


Yus Papí: Shuarjái
Yus Yamaram Chicham
Najanamu



New Testament in Shuar (EC:jiv:Shuar)

Yus Papí: Shuarjaj Yus Yamaram Chicham Najanamu New Testament in Shuar (EC:jiv:Shuar)

copyright © 2012 Wycliffe Bible Translators, Inc.

Language: Shuar

Translation by: Wycliffe Bible Translators, Inc.

Shuar [jiv], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Shuar

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022
fb10d1f0-e2d5-5d8e-8a74-10846708c857

Contents

MATEU	1
MĀRKUS	53
RŪKAS	86
JUAŅ	142
TŪRAMU	181
RŪMANAM	235
1 KURINTIUNAM	256
2 KURINTIUNAM	277
KARASEANAM	291
IPISIUNAM	300
JIRIPIUSNUM	307
KURUSEŅAM	312
1 TĪSARŪNIKIANAM	317
2 TĪSARŪNIKIANAM	322
1 TIMIUTĒUN	325
2 TIMIUTĒUN	331
TITIUN	335
JIRIMIŪŅKAN	338
ISRAERNUM	340
SĀŅTIAK	356
1 PĪTIUR	362
2 PĪTIUR	369
1 JUAŅ	373
2 JUAŅ	379
3 JUAŅ	380
JŪTAS	381
APUKARĪPSIS	383

Yúsan Shiir Chichamen MATEU aarmia nu

Jesukrístu weatrí (Rúkas 3.23-38)

¹ Jesukrístu weatrí ju ániawai. Tura ashí nankaamas ti uunt weat Tawitcha Apraámsha ániawai. ² Apraáma uchirí Isak. Tura Isaka uchirí Jakup. Jakupa uchirísha Jutá ni yachijíjái. ³ Tura Jutá uchirín Páresan tura Sarancha Tamar jurermiayi. Páresa uchirísha Esrum, nuna uchirísha Aram. ⁴ Nuna uchirísha Aminiatáp. Nuna uchirísha Nasun. Nuna uchirísha Sarmun. ⁵ Sarmunka uchiríncha Púusan Raap jurermiayi. Puusa uchirín Uwitian Ruut jurermiayi. Uwitia uchirísha Isaí. ⁶ Nuna uchirísha uunt akupin Tawit. Uunt akupin Tawitia uchiríncha Sarumúnkan Patsepa jurermiayi. Patsepasha emka Uríasa nuweeyayi.

⁷ Sarumúnka uchirí Rupuam. Nuna uchirísha Apías. Nuna uchirísha Asa. ⁸ Asa uchirísha Jusapát. Nuna uchirísha Juram. Nuna uchirí Usías. ⁹ Usíasa uchirí Jutam. Nuna uchirí Akas. Nuna uchirí Esekías. ¹⁰ Esekíasa uchirí Manasés. Nuna uchirí Amun. Nuna uchirí Jusías. ¹¹ Jusíasa uchirí Jekunías ni yachí armia nujái. Nuí Papirúnianmayá shuar Israer shuaran mesetjai nupetkar Papirúnia nunkanam achirar júkiarmiayi.

¹² Nu ukunmanka Jekuníasa uchirí Saratiár akiiniamiayi. Tura nuna uchirí Surupapír. ¹³ Surupapíra uchirí Awiut. Nuna uchirí Iriakím. Nuna uchirí Asur. ¹⁴ Asura uchirí Satuk. Nuna uchirí Akim. Nuna uchirí Eriut. ¹⁵ Eriuta uchirí Ereasár. Nuna uchirí Matan. Nuna uchirí Jakup. ¹⁶ Jakupa uchirí Jusé Marí áishriya nu. Marisha Jesusan jurermiayi. Nu Jesuska shuáran uwentikiartin asa Kristu tu anaikiamuiti.

¹⁷ Tuma asamtai Apraámnumia Tawitnium Jesusa weatrí katurse (14) ániawai. Tawitniumíasha Papirúnianam jukimionma nuísha katurse weat ániawai. Papirúnianam jukimionmayasha Krístunam ataksha katurse ániawai.

Jesukrístu akiiniamu (Rúkas 2.1-7)

¹⁸ Jesukrístu akiiniamu júnis ámiayi. Ni nukurí Marí Jusejai anajmanairuyayi. Tura tsaniatsain Yusa Wakaní ajaprumtkiamiayi. ¹⁹ Ajaprukmetaisha Jusé Marin iniatsaatsuk nin ajapatnium enentáimpramiayi. Tura ti pénger asa aya iniaiatnium wakerimiayi aents nekainiatsain. ²⁰ Nuna tu enentáimia pujái, mesekranam Yusa suntari tari chicharuk tímiayi “Juséa, ame weatrum Tawitachakait. Tuma asam Maríjijái nuatnaikiatin ashamkaip. Uchin jurertatna nuka Yusa Wakaníniuiti. ²¹ Uchin áishmankan takustatui tura nuna naari *JESUS* anaikiattame. Ashí ni shuárin ni tunaariya uwentikkiartin asa Jesus anaikiatniuiti” tímiayi.

²² Yus ni etserniurijijái yaunchu timia nu uminkiatu tusa nu túrunamiayi. Juna áamtikramiayi:

²³ “Nuwa natsa ajapruktatui tura uchin takustatui. Nuna náarísha Emanuér anainiaktatui.” Tu áarmaiti.

Emanuérsha nu chichamnum “Yus iijjái pujuwiti” tawai.

²⁴ Jusesha mesekranmaya shintiar Yusa suntari timia nú núnisan Marin nu-atkamiayi. ²⁵ Tura uchin júreatsain tsaninchamiayi. Tura jurermatai uchin Jesus anaikiamiayi.

2

Ti neka apach Jesusan eqakarmiania nu

¹ Jutía nunkanam Pirin pépru ana nuñ Jesus akiiniamiayi. Nuñsha nú nunka akupniurj Irutisauyayi. Akiiniamtai ti neka apach nantu tátainmaaniya Jerusaréñ péprunam táarmiayi. ² Taar inintruiniak “¿Israer shuara úunt akupniurj tuñ akiiniait? tiarmiayi. Nantu tátainmaani pujaati ni yaari wáinkiamji. Tura tikishmatratatai tusar winiaji” tiarmiayi.

³ Irutis nuna antuk nusháa enentáimpramiayi. Tuma asamtai ashí Jerusaréñnumiá shuarsha antukar nusháa enentáimprarmiayi. ⁴ Irutis nuikia ashí Israer-patri uuntrincha tura yaunchu akupkamun jintinniuncha untsukarmiayi. Tura Kristu akiiniatniurin inintrusmiayi. ⁵ Tutai chichainiak “Jutía nunkanam Pirin pépru ana nuñ akiiniatniuiti, tiarmiayi. Yaunchu Yúsnan etserin tu áaruiti:

⁶ “Jutía nunkanam, Pirin pépru, ishitiápchich ana nuyá nekas uunt akupin winittiwai. Nii ashí Israer shuaran, Wíi shuar áarmatai, péñker wáinkiatwawai,” tawai Yus.” Tu tiarmiayi.

⁷ Nuna tuñiakui Irutis ti neka apachin úusan, urutía yaa emka wáinkiamarum tusa aniasarmiayi. ⁸ Nuyá Pirinnum akupeak “Nuñ werum uchi péñker inintrusum wáinkiatarum. Tura wáinkiarum ujatkatatum. Wisha werin tikishmátuutaj” tímiayi.

⁹⁻¹⁰ Tutai ti neka apach wearmiayi. Tura yaa, yajaya wáinkiarmania nu, tuke eem wémiayi. Tura yaan wáinkiar ti wararsarmiayi. Tura nú yaa uchi pujumia nuñ ejeniarmiayi. ¹¹ Jeá wayawar uchincha ni nukurj Marijjai wáinkiarmaniayi. Tura uchin tikishmatrarmiayi. Nuyá ni kajuntriyan kurincha, mirá kunkuinniasha, chíkich kunkuinniasha súarmiayi. ¹² Nuyá mesekranam Yus “Irutisaini weerap” tutai chíkich jintianam waketkiarmiayi.

Ejiptunam pisaamu

¹³ Ti neka apach waketrantai Yusa suntari mesekranam Jusen ujakmiayi. “Nantakim uchi ni nukurjiai Ejiptu nunkanam jukim nuñ pujustá. Irutis uchin máataj tusa eqatatui. Tura ukunam ankant ajasmatai ujaktajme” timiayi.

¹⁴ Tutai Jusé kurat shintiar nú káshik uchincha nukurjiai Ejiptunam jukimiayi. ¹⁵ Irutis jáatsain nuñ pujusarmiayi. Ejiptunam pujusmatai Yus yaunchu timia nu uminkiamiayi. Iis, Yúsnan etserin aak tímiayi: “Ejiptunmayan winia Uchirun untsukmajai.” Tu áarmiayi.

Irutis uchin máawarat tusa akupkamu

¹⁶ Irutissha ti neka apach nin ananka yajá waketrans nekáa ti kajekmiayi. Ti kajek ashí áishmanchin Pirinnumsha tura yantamach pujuarmia nunasha maawaarat tusa akupkamiayi. Ti neka apach ujakmia nuna enentáimias ashí jimiará uwin takakun tura nú uchichin máawarat tusa akupkamiayi. ¹⁷ Nuka Yusnan etserin Jeremías aarmia nu uminkiamiayi. Juna áarmiayi:

18 “Ramá nunġanam ti úutainiak uur ajainiawai. Raker ti uutu asa at-saŋkrachminiaiti ni uchirí jákarmatai.” Tu áarmiaiyi.

19 Tura Irutis jakamtaí Yusa suntariġ mesekranam Jusen ujakmiyai.

20 “Uchin máataj tiarmia nuka jákarai. Yamaikia ataksha uchi ni nukuríjjaiġ jukim Israer nunġanam waketkitia” tímiyai. 21 Tutai Jusé nantaki uchinchá nukuríjjaiġ jukin Ejiptunmaya Israer nunġanam waketkimiyai. 22 Túrasha Irutisa uchirí Arkiráu Jutía nunġanam uunt akupin ajasun nekáa nuí wétinian aránkámiyai. Mesekranmasha ujakma asa nuí pujutsuk Kariréa nunġanam wémiyai. 23 Nuí jeá Nasaréť péprunam pujusmiyai. “Nasarétnumia átatui” Yusnan etserin yaunchu tu etserkamú nujai uminkiamiyai.

3

Imiakratin Juan atsamunam etserkamiania nu (Márkus 1.1-8; Rúkas 3.1-9, 15-17; Juan 1.19-28)

1 Nuyá imiakratin Juan Jutía nunġanam aents atsamunam etserki támiyai.

2 “Enentáim yapajjatarum. Tsawant ishichik ajasai Yus juí akupin ajastin.” Tu etserkamiyai.

3 Nú Juanġan yaunchu Yúsnan etserin Isayas juna áarmiaiyi:

“Shuar atsamunam aents unsumuí. Unsumuk “Atumí enentái Uunta jinti iwiarturtarum tura naka awajsatarum” tawai.” Tu áarmiaiyi.

4 Nu Juanġsha kamiyu ure najantramun entsauyai. Emenmamkesha nuapeyai. Tura yutai-titikriátsnasha chinijjai yúuyai. 5 Tura Jerusaréň péprunmaya shuarsha tura ashí Jutía nunġanmaya shuarsha Jurtaň entsanam matsamiarmia nú shuarsha mash Juáŋkan tariarmiayi ni chichamen anturkatai tusar. 6 Tura ni tunaarġin paant etserkarmatai Juan Jurtan entsanam imiainiarmiayi.

7 Juanġsha Pariséuncha Satuséuncha imiatti tusa wininian wáiniak tímiyai “Napia áaniutirmincha, ¿ya atumniaasha ti asutniátniummaya uwempratniuncha ujatmakmarum? tímiyai. Asutiátin tsawant ishichik ajasai. 8 Tuma asamtaí enentáim yapajjámuitkiuŋkia péŋker wekaamurmíjjai paant iniakmatarum. 9 Atumsha “Íikia Apraám weeitji” tu enentáimtumasairap. Nujai uwemprashatrumé. Yus wakerakka ju kayan Apraáman tiranġi najankainti, tímiyai. 10 Numi ajaktinia ántsasŋ kampuwarġin jacha atuttsamuiti. Tura numi péŋker nereatsna nuka tsupikia jinium apeamu ártatui. 11 Wikia aya entsajaiġ iniajrumé atumi enentái yapajjáwakrumin. Antsu winia ukuruġ winiana nuka péŋker awajtamsataj tusa imiantinia áanis tura jáa áanis Yusa Wakanin eŋketramprattarme. Wijjai nanġkaamantu asamtaí wikia tsunsumpruan ni sapatrġnkisha atitrachminiaitjai. 12 Aruusa nerejai túruinia ántsasŋ átatui. Awajtiutairġin achikiuiti tura nujai saepen awajtitiawai. Tura nerġen péŋker ikiustatui, antsu saepenka jinium apeat-tawai. Nu jisha tuke kajinchaiti.” Tu tímiyai Juan.

Juan Jesusan imiaimiu amia nu (Márkus 1.9-11; Rúkas 3.21-22)

13 Nuyá Jesus Kariréa nunġanmaya winis Jurtan entsanam támiyai Juan imiatti tusa. 14 Juanġsha emka nakitiak Jesusan tímiyai “Ame winia imiatmini-aitme. Túrutamniaiatmesha ¿urukamtaí winia tarutnium?” tímiyai.

15 Tura Jesus tímiyai “Ántsasŋ asati yamaikia. Núnisrik ashí Yus akupkamu umirkatniuitji.” Tutai Juan iniaisamiyai. 16 Tura Jesus imiani entsaya

jiinkímtai nayaimpⁱ uranmiayi. Tura Yusa Wakaní yámpitsa áintsan Jesusan tarimiayi. Niisha wáinkíamiayi. ¹⁷ Túramtai nayaimpinmaya Yus chichaak “Juka winia Uchiruiti. Ti aneamuiti. Ti shiir enentáimtaji” tímiayi.

4

Unt iwianch Jesusan anankataj tímiania nu (Márkus 1.12-13; Rúkas 4.1-13)

¹ Nu túrunamtai Yusa Wakaní Jesusan iwianchjai nekapmamtiksatts aents atsamunam jukimiayi. ² Nuí kuarenta (40) tsawant, káshisha tsawaisha yurumsuk pujak tsukarmiayi. ³ Nuí uunt iwianch Jesusan nekapsataj tusa tarí tímiayi “Nekas Yusa Uchirinkiumka ju kaya apatuk najanata.”

⁴ Tutai Jesus tímiayi “Yus-Papinium áarmaiti: “Aents aya apatkujain iwiaku pujuschamniati. Antsu Yus táman enentáimtuiniak nekas iwiaku pujusartatui” tawai” tímiayi.

⁵ Tutai uunt iwianch Jerusaréñ péprunam jukí Yusa Uunt Jee cháikín iwiak ⁶ tímiayi “Nekas Yusa Uchirinkiumka juya akaikim iniaata. Kame Yus-Papinium áarmaiti:

“Yus ni suntarín akatar akúptúrmaktatui. Nawemin kayanam ajiintsurnin wenkurmaktatui” tawai” tímiayi.

⁷ Tutai Jesus tímiayi “Núnisan Yus-Papinium áarmaiti: “Ame Úuntrum Yus “Nekapsataj” tiip” tawai” tímiayi.

⁸ Ataksha uunt iwianch naint yakí wájakmanum iwiakmiayi tura nuyá ashí nunkanmaya péprun shiira nuna iniaktusmiayi. ⁹ Tura tímiayi “Winia tikishmatrurakminkia juna mash amastatjai.”

¹⁰ Tutai Jesus tímiayi “Werumta, uunt iwianchi. Yus-Papinium aarma awai: “Ame Úuntrum Yúsak tikishmatrata tura Nínki shiir awajsata” tawai” tímiayi.

¹¹ Tutai uunt iwianch Jesusan ikuak wémiayi. Túramtai Yusa suntarí tariar atsumamurín súsarimiayi.

Jesus Kariréa nunkanam etserkamiania nu (Márkus 1.14-15; Rúkas 4.14-15)

¹² Juan sepunam enketui taman antuk Jesus Kariréa nunkanam wémiayi.

¹³ Tura Nasaréñ péprunam pujutsuk Kapernáum péprunam we pujusmiayi. Kapernáumsha Kariréa antumianka kánmatkarin pujumiayi. Ti yaunchusha Jakupu uchirí Sapurúnsha tura Niptarísha nu nunkanak nuí pujustaitisar achikiaruyayi. ¹⁴ Jesus nuna túramtai yaunchu Yúsnan etserin Isayas aarmia nu uminkiamiayi. Juna áarmiayi:

¹⁵ “Sapurúnsha Niptarísha nayaantsanam tíjuuch Jurtañ entsa amainini nunkan achikiarmiayi. Nuka Kariréaiti Israer-shuarcha matsatainia nuí. ¹⁶ Nu aents kiritniunam pujuiniayatan ti tsáapninan wáinkiarimiayi. Jákatniunam pujuiniaj tsáapin tsáapnirmiayi.” Tu áarmaiti.

¹⁷ Nuyá Jesus étseruk tímiayi “Tunaarum enentáimturum enentáim yajáitarum. Ju nunkanam Yus akupkatin tsawant ishichik ajasai.”

Jesus kuaru aents namakan achinian ni unuinamurí ajasarat tusa achikiania nu

(Márkus 1.16-20; Rúkas 5.1-11)

¹⁸ Jesus Kariréa antumianka kánmatkarin wesa jimiará áentsun nuámtak yáchinun wáinkíamiayi. Chikichik Antresauyayi, chikichcha Semunkauyayi. Nu Semun núnisan Pitru náartiniuyayi. Namakan achin ásar namakan nekajai

nan̄kiak yujaarmiayi. ¹⁹ Nuna Jesus wáinkiar tiarmiayi “Nemartustarum. Túrakrumin shuarsha Yusna arti tusan yamáí namak achíarmena núnisan̄ shuaran-ə̄əu awajsatjarme.” ²⁰ Tutai ni nekarin̄ ikiukiar Nin nemariarmiayi.

²¹ Nuyá ishichik wésan̄ ataksha nuámtak yachinniun wáinkíamiayi. Jakupu Juan̄jaj̄ mai Sepetéu uchirj̄ ármiai. Niisha kanunam en̄kemsar ni nekarin̄ ni aparj̄jaj̄ iwiarainiak pujuriarmiayi. Tura Jesus “Nemartusta” tutai ²² nu chichamaik kanuncha tura aparin̄cha ikiukiar Jesusan nemariarmiayi.

Jesus untsurj̄ shuaran jintintiamiania nu

(Rúkas 6.17-19)

²³ Ashí Kariréa nun̄kanam Jesus Israer-shuar iruntainiam etserki wémiayi. Yus jū nun̄kanam akupkatin chichaman etserkamiayi. Tura untsurj̄ sun̄kurjaj̄ jáinian ashí tsuármiai. ²⁴ Ashí Siria nun̄kanam Jesus tsuákratman nekaawar ashí nan̄kamas sun̄kurjaj̄ wáitin armia nuna Jesusan suarti tusa itiararmiayi. Ashí jaancha, najaimiancha, yajauch wakantrukuncha, wáuruncha, tampemaruncha Jesus tsuármiai. ²⁵ Tura untsurj̄ shuar Jesusan nemariarmiayi. Kariréa nun̄kanmayasha, Tekapurisnumiasha, Jerusarén̄ péprunmayasha, Jutía nun̄kanmayasha, Jurtan̄ entsa amainiyasha Jesusan nemariarmiayi.

5

Náinnium Jesus etserkamu

¹ Jesus untsurj̄ shuar káunkarun wáiniak náinnium waka nuj̄ pujusmiayi. Tura ni unuiniamurj̄sha taar pujusarmiayi. ² Nuyá Jesus j̄n̄is unuiniamiayi.

Warastin ainia nu

(Rúkas 6.20-23)

³ “Ame wakanim atsumamu nekamarum kakaram ajasrum warastarum. Tuma asarum Yus akupeamunam pachiinniuitrume. ⁴ Kúntuts pujarum nu warastarum. Yus atsan̄tamprattarme. ⁵ Péejchach enentáimtumarmena nu warastarum. Yus ashí nun̄kan amastatrume. ⁶ Eeser wekasataj tusa aya ki-tiamarum nu warastarum. Yus imiktamprattarme. ⁷ Waitnen̄kratniutiram warastarum. Yus waitnentramprrattarme. ⁸ Péñker enentáimniutiram warastarum. Yus wáinkíattarme. ⁹ Chicham iwiarin̄ árum nu warastarum. Yusa uchirj̄ turamartatui. ¹⁰ Péñker túrakrumin yajauch awajtamainiakui warastarum. Yus akupeamunam pachiinniuitrume. ¹¹ Wíi shuar asakrumin kat-sekramainiakui sha, itit awajtamainiakui sha, tura ashí tsanumprutmainiakui sha warastarum. ¹² Núnisan̄ yaunchu Yúsnan̄ etserin armia nunasha túrawarmiayi. Túramtai shiir enentáimkiuram warastarum. Nayaimpiniam ti péñker akinkíattarme’ tímiayi.

Ju nun̄kanam átum tsápninia áintsarum tura weeya áintsarum árum

(Márkus 9.50; Rúkas 14.34-35)

¹³ ‘Átumka jū nun̄kanam wee ana áintsan̄ketrume. Tura wééaitiat jeakchaitkiun̄ka míchuiti. ¿Nusha itiar yuámniak ati? Antsu ántraiti. Tuma asamtai ə̄ə najatai tepet tusar ajapashtinkíait’ tímiayi.

¹⁴ ‘Átumka jū nun̄kanam shiripkia áintsan̄ketrume. Náinniumka pepru úumkachminiaiti. ¹⁵ Núnisan̄ shiripik ekeemakam kajun̄num en̄keatsme. Antsu yakí sukúatsmek ashí jeanam ana nu paant atí tusam. ¹⁶ Núnisan̄

atumsha Yusjaj péñker túramu paant atí. Tura ashí aents nuna iisar niisha Yus Apan shiir awajsartatui' tímiayi.

Yaunchu akupkamun pachis Jesus unuiniamiania nu

¹⁷ 'Muisais akupkamuncha tura yaunchu Yúsñan etserin etserkarmia nuna ántar awajsattawai" turutiirap. Antsu nuna Wikia umiktaj tusan táwitjai. ¹⁸ Nekasan tájarme. Ashí túrunatniua nu amúatsajñ nu akupkamu ishichkisha yapajniáshtatui. Nayaimpisha tura nunčkasha tuke amúatsajñ nu akupkamusha amuukashtatui. ¹⁹ Nu asamtai shuar chikichik akupkamun, yúpichuch ana nunaksha, umirchakka tura chíkich shuaran umirkashinian unuiniačka Yus nekas akupin paant ajastatna nuñ nú shuar uunt áchattawai. Antsu ashí shuar akupkamun umíana nu tura chíkich shuaran umirkatniun unuiniana nusha Yus nekas akupin paant ajastatna nuñ, nu shuarka uunt átatui. ²⁰ Tuma asamtai Yus akupeamunam pachiinkiataj tákumka Pariséujaj nančkamas tura akupkamu jintinniuajaj nančkamas esera wekasatniuitrume' tímiayi.

Kajeamun pachis Jesus unuiniamiania nu

(Rúkas 12.57-59)

²¹ 'Yaunchu tiniu armia nu ántichukaitrum: "Mañkartuawairap. Mañkartana nuka asutniátniuiti" tiniu ármiayi. ²² Tura Wisha tájarme: Shuar ni yachñ aya kajerakka nusha asutniátniuiti. Ni yachñ kátsekea nuka akupniunam junaktiniaiti. Tura ni yachñ "netsé" tákuńka jinium akupnakminiaiti.'

²³ 'Tuma asamtai Yus susataj tusam wakerakum tura ame yatsum ámin itit enentáimturman enentáimpramka, ²⁴ suamu nuñ ikiuakum emka ame yatsum werim niijijaj iwiarata. Turam waketkim Yus suam nu susata.'

²⁵ 'Shuar úntnum júramkuńkia jintiañ wesam niijijaj iwiarata úntnum ejetamsajñ. Túrachakminkia úntnum surutmaktatui tura niisha suntarnum surutmaktatui tura sepunam enketmattawai. ²⁶ Tura nekas tajai, nuñ enķemamka ashí rearchisha akimachkumka jįinkishtatme' tímiayi.

Tsanirmatniun pachis Jesus unuiniamiania nu

²⁷ 'Yaunchu tiniu armia nu ántichukaitrum: "Tsanirmawaip." ²⁸ Tura Wisha tájarme: Shuar nuwan tsanirmataj tu iiska nuńkia ni enentáin tsanirmayi.'

²⁹ 'Tuma asamtai ame jįimi tunaanum yajauch awajtamkuńkia ukuńkiam yajá ajapata. Ashí ame ayashim jinium esaatsajñ aya chikichik ayashmi muchitmarj emesratin péñkeraiti. ³⁰ Ame ewejmesha untsuurmetiat tunaanum ajunmakuńkia tsupikiam yajá ajapata. Ashí ame ayashim jinium esaatsajñ aya chikichik ayashmi muchitmarj emesratin péñkeraiti.'

Nuwą ajapatniun pachis Jesus unuiniamiania nu

(Mateu 19.9; Márkus 10.11-12; Rúkas 16.18)

³¹ 'Núnisan yaunchu tiniu ármiayi: "Shuar ni nuarñ ajapatniun wakera nuka papí najana susati." ³² Tura Wisha tájarme: Shuar ni nuarñ tsanirmachun ájapeakka nuwan tsanirmamtikiaiti. Tura ajapamujaj nuatnaiyakka nuka tsanirmaiti.'

Jesus aya nekasa nu titinian unuiniamiania nu

³³ 'Núnisan yaunchu tiniu ármiayi: "Yusa naarj pachisan turattajaj" tákumka nekas takamtsuk umiktiniaitme." ³⁴⁻³⁷ Tura Wisha tájarme: Áyatik "Ee"

tákumka tura “Atsá” tákumka wáitrusuk nuke titiá. Támena nu nekas umiktaj takum ame nú arant pachistiniaitkiumka nuka yajauchiiti, iwianchnumiáti. Ti nekas tajai tusam nayaim pachischatniuitme. Nuka Uunt Yus pujutainti. Nun̄kasha pachischatniuiti Yusa tarimtaiṛi asamtai. Jerusaren péprusha pachischatniuiti Uunt Akupin pujutai nuṛi asamtai. Múukmesha pachischatniuitme. Chikichik intiashkesha pújusha mukusasha awajsachminiaitme. Áyatik nekasa nu páchitsuk titiá.’

Ikkiatniun pachis Jesus unuiniamiania nu
(Rúkas 6.29-30)

³⁸ ‘Yaunchu tiniu armia nu ántichukaitrum: “Shuar máanikiar jii apujtukka niisha apujtuktiniaiti. Tura naj̄ akarkasha ni naj̄isha akarkatniuiti.” ³⁹ Tura Wisha tájarme: Yajauch shuar taritirairap. Antsu ame yapimin ijiutmamtai áatú yapimsha tsan̄katkata. ⁴⁰ Tura pushirmin jurutramkitiaj tákuisha sakurmesha susata. ⁴¹ Tura káarkancha chikichik kirumitruk jurutkitia túramkui ámeka jimiará kirumitru ejeeta. ⁴² Seatmana nu susata. Ikiatmakuisha páchitsuk ikiasta.’

Nemasrj aneetniun Jesus unuiniamiania nu
(Rúkas 6.27-28, 32-36)

⁴³ ‘Núnisan̄ tiniu armia nu ántichukaitrum: “Ame shuarum aneeta tura nemasrumka kajerkata.” ⁴⁴ Tura Wisha tájarme: Nemasrum aneetarum. Yajauch chichartamna nusha shiir awajsata. Nakitramana nusha nawamkata. Tura katsekramainiana nu tura yajauch awajtamainiana nusha Yus áujtusarta. ⁴⁵ Atumsha nu túrakrum atumí Aparj̄ nayaimpiniam pujana nu túrana áitkiasrumek túarme. Iista, Yus yajauch shuarnumsha péñker shuarnumsha tsáapin awajmatkiatsuk. Núnisan̄ yumincha yajauch shuar pujuiniamunmasha péñker shuar pujuiniamunmasha yútumtiktsuk. ⁴⁶ Aya atumin anenmainia nuke aneakmesha çyaki akirmakat? Yajauch shuarsha nuna túrin ániawai. ⁴⁷ Aya ame yatumek shiir chichaakmeka çwarí péñkerak túram? Yus-shuarchasha nuna túrin ániawai. ⁴⁸ Nu asamtai atumí Aparj̄ Yus nayaimpiniam pujana nujaṛi métek ti péñker átiniaitrume.’

6

Péñker túratniun Jesus unuiniamiania nu

¹ ‘Ashí ímiainiaṛin̄ aya shuar iirsarti tusarum Yusna nu takasairap. Tu takaakrumniñkia Yus Apa nayaimpiniam pujana nu pen̄ké akirmakchatarme. ² Nu asamtai shuar atsuma nu yaiyaṛkmeke ashí shuar ujakairap. Anan̄kartin ainia nuka iruntainmasha tura pepru jintí wekasasha ashí ímiainiaṛin̄ shiir túrajai tusar nuna túrin ániawai. Júnasha “péñker túrawai” tu enentáimturarti tiniu ásar Yus akíatsaṛin̄ aya tu enentáimturmajaiṛin̄ akinkiaruiti, nekas tajai. ³ Antsu átumka atsumainia nu yaiyaṛkmeke pen̄ké úṛkam túrata. Chikichkisha nu yaṛin̄man nekaashti. ⁴ Úṛkam túrakminkia ame Apa Yus úṛkam wainia nu, nuna akirmaktatui.’

Yus áujsatniun Jesus unuiniamiania nu
(Rúkas 11.2-4)

⁵ ‘Atumsha Yus áujeakrumsha ántar chichamtin ainia núnis áujsaṛap. Nu shuarka iruntainmasha tura pepru jintísha shuar iirsarti tusa wajakiar Yúsan áujin ániawai. Nekasan tájarme, Yus akíatsaṛin̄ aya nu iismajaiṛin̄ akinkiaruiti. ⁶ Tura ame Yus áujeakmeke ame kuárturmin wayam waiti

epenim nuĵi amek ame Apa Yus áujsata. Nuna ame Apa Yus uĵka túramu waitma asa akirmaktatui.'

⁷ 'Yus áujeakmesha ántram esaram áujsaip. Yúsan nékainiatsna nuka "Esaram áujeakuinkia Yus anturtuktatui" tu enentáimainiawai. ⁸ Niiĵĵai métek ajasairap. Átumka seatsrumniĵ Yus Apa átum atsumamun nékawai. ⁹ Nu asamtai Yus áujkuram ĵúnis títiniaitrume:

'Aparu Yus, nayaimpiniam pujamna nu, ii Aparínme. Ame náarmincha shuar ántar pachischarti. ¹⁰ Ashí áentsnum ame akupkatin tsawantrum wari jeati. Ame wakeramuram nayaimpiniam umikma ana núnisanĵ ĵu nunĵkanmasha uminkiatí. ¹¹ Aparu, ii yurumkarĵ ashí tsawant amasta. ¹² Tura winia nemasrun tsanĵkurajna núnismek, Aparu, winia tunaaru tumashrisha tsanĵkurturta. ¹³ Tunáa wakeruktin tsanĵkatrukaip. Antsu ashí tunaanumiá uwemtikurta. Tuke ashí aents akupkamniaitme. Núnisam Amesha tuke ti kakarmaitme. Tura ti shíraitme. Tuma asakmin seajme. Nuke atí.'

¹⁴ 'Amesha chíkich shuar yajauch awajtamka nu tsanĵkureakminkia Yus Apa nayaimpiniam pujana nu amincha tsanĵkurtamprattawai. ¹⁵ Tura chíkich tsanĵkureachkumniĵkia Yus Apasha ame tunaarmincha tsanĵkurtamprashatui.'

Jĵiarmatniun pachis Jesus unuiniamiania nu

¹⁶ 'Jĵiarmarum Yus áujkurmasha wake mesekrum susuntrairap. Anaĵkartin shuar chíkich shuar "ĵiarmaiti" tu enentáimtursarti tusa tuma áiniawai. Nekasan tájame, Yúska akiátsaiĵ aya nujai akikma áiniawai. ¹⁷ Antsu ámeka ĵiarmamsha péĵker temashmaram péĵker jaupmitia. ¹⁸ Shuar ĵiarmaiti tu enentáimturmasaraiĵ. Aya Yus Apak nekaattawai. Tura asa akirmaktatui.'

Kuítian pachis Jesus unuiniamiania nu

(Rúkas 12.33-34)

¹⁹⁻²⁰ 'Ĵu nunĵkanmaya kuit ikiaunĵkatniujai nanĵkaamas nayaimpiniam kuit ikiaunĵkata. Juĵĵkia kayaa yúchakait tura mash meseatsuk. Tura kasasha wayá kasamtsuk. Antsu nayaimpinmanĵka kayaaasha yuatsui tura mash meseatsui tura kasasha wayá kasamtsui. ²¹ Kuítium ana nuĵ enentáimtustatme. Tuma asam nayaimpiniam ikiaunĵkata.'

Ayashí tsáapnintrí

(Rúkas 11.34-36)

²² 'Ame ĵimiĵĵai tsáapin amiĵin wayamniaiti. Tuma asamtai ame ĵimi péĵkeraitkiuĵkia amiĵin tsáapin wayá tuke tsáapniiti. ²³ Antsu ame ĵimi yaĵauchitkiuĵkia tsáapin amiĵin wayaĵhmin asamtai tuke kiritin átatui. Núnisanĵ yajauchia nu wakerakmeka péĵkera nu ame enentáimiĵin wayaĵhmin asamtai tuke kiriti ajastatui. Nu kiriticha imiá yajauchiti.'

Yussha kuitsha máimtek enentáimtuschaniaiti

(Rúkas 16.13)

²⁴ 'Shuar ĵimiará úuntriĵ umirkatniun tujintiawai. Chikichan wakerak chikichnaka nakitrattawai. Chikichan umiruk chikichnaka umirkashtatui. Núnisanĵ átumka Yussha kuitcha máimtek enentáimtustin tujinkiattarme.'

Yus ni uchirín péĵker wáinkiaiti

(Rúkas 12.22-31)

²⁵ 'Tuma asamtai tájarme: Wariniak yuataĵ wariniak umartaj tura wariniak entsartaj tusarum nuke enentáimsairap. Yus iwiaaku átinian

amasu asa yurumkancha amaschamniakait. Tura ju ayashniasha najana asa entsataincha amaschamniakait. ²⁶ Chinkisha enentáimpratarum. Yaki nanamainiak yurumkan arakmainiatsui. Tura juuk yurumkan ikiuiniatsui. Tuma aiñ Yus Apa nayaimpiniam pujana nú Yusak áyureatsuk. Atumsha chinkia nú nankaamaschakaitrum. ²⁷ Nu arantcha ti enentáimkiumsha ¿nujai tsakartatmek?

²⁸ Nuikia ¿urukamtai entsartincha timiá enentáimprum? Iistá, kukujsa takachuitiat tura najanchaitiat ²⁹ ti shíirmach áiniawai. Yaunchu uunt akupin Sarumún ti shiir iwiarmamniuitiat kukuja timianchayayi. ³⁰ Iis, nupa yamá tsakaawai tura kashin aents tsupikiar jinium epeenawai. Tuma aiñ Yus ti shiir áentseatsuk. Nuna tura asa atumniasha nú péñker waitmakchattawak. ¿Urukamtai Yus nekas enentáimtatsrum? ³¹⁻³² Ju nuñkanam ana nu pachiki-airap. Chíkich shuar, Yúsán nékainiatsna nu, warin yuattajⁱ warin umartatajⁱ warin entsartatajⁱ nuna ti pachiiniawai. Tura atumsha tu enentáimsarum weerap. Ame Apa nayaimpiniam pujana nu ame atsumamurmin nékawai. ³³ Tuma asamtai Yusjai shiir wekasatin tura Yus akupkamu ana nu umiktin emka enentáimsatarum. Túrakrumniñkia atsumamurmin Yus suramsattawai. ³⁴ Kashin átatna nujai itiuurchat enentáimsairap. Kashinkia nusháa itiuurcharrijai tsawarchattawak. Yamái tsawanta jujai máakchakait.'

7

Chíkich sumamtikiawairap

(Rúkas 6.37-38, 41-42)

¹ 'Chíkicha tunaari ti enentáimtusairap. Núnisan Yus atumí tunaari iirtam-sashtatui. ² Chíkich wárik sumamtikiatin enentáimkiumniñkia Yus núnisan sumantikramattawai. Tura ame chíkicha túramuri nekapmarmena nú nekapkajain amincha nekapmarmattawai. ³ Tuma asamtai ¿itiurtsuk atumi jin numi enketna auk ítskeshá atumi yachí jin tsuat enketusha iyarum? ⁴ Ame jimiin numi tuke enketajisha ¿itiurtsuk ame yatsumi jiyá tsuátan jurustajme tame? ⁵ Antar shuará, ame yáintaj tákumka emka ame jimiin numi enketna nu jusata. Nuyá paant iistatme yatsumi jin tsuat enketna nu jurustin.'

⁶ 'Ti shiira nuka yawá súsashtiniaiti. Nuna nakitrar amincha esat-michartimpiash. Kuítrumsha kuchi súsashtiniaiti. Aya najatrachartatuak.'

Yus seakmin suramsattawai

(Rúkas 11.9-13; 6.31)

⁷ 'Yus seakmin suramsattawai. Eakrumka wainkiattarme. "Winiajai" tákurmin awáintiamattarme. ⁸ Seana núnaka suíniawai. Eana nuka wáiniui. "Winiajai" tuinia núnaka awáiniawai.'

⁹ 'Ame uchiram apatkun seatmakui ¿kayaash súsaintiam? ¹⁰ Tura namakan seatmakui ¿napíash súsaintiam? ¹¹ Nuikia átum yajauchitirmesha atumi uchirí péñker ana nu tuke súchakaitrum. Nuna nankaamas nuikia seakrumniñkia atumi Aparí nayaimpiniam pujana nu péñker ana nuna suramsashtatuak.'

¹² 'Júnaka Muisaikkha Yúsnan etserniusha akupenawai: "Chíkich ámin túrutatí tusa wakerakmekka amesha núnismek túratá." Tu akupenawai.'

Wankaram jintiasha tura yupikiach jintiasha

(Rúkas 13.24)

¹³⁻¹⁴ 'Wankaram jintia awai. Wayatniusha yúpichuchiiti. Nujsa untsurí wáiniawai. Tura nusha menkakatniunam jeawai. Túrasha chíkich jintia awai.'

Nusha yupikiach asa itiurchataiti. Wayatniurisha yupikchiiti. Nuj ishichik wáiniawai. Tura nusha iwiaaku pujustinnium jeawai. Tuma asamtai tuke iwiaaku pujustaj tákurmeka yupipitin jintia achiktarum.'

Nerejai numi nekaatainti

(Rúkas 6.43-44)

¹⁵ 'Aneartarum. Wáitruiniak "Wi Yúsnan étserjai" tuinia nu írnuui. Pátatek murikiua áinis yúpichuch áiniawai tura ni enentáin nekas úunt-yawá áinis áiniawai. Pátatek shiir chichainiawai tura ni enentáin yajauch piakuiti. ¹⁶ Atumsha túramujai nin nekaatniuitrume. Naranmaya shuiya júukchamniaiti. ¿Tsachiksha kushin'kiapen nerektatuak? ¹⁷ Núnisañ péñker numia nu tuke péñkeran nereatsuk. Tura yajauch numia nu yajauchin nereatsuk. ¹⁸ Péñker numi yajauchin nereatsui. Núnisañ yajauch numi péñkeran nereatsui. ¹⁹ Yajauch numi ajakar tsupirar jinium apeashtinkiait. ²⁰ Tuma asamtai wáitrin ainia nuka túramujai nekanattawai.'

Ashikia Yus akupeana nu jeachartatui

(Rúkas 13.25-27)

²¹ 'Aya winia Apar nayaimpiniam pujana nuna wakeramurin umirin ainia nuke Yus akupeamunam pachiinkartatui. Chíkichka "Uuntá, Uuntá" turutainiyat nayaimpiniam jeachartatui. ²² Amuukatin tsawant jeamtai untsurí turutiartatui "Uuntá, Uuntá, ame náaram pachisar ashí nuñkanam etserkachmakaj'. Ame náarmesha pachisar yajauch wakancha jiki akupkamji. Tura ame náaram pachisar aentsti tujintiamu túramji" turutiartatui. ²³ Nuj chichainiakui "Werumtarum. Penke nékachuitjarme. Aya yajau-chitrume" títiatjai.'

Péñker ukurma tura yajauch ukurma

(Rúkas 6.47-49; Márkus 1.22)

²⁴ 'Shuar winia chichamprun antuk umirkanka nu shuar ti péñker enentáimniuiti. Niisha ju shuarjai méteketete. Jeá jeamuk kayanam ukurma. ²⁵ Tura yumi ti yutuk entsa nujan'kruamai tura nase ti kakaram umpuimiai. Túmain' pukukachmai ni ukurmari kayanam ukuamu asamtai. ²⁶ Tura shuar winia chichamprun antuk umirtukchanka ju shuara núnisañ enentáimchaiti. Jeá jeamuk náikminiam ukurma. ²⁷ Tura yumi yutuk entsa nujan'kruamai tura nase ti kakaram umpuimiai. Túmakui jeá mash saanaki iniaamai" tímiayi Jesus.

²⁸ Jesus nuna tinia amukmatai ashí shuar ti enentáimprarmiyai. ²⁹ "Yusa kakarmarjijai unuitiamtsujik. Israer-shuara jintinniur'inkia núnis unuini-ainiatsui" tíarmiayi.

8

Jesus tunamarun tsuarmiania nu

(Márkus 1.40-45; Rúkas 5.12-16)

¹ Jesus muraya támatai untsurí shuar Nin nemariarmiyai. ² Nuj shuar tunamaru Jesusan jearin tikishmatramiyai. Tura tímiayi "Uuntá, wakerakmeke tsuáramniaitme."

³ Tutai Jesus uwejéjai antin "Wakerajai. Péñker ajasta" tímiayi. Tutai tunamaru ni tunamarmari péñker ajasmiyai. ⁴ Tura Jesus tímiayi "Pai, penké etserkaip. Áyatik Israer-patri iniakmamsam Muisais timia nu susata ashí shuar nekaawarti tusam."

²⁵ Nuyá ni unuiniamurĭ kŭrashim Jesusan ishintiarar tiarmiayi “Uuntá, wayajĭ. Kakaram ajachkumñĭkia jakattajĭ.”

²⁶ Jesus tímiayi “¿Urukantai timiá ashamarum, Yus enentáimtuskesha?” Nuyá wajaki nasencha entsanča chicharkamiayi. Tutai mash miaaku ajasmiai. ²⁷ Nuna íisar ni unuiniamurĭ ti enentáimsarmiayi. Tura tiarmiayi “Jŭsha ¿warĭ áentsuit? Nasesha entsasha Nin umirainiatsuk” tiarmiayi.

Jatara nuñkanam Jesus yajauch wakantrukun tsuármiania nu

(Márkus 5.1-20; Rúkas 8.26-39)

²⁸ Nuyá Jesus entsá amaini katiñ Jatara nuñkanam jeamiayi. Nuĭ jimiará shuar yajauch wakantruku tuke iwiartainium pujú Jesusan tariarmiayi. Mai yajauch wakantruku ásar ti kajen ármiai. Tuma asamtai shuar nu jintianam nanĭkaamachu ármiai. ²⁹ Niisha Jesusan wáinkiar kakantar tiarmiayi “¿Warĭ pujuram iijĭai, Jesúsá, Yusa Uchirĭa. Tsawant jeatsajĭn in amukratkataj tusamek taum?” tiarmiayi. ³⁰ Nuĭ arant kuchi untsurĭ shshuñmak yu-jaarimiayi. ³¹ Yajauch wakanča Jesusan seainiak “Jĭiki akupkartakmeka kuchĭniam wayatĭn tsanĭkatkartukta” tiarmiayi.

³² Tutai Jesus “Pai, wetarum’ tímiayi. Yajauch wakanča shuara enentáiya jĭinkiar kuchĭniam enĭkemáwarmiai. Túramtai kuchi wáurkiar arau utsanamiai. Nuyá entsá iniañkar jakerarmiayi.

³³ Kuchĭ wáinniusħa nuna ashamkar péprunam tseĭe wéarmiayi. Nuĭ jeawar ashĭ túrunamun etserkarmiayi. Yajauch wakantrukun péñker ajasmanča etserkarmiayi. ³⁴ Nuyá ashĭ nú peprunmaya shuar Jesusan inĭkiunĭtai tusar ashĭnkarmiayi. Tura inĭkiunĭkar ní nuñĭkeyá waketĭti tusar seawarmiayi.

9

Jesus emearun tsuármiania nu

(Márkus 2.1-12; Rúkas 5.17-26)

¹ Nuyá Jesus kanunam enĭkemar antumian amaini katiñmiayi. Tura nuĭ ni péprurĭn Kapernáumnum jeamiayi. ² Nuĭ jeamtai shuar emearu jaan patak yanakin ejeetiarmiayi. “Tsuártatui” nekas tu enentáimtuinia ásarmatai Jesus jaan tímiayi “Uchirú, kakaram ajasta. Ashĭ ame tunaarum tsanĭkuramuiti.”

³ Takui Israer-shuara jintinniurĭ yajauch enentáimprar “Jŭka Yúsan ti yajauch chicharuĭ” tiarmiayi.

⁴ Tu enentáimainian Jesus nekáa tiarmiayi “¿Urukantai imiá yajauch enentáimprum. ⁵ Tua imiá yúpchuchit. Shuara tunaarĭn tsanĭkuratin yúpchuchikiai. Tura emearun “Nantakim wekasata” títin yúpchuchikiai?

⁶ Wĭ Aents Ajasua núchakaitĭaj. Jŭ nuñkanam Wĭ tunaan asakátratnuiĭtĭaj. Wátsek, nu nekaatarum tusan jŭna iniakmastatĭaj.” Nuna tinia emearun “Wajaktia, tepetairam jukim jeemĭin wetá” tímiayi. ⁷ Tutai emearu tsuámar nantaki ní jeen wémiayi. ⁸ Tura nuna ashĭ aents wáinkiar Yus kakarman shuáran susa asamtai ashamkar Yúsan shiir enentáimtusarmiayi.

Jesus nemartusat tusa Mateun achĭawai

(Márkus 2.13-17; Rúkas 5.27-32)

⁹ Nuyá Jesus wémiayi. Nuĭ wesa Mateun kuit jútainium puĭan wáiniak “Nemartusta” tímiayi. Tutai Mateu nuna ikiuak Jesusan nemarmiayi.

¹⁰ Nú ukunmasha Mateu jeen yurumuk puĭaj yajauch armia nu Israer-shuar untsurĭ káunĭkar Jesusa unuiniamurĭjĭai irunar yurumiarmiayi.

11 Pariséusha nuna ísar Jesusa unuiniamurin aniasarmiaiyi “¿Urukamtia atumí Uuntri kuitia achinjajsha tunaarinniuajsha irunar yuruma?”

12 Tura Jesus nuna antuk tímiayi “Pénker ainia nuka tsuákratniun at-sumainiatsui. Antsu jainia nu tsuákratniun atsumainiawai. 13 Werum ju aarma unuimiutarum:

“Murik maam Winia surusum nujaj “máakete” tátsujai. Antsu wait-nenkartutain wakerajai,” Yus-Papinium tu áarmaiti.

Wikia “pénkeraitjai” tuínian untsuktaj tusan táchaitjai. Antsu tunáa shuar ni enentáin yapajíáwarat tusan táwitjai” tímiayi.

Jjiarmatniun Jesusan aniasarmiania nu

(Márkus 2.18-22; Rúkas 5.33-39)

14 Nuyá imiakratin Juanka unuiniamurj Jesusan tariar aniasarmiaiyi. “¿Urukamtai iikia tura Pariséusha ijiamaj' tura ame unuiniamurmeka ijiamainiatsu?” tiarmiayi.

15 Jesus ayak tímiayi “Nuatma nampernum ipiaamu ainia nu ¿ajakra uutu wayamniakait? Yamái-nuatu pujakui úutchamin áiniawai. Núnisan Wi pujakui ijiamashtin áiniawai. Tura tsawant jeattawai nuatua áintsan Wi junaktatjai. Antsu nujkia ijiamawartatui' tímiayi.

16 ‘Mamuru pushí jaanakmatai yamaram tarach anujtukchatniuiti. Túramka nijjam yamaram tarach sumpeak mamushan chiníá nuna nankaamas jaaktatui. 17 Nijjamanch yamáí nawar nuap najanamu arutnum yaraachminiaiti. Túramka karíak nuap najanamun ijiakratniuiti, nijjamchisha ukaratniuiti, tura nuap najanamusha yajauch ajastiniaiti. Antsu yamaram nijjamanch yamaram nuap najanamunam yaraatniuiti. Nu túramka nijjamchisha nuap najanamusha mai péñker ártatui.”

Jesus Jairu nawantrincha tura chíkich nuwancha tsuármiania nu

(Márkus 5.21-43; Rúkas 8.40-56)

18 Jesus nuna taj Israer-shuara uuntri Jesusan tarí tikishmatar tímiayi “Winia nawantur jarutkayi, tura Ame winim ewejmijjaj antintrukakminkia ataksha nantaktiatui.” 19 Tutai Jesus ni unuiniamurjijjaj wajakiar nijjaj wearmiayi.

20 Tura jintiá weenaj nuwá tuse (12) uwitin numpá ájapeak wáitias pujú asa Jesusa ukurinj amainian ni pushirin antinmiayi. 21 “Áyatik ni pushirin antinbaka péñker ajastatjai” tu enentaimpramiayi. 22 Nuna nekáa Jesus ayantar nuwan tímiayi “Shiir enentáimprata, nawantru. Yus shiir enentáimtususu asam péñker ajasume.” Nu chichamtaik ni jáamurj péñker ajasmiaiyi.

23 Nuyá Jesus uunta jéen jeamiayi. Tura nuj charaatum ajainiancha tura jakan iwíarsatai tusar péeman umpuiniancha wáiniak 24 tímiayi “Áa jíntratarum. Nuwáchikia jákachai antsu aya kanarai.” Penké jakan nékayat túratta nuna neka asa “aya kanarai” tímiayi. Takui aents Nin wishikrarmiaiyi. 25 Tura nuna ashí jjiir Jesus jeá wayá nuwáchin uwejnun achik iniantkimiaiyi. Túram nantakmiayi. 26 Nu túramu ashí nu nunkanam etsernarmiaiyi.

Jesus kusurun jímíaran tsuármiania nu

27 Nuyá Jesus wéakui jimíará shuar jji kusuru untsumki weriarmiayi. “Uuntá, ii Uuntri Tawit ame weatrum asamtai in waitnenkarturta” tiarmiayi. 28 Jesus jeá wayamtai jji kusuru tariarmiayi.

Tura Jesus aniasar “¿Juna túramniaiti túrutrumek?” tímiayi.

Niisha “Ee, Uunta” tiarmiayi.

²⁹ Tuñiakui Jesus ni jiiñ antinkiar túmiayi “Átum nekas enentáimtarmena núnisañ túrunati.” ³⁰ Nujaj̄ jiī péñker ajasarmiayi. Nuyá Jesus “Etserkairap. Shuar penkē nekáwarain̄” túmiayi. ³¹ Támaiatiat̄ jiiñkiar Jesus túramun ashí nu nunñkanam etserkarmiayi.

Jesus chichachun péñker awajsamiania nu

³² Nuyá wenaj̄ shuar yajauch wakantruku chichachun Jesusan itiariarmiayi. ³³ Tura Jesus yajauch wakanin̄ jiīki awemamtai nu chichachu chichakmiayi. Ashí nuna ísar ti enentáimprarmiayi. Tura tiarmiayi “Yáunchusha Israer nunñkanam jujaj̄ métek túramu penkē atsuwiti.” ³⁴ Antsu Pariséuka yajauch enentáimtuiniak tiarmiayi “Nu shuar iwianchi uuntrī kakarmarijijaj̄ yajauch wakanin̄ jiīki akupeawai.”

Jesus shuaran waitnentawai

³⁵ Jesus ashí péprunam we ni iruntairin̄ wayá “Yus akupeana nūj̄ en̄kemátarum” tu etsermiayi. Tura ashí nánkamas sun̄kurjaj̄ jáiniancha tsuármiayi. ³⁶ Shuaran ísar murik wáinchatia núnis̄ pimpikiar tura kúntuts pujuinia asamtai waitnentrarmiayi. ³⁷⁻³⁸ Nuyá ni unuiniamurin̄ túmiayi “Jū aents Yus-Chicham ujaktiniat̄ji Yus-shuar ajasarat tusa. Nu takat ti núkap awai tura takarin̄ ishichik ániawai. Nu takatka júuktin̄ áintsan̄kete. Júuktin̄ tsawant̄ jeamtai takau táasmatai takamtikin̄ ujaktin̄ átsuk takaun akupkat tusa. Atumsha núnisrumek Yus seatarum ni shuarin̄ akupak áentsun̄ júukarat tusarum.”

10

Jesus tuse (12) unuiniamurin̄ achikmiayi tuke nemarsatniun (Márkus 3.13-19; Rúkas 6.12-16)

¹ Nuyá Jesus tuse (12) unuiniamurin̄ achik Yusa kakarmarin̄ súsarmiayi yajauch wakanin̄ shuara enentáiyaj̄ jiīki akupkatniun. Núnisañ ashí sun̄kurjaj̄ jáinian tsuárartinian̄ susamiayi.

² Jū ániawai Jesus tuse (12) unuiniamurin̄ achikiarmia nu: Emka Semuñ núnisañ Pitru náartiniuyayi. Nuyá ni yach̄i Antres. Nuyá nuám̄tak yáchintin̄ Jakupusha Juañsha, Sepetéu uchir̄i armia nu. ³ Nuyá Jiripi, Parturumí, Tumas, Mateu. Mateusha kuítian̄ achiniuyayi. Arpeu uchir̄i Jakupusha. Ripiū núnisañ Tateu náartiniuyayi. ⁴ Ásump̄i Semuñsha nuyá Jútas Iskariúti Jesusan ukunam surukmia nu. Nu tuse (12) achikma ármiayi.

Jesus ni unuiniamurin̄ etserkarti tusa akupkarmiania nu (Márkus 6.7-13; Rúkas 9.1-6)

⁵ Nu tuse (12) unuiniamurin̄ Jesus júñis chicharak akupkarmiayi. “Israer-shuaracha matsatmanum weerap. Samaria nunñkanam péprunam weerap.

⁶ Antsu Israer-shuar murikiua áinis̄ Yusaj̄yá wáakarú ainia nu weritiarum. ⁷ “Tsawant̄ ishichik ajasai Yus jú̄ nunñkanam akupin̄ ajastin̄” tu etserk̄i watarum. ⁸ Tunamarusha chikich̄ sun̄kurjaj̄ jainia nusha tsuatarum. Jakasha iniantkitiarum. Yajauch wakan̄cha shuara enentáiyaj̄ jiīki awematarum. Nu túratin̄ kuítchajaj̄ kakaram̄ susamuitrume, tuma asam̄tai atumsha ashí ántarmek túratarum.’

⁹ ‘Kurisha ashí kuitcha jukiirap. ¹⁰ Uyuncha jukiirap. Sapatcha tura ushukrustin̄cha jukiirap. Antsu chikichik̄ push̄i jukitiarum. Takau asakrumin̄ yurumkan̄ ajampramsartin̄ ániawai.’

11 ‘Péprunam jearmesha péñker shuar wáinkiarum nuǵ wayarum tuke nuin pujustarum. 12 Nu jeanam wayamsha “Ju jea shiir atí” titiá. 13 Nekas péñker shuaraitkiunǵa shiir ajasartí. Antsu nu shuar péñker itiar machkuñǵa shiir ajascharti. 14 Tura náñkamsañ atumin awáintiamainiachkuñǵa anturtamainiachkuñǵa nuǵa jíinkitiarum. Nu shuar yajauch ásarmatai jíinkirum atumí naweyá nuñka japimiarum ikiuktiarum. Ni tunaari aents nekaawarat tusarum túratarum. 15 Nu shuaran nekapsatin tsawant jeam-tai Yus asutiáshtatuak. Sutum péprunmayá shuara nanǵkaamas Kumura péprunmayá shuarnasha nanǵkaamas Yus asutiáttawai nu shuaran’ tímicai.

Yajauch awajsatniun ujakmania nu

16 ‘Aneartarum. Wisha murik yawañum akupkatniua áintsanak akupeajrume. Tuma asantai shiir nawamkartin áyatrum aneartarum. 17 Yajauch shuarjai aneartarum. Akupniunam juramkiartatui. Israer-shuar iruntainiam asutiamawartatui. 18 Wíi shuar asakrumin uuntnumsha tura nuǵa akupniunmasha juramkiartatui. Núnisrum akupniuncha tura Israer-shuarancha winia chichamur ujaktatrame. 19 Tura akupniunam surutmakakrumnisha wariniak títiáj tu enentáimprairap. Nuǵ uuntjai chichaakrumin Yus títinian jintinramattarme. 20 Nuñǵa átum enentáimmiájai chichaschattarme antsu atumí Aparí Yusa Wakaní atumin chichamtikramsattarme.’

21 ‘Shuar ni yachíncha máawarti tusa suruktatui. Apasha ni uchirín suruktatui. Uchisha ni aparín máawarti tusa suruktatui. 22 Tura Wíi shuar asakrumin mash muíjramkartatui. Tura tuke katsuntea nu uwemprat-tawai. 23 Chikichik péprunam yajauch awajtamainiakui chíkich péprunam pisartarum. Wi Aents Ajasuitjai. Tuma asan nekasan tájarme, átum Israer-shuar mashí ujatsrumniñ wantinkiattajai.’

24 ‘Unuiniamuka nin unuiniana nuna nanǵkaamaschaiti. Takarniusha ni uuntri nanǵkaamaschaiti. 25 Unuiniamuka nin unuinia nuǵaí métek ajaska maak. Takarniusha ni úuntriǵajai métek ajaska maak. Wátsek, Winia atumí úuntrin “Iwianchi uuntri” túrutainiakui atumniasha nuna nanǵkaamas ya-jauch turamtatui.’

Yúsak ashamkatniuiti (Rúkas 12.2-9)

26 ‘Tuma asantai aentska ashamkairap. Ashí uǵkma nu paant nekanat-tawai. 27 Ishishmasan kiritniunam ujaajrumna nu, tsawáí kakantrarum et-serkatarum. 28 Aya ayashin main áinia nu ashamkairap. Wakanin máachmin áiniawai. Antsu wakanniasha ayashniasha mai jinium emesramnia asantai Yus ashamkatarum.’

29 ‘Jimiará chíñki penké ishichik kuitjai surukmin áiniawai. Túmaitiat Yus tsanǵateachkuñǵa nuñká jaka iniainiatsui. 30 Ame intiashmisha mash nekapparmaiti. 31 Nu asantai jákatin ashamkairap. Yusjai átumka ti untsurí chíñkijajai nanǵkaamas péñkerchakaitrum.’

Jesus natsantrashtiniaiti (Rúkas 12.8-9)

32 ‘Ashí shuar ashí íimiainiañ Winia natsantruiniatsna núnaka Winia Apar yakí nayaimpiniam pujana nuǵ natsantrastatjai. 33 Antsu shuar íimiainiañ Winia natsantra núnaka Wisha yakí nayaimpiniam winia Apar pujana nuǵ natsantrattajai.’

Jesusa chichamejaj shuar akannartatui

(Rúkas 12.51-53; 14.26-27)

³⁴ Ashí shuar nawamnaikiar shiir pujusarat tusan ju nunkanam táchaitjai. Nuna túrat tusarum enentáimturairap. Antsu wi tamaajaj shuar péñker ajasarmatai yajauch shuar nin nakitratatui. ³⁵ Shuar ni aparín nakitratatawai. Nuwasha nukurín nakitratatawai. Najatjsha tsatsarín nakitratatawai. ³⁶ Tuma asa shuar ni shuarijjaj nemasrintin ártatui.'

³⁷ 'Shuar ni aparíncha nukuríncha Wijjaj nankaamas aneakka Wíi shuar áchamniaiti. Núnisan ni uchiríncha nawantríncha nankaamas aneakka Wíi shuar áchamniaiti. ³⁸ Tura ashí wáitsatniun surimiatsuk ni krúsrijn yanaki juki nemartachkunka Wíi shuar áchamniaiti. ³⁹ Aya jú nunkanam péñker pujustaj tana nu ni iwiaakmarín emesratatawai. Tura Winia anentu asa ju nunkanam péñker pujustinian páchiatsna nu tuke shiir pujustatui.'

Akinkiatin

(Márkus 9.41)

⁴⁰ 'Atumin itiaarma nuka Winia itiaarui. Tura itiaarea nuka Winia akup-tukmia nunasha itiaawai. ⁴¹ Yúsnan etserniuncha Yúsnumia winia asamtai itiaakka etserin akinkiáttana nujaj métek akinkiáttawai. Péñker shuárnasha péñker asamtai itiaakka péñker shuar akinkiáttana nujaj métek akinkiáttawai niisha. ⁴² Uchíncha Wíi shuar asamtai entsá michan shikirak súsanka imiá nekas nusha akinkiáttawai." Tu tímiayi Jesus.

11

Imiakratin Juan Jesusaj shuaran akupkamiania nu

(Rúkas 7.18-35)

¹ Tura tuse (12) unuiniamurín Jesus tinia akupkar Niisha nú nunka péprunam we Yus-Chichaman jintiak etserkamiayi.

² Tura Juan sepunam enkemas Kristu túramun antukmiayi. Antuk ni unuiniamurín jímiaran Jesusaj akupkamiayi. ³ Tura Jesusan aniasarmiayi "¿Nekas ame Kristu Yus akupkamu tátinia nukaitiam. Kame chikichak nákastataj?"

⁴ Tutai Jesus tímiayi "Waketkirum ashí ántarmena nusha wáintrumna nusha Juan ujaktarum. ⁵ Kusurusha wáinmainiawai. Shutuapsha wekainiawai. Tunamarusha péñker ajainiawai. Empekarusha ántuiniawai. Jákarusha nantainiawai. Tura kuítrínchanmasha uwempratin chicham ujakmaiti. Nu ujaktarum. ⁶ Túrasha yawetsuk Winia tuke shiir enentáimturna nú shuar shiir átatui." Jesus nuna tutai waketkiarmiayi.

⁷ Waketkiarmatai shuar káunkarun Jesus Juáñkan pachis áujmatmiayi. "Shuar atsamunmasha ¿warí werimiarum? Pintiu nase umpúam atúu we juní we ajana nuka ¿ístai tusarumek wémarum? Kame Juánkka nú shuarchaiti. ⁸ Nuikia ¿warí werimiarum. Shuar péñker iwíarmampra ístai tusarmek wémarum? Warí, péñker iwíarmampraka uunta jéen pujuiniatsuk. ⁹ Nuikia ¿warí werimiarum. Yúsnan etserniuk werimiarum? Maa, túrachmashiuram. Túrasha Juánkka yaunchu etserniun nankaamas enentáimtustiniaiti. ¹⁰ Yaunchu Yus-Papinium áarmaiti: "Winia akatramurun amiñi emka akupeajai ame jintimin iwíarat tusa." Juan nu akatramuiti. ¹¹ Nekasan tájarne, shuar imiakratin Juanjaj nankaamas uunt atsuwiti. Tuma ain Yus akupeamunam pachiinia nu

shuarnaka, nekasmianchancha, Juanjaj nankaamas shiir enentáimustiniaiti. Tuma asamtai nuj pachiinkiatin enentáimpratarum.'

12 'Kakaram shuarka imiakratin Juan támia nú tsawantnumia Yus akupeamunam ti pachiinkiatniun wakeruiniak kakarmajaj pachiinkiatniun enentáimiainiawai. 13 Juan pujumia nú yaunchu ashí Yúsnan etserin armia nusha tura Muisais akupkamusha Yus akupin ajastinian etserkarmiayi. 14 Yaunchu Yúsnan etserin "Kristu táatsain Eriás tátiniaiti" tímiayi. Tura nekaatin wakerakrumka Juan nu Eriásaiti. 15 Antuktin jeakrumka nekaatarum.'

16 'Ju áentsnasha ¿warijjaj métek nakumkataj? Uchijjaj métek áiniawai. Ni aijjaj iruntrar nakurustaj táyatañ tuíniawai 17 "Námpera áinis nakurustaitsar peem umpwarji túrasha jantsemáchure. Nuyá iwiarsatniua áinis nakurustaitsar íwiareakur kantamta kantamáji túrasha átum úutcharme." 18 Atumsha núnisaitrume. Kame Juan núkap yurumtsuk nijiamchincha úmutsuk wekaimiayi. Túmakui átumka "Yajauch wakantrukuiti" tímiarme. 19 Nuyá Wisha Aents Ajasu támajaj. Tura yurumeakui tura úmakui "Ti yurumin ti nampenaiti. Ashí yajauch shuaran amikrinti" túrutrume. Wátsek, wi túramujaj Yus nekas nékamu nekanattawai."

Yajauch péprunmayaj shuaran chicharkamiania nu
(Rúkas 10.13-15)

20 Nuyá tujintiamun túramiania nú peprunmayaj shuaran pachis Jesus chicharkamiayi. Tuma aiñ nuyá shuar ni enentáin yapajjácharu asamtai juna chicharkamiayi.

21 "Wáinkiatá, Kurasín péprunmayatiram, Petsaitia péprunmayatirmesha. Nuj aents tujintiamun ti túraitjai. Tíru péprunmasha Setun péprunmasha nu tujintiamu túramuitkiuinjia yaunchu ni enentáin yapajjáwaraayí. Túrawar kúntuts pujutaj pushín entsarar yunjunim ajakiaraayí. 22 Tura Wisha tájarme, nekapsatin tsawant jeamta Yus atumin tí asuttiamattarme. Tirunmayaj shuaran nankaamas tura Setunnumia shuaran nankaamas asuttiamattarme.'

23 'Tura atumsha Kapernáum péprunmayatirmesha, ashí nankaamas nankaamantu ajastin enentáimtumarme. Antsu ashí emestamprartatui. Atumijn aents tujintiamun ti túraitjai. Sutuma péprunam nu tujintiamu túramuitkiuinjia nu pepru yamaisha tuke aayí. 24 Tura Wisha tájarme, nekapsatin tsawant jeamta Yus Sutumanmayaj shuar nankaamas atumin asuttiamattarme."

"Winin ayampratarum" tímiania nu
(Rúkas 10.21-22)

25 Nuyá Jesus tímiayi "Shiir enentáimtajme, Aparu, ashí nayaimpisha nunkasha Úuntrinme. Tuma asam Ame túram nu ti unuimiaru enentáimtumainia nuyá úukuitme antsu uchichia áinis nankaamantu enentáimtumainiatsna nú shuar paant awajtusuitme. 26 Ame, Aparu, núnis wakera asam túraitme.'

27 'Winia Apar ashí surusuiti. Wisha ni Uchirí asamta Winia nékarui. Tura chích Winia nekas nekarainiatsui. Yus Apancha Wiki nékajaj. Tura Wi wakeraj nú shuaran winia Aparun paant awajtajaj. Nu shuarsh winia Aparun nékainiawai. 28 Ashí pimpikniutirmesha itiuurchat pujarmena nusha Winí winitiarum. Túrakrumniñkia ayamtikrattajrume. 29 Wi kajechu asan tura péechach enentáimin asamta Winí winirum unuimiartarum.

Winia chichamur ántakrum umíakrumnińka atumí wakaní ayamprattawai.
³⁰ Atumin akuptaj nú túratin yúpichuchiiti. Káarkasha Wi súajrumna nu wampuchiiti” timiayi Jesus.

12

Jesusa unuiniamurí ayampratin tsawantaj trikiu neren pakaarmiania nu (Márkus 2.23-28; Rúkas 6.1-5)

¹ Nuyá Jesus ayampratin tsawantaj ajanman ajapenin nankaamamiayi. Ni unuiniamurisha tsukarar trikiu neren majusar yukí wekasarmiyai.
² Pariséu shuarsha nuna wáinkiar Jesusan aniasarmiyai “Iista, ame unuini-amuram ayampratin tsawantaj túratin surinkiamua nuna túruiniawai.”

³ Tutai Jesus tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Yusa Uunt Jeen wayá Yus iniaktusma tantan yuámiayi. Nu tantasha aya Israer-patrik yúatin asam-tai Tawitniasha tura ni nemanin ana nunasha suritkiamuyayi. Túmaiń yúawarmiyai. ⁵ Muisais akupkamunam aarma nu áujśachukaitrum. Israer-patrikia ayampratin tsawantaj takainiyatań nusha tunaachuiti. ⁶ Nekas tájarne, yamá Yusa Jeen enentáimtustinia nuna nankaamas Winiaka Aents Ajasuitjiana nu, nekas enentáimtursatniuitrume. ⁷ Yus-Papinium tawai: “Murik maam Winia surusum nujaj “maakete” tátsujai. Antsu wait-nenkartutain wakerajai.”

Nu chicham nekas nékaitkiurmeka yamá túrarmena núnisrum tunáa túrachu ánrarum súmamtikiachaintrume. ⁸ Wi Aents Ajasu asan ayampratin tsawantan Úntrintjai.”

Shuara uweje jakan Jesus tsuármiania nu (Márkus 3.1-6; Rúkas 6.6-11)

⁹ Jesus nuyá wé Israer-shuar iruntainiam wayamiayi. ¹⁰ Nuj shuar ámiayi ni uweje jaka. Tura Jesusan ántar nekapsatai tusa wakeruiniá ásar aniiniak “¿Ayampratin tsawantaj jaa shuar tsuarminkiait?” tiarmiayi.

¹¹ Tutai Jesus tímiayi “Atumsha atumí murikrj ayampratin tsawantaj wáńnam akaiki iniamtai jusatai tusarum wéchaintrupash. ¹² Antsu shuarka murikjaj nankaamaschakait. Tuma asamtai ayampratin tsawantaisha péńker ana nu túramniaiti.” ¹³ Tinia iniaais áishmańkan uweje jakan tímiayi “Uwejem takuitia.” Tutai uweje takuj chíkich uwejejai métek péńker ajasmíayi. ¹⁴ Nuna túramtai Pariséu shuarsha aa jńinkiar Jesus itiurak máawaintiajġ tusar chichaman najatiarmiayi.

Isayas Jesusnan tímia nu uminkiamiayi

¹⁵ Jesus nin máatniun nekaama nuyá jńinkimiayi tura wéakuí untsurġ shuar nemariarmiayi. Untsurġ jáiniancha tsuámiayi. ¹⁶ Tsuar “etserkairap” tinia akupiarmiayi. ¹⁷ Yaunchu Yúśnan etserin Isayas tímia nu uminkiaiti tusa túrunamiayi. Niisha juna áarmiayi:

¹⁸ “Júiti Wi achikmaj nu. Niisha Wi tájana nuna umin asamtai ti aneakun Niijjaj waraajai. Winia Wakantru kakarmarġn takamtsuk susattajai. Túramtai winia uwempratin chichamprun ashí Israercha nunkanmasha etserkattawai. ¹⁹ Jiakchattawai tura kakaram chichaschattawai. Winia anturtukarat tusa péprunam weak untsukchartatui. ²⁰ Akupin ajatsuk shuar pintiu punua núnis pimpiru ainia nuna kúpitsuk yáintatui. Núnisan shuar ji yama ikiapámu áinis

kakarmachu ainia nuna ikiajniansuk ikiakártatui. Tura ashí nupetak ti péñker kakaram akupin ajastatui. ²¹ Tura Israer-shuarchasha Nin nekas enentáimtusartatui.”

Jesusan “iwianchi uuntri kakarmaríjái túrawai” tiarmiania nu (Márkus 3.19-30; Rúkas 11.14-23; 12.10)

²² Nuyá Jesusan shuar yajauch wakantrukun itiararmiayi. Nu shuar jii kusurusha chichachusha ámiayi. Tura Jesus tsuármatai paant íimsamiayi tura chichakmiayi. ²³ Nuna wáinkiar shuar shiir enentáimprar tiarmiayi “¿Tawitia uchríř pampañku iniañnamu uwentikkiartin tátinia nuáshit?”

²⁴ Tura Pariséu shuarsha nuna antukar yajauch enentáimtuiniak tiarmiayi “Juka iwianchi kapitíántriñ Pirsepún umirniuiti. Tuma asa nuna kakarmaríjái yajauch wakanin jiiiki akupeawai.”

²⁵ Jesus tu enentáimainian neka asa tímiayi “Nú nunñanmayá shuar numtak kajernaiyakuñkia nú nunña wari meserchattawak. Núnisañ nuamtak shuar ní shuarjai mánainiakka amunaikchartuak. ²⁶ Núnisañ íwianch nuamtak jiiiki akupnainiakka máanaikiar wárik amuukashtatuak. ²⁷ Kame Wi Pirsepú iwianchi kakarmaríjái iwianchin jiiiki akupeakuñkia atumí uchrířsha ¿yana kakarmaríjáiñ jiiiki akupena? Ni túramuríjái atum awajirma nekamatarum. ²⁸ Wi Yusa Wakaní kakarmaríjái yajauch wakanin jiiiki akupea asantai atumsha Yusa akupeamurí atumíñ jeartamarmena nu nekaatniutrume.”

²⁹ ‘Iista. Shuar kakaram shuara kuítriñ kasarkatin wakerakka emka kakarman jinñkiá aya túrañ ni jeñ wayá kasarkamniaiti. Wi iwianchin jiiikmiajai uunt iwianch nupetkamua nu nekaamniaiti.’

³⁰ ‘Wíjái tsanin pujatsna nuka winia nemasrui. Núnisañ Winia yáintsuna nu aya iturchat nájateawai.’

³¹ ‘Tuma asantai tájarme, Ashí shuar tunáa túruinia nusha yajauch chichainia nusha tsañkuratin awai. Antsu Yusa Wakanin yajauch chicharin ainia nuka tsañkurashtiniaiti. ³² Winiasha Aents Ajasuitjiana nuna yajauch chichartuinia nú shuarsha tsañkuramniaiti. Tura Yusa Wakanin yajauch áujmatania nuka penké tsañkurachminiaiti. Ju nunñanmasha tura ukunmasha tsañkurnarchattawai’ tímiayi.

Ni nerejai numi nekaamniaiti (Rúkas 6.43-45)

³³ ‘Yutai numi péñkeran nereawai. Tseas numisha yajauchin nereawai. Ni nerejai numi nekaamniaiti. Núniskete atumjai. ³⁴ Tseas wenunniutirmesha, ¿atumsha itiuurak imiá yajauchitirmesha péñker chichamsha chichastarum? Shuar ni enentáin enentáimna nuna chichaawiti. ³⁵ Péñker shuar péñker enentáimiu asa shiir chichaawiti. Tura yajauch shuar yajauch enentáimiu asa yajauch chichaawiti. ³⁶ Tura Wisha tájarme, nekapsatin tsawant jeamtai ashí enentáimtsuk chichakma nuna Yúsan paant ujakartatui. ³⁷ Iis, ame chichammíjái nekanattarme. Péñker chichakuitkiumka sumamashtatme. Tura péñker chichachaitkiumka sumamattame.”

Nu shuar yajauch ásar iniakmamun seawarmiania nu (Márkus 8.12; Rúkas 11.29-32)

³⁸ Pariséu shuarsha Israer-shuara jintinniurířsha Jesusan chicharuk “Uuntá, ame Yúsaiyáitjai tusam nayaimpinmayá kakarmajái iniakmamu túrata, iisha wáinkiatái” tiarmiayi.

³⁹ Tutai Jesus tímiayi “Shuar yajauch tura Yúsan enentáimtachu ásar nayaimpinmaya iniakmamun seainiawai. Tuma asamtai, áyatik yaunchu Junas túrunamu iniakmastiniaiti. ⁴⁰ Junas menaintiu kashi menaintiu tsawantcha namaka ampujen enkemsamiayi. Núnisnak Wi, Aents Ajasu asan, menaintiu kashi menaintiu tsawantcha nunka jakan tepestatjai. ⁴¹ Júnás Níniwi pérunmaya shuaran Yus-Chichaman etserkamtai nu shuar ni tunaarín enentáimtusar ni enentáin yapajjáwarmiayi. Tura juí yamáí Junasa nankaamas etserin pujawai. Wiitjai nusha, tura anturkachuitrume. Tuma asamtai nekapsatin tsawant jeamtai Níniwinmaya shuar juyá shuaran súmantikiawartatui.’

⁴² ‘Yaunchu nuwá yajaya shuaran úunt akupniuriyayi. Nu nuwá Sarumún ti neka asamtai nin anturkataj tusa tarimiayi. Tura juí yamáí Sarumúnjai nankaamas anturkamnia pujawai. Nusha Wiitjai. Tuma asamtai nekapsatin tsawant jeamtai nu nuwá juyá shuaran súmantikiawartatui’ tímiayi.

*Yajauch wakan jiki akupkamuitiat wáketna nu
(Rúkas 11.24-26)*

⁴³ ‘Shuara enentáiyá yajauch wakan jíinkin yumi penké yútatsna nuí wéawai. Tura nuí péñker pujustinian wáinkiach ataksha waketkitniun enentáimui. ⁴⁴ “Wí jíinkimaj nuí waketkittijai” tawai. Tura waketki shuara enentáin péñker iwiamu tura ankantán wáiniak ⁴⁵ ni ajn siati (7) iwianchin níijjai nankaamas yajauchin itíá shuara enentáin enkemáwartatui. Túrunamtai nu shuar nuiki nuna nankaamas yajauch ajastatui. Núnisan juyá shuar túrunawartatui” tímiayi Jesus.

*Jesusa yachí, Jesusa nukurí
(Márkus 3.31-35; Rúkas 8.19-21)*

⁴⁶ Jesus nu shuarjai tuke chichaak pujai ni nukurísha ni yachísha tariarmiayi. Tura aa wajasar Níijjai chichastaj tiarmiayi. ⁴⁷ Túramtai Jesusan ujakar “Ame nukusha yatsumsha aa wajasar chichastaj turamainiawai” tiarmiayi.

⁴⁸ Chichaman ujakmia nuna Jesus tímiayi “¿Ya áinia winia nukursha winia yatsursha?” ⁴⁹ Nuyá ni unuiniamurín iniakmas tímiayi “Ju áiniawai winia nukur tura winia yatsursha. ⁵⁰ Ashí shuar winia Apar nayaimpiniam pujana nu wakeramun umiiniana nu winia yatsur winia umar winia nukur áiniawai” tímiayi.

13

Untsurí métek-taku chichamjai Jesus unuiniamiania nu

*(1) Atsaamin atsaampramiayi
(Márkus 4.1-9; Rúkas 8.4-8)*

¹ Nu tsawantaj Jesus ni jeeyá jíinkin antumianka kánmatkarín pujusmiayi. ² Tura ti untsurí shuar káunkarmatai kanunam enkemar nuí pujusmiayi. Shuarsha antumianka kánmatkarín pujusarmiayi. ³ Túrunawarmatai untsurí métek-taku chichamjai unuiniamiayi. “Atsaamin atsaampratáj tusa jíinkimiai, tímiayi. ⁴ Atsaamki wesa arakri jintia písunmasha iniaarmai. Tura chíñki tariar yuwarmai. ⁵ Chikichcha kaya írunmanum iniaarmai. Nunka ishichik asamtai wárik tsapainiarmai. ⁶ Tura nantu etsantramtai péñker kankáprúrcharu asa sukuam káararmai. ⁷ Chikichcha janí nupanam iniaarmai. Tura janí wárik tsakar nupetak ajakramai. ⁸ Chikichcha péñker

nunġanam iniaarmai. Nusha pēnker nerekar chīkich siansha (100) nerekar-mai. Tura chīkichcha sesenta (60) nerekar-mai. Tura chīkichcha trainta (30) nerekar-mai. ⁹ Kuishim ákuinġkia antuktatum” tīmiayi.

“¿Urukamtai aya métek-taku chichamjaj jintiam?” aniasarmiania nu (Márkus 4.10-12; Rúkas 8.9-10)

¹⁰ Nuyá ni unuiniamurġn Jesusan taruntar aniiniak “¿Urukamtai aya métek-taku chichamjaj ju shuar unuiniam?” tiarmiayi.

¹¹ Tutai Jesus tīmiayi “Urukuk ju nunġanam Yus akupin ati, nuka yaunchu nekanachmiayi. Tura yamaikia Yus ashí nuna atumin paant iniakturmawai. Antsu chīkich nuna nekaachmin ániawai. ¹² Kame núkap takakna nu shuar nú nukap patatnaktatui tura ti núkap takustatui. Antsu ishichik takakna nuka ishichik takakuk juruktiniaiti. Núnisañ Yusna ti nekarum nú nukapka yúpichuch nekaattarme. Tura ishichik nékarum wárik kajinmatkittiar-me. ¹³ Tuma asamtai aya métek-taku chichamjaj unuiniajai. Nú shuarka íniayatan wáiniániatsui. Ántuiniayatan ántachua núnis nékainiatsui. Túmainiak Winia nekarainiatsui. ¹⁴ Nujaj yaunchu Yúsnan etserin Isayas timia nu uminkiaiti. Juna tīmiayi:

“Ti ántayatrum anturkashtatrum. Wáiniatrumsha nekaashtatrum. ¹⁵ Ju shuara enentáġ kátsuram ásar pēnkerá nuna nakitiainiawai. Nu asamtai pēnker ántuiniatsui, jiiisha pusá áinis ániawai. Túrachkuġka paant nekaawarainti, tura nekas antukarainti, tura enentáġġġ enentáimias Winia tsuarat tusa tarutiarianti.”

¹⁶ Tura átumka paant wainkia asarum pēnker anta asarum shíraitrum. ¹⁷ Nekasan tájarme, untsurġ Yúsnan etserniusha tura pēnker shuarsha átum yamá wáintrum nuna wáinkiatniun wakeruiniayatan wáinkiacharmīayi. Tura átum yamá ántarme nuna antuktinian wakeruiniayatan antukcharmīayi’ tīmiayi.

Jesus atsaampramu chichaman paant jintintiamiania nu (Márkus 4.13-20; Rúkas 8.11-15)

¹⁸ ‘Ayu, antuktatum. Atsaampramu chichaman paant jintintiatjarme. ¹⁹ Árak jintia písunam iniaararma nuka shuar Yus-Chichaman ántayatan ni enentáġn ikiuiniatsna núiti. Tura íwianch nu Yus-Chicham ni enentáġn atsaampramu áinis antukman kajinmatkiawai. ²⁰ Árak kaya írunmanum iniaarman nuka shuar Yus-Chichaman antuk waras umirainia núiti. ²¹ Tura núkap kaġkaprurcharu ásar katsumiatsui. Antsu itjurchatan ínkiuiniak tura Yus-Chichaman wakeruinia ásar-matai chīkich yajauch áujmatam wárik iniaisar ikiuiniawai. ²² Árak jaġki nupanam iniaarman nuka shuar Yus-Chichaman antuk emka umirniua núiti. Tura ju nunġanam írunna nuna tuke páchinia ni kuštrġncha ti enentáimtuinia ásar-matai ashí Yus-Chichaman enentáimtamun núpeteawai. Tuma asamtai nu áentsnum Yus-Chicham atsaampramu nereatsui. Yus-Chicham ni enentáġn takasma atsawai. ²³ Tura árak pēnker nunġanam iniaarman nuka shuar Yus-Chichaman antuk pēnker umirainia núiti. Tura pēnker nerenawai. Chīkich sianġ (100) nerekarman núnis chīkichcha sesenta (60) nerekarman núnis chīkichcha trainta (30) nerekarman núnis ániawai” tīmiayi Jesus.

(2) Yajauch nupq trīkionam atsaamkamū

²⁴ Jesus ataksha ju métek-taku chichaman áujmatsamiayi. “Shuar Yus aku-peamunam pachġinġartin júnisaiti. Shuar pēnker arakan, trīkion ni nunġen

araamai. ²⁵ Tura ashí kanararmatai nemasrj kashi taa trikiu arakmanum yajauch nupān aratak ikiukmiai. ²⁶ Trikiu tsapakar nereakuí nuyá yajauch nupāsha nusháa nereku asa ti paant ajasmai. ²⁷ Nuna ísar takainia nu ni úuntrin werí tiarmai “Uunta, ¿pénker arak araachmakam. Itiura jūsha yajauch nupāsha tsapakuit?”

²⁸ “Tutai nērentin timiai “Winia nemasur arakuiti.”

“Takui ni takarniurj tiarmai “¿Yajauch nupān uwerat tusam wakeramek?”

²⁹ “Tutai timiai “Atsá, uwerairap. Yajauch nupā uweaj tukamarum trikiu uweniirum. ³⁰ Iniaisatarum. Antsu métek tsakakti. Júuktin tsawant jeamtai winia takartinian emka yajauch nupān uwer irumar jinkiiawarat tusan akupkartatjai. Tura áesawartatui. Tura trikiu nerēn júkar péñker ikiusarat tusan akupkartatjai” timiai” timiayi Jesus.

(3) *Mustasa jínkiái*

(*Márkus 4.30-32; Rúkas 13.18-19*)

³¹ Jesus ataksha métek-taku chichaman áujmatsamiayi. “Shuar Yús akupea-munam pachiinkiertin mustasa jínkiáiya áintsan̄kete. Shuar péñker nun̄ken araamai. ³² Mustasa jínkiáikia imiá uchichiitiat tsapái tsakaakka ashí nu-michijijai nan̄kaamas uunt ajawai. Ti uunt asamtai chin̄ki ni kanawen pasun̄mainiawai” timiayi Jesus.

(4) *Karin en̄ketatin*

(*Rúkas 13.20-21*)

³³ Núnisan̄ chíkich métek-taku chichaman áujmatsamiayi. “Shuar Yús akupea-munam pachiinkiertin karinia áintsan̄kete. Nuwā nijiamchiniam karinia en̄kea mashi páchimiawai. Tura nu mash karimtikiiawai” timiayi.

Jesus aya métek-taku chichamjain̄ jintintiamiania nu

(*Márkus 4.33-34*)

³⁴⁻³⁵ Ashí nuna Jesus métek-taku chichamjai áujmatsamiayi. Yaunchu Yúsnan etserin timia nu uminkiatí tusa túramiayi. Etserin juna áarmiayi: “Métek-taku chichamjai áujmattiatjai. Yámankamtaiknumiá nékash̄tain etserkat-tajai” tu áarmiayi.

Nu asamtai aya métek-taku chichamjain̄ áujmatmiayi Jesus.

Jesus yajauch nupā tr̄kiunam atsamkamun paant awajsamiania nu

³⁶ Nuyá shuaran ikiukin Jesus jeá támiayi. Túramtai ni unuiniamurj tariar “Yajauch nupā áujmatmena nu paant awajsata” tiarmiayi.

³⁷ Tutai Jesus timiayi “Wi Aents Ajasuitjai. Wi péñker arakan atsaamkaitjai. ³⁸ Ashí nun̄ka aja áintsaiti. Péñker jínkiái Yús-shuaran Yús akupea nuna nakumeawai. Yajauch nupā iwianchna ainia nuna nakumeawai. ³⁹ Tura íwianch ii nemasrj asa yajauch nupān arakuiti. Tura nun̄ka amúamunam Yusa suntarj arakan júuktinia áintsan̄ shuaran yaruaktatui. ⁴⁰ Yajauch nupā irur jinium áesatniua áanis nun̄ka amúamunam túrunattawai. ⁴¹⁻⁴² Nūj Wi Aents Ajasu asan winia suntarun akupkattajai. Tura ashí tunaan túruinia nunasha tura chikichan tunaanum útsuinia nunasha mash irurar jinium apeawarta-tui. Nūjsha ti úutin ti wáitsatniusha átatui. ⁴³ Antsu péñker túruinia nuka ti shiir wincha ajasar ni Aparj akupeana nūj etsa núnis tsáapnin ajasartatui. Wats, kuishim átsuk. Antukta.’

(5) *Kuit wáinkiamu*

⁴⁴ ‘Shuar Yus akupeamunam pachiinkiatin kuit nunká uukma áintsankete. Shuar nu kuítian wáiniak nuin ataksha uukmai. Tura ti waras waketki nu kuit niiniu atí tusa ashí ní takakman suruk nu nunkan sumakmai.’

(6) Kaya shiirmach ti kuitia nu

⁴⁵ ‘Shuar Yus akupeamunam pachiinkiatin júnisaiti. Shuar kayachin ti shírman eak wekaana áintsankete. ⁴⁶ Tura kayan ashí nankaamas kuit jeean wáiniak waketki ashí takakna nuna suruk nu kayan niiniu atí tusa súmawai.’

(7) Neka

⁴⁷ ‘Shuar Yus akupeamunam pachiinkiatin júnisaiti. Shuar nekajai namakan achía áintsankete. Nekan nayaantsanam ajuntak niisháa namakaim achíawai. ⁴⁸ Tura nekanam nemarmatai kukar jiiiki, nuí péñker namak-nasha chaninnium chumpiniawai. Tura yajauch namaknaka ajapenawai. ⁴⁹ Núnisan átatai nunka amúamunam. Yusa suntari taar Yus-shuaran tura íwianch shuaran akantrattawai. ⁵⁰ Tura íwianch shuarnaka uunt jinium apeattawai. Nuísha tí úutin ti wáitsatin átatai.” Nuna ashí ní unuiniamurijjai áujmatsamiayi Jesús.

Yamá nekaamujajsha tura yaunchu nekaamujajsha Yus-shuaran yáintiniaiti

⁵¹ Jesús nuna tinia amuk “¿Jú mash antukurmek?’ tímiayi.

Tutai ní unuiniamurj “Ee, Uunta, ashí antukji” tiarmiayi.

⁵² Tuiniakui Jesús tímiayi “Shuar ashí Yúsnan péñker unuimiaruka aents kuítriniua áintsankete. Ní ikiutairiya yamarmancha yaunchu sumakmancha jushanniaiti. Núnisan nu shuar yamá nékamujajsha tura yaunchu nékamujajsha Yus-shuaran yáintiniaiti.”

Jesús Nasarénum waketkimiania nu

(Márkus 6.1-6; Rúkas 4.16-30)

⁵³ Jesús nu métek-taku chichaman áujmatas amuk nuyá wémiayi. ⁵⁴ Tura ní péprurin Nasarénum jeá Israer-shuar iruntainiam wayá unuiniamiyai. Tura nuyá shuar antukar tí enentaimprarmiyai. Tura “¿Jusha tui imiá unuimiaruit, tiarmiayi. Itiurak aents tujintiamun túramniait? ⁵⁵ Juka karpintíru uchirinchkukait. Nukurjsha Marichukait. Tura ní yachjsha Jakupu, Jusé, Semun, Jútas ániatsuk. ⁵⁶ Tura ní umajsha iijjai írutra pujuiniatsuk. ¿Nuikia itiura mash neka?” tiarmiayi. ⁵⁷ Túrawar Jesusan itiurchat enentáimturarmiyai.

Túramtai Jesús chicharuk “Yúsnan etserniun ashí shuar péñker anturainiawai, antsu aya nuna nunkeyanka ní shuarinkia nin anturainiatsui” tímiayi. ⁵⁸ Tura nú shuar Jesusan enentáimtuiniachu asamtai aentsti tujintiamun aya ishichik túramiyai.

14

Imiakratin Juan jakamu

(Márkus 6.14-29; Rúkas 9.7-9)

¹ Kariréa nunkanam Erutis akupniuyayi. Tura Jesús túramuncha antukmiayi. ² Tura ní írutraturin tímiayi “Nuka imiakratin Juan jakamunmaya nantaki túrawai auka. Tuma asa aents tujintiamun túrawai” tímiayi. Kame Erutis Juan kan maa asa tímiayi.

³⁻⁴ Akupin Erutis ní yachj Jiripi nuwen Jirutíasan akintrukmatai Juan Erutisan “Amé yatsumi nuwé akintrukchatniuitme” tímiayi. Tutai Erutis Juan kan

achik jirujaj jin̄kiá sepunam en̄keatarum tusa akupkamiayi. ⁵ Niisha Juan̄kan máataj tukamá aentsun ashamiarmiayi. Ashí aents “Juan̄ Yúsnan etserniuiti” enentáimtuiniakui ashammiai. ⁶ Tura akupin Erutis akiiniamu tsawantr̄j jeamtai nú námpertin Jirutíasa nawantr̄j ashí ípiaamu pujuiniamunam jantsemamiayi. Túramtai Erutis shiir enentáimtak ⁷ “Ame ashí wakeram nu seattai, tímiayi. Nekasan amastatjai, Yussha iirui” tímiayi.

⁸ Tutai nu nuwàch emka ni nukur̄j akatramu asa Erutisan chicharuk “Imi-akratin Juan̄ka muuké tsupikiam amamkunam en̄keram surústá” tímiayi.

⁹ Tutai Erutis wake mesekmiayi. Túrasha “nekas Yus iirui” tiniu asa tura ni amikr̄isha antukaru asamtai umikmiayi. ¹⁰ Ni suntar̄in sepunmayan Juan̄ka muuken tsupik itiarti tusa akupkamiayi. ¹¹ Tura amamkunam itiar nuwàchin súsarmiayi. Tura niisha ni nukur̄j susamiayi.

¹² Nuyá Juan̄ka írutramur̄j tariar ayashí jukiar iwiarsarmiayi. Túrawar Jesusan ujauwearmiayi.

*Jesus sen̄ku mir (5000) áishman̄kan ayuramiania nu
(Márkus 6.30-44; Rúkas 9.10-17; Juan̄ 6.1-14)*

¹³ Jesus nuna antuk Niñki ni unuiniamur̄jijain̄ kanunam en̄kemar arant aents atsamunam wémiayi. Túrasha nuna aents nekaawar kukarak weri-armiayi Jesusan. ¹⁴ Kanunmayā jiniñaj tukamá untsur̄j áentsun wáinkiamiayi. Tura wáiniak waitnentrarmiayi. Tura jáiniñcha tsuárarmiayi. ¹⁵ Kíakui ni unuiniamur̄j Nin tariar tiarmiayi “Kíawai, Uunta. Tura shuar t̄jiuch pujaaka atsawai. Ju aents akupkarta. Péprunam wear sumak yuuwearti” tiarmiayi.

¹⁶ Tutai Jesus tímiayi “¿Urukamtaik wearat? Antsu atumek ayuratarum.”

¹⁷ Tutai tiarmiayi “Íikia takaktsuji. Aya sen̄ku (5) tantachik jimiaichik namakchijain̄ takakji.”

¹⁸ Tuíniakui Jesus “Wats, nu itiarititarum” tímiayi. ¹⁹ Tinia aents chírichriniam pujusarti tusa akupkamiayi. Nuyá sen̄ku (5) tantancha jímiar namaknasha achik nayaimpiniam ímias Yúsan yuminsamiayi. Tura puur ni unuiniamur̄in aents ayuratarum tusa súsarmiayi. ²⁰ Ashí yurumáwar jémararmiayi. Tura nuyásha puunaruka tuse (12) chan̄kin tiarmiayi. ²¹ Nuj̄ yurumáwarmia nusha nuwásha uchisha nekapmatsuk sen̄ku mir (5000) aya áishman̄ áirmiayi.

*Jesus entsá pátatek wekasamiania nu
(Márkus 6.45-52; Juan̄ 6.16-21)*

²² Nuyá Jesus ni unuiniamur̄in kanunam en̄kemprarum amain émaa ajatarum tusa akupkarmiayi. Niisha áentsun akupkarmiayi. ²³ Akupkarsha naint waka Yúsan áujumiayi. Káshisha nūj Niñki tuke pujumiayi. ²⁴ Tura antumiañ tí wan̄karam asamtai kanu ajapén ajasmatai nase tukumma entsa tamparukmiayi. ²⁵ Tsawaana aj̄ nii tuke wenaj̄ Jesus entsá pátatek wekas pujuiniamunam jeamiayi. ²⁶ Tura ni unuiniamur̄j entsá pátatek wekaan wáinkiar tí sapijmiakarmiayi. Tura ashamainiak “wakanchashit” tiarmiayi.

²⁷ Tuíniakui Jesus tiarmiayi “Kakaram ajastarum. Wiit̄jai. Asham-prukairap.”

²⁸ Takui Pítur chicharuk tímiayi “Uunta, Ámetkumka nūj wekasa jeatin untsurkata.”

²⁹ Takui Jesus tímiayi “Wats, winitia.”

Tutai Pítuur kanunmaja akaikin Jesus wajana nuĵ jeataj tusa entsá pátatek wekasamiayi. ³⁰ Tura ti nasen násentun nekáa ashamkamiayi. Ashama asa entsá wayamiayi. Tura “Uuntá, achirkata” tu untsummiayi.

³¹ Nu chichamtaik Jesus uwejnun achik júak “Maa, Yus imiá ishichik enentáimtuschamek” tímiayi. ³² Tura kanunam enĵkemáwarmatai nasesha menĵakamiayi.

³³ Túramtai kanunam enĵkemarmia nusha Jesusan tikishmatar chicharuk “Nekas ame Yusa Uchirínme” tiarmiayi.

Jesus Jinisarítiumiĵ shuaran tsuármiania nu
(Márkus 6.53-56)

³⁴ Tura amainĵ katiñkiar Jinisarít nunĵkanam jearmiayi. ³⁵ Tura nuyá aents Jesusan nekaawar nu nunĵkanam ashí ujanairarmiayi. Túrawar jaancha ni pujamunam itiararmiayi. ³⁶ Ni pushirínkisha antiñtai tusar seawarmiayi.

15

Shuáran yajauch awajeana nuna Jesus jintintiamiania nu
(Márkus 7.1-23)

¹ Nuyá Jerusarén péprunmaja Pariséusha yaunchu akupkamu jintinniurĵsha Jesusan tariar aniasarmiayi ² “¿Urukantai ame unuiniamuram ii uunĵri yaunchu jintintrarmia nuna uminiatsu? Iis, ikĵmiatskesha yurumáiniawai” tiarmiayi.

³ Tuíniakui Jesus aniasarmiayi “¿Urukantai atumsha Yus akupkamu umirt-suk aya aents akupkamu umiirum? ⁴ Iis, Yus tíchamkia: “Ame apa, nukusha shiir enentáimtustarum.” Tura “Shuarsha ni aparíncha nukuríncha katsekka nu shuar jakati” tíchamkia.

⁵⁻⁶ Antsu átumka tárume “Shuar ashí niiniu íranna nuna mash “Yúsnaiti” takui nuikia nujai ni aparíncha nukuríncha yáinĵchamniaiti, tárume. Nin yáinĵtinian nakitiak ayatik “Ashí winia áiniana nu Yusna asamtai yáinĵchamniaitjame” títiniaiti” tárume. Núnisrum tákuram Yus akupkamu iniaisarum aya aents akupkamu umiirume, tímiayi. ⁷ Antra chichamtiniaitrum. Yúsnan etserin Isayas yaunchu nekas atumin áartampramiayi júna:

⁸ “Jú aents ni wenejai shiir awajtuiniawai, tura ni enentái jechat pujuiniawai. ⁹ Tura tukeneasan shiir awajtuiniawai. Aentsu chichamenĵ jintintiainiyat “Yusa chichamente” tuiniawai.” Tu áarmiayi” tímiayi Jesus.

¹⁰ Tínia shuaran untuk tiarmiayi “Jú antukrum péñker nekaatarum.

¹¹ Aents yúana nuka shuáran yajauch awajsashtatui. Antsu wenunmaja jíinia nuka shuáran yajauch awajeawai” tímiayi.

¹² Nuyá ni unuiniamurĵ Jesusan tariar “Maa, Pariséu ame chichammin antukar ti itiuŵchat enentáimprarai” tiarmiayi.

¹³⁻¹⁴ Tuíniakui Jesus tímiayi “Ikiuktiarum. Kusuru áintsan áiniawai. Tura kusuruncha jintintiainiawai. Mai kusuru ásar mai wágnam akaiki iniaawartatui. Wats, ajanam nupá áintsan áiniawai. Tura ashí winia Apar nayaimpiniam pujana nu araachmaka takamtusuk uwé ajapamu átatui” tímiayi Jesus.

¹⁵ Takui Pítuur Jesusan tímiayi “Nu métek-taku chicham paant awajsata.”

¹⁶ Tutai Jesus tímiayi “¿Atumsha nekaachurmek. ¹⁷ Enentáimprachurmek? Ashí wenunam wayaana nu wakenam wéatsuk. Tura nuyá iniañkastiniaiti.

18 Antsu wenunmayā jiniia nu enentáinmayā jiniiu asa áentsun yajauch awajeawai. 19 Enentáinmayā ashí yajauch enentáimsatin jiniiniawai. Mañkartuatniusha, chikicha nuwé kasamkatniusha, tsanirmatniusha, kasamkatniusha, wáitruatniusha, yajauch áujmatsatniusha 20 ashí nu áiniawai nekaska shuáran yajauch awajeana nu. Tura ikijmiatsuk yurumátniuka shuáran ni enentáin yajauch awajeatsui” tímiayi.

*Nuwā Israer-shuarcha Jesusan enentáimtusmania nu
(Márkus 7.24-30)*

21 Jesus nuyá jinki Tiru péprunmasha Sitiun péprunmasha wémiayi. 22 Tura nu nunñanmayā nuwá Jesusan tarí tímiayi “Uunta, uunt akupin Tawit ame wegrum asamtai winia waitnentrurta. Nawantur yajauch wakantruku asa ti wáitrutawai” tímiayi.

23 Tura Jesus áikchamiayi. Tura ni unuiniamurj tariat “Awemata, tiarmiayi. Tuke unsumki apapétmaji” tiarmiayi.

24 Nuyá Jesus tímiayi “Aya Israer-shuarnum menkakarú áinia nuna eaktinian Yus akuptukuiti.”

25 Túrasha nuwá tikishmatar tímiayi “Uunta, waitnentrurta.”

26 Tutai Jesus tímiayi “¿Uchí apatkurj jurukir yawá susamniakait?” tímiayi.

27 Tutai nuwá tímiayi “Nekas, Uunta, tame. Tura yawasha ni aentsrj yurumainiakui nunká iniaarun yuñiatsuk.”

28 Takui Jesus tímiayi “Maku, nekas Winia enentáimtursaitme. Ame wak-eram núnisan̄ atí” tímiayi. Tura nu chichamaik ni nawantrj péñker ajasmiai.

Jesus untsurj jáinian tsuararmiania nu

29 Jesus nuyá jinki Kariréa antumianka káanmatkarin waketkimiayi. Tura naint waka nuj pujusmiayi. 30 Nuñ untsurj aents Nin tariat shutuapnasha kusuruncha chichachuncha tsupirkamuncha chikich jáiniancha itiararmiayi. Túrawar nawenan aeprusarmiayi. Túram tsuararmiayi. 31 Nuna ísar chichachusha chichainiakui, tsupirkamusha péñker ajainiakui, shutuapsha péñker wekainiakui, kusurusha wáinmainiakui, ti shiir enentáimprarmiayi. Yus ni áentsrin Israeran yáinmatai shiir yuminsarmiayi.

*Jesus kuaru mir (4000) áishman̄kan ayuramiania nu
(Márkus 8.1-10)*

32 Nuyá Jesus ni unuiniamurj untsukar tiarmiayi “Ju aentsun waitn-tainiajai. Warí, menaintiu tsawant Wijjaj yurumtsuk yujainiatsuk. Ayurt- suk ni jeeñ akupkachminiaitjai. Jintiá pimpiki wáitsartatui.”

33 Ni unuiniamurj tiarmiayi “Túrasha, Uunta, ¿shuar atsaasha tuyan yuru- mak imiá sumaktaj' ju aents ayurawartincha?”

34 Jesus aniasarmiayi “¿Urutma tanta takakrum?”

Tutai niisha “Siati (7) tanta nuyá ishichik namak takakji” tiarmiayi.

35 Nuyá aents nunká pujusarti tusa akupkamiayi. 36 Tura siati tantan achik namaknasha achik nuyá Yúsan yuminsamiayi. Tura puur aents ayuratum tusa ni unuiniamurj susamiayi. 37 Ashí yurumáwaru jémararmiayi. Tura puunaru siati chañkin tiarmiayi. 38 Tura nuñ yurumáwaruka nuwasha uchisha nekapmatsuk aya áishman̄kak kuaru mir (4000) ármiayi. 39 Nuyá Jesus áentsun akupak kanunam enkemar Maktara nunñanam wémiayi.

16

Pariséusha Satuséusha iniakmamuṛin Jesusan seawarmiania nu (Márkus 8.11-13; Rúkas 12.54-56)

¹ Pariséusha tura Satuséusha Jesusan nekapsatai tusar tariarmiayi. Túrawar “Ame Yúsaiyáitkiunka kakarmarmijai nayaimpinnmayá iniakmasta, iisha wáinkiatái,” tiarmiayi.

² Tutai Jesus tímiayi “Átumka “Kapaaku péetar kíntiamkui kashin esatrurtaui” tíniuitrume. ³ Túrasha “Te ajas kapaaku péetar tsawaakui yumi yajauch átatui” tíniuitrume. Tura nekasaiti. Maa, átumka nayaim íisrum jú nuṅkanam túrunattana nu nékarme. Antsu Yus yamá jú nuṅkanam tura nuka nékatsrume. Ántrairume. ⁴ Aents yajauch ásar tura Yusan enentáimtachu ásar kakarmajai iniakmamun wakeruiniawai. Túrasha áyatik Junas túrunamia nuke iniakmas-tiniaiti” tímiayi. Tinia ikiuak wémiayi.

Pariséusha Satuséusha jintintiania nu aneartiniaiti (Márkus 8.14-21)

⁵ Tura entsá amaini katiṅkiar ni unuiniamurí tantan júkitniun kajinmatkiarmiayi. ⁶ Nuyá Jesus tímiayi “Wáinkiatarum, Pariséusha Satuséusha wakaprutai takakainia nújajsha aneartarum.”

⁷ Tutai ni unuiniamurí tiarmiayi “Ii tanta itiachakrin tátsuk.”

⁸ Jesus nuna antuk tímiayi “¿Urukamtai tanta itiachjí tunaiyarum. Yusa kakarmari kajinmatkintrumek. ⁹ Senku tantajai túramiaj nu kajinmatkintrumek. Senku mir (5000) áishmaṅkan ayuramtai untsurí chaṅkin tiármia nu enentáimtsurmek. ¹⁰ Tura siati tantajai kuaru mir (4000) áishmaṅkan ayuramtai nuna ishichik chaṅkin tiármia nu kajinmatkintrumek. ¹¹ Itiurak imiá nékatsrum? Wi Pariséu wakaprutairisha Satuséu wakaprutairisha aneartarum tákun penké tantan tátsujai” tímiayi. ¹² Nuna Jesus takui ni unuiniamurísha nekaawarmiayi. Penké tantaa wakaprutairin tíchamiayi antsu Pariséusha Satuséusha unuiniatairin tímiayi.

Pítiur Jesusan Yus anaikiamun paant ujakmiania nu (Márkus 8.27-30; Rúkas 9.18-21)

¹³ Tura Sesaria-jiripiunam jeawar Jesus ni unuiniamurin aniasarmiayi “Aents Ajasuitjiana júna ¿yaiti turutainiawa Winia?”

¹⁴ Niisha ayak tiarmiayi “Chíkich, imiakratin Juánkaiti turamainiawai. Chíkichka, Eríasaiti turamainiawai. Chikichcha Jeremíasaiti, chikichcha chíkich aents Yúsnan etserniuiti turamainiawai” tiarmiayi.

¹⁵ Tutai nincha aniiniak “¿Atumsha yaiti túrutrum?” tímiayi.

¹⁶ Semuñ Pítrusha “Ámetme Kristu, Yus Anaikiamu. Nekas iwiaaku Yusa Uchirínme” tímiayi.

¹⁷ Tutai Jesus tímiayi “Shiiraitme Junasa uchirí Semuñka. Núnaka aents ujatmakchaiti antsu winia Apar nayaimpiniam pujana nu ujatmakmatai nekaam tame. ¹⁸ Tura Wisha tájame, ame Pítruitme, kayach tútaim. Nu kayanam jea jeamtinia áintsan Yus-shuaran ekenin tsakatmartatjai. Túramtai jákatniusha tura Yusa nemasrisha nu jeamman pukukchattawai. ¹⁹ Yus akupeamu yawincha amatatjai. Jú nuṅkanam jiníkiatniusha atíatniusha amasmaiti. Tuma asamtai ame jú nuṅkanam suritiam nu nayaimpin-masha suritniaktatui. Tura jú nuṅkanam tsan̄kateam nu nayaimpinmasha tsan̄katnaktatui” tímiayi. ²⁰ Nuna tinia Jesus ni unuiniamurin Kristuitiaj nu etserkairap tinia akupkarmiayi.

Jesus Nin máatniun etsertumakmiania nu

(Márkus 8.37-9.1; Rúkas 9.22-27)

²¹ Nuyá Jesus júna unuiniatan nankammiayi. “Wi Jerusarénnum wétiniaitjai. Nuí Israer-shuara úuntrišha, Israer-patri úuntrišha, Israer-shuara jintinniuršha ti wáitkiarsartatui. Nuyá mantuawartatui túrasha menaintiú tsawantaj nantaktajtjai.”

²² Takui Pítiur arantach júki chicharuk tímiayi “Uunta, nuka penké áchatniuiti. Áminkia túrutmacharminiaiti.”

²³ Jesus ayanmatar Pítrun tímiayi “Werumta, Satanása. Yajauch awajtame. Ámeka Yus wakeramu enentáimtsume. Antsu jú nunkanam enentáimainia áinis enentáimme.”

²⁴ Nuyá Jesus ashí ni unuiniamurjín tímiayi “Shuar Winia nemartustaj tusa wakerakka ni wakeramurjín iniais ni krusj yanaki Winia nemartusti.

²⁵ Shuar áyatik penker pujustaj tákuŋka nu shuar uwemtsuk jakattawai. Antsu jákatniuitkuisha penker pujustinian enentáimtsuna nú shuar nekas iwiaakman wainkiattawai. ²⁶ Wats, shuar ashí jú nunkanam írúnna nuna sumakka tura nujaj ni wakanj émesek žitiurak penker pujustj? Shuara wakanj emesramu žashí jú nunkanam írúnna nujaj iwiamarniakait? ²⁷ Wi Aents Ajasu asan, winia Aparu kakarmarjijaj tura ni suntarjijaj tana ashí shuáran ni takasmajaj métek akiktajtjai. ²⁸ Paant tájarme, shuar juí wajainia ju játsuk Wi akupin ajasmatai wáitkiartatui” tímiayi.

17

Jesus nushá iira ajasmiania nu

(Márkus 9.2-13; Rúkas 9.28-36)

¹ Nuyá sais (6) tsawant nankaamasar Pítruncha, Jakupuncha, tura ni yachj Juanasha níniak júkiar Jesus náinnium yakí wakamiayi. ² Nuí Jesus nusháa iira ajattsarmiayi. Ni yapisha etsaya áinis wincha ajasmiai. Ni pushiršha ti puju jiitsumir ajasmiai. ³ Nušha Muisaisnasha Eríasnasha Jesusaj chichainian wáinkiarmai. ⁴ Nuyá Pítiur Jesusan tímiayi “Uunta, ti shiir pujaji juí. Wakerakminkia menaint áakmaktai, Áminiu chikichik tura chikich Muisaisnasha, tura chikichcha Eríasna.” ⁵ Tura Pítiur tu auju wajái yuranjím ti puju amuamiayi. Tura nu yuranminmayá chichaman antukarmiayi. “Júka winia aneamu Uchiruiti, tímiayi. Nin ti shiir enentáimtajtjai. Nii penker anturkatarum” tímiayi. Tu chichasmiai Yus. ⁶ Nuna ni unuiniamurj antukar ti ashamkar pákea ajakiarmiayi. ⁷ Túrunawarmatai Jesus táriar antiñ “Ashamkairap, nantaktiarum” tiarmiayi. ⁸ Tura pankeinair íimij tukamá aya Jesusan wáinkiarmai.

⁹ Nuyá náinniumiá akainiak Jesus tiarmiayi “Átum ísurmena nu penké etserkairap. Wi Aents Ajasu asan jakamunmayá nantaatsaj etserkairap’ tímiayi.

¹⁰ Nuyá ni unuiniamurj Jesusan aniiniak “žUrukamtai in jintintra min “Kristu táatsaj Erías emka tátiniaiti” tuinia?” tiarmiayi.

¹¹ Tuíniakui Jesus áikmiayi “Nekas Erías tátiniaiti. Tura nii mash iwiaratawai. ¹² Kame nekas Erías táwiti tura nin nekaacharmai. Antsu aents wakeriarmia nuna túrawar yajauch awajarmiayi. Núnisañ Winiasha, Aents Ajasu ain, wáitkiarsartatui.” ¹³ Nuna takui ni unuiniamurj imiakratin Juánkan áujmatui, tu enentáimprarmiai.

Tsuumainti yajauch túrumtikiatin

(Márkus 9.42-48; Rúkas 17.1-2)

⁶ Shuar ju uchin Winia umirtana nuna tunaanum ajuarmataiñkia nuna túratsain niisha kuntujén kayajai jñkiar nayaantsanam ajapen kunanam ajunmaitkiunka maak ainti, tímiayi. ⁷ Ju nunkanam tunáa iniaatai íruluk tuke itiurchataiti. Antsu shuar chikichan tunaanum ajuarka ti itiurchatan inkiuntatu' tímiayi.

⁸ Nu asamtai ame uwejem tura nawem tunaanum ajunmatniuitkiunkia tsupikiam ajapata. Kame muntuch pujustin tura ukunam nayaimpiniam wétin péñkeraiti. Antsu kajinkiashtin jinium takamtsuk jeatniuka imiá yajauchiiti. ⁹ Núnisan ame jimi tunaanum ajunmatniuitkiunkia ukuinkiam ajapata. Kame chikichik jijjiaí pujusam nayaimpiniam wétin péñkeraiti. Antsu jinium mai jintiuk wétin imiá yajauchiiti' tímiayi.

Murik menkaaka áujmatsamu

(Rúkas 15.3-7)

¹⁰ Uchi ainia nu nakitirairap. Yusa suntari nin wáinkiatniua nu winia Aparu j tjuuch pujuiniawai. ¹¹ Kame wi Aents Ajasu asan, menkaakarun éaktajtsan táwitjai.

¹² 'Enentáimpratarum. Shuar sian (100) murikiun takakuitiat chikichik menkakamtai untsurí menkakacharun náinnium matsaak, menkakan éaushatuak. ¹³ Wáinkiasha untsurí menkakacharua nujai nankaamas waraschattawak. ¹⁴ Núnisan atumi Aparí nayaimpiniam pujana nu, nu uchi chikichikisha menkakacharti tawai' tímiayi.

Yus-shuarti tsankurnairatin

(Rúkas 17.3)

¹⁵ 'Chikich Yus-shuar ámin yajauch túrumtakuñkia nii werim áujtsata. Tura ámechik werim ame yatsumjai chichasta. Anturtamkuñkia ame yatsum yáinkiume. ¹⁶ Tura anturtamchakuñkia nuyá chikichik shuar jimiari shuarsha jukim ataksha weritia. Túram ataksha áujnaisatarum, niisha paant nekaawarat tusam. ¹⁷ Túrasha yatsum tuke ántachkuñkia Yus-shuar iruntainiam iwiainiakta. Túrasha yatsum tuke ántachkuñkia Yus-shuarcha núnisan enentáimtusta nu shuar.'

¹⁸ 'Nekasan tájarme, ju nunkanam suritiam nu nayaimpinmasha suritniaktatu. Tura ju nunkanam tsankateam nu nayaimpinmasha tsankatnaktatu.'

¹⁹ 'Núnisnak tájarme, ju nunkanam pujusrum jimiariá Yus-shuarterim métek enentáimprarum winia Apar nayaimpiniam pujana nu seakrumniñkia wakerarmena nuna suramsattarme. ²⁰ Jímiar menaintiusha Yus-shuar Winia enentáimturuk iruntrarmatai Wisha nu j nijjiaí pujajai' tímiayi Jesus.

²¹ Takui Pfiur werí Jesusan aniasmiayi "Uuntá, winia yatsur yajauch awajtakui ¿urutma tsankuratniuitiaj. Siátikik tsankuratniuitiaj?"

²² Jesus aiyak "Siátik tátsujme, antsu inianatsuk tsankuratniuitme" tímiayi.

Takakmau tsankurachun pachis áujmatsamiania nu

²³ Tuma asa Jesus Yus akupeemunam pachiinkiaru tsankurnairartiniaiti tusa ju métek-taku chichaman áujmatuk tímiayi, "Uunt akupin takarin tumashin akirkarat tusa untsukarmai. ²⁴ Yama nánkamuk ti nukap tumashmakua nuna untsukmai. Akikmakchamnia ti tumashmakuyi. ²⁵ Tura nu takakmau kuitri atsakui uunt akupin "Yajasma áitkiasrum nuartiuk uchirtiuk ashí waririntiuk suruktarum, timiai. Nu kuitjai akirkati" timiai.

26 Tutai nu takakmau uunt akupniun tikishmatar seak timiai “Uunta, waitneasam nákarsatá. Auka, mash akikatatjame.” 27 Uunt akupin waitnentar mash tsankur ankant akupkamai. 28 Tura nú chichamaik nú takakmau jiiñki ni ain inkiunmai. Nú aisha nin ishichik tumashiyyi. Tura tsékeñki suwenam achik chicharuk timiai “Wari akirkata tumashitmena nu.”

29 Tura ni aḡ nin tikishmatar timiai “Waitneasam nákarsatá. Auka, mash akikatatjame” timiai. 30 Túrasha nakitramai. Antsu tsankurtsuk sepunam enkeamai ashí akirkatí tusa. 31 Chíkich takakmau nuna wáinkiar ti kúntuts enentáimtuiniak uunt akupniun ashí etsertukarmai. 32 Nuna antuk uunt akupin untuk itia timiai “Yajauchiitme. ḡWinia “waitnentrurta” túrutkumin tsankurachmakjam? 33 Amesha núnismek ame aḡm tsankuratniuitme” timiai. 34 Tinia uunt akupin kajekmai. Tura ashí tumashin akikmatsuk asutniati tusa suntarnum surukmai.” 35 Jesus nuna áujmatas amúak tímiayi “Núnisaḡ winia Apar nayaimpiniam pujana nu atumin túrutmattarme atumi yachi nekas enentáijjai tsankureachkurminkia.”

19

Jesus nuwá ajapatniun áujmatsamiania nu

(Márkus 10.1-12; Rúkas 16.18)

1 Jesus nuna tinia ikuak Kariréa nuñkanmayá wémiayi. Tura Jurtañ entsa amain Jutía nuñkanam jeamiayi. 2 Untsurí aents nemariarmiayi tura jáiniancha péñker awajsamiayi.

3 Nuḡ Pariséu Jesusan nekapsataj tusar aniasarmiayi “ḡShuar ni nuwen itirchat akui ajapamniakait?”

4 Tutai Jesus tímiayi “ḡÁtumka Yus-Papí áujtsachukaitrum? Yámankamtaik Yuska shuáran áishmañkan nuwáncha najanamiai tawai. 5 Tuma asamtai áishmañ ni aparín ni nukurín ikiuki ni nuwejai tsaniñ chikichik ayashtinia áinis ajasartatui, tu áarmaiti, tímiayi. 6 Tuma asa jímiarcha antsu chikichik ayash áiniawai. Tuma asamtai shuar Yus apatkamia nuna, aents akankash-tiniaiti’ tímiayi.

7 Takui tiarmiayi “Nuikia ḡurukamtai papí áarar nuwá ajapatniun Muisais tsankatkamia?”

8 Tutai Jesus tiarmiayi “Timiá ántichu asakrumin nuwá ajapatniun tsankatkamiayi. Túrasha émkaka núnischauyayi. 9 Wi tájarne, shuar ni nuwen chikichjai pujuschan ajapeakka tura chikichan nuatkunka tsanirmayi. Chíkich áishmañsha nuwá ajapamun nuátkan̄ka nusha tsanirmayi” tímiayi.

10 Takui ni unuiniamurí tiarmiayi “Nuikia áishmañ ni nuwé penké ik-iukchamniaitkiuñkia nuátkachminiaiti.”

11 Jesus tiarmiayi “Nu chichamnaka mash antukchamin áiniawai. Antsu Yus nuna umiktin susamua nuke antukmin áiniawai. 12 Chíkich chíkich nuatkachmin áiniawai. Chíkich nuátkachmin akiiniawaru áiniawai. Chikichcha aentsjai nuátkachmin najanaru áiniawai. Chikichcha nuátainiatsui Yus aku-peamu takatan takastinian. Juna antuktinian jeáka antukti.”

Jesus uchin shiir awajsamiania nu

(Márkus 10.13-16; Rúkas 18.15-17)

13 Nuyá Jesusan uchin itiariarmiayi. Nin antin Yúsan áujtusarat tusar wakeriarmiayi. Túruiniakui ni unuiniamurí chicharkarmiayi. 14 Túruiniakui Jesus tímiayi “Uchi Winí winitin tsankatkatarum. Suritkiairap. Kame ju

uchia áintsan pééjchach áinian nunak Yus akupkamniaiti.” ¹⁵ Tinia uchin miniakas nuyá wémiayi.

Kuítrintin Jesusjaj chichasmiania nu
(Márkus 10.17-31; Rúkas 18.18-30)

¹⁶ Shuar natsa Jesusan tarin aniasmiayi “Uuntá, péñkeraitme. Tuma asam turuttia ¿warinia túrakna tuke iwiaaku átataj?” tímiayi.

¹⁷ Tutai Jesus nin enentáimtikrataj tusa tímiayi “¿Urukamtai péñkeraitme túrutam. Shuar péñkerka atsatsuk. Aya Yúskechukait? Wats, tuke iwiaaku pujustaj tákumka akupkamu umírkartá.”

¹⁸ Tutai shuar “¿Tuna nekas umirkatniuitiaj?” tímiayi.

Takui Jesus tímiayi “Mañkartuawaip, tsanirmawaip, kasámkaíp, chíkich shuar tsanumpruraip, ¹⁹ ame apa nukusha umírkartá, ame shuárum ame ayashim aneamna nútiksamek aneeta.”

²⁰ Tutai natsa tímiayi “Núnaka úchichik mash umiki tsakaruitjai. Nuyasha ¿warí táatrusa?” tímiayi.

²¹ Takui Jesus tímiayi “Nekas péñker átaj tákumka, weme ame kuítrum kuítrincha ainia nu súsartá. Tura nayaimpiniam kuítrintin ajastatme. Nuyá Winia nemártustá” tímiayi Jesus. ²² Tura natsa nuna antuk kúntuts wémiayi ti kuítrintin asa.

²³ Nuyá Jesus ni unuiniamurjñ tiarmiayi “Nekasan tájarme, kuítrintin Yus akupeamunam pachiinkiatin ti itirchataiti. ²⁴ Ataksha tájarme, kamiriuka kawái nankaamas uunt asa auja jñin wayachminiaiti. Núnisan kuítrintin Yus akupeamunam pachiinkiatin ti itirchataiti.”

²⁵ Ni unuiniamurjñ nuna antukar antúu ajarmiayi. Túrawar aniniainiarmiayi “¿Nuikia yaki uwempramniait?”

²⁶ Túniakui Jesus ashí ísar tímiayi “Aents uwempratniun nekas tujintiaini-awai antsu Yuska ashí tujintiatsui.”

²⁷ Nuyá Pítur tímiayi “Uuntá, iikia ashí ikiukchajik Ámin nemarsatai tusar. ¿Warin wáinkiatjaj iisha?”

²⁸ Jesus tímiayi “Nekasan tájame, ukunmañka ju nuñka yamaram ajastatui. Aents Ajasu asan, Wisha nuj, uunt akupin ajastatjai tura atumsha winia nemartusutirmeka Wijjaj métek akupin ajastatrome ashí Israer-shuar akupkat. ²⁹ Tura shuar ni jeñcha, yachincha, umaincha, aparincha, nukurincha, nuarincha, uchirincha, tura nuñkencha Winia anentu asa ikiukiñ wekaakka, nu shuar nii ikiukmia núnisan yamaisha ti untsurj wáinkiatawai tura ukunmasha tuke shiir pujustatui Yusjaj. ³⁰ Untsurj yamá peñkerj ánianana nu ukunam ukunmaani pujusartatui, tura yapajjáwar yamá ukunmayá ánianana nu ukunam emka pujusartatui’ tímiayi Jesus.

20

Jesus takarniun pachis áujmatsamiania nu

¹ Yus akupeamunam pachiinkiatin júnisaiti. Nuñka nérentin ni araamurjñ júuktaj tusa káshik iniartaj tusa jñinkimiayi. ² Chikichik tenariu kuit jean tsawant takamtsuk akiktajrume tusa chichas ni araamun júuktinian akupkarmiayi. ³ Nantu takuntajsha ataksha jiinki shuar yujan wáiniak ⁴ timiai “Atumsha winia arakur júuktin yáintkiatarum. Shiir akiktajrume.” Tutai wearmai. ⁵ Ataksha tutupin aj nuyá áañkúsha jiinki, núnisan tinia

akupkarmai. ⁶ Ataksha nantu patamsaj jínkimiai. Tura shuaran yujan wáiniak “¿Urukamtai takakmatskesha áani pujarum?” timiai.’

⁷ “Warí, iincha iniatmainiatsji” tiarmai.’

“Tuíniakui timiai “Atumsha winia nunkaruj takautarum. Péñker akikta-rume.”

⁸ ‘Kirit ajátekiáj takatrjn wáinniun timiai “Takatan takasaru untsukam akikiarta. Kíaraj nankamawaru emka akikiarta. Túram káshik nankamawarujaj amuktá” timiai. ⁹ Takui nantu patamsa aj nankamawaru wayawarmatai chikichik tenariu kuit jean ashí akikiarmai. ¹⁰ Mash umintramtai nuyá emka nankamawaru wayawar “nuna nankaamas achikchatjash” tu enentáimsarmai. Tura chikichik tenariu kuit jean achikiarmai. ¹¹ Achikiar nérenniun itiurchat enentáimturarmai. ¹² Tura tiarmai “Íikia ashí tsawant nantujaj wáitsachjik. Ju shuarsha nantu patamsa aj nankamawaruka penké ishichik takasarai. Túrasha iijijaj métek akikiarume” tiarmai.

¹³ Tutai nérentin chikichkiniak iniakmas timiai “Umpá, penké kasartsu-me. Káshik chikichik tenariu kuit jeá chichasar iijijaj iwíarachjik, timiai. ¹⁴ Pai, ame kuítrum achikiume. Nantu patamsaj takasuncha amijijaj métek akiktinian wakerajai. ¹⁵ Warí, winia kuítrujaj wi wakeramun túrachminkaitiaj. Antsu wi tsan̄ka asamtai ¿yajauch enentáimturmek?” timiai.’

¹⁶ ‘Núnisaiti Yus-shuarnum. Émkaru áinia nu uku ártatui. Tura ukuya áiniana nu, emka ártatui. Untsurj ípiaamu áiniawai tura ishichik achikma áiniawai.” Tu áujmatsamiayi Jesus.

*Jesus ataksha ni jákatniurjn etserkamiania nu
(Márkus 10.32-34; Rúkas 18.31-34)*

¹⁷ Jesus Jerusaréñnum jintiá wesa ni unuiniamurjn akankin tiarmiayi ¹⁸ “Iistarum, Jerusaréñnum wéaji. Nujsa Israer-patri úuntrjn tura ni jintin-niurjncha Winia surutkartatui. Nujsa, wi Aents Ajasu ajn, “mantamnai” túrutartatui. ¹⁹ Tura apachniun surutkartatui. Nuñ katsekrukar, awattiar krúsnum máawarti tusar túrutawartatui. Túrasha jakayatan menaintiú tsawan-taj nantaktiatjai” tímiayi.

*Jakupu tura Juañka nukurj Jesusan seamiayi
(Márkus 10.35-45)*

²⁰ Nuyá Jakupusha Juañsha, mai Sepetéu uchirj, nukurjijaj tariaj Jesusan tikishmatrarmiayi. Tura nukurj Jesusan waitnentrutarat tusa seamiayi. ²¹ “¿Warí wakeram?” tímiayi Jesus.

Tutai nuwá tímiayi “Ame uunt akupin ajastatmena nuñ winia uchir chikichik untsuurnumaani chikichcha menaanmaani akupkarti tusam apu-sarta.”

²² Takui Jesus tiarmiayi “Atum seatrumna nu nékatsrume. ¿Wi wáitsattajna nuñaj métek túramniakaitrum? Wi wáitsatniun yapá umartinia áinis umar-tinaitjai. Núnisañ wáitsatniujaj imiaitniua áintsan imiantinaitjai. ¿Nu pininnumiá umarminkiaitrum. Núnisañ imianminkiaitrum?”

Tutai “Páchitskea” tiarmiayi.

²³ Tuíniakui Jesus tímiayi “Ayu. Winia pininkrujya umartatume. Wi imiantiatjana nuñaj imiantiatrume. Antsu Wijijaj tsaninkia pujustinniaka Wikia íschatniuitjai, antsu winia Apar iwíarturu áinia nuna nuñ apujsattawai” tímiayi.

²⁴ Chíkich tias (10) unuiniamurí nuna antukar nu jímiarán kajerkararmiayi. ²⁵ Túmainiakui Jesus untsukar tiarmiayi “Ju nékarme, apachniúmka kapi-tián ajasar ní shuarín nérenniua áinis ti akupenawai. Ní úntrisha waantu enentáimsar “wítjai akupniun” tu enentáimtikiainiawai. ²⁶ Antsu atumjainkia núnis áchatniuiti. Nankaamaku ajastaj tákuŋka chikicha yaintrí átiniaiti. ²⁷ Ame kapitíántrum ajastaj tákuŋka ashí shuara yaintrí ajástí. ²⁸ Wisha Aents Ajasuitiatan, Winia yáintkiarat tusan táchaitjai antsu shuáran yáintaj tusan táwitjai. Untsurí shuaran tunáa tumashrin akikmatkataj tusan jákatniuitjai. Nuna tarimjai” tímiayi Jesus.

Jímiar jii kusurun Jesus tsuármiania nu
(Márkus 10.46-52; Rúkas 18.35-43)

²⁹ Jirikiú péprunmaya wénakui untsurí aents Nin nemariarmiayi. ³⁰ Nuj jintiá yantam jímiar jii kusuru pujuarmiayi. Jesus wéawai taman antukar kakantar untsukarmiayi. “Uuntá, uunt akupin Tawitia Uchirínchukaitiam. Waitnentrurta” tiarmiayi.

³¹ Tuíniakui “Takamatsatarum” tiarmiayi.

Tútaisha nú nankaamas untsukarmiayi. “Uuntá, Tawitia Uchiriá, waitnentrurta” tiarmiayi.

³² Tuíniakui Jesus wajas jii kusurun untsukar aniasarmiayi “¿Warí ititurukat tusarum wakerutarum?”

³³ “Uuntá, iimtai tusar wakeraji” tiarmiayi. ³⁴ Tuíniakui Jesus nin waitnentrar ní jii antíkiarmiayi. Nu chichamaik ímiar níisha Jesusan nemariarmiayi.

21

Jesus Jerusarénum wayamiania nu
(Márkus 11.1-11; Rúkas 19.28-40; Juan 12.12-19)

¹ Jerusarénum nuntumsar Petpajái péprunam jeawarmiayi. Nusha Uri-wiu náinnium ayamchiyayi. Nuj jeawar Jesus ní unuiniamurín jímiarán aku-peak tímiayi ² “Tíjiuch péprunam wérum umpuuru umpuuruchijjai jínkiamu wáinkiatarme. Nu atiarum itartitiarum. ³ Tura aents “Urukamtaí áitkiarum” túramkurminkia “Uunt wakerawai, tura wárik awainkittiwai” titiarum” tímiayi.

⁴ Tura nusha yaunchu Yúsnan etserin aarmia nu umínkiatí tusa tímiayi. Júnis áarmiayi:

⁵ “Ashí Israer-shuarnum ju etserkatarum:

“Iistarum, atumi Akupniurí, pééjchach ajas umpuuruchiniam ekeemak winitramprome. Pééjchach asa káarak áintstai umpuuru uchirín ekeemak winitrámtatrome,” titiarum.” Tu áarmaiti.

⁶ Tutai nu jímiar unuiniamurí wear Jesus timia núnisan túrawarmiayi.

⁷ Umpuuruchin nukurtiuk itiararmiayi. Tura ní pushirín áitkiaram Jesus entsamkamiayi. ⁸ Shuar untsurí ásar ní wéamunam pushirín áitkiarmiayi. Chikichcha nuká jurukar ní wéamunam áeprurarmiayi. ⁹ Shuar untsurí eem wearmia nusha tura uku winiarmia nusha kakantar untsumiarmiayi. “Juna weatrí uunt akupin Tawit asamtaí nankaamakuiti. Yusa náariin winiana ju ii Uuntrinti. Shiir atí. Nayaimpinmasha Yus shiir awajsatai.” Tu untsumiarmiayi.

¹⁰ Jesus Jerusarénnum wayamtai ashí shuar ti enentáimainiak “¿Yusha yait?” tiarmiayi. ¹¹ Chikichcha “Yúsnan etserin Jesusaiti, tiarmiayi. Nasarét pepru Kariréa nunkanmayaiti” tiarmiayi.

Yusa Uunt Jëen suruktinian Jesus surimkiamiania nu
(Márkus 11.15-19; Rúkas 19.45-48; Juan 2.13-22)

¹² Nuyá Jesus Yusa Uunt Jëen wayá kuítian súruiniak tura súmainiak pujan akúprámiayi. Kuitian yapajinia misaríncha ayanturmiayi tura yampitsa súruinia kutañkríncha núnisan ayanturmiayi. ¹³ Nuyá tímiayi “Yus-Papinium áarchamukait,

“Yusa Jëenka Yus aujtai jéaiti.” Antsu átumka kasa matsamtaiyi nútikiarme” tímiayi.

¹⁴ Nuñ Yusa Jëen jii kusurarusha shutuapsha Jesusan tariarmiayi. Túramtai tsuárarmiayi. ¹⁵ Tura Israer-shuar pátrisha tura Israer-shuara jintinniurisha aents tujintiamun Jesus túrakui ísar kajerarmiayi. Nu arantcha uchi Yusa Jëen “Juna weatři uunt akupin Tawit asamtai nankaamakuiti” unsumainiakui Jesusan ti kajerarmiayi. ¹⁶ Tura tiarmiayi “¿Ju uchi tuinia nu ántamek?”

Tutai Jesus “Ee, ántajai, tímiayi. Átumka Yus-Papí juna tana juka áusachukaitrum. Júnis tawai, “Uchisha kuírchisha Yusa náarín imiá shiir awajtusarat tusa Yus tsañkatkaiti.” Tu áarmaiti.

¹⁷ Nuna tinia ikiuniak Jerusarénnumiá jiinki Petania péprunam we nuñ kanarmiayi.

Jesus iikiu numin yuminkramiayi
(Márkus 11.12-14, 20-26)

¹⁸ Kashin tsawaar Jerusarénnum waketas Jesus tsukaarmiayi. ¹⁹ Iikiu numi jintiá yantam wajan wáiniak akaktajtsa werimiayi. Tura werí aya núminiak wáinkiamiayi. Túra numin tímiayi “Atakka nerekchattame.” Takui nu chichamaik káarmiayi.

²⁰ Nuna wáiniak ni unuiniamurí ti enentáimprar aniasarmiayi “¿Urukaku imiá wárik jaka?”

²¹ Tuíniakui Jesus tiarmiayi “Nekasan tájarme, Yus nekas enentáimtakrumka, “nekasplash túrat” táchakrum iikiun túrajna nusha túramniaitrum. Tura nu arantcha nu naint “Ékemtam nayaantsanam iniañta” tutai túrunattawai. ²² Ashí Yus áujeakum seamna nu, Yus nekas enentáimtakum seakmeke, wáinkiáttame” tímiayi.

Yusa kakarmarjijai Jesus takasmiania nu
(Márkus 11.27-33; Rúkas 20.1-8)

²³ Yusa Uunt Jëen Jesus wayá unuiniamiayi. Turaj Israer-patri uuntri tura Israer-shuara úuntri tura Jesusan tariar aniasarmiayi “¿Yana chichamejai ju túram. Ya ju túratniuncha akuptamkait?” tiarmiayi.

²⁴ Tutai Jesus tiarmiayi “Wisha aniastaj tusan wakerajrume. Ju áirkakrumniñkia Wisha yana chichamejai túraj nuna ujakattajarme. ²⁵ Wats, ¿ya imiakratin Juanan akupkamia. Yusak, aentsuk, ya akupkamia?”

Tutai nuámtak tunainiarmiayi. “Yus akupkamiayi” tákurniñkia “¿urukamtai enentáimtichuitrum?” túramtatji. ²⁶ Kame “shuar akupkaiti” tákurnisha ashí aents mantamattaji. Warí, ashí niisha Juan Yúsnan etserniuyi tuíniatsuk” tiarmiayi. ²⁷ Nuyá Jesusan “Nékatsji” tiarmiayi.

Tutai Jesussha aḡiniak “Wátsek, Wisha núnisnak akuptukua nuna ujakchat-tajrume” tímiayi.

Jimiará uchi tiarmia nuna áujmatsamiania nu

²⁸ Jesus unuiniak tiarmiayi “Enentáimpratarum. Shuar uchin jímiaran takakuuyi. Nuna chikichkin chicharuk timiai “Uchirú, arakur júuktin yamáí wetá.”

²⁹ “Tutai uchi “Atsá, nakitiajai” timiai. Tayat urum enentáimiar takaumai.’

³⁰ ‘Nuyá aparí chikichnasha werí núnisan timiai.’

“Tutai uchi “Apawa, páchitsuk wetajai” timiai, túrasha wéchamai.’

³¹ ‘¿Túa ni aparí wakeramun umirkama?’ tímiayi Jesus.

Tutai “Emkaa nu” tiarmiayi.

Tuñiakui Jesus tímiayi “Nekasan tájarme, yajauch shuar ainia nu tura tsanirma ainia nusha átumka pachiiñtsrumniñ nii emka Yus akupeamu-nam pachiiñkiartatui. ³² Iis, imiakratin Juan péñker wekasatniun et-serkamiayi, túrasha antukchamarme. Antsu yajauch shuar ainia nu tura tsanirma ainia nu umirkarmiayi. Nusha wáinkiaiatrum atumi tunaari enentáimturchamarme’ tímiayi.

Yajauch takaun áujmatsamiania nu

(Márkus 12.1-12; Rúkas 20.9-19)

³³ ‘Jú chikich áujmatmasha antuktarum. Nunká nérentin uwa ajan ajam-mai. Tura wenuimiai. Uwa neketaincha najanamai. Kumpin jeancha najanamai. Tura mash péñker iwiar shuar wáitrukarti tusa apujkimiai. Tura ninḡia yajá nunḡanam wemai. ³⁴ Tura júuktin tsawant jeamtai juuk nakak akúptúrkarti tusa chikich takarniurí akupkamai. ³⁵ Tura nuḡ pujuinia nu, akupkamun achikiar chikichnaka katsumkar, chikichnasha máawar, chikichnasha kayajají tukurar máawarmai. ³⁶ Túrawarmatai nérentin takarniun nuna nanḡaamas akupramai. Ataksha nuḡ pujuarmia nu núnisan túrawarmai. ³⁷ Amúamunam ni uchirín akupeak “Winia uchirí samtai umirkachartimpiash” timiai. ³⁸ Túrasha nu takau nérenniun uchirín wáinkiar “Nuna aparí jakamtai juna mashi júkishtatuak, tiarmai. Maatai, túrar ii nérentin ajastai” tiarmai. ³⁹ Tiar achikiar arant júkiar nuḡ máawarmai.” ⁴⁰ Tinia Jesus aniasarmiayi “Nunká nérenniurí taa nu takaun ¿itiurkatiñ?” tímiayi.

⁴¹ Tutai tiarmiayi “Nu shuar ti yajauch ásarmatai waitnentsuk máawartatui. Tura nu ajan chikich takaun neren akanak nin susamnia nuna apujsattawai” tiarmiayi.

⁴² Tuñiakui Jesus tímiayi “Átumka Yus-Papikia ¿penḡek áujchaitrum? Júñis áarmaiti:

“Jea jeamin utsanḡarmia nú kaya ashí kayajají nanḡaamas apujsamuiti. Núnaka ii Uuntrí Yus túraití. Iisha iisar ti enentáimtaji.” Tu áarmaiti.

⁴³ Tuma asamtai tájarme, Yusna írúnna nu wáinkiatárum tusa suramsamuitiat atumiyá junas chikich aents súnastatui. Niisha awantukiartatui. ⁴⁴ Tura shuar nu kayan tukumainia nuka kupintrartatui. Tura nu kaya shuarnum iniarka tsai tsai awajsattawai auka” tímiayi Jesus.

⁴⁵ Israer-patri uuntriḡsha Pariséusha Jesus áujmatman antukar “in túramji” tusar achiktaj tiarmiayi. ⁴⁶ Tura ashí aents “Jesus Yúsnan étserui” tuinia ásarmatai nin ashamkarmiayi.

22

Métek-taku chichamjaj nuatnaiyamun Jesus áujmatsamiania nu

¹ Jesus ataksha áujmatuk juna timiayi: ² “Yus akupeamunam pachiinkiertin júnis enentáimpramniati. Uunt akupin ni uchirí nuáteakui nampermamai. ³ Túrak ni takarniurín ipiaamautarum tusa akupkarmai. Tura ipiaamusha nakitrarmai. ⁴ Ataksha chikich takarniuncha ipiaamakrum ju titiarum tusa akupkarmai. ““Mash yurumkan iwiarajai, tawai, titiarum, timiai. “Waakasha máatarum tusan akupkarjai, tawai. Ajaermancha máatarum tusan akupkajai, tawai. Ashí nuatnaiyamunam winiarti,” tawai” titiarum” timiai. ⁵ Támaitiat nú ipiaamusha nakitrarmai. Chikichik ni nunken wemai. Chikichcha kuítian suruktinian wemai. ⁶ Chikichcha ipiakratniun achikiar yajauch awajsarmai, tura chikichnaka máawarmai. ⁷ Túramtai uunt akupin ti kajek, ni suntari mash máatarum túrarum ni jee mash ekeemáktárum tusa akupkarmai. ⁸ Nuyá ataksha ni takarniurín akupkamai. “Nuatnaiiktin jísat mash iwiaramuít, timiai. Tura nu ipiaamu winichin armai. ⁹ Tuma asamtai pepru jintí werum ashí shuar nánkamas wáintrum nu ipiaatarum” timiai. ¹⁰ Takui takarniurí jínkiar pepru jintín wajainian, yajauch shuar-nasha péñker shuarnasha, ashí ipiaawarmai. Túramtai jee piákmái.”

¹¹ “Nuyá uunt akupin ipiaamun ísartaj tusa wayamái. Nu j shuaran péñker iwiarmamprachun wáinkiamai. ¹² Tura timiai “Umpá, ¿urukamtai nuatnaiyamun entsatai pushí entsatsuk wayam?” Tutai nu áishman tákamtak pujusmiayi. ¹³ Nuyá uunt akupin yurumka ajaaman timiai “Achikrum nawenmasha uwejnusha jinikiar aa jíkum kiritniunam ajapatarum. Nu jsha ti úutin ti wáitsatin átatui” timiai. ¹⁴ Kame untsurí ipiaamu áiniawai antsu ishichik achikma áiniawai.”

*Uunt akupin Sésar akiktinia nu**(Márkus 12.13-17; Rúkas 20.20-26)*

¹⁵ Nuyá Pariséu chichaman najatawar uyumtkiatai tusar tiarmiayi. ¹⁶ Túrawar ni shuaríncha tura akupin Erutisa nemarniurísha Jesusan akup-tukarmiayi. Kame akupin Erutis uunt akupin Sésara kuitri wáinin asamtai nu apachniasha akupkarmiayi. Niisha jeariar Jesusan tiarmiayi “Uuntá, amesha nekas chicham chichaame. Nu nékaji. Chíkich shuar tuinia nu ántutsuk nekasam Yus-Chicham jintíame. Shuar shiir enentáimturarat tusam jintíatsme, tiarmiayi. ¹⁷ Tuma asamtai ju nekaatai tusar wakeraji. ¿Uunt akupin Sésar akikminkiait?” tiarmiayi.

¹⁸ Jesus ni yajauch enentáijiai aníam nekáa tiarmiayi “Aya shiir chicham-tiniaitrueme. ¿Urukamtai uyumatkiarkatin wakerutarum? timiayi. ¹⁹ Wats, Sésar akiktinia nú kuit itititiarum.” Takui chikichik kuítian itiararmi-ayi. ²⁰ Nuna iis Jesus aniasarmiayi “¿Juí yana yapimpiait tura yana naari áarmait?”

²¹ Tutai “Uunt Sésarna” tiarmiayi.

Tuiniakui Jesus chicharuk tiarmiayi “Nuikia uunt Sésarna nu, Sésar susa-tarum. Tura Yusna nusha Yus susatarum” timiayi. ²² Tura nuna antukar ti enentáimprarmiayi. Tura ikiuiniak wearmiayi.

*Jesusan jakamunmaya nantaktinian aniasarmiania nu**(Márkus 12.18-27; Rúkas 20.27-40)*

²³ Nu tsawantajik Satuséusha Jesusan tariarmiayi. Satuséuka jakamunmaya nantakchatniuiti tuiniawai. Nuna tiniu ásar juna Jesusjaj áujmatsarmiayi.

24 “Uuntá, Muisais juna áartampramiayi, “áishman uchin yajutmatsuk jakamtainkia ni yachi nu nuwan nuatak ni yachin yajútmátrati,” tu áarmiayi, tiarmiayi. 25 Ayu, íi shuarnum siati (7) yáchintin áarmiayi. Iwiajri nuatak uchin yajutmatsuk jakamiayi. Tura wajen ni yachin ikiurkimiayi. 26 Tura niisha nuatak uchin yajutmatsuk jakamiayi. Tura chikichcha núnisan jakamiayi. Tura chikichcha siati armia nu ashí nuatkar jákarmiayi. 27 Nuyá nuwasha jakamiayi. 28 Jakamunmaya nantakiar ¿yaki nekas ni aishri ati? Ashí nin nuatkacharmakia” tiarmiayi.

29 Tuíniakui Jesus tímiayi “Yus-Chichamsha nékachkuram tura Yusa kakarmarisha nékachkuram nantaktin atsawai tákuram ti awajiarne. 30 Nekaatarum. Jakamunmaya nantakiaruka nuatkachartatui. Antsu Yusa suntari nayaimpiniam pujuinia núnisar nuartichu pujusartatui. 31 Túrasha jakamunmaya nantakiartatna nu nekaatajtsa wakerakrumka ju enentáimsatarum. Muisais aarma nu áujsachukaitrum. Júnisan áarmiayi: 32 “Wiitjai Apraáma Yúsrinjai, Isaka Yúsrinjai, Jakupu Yúsrinjai.” Tu áarmiayi. Watsek, Yuska jaká Yúsrinchuiti. Antsu iwiaaku ana nuna Yúsrinti, tímiayi. Iis, nu shuar imiá yaunchu jákaruitiat Yusjai iwiaaku pujuiniak nantakmin ániawai” tímiayi. 33 Ashí aents nuna antukar nu jintintiam ti enentáimprarmiayi.

*Yus akupkamu imiá enentáimtustinia nu
(Márkus 12.28-34)*

34 Satuséu Jesusan ajktinian tujinkiar matai Pariséu nuna antukar irunrarmiayi. 35 Tura chikichik Pariséu jintintin asa Jesusan uyumtikiataj tusa aniasmiayi 36 “Uuntá, ¿túa Yus akupkamu imiá nankaamas enentáimtustiniait?”

37 Tutai Jesus tímiayi “Júiti: “Ame Yúsrum ashí enentáimjai aneeta. Ashí ame wakanmijjaisha tura tuke enentáimtusam aneeta.” Tu áarmaiti, tímiayi. 38 Núiti emka ashí akupkamu nankaamas enentáimtustinia nu. 39 Chikichcha jujai métek-taku awai. Nusha tawai: “Ame írutramuram ame ayashim aneamna nútiksamek aneeta.” 40 Nu jímíar akupkamu umirkam ashí Muisais akupkamia nusha tura ashí Yúsnan etserin unuiniararmia nusha umirkattame” tímiayi.

*Kristu Tawit weeaitiat Yusa Uchirínti
(Márkus 12.35-37; Rúkas 20.41-44)*

41 Tura Pariséu tuke irunar pujuiniakui 42 Jesussha aniasarmiayi “Kristu tutai ¿ya weeá átiniait. Warí enentáimtarum atumsha?”

Takui “Tawit weeá átiniaiti” tiarmiayi.

43 Tuíniakui Jesus tiarmiayi “Nuikia ¿urukam tai Tawit, Yusa Wakaní “titia” tutai, Krístun “winia Úuntur” tímia? Iis, Tawit juna tímiayi:

44 “Uunt Yus winia Úunrun juna tímiayi: “Akupin pujutainium, winia untsuruinj, pujusam nákarsata. Ashí ame nemasrumin nupetkan Ámin umirtamkarti tusan amastatjai” tímiayi Yus.” Tu tímiayi Tawit.

45 Watsek, Tawit Krístun “winia Úuntur” tajsha ¿itirak ni pampanmarí áti?” tímiayi Jesus. 46 Nuna takui penkesha ajkcharmiayi. Túrawar atakka uyumantikiatai tusar aniascharmiayi Jesusan.

23

Jesus Pariséuncha Israer-shuara jintiniuríncha “yajauchitrume” timiania nu

(Márkus 12.38-40; Rúkas 11.37-54; 20.45-47)

¹ Jesus ni unuiniamuríncha tura ashí shuárnasha tiarmiayi ² “Israer-shuara jintinniurísha tura Pariséusha Muisais akupkamun paant ujatmainiawai. ³ Tuma asamtai tuinia nu umirkatarum. Túrasha ni túruinia nu jumamkiirap. Nu shuar shiir chichainiyat nusháa túrin ániawai. ⁴ Ti iturchat ana nuna akupeenak ti emeram entsaktinia áintsan áentsun apujtuiniawai. Túrasha chikichik uwejéjajsha ishichkisha takuitniun nakitiainiawai. ⁵ Aya shuar írsarti tusar ashí túruiniawai. Ashí shuar péñker enentáimturarti tusar Yus-Papin nijiaíncha tura kunturíncha ti wan̄karam awasraj anujak yujainiawai. Tura nu arantcha pushirj sasariarman ashí shuarjaj nan̄kaamas esaram awajas wekainiawai. ⁶ Nampernumsha péñker iwiararmanam pujustinian wakeruiniawai. Iruntainmasha nan̄kaamantu ajasa pujustinian wakeruiniawai. ⁷ Jintiá wekainiaksha ashí aents áujtuiniak “Jintínkiartiniá” turutiarti tusa wakeruiniawai’ tímiayi.

⁸ ‘Túrasha átumka ashí shuar “Jintínkiartiniá” turutiarti tusa enentáimsashtiniatrum. Átumka nuámtak yáchintrume. Átumka chikichik jintínkiartin ní naarj Kristu takakrume. Nu asamtai “Jintínkiartiniá” túramcharmin áiniawai. ⁹ Ju nun̄kanmasha shuar “Aparú” tiirap. Chikichik nayaimpiniam pujana nu atumí Aparínti. ¹⁰ Atumi uuntrj aya Kristuk asamtai “Uuntrú” túramcharmin áiniawai. ¹¹ Antsu átum írutkamunmaya uunta nuka peejchach átiniaiti. ¹² Shuar nan̄kaamantu ajastaj tákuinkia Yus nin peejchach awajsattawai. Antsu peejchach ana nuna Yus nin nan̄kaamaku awajsattawai’ tímiayi.

¹³ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrum. Yus akupeamunam wayatín waiti epenniuitrum. Atumsha wayatsuk chikichcha wayataj tuinia nusha suritniuitrum.’

¹⁴ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrum. Wajé jee atankiirum aents enentáimturaraj̄n̄ tusarum ti esaram Yus áujtiniaitrum. Túrin asarum átum ti asutniátniuitrum.’

¹⁵ ‘Maa wáinkiatárum jintinniutirmesha, Pariséutirmesha. Ántrarum shiir chichamtiniaitrum. Nun̄kanmasha nayaantsanmasha yajá wekainiuitrum chikichik shuar wini nemartusat tusarum. Tura atumi nemanj ajasmatai atumjaj nan̄kaamas tunáa sumamamnia awajearme.’

¹⁶ ‘Wáinkiatárum átumka. Jintínkiartiniatrum nékachu asarum kusurua ániuitrum. Ju jintiarne: “Shuar nekasan tajai tusa Yusa Jeen páchiakka nii tana nuna umitsuk ikiukminiaiti. Antsu nekasan tajai tusa Yusa Jeen kuri ana nuna páchiakka ti nekas umiktiniatrum.” tniuitrum. ¹⁷ Nétsetrum. Yúsjaínkia ashí kuri ánrachukait. Antsu Yusa Jeen írunna nuka aya nuin ikiusma asa Yusna ajasuiti. Tuma asamtai kurijaj nan̄kaamas Yusa Jee enentáimtustiniatrum. Enentáimcha asarum kusurua ánin wáakuitrum.

¹⁸ Nu arantcha tniuitrum: “Shuar nekasan tajai tusa naman̄-maar-Yus-sutain páchiakka nii tana nuna umitsuk ikiukminiaiti. Antsu Yús-sutain naman̄ patasman páchiakka ti nekas umiktiniatrum.” tniuitrum. ¹⁹ Nétsetrum. Penké naman̄ Yusjaj ánrachukait. Aya Yús-sutainiam patasma asa nu naman̄ enentáimtuschatniukait. Enentáimcha asarum kusurua ánin wáakuitrum. ²⁰ Enentáimpratarum. Shuar nekasan tajai tusa Yús-sutain

páchiakka aya sútainiak páchiatsui antsu sutaincha tura nuĵ patasmancha máí-metek páchiawai. ²¹ Núnisan shuar Yusa Jeen páchiakka aya nunak páchiatsui antsu Yus nu jeanam pujú asamtai nunasha páchiawai. ²² Núnisan shuar nayaimpin páchiakka Yus pujutainchsetrume. Penĵer naman Yusĵai ánrachukait. Aya Yúa tura Yus nuĵ pujana nunasha páchiawai.'

²³ 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Kumintsu nukesha, anisa nukesha, menta nukesha tias (10) akantram chikichik akankamu Yus súwitrume. Nuka péñkeraiti, ikiukchatniuiti. Túramaitiat nekas péñker túratniua nu túrutsuk ikiuwitrume. Yus nekas enentáimtustincha, waitnentáimturincha tura tuke péñker túratniusha enentáimtsuk ikiuwitrume. ²⁴ Átumka jintinkiertiniaitrum nékachu asarum kusuru ániuitrume. Kutanam yajasmach enketu wáinkurmeka júwitrume. Túrayatrum kamiriu wáinkurmeka kawai nanĵkaamas únt aiñ takamtsuk kújawitrume.'

²⁵ 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Átumka tsapasha pininsha initiaani nijiatsuk aya pátakek niĵawitrume. Núnisrum pátakek shiir awajmanniutrum tura enentáiminkia kasamkatniusha tura chikichna wakeruktincha nuĵai piákuitrume. ²⁶ Kusuru ániuitrume, Pariséutirmeá. Antsu emka initiaani tsapasha pininsha niĵaktarum. Túrakrumninkia pátakeksha mai péñker átatui. Núnisrum atumsha atumi enentáin ana nu shiir awajsarum pátakeksha shiir átatrume.'

²⁷ 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Iwiarsamu púĵajai yakarar shiir awajsamua ániuitrume. Aanĵ shiir ániawai. Tura initkia jaká ukunchijĵai piákuiti. ²⁸ Núnisaitrume atumsha. Chikich shuar ísmaka ti shiira ániuitrume. Túrasha atumi enentáinkia ashí muĵĵimiai piákuiti.'

²⁹ 'Maa wáinkiatarum jintinniutirmesha, Pariséutirmesha. Ánrarum shiir chichamtiniaitrume. Yaunchu Yúsnan etserin iwiarsamunam átumka shiir enentáimtakrum jea jeamkaitrume. Tura péñker shuar yaunchu jákarusha shiir enentáimturtaĵ tusarum ni iwiarsamu shiir awajearme. ³⁰ Túrakrum ĵu tniuitrume: "Iikia yaunchu ii weatrijĵai puĵaitkiurkia Yúsnan etserin máatin yáimkiachaĵĵi." ³¹ Nuĵai ti paant chichaarme atumsha. "Ii weatři Yúsnan etserniun máawar tunáa túrin ármiai" tárume. Tura "Yáimkiachaĵĵi" táyatrum, atumsha métek túrin asarum "Niĵĵai méteketĵi" tárume. ³² Wats, atumi weatři nanĵkamawarmia nu átum amuktatrume' tímiayi Jesus.

³³ 'Napia ániuitrume. Shuar aya yajauch awajniuitrume. Túmatirmesha Yus tunáa shuaran ĵiniun akupkartatna nuya ĵitiurak uwempratarum? ³⁴ Untsurĵ shuaran akuptuktatĵarme. Yúsnan etserniuncha, ti nekancha, jintinkiertinniaasha akuptuktatĵarme. Tura atumsha chikich máattarme, chikichcha krúsnum ajinruarum máattarme, chikichcha iruntai jeanam asutiáttarme, tura chikichcha ashí nunĵanam ánrattarme. ³⁵ Nu tura asarum péñker shuara numpé puarma nuĵai átum sumamattarme. Yámankamtaik Apir ti penĵer shuáraitiat máamuyayi. Tura unĵanam Perekíasa uchirĵ Sakarías atumi untrĵ Yusa Jeĵ ámanun naman-maar-Yús-sutai ajapén aténkamunam máawarmiai. Wats, Apir máamunmaya Sakarías máamunam ashí péñker shuar ti untsurĵ máamujai sumamattarme. ³⁶ Nekasan táĵarme, yamá puiunia nú shuar ashí nuĵai sumamawartatui' tímiayi Jesus.

Jerusarénnumiá shuaran Jesus aneak útmiania nu

(Rúkas 13.34-35)

³⁷ Jerusarénnumiá tirmeá, Yúsnan etserin máiniaitrume. Yus akatar akup-turmakmasha kayajai tukuram máiniaitrume. Túrin árumniñ waitnenta-rume. Atash ni uchrin weaana áitkiasnak weartinian wakerimjarne, tura nakitramarme. ³⁸ Iistarum. Ame pépruram ajapamuiti. ³⁹ Tura “Yusa náarijn winiana nu, shiir atí” títiatrumna nu tsawant jeatsain penké wáitkiashtatrumé. Nuna tájarne” tímiayi Jesus.

24

Yusa Unt Jee saanaktinian Jesus ujakmiania nu

(Márkus 13.1-2; Rúkas 21.5-6)

¹ Jesus Yusa Unt Jeeñia jiinki weaj ni unuiniamurj nin tariar Jeeñ iniktusar áujmatsarmiayi. ² Tura Jesus tiarmiayi “Nu mash yamáí wáintrume. Tura nekasan tájarne ukunmanka mash saanaktiatui. Chikichik kayaksha eken tramurj atsuttawai” tímiayi.

Amúamu tsawant nekaatin

(Márkus 13.3-23; Rúkas 21.7-24; 12.22-24)

³ Nuyá Uriwiu náinnium wear niñki nuj pujusar ni unuiniamurj Jesu-san aniasarmiayi “¿Nusha urutaik túrunatí. Tura ame tátincha tura nunka amuukatin tsawant jeakuisha warijaiñ nekaattaj? Nu ujatkata” tiarmiayi.

⁴ Tuíniakui Jesus tímiayi “Aneartarum, anañkramawairap. ⁵ Untsurj shuar winia náarun pachisar “wi Krístuitjai” tiar untsurj shuaran anañkawartatui. ⁶ Ti untsurj meset chicham antuktatrumé túrasha sapijmiakairap. Núnisan átiniati nunka amúatsain. ⁷ Apachcha chikich nunkanmayá apachjai máaniawartatui. Tura ti tsukasha átatui. Sunkursha ti pampartatui. Uusha ti uurkartatui. Nuka untsurj nunkanam ashí túrunawartatui. ⁸ Nujai ti wáitsatin aya yama nañkamui’ tímiayi.

⁹ Nuyá atumniasha yajauch awajsarti tusa surutmakartatui. Tura manta-mawartatui. Tura winia naar pachia asakrumin ashí shuar mujramkartatui. ¹⁰ Nu tsawantaj untsurj shuar Yúsán iniaisartatui. Túrawar nuamtak mujniainiak surunairartatui. ¹¹ Untsurj shuar wáitruiniak “wi Yúsnan etserniuitjai” tiartatui. Túrawar untsurj shuáran nusháa enentáitkrartatui. ¹² Tura tunáa ti ákui nuamtak anenaichartatui. ¹³ Tura shuar ashí nuna tuke katsuntra nu uwemprattawai. ¹⁴ Ashí aents nekaawarat tusa Yus-Chicham ashí nunkanam etsernaktatui. Túramtai amuukatin tsawant jeattawai” tímiayi.

¹⁵ Shuar juna áujea nu enentáimprati. Kame Jesus tímiayi “Yúsnan etserin Taniar mujmiamtik tuke emesratin ana nuna yaunchu aar etserkamiayi. Nuka Yusa Jeeñ wantinkiamtai ¹⁶ ashí shuar Jutía nunkanam írúnna nu, muranam pisararti. ¹⁷⁻¹⁸ Ti wárik pisartin asamtai shuar jee yakí pujaksha tura shuar ajanam wekaakusha jeá waketki warirj jukitiaj tíchati. Antsu nuyañ wárik pisarti. ¹⁹ Nu tsawantaj nuwá ajamtincha tura kuirchin takaku ainia nusha ti wáitsartatui. ²⁰ Ayampratín tsawantajsha tura michá nántutincha nu pisartin tsawant áchati tusarum Yus seatarum. ²¹ Maa, nu tsawantaj ti wáitsatin átatui. Ti yáunchusha núnisan wáitsatin atsuuyayi. Ukunmasha at-suttawai. ²² Nu wáitsatin ti esarmaitkiuñkia chikichiksha uwemprachainti. Tura Yus nu wáitsatniun wárik amumtikiattawai. Shuar Niiniu ajasarat tusa achikma ainia nu uwemprarat tusa wárik amumtikiattawai’ tímiayi.

²³ “Tura atumin “Júiti Kristu,” tuíniakuisha tura “Nuí pujawai” tuíniakuisha anturkairap. ²⁴ Untsurí shuar Kristuitjai tusar wantinkiertatui. Untsurísha “Yúsnan etserniuitjai” tiartatui. Tura shuáran anankataj tusar aents tujintiamun iniakmasartatui. Tura ti kakarman túruiniak Yús-shuarnasha anankamin áiniakuinkia anankawarainti. ²⁵ Túrunatsain nuna emka ujaajrume. ²⁶ Tuma asamtai “Iis, Kristu nuí aents atsamunam pujawai” túramainiakuisha nuí wéerap. “Juí úumak pujawai” tuíniakuisha anturkairap. ²⁷ Núnisan úumkan táchattajai. Peem péetuk ti wárik ashí nunkanam wáinkiachminkiait. Núnisnak wi Aents Ajasuka winiakun paant wantinkiertatui. ²⁸ Wats, jaka tepaana nuí chuan káutkachartatuak’ tímiayi.

Kristu tátintri

(Márkus 13.24-37; Rúkas 21.25-33; 17.26-30, 34-36)

²⁹ “Ti wáitsatin nankaamasmatai ti wárik tsawái nantu kajinkiertawai. Tura kashí nantusha etsantrashtatui. Yaasha ashí muchitrattawai. Nayaimpiniam kakaram ainia nusha peantrartatui. ³⁰ Nuíkie Wi Aents Ajasuka, tátiniur paant átatui. Tura ashí nunkanmayá aents Wi winiái wáitkiar asuttiamattajai tusar úutiartatui. Wisha ti kakaram tura Yusa wincharjjajai yuranminiam winiái wáitkiartatui. ³¹ Yusa suntarjin kachu kakaram umpuarterum tinia akupkamtai nu suntar ashí nunkanmayá ashí Yús-shuaran, Yus achikma ásarmatai, irurartatui’ tímiayi.

³² ‘Iikiu numirí nakumea nu nekaatarum. Ni nuken eteakui “esat nantu jeatemayi” tátsurmek. ³³ Núnisan ashí ju wáinkiumeka “amuukatin tsawant nekas jeatemayi” títiniaitrum. ³⁴ Nekasan tájarme, yamá aents pujuinia nu amúatsain ashí túrunattawai. ³⁵ Nunkasha nayaimpisha amuukartatui antsu winia chichamur amuukashtatui’ tímiayi.

³⁶ “Tura nu túrunatin tsawant nekanachminiaiti. Yusa suntarjsha nékainiatsui. Wisha Yusa Uchiríntiatnak nékatsjai. Antsu aya winia Aparuk nékawai’ tímiayi.

³⁷ “Wi tátiniur jeamtai yaunchu Nuai pujumia nú tsawantin túrunamia núnisan átatui. ³⁸ Nu tsawantin, tuke amaartsain, aya júnisan aa asamtai yurumuk umarar pujuarmiayi. Nuatnainiarmiayi. Ni nawantrincha nutamantikiarmiayi. Tura tumá pujuiniaí Nuai uunt kanunam enkemamtai ³⁹ nu aents tuke nékainiatsain ama amarak mash amuukarmiayi. Núnisan átatui Wi tátin jeamtai. ⁴⁰ Nu tswantaik jimiará shuar ajanam pujuttawai. Chikichik junaktiatui tura chikichikia ikiunkittiwai. ⁴¹ Núnisan jimiará nuwá shana nekeak pujuttawai. Chikichik junaktiatui chikichikia ikiunkittiwai’ tímiayi.

⁴² “Nu asamtai atumsha iwiarnarum pujustarum. Nekaachminiaiti uruk áintsuk taritjarum. ⁴³⁻⁴⁴ Tuma asamtai aneara pujustarum. Wi nekaachmanum tátin júnisan enentáimpramniaiti. Shuar ju kashi kasa tátinian nekaanka kánutsuk kasa táawai tusa iwiarnar nákasainti. Núnisrum aneara pujustarum.’

Pénker takamtikniuncha yajauch takamtikniuncha Jesus áujmatsamiania nu *(Rúkas 12.41-48)*

⁴⁵ “Shuar pénker uminiam tura pénker enentáimniun áujmatsattajai. Nuna uuntri yajá irauweak “Yurumátin jeamtai winia takartin ayuratarum” tíchanpiash. ⁴⁶ Nu takamtikniuncha ni uuntri taa takatrin tímiatrusan túran tarinkia shiir enentáimtusainti. ⁴⁷ Nekasan tájame, umin asamtai ni uuntri ashí ni waririn wáitrukát tusa takatan susattawai. ⁴⁸⁻⁴⁹ Antsu úuntur wau

táchattawai tusa takamtikin ni uuntri yáintrin yajauch awajeak tura takatsuk aya yurumátniun tura nampektinian wararkunka nu takamtikin yajauchiiti. ⁵⁰ Turaj ni uuntri aya aneachma taa nu takamtikniun, yajauch asamtai, ⁵¹ ti kakaram asutiattawai. Yajauch shuar pujuinia nu akupkattawai. Nujsa ti wáitiak ti úttiatiu' tímiayi Jesus.

25

Jesus tias (10) nuwan áujmatsamiania nu

¹ Yus akupeamunam pachiinkiatin júnis átatui. Nuatnaikiatin jisat akui tias nuwá natsa kantiran akaawar nuátkattana nu áishmankan inkiun jeá itiatatiusar wearmai. ² Senku nuwá enentáimcha armai. Tura chikich senku nuwá enentáimin armai. ³ Enentáimcha arma nú nuwá aya akaamunak juíniak amuukamta yaraatniun asuitin júkicharmai. ⁴ Antsu chikich senku núwaka akaamuncha juíniak tura ataksha amuukamta yaraatniun asuitin júkiarmai. ⁵ Tura jíinkiarматаi nuatkatin áishman wari taachkui karj pujakui kanararmai. ⁶ Nuyá kashi ajapén shuar untsunuk "Pai nuatkatin winiawai. Werirum inkiuntarum" timiai. ⁷ Tu untsunuk antukar nantakiar kantiran akaatai tusar pujursarmai. ⁸ Nuyá senku nuwá enentáimcha arma nu, chikich nuwá enentáimniun tiarmai "Incha atumi asutirj ishichik ajamprusaitia. Ii kantirjsa kajiniawai."

⁹ 'Tutai chikich senku nuwá tiarmai "Átsá, warí incha jeartamchattaji. Tura atumnia penké jeashtatui. Nekaska surutainium werum sumaka utumtarum" tiarmai.'

¹⁰ 'Tura nuyá senku nuwá enentáimcha arma nu, asutian sumak utitai tusar wéaraj ukunam nuatkatin áishman tamai. Túramtai enentáimin nuwá arma nuka nuatnaikiatin námpernam nuatkatniujaj wayawarmai. Túramtai wáitin epeniarmai. ¹¹ Tura epeniaraj enentáimcha nu táarmai. Tura tiarmai "Úuntá, waiti uratritia."

¹² 'Tu untsunukniakui nu uunt kakerak chichak "Cha, zyátsukaaitrum? Penké nékatsjarne" tiarmai.' ¹³ Jesus nuna áujmatas umik tímiayi "Aents Ajasuitjai tura tátin tsawantrusha tura uruk aijn tátaj nusha nékatsrume. Tuma asarum tuke iwiarnarum pujustarum' tímiayi.

Kuit susamun áujmatsamiania nu

¹⁴ Núnisan Wi tátin júnisaiti. Shuar chikich nunkanam wéak, ni takarniurjn untsukar ni kuitrin akanak súsarmai. ¹⁵ Chikichkiniak senku mir (5.000) kuítian susamai. Chikichnasha jimiará mir (2.000) kuítian susamai. Tura chikichnasha chikichik mir (1.000) kuítian susamai. Nii takastin jearma nujaj métek súsarmai. Tura ikuak yajá wemai. ¹⁶ Takarjn senku mir kuítian achikmia nujaj takakmas ataksha senku mir kuítian patakmai. ¹⁷ Chikichcha núnisan jimiará míran achikmia nujaj takakmas ataksha jimiará míran patakmai. ¹⁸ Tura chikich shuar ni uuntri kuitrin chikichik míran achikmia nuna waa taur úukmai.'

¹⁹ 'Nuyá ukunam nu shuara uuntri támai. Tura kuítian súkiarma nujaj itirkarmakit tusa untsukarmai. ²⁰ Emka senku mir kuítian achikmia nu tamai. Nuyá ni úntrin chikich senku mir patakman suak timiai "Uuntá, senku mir kuit surusname. Pai, atak senku míran patasmajai."

²¹ 'Takui ni uuntri timiai "Ti péñker takakmawitme. Nekas uminiaitme. Ishichkijajsha ti péñker takakma asakmin ti núkap yamaikia amastatjai. Winí wayam wijaj ti shiir warasta" timiai.'

22 ‘Nuyá chíkich shuar jimiará míran achikmia nu tarí timiai “Uuntá, jimiará mir surusmame. Pai, ataksha jimiará míran patasmajai.”

23 ‘Takui ni uuntri timiai “Ti penker takakmauwitme. Nekas uminiaitme. Ishichkijaisha ti penker takakma asakmin ti núkap yamaikia amastatjai. Winí wayam wijjai ti shiir warasta” timiai.’

24 ‘Nuyá chíkich shuar chikichik míran achikmia nu tarí timiai “Uuntá, ti kajen asakmin tura araachiatam tura atsaamprachiatam júurtuktarum tiniu asakmin 25 sapijmiakun ame kuítrumniaka nunká táutran úukmajai. Pai, juíti ame surukmiam nu” timiai.’

26 ‘Takui ni uuntri timiai “Ámeke yajauchiitme. Aya nákiitme. Wi araachiatan tura atsaamprachiatan júurtuktarum tiniuitme túrutsumek. 27 Tu enentáimkiumka žurukamtai kuit-iruntainiam ikiurtuschamam? Nuikia wi táakun patasan achikiájai” timiai. 28 Nuna tinia nuj wajainian tiarmai “Ju shuar chikichik mir kuit atankirum tias mir kuítian takaka nu susatarum. 29 Kame núkap takakna nú shuar ataksha patatnastatui tura ampiniartatui. Antsu ishichik takakna nusha ishichik takakuitiat jurunkittiaiwai. 30 Ju umichu shuarsha aq kiritniunam ajapatarum. Nuji ti wáitiak ti úuttiatui” timiai”. Tu áujmatsamiayi Jesus.

Akantratin áatna nu

31 Jesus áujmatuk tímiayi ‘Aents Ajasuitjiana nu ashí akupin ajasan Yusa suntarj énekema winittiajai. Tura Uunt Akupin asan shiir pujutairuj pujuratjai. 32 Túramtai ashí nunkanmaya aents Winia irunturartatui. Túrunawarmatai akantratatjai. Murikiu wáinin kachurtinian tura kachurtichujai akanea nútisanak shuáran akantrattajai. 33 Tura kachurtichunka, penkera nuna, untsuuruinj awajsartatjai. Tura kachurtinniaka, yajauchia nuna, menaruinj awajsartatjai. 34 Túran nekas Uunt Akupin asan untsuuruinj wajainian titiatjai “Atumniaka winia Apar shiir awajtamsaitrume. Wi akupeajna nuj winitiarum. Yus nunkan najanamia tímianaik átum nuj warastinian tsankatramkiamirme. 35 Kame Wi tsukamá wekaj ayurtuamiarme. Kitiama wekajisha umartin surusmiarme. Wait ajá wekajisha itiaarum ajamprusmiarme. 36 Pushir atajisha átumka surusmiarme. Jaa tepajsha íráiamiarme. Sepunam enketajisha tarum íráiamiarme” titiatjai. 37 Tutai untsuuruinj wajainia turutiartatui “Uuntá, žurutia tsukamá wekaamnisha ayuramaj. Urutiá iisha kitiama wekáa wainkiarsha umartincha amasmaj. 38 Tura urutia wait ajá wekaamnisha tura pushiram mamurmataisha iisha amasmaj. 39 Urutia iisha jaa tepamin tura sepunam enketmin wainkiarsha winitir íimij?” turutiartatui.’

40 ‘Turutainiakui Wi Uunt Akupin asan tiartatjai “Nekasan tájarme, ashí ju wíi shuar péejchachisha waitnentramarum nu Winia anentakum túraitrume” tiartatjai’ tímiayi.

41 ‘Wi Uunt Akupin asan menaruinj wajainian tiartatjai “Atumsha yajá wetarum. Yajauchijjai yuminžramuítrome. Yus uunt iwianchi ni suntarjijjai tuke kajinkiashtin jiniun apeatniua nuj wétatrume atumsha. 42 Átumka Wi tsukamaj ayurtuachmarme. Kitiamaisha umartin suruschamarme. 43 Wait ajá wekajsha ikiatrachmarme. Pushirun imiamprajsha entsartin suruschamarme. Jaa tepajsha tura sepunam enketajisha íraichmarme” tiartatjai.’

⁴⁴ ‘Tutai niisha turutiartatui “¿Urutia, Uuntá, tsukamakmesha, kitia-makmesha, wait ajaknísha, pushiram imiampramsha, jáakmesha, tura sepunam wait ajá pujamnisha íisha winitir yáinçhamaj’?” turutiartatui.’

⁴⁵ ‘Wi Uunt Akupin asan tiartatjai “Nekasan tájarme, Ashí Wíi shuar, péejchachisha waitnentrachmarum nuí Winiasha túrutachuitrume” tiartatjai. ⁴⁶ Nu shuarka tuke wáitsatniunam weartatui. Tura Yus achikma ainia nusha tuke iwiaaku Yusjaj pujustinnium weartatui” tímiayi Jesus.

26

Jesus achiktin chichaman jurusarmiania nu

(*Márkus 14.1-2; Rúkas 22.1-2; Juan 11.45-53*)

¹ Jesus ashí nuna tinia umik ni unuiniamurjñ tiarmiayi ² “Atumsha nékarme, Paskua jisat jeatin jimiarchik tsawant ajasai. Nuí Wi Aents Ajasu asamtai krúsnum máawarti tusar surutkartatui” tímiayi.

³ Nuyá Israer-patri uuntrišha Israer-shuara jintinniurjsha Israer-shuara úuntrišha Kaipiasa jeen áarñ iruntrarmiayi. Kaipiassha Israer-patri uuntrişyayi. ⁴ Nuí anañkatin chichamjaj Jesus achikiar maatai tusar chichaman jurusarmiayi. ⁵ Tura tiarmiayi “Jístatin túrachminiaiti aents téetet ajarajñ tusar.”

Nuwa Jesusan kuñkuinian ukatramiania nu

(*Márkus 14.3-9; Juan 12.1-8*)

⁶ Jesus Petania péprunam pujus tunamaru Semunka jeen pujumiayi. ⁷ Nuí pujaj nuwá ti kuit jeá kuñkuinian arapástru tutai kaya najanamunam piakun itiamiayi. Tura Jesus misanam yurumátaj tusa pujan tarí nu kuñkuinian ukatramiayi. ⁸ Túramtai ni unuiniamurjñ nuna íisar kajerkar tiarmiayi “¿Urukamtai au kuñkuin imiá kuítniasha áantrasha wasurea? ⁹ Antsu ti kuitjaj suruk shuar kuítrincha ainia nuna yáítskesha” tiarmiayi.

¹⁰ Jesus tuinian anturak tiarmiayi “¿Urukamtai ju nuwá yajauch enentáimtarum? Túrutana ju ti péñkeran túrayi. ¹¹ Kuítrincha tuke atumjaj pujushtatuak. Antsu Wikia atumjaj tuke pujushtatjai. ¹² Ju nuwá kuñkuinjaj ukatruvaj júka, Wi iwiarnastin asamtai áitkiarayi. ¹³ Nekasan tájarme, ashí nunñkanam uwempratñ chicham etsernakui tuke ju nuwá pachinias etsernaktatui. Túramtai ni túramurjñ kajinmankishtatui” tímiayi.

Jútas Jesusan surukmiania nu

(*Márkus 14.10-11; Rúkas 22.3-6*)

¹⁴ Nuyá Jesus tuse (12) unuiniamunmayá chikichik ni naarj Jútas Iskariúti Jesusan suruktaj tusa Israer-patri uuntrişñ wémiayi. ¹⁵ Tura jeari tímiayi “Jesusan achikia amakuí ¿urutmá akirkaintrum?” Takui trainta (30) kuítian akikiarmiayi. ¹⁶ Nu akikiam Jútas itiurak Jesusan súsaraintaj tu enentáimias wekaimiayi.

Kristu jakamu enentaimtustñ námper

(*Márkus 14.12-25; Rúkas 22.7-23; Juan 13.21-30; 1 Kurintiunam 11.23-26*)

¹⁷ Wakapruachu tantan yurumáinia nú námper yama nanñkamkui Jesusa unuiniamurjñ tariar aniasarmiayi “¿Tui paskua námper iwiaarakrin yurumáttam?” tiarmiayi.

¹⁸ Tuíniakui Jesus tímiayi “Péprunam wetarum. Nuí chikichik shuara jeen jearum titiarum “Uunta chichaak “Winia tsawantur ishichik ajasai. Tuma asan paskua namperan winia unuiniamurjaj ame jeemjñ yurumátjai”

tawai” titiarum” tímiayi. ¹⁹ Tutai ni unuiniamurij wear Jesus timia nuna umikiar paskua nampertin yurumátniun iwiararmiayi.

²⁰ Tura kashi ajasáji Jesus ni tuse (12) unuiniamurijjiaí misanam yurumuk pujumiayi. ²¹ Nuj yurumáiniaí Jesus tiarmiayi “Nekasan tájarne, átum pujar-mena juyá chikichik Winia surutkattawai.”

²² Nuna takui ti kúntuts enentáimprar mai aní awajiararmiayi “Uuntá, ¿wiáshitiaj?”

²³ Mai tu awajenam Jesus tiarmiayi “Wi nú piniñnumañ jimiartukan yuajna ju Winia surutkattawai. ²⁴ Wi Aents Ajasu asan Yus Chicham tana nujai métek túrunattajai. Túrusha shuar Winia surutkattana nuka ti asutniátin asa akiinmainchu ajakuíti” tímiayi.

²⁵ Nuyá Jútas suruktaj tana nu Nin tímiayi “Uuntá nuikia ¿wiáshitiaj?”

Takui Jesus tímiayi “Ee, nekas ámetme.”

²⁶ Tura yurumuk pujuiniaí Jesus yurumkan achik Yúsan yumĩnsamiayi. Tura puur ni unuiniamurĩn suiniaíki achik tímiayi “Ju yuatarum. Juca winia ayashruiiti.” ²⁷ Nuyá piniñkian achik Yúsan yumĩnsamiayi. Tura suiniaíki tiarmiayi “Jusha ashí umartarum. ²⁸ Juca winia numparuiti. Tura winia numpar puármatai, yamaram chicham nekas uminkiatatawai tawai. Tura puármatai untsurí shuara tunaarĩn tsankurattawai. ²⁹ Tura ataksha átum Yus akupea nuí jeatsrumniñ ju uwa yumirĩn umarchattajai. Tura tsawant jeamtai atumjai Yus akupeana nuí yamarman umartatjai” tímiayi Jesus.

Pítiur natsantratniua nuna Jesus ujakmiayi

(Márkus 14.26-31; Rúkas 22.31-34; Juan 13.36-38)

³⁰ Yús-kantan kantamáwar umikiar Uriwiu náinnium wearmiayi. ³¹ Nuj Jesus tímiayi “Ju kashi átum Winia ashí natsantrurtatrome. Kame Yus-Papiniun áarmaiti “Murikiu wáinnium mantuattajai túram murik pisararta-tuí.” Tu áarmaiti. ³² Tura nantakin Kariréa nunkanam Wi émktatajai átum wéatsrumin.”

³³ Takui Pítiur tímiayi “Chíkich natsantramainakuisha wikia túrashtatjai.”

³⁴ Tutai Jesus tímiayi “Nekasan tájame, ju kashi atash shiniatsajĩn menaintiú natsantrurtatme.”

³⁵ Pítiur tímiayi “Maa, Ámijjiaí métek mántuiniakuisha penkesha natsantrash-tatjame.” Ashí ni unuiniamurij núnisañ tiarmiayi.

Jesus Jitsemani ájanam Yúsan áujsamiania nu

(Márkus 14.32-42; Rúkas 22.39-46)

³⁶ Nuyá Jesus ni unuiniamurijjiaí Jitsemani náartin ájanam jeá tímiayi “Juí pujusrum nákaratarum. Aranta aĩ wena Yúsan áujsatjai.” ³⁷ Tinia Pítruncha tura mai Sepetéu uchirí jukí wémiayi. Nujsa ti kúntuts enentáimiuk wake mesekmiayi. ³⁸ Nuyá Jesus tímiayi “Ti kúntuts jakamnia enentáimjai. Atumsha juí pujusrum Wijjiaí métek iwiáa pujutarum.” ³⁹ Tinia Jesus arantach we nuí tikishmar tsuntsuma Yúsan áujeak tímiayi “Winia Aparú, Wi túrunatniua nu nusháa iwiaramniaitkiuñkia ju wáitsatniua nu tsankatrúkaip. Tura Wi wakeraj núniska áchatí antsu Ame wakeram núnis atí” áujuk tímiayi.

⁴⁰ Nuyá ni menaintiú unuiniamurij pujuiniamunam wakетки kanúu pu-juinian jeariar Pítrun tímiayi “Átumka chikichik úraksha Wijjiaí iwiáa pujutin ¿tujinkiamek? ⁴¹ Iwiáa pujusrum Yus áujsatjarum. Tunáa nupettamkairap. Enentáimin ti wakeriniaitrome túrusha ayashim pimpiruiti.”

⁴² Tinia ataksha we Yúsan áujeak tímiayi “Winia Aparú, Wi imiá nekasan wáitsatniuitkiuñkia nuñkia Ame wakeramna nu atí.” Tu áujsamiayi.

⁴³ Nuyá ataksha taa ni menaintiu unuiniamurí tarimiayi. Tura karí ti nupeteam ataksha kanúu pujuarmiayi. ⁴⁴ Túmainiakui nin ikiukin ataksha áujmia núnisañ Yúsan áujsataj tusa waketkimiayi. ⁴⁵ Áujas umik ni unuiniamurí pujamunman wémiayi. Tura tiarmiayi “Antsu yamaikia kanarum ayam-pratarum. Ura jeayi. Wi Aents Ájasu aññ, tunaarintin shuarnum surunkatin jeayi. ⁴⁶ Wari nantaktiarum. Wéartai. Súrutna nu winiawai” tímiayi.

Jesusan achikiarmiania nu

(Márkus 14.43-50; Rúkas 22.47-53; Juan 18.2-11)

⁴⁷ Jesus tu chichaj Jútas támiayi. Nusha ni unuiniamuríyayi. Nujajsha untsurí shuar puniajajsha tura numijajajsha winiarmiayi. Nu shuaran Israer-patri uuntrijsa Israer-shuara úuntrijsa akupka áirmiayi. ⁴⁸ Jútas, Jesusan sura, tuke Jesusaj jeatsuk nu shuaran tiarmiayi “Wí miniakkan mukunattajna núiti. Nu achiktarum.” ⁴⁹ Nu asamtai Jesusan tarí “Winiajai Uuntá” tinia mukunamiayi.

⁵⁰ Takui Jesus tímiayi “Amikrú, ¿warí winitiam?” Nuyá achikiar Jesusan júkiarmiayi.

⁵¹ Nuñ chikichik Jesusa tsaniakmarí ni puniarin ukuiniak shuara kuishin tsupirkamiayi. Nu shuarsha Israer-patri uuntri takarniuriyayi. ⁵² Túramtai Jesus tímiayi “Puniarum enkeata. Ashí puniajai máanainia nusha puniajai mantamnashatuak. ⁵³ Wi wakeraknaka winia Aparun timiá untsurí suntarin seaku páchitsuk akupturkainti. ¿Nu nékatsmek? ⁵⁴ Tura nuna túramtañkia Yus-Chichamun tana nu uminkiachanti” tímiayi.

⁵⁵ Nuna tinia Jesus nu shuaran tiarmiayi “Átum kasá achiktaj tawa nútiksarum puniajajsha numijajajsha tarutniurme. Kame ashí tsawantaj Yusa Jeen atumjai pujusan Yus-Chichaman etsermiajai. Nuñsha achirkach-marne. ⁵⁶ Antsu yamaikia yaunchu Yúsnan etserin áararmia nu umínkiati tusarum jútikarmer.” Tu tímiayi Jesus.

Nuyá ni unuiniamurí Jesusan Níniak ikiuiniak pisararmiayi.

Israer-patri uuntriin Jesusan júkiarmiania nu

(Márkus 14.63-65; Rúkas 22.54-55, 63-71; Juan 18.12-14, 19-24)

⁵⁷ Shuar Jesusan achikiarmia nusha Kaipiasaj júkiarmiayi. Nusha Israer-patri uuntrijsayi. Nuñsha Israer-shuara jintinniurjsa Israer-shuara uuntrijsa armia nusha irunar matsarmiami. ⁵⁸ Tura Pítiur árantak Jesusan nemarkin uuntri jeen aari jeamiayi. Tura suntarjai tsaniñ pujusmiayi Jesusan iturkartin tusa.

⁵⁹ Tura Israer-patri úuntrijsa Israer-shuara úuntrijsa tura ashí naamka uunt armia nusha Jesusan wait-chichamjai súmamtikiatiai tusar áujmiamiarmiayi. ⁶⁰ Untsurí shuar ántar tsanumpruiniakuisha máatin chichaman nekaracharmiayi. Nuyá jimiará shuar tsanumpruiniak ⁶¹ tiarmiayi “Ju áishman chichaak “Yusa Uunt Jeen yumpuan ataksha menaintiú tsawantin jeamminiaitjai,” tu chichamai” tiarmiayi.

⁶² Nuyá Israer-patri uuntrijsa wajakí Jesusan tímiayi “¿Áimtsmek. Tura-mainia nusha anturmamk?” ⁶³ Túrusha Jesus tuke áimchamiayi. Túmakui Israer-patri uuntrijsa chicharuk “Nekas iwiaaku Yusa náariin tájame nekasa nu táchakminkia Yus írmastatui. ¿Ame Krístukaitiam. Yusa Uchirinñkaitiam? Paant etsérkatá” tímiayi.

⁶⁴ Tutai Jesus tímiayi “Ee, ame támena núitjai. Tura ataksha atumin tájarne, wi Aents Ajasu asan ti kakaram Yusa untsuuriní pujají wáitkiáttarme. Tura yurañminiam winiaísha wáitkiáttarme” tímiayi.

⁶⁵ Nuyá Patri uuntri nuna antuk ti kajek ni pushiri jaak tímiayi “Ju áishman ni chichamejají Yúsán nekas yajauch chicharniuiti. Nuyásha ¿warí atumají? Atumsha Yúsán yajauch chicharu antukcharumek. ⁶⁶ ¿Waritia enentáimprum?”

Tutai “Sumamayi. Mantamnatí” tiarmiayi. ⁶⁷ Tiar usukiawarmiayi yapiniam. Tura awattiararmiayi.

Chikichcha yapiniam awati wishikiainiak tiarmiayi ⁶⁸ “Ame Krístuchukaitiam. ¿Ya awattama? Ítsuk nekaata.” Tu chichariarmiayi.

Pítur Jesusan natsantramiania nu

(Márkus 14.66-72; Rúkas 22.56-62; Juan 18.15-18, 25-27)

⁶⁹ Nu túmaiñ Pítur aa pujají nuwa chikichik jearí tímiayi “Amesha ju Kariréanmayá Jesus tutajjají wekaichamkam.”

⁷⁰ Tutai Pítur ashí ántuiniamunam tímiayi “Nékatsjai. ¿Warittsuk chichaam?”

⁷¹ Nuna tinia jíinkitij tusa wéají chíkich shuar wáiniak nuí pujuinian tiarmiayi “Au áishmansha Nasarénumiá Jesusají wekainiuiti.”

⁷² Tutai Pítur ataksha tímiayi “Nekasan tájarne, ju áishman kan penké nékatsjai.”

⁷³ Árusan nuí pujuarmia nu Pítrun tariar tiarmiayi “Nekas amesha aujají wekaimiame. Warí, chichammijjají páantaiti.”

⁷⁴ Tutai Pítur “nekas Yus íruí” taku tímiayi “Nu áishman kan penké nékatsjai.” Nuna taj atash shiniukmiayi. ⁷⁵ Túramtai Pítur Jesus nuik tímia nuna enentáimpramiayi. “Atash shiniatsajín menaintiú natsantrurtatme” tímiayi Jesus. Pítur nuna enentáimiar jíinki we ti úutmiayi.

27

Piratují Jesusan júkiarmiania nu

(Márkus 15.1; Rúkas 23.1-2; Juan 18.28-32)

¹ Kashin tsawarmatai Israer-patri uuntri sha Israer-shuara úuntri sha Jesus maatai tiarmiayi. ² Tiar Jesusan jínkiawar apachi uuntriñ Punsiu Piratují júkiarmiayi.

Jútas máamamiania nu

³ Jútas Jesusan suruk tura máatai tuínian antuk enentáimiar trainta kuítian Israer-patri uuntri ncha Israer-shuara úuntri ncha awantukiarmiayi. ⁴ Tura tímiayi “Nu áishman tunaarinchán máatarum tusan surukan wi sumamajai.”

Takui tiarmiayi “Nusha íjijajísha warí urukatiñ. Nuka amek íschatniukaitiam.” ⁵ Tinia Jútas nuí Yusa Uunt Jee kuítian utsañ ikuak nuyá we kajempramiayi. ⁶ Nuyá Israer-patri uuntri nu kuítian júukar tiarmiayi “Ju kuit shuar sumakma asamtai Yusa kuítrijjají irurchamniaiti.”

⁷ Tura nuamtak áujmatsar “nunka sumaktai” tiar Nuwe Najantai nunkan sumakarmiayi yajaya shuar nuí iwiarsatniun. ⁸ Shuar sumakma kuitjají sumakma asamtai yamaisha Numpá Nunka tuke tuíniawai. ⁹⁻¹⁰ Nujají yaunchu Yúsán etserin Jeremías tímia nu uminkiamiayi:

“Uunt Yus turutmia núnisañ túrawarmiayi. Israer-shuar trainta kuítian sea-warmatai nuna akantrar nujaj Nuwe Najantai nunkan sumakarmi-ayi.” Tu áarmiayi.

Piratu Jesusan aníasmania nu

(Márkus 15.2-5; Rúkas 23.3-5; Juan 18.33-38)

¹¹ Jesusan apachi úuntriñ ejeniarmatai nii aniasmiayi “¿Nekasmek Israer-shuara uunt akupniurñntiam?”

Tutai Jesus “Ame támena núitjai’ tímiayi.

¹² Nuyá Israer-patri úuntriña Israer-shuara úuntriña súmantikia Jesus pachischamiayi. ¹³ Nuyá Piratu tímiayi “Ashí yajauch chichartamainia nu ¿anturmammek?” ¹⁴ Tútaisha Jesus penké áimkiachmiayi. Túmakui akupin ti enentáimiar tíninian nekaachmiayi.

Piratu Jesusan “mantamnati” tímiania nu

(Márkus 15.6-20; Rúkas 23.13-25; Juan 18.39-19.16)

¹⁵ Jísat tsawantin apachi uuntri Israer-shuar shiir enentáimprarat tusa sepunam enketun shuar wakeramun jiki ankant akupniuyayi. ¹⁶ Nui sepunam tunáa shuar Parapás náartin pujumiayi. Ashí shuar nékarmiayi. ¹⁷ Tuma asamtai Piratu Israer-shuar iruntrarun aniasmiayi “¿Yana ankant akupkat tusarum wakerarum. Parapásnak akupkattaj; Kristu tutai Jesusnak akupkattaj?” tímiayi. ¹⁸ Kame Israer-shuar ántar kajerainiak ni itiarman nekaamiayi.

¹⁹ Tura Piratu nuna inintrak pujaj ni nuarj chichaman akuptukmiayi. “Ju péñker áishman súmantikiatniujaj pachíinkiaip. Mese克蘭am nii áitkiatniun nekaan wáitsan tsawarjai” tímiayi.

²⁰ Túrasha Israer-patri úuntriña Israer-shuara úuntriña “Parapás ankant wetí, tura Jesus mantamnati” titiarum tusar shuáran akatrarmiayi. ²¹ Apachi akupniurj ataksha aniasarmiayi “Ju jimiará áentsun ¿yana ankant akupkat tusarum wakerarum?”

Tutai “Parapás” tiarmiayi.

²² Tutai aniasarmiayi “Jesusnasha. Yusa Anaikiamurj Kristu tuinia nunasha, ¿itiúrkáttaja?”

Tutai ashí “Krúsnum máatá” tiarmiayi.

²³ Tuíniakui Piratu tiarmiayi “¿Warí yajauchinia túrait?”

Tutai kakantar unsumuk “Krúsnum máatá” tiarmiayi.

²⁴ Tura Piratu Jesus uwentikrachminiaitkiui antsu ashí shuar charaatum ajainiakui entsa uturtitiarum tusa seamiayi. Tura ashí ímianiañ ikijmiak tímiayi “Ju péñker áishman máatniunam wikia pachíintsujai. Antsu atumek ístarum.”

²⁵ Tutai ashí shuar tiarmiayi “Iik ii shuarjijai ju áishman máatin ístaji.”

²⁶ Nuyá Piratu Parapásan ankant akupkamiayi. Tura Jesus asutiárum krúsnum máatárum tusa akupkamiayi. ²⁷ Nuyá akupin pujutai jeanam akupniú suntari Jesusan júkiar ashí suntaraim irunturarmiayi. ²⁸ Tura pushirj áitkiar akupin entsatain kapaaku pushin áentsrarmiayi. ²⁹ Múuknúmsha tawaspán janke najanamun etsemtikiarmiayi. Tura karisun akupniú numirja áaniun untsuuriñj ataksarmiayi. Túrawar wishikiainiak tikishmatrar tiarmiayi “Israer-shuara uunt akupniurñnme.” ³⁰ Tiar usukiarmiayi. Tura karisun jurukiar múuknum awatiarmiayi. ³¹ Tura núkap wishikrar kapaaku pushin áitkiar ni pushirñ áentsrarmiayi. Nuyá krúsnum maatai tusar júkiarmiayi.

Jesusan krúsnum máawarmiania nu
(*Márkus 15.21-32; Rúkas 23.26-43; Juan 19.17-27*)

³² Jesusan juki wésar Serini nunkanmaya shuaran, ni naari Semun, Jesusa krúsrin jurukit tusar achikiarmiayi. ³³ Nuyá Kúrkutanam ejeniarmiayi. Kúrkutaka, shuar chichamjainkia, muuka ukunch tútainti. ³⁴ Nuí Jesusan umutai yapájai pachimpra najanamun áartaj tusar súarmiayi. Tura Jesus apas iis umarchamiayi.

³⁵ Krúsnum ajintrurar suntar yáki Jesusa pushirin jukit tusar nakurusar awakmakua nuna súarmiayi. Nújainkia yaunchu Yúsnan etserin áarmia nu uminkiamiayi:

“Winia entsarmanun akantrarmiayi tura nakurusar awakmakua nuna winia pushirun súarmiayi.” Tu áarmiayi.

³⁶ Nuyá wáinkiatái tusar pujursarmiayi. ³⁷ Tura urukamtai máamuit ashí aents nekaawarti tusa áarman muuknumaani anujtukarmiayi. *JUJITI JESUS, ISRAERA UUNT AKUPNIURI*
Tu áarmauyayi.

³⁸ Núnisan Niijjai métek jimiará kasa chikichkin untsuurnumaní tura chikichnasha menaanmaní krúsnum máawarmiayi. ³⁹ Shuar nuí nankaamainiak miuche peğar wishikiainiak ⁴⁰ tiarmiayi “Ame Yusa Uunt Jee sáakim menaintiú tsawantin jeamtatjai tíchakaitiam. Nekas Yusa Uchirinkiumka krúsnumiá akaikim uwemprata” tiarmiayi.

⁴¹ Núnisan Israer-patri úuntrisha, Israer-shuara jintinniurisha, Pariséusha, Israer-shuara úuntrisha, Jesusan wishikiainiak nuamtak tiarmiayi ⁴² “Chikichnaka uwemtikrati tura Nínkika uwemtsui. Israera Uunt Akupniuríntkiunka krúsnumiá akaikimtai nekas enentáimtustatji. ⁴³ “Yúsán nekas enentáimtiniaitjai” tawai. Wátsek, Yus nekas Nin aneakka uwemtikrati. “Wi Yusa Uchiríntjai” turamchamkaj” tiarmiayi. ⁴⁴ Kasá shuarsha Niijjai ajintruamu armia nusha Nin wishikrarmiayi.

Jesusa jakamuri
(*Márkus 15.33-41; Rúkas 23.44-49; Juan 19.28-30*)

⁴⁵ Nuyá tutupin ai tee ajasmiai. Túrunayat ataksha aañku tsáapin ajasmiai. ⁴⁶ Nuni ai Jesus kakantar untsumkamiayi. “Eri, Eri, rama sapaktani’ tímiayi. Nusha shuar chichamjainkia “Yusrú, Yusrú, ¿urukamtai ajapa ikiurkiniam?” tawai. ⁴⁷ Shuar nuí wajarmia nusha nuna enentáimtsuk antukar tiarmiayi “Yaunchu Yúsnan etserniun Eriasan untsuawai.” ⁴⁸ Tura chikichik tsékenki we uruchin itiamiayi. Tura churuinian ajamper sapapjai ijiú mukunati tusa susamiayi. ⁴⁹ Tura chikichcha wíshikeak tiarmiayi “Iniáísatá, Eriás tarí uwemtikratpiash.”

⁵⁰ Jesus ataksha kakantar untsamak nuyá jakamiayi. ⁵¹ Nu chichamaik Yusa Uunt Jee tarach ajamu yakiiniya achik nunkaani tseu jaanakmiayi. Nunkasha úurkamiayi. Kayasha jakukarmiayi. ⁵² Núnisan iwíarsamusha uraniarmatai untsurí Yus-shuar jákarusha nantakiarmiayi. ⁵³ Nusha emka Jesus nantakmiatai niisha nantakiar iwíarsamun ikiukiar Yusa péprurin Jerusarénum wayawarmatai untsurí shuar wáinkiamiayi.

⁵⁴ Nuyá suntar Jesusan wáinkarmia nusha tura ni kapitíántrisha nunka úurkamtai nuyá chikichcha ashammai ajasmatai ti sapijmiakarmiayi. Tura tiarmiayi “Ju áishman nekas Yusa Uchirínti.”

⁵⁵ Nuísha nuwá Jesusan nemariarmia nu, arant wajasar, ii wajaarmiayi. Nusha Kariréanmaya pataatukiar Jesusan yainki ejeniarmiayi. ⁵⁶ Nujai

Máktaranmaya Marisha, Sepetéu nuwésha, tura chíkich Marisha ármiaiyi. Chíkich Marikia Jakupuncha tura Jusenchá nukuríyayi.

Jesus iwiarsamu

(Márkus 15.42-47; Rúkas 23.50-56; Juan 19.38-42)

⁵⁷ Kiaraj shuar ti kuítrintin Arimatéu péprunmaya ni naari Jusé támiyai. Nusha Jesusan enentáimtinuyayi. ⁵⁸ Nii Piratuj we Jesusa ayashin seamiyai. Nin súsarát tusa Piratu akupkamiyai. ⁵⁹ Túram Jusé Jesusa ayashin krusnumia jusa ti péñker tarachjai penuarmiaiyi. ⁶⁰ Tura kaya waá táurmanum yamará amia nuí iwiarsamiyai. Ni iwiarsatin táumtikramunam Jusé iwiarsamiyai. Iwiaras kaya uuntjai etektuk ikuak wémiyai. ⁶¹ Nuísha Máktaranmaya Marisha tura chíkich Marisha iwiarsamunam naka ii pujuarmiaiyi.

Jesus iwiarsamun suntar wáinkiarmania nu

⁶² Nú kiarain ayampratin tsawantna mash iwiarnakui Israer-patri úuntrisha Pariséusha Piratuj wearmiaiyi. ⁶³ Tura tiarmiaiyi “Uuntá, nu wáitrin áishman iwiaaku pujus “Menaintiú tsawant jakan nantaktiatjai” tiniuyi. ⁶⁴ Nu asamtaí iwiarsamunam menaintiú tsawant suntar wáinkiarat tusa akuptukta. Ni unuiniamurj kashi tariar tura ni ayashin kasamkar “Pai, nantakni” shuáran tiarain. Jujainkia nuna nankaamas shuáran anañkawarainti” tiarmiaiyi.

⁶⁵ Tutai Piratu tiarmiaiyi “Nuí suntar takakrume. Werum iwiarsamu urakhamnia péñker wáinkiatárum.” ⁶⁶ Tutai wear iwiarsamun urankashti tusar etektukma inkiunmanum serajai yakarar ni áarmarin anujtukarmiaiyi. Tura suntarnasha awajtukiarmiaiyi.

28

Jesusa nantakmiari

(Márkus 16.1-8; Rúkas 24.1-12; Juan 20.1-10)

¹ Ayampratin tsawant nankaasmataí tumintin yama tsawaana ai Máktaranmaya Marisha chíkich Marijiai iwiarsamu iyutai tusar wearmiaiyi. ² Tumaj Yusa suntari nayaimpinmaya iwiarsamun tari kaya atutkamun urak nuí pujusmiyai. Túmakui nunka ti úurkamiyai. ³ Yusa suntarisha peemia tímatrus wínchauyayi. Pushirisha ti puju áuyayi. ⁴ Tura iwiarsamun wáiniarmia nú suntarsha nuna wáinkiar ashamainiak ti kuranñkarmiaiyi. Jaká áinis ajasarmiaiyi.

⁵ Nuyá nayaimpinmaya suntar nuwan tímiyai “Ashamkairap. Jesus krúsnum máawarmia nu eátsrumek. ⁶ Juinkia pujatsui. Nii timia núnisan nantakniuiti. Pai, áepsarma nu ítiarum. ⁷ Wárik wérum ni unuiniamurj “Jesus jakamunmaya nantakni tura wari Kariréanam wétatui. Nuí werirum wáinkíattarme” titiarum. Wats, nunak tájai” tímiyai. ⁸ Tutai nu nuwá iwiarsamunmaya wárik jinkiar ashamainiayat ti warasar teke waketkiarmiaiyi ni unuiniamurj inujaktai tusar. ⁹ Tumaj Jesus wantin-tiukarmiaiyi. Tura “pujarmek” takui Jesusan tariar tikishmatrar nawencha miniakrusar shiir awajarsarmiaiyi. ¹⁰ Túram Jesus tiarmiaiyi “Ashamprukairap. Werum winia yatsur ujatruktarum. Kariréanam weartí. Nuí wear wáitkiartatui. Tu ujaktarum” tímiyai.

Suntar etserkarmania nu

¹¹ Nuwá wéarmatai iwiarsamu wáinin suntarsha péprunam wéar Israer-patri úuntriñ ashí túrunamun ujakarmiayi. ¹² Niisha nuna antukar Israer-shuara úuntriñ*ai* áujmatsatai tusar wearmiayi. Áujmatsar suntaran ti kuít akikiar ¹³ tiarmiayi “Atumsha étserkuram “Kashi kanararin ni unuiniamur*i* taar Jesusa ayashin kasamkarmai” titiarum. ¹⁴ Tura akupin átum kanarman nekamtaisha niij*ai* ii iwiarattaji atumin yajauch awajtamsa*in* tusar” tiarmi-ayi.

¹⁵ Nuyá suntarsha kuítian achikiar tiarmia nuna tímiatrusa*n* titiái tusar wéarmiai. Tura tuke yamaisha Israer-shuar tu túrunaiti tuñiawai.

*Jesus ni unuiniamur*in* akatar akupkamiania nu
(Márkus 16.14-18; Rúkas 24.36-49; Juan 20.19-23)*

¹⁶ Nuyá ni auntse (11) unuiniamur*i* Kariréanam wéarmiai. Tura Jesus timia nú nainnium jeawar ¹⁷ nu*i* Jesusan wáinkiar tikishmatrarmiayi. Kame chíkichka Jesusashit tuñiyat Nin wáinkiar tikishmatrarmiayi. ¹⁸ Nuyá Jesus tíjiuch tantá tímiayi “Ashí nayaimpinmasha nun*k*asha akupkatniun kakarman surusuiti. ¹⁹ Tuma asamtai ashí nun*k*anam werum ashí shuar jintintiarum Wíi shuar awajsatarum. Túrarum Yús Apa náarij*ai*, Yús Uchi náarij*ai*, tura Yús Wakan*i* náarij*ai* imiaitiarum. ²⁰ Ashí atumin Wíi akatramajrum nu nútiksarmek umiktin unuiniartarum. Tura ju nekaatarum: Tuke tsawantaj ikiutsuk atumj*ai* pujuttaj*ai*” tímiayi Jesus.

Yúsán Shiir Chichamén

MÁRKUS aarmia nu

Imiakratin Juanka etserkamuri

(Mateu 3.1-12; Rúkas 3.1-9, 15-17; Juan 1.19-28)

¹ Jui Jesukristunu shiir chicham nánkameawai. Jesukristu Yusa Uchirínti.

² Yuska imiakratin Juan kan pachis ni etserniurín Isayasan ti yaunchu ni Papirín juna áamtikramiayi:

“Iisiana, ame wéamurmín emka wetí tusan winia akatramurun akupeajai. Niisha ame jintimin iwiarattawai. ³ Niisha aents atsamunam untsumuk juna títiatui: “Uunta jintí iwiarturtarum; naka awajsa-tarum.”

Nuke áarmaiti.

⁴ Wats, aents atsamunam imiakratin Juan imiaittsa pujus étseruk, “tu-naarun Yus asakatrurat” tusarum, enentáim yapajjárúm imiantiarum” tímiayi. ⁵ Anturkatai tusar ashí Jutía nunkanmaya shuar tura Jerusarén peprunmaya shuarsha Niin tariarmiayi. Taar, ní tunaarín ujakarmatai, Juan Jurtañ entsanam imiainiarmiayi.

⁶ Juansha kamiriu ure najantramun entsauyayi. Emenmamkesha nu-apeyayi. Tura chinijiai yutai-títikriatsnasha yuuyayi. ⁷ Niisha áentsun ujaak tímiayi “Wíjjainkia nankaamas ana nu winia ukuruji winittiwai. Niisha nekas ii Uuntri asamtai, wikia tsuntsumpruan ni sapatrj jinkiamurínkisha atitrachminiaitjai. ⁸ Wikia entsajain aya ayashmin imiaajrume, antsu Niñkia imiantinia áanis Yusa Wakanj atumj enentáin enketramprattarme” tímiayi.

Juan Jesusan imiaimiania nu

(Mateu 3.13-17; Rúkas 3.21-22)

⁹ Juan áentsun imiak pujurainiai, Jesuska Nasarét pepru Kariréa nunkanam ana nuyá jiinki Juan kan tarimiayi. Tura Juan Jurtañ entsanam Jesusan imiaimiayi. ¹⁰ Nuin, Jesus entsaya jiiniuk, nayaimpin uranniun wáinkiamiayi. Tura Yusa Wakanín yámpitsa núnin najanar Niin taarun wáinkiamiayi. ¹¹ Tura nayaimpinmaya chichaamun juna antukmiayi, “Ámeke winia aneamu Uchiruitme. Ámin shiir enentáimtajme.”

Unt iwianch Jesusan anankataj tmiania nu

(Mateu 4.1-11; Rúkas 4.1-13)

¹² Nuyá wárik Yusa Wakanj Jesusan atsamunam jukimiayi. ¹³ Tura nuj, yajasma yujamunam, kuarenta tsawant pujumiayi. Nu jujai uunt iwianch Satanás naartín Jesusan nekapsataj tusa pujurmiayi. Túramtai Jesusan wáinkiatái tusar nayaimpinmaya suntar tariarmiayi.

Kariréa nunkanam ni takatrín Jesus nankommiania nu

(Mateu 4.12-17; Rúkas 4.14-15)

¹⁴ Ukunam, Juan kan sepunam enkeawarmatai, Jesuska Kariréa nunkanam Yusa akupeamurín pachis shiir chichaman etserki támiayi.

¹⁵ “Tsawant jeayi. Shuarnum Yusa akupeamurj jeatemai. Tuma

asamtai, yaunchu enentáimsamuram yapajjárúm, Uwempratin Chicham umirkatarum” tu etserkamiayi.

Jesus namakan achinian ni unuiniamurí ajasat tusa kuaru achikmiania nu

(Mateu 4.18-22; Rúkas 5.1-11)

¹⁶ Jesus Kariréa antumiañka kánmatkaríjn wekas, namakan achinian Semunñasha ni yachí Antresnasha nekan ajuntuk pujuinian wáinkiamiayi. ¹⁷ Wáiniak “Nemartustarum, tímiayi. Namak achiarmena nútiksanak áentsun-
eñu Yusna arti tusan awajsatjarme” tímiayi. ¹⁸ Tura nuyañka ni nekaríjn ajapa
ikiuiniak Jesusan nemarsarmiai.

¹⁹ Nuyasha Jesus ishichik arantach wesa, Sepetéu uchirín Jakupun ni yachín Juáñnasha kanunam ni nekaríjn apáa pujuinian wáinkiamiayi. ²⁰ Wáiniak, nemartusta tusa untsukarmiai. Tutai ni aparíncha, ni aparí takarniuríncha kanunam ikiuiniak Jesusan nemarsarmiai.

Jesus iwianchin áishmanñumia jiiiki akupkamiania nu

(Rúkas 4.31-37)

²¹ Nuyá Kapernáum péprunam jeawarmiai. Nuí Israer-shuara ayampratin tsawantrí jeakui Jesus Israer-shuar iruntainiam wayá Yus-Chichaman unuiniamiayi. ²² Tura ni jintinniurí jintintiarmla nuna iniañkas uunt chichanjai Jesus jintiakui ni chichamen anturkar ti enentáimprarmiai. ²³ Nujsha nu iruntainiam áishmanñ iwianchruku ámiayi. Niisha untsumuk ²⁴ “¿Warí itiurtamkattsamea incha taum, Nasarénumia Jesusa? Wikia nékajme. Ámetme Tunaartichu Yúsaiya winiamna nu. In emestamprataj tusam táchamek” tímiayi.

²⁵ Tutai, Jesus kakantar chicharuk “Takamátsatá. Ni enentáiya jiiinkitia, tájame” tímiayi.

²⁶ Tutai iwianch áishmanñkan ukurak ajakniñkiar untsamak kakaar aq jiiinkiamiayi. ²⁷ Nuna wáinkiar, ashamkar nuámtak aniniaisarmiai. “¿Ausha warinkit. Yamaram chicham warí chichamaít? Ju Jesuka timiá kakaram asa ímia iwianchin akupeatsuk. Iisiana umirainiatsuk” tiarmiayi. ²⁸ Tura ti wárik nu túrunamu ashí Kariréa nuñkanam antunkiamiayi.

Jesus Semunka tsatsarín tsuármiania nu

(Mateu 8.14-15; Rúkas 4.38-39)

²⁹ Nuyá Israer-shuara iruntai jegenia jiiinki Jesuka Jakupujai Juanñajisha we, Semunñ ni yachí Antresñai pujuarmia nuí jeawarmiai. ³⁰ Semunka tsatsarí tsuer peaknum jaa tepemiayi. Núnaka wárik Jesusan ujakarmiai. ³¹ Nuñkia Jesus werí uwejnem achik iniantkimiayi. Tura nu chichamaik michatramiai. Michatar, péñker ajas, Jesusnasha ni nemarniuríncha ayu-rawarmiai.

Untsurí jaan Jesus péñker awajsarmiania nu

(Mateu 8.16-17; Rúkas 4.40-41)

³² Nu tsawantaj kjaraj, ashí jáinian, iwianchrुकuncha Jesusan itiararmi-ayi. ³³ Tura ashí nú péprunmayá shuar taar wáitiniam Jesusan káutkarmiai. ³⁴ Untsurí shuáran chíkich sunkuraim jáinian Jesus tsuarmiai. Tura iwianchrुकu armia nuna enentáiyán iwianchin jiiirkarmiai. Jesuka iwianch nékamu asa, winia náarun ántar pachisaríjn tusa suritkarmiai.

Kariréa nunkanam Jesus Yus-Chichaman etserkamiania nu

(Rúkas 4.42-44)

³⁵ Nuyá kashin káshik tsawaátsain Jesus nantaki Yúsan áusataj tusa jiinki at-samunam wémiyai. ³⁶ Tura Semun ni amikrijjai Jesus wemaanum wéarmiayi.

³⁷ Nin wáinkiar “Ashi shuar Ámin eátmainiawai” tiarmiayi.

³⁸ Tutai Jesus chichaak “Chíkich péprunmasha arantach wetai. Nui Yusa chichame etserkatai; nuna túratsan táwitjai” tímiyai.

³⁹ Nuna tí ashí Kariréa nunkanam Israer-shuar iruntai jeanam etseras wekaimiyai; tura núnisan iwianchniasha jiiki akupkini wekaimiyai.

Tunamaru shuaran Jesus tsuármiania nu

(Mateu 8.1-4; Rúkas 5.12-16)

⁴⁰ Túramtai, ti tunamaru shuar Jesusan seatajtsa tarimiayi. Taa tikishmatar tímiyai “Wakerutakmeka tsuaratin tujinratsme.”

⁴¹ Jesus nin waitentak uwejejai antinmiayi. Antin “Wakerajme. Pénger ajasta” tímiyai. ⁴² Nu chichamaik, Jesus chichakmatai, ni sunkuri menkakamiayi. Tura pénger ajasmiyai. ⁴³ Túrunamtai Jesus kakantar chicharuk ⁴⁴ akupeak “Wáinkiatá, nánkamsam etseraip, tímiyai. Antsu weme, Israer-patrimin iniakmamsata. Túram ashí aents ame pénger ajasmarumin nekaawarat tusam, Muisais aar akupkamiania nu umikiam súsatin ana nu susata” tímiyai. ⁴⁵ Tura etserkaip támaitiat, jiinki ni túrunamurin mash etseramiayi. Tura nuna etserka asamtai, péprunam, aents írunmanum wétinian Jesus nakitramiyai, antsu aa atsamunam pujumiayi. Tura ashí nunkanmaya Jesusan tariarmiayi.

2

Jesus emearun pénger awajsamiania nu

(Mateu 9.1-8; Rúkas 5.17-26)

¹ Kapernáum péprunam Jesus ukunam ataksha wémiyai. Jeamtai, ni jeen pujan nekaawarmiayi. ² Tuma asamtai shuar wárik ti untsurí káutkarmiayi. Ti untsurí asamtai, jea piakmiayi; wáitinmasha ankantchauyayi. Jesuska Yus-Chichaman nu aentsun ujaak pujurmiayi. ³ Nuiñkia ni amikrin emearun kuaru shuar tampumpuawar júkiar Jesusan itiararmiayi. ⁴ Tura jeawar, untsurí shuar írunu ásamtai jeá wayatniun tujinkiarimiayi. Tuma ásar, yakininj wakar jea urakar, áankawar, tampunam ni amikrin Jesus puja-munam awaintuawar itiararmiayi. ⁵ Tura niisha Jesus nekas tsuártatui tu enentáimmiarin Jesus nekáa emearun chicharuk, “Uchirú, ame tunaarumka tsankuramuiti” tímiyai.

⁶ Israer-shuara jintinniurisha nuna antúu pujuarmiayi. Tura ni enentáijjai enentáimsar, ⁷ “¿Jysha urukamtai emearun tu chichara? Yúsan imiá yajauch chicharui. Warí, yaki tunaan asakarminiait; aya Yúsak tunaan asakarcham- niakait” tu enentáimsarmiayi.

⁸ Jesuska ni enentáimmiarin nekarawar “¿Urukamtia átum tu enentáimprum? tímiyai. ⁹ Emearu, tunaarum tsankuramuiti títinjai, emearu, wajakim tampu- ram entsakim wekasata títinjai ¿tuá imiá yúpichuchit? ¹⁰ Wats wi, Aents Ajasu asan Yusa kakamarijjai shuara tunaari tsankuramniaitjiana nuna paant iwiaintiuktajrume” tímiyai. Nuna tinia emearun chicharuk ¹¹ “Wajaktia, tájame; túram tampuram jukim jéemijn wetá” tímiyai. ¹² Nu chichamaik emearu wajaki, tampurin júki, ashí ímiainiajn jinkimiayi.

Nuna túrunamtai ashí ashamkarmiayi. Tura “jútikiamu penké wáinchaitji” tiar Yusa náarín uunt awajsarmiayi.

Jesus Riwin untsukmiania nu
(Mateu 9.9-13; Rúkas 5.27-32)

¹³ Nuyá ukunam Jesus antumiannum waketkimiayi. Tura ashí shuar káunkarmatai jintintiawarmiayi. ¹⁴ Tura jintintiawar amuk, akupin akitiai jeenam nankaamak, Arpeu uchirín Riwin pujan wáinkiamiayi. Wáiniak “Nemartusta” tímiayi. Tutai Riwi wajaki Jesusan nemarsamiayi. ¹⁵ Chíkich tsawant, Riwisha Jesusan ni jeen itiaamiayi. Tura untsurí kuítian-juu shuarsha, yajauch shuarsha Jesusjái ni unuiniamuríjjaisha ashí nuim misanam pujuarmiayi. ¹⁶ Tura kuítian-juu shuarsha yajauch shuarsha Jesusjái irunar yurumáinian wáinkiar, Pariséu jintinniurisha Israer-shuara jintinniurisha Jesu unuiniamurín aniasarmiayi. “¿Urukamtai ame úuntrum Jesus, kuítian-juu shuarjái tura yajauch shuarjjaisha yuruma?” tiarmiayi.

¹⁷ Jesus nuna antuk tímiayi “Jaachu shuar tsuákratniun atsumainiatsui. Antsu jaa ana nu tsuákratniun atsumainiawai. Wats, “pénkeraitjai” tuinia nú shuaran untsuktajtsan táchaitjai; antsu “tunaitjai” tuinia nú shuaran Winia ajasat tusan untsuktajtsan táwitjai” tímiayi.

Yurumtsuk Yus áujatsniun Jesusan aniasarmiania nu
(Mateu 9.14-17; Rúkas 5.33-39)

¹⁸ Juanka unuiniamurisha Pariséu unuiniamurisha yurumtsuk Yúsán áujiarmiayi. Túmakui chíkich shuar Jesusan tariar chicharainiak, “Juanka unuiniamurisha, Pariséu unuiniamurisha yurumtsuk Yúsán áujainiatsuk; ¿ame unuiniamurmeka urukamtai yurumtsuk áujainiatsu?” tiarmiayi.

¹⁹ Tutai Jesus chichaak, “¿Nuatma nampernum ipiaamu ainia nu ijiarmawartiniak ainia? Yama nuatu pujakui ni amikrj warainiak ijiarmachartin ainiawai. Núnisan winia unuiniamur, Wi pujakui, warainiak yurumtsuk pujuschartin áiniawai. ²⁰ Tura tsawant jeattawai, Winia jurukiartin. Nuñkia winia unuiniamur ijiarmawartatui’ tímiayi Jesus.

²¹ Tura nuyá juna tímiayi ‘Mamuru pushí jaanakmatai yamaram tarach anjuktchatniuiti. Túramka nijiam yamaram tarach sumpeak mamushan chiníkiá nuna nankaamas jáaktatui. ²² Nijiamanch yamáí nawar nuap najanamu arutnum yaraachminiaiti. Túramka wakaprua kariak nuap najanamu ijakratniuiti. Tura nijiamanch ukarattawai. Nuap najanamu yajauch ajastatui. Antsu yamaram nijiamanch yamaram nuap najanamunam yaraatniuiti” tímiayi.

Trikiu neren yuawarmiania nu
(Mateu 12.1-8; Rúkas 6.1-5)

²³ Chíkich ayampratin tsawantai Jesus ajanman ajapén nankaamarmiayi. Tura ni unuiniamurj trikiu neren majúkiar wearmiayi. ²⁴ Nuna wáinkiar Pariséu Jesusan chicharainiak “¿Warí, urukamtai ame unuiniamuram ayampratin tsawant takastin surinkiamu ajsha takainia?” tiarmiayi.

²⁵ Tutai Jesus tímiayi “Íi uuntri Tawitia túramurí Yús-Papinium áujachukaitrum. Niisha ni nemarniurisha tsukamainiak, ni yurumkari atsakui, túrawarmia nu áujachukaitrum. ²⁶ Apiatár Yusnan pujurniu untri pujaj Uunt Tawit Yusa Jeen wayamiayi. Tura Tawitkia, patri nankaamas uunt asa, pátrichuiat, iniaktusma tantan, aya patri yútainiak, yuamiayi; tura ni nemarniuríncha ajamsamiayi. Nu áujachukaitrum, tímiayi.

²⁷ Ayampratin tsawantaj túrashтинian umirkashtimpiash tusa Yuska aentsun najanachmiayi. Antsu aents ayamprarat tusa Yus ayampratin tsawantan tesamiayi. ²⁸ Wisha, Aents Ajasu asan imia ayampratin tsawantan Nerenniurintjai” tímiayi.

3

Uweje jakan Jesus tsuármiania nu (Mateu 12.9-14; Rúkas 6.6-11)

¹ Ataksha chíkich tsawantaj Israer-shuar iruntainiam Jesus wayamiayi. Nuj shuar ámiayi, ni uweje jaka. ² Tura tunáan túrayi titiai tusar wakeruiniak “ayampratin tsawantaj tsuártimpiash” tusar, Pariséu shuarsha Jesusan ii pujuriarmiayi. ³ Nuñkia Jesus uweje jaka shuaran chicharuk “Ajapén wajasta” tímiayi. ⁴ Nuñkia mamikmaun chicharuk “¿Ayampratin tsawantaj péñker túratin yajauch túratniujaj tuá imiá péñkerait? Shuar uwentikratin máatniujaj tuá imiá péñkerait?” tímiayi.

Nuna takui niisha pachischarmiayi.

⁵ Tura Jesus kajek nin íyarmiayi; tura ni enentáin kátsuram ásarmatai kúntuts enentáimsamiayi. Tura shuáran chicharuk “Uwejem iniakmasta” tímiayi. Iniakmastatai ni uweje jaruku ataksha péñker ajatsamiayi. ⁶ Nuyá Pariséu shuar jinkiar, Jesus maami tusar Erutis shuarjaj áujmatsarmiayi.

Untsurí shuar Jesusan káutkarmiania nu

⁷ Nuyá Jesus ni unuiniamurijjaj antumiannum wémiayi. Kariréa nunkanmayá untsurí shuarsha Jesusan nemariarmiayi. ⁸ Untsurí nunkanmayasha káunkarmiayi. Jutía nunkanmayasha, Jerusarén péprunmayasha, Itiumía nunkanmayasha, Jurtan entsa amainiasha, Tiru tura Setun pepru pujuinia nú nunkanmayasha, untsurí shuar ni túramurin nekaawar, Jesusan káutkarmiayi. ⁹ Untsurí káunkar chanuntawarajin tusa Jesus ni unuiniamurin kanuram inianáastarum tusa seamiayi. ¹⁰ Kame untsurí shuaran Jesus nuik tsuaru asantai, jaa shuar nuí káunkarmiania nu Jesusan antintaj tusar shitianainiakui nuna seamiayi. ¹¹ Tura iwianchrusha Jesusan wáinkiar tikishmatrarmiayi. Untsumainiak “Ame nekas Yusa Uchirinme” tiarmiayi. ¹² Tura nuna etserkairap tusa Jesuska kakantramiai.

Jesus tuse shuaran anaikiarmiania nu (Mateu 10.1-4; Rúkas 6.12-16)

¹³ Nuyá Jesus náinnium wakamiayi. Tura anaikiatniun wakerimia nú shuaran untsukmiayi. Tura niisha Jesusan weriarmiayi. ¹⁴ Tura Niijjaj wekasar Yus-Chichaman unuiniartinian tuse shuáran anaikiarmiayi. ¹⁵ Tura sunkur tsuártinian, iwianchcha jilki akupkatniun ni kakarmarin súsarmiayi nú shuaran. ¹⁶ Ju shuáran anaikiamu ármiai: Semun, Jesus chíkich naarin Pitiur apujtushmania nu; ¹⁷ Sepetéu uchirí Jakupu, ni patai Juánsha; ipi-amtajaj métek kakaram ásarmatai nuna mai “Puanérjis” naari susamiayi. Nusha shuar chichamjainkia “ipiamta nuke” tawai. ¹⁸ Nuyá Antressha, Jiripi, Parturumí, Mateu, Tumas, Arpeu uchirí Jakupu, Tateu, ásump Semun, ¹⁹ Jutas Iskariúti. Jesusan ukunam surukmia nú Jutasauyayi. Anaik amukmatai jeá waketrarmiayi.

Yusa Wakanin yajauch chicharna nu (Mateu 12.22-32; Rúkas 11.14-23; 12.10)

²⁰ Waketkiarmatai, ti untsurí shuar taarmatai takatrí ti akui, yurumátনিun jeacharmiayi. ²¹ Jesusa shuárissha nuna nekaawar Jesus ti itirchat pujus wáurtsuash tu enentáimsar jukítiai tusar nu jeanam jeariarmiayi.

²² Nuyá Israer-shuara jintinniurí Jerusarénumiá táarmiania nu, Jesusan áujmatainiak “Pirsepú enkea asa iwianchrúkuiti. Tuma asa uunt iwianchi kakarmarjijai iwianchin jiki akupeawai” tiarmiayi.

²³ Tutai Jesus winitiarum tusa nin untsukmiayi. Tura enentáimtikrataj tusa juna tímiayi: “¿Iwianch Satanáskesha itiuur ajapmamatin? ²⁴ Chikichik nú nunkanmaya shuar nuámtak kajernaiyakuñkia, nu nunka wari meserchattawak. ²⁵ Nuámtak shuar ni shuarjijai kajernaiyakuñkia nu shuarsha amunaikchartatuak. ²⁶ Núnisan ¿Satanáskesha ni suntarjijai máaniakka itiuurak tuke pujusarat? Amunaikiartatui. ²⁷ Nánkamas shuar kakaram shuara jeen wayá, nérenniun jinkiatsuk ni kuítrín kasarkachminiati. Antsu nérenniun jinkiá ni kuítrín kasarkamniati. ²⁸ Nekas tájarne, shuar tunáa ashí túruiniana nuka tsankuramniati. Winiasha winia Aparnasha yajauch áujmatusha tsankuramniati. ²⁹ Antsu Yusa Wakanín yajauch áujmatna nuka tsankurachminiati; antsu nu shuar niniki tuke sumamattawai.” ³⁰ “Jesuka iwianchrúkuiti” tuñiakui Jesus nuní tímiayi.

Jesusa yachi Jesusa nukurí

(Mateu 12.46-50; Rúkas 5.19-21)

³¹ Nuyá ni yachi ni nukurjijai taar aa wajasar, Jesusan untsukat tusa akupkarmiayi. ³² Shuar Jesusan téntak pujuarmia nu tiarmiayi “Iis, nukusha, yatsumsha aa wajasar untsurmainiawai.”

³³ Tutai Jesus chichaak “Ya ainia winia nukursha yatsursha” tímiayi. ³⁴ Nin téntakar pujuarmia nuna iis “Júiti winia nukurka, yatsurka, tímiayi. ³⁵ Shuar Yusa wakeramurín uminiana nu winia yatsuruiti, winia umaruiti, winia nukuruiti” tímiayi.

4

Atsaamin atsaampramiania nu

(Mateu 13.1-9; Rúkas 8.4-8)

¹ Nuyá jiniki antumianka yantamen Jesus ataksha unuiniartinian juarkimiayi. Tura untsurí shuar iruntrar matai, kanunam enkempramiayi. Shuarsha antumianka káanmatkarín pujuarmiayi. ² Jesuka métek-taku chichamjai ti jintintiarmiayi. Jintintiuk juna tímiayi: ³ “Antuktarum. Atsaamin atsaamprataj tusa jinikiimai. ⁴ Atsaamkui ni arakrú jintiá iniararmai. Chínki yakiya káutkar yuawarmai. ⁵ Chikichcha kaya írunmanum iniararmai, nunka ishichik ámanum. Tura nunka ishichik asamtai wárik tsapainiarmai. ⁶ Tura etsa etsantar sukuám kankepe atsa asamtai káararmai. ⁷ Chikichcha janquí nupanam iniararmai. Jankisha tsapainiar kankar ajakrarmai; túram nerekararmai. ⁸ Chikichcha péñker nunkanam iniararmai. Tura tsapainiar nerekararmai, chikich trainta, chikich sesenta, chikich sian nerekararmai. ⁹ Kuíshim ákuñkia antuktarum” tímiayi.

(Mateu 13.10-17; Rúkas 8.9-10)

¹⁰ Untsurí wearmatai, ishichik Niijiai juakarmiania nu, ni tuse unuinia-murijiai aniasarmiayi “¿Ame jintintiamna nusha warimpiait?” tiarmiayi.

¹¹ Tutai Jesus chichaak “Yuska ni akupeamurín atumin paant nekamtikramatssa wakerutmarme. Antsu chikich shuarka aya métek-taku chichamjai

jintintiáwartatui. ¹² Íniayatañ wáinkiacharat tusa, antukarsha nekaacharat tusa, umirtsuk ni tunaarj tsañkurnacharat tusa túrattawai' tímiayi.

(Mateu 13.18-23; Rúkas 8.11-15)

¹³ Tura tímiayi 'Wi jintintiajrumna nú métek-taku chicham nekaachurmek. Nu nékachkurmeka žitiurak chíkich métek-taku chichamsha nekaatarum?' ¹⁴ Atsaamnua nuka Yus-Chichaman étserna nuna nakumui. ¹⁵ Jínkiái jintiá iniaarua nuna chíkich shuar ántuiniamun nakumui. Nu shuar chichaman ántuiniawai. Tura antukarmatai Satanás wárik tarí ni enentáin atsaampram jurawai. ¹⁶ Chíkich shuar ántuiniamu kayanam atsaampramua núniskete. Niisha chichaman antukar wárik warainiak umiktasa wakeruiniawai. ¹⁷ Tura ni kañkape atsakui, aya ishichik katsuiniawai. Tura ukunam, Yus-Chichaman wakeruiniakui shuar kajeram tura chíkich itiurchatan wáinkiar Yúsaiya kanainiawai. ¹⁸ Chíkich ántuiniamuka jañkí nupanam atsaampramua núniskete. Nu shuar Yus-Chichaman ántuiniawai. ¹⁹ Ántuiniayat ju nuñkanam ana nuna ti páchiniawai. Tuma ásar kuítian tura shiirmachin ti takustinian wakeruiniawai. Nú wakeramu ni enentáin Yus-Chicham ana nuna kañkar emenkatui. Tuma asamtai nerektinian tujintiainiawai. ²⁰ Tura chíkich ántuiniamusha péñker nuñkanam atsaampramua núniskete. Nú shuarsha Yus-Chichaman antukar umiiniawai. Tura nerenawai, chíkich shuar trainta, chíkich shuar sesenta chíkich shuar siañsha nerenawai.'

Uukma ana nu paant nekanattawai

(Rúkas 8.16-18)

²¹ Nuyá Jesus juna tímiayi 'žShuar shiripkin ekeemak itiá pitiaknum enkeattawak. Peaknum wakenam ikiustatuak? Atsá. Antsu misanam ekentsashtinkiait. ²² Núnisañ ashí uukma ana nu ukunam paant nekanattawai. Tura núnisan yamá ishishmasa chichasmasha ukunam paant nekanattawai. ²³ Kušhim ákuñkia antuktarum.' ²⁴ Tura nuyá tímiayi 'Ántarmena nu esetrarum enentáimsarum antuktarum. Urutá péñkerak enentáimsatarum, núnisañ Yuska ámin nekaatniun suramsattarme, tura nú núkap patatramsattarme. ²⁵ Tuma asamtai shuar núkap takakna nu patatnastatui. Antsu chíkich shuar ishichik takakuk jurunkittiawai.'

Yusa akupeamuri júnisaiti

²⁶ Nuyá Jesus chichaak juna tímiayi 'Yusa akupeamuri júnisaiti. Shuar jínkian atsaampratniua núniskete. ²⁷ Jínkiáin atsaamar, untsurj kanar, tsawar, uruksanpi tusa nákwai. Tura ititura tsapainia núnaka nékatsui. ²⁸ Kame jínkiái nuñkanam inít aku niñki tsapaatsuk; emka nukareawai, nuyá tuyureawai tura nujamar katsuawai. ²⁹ Túruna káakmatai júuktin tsawant jeayi tusar júniawai.'

(Mateu 13.31-32; Rúkas 13.18-19)

³⁰ Ataksha Jesus tímiayi 'žYusa akupeamuri warijjainkⁱ nakumkataj. Warijjainkⁱ métek-takuit? ³¹ Mustasa jínkiái araamua nujaj métek-takuiti. Nu jínkiaisha ashí nañkaamas ishitiupchichiti. ³² Tura araam tsapái ashí nañkaamas uunt ajawai; tura tseñkeakmarjsha kámpuram asamtai nuj mik-intranam chiníkisha shiir ayamainiawai.'

(Mateu 13.34-35)

³³ Núnisan̄ Jesus untsurí métek-taku chichamjaī Yus-Chichaman ujaamiayi. Nii nekaatniun jearmia nunak ujaamiayi. ³⁴ Chíkich shuaran aya métek-taku chichamjaī ujaamiayi; antsu ni unuiniamurjijaī Niñki pujus ashí paant jintintrarmiyai.

Nasencha, entsanCHA Jesus imijíánmia nu
(Mateu 8.23-27; Rúkas 8.22-25)

³⁵ Nu tsawantaj̄ etsa akaikimtaī Jesus ni unuiniamurj̄in chicharainiak “Entsa amain katintaī” tímiayi. ³⁶ Tutai kanunam en̄kemprarmiyai. Chíkich shuarnaka káanmatkanam ikiukiar Jesusan kanunam pujan júkiarmiyai. Chíkich kanunmayasha atampriarmiyai. ³⁷ Tura nasesha ti nasenkatasa nan̄kammiayi; chíchimi kanunam yaráná piáktasa ajamiayi. ³⁸ Jesuska kanú senkarin̄ atampus kanúu tepemiayi. Tura, ni unuiniamurj̄i Jesusan ishintiak chícharuk “Uunta ii wayajniā júka pachitmatsemek” tiarmiyai.

³⁹ Tutai Jesus nantaki nasen kakantramiayi. EntsanCHA chícharuk “Takamatsata. Miaku ajasta” tímiayi. Tutai nasesha men̄kakamiayi, entsasha miaku ajamiayi. ⁴⁰ Túrunamtaī Jesus ni unuiniamurj̄in chicharainiak “¿Urukamtaī ashamarum? Itiura Yus nekas enentáimtatsrum” tímiayi. ⁴¹ Tura imiá ashamainiak “¿Maa júsha yait? Nasesha entsasha nin umirainiatsuk” tunaiyarmiyai.

5

Jataranmayan̄ iwianchrukun Jesus tsuármiania nu
(Mateu 8.28-34; Rúkas 8.26-39)

¹ Nuyá antumian̄ amainī Jataran̄ nun̄kanam jeawarmiyai. ² Jesus kanunmayā jínkimtaī áishman̄ iwianchruku, shuar jakáā iwiartainiumiá wárik taa Jesusan̄ in̄kiun̄miayi. ³ Nu shuar iwiartainium̄ tuke pujuyayi. Tura jirujaj̄inkiā nin̄ jinkiaatniun̄ tujinkiar̄miayi. ⁴ Jirujaj̄i nawenmasha, uwejn̄umsha tuke jínkiaū ármiayi. Túramaitiat̄ jinkiaarman̄ tsuriar̄ tepet-tepet awajmiayi. Tura ti kakaram̄ asamtaī nin̄ nupetkachminiuyayi. ⁵ Tuke tsawaj̄sha káshisha, iwiartainium̄sha murasha kayajaj̄ī ijiumak̄ untsumuū wekainiuyayi. ⁶ Tura yajayan̄ wáiniak̄ Jesusan̄ tsekē tarimiayi; tura tikishmatramiyai. ⁷⁻⁸ Túrunamtaī Jesus chícharuk “Iwianchiá, ni enentáiyá̄ jínkitia, tájame” tímiayi.

Takuī íwianch̄ kakantar chíchaak̄ “¿Winiasha urukamtaī tarutnium, Uunt Nan̄kaamaku Yusa Uchirj̄ī Jesusá? Yus iirmanum̄ wáitkiarsaip, tájame” tímiayi.

⁹ Takuī Jesus tímiayi “¿Ame náarmesha yait?”

Tutaī niishā ayak̄ “Untsurj̄ī ásar wikiā Untsurj̄ī-suntar tu anaikiamuitjaī” tímiayi.

¹⁰ Nunā t̄ī amik, nu nun̄kanmayā akuptukaj̄in̄ tusa Jesusan̄ ti seamiyai. ¹¹ Nujsā nainnium̄ nuntumas̄ untsurj̄ī kuchī shushun̄mak̄ matsamarmiyai. ¹² Tumā asamtaī, kuchiniam̄ en̄kemátin̄ tsan̄katruktā tusar Jesusan̄ seawarmiyai.

¹³ Tuiniakuī Jesus “ayu” tímiayi. Takuī íwianch̄ áishman̄kaj̄iniá̄ jínkiar̄ kuchiniam̄ en̄kemáwarmiyai. Kuchishā ti untsurj̄ī, jimiará̄ mir̄ (2.000) áchiawash. Ashí̄ mash̄ nánatanam̄ iniāawar̄ antumian̄num̄ inian̄karmiyai. Nujsā entsá̄ k̄j̄akar̄ jakerarmiyai.

¹⁴ Túrunamtaī kuchin̄ wáinin̄ pisarar̄ péprunmasha shuarnum̄sha nunā etserarmiyai. Tumā asamtaī iyutaī tusar ashintiukarmiyai. ¹⁵ Túrawar̄ Jesusaj̄ī

jeawarmiayi. Jeawar áishman yaunchu iwianchrukun yamaikia péñker aja-sun pushirín entsar pujan wáinkarmiayi. Wáinkiar ashamkarmiayi. ¹⁶ Tura waketkiar kuchi túrunamuncha iwianchruku péñker ajasmancha mash et-serkarmiayi. ¹⁷ Tuma asamtai ni nuñkeya jiinki wetá tusa seawarmiayi. Jesus kanunam enkemamtai áishman nuik iwianchruku amia nu Jesusan chicharuk ¹⁸ “Wi Ámijjai tuke tsaniñkian wekasatjai” tímiayi.

¹⁹ Tura núnaka Jesus suritkiamiayi. “Antsu ame jeemiin, áminiurmijn weme, ashí Uunt Yus túrutma nu tura waitnentrampra nusha ujakarta” tímiayi.

²⁰ Tutai áishmansha wémiayi. Tura antsu Tekapuris nuñkanam Jesus nin péñker awajsamia nuna ashí shuaran ujakmiayi. Nu nuñkanmaya shuarka nuna antukar ti enentáimprarmiayi.

*Jimiará jaan Jesus tsuármiania nu
(Mateu 9.18-26; Rúkas 8.40-56)*

²¹ Ataksha Jesus kanujai katinmatai, aents untsurí Nin irunturarmiayi. Jesuska antumianka káanmatkari wajamiayi. ²² Tura Israer-shuar iruntai jea náampruku, ni naari Jairu, támiayi. Taa, Jesusan wáiniak, piniakum tepersamiayi. ²³ Piniakumar ti seak, “Winia nawantur jarutui. Winitia, túram péñker ajasat tusam uwejmijjai antinrukta. Nuñkia jarutkashtatui” tímiayi.

²⁴ Tu tímiatai Jesus niijjai wémiayi. Tura untsurí shuar wena ásar Nin chánuarmiayi.

²⁵ Nuñ pachitkia nuwa ti jaa wémiayi. Niisha tuse uwi numpan ajapeak wáitias pujuyayi. ²⁶ Ti untsurí tsuakratin nincha iisu armiayi. Tura iyamsha ti wáitias pujuyayi. Tura ni kuitrincha ashí ajapaitiat tsuámarchauyayi; antsu tsuamsha nu arant ajauyayi. ²⁷ Nu nuwasha, Jesus túramun antuku asa, ni ukuurini amainian ni pushirín antiñmiayi. ²⁸ “Wi aya ni pushirín antiñnaka péñkerapi ajasaintjia” tu enentáimiar túramiayi. ²⁹ Tura Jesusa pushirín antiñ ni chichamaik numpa ájapan menkakamiayi. Péñker ajasman ayashin nekapramiayi. ³⁰ Tura nuin Jesuska, ni kakarmarjjai tsuarman nekapmampramiayi. Tura nuna nekáa, ayantar chichaak “¿Yaki winia pushirun antinrukta?” tímiayi.

³¹ Tutai ni unuinamurí tiarmiayi, “Untsurí Ámin antinmainiasha ¿urukam-tai “yaki winia antintkia” tame?”

³² Tura Jesus, yaki túruta tusa ashí íimpramiayi. ³³ Nuñkia nuwasha, ni ayashin túruna nuna nekáa, ti ashamak kuraimiayi. Tura Jesusan jeari tikishmatramiayi. Tura ni túrunamurín ashí paant ujakmiayi. ³⁴ Takui Jesus nin chicharuk “Nawantru, Winia nekas enentáimtura asakmin, péñker awajtamsaitme. Shiir wetá, tura tuke péñker pujusta” tímiayi.

³⁵ Tura Jesus nuna tuke chichas pujai, iruntai jea uuntri jeenia tariarmiayi. Tariar chicharainiak “Ame nawantrum jakayi. ¿Urukamtaí Unuikiartin tuke itit awajsatam?” tiarmiayi.

³⁶ Tura Jesuska, nii tiarmia nuna ántayat, núnaka pachitsuk, iruntai jea uuntrin chicharuk “Ashamkaip; áyatik nekas enentáimtura sata’ tímiayi. ³⁷ Tura Niijjai wétinian aya Pítruncha, Jakupuncha ni yachi Juanjai tsanekatarmiayi. ³⁸ Iruntai jea uuntri jeen jeawar, áentsun charaatum ajainian, útainian untsukum ajainiancha Jesus wáinkiamiayi. ³⁹ Tura nuwach penké jakan

nékayat, wayá nin chicharuk “¿Urukamtai timiá úutrüm, tura wa wa ajarum? Nuwäch jákachai, antsu kanarai” tímiayi.

⁴⁰ Nuna takui wishikrarmiayi. Tura Jesus ashí jïir akupkarmiayi. Áyatik nuwächï aparïn, nukurïncha tura Nijjajï táaruncha nuwächï tepamurïn jukimiayi. ⁴¹ Tura wayawar Jesuska nuwächï uwejen achik tímiayi “Tari-tia kumi.” Nusha shuar chichamjainkia “nawantrü nantáktiá” tawai. ⁴² Nuwäch tuse uwí takakuya nu, nú chichamaik nantaki wekasamiayi. Túramtai nuï pujuarmiania nu ti enentáimprarmiayi. ⁴³ Jesuska chichaak “Atumsha penké etserkairap’ tímiayi. Tura “nuwäch ayuratarum” tímiayi.

6

Jesus Nasarétnum pujusma (Mateu 13.53-58; Rúkas 4.16-30)

¹ Jesus nuyá jïinki ni nunken waketkimiayi. Ni unuiniamurïsha nemari-armiayi. ² Nuïsha ayampratin tsawant jeamtai Israer-shuar iruntainiam wayá unuiniamiayi. Tura Jesusan anturkarmiania nu ti enentáimsarmiayi. “¿Jusha tuï unuimiaruit. Ni nekaatniurïncha yaki susait. Tura aentsti tujintiajnía nuna Niisha itirak tura?” ³ Jusha karpintiruchukait; Marí uchirïnchukait. Ni yachïsha Jakupusha, Jusesha, Jútassha, Semunsha nékatsjik. Tura ni umaïsha juï ijïajï pujuiniatsuk” tiarmiayi. Túrawar Nin nekas enentáimtustinian tujinkiararmiayi.

⁴ Túrassha Jesus nin chicharuk “Yúsnan etserniun chíkich nunkanmayaanka shiir anturainiawai. Antsu ní nunkeyanaka, ní shuarsha anturainiatsui” tímiayi.

⁵ Tura nuïsha, ni nunkenkikia aentsti tujintiamun túratniun tujinkiamiayi. Antsu jaancha aya ishichik ni uwejejai antïn tsuármiai. ⁶ Tura nekas enentáimtacham “¿urukamtai nusha?” tu enentáimsamiayi.

Nuyasha chíkich péprunam wayá, chíkich péprunam wayá Yus-Chichaman unuiniakní wekaimiayi.

Yus-Chicham etserkatarum tusa Jesus ni unuiniamurïn akupkarmiania nu (Mateu 10.5-15; Rúkas 9.1-6)

⁷ Tuse unuiniamurïn utsuk jímiarchik jímiarchik werum Yus-Chicham etserkatarum tusa akupkarmiayi. Tura iwianchin nupetkarat tusa ni kakarmarïn súsarmiayi. ⁸ Tura chicharuk “Jintiá yurumátniusha jukiirap, uyuntrümïncha kuitcha enkearum jukiirap. Antsu aya áanik mashtun jukiirum wetarum. ⁹ Sapat uwekatarum, tura entsartincha jímiar jukiirap, tímiayi. ¹⁰ Tura jea wayarmena nuïn pujustarum; pujá-pujakuarum nuyá chíkich peprunmasha wetarum. ¹¹ Tura nánkamas aents atumin awaintiamainiachkuisha, anturtmainiachkuisha, nuyá jïinkirum, nu shuar yajauch áiniawai tusarum, atumí nawe nunka akakekrum ikiuktiarum. Kame Yus áentsun nekapsattana nú tsawant jeamtai, nu shuarnaka asutiattawai. Sutama péprunmaya shuarjai tura Kumura péprunmaya shuarjai nankaamas nin asutiattawai” tímiayi Jesus.

¹² Nuyá Jesusa unuiniamurï jïinkiar enentái yapajjar Yúsai enentáimtumartinian etserkarmiayi. ¹³ Tura iwianchruku enentáiyá iwianchin jïirki akupkarmiayi, tura asutiijjai yakarar untsurï jáinian tsuararmiayi.

*Juanka jakamuri**(Mateu 14.1-12; Rúkas 9.7-9)*

¹⁴ Jesusa náarín tura ní túramurín ashí aents áujmatin ásarmatai, uunt akupin Erutis nuna antukamiayi. Erutiska “Imiakratin Juan jakamunmayá nantakni. Tuma asa ti kakaram takaawai” tímiayi. ¹⁵ Tura chíkich shuar “Eríasaiti” tiarmiayi. Chíkichcha “Yúsnan etserniuiti, yaunchu etserniuya núkete” tiarmiayi. ¹⁶ Erutis nuna antuk “Nekas Juánkaiti. Ní muuken tsupiktinian akupkamiay nu, jakamunmayá nantakniuiti” tímiayi. ¹⁷⁻¹⁹ Kame Uunt akupin Erutis, ní yachi Jiripi nuarín nuatkamiayi. Nú nuwá naari Jirutíasaiti. Juansha uunt akupniun Erutisan chicharuk “Yatsumi nuarí akintrukchatniuitme’ tímiayi. Tutai nuwá Jirutías Juánkan ti kajerkamiayi. Tura Juánkan máataj tusa wakerimiayi. Túrasa uunt akupin Erutis nuna surimkamiayi. Antsu Juan achikrum sepunam enkeatarum tusa akupkamiayi. ²⁰ Juansha tuke enentáijjai Yusa jintín wekainiuyayi. Erutis, ní esetar enentáimniun neka asa Juánkan ashamak Jirutías wakeramurín túrawain tusa suritkamiayi. Kame Erutis Juan etserman nékachuiat antuktinian wakerimiayi.

²¹ Jirutías, itirak máawaj tu pujai, uunt akupin Erutis, ní akiiniamu tsawantrí jeamtai, ní suntaríncha, Kariréa nunkanmayá úuntríncha, kuítrintin armia nunasha untsukar, namperan najanamiayi. ²² Nujsha Jirutíasa nawantrí wayá jantsemámtai Erutis tura níjjai nampernum matsarmia nusha shiir enentáimsarmiayi. Túramtai uunt akupin nuwáchin chicharuk “Ame wakeram nu seattia. Wi amastatjai. ²³ Nekas tájame, ashí ame seatmena núnaka amastatjai. Wats, seatkumningkia takakjana nuna jímiapetek nakakan, amastatjai” tímiayi.

²⁴ Tutai nuwách jinki ní nukurín Jirutíasan chicharuk “¿Wariniak seattaj?” tímiayi.

Tutai “Imiakratin Juan ka muuke seata” tímiayi.

²⁵ Nu chichamaik nuwách wari wayá Erutisan chicharuk “Yamaikia uunt amamkunam Juan ka muuken wakerajai” tímiayi.

²⁶ Nuna takui uunt akupin ti kuntuts enentáimpramiayi. Tura nii tiniu asa ní amikrj matsatania nu antukaru ásarmatai surimkiatniun tujinkiamiayi.

²⁷ Tuma asa uunt akupin Juan ka muuke itiata tusa ní suntarín wárikmas akupkamiayi. ²⁸ Túramtai suntar wari we, sepunam Juan ka muuken tsupikmiayi. Tsupik, amamkunam itíá, nuwán susamiayi. Túram achik ní nukurín susamiayi. ²⁹ Juan maamun antukar ní unuiniamurj ní ayashín iwarsatai tusar júkiarmiayi.

*Senku mir áishmankan Jesus ayuramiania nu**(Mateu 14.13-21; Rúkas 9.10-17; Juan 6.1-14)*

³⁰ Tura Jesusa unuiniamurj Nii akupkarma nu, ataksha waketki káunak irunturarmiayi. Ashí nii túrawarmia nuna, unuiniararmia nunasha ujakarmiayi. ³¹ Tura untsurj shuar táiniakui, niisha ankant ajastinniasha yurumátniun tujinkiararmiayi. Tuma asamtai Jesus chichaak “Iijjai wemí aents atsuiniamunam; nuj ishichik ayamprarmi” tímiayi. ³² Nuyá Jesus ní unuiniamurjjjai kanunam enkemprar, aents atsuiniamunam jeatai tusar jinkiararmiayi. ³³ Túrasa shuar ní wéenan wáinkiararmiayi. Tura “Jesusaiti” tiarmiayi. Tuma ásar ashí péprunmayá untsurj shuar tseke ashintiukar, ní jeatniunam nákakarmiayi. ³⁴ Jesus kanunmayá jinki ti untsurj aents iruntrar matsatun wáinkiamiayi. Murik pénger wáinchataiya núnisan matsatu ásarmatai

Jesus nin wáitnentrarmiyai. Tura núkap unuiniararmiyai. ³⁵ Nuyá k̄iakui ni unuiniamur̄i Jesusan tariar chicharainiak “Atsamunam pujatsjik; tura yamá k̄iatsuk. ³⁶ Shuar wari akupkarta. T̄ij̄iuch péprunmasha, shuarnumsha wearti, ni yurumkar̄i sumarmakarati” tiarmiayi.

³⁷ Tutai Jesus chichaak “Atumek ayuratarum” tímiayi.

Tutai “Íisha j̄u shuar ayuratai tusar, ¿j̄imiará sian̄ kuit̄j̄ai yurumak sumaktai tusar wétinkiaitiai?” tiarmiayi.

³⁸ Tura Jesus ni unuiniamur̄in chicharainiak “Tanta takakrum nu iistarum ¿urutmak aa?” tímiayi.

Tutai nekapmarar chichainiak “Tántaka s̄enkuchikiiti, tura namaksha j̄imiararchikiiti” tiarmiayi.

³⁹ Tutai Jesus tímiayi “J̄u shuar chírichriniam pujusarti tusar akupkatarum.”

⁴⁰ An̄kant an̄kant sian̄ sian̄sha, sen̄kuenta sen̄kuenta iruntrar matsamsarmiyai. ⁴¹ Jesuska sen̄ku tantancha, j̄imiar namaknasha jusa, yakí nayaimp̄inmaan̄i íimias Yúsan yum̄insamiayi. Tura yurumkan púurmiayi. Puur ni unuiniamur̄in súsarimiayi. Namaknasha puur súsarimiayi, ashí shuáran ajamsarat tusa. ⁴² Ashí yurumáwar ejemarmatai, ⁴³ puunaruncha, namak ampirmancha achikiar, tuse chan̄kinian̄ áimkiar j̄úkiarmiayi. ⁴⁴ Nu yurumkan ti untsur̄i yurumáwarmiayi. Aya áishman̄kak sen̄ku mir (5.000) ármiai.

Jesus entsá pátatek wekasamiania nu (Mateu 14.22-27; Juan 6.16-21)

⁴⁵ Nuyá Jesus ni unuiniamur̄in chicharainiak “Kanunam en̄kemprarum, kat̄inkrum amain émaa ajatarum, Petsaitia péprunam. Wisha j̄u shuaran áuj̄san ikiuktiat̄jai” tímiayi. ⁴⁶ Shuáran áuj̄as ikiuki Yus̄j̄ai chichastaj tusa náinnium wémiayi.

⁴⁷ Tura kirit ajasmanum kánuka antumian̄num ajapén nanammiai. Jesuska nin̄ki juakmiayi. ⁴⁸ Jesusa unuiniamur̄isha wia-wiantainiakua ti pimpikiarmiayi, nase tukumma ásar. Nuna Jesus wáiniak tsawartin ishichik ajasmatai entsá pátatek wekas nin jeariarmiayi. Tura nan̄kaamaktiasa wea núnisan̄ wémiayi. ⁴⁹ Jesus entsá wekaan ni unuiniamur̄i wáinkiar, wakan-chashit, tu enentáimprarmiayi. Túrawar ti untsumkarmiayi. ⁵⁰ Ashí wáinkiar ti ashamkarmiayi. Tura Jesus wárik nin chicharuk “Kakaram ajastarum, wíit̄jai Jesus; ashamprukairap” tímiayi. ⁵¹⁻⁵² Nuñkia entsaya kanunam waka en̄kempramiayi. Túramtai nasesha majaan̄tamiayi. Ni unuiniamur̄inkia enentá̄i kiritia áintsan̄i ásmatai Jesus yurumkan núkap awajsamia nuna paant nekaatniun tuke tujinkiarimiayi. Tuma ásar yamá túrunamu itiurak aankia tusar ti enentáimprar sapijmiakarmiayi.

Jinisarítiumiá shuáran Jesus tsuármiania nu (Mateu 14.34-36)

⁵³ Nuyanka kat̄inkiar, Jinisarít núnkanam jeawarmiayi. Jeawar kanunajuiniarmiayi. ⁵⁴ Kanunmayā j̄inintrarmatai, nu nun̄kanmayā shuar Jesusan nekaawarmiayi. ⁵⁵ Tura “Jesus pujawai” táman antukar, ashí jean̄mayā jaan ni peakrintiuk Jesus pujamunam itiaarmiayi. ⁵⁶ Tura Jesus wekaak wémia nuísha, péprunmasha, shuar matsatmanumsha, ishichik matsatmanumsha jaan itiarar jintiá áepusarmiayi. Túmainiak Jesusan pushirmin ant̄int̄aj tusar seawarmiayi. Tura ashí ant̄inkiarimia nuka pé̄nker ajasarmiyai.

7

*Jesus Pariséun áujmatsarmiania nu
(Mateu 15.1-20)*

¹ Pariséusha, Israer-shuara jintinniurjsha Jerusarénnumia Jesusan tari armiaiyi. ² Tura Jesusa unuiniamurj in ikijmiatsuk yurumun wáinkiar “Israer-shuara túrutairj in túruiniatsui” tiarmiayi. ³ (Kame Pariséusha, tura ashí Israer-shuarsha, ni uuntrj jintintiamurj in umikiar ti núkap ikijmiarar yurumin ármiaiyi. ⁴ Péprunmayá tari “ikijmiatsuk yurumáshtiniaiti” tiniu ármiaiyi. Tura ti untsurj ni uuntrj túrutairj núnisan ármiaiyi. “Tsapancha, ichiñnasha, jiruncha, peaknasha niñiakartiniaiti” tiniu ármiaiyi.) ⁵ Tuma asamtai Pariséusha, Israer-shuara jintinniurjsha Jesusan chicharainiak “¿Urukamtai ame unuiniamuram ii uuntrj jintinramniuitiaj nuna túruiniatsu. Urukamtai ikijmiatskesha yurumáinia?” tiarmiayi.

⁶ Tutai Jesus tímiayi “Ántar chichamtiniaitrumé. Isayas yaunchu nekas atumin ártampramiayi juna:

Ju aents ni wenejai Winia “ti péñkeraiti” turutainiawai, tímiayi Yus, tura ni enentáinkia jeachat pujuiniawai. ⁷ Tura tukeneas Winia shiir awajtuiniawai. Aentsu chichame jintiainiyat, “Yus-Chichamaiti” tuñniawai.”

Tu áarmaiti. ⁸ Tura átum Yusa chichame iniaisarum, aentsu jintintiamurj umirkarum, ichiñnasha, tsapancha niñiaktin, tura chíkich túrutaisha áintsarmek untsurj túrarme. ⁹ Túrákrum Yus-Chichamka tsukintiaani ikiusurme atumj uuntrj chichame umirkatai tusarum. ¹⁰ Kame Muisais yaunchu aar juna tíchamka:

Ame apa nukusha shiir enentáimtustarum.

Tura ataksha áarmiaiyi:

Shuarsha ni aparj in, nukurj incha yajauch chichareakka, nu shuar jákatniuiti. ¹¹⁻¹² Túrasha átumka Pariséutirmeka, antsu ju tárume: “Shuar ni aparj in ni nukurj in chicharuk “Wi yáñntinian takakjana nu Kurpanaiti” takuñkia, atumsha péñkeraiti, aparj incha nukurj incha yáñnchatí” tarume. (Kurpan tana nuka, Yus susamu, tawai.) ¹³ Nekaatarum, Pariséutiram. “Íi yaunchu uuntrj chichame tuke umiki wétiniajtji” tákurum, Yus-Chicham penké ántar chichama núnin awajearme. Núnisrumek chíkichcha untsurj túrarme.” Tu tímiayi Jesus.

¹⁴ Nuyá ataksha Jesus ashí shuáran untsukar “Mash anturtuktarum, ashí nekaatarum, tímiayi. ¹⁵ Aayá ayáshnium wayaana nu, shuáran yajauch awajsachminiaiti; tura antsu ni enentáinia jiiina nu, yajauch awajsattawai.

¹⁶ Shuar nuna ántakka enentáimprati” tímiayi.

¹⁷ Nuyá áentsun ikuai, jea wayamtai, ni unuiniamurj aniasarmiayi “¿Nu métek-taku chicham warintia?” tiarmiayi.

¹⁸ Tutai Jesus tímiayi “Atumsha nékatsrumek. Páantchakait; yurumak yúajnia nu, enentáiniam wayachu asa, shuáran yajauch awajsachmini-aiti. ¹⁹ Antsu wakenam wayá, nankaamas menkaatsuk” tímiayi. Nuna taku, ashí yurumak páchitsuk yuamniaiti, tímiayi. ²⁰ Nuyá tímiayi “Shuara enentáinia jiiina nu, yajauch awajsamniaiti. ²¹ Shuara enentáinia, initia, yajauch enentáimsatniusha, tsanirmatniusha, natsa tsanirmatniusha, shuar máatniusha, ²² kasamkatniusha, chíkichna wakeruktincha, péñkercha túratniusha, anankatniusha, natsantain átincha, yajauch enentáimtustincha, tsanumpratniusha, waantu enentáimtumastincha, netse túratniusha, ashí nuka

inítiã wininiatsuk. ²³ Ashí nu tunáa ainia nu, shuara enentáiniã jíiniu asa, shuáran yajauch awajainiawai” tímiayi.

*Serupinísianmaya nuwã Jesusan nekas enentáimtusmiania nu
(Mateu 15.21-28)*

²⁴ Tiru pepru, Setún péprusha Serupinísia nunkanam ámiayi. Nuka Israer-shuara nunkenchayuyai. Nu nunkanam Jesus wémiayi. Tura jeá, jeá wayáa pujusmiayi. Tura nuj pujamun nu nunkanmaya shuar nekarawarain tusa nakitmiayi; túrasha uumkatniun tujinkiamiayi. ²⁵ Wárik nu nunkanmaya nuwã Jesus pujan nekaamiayi. Nu núwaka nawantri iwianchrुकुयayai. Tuma asa Jesusan tarí ni nawen piniakum tepersamiayi. ²⁶ Nu nuwã Israer-shuarcha, Serupinísianmaya uyuyai. Túmaitiat, nawantru enentáiyã iwianchin jíirturkitia tusa Jesusan seamiayi. ²⁷ Tutai Jesus nuwan chicharuk “Uchi emka ejemararti. Uchi apatkurj atankir yawach súsatin péñkerchaiti” tímiayi.

²⁸ Tutai nuwã ayak “Nekas, Uunta, tame. Tura yawachisha misanam wak-enam pujuinia nu, uchi apatkun yurumuk juyumak kákeamun yuñiatsuk” tímiayi.

²⁹ Tutai Jesus tímiayi “Péñker tame. Tuma asam, shiir wetá; ame nawantrumj enentáiyã iwianch jíinkiyi” tímiayi.

³⁰ Takui niisha wémiayi. Tura ni jeen jeá, ni nawantrin íwianch jíinkintai péñker ajas peaknum tepan wáinkiamiayi.

Jesus empekun tsuármiania nu

³¹ Jesus Tirunmaya jíinki Setún péprunam nankaamarkutak, Tekapuris nunkanmaani nankaamaki, Kariréa antumiannum ataksha jeamiayi. ³² Nu chichachu ámiayi, kuishjn empeku. Nu shuáran Jesusan itiarar, ni uwejejai antíkiat tusal seawarmiayi. ³³ Shuar matsatmanumia Jesus nin akanki jukí kuishjn tsara uwejejai tsutsukruamiayi. Tura usukia, nu shuara iniajn antintkiamiayi. ³⁴ Tura nayaimpinmaani íimias súkaska mayati “Epata” tímiayi. Nuka, shuar chichamnumka “chinkiatí” tawai. ³⁵ Nu chichamaik ni kuishsha chinkiamiayi, iniajsha séermiayi. Tura paant chichasmiayi. ³⁶ Tura Jesus chicharainiak “Penké etserkairap” tímiayi. Jesuska suri-suritiamaitiat, nu nankaamas etseriarmiayi. ³⁷ Tura ti enentáimprarmiayi. Enentáimprar, “Ju Jesus aya péñkeran túrawai. Empekuncha ántumtikniaiti, tura chichachun chichamtikniaiti” tiarmiayi.

8

Kuatu mir shuáran Jesus ayuramiania nu

(Mateu 15.32-39)

¹ Nu tsawantá shuar timiá untsurj iruntrarmiayi. Yurumkarj atsakui Jesus ni unuiniamurjn untsukar juna tímiayi: ² “Ju shuáran waitnentajai. Menaintiú tsawant Wijiã pujuinia ásarmatai ni yurumkarj amuukachaik. ³ Tura ni jeen ayurtsuk akupeamka, tsukarijn jintiã pimpikiartatui, yajaya káunkaru ásar” tímiayi.

⁴ Tutai ni unuiniamurj chichainiak “Túrasha juj atsamunam, ju aents ejemaratat tusal ¿tuyá yurumkã wáinkiatatj?” tiarmiayi.

⁵ Tutai Jesus nin aniasmiayi “¿Urutmá tanta aa?”

Tutai “siati awai” tiarmiayi.

⁶ Nuñkia ashí áentsun “nunká pujustarum” tiarmiayi. Tura tantan achik, Yúsã yumñsamiayi. Tura puuk, áentsun ajamsatarum tusa ni

unuiniamurin susamiayi. ⁷ Tura uchich namaksha ishichik aan achik, Yúsan yuminkias, ni unuiniamurin chicharuk “Jusha shuar ajamsatarum” tímiayi. ⁸ Turam ashí yurumáwar ejemarmiyai. Ampirma púunaruncha siati chan̄kinnium áimkiarmiyai. ⁹ Kuaru mir (4.000) shuar yurumáwarmiyai. Yurumáwar amikiarmatai, Jesus nin áujas akupkarmiyai. ¹⁰ Tura ni unuiniamurijjai kanunam en̄kemprar Tarmanúta nun̄kanam wearmiayi.

Pariséu Jesusan iniakmasta tiarmiania nu

(Mateu 16.1-4; Rúkas 12.54-56)

¹¹ Paríséu Jesusjai áujmatsatai tusar tariarmiyai. Nekapsatai tusar wakeru-
iniak Nin chicharuk “Nayaimpinmaya kakaram iniakmasta” tiarmiyai.

¹² Tuiniakui Jesus kúntuts enentáimias, súkaska mayati “¿Urukantai, yamaiya aentstiram, nayaimpinmaya kakarman iniakmasat tusarum wakerarum? Nuka pen̄ké sunaschattarme, paant tájarne” tímiayi.

¹³ Nuyá nin ikiukiar ataksha kanunam en̄kemar amain katiñmiayi.

Pariséu túramurijjai aneartarum, tímiayi Jesus

(Mateu 16.5-12)

¹⁴ Tura ni unuiniamurj yurumak jukitiai tukamá kajinmatkiarmiyai. Kanunman̄ka aya chikichik tantanak takaku ármiayi. ¹⁵ Jesussha ni unuiniamurin enentáimtikui tímiayi “Wáinkiatarum; Paríséusha Erutissha wakapru-
tain takakainia nújajisha aneartarum” tímiayi.

¹⁶ Tutai ni unuiniamurjsha tunaiyarmiyai “Tanta kajinmatkin asakrin nuna túramtsujish” tiarmiyai.

¹⁷ Tura Jesus nuna nekáa chichaak “¿Urukantai aya yurumkak enentáimtarum? Tuke nékatsrumek. Pen̄ké enentáimtsurmek. Atumí enentái tuke kiritkiai? tímiayi. ¹⁸ Jimi ajsha itiura wáintsurmea. Kuishim ajsha itiura ántatsrum. Ashí kajinmatkintrumek. ¹⁹ Nekaatarum, nuik, sen̄ku tantan púaran sen̄ku mir áishman̄kan ayurachmakaj. ¿Tura ampirma urutná chan̄kinnium chumpiamarum?” tímiayi.

Niisha tiarmiyai “Tuse chan̄kinnium chumpiamji.”

²⁰ Ataksha Jesus tímiayi “Tura siati tantajai kuaru mir shuaran ayurantai, ¿ampirmasha urutná chan̄kinnium chumpiamarum?”

Niisha “siati” tiarmiyai.

²¹ Tuma asantai Jesus tímiayi “¿Itiura imiá nékatsrum?”

Jesus kusurun ímtiksamiania nu

²² Nuyá Petsaitia péprunam jeawarmiyai. Jeawarmatai, áishman̄ jii kusurun Jesusan itiararmiyai. Túrawar antinta tusar seawarmiyai. ²³ Tuma asantai Jesus uwejnun achik péprunam aani en̄keki juki jin usukjijai kuérmiayi. Tura uwejéjai antin̄ “¿ímmek?” tímiayi.

²⁴ Tutai kusuru ími tímiayi “Aentsun iiyajai, túrasha paantcha. Numi wekainian áaniun iiyajai” tímiayi.

²⁵ Nuyá ataksha Jesus ni uwejéjai kusuru jin antin̄miayi. Tura kusurusha úmamkes iis, péñker ajas, ashí paant ímpramiayi. ²⁶ Jesus chichaak “Jeem̄in weakum péprunam wayawaip tura shuar ujakaip” tímiayi.

Pítur Jesusan “Yusa Anaikiamurinne” tímiania nu

(Mateu 16.13-20; Rúkas 9.18-21)

²⁷ Jesus ni unuiniamurijjai uunt pepru Sesaria-jiripiunam jeatsuk, tíjuch uchich péprunam irasarmiyai. Jintia wésar Jesus ni unuiniamurin chicharainiak, “¿Yaiti turutainiawa Winia?” tímiayi.

²⁸ Tutai niisha áimkiarmiayi “Chíkich chichainiak, imiakratin Juan̄kaiti, turamainiawai. Chíkichcha, Eríasaiti, tura chíkichkia, yaunchu Yúsnan etserin nantakniua núiti, turamainiawai” tiarmiayi.

²⁹ Tutai Jesus tímiayi “Atumsha, ¿waritrume. Yáitij?” tímiayi.

Tutai Pítur tímiayi “Ámeke Krístuitme; Yúsaiya akupkamuitme.”

³⁰ Tutai Jesus chichaak “Penké etserkairap” tímiayi.

*Jesus ni jákatniur̄in ujakmiania nu
(Mateu 16.21-28; Rúkas 9.22-27)*

³¹ Unuiniak: “Wi Aents Ajasuitjiana ju ti wáitsatniuitjai. Israer-shuarti ii uuntrīsha, Patri úntrīsha, ii jintinniur̄isha Winia nakitrurar mantuawartai. Túrasha menaintiu tsawant nan̄kaasmatai nantaktiniaitjai” tímiayi.

³² Nunasha paant ujakmiayi.

Tura Pítrusha Jesusan arantach jukí kakantramiayi. “Tu chichasaip” tímiayi.

³³ Tutai Jesus ayantmatar, ni unuiniamur̄in iis, Pítrun kakantar chicharuk “Satanása, werumta. Ámeke Yusna ana nu enentáimtatsme, antsu aya áentsnak enentáimtame” tímiayi. ³⁴ Nuna tuasua amik tura nūj matsamarmia nunasha, ni unuiniamur̄incha unsuk tímiayi, “Shuar Winia nekas nemartustasa wakerakka ni wakeramur̄inkia iniaisati; tura ni krusr̄i yanak̄i nemartustí. ³⁵ Kame shuar ju nunkanam aya nin̄ki anenmamkun̄ka nu shuar ni iwiaakmar̄in emen̄kaktatui. Antsu Winia anentu asa tura winia chichamprun anea asa, shuar aya pen̄ker pujustinniak enentáimtsuna nu, nekas iwiaakman wáinkiat̄awai. ³⁶ Nekaata, shuar ashí ju nunkanam ír̄unna nuna sumaksha túrasha ni wakan̄i jinium wéakuisha, ¿itiurak pen̄ker pujusaint? ³⁷ Shuarka wakan̄in uwentikrataj tusa wakerak ¿urutmak akimkaint? ³⁸ Antuktarum. Yamaiya aents Yúsna nakitiar ajapawaru yajauch ainia nu ímiainiamunam shuar Winia natsantrakuin̄kia tura winia chichampruncha natsantakuin̄kia, wi, Aents Ajasuitjiana ju, winia Aparu kakarmar̄ijjai tura nayaimpinmaya pen̄ker suntarjai atak taakun, nú shuaran natsantrattajai Wisha.’ Tu tímiayi Jesus.

9

¹ Ataksha Jesus nin chicharuk, ‘Nekas tájarme, shuar játsuk Yus ni kakarmar̄ijjai antsu enentáin akupkattana nú tsawantan wáinkiat̄atna nu jūi iijjai pujuiniawai” tímiayi.

*Jesus nusháa iira ajasmiania nu
(Mateu 17.1-13; Rúkas 9.28-36)*

² Nuyá sais tsawant nan̄kaasmatai, Jesus Pítruncha, Jakupuncha, Juán̄nasha uunt náinnium júkiarmiayi. Nūjsha Jesus nushá iira ajasmiai.

³ Ni pushir̄isha ti puju jíitsumir ajattsarmiayi. Nūjai métek puju awajsat̄in ju nunkanam atsawai. ⁴ Túruna nūj Erías, Muisaisjai wantinkiar Jesusjai chichainian wáinkiarimiayi. ⁵ Nuyasha Pítur Jesusan chicharuk “Uuntá, ii jūi pujustin ti pen̄keraiti. Menaintiú áakmaktai, Áminiu chikichik, Muisaisna chikichik, Eríasnasha chikichik” tímiayi. ⁶ Jesusa unuiniamur̄i sapijmainiak, Pítur wariniak titi nekaachmiayi. Nékachu asa nuna tímiayi.

⁷ Tura yuran̄kim tara mikintiu awajsamiayi. Yuran̄minmaya chichaak “Júiti winia aneamu Uchir. Nii anturkatarum” tímiayi.

8 Nuyanka ni unuiniamuri ayantmar iiyaj tukamar aya Jesusnak wáinkiarmaiya. Chíkichkia atsuarmiayi.

9 Nuyá náinniumiá akainiak Jesus nin chicharuk “Wáinkiarumna nu et-serkairap. Wi, Aents Ajasutjiana ju jakamunmayá nantaatsain nu et-serkairap” tímiayi.

10 Tutai ni tímian ímiatrusan úukarmiayi. Tura “jakamunmayá nantaatsain tana nu, ¿wariniak ta?” nuamtak tunainiarmaiya. 11 Tura Jesusan aniasarmiayi “¿Urukamtai Israerti ii jintinniurjsha, Eriás emka tátiniaiti, tuinia?” tiarmiayi.

12 Tutai Jesus tímiayi “Nekas Eriás ashí iwiarattsa emka tátiniaiti. ¿Tura Aents Ajasunun Yus-Papinium warintua?

“Ti wáitsattawai; Nin nakitrartatui.” Tu áarmaiti.

13 Wi tájarme, Eriás nekas táwiti. Támtai, shuar ashí ni wakeriarmia nuna nin túrawarmiayi. Yusa Papirijn Eriása túrunatniuri aarma amia tímiatrusan túrawarmiayi” tímiayi Jesus.

*Jesus iwianchin jiki akupkamina nu
(Mateu 17.14-21; Rúkas 9.37-43)*

14 Tura ni unuiniamuri matsatmanum atak wáketuk, ti untsuri aents káutkar Israer-shuara jintinniurjsha níjijai tunai pujuinian wáinkiamiayi.

15 Tura aencha, Jesusan wáinkiar warainiak, tsékeñki weriar, áujsarmiayi. 16 Túrunawarmatai, Jesus chicharainiak, “Wari tunaiyarum?” tímiayi.

17 Tutai chikichik ayak “Uuntá, winia uchirun Ámin itiarjame. Iwianchruku asa chichachuiti. 18 Túmakui iwianch enketakun paat ajar áepeawai; túram uchisha saun kaput apak najn kátetete awajeawai. Túram kakaakcha ame unuiniamurmin seamjai, jirtukti tusan, túrasha tujintrutkarai” tímiayi.

19 Tutai Jesus tímiayi “Yúsan enentáimtichirmea urutmá tsawantak pujustaj atumjai. Urutmá katsuntrataj! Uchi itiatarum” tímiayi. 20 Takui uchin Jesusan itiararmiayi. Tura íwianch uchin enkemta Jesusan wáiniak uchin ajakramiayi. Uchisha chichiptur nunká iniaan péper-péper ajakin wenunam saun apakmiayi.

21 Túrunamtai Jesus ni aparín aniasmiayi “¿Urutá yaunchu áinkiait?”

Tutai ni aparí tímiayi “Úchichik áinkiaiti. 22 Tuma asa tuke jutikiú pu-jurniuiti; jiniumsha apeawai, entsá maataj tusa ajuawawai. Yaintrukmini-aitkiumka waitneasam yaintrukta” tímiayi.

23 Tutai Jesus chicharuk “¿Urukamtai, yaintrukmini-aitkiumka, tame? Nekata, shuar Winia nekas enentáimturna nu ashí túramniaiti” tímiayi.

24 Tutai uchi aparí kakantar chichaak, “Uuntá, nekas enentáimtajme. Nekas enentáimtustinian táasjana nu yáintkiata” tímiayi.

25 Tura shuar untsuri káunainian Jesus wáiniak kakantuk “Empeku chichachu awajin iwianchi jíinkitia, tájame. Jíinkim ataksha wayawaipia” tímiayi. 26 Tura íwianch jíiniuk untsamak uchin we-werkasa ajakar chichichiptu áepkimiayi. Túram uchi jaka ímianis tepemiayi. Túrunamtai untsuri shuar “jakayi” tiarmiayi. 27 Támanak Jesus uwejen achik awajimiayi, tura uchi nantaki wajakmiayi.

28 Tura Jesus jeá wayamtai, níñki pujusar, ni unuiniamuri aniasar “¿Urukamtai iisha jíiktin tujinkiamaj?” tiarmiayi.

29 Tutai Jesus tímiayi “Ju iwianchkia ijarmar Yus áujkur jíikminiaiti” tímiayi.

Jesus ataksha ni jákatniurin ujakmiania nu

(Mateu 17.22-23; Rúkas 9.43-45)

³⁰ Nuyá jínkiar Kariréa nunkanmaani nankaamakarmiayi. Ni unuiniamurin unuinia asa nu nankaamamun nekaawarain tusa Jesus nakitmiayi. ³¹ Unuinia juna tímiayi: “Wi Aents Ajasuitiaj juna mantamnati tusar achirkar surutkartatui. Tura máamuitiatnak, iwiarsamunmayan menaintiú tsawantaj nantaktiatjai” tímiayi. ³² Tura nu chichaman nekaacharmiayi. Nékainiachiat, anintrustinian arantukarmiayi.

“¿Yaki imiá nankaamantuit?”

(Mateu 18.1-5; Rúkas 9.46-48)

³³ Nuyá Kapernáum péprunam jeawarmiayi. Tura Jesus jeá pujus ni unuiniamurin aniniar, “¿Atumsha jintiá winisrum warí áujmatmiarum?” tímiayi. ³⁴ Tura natsarar pachischarmiayi. Kame jintiá wésar “iijjai ¿yaki imiá nankaamantu ajasat?” tunainiarmiayi. ³⁵ Ni unuiniamurí pachischarmatai, Jesus pujus ashí tuse unuiniamurin irur chichaak “Shuar nekas nankaamantu ajastajtsa wakerakka, peejchachia nuke enentáimtumar shuara yáintri atí” tímiayi. ³⁶ Tura uchin itiáa miniakas chichaak: ³⁷ “Shuar uchin winia naaruj shiir awajeakka Winia shiir awajtai. Tura Winia akuptukua nunasha shiir awajeawai” tímiayi.

“Shuar in nakitramachkuŋka in páchitkiawai”

(Rúkas 9.49-50; Mateu 10.42)

³⁸ Nuyá Juan Jesusan chicharuk “Uuntá, shuar ame náarmin pachis iwianchin akupea wainkiamji. Tura iijjai írutkachu asamtai nu túratin suritki-amji” tímiayi.

³⁹ Tutai Jesus tímiayi “Antsu suritkiarap. Shuar winia náarun pachis tujinkiamun túrakka, nu shuar warí tsanumprutratniun tujinkiattawai. ⁴⁰ Shuar in nakitramachkuŋka, in páchitkiawai, tímiayi. ⁴¹ Winia nemarka asakrumin shuar yumiichinkesha ajampramkuka ántar túratsui; akikma átatui” tímiayi.

(Mateu 18.6-9; Rúkas 17.1-2)

⁴² Tura shuar ju uchin Winia umirtuinia nuna yajauchin túrumtikiamtáinkia, ti asutniattawai. Tuma asamtai uchin yajauchin túrumtiktsain kuntujen kayajai jínkiar nayaantsanam ajunmaka maak ainti. ⁴³ Ame uwejmek yajauchin túrumtikramamniaitkuinkia tsupikta. Mai uwejtuk wáitsatniunam jeatniujainkia chikichik uwejjai ju nunkanam pujusar tuke iwiaaku pujustinnium jeatin ti shiiraiti. Warí, wáitsatniunmanka ji kajinkiashtin awai, ⁴⁴ jákaru akarisha jániatsui tura jisha tuke kapaawai. ⁴⁵ Nawemsha yajauchin túrumtikramamniaitkuinkia nusha tsupikta. Mai nawentuk wáitsatniunam jeatniujainkia chikichik nawejai ju nunkanam pujusar tuke iwiaaku pujustinnium jeatin ti shiiraiti. Wáitsatniunmanka ji kajinkiashtin awai, ⁴⁶ jákaru akarisha jániatsui tura jisha tuke kapaawai. ⁴⁷ Jimisha yajauchin túrumtikramamniaitkuinkia ukuinkiata. Mai jiiintiuk wáitsatniunam jeatniujainkia chikichik jijjai ju nunkanam pujusar Yus akupeana nui jeatin ti shiiraiti; ⁴⁸ wáitsatniunmanka jákaru akarisha jániatsui tura jisha tuke kapaawai.

⁴⁹ Naman Yus susamu weaktinia áintsan aentstirmesha jijjai nekapnastatrume. ⁵⁰ Weesha ti penkeraitiat michumarka, ¿itiurak jea-jeat á tink? Wats, wee jeakua áintsarmek atumek shiir enentáimtunaistarum” tímiayi Jesus.

10

*Nuwá ajapatniun Jesus áujmatsamiania nu**(Mateu 19.1-12; Rúkas 16.18)*

¹ Jesus Kapernáumnumiá jiinki, Jutía nunkanam nankaamaki, Jurtan entsa amain jeamiayi. Nuj pujaj, aents ataksha Nin irunturarmiayi. Iruntrar-matai tuke túrin asa ataksha unuiniamiayi. ² Tura Pariséu Jesusan nekap-satai tusar wakeruiniak, Nin chicharainiak “¿Áishman ni nuarí ajapatin tsanƙamkamukait?” tiarmiayi.

³ Tutai Jesus tímiayi “¿Muisais wariniak timia?”

⁴ Tutai “Papíjaj in ajapatniun tsanƙatramkamiayi” tiarmiayi.

⁵ Tutai Jesus tímiayi “Atumí enentaj kátsuram asamtai nu chichaman atumin tsanƙatramkamiarme. ⁶ Tura Yus yámankamtaik ashí najanamia nuj, áishman nasha nuwancha najanamiayi. ⁷ Tuma asamtai áishman ni aparíncha nukuríncha kanaki ikiuki, ni nuaríjaj tsaníniniiai. ⁸ Wari, áishman nuaríjaj jímiaraiat chikichik ajasartatui. Tuma asamtai yamá jímiarhaiti, antsu chikichik ajasuiti. ⁹ Tuma asa, Yus atsanƙiania nuna, aents akankashtiniiai” tímiayi.

¹⁰ Tura urum jeá wayawar, Jesusa unuiniamurí nu chichaman ataksha aniasarmiayi. ¹¹ Tuiniakui Jesus tímiayi “Shuar ni nuarín ajapa ikiuak chikichan nuátƙaƙa, emka nuarín yajauch awajas, ikiuak, tsanirmayi. ¹² Nuwasha ni áishrí ajapa ikiuak, chikichaj niiniurtukka, niisha tsanirmayi” tímiayi.

*Jesus uchin shiir awajsamiania nu**(Mateu 19.13-15; Rúkas 18.15-17)*

¹³ Antínkiarar tusar uchin Jesusan itiararmiayi. Túruiniakui Jesusa unuiniamurí “itíairap” tiarmiayi.

¹⁴ Tura Jesus nuna wániak, kajek juna tímiayi “Uchi Winí winitin tsanƙatrutarum. Suritkiarap. Iis, shuar ju uchía núnisan peejchach enentáimtumainia nu Yusa akupeamurín pachiinkiamniiai. ¹⁵ Nuní asamtai tájarme, uchi umiana núnisan Yusa akupkamurín shuar umíachƙunƙa nuna pachiinkiachminiiai. ¹⁶ Nuyá uchin miniakas, “Yus yáinmakarti” tímiayi.

*Kuítrintin Jesusan áujsamiania nu**(Mateu 19.16-30; Rúkas 18.18-30)*

¹⁷ Ukunam, Jesus nuyá weaj, shuar tseke Nin tarimiayi. Tari tikishmatar chicharuk “¿Uuntá, Amesha ti péƙkeraitme. Tuma asam, turuttia, ¿warinia túrakna tuke iwiaaku átataj?” tímiayi.

¹⁸ Tutai Jesus tímiayi, “¿Urukamtaí Winia, péƙkeraitme, túrutam? Shuarka chikichikisha péƙkerka atsawai. Aya Yúsak péƙkeraiti. ¹⁹ Yus akupkamu nékatsmek. Ju áiniawai: tsanirmawairap, manƙartuawairap, kasamkairap, chikich shuar tsanumprurairap, anaƙartuawairap, apasha nukusha umirkatarum. Nu áiniawai” tímiayi.

²⁰ Tutai kuítrintin chichaak “Uunta, núnaka úchichik mash umiki tsakaruitjai” tímiayi.

²¹ Tutai Jesus iis waitnenmai tímiayi “Chikichik táasume. Weme ashí áminiu ana nu surukta. Túram nu kuit kuítrincha susarta. Túrakum nayaimpiniam kuítrum ikiaunƙattme. Túram winitia, krus yanaktinia áintsamek itíurchatrum aji nemartusta” tímiayi.

²² Tura kuítrintin nu chichaman antuk, wake mesek, kúntuts enentáimiar wémiayi, ti kuitrintin asa.

²³ Nii wématai, Jesus ashí ní téntakarín iis, ni unuiniamurín chicharuk, “Kuítrintin ainia nu Yusa akupeamurín pachiinkiatin ti itiuurchaiti” tímiayi.

²⁴ Takui ni unuiniamurí nuna antukar niisháa enentáimprarmiyai. Túramtai Jesus tímiayi “Uchiru antuktarum. Shuar kuítriniak enentáimtuinia nuka, Yusa akupeamurín pachiinkiatin penké itiuurchataiti. ²⁵ Uunt kamiriu auja jjiin wayatin ana nú nankaamas, kuítrintin Yusa akupeamurín pachiinkiatin itiuurchataiti” tímiayi.

²⁶ Nuna antukar nú arant niisháa enentáimprarmiyai. “¿Nuiñkia yaki uwemprarniait?” tunaiyarmiyai.

²⁷ Tura Jesus nin iisar chichainiak “Aents niñki túrachminiaiti, antsu Yus túramniaiti. Yuska ashí túramniaiti” tímiayi.

²⁸ Nuyá Pítiur Nin chicharuk “Iis, iikia ashí ikiukir némarksujik” tímiayi.

²⁹ Tutai Jesussha tímiayi, “Nekas tájarme, shuar Winia nemartak Yus-Chichamnasha ipiampartasa wakerak ni jeencha, yachíncha, umaincha, aparíncha, nukuríncha, nuaríncha, uchiríncha, nunkencha uyumatsuk ikiuakka, ³⁰ nu shuar ju nunkanam siañ patatnas jeencha, yachíncha, umaincha, nukuríncha, uchiríncha, nunkencha, ju nunkanam wáitiatat sunastatui. Tura ukunam, nunka amuukamtai, nu shuarsha jáchatainiam tuke péñker pujustatui. ³¹ Tura untsurí shuar yamáí penkerí ainia nu, ukunam ukunmaaní pujusartatui, tura líksañ untsurí shuar yamáí ukunmayá ainia nu, ukunam eem pujusartatui” tímiayi Jesus.

*Jesus ni jákatniurí ataksha ujakmiania nu
(Mateu 20.17-19; Rúkas 18.31-34)*

³² Nuyá arak Jerusaréñnum wéenak, jintiak wearmiayi. Jesuska émak wémiayi. Ni unuiniamurísha niisháa enentáimprarmiyai. Ashamainiyatan Jesusan nemarsarmiyai. Túmainiaí atak ni nekas unuiniamurín akankiar, ni túrunatniurín ujakmiayi. ³³ Ujaak tímiayi “Antuktarum, arak Jerusaréñnum wéaji. Nuí Winia, Aents Ajasuitjiana juna, Patri untríncha, jintinniun-masha surutkartatui. Niisha apachnium mantamnatí tusar surutkartatui. ³⁴ Nusha Winia wishikrurar, katsumprukar, usukruawar mantuawartatui. Túramaitatnak menaintiú tsawantai nantaktiatjai” tímiayi.

*Jakupu Juanjai seawarmiania nu
(Mateu 20.20-28)*

³⁵ Sepetéu uchirí Jakupusha Juansha Jesusan taruntarmiyai. Taruntar “Uuntá, ii seattajnia nu túrak tusar wakeraji” tiarmiyai.

³⁶ Tutai Jesus tímiayi “¿Warí itiuurtukat tusam wakerutam?”

³⁷ Tutai “Ame nupetmaktin tsawantrum jeamtai, iisha Ámijjai pujustaitar wakeraji, wi untsuurumini, winia yatsursha menaarmini. Nu tsankatrukta” tiarmiyai.

³⁸ Tura Jesus tímiayi “Átum seatrumna nu nékatsrume. Wi umartatjana nu umarminkaitrum. Tura Wi imiantiatjana núnisrum imianminkaitrum” tímiayi.

³⁹ Niisha tiarmiyai, “Túramniaitji, páchitskea.”

Tuñiakui Jesus tímiayi “Wats, Wi umartatjana nu umartatrum, tura Wi imiantiatjana núnisrumek imiantiatrum. ⁴⁰ Túrusha winia untsuuruini,

menaruinjsha átum pujustinian Wikia súsashtiniaitjarme, antsu Yus wakerana nu nuinj apujsattawai” tímiayi.

⁴¹ Tura chíkich tias unuiniamurj nuna anturkar Jakupuncha, Juánasha ti kakerkarmiayi. ⁴² Tura Jesus ni unuiniamurj inrur tímiayi “Ju nékarme; Yus-shuarchanum akupniuitjai tuinia nu, waantu enentáimtumas, ni shuarin ti akupeawai; tura uunt ainia nusha ashí shuar ti takamtikiainiawai. ⁴³ Antsu atumjai núnisañ atsutniuiti. Átumka, wi unuiniamutiram, uunt ajastaj tusarum wakerakrumka, ashí yáimin ajastiniaitruma. ⁴⁴ Shuar atumj penkerj ajastajtsa wakerakka, takarniua nuke ajas, umirtamkatí. ⁴⁵ Wisha, Aents Ajasuitjiana ju, shuar takartusarat tusan táchamjai, antsu ashí shuáran yáinjaj tusan táwitjai. Wisha jarukan shuáran uwentikratajtsan táwitjai” tímiayi.

Jesus Partimiásan tsuármiania nu

(Mateo 20.29-34; Rúkas 18.35-43)

⁴⁶ Jesus ni unuiniamurjijai, tura chíkich untsurj aentsjai Jirikiú péprunam jeawarmiayi. Nuyá Jirikiúnmayasha jíinkiar weenaj, Timiasa uchirj Partimiás, kusuru amia nu, jintiá yantam kuítian seamu pujumiayi. ⁴⁷ Niisha, Nasarénumia Jesusaiti táman antuk, untsumuk “Uunt Jesusa, amesha Uunt Akupin Tawit weeachukaitiam, Yus anaikiachmakaitiam. Winiaja waitnen-trurta” tímiayi.

⁴⁸ Tura untsurj nuj matsamarmia nu nin chicharainiak “Takamatsata” tiarmiayi.

Niisha nú nankaamas untsummiayi “Tawit weeá Jesusá, winia waitnen-trurta.”

⁴⁹ Nuna antuk Jesus wajas, chichaak “Untsuktarum” tímiayi.

Takui shuar kusurun untsuiniak “Kakaram ajasta. Wajaktia; untsur-mawai” tiarmiayi.

⁵⁰ Tuiniakui niisha esekmatairj ajapa ikiuak wajaki Jesusan tseke tarim-iyai.

⁵¹ Tura Jesus nin chicharuk “¿Winia itiurtukat tusamea wakerutam?” tímiayi.

Tutai kusuru chicharuk “Uunta, ímtiasan wakerajai” tímiayi.

⁵² Tutai Jesus chichaak “Shiir wetá. Winia nekas enentáimtura asam pénger ajasume” tímiayi. Tura nu chichamaik ímpramiayi. Tura Jesusan nemarki wémiayi.

11

Jesus Jerusarénum wayamiania nu

(Mateo 21.1-11; Rúkas 19.28-40; Juan 12.12-19)

¹ Wésar Jerusarénum tura Petpajái péprusha Petania péprusha Uriwiu naint ínkiuasmak ámanum jeawar; Jesus jimiará unuiniamurj ujuikimi-ayi. ² Ujuiak tímiayi “Aatuninj pépruchiniam werum nuinj umpuuru uchich jinkiamu wáinkiatarme. Nu umpuuruuka tuke entsamprukchamuiti. Nu atiarum utitiarum. ³ Tura “¿Urukamtia áitkiarum?” turamainiakuisa, “ii Uuntrj wakerawai” titiarum” tímiayi. ⁴ Tutai wearmiayi. Tura umpuurun wáitiniam aani jinkiamun, jintiá yantamnum wajan wáinkiar atiwarmi-ayi. ⁵ Nu j pujuarmia nu “¿Warí áitkiarum. Urukamtai umpuuru atiarum?” tiarmiayi. ⁶ Takui, niisha Jesus timia nu ujakam suritkiacharmiayi. ⁷ Tura umpuurun Jesusan itiarar pushirj umpuurunam awantkarmiayi. Túram

Jesus entsamkamiayi. ⁸ Tura untsurí shuarsha pushirín jintianam aypar áinkiarmaiya. Chíkichcha jintiá yantamnumián nukan juuk jintianam áintrarmiayi. ⁹ Eem wearmia nusha, uku winiarmia nusha warainiak “Jusanna” untsumkarmiayi. “Yusa náarín winiana nu imiá péñkeraiti. ¹⁰ Ii untrí Tawitia akupeamurí tátatna nu imiá peñker atí. Ii Yusrí naarí shiir ati.” Tu untsumki wearmaiya. ¹¹ Tura Jesus Jerusarénum jeamiayi. Jeá, Yusa Uunt Jeen wayamaiya. Tura ashí iyasua amik, kintiamprají tusa ni tuse unuiniamuríjái tíjiuch Petania péprunam wearmaiya.

Jesus iikiu numin yumínkramiania nu
(Mateu 21.18-19)

¹² Kashin tsawar, Petanianmaya jintia wesa, Jesus tsukammiayi. ¹³ Tura arant wajan iikiu numirín núkenniun wáiniak, nereatsuash tusa iyumiayi. Tura nereshtairín asamtai neren peñké wáinkiachmaiya. ¹⁴ Nuyá iikiu numin yumínkeak: “Ame nerem peñké yunaashti” tímiayi. Ni unuiniamurísha nuna táman antukarmiayi.

Yusa Uunt Jeen suruktinian Jesus suritkiamiania nu
(Mateu 21.12-17; Rúkas 19.45-48; Juan 2.13-22)

¹⁵ Nuyá atak Jerusarénum jeawarmiayi. Nui Jesus Yusa Uunt Jeen wayá suruktai tusar pujuarmia nuna jíiki akupkatasa nankammiayi. Kuítian yapajín armia nuna misarín tura yampitsan súrin armia nuna kutankríncha ayanturmiayi. ¹⁶ Tura káarak entsaki Yusa Uunt Jeen nankaamaktinian suritkiarmiayi. ¹⁷ Nuyá “Yus áúsatai tusar ashí shuar Yusa jeen wayamnia átatui” tú aarchamukait Yusa Papiirín. Antsu átumka Yusa jee kasa matsam-taiya nútikiarme” tímiayi. ¹⁸ Aents nui matsamarmia nu Jesusa chichamen antukar ti enentáimprarmiayi. Tuma asamtai Israer-patrí úntrísha, Israer-shuara jintinniurísha, nuna nekaawar, Jesusan ashamainiak mantamnati tusar chichaman jurusarmiayi. ¹⁹ Nuyá kiakui Jesus Jerusarénumiá jinkimiyai.

Iikiu numin káarun wáinkiamiania nu
(Mateu 21.20-22)

²⁰ Kashin káshik nankaamainiak iikiu numin kan̄kaptuk jaka wajan wáinkiarmaiya. ²¹ Tura Pítiur enentáimias Jesusan tímiayi “Uunta, iista, iikiu Ame yumínkramam nu kan̄kaptuk káarchaik.”

²² Tutai Jesus tímiayi “Yus nekas enentáimtustarum. ²³ Iis, nekas tátsujrumek, shuar “Yus nekas túratpiash” tútsuk, tura “wi tájana nuna Yus nekas túratwái” tu enentáimsar, ju náintian “jiinki nayaantsanam iniántí” tákuin̄kia, páchitsuk iniañtatu, tímiayi. ²⁴ Tuma asamtai tájarme, ashí Yus áujkuram searmena nuna suramsattarme. “Wi seajna nuna yamá takakjai” tu enentáimkiurmeka, wáinkíáttarme. ²⁵ Tura Yus áujkuram pujarmena nu, karnaiyamuram ákuin̄kia tsan̄kurnáiratarum. Atumí Aparí nayaimpiniam pujana nu atumí tunaarín tsan̄kurturti tusarum túratarum. ²⁶ Atumsha tsan̄kurnáiyachkurmin̄kia, núnisan̄ atumí Aparí nayaimpiniam pujana nu atumí tunaarín tsan̄kurtámpashtatrume” tímiayi Jesus.

Yusa kakarmaríjái Jesus takasmiania nu
(Mateu 21.23-27; Rúkas 20.1-8)

²⁷ Ataksha Jerusarénum waketkiarmiayi. Jesus Yusa Uunt Jeen wekaj, Israer-patri úntrisha, Israer-shuara jintinniurisha, Israer-shuara iruntai-jeé úntrisha Nin káutkarmiayi. ²⁸ Káutkar Jesusan tiarmiayi “¿Yana kakarmarjijai ju túram. Ame túramna nuna ya tsankatrama?” tiarmiayi.

²⁹ Tuiniakui Jesus tímiayi, “Chikichkiniak aniastatjarne. Áirkatarum. Túrakrumníkia Wisha winia takastinian tsankatrukma nuna ujaktatjarne. ³⁰ Wats, turutiarum, ¿ya Juan imiaitniun tsankatkama? ¿Shuar tsankatkamka? ¿Yus tsankatkamka? Áirkatarum” tímiayi.

³¹ Tura niisha enentáimprar “Yus akupkaiti” tákurninkia, “¿urukamtia umirkachuram?” turamchattajik. ³² Antsu “shuar tsankatkaiti” tákurkia, ashí shuar ashamaji” tunainiarmiayi. Ashí aents Juan nekas Yúsnan etserniuti, tu enentáimainiakui ashammiarmiayi. ³³ Nuyá Jesusan tiarmiayi “Iikia nékatsji.”

Tutai Jesus tímiayi “Wisha núnisnak yana kakarmarjijai takaaj nuna ujakchattajrume.”

12

Yajauch takau armia nu

(Mateu 21.33-46; Rúkas 20.9-19)

¹ Jesus ju métek-taku chichaman unuiniarmiayi: “Shuar uwa ajan ajam wenuimiai. Nuyá uwa nekeetain najanamai. Tura kumpin jean najanamai. Nwana takartusti tusa shuáran ikiuak níñkia jeachat wémai. ² Neretai tsawant jeamtai, ni takarniurin júukman akankat tusa akupkamai. ³ Tura ajanam takau arma nu, nu takarniun achik, katsumkar, áyatik awainkiarmai. ⁴ Ataksha chikich takarniun akupkamai, tura nunasha kayajajai tukurar, múuknum katsumkar, katsekar awainkiarmai. ⁵ Tuma ain ataksha chikichan akupkamai, tura nunasha máawarmai. Ti untsurin akupramai. Chikichnasha katsumkarmai, chikichan máawarmai.

⁶ Tura niijijai chikichik tuke ámiayi, nuka ni aneamu uchirj. Nu uchincha ukunam akupkamai. Akupeak “Winia uchnaka shiir awajstartui” tímiayi. ⁷ Tura ni uchirj winian wáinkiar, takau shuar nuámtak chichainiak “Ju ka ajá nérenniu uchirinti. Wátsek, maatai; túramka ajaka iiniu átatui” tiarmai. ⁸ Túsar achikiar máawarmai. Ayashincha ajanmaya ajapawarmai” tímiayi.

⁹ Tura nuyá aniasmiayi, “¿Wats, warí enentáimsarum; ajá nérenniurj itieurkat-tawa? Jeashtanmaya taa, ajá takainia nú shuaran amuktatui. Ni ajarincha chikichan ikiastatui. ¹⁰ Ju, Yus-Papinium aarma ana nu áujsachukaitrum: Kaya pénkernak, jeammin “yajauchiiti” tusar ajapawarmia nu ashí kayajajai nankaamas pénger apujsamuiti. ¹¹ Nusha Yus túramuiti. Iisha ísar ti enentáimtaji.

Nuke áarmaiti” tímiayi.

¹² Tura nú metek-taku chichamjai nin áujmatma asa achiktai tusar chichaman jurusarmiayi. Túmainiyat shuáran ashamainiak Jesusan ikiniak wearmiayi.

Uunt akupin súsatin tura Yus súsatin

(Mateu 22.15-22; Rúkas 20.20-26)

¹³ Tura wear, imiaamtikiar yaja chichakmatai nújai yajauch títai tusar Paríséu shuarnasha, Erutisa nemarin shuarnasha akatar Jesusan akup-tukarmiayi. ¹⁴ Túram Nin jeariar chicharainiak: “Uuntá, aents nakitiainiajn

tuke nekas chicham páchitsuk chichaame, nu nékaji. Aents pátatek iyatsme, antsu nekas Yusa jinti unuiniame. ¿Waritia enentáimiam, ii kuitri uunt Sesar súsatin péñkerkait. Susattajik. Suritkiattajik? Nu nekaatai tusar wakeraji” tiarmiayi.

¹⁵ Tura Jesus ni yajauch enentáimiarin nekara “¿Urukamtai Winia yajauch titi tusarum wakerutarum? Kuit itiatarum, Wi ístaj” tímiayi.

¹⁶ Tutai kuitian itiararmiayi.

Jesus nuna iis tímiayi, “¿Juísha yana yapí tura yana naarí áarmait?” tímiayi.

Tutai “Uunt Sésarna” tiarmiayi.

¹⁷ Nuyá Jesus tímiayi “Uunt Sésarna ana nu susatarum; túrarum Yúsnaka Yus susatarum” tímiayi. Tura ni áimkiamurin antukar ti enentáimprarmiayi.

*Aents nantaktinian Satuséu anintrusarmiania nu
(Mateu 22.23-33; Rúkas 20.27-40)*

¹⁸ Nuísha Satuséu aents, jakamunmayá nantaktin peñké atsawai tiniu armia nu, Jesusan tariarmiayi. Taar Jesusan chicharainiak: ¹⁹ “Uuntá, Muisais júna áatrampramijai:

“Áishman ni nuarí júreatsañ jakamtainkia, yachin yajutmatratsa, ni yachi nu wajen nuátkatniuiti!”

²⁰ Wats, siati yachi árimiayi. Iwíairí nuwan nuatak yajutmatsuk jakamiayi.

²¹ Ni yachi wajen akinkiamiayi. Nusha núnisan tura nuna yachísha núnisan túramiayi. ²² Tura ashí siati patainman, patainman nu nuwan nuátkarmiayi. Yajutmatsuk, yajutmatsuk jíiniawarmiayi. Tura ukunam nuwasha jakamiayi. ²³ Nuínkia nantaktin tsawantaj, nantakiarmatai, ¿yana nuarín ati? Ashí siati nuátkacharmaka” tiarmiayi.

²⁴ Tutai Jesus tímiayi ““Jakamunmayá nantaktin atsawai” tátsurmek. Yusa chichame tura Yusa kakarmari nékachu asarum awajiarne, tímiayi.

²⁵ Iimiatarum, aents jakamunmayá nantakiarmatai, uatnaikiatin atsutawai, antsu nayaimpinmayá suntara núnisaran pujusartatui. ²⁶ Tura jakamunmayá nantaktiniapitia tusarum nu nekaatin nekas wakerakrumka Muisais aarmia nu enentáimtustarum. Yuska numichinmayá Muisaisan chicharuk “Wikia Apráma Isaaka tura Jakupu Yúsrintjai” Yus tímiayi.

²⁷ Yaunchu jákaru ain, Yus nuna taku, ayashnium jakayat iwíiaaku pujuinia nuna Yusríntjai, tawai. Nekas jaka ainia nuna Yusrínchuiti. Nantaktin atsawai tau asarum awajirurme” tímiayi Jesus.

*Yus akupkamu imiá péñker ainia nu
(Mateu 22.34-40)*

²⁸ Jesssha Satuséusha áujmatnainian Israer-shuara jintinniuri taa an-turkamiayi. Anturak, Jesus ti peñker áimkiui, niisha Jesusan júna aniasmiayi: “¿Yus akupkamu tuá imiá péñkerait?” tímiayi.

²⁹ Tutai Jesus tímiayi “Júiti Yus akupkamu imiá péñker: Antukta Israer shuará. Ii Yusrí úuntaiti, tura Niñki nekas Yúsaiti. ³⁰ Tuma asantai, tuke enentáimjaj ti enentáimsam Uunt Yus aneeta. Túram ame iwíiakmarmesha, kakarmarmesha Yus íktusta. Núiti nekas péñker akupkamu, tímiayi.

³¹ Nuyasha chikichcha awai, “ame ayashim aneamna tímiatrusmek ame írutramurmesha aneeta.” Chíkich nu nankaamas péñker akupkamu atsawai” tímiayi.

³² Tutai jintintin tímiayi “Ee, péñkeraiti, Uunta. Nékasmek tame. Chikichik Yus awai, chíkichkia atsawai. ³³ Tura tuke enentáijijai ti enentáimsar, ii kakar-marisha Yus íktusar Nin aneakrikia, ii ayashj aneajnia núnik ii írutramurisha aneatniuitji. Nusha ashí Yus sutai ana nujaj nankaamas péñkeraiti’ tímiayi.

³⁴ Nuna tiniu asamtai Jesus ni péñker áimkian nekáa “Ameja Yus akupea-numam pachiinkiatin ishichik táasume” tímiayi. Tura nuyá chíkich shuar Jesusan aniastinian arantukarmiayi.

Kristu tutai çyana uchirjimpait?
(Mateu 22.41-46; Rúkas 20.41-44)

³⁵ Jesus Yusa Uunt Jeen unuiniak pujumiayi. Tura chichaak “çUrukamtai ii jintinniuri “Yus anakiamu Krístun Tawitia shuari” tuinia?” ³⁶ Tawit, antsu, Yusa Wakaní aarta tutai, Yus-Papinium juna áarmiayi:

Uunt winia Úuntrun tímiayi “Ame nemasrumin nupetkatin amuatsajin winia untsuuruinini pujusta”.

³⁷ Kame Tawitkia, Krístun áujmatuk, “winia Uuntru” taisha, çitiura ní shuarisha átiñk’?” tímiayi Jesus. Tuma asamtai untsurj shuar nuj mat-samarmia nu ti shiir antukarmiayi.

“Israer-shuaran jintintin ainia nújaj aneartarum” Jesus tímiania nu
(Mateu 23.1-36; Rúkas 11.37-54; 20.45-47)

³⁸ Jesus unuiniak tímiayi, “Israer-shuara jintinniuri ainia nujaj aneartarum. Niisha waantu enentáimtumasar, esaram pushin entsasar wekasatajtsar wakeruiniawai. Péprunmasha shuar shiir áujtusarat tusa wakeruini-awai. ³⁹ Israer-shuar iruntainiam penkerj pujutainium pujustinian wakeru-iniawai. Nampernumsha penkerj pujutainium pujustinniasha wakeruini-awai. ⁴⁰ Tura waje jeencha atantainiawai. Túrawar aents nekaracharat tusar ti esaram chichamjai Yusan áujainiawai. Nincha chikichjai nankaamas Yus asutiawartatui” tímiayi.

Waje kuítrjn susamiania nu
(Rúkas 21.1-4)

⁴¹ Jesus Yusa Uunt Jeen kuit enketainiam naka pujus áents kuítrjn chumpian wáinkiamiayi. Untsurj kuítrintin núkap enkeawarmiayi. ⁴² Nuyá waje kuítrinchá taa jimiará uchich kuítian, reara áantsan, enkeamiayi. ⁴³ Jesuska unuiniamurj untsuk “Nekas tájarme, ju waje kuítrinchoitiat, ashí enkeena nú nankaamas núkap enkeayi. ⁴⁴ Íis, kuítrinniusha nii ampirma nuna enkeenawai, tura antsu ju nuwá kuítrinchoitiat, ampirmatsuk ni yurumatni-urj takurmakman ashí enkeayi” tímiayi.

13

Yusa Uunt Jeen yumpuntratniun Jesus ujakmiania nu
(Mateu 24.1-2; Rúkas 21.5-6)

¹ Yusa Uunt Jeenia Jesus jiinkimtai, unuiniamurj Nin tímiayi “Íisia, Uunta, kayasha ti shiir áiniawai. Jeasha imiá úntchakait.”

² Tutai Jesus tímiayi “Ju imiá uunt jea wáinmek. Kaya ekenramu au ashí mash yumpuntratartatui” tímiayi.

Amuukatin tsawantin uruku átatna nu
(Mateu 24.3-28; Rúkas 21.7-24; 17.22-24)

³ Nuyá Uriwiu náinnium wakar, Yusa Uunt Jee naka pujasar, Pítrusha, Jakupusha, Juangsha, Antressha, nínkimias Jesusan aniiniak ⁴“Uuntá, tímiam nu, žurutíá túrunatta. Nu túrunatin jeakuisha itiura nekaattajia? Paant ujatmakta” tiarmiayi.

⁵ Tutai Jesus tímiai “Aneartarum, anankramawairap. ⁶ Nekaatarum, untsurj winia naarun pachisar winiartatui. Chíkich chíkich “Wíitjai Kristu” taku, untsurín anankawartatui. ⁷ Tura meset chicham ántakrumka, yajaya meset chicham ántakrumsha sapijmiakairap. Nekas túrunashtinkiait. Nujajisha amuukatin tsawantka tuke jeatsui, tímiai. ⁸ Shuar chíkich shuarjaj mesetan najanawartatui; apachcha chíkich apachjaj núnisarañ mesetan najanawartatui. Untsurj nunñanam úurkattawai. Tsukasha ártatui, charaatum ajamusha núnisarañ átatui. Tura nujaj itiurchatka aya yama nanñkamui.’

⁹ Túmaitkui atumsha aneartarum. Akupin iruntainiumsha surutmakar-tratume, tura íi shuar iruntainmasha katsumpramkartatume. Wíi shuar asakrumin, kapitiánnium, akupniunmasha juramkittiarume. Nuñ jearum, Winia chichastatume. ¹⁰ Nu túruntsain ashí áentsnum Yus-Chicham etsernaktiniaiti. ¹¹ Atumin surutmaktasar juramainiakuiisha, warintiajak tusarum ti enentáimsairap. Chichastin jeamtai, Yusa Wakanj jintintramatarmena nu titiarum. Iis, atumí enentáijjaj tichattarme, antsu Yusa Wakanj jintintiam títiatume. ¹² Nu tsawantin shuarsha ni yachín mantamnat tusa suruktatui. Apasha ni uchirín suruktatui. Uchisha aparíncha nukuríncha kakerak, jakati tusa suruktatui. Núnisarañ untsurj shuar túrawartatui. ¹³ Nuñkia Wíi shuar asakrumin ashí nakitramprartatui. Tura shuar yawetsuk katsuntrañka uwemprattawai” tímiai.

¹⁴ Nuyá Jesus tímiai “Shuar juna áujeana nu nekaati. Yúsnan etserin, ni naari Taniar, ti yajauch tuke emesin ana nuna yaunchu aar etserkamiayi. Nuka pujushtainiam pujan wáinkiumesha, ashí Jutía nunñanam pujarmena nu, náinnium pisartarum. ¹⁵ Jea yakiiní pujana nu akaiki wariri achiktajtsa, jeeñ wayashti. ¹⁶ Ajanam pujana nusha ni pushirín jukitiajtsa waketkishti. ¹⁷ Tura ajamtin áiniana nusha, kuírchin umuntsainia nusha, nu tsawantin timiá itirchatan wáinkartatui. ¹⁸ Tuma asamtaí átum pisaarmena nuñ yumitin achati tusarum Yus seatarum. ¹⁹ Nu tsawantinkia ti wáitsatin átatui. Yama nanñkamtaik Yus nunñanam najanama nuñsha, yamaisha ukunmasha timiu wáitsatin penké atsuttawai. ²⁰ Tura Uunt Yus wáitsatin tsawantan ishichik awajsattajai tichaitkuñkia, uwempratin penké atsuinti. Tura ni shuarín anaikiamia nuna yáintajtsa wakerak, nu tsawantan ishichik awajsattawai. ²¹ Nu tsawantaj “júiiti Kristu” túramkuñkia anturkairap. ²² Kame “Kístuitjai” ántar tuinia nu, tura “Yúsnan etserniuitjai” ántar tuinia nusha wantinkartatui. Wantinkiar Yus anaikiamu shuárnasha anankatai tusar wakeruiniak, ni kakarmarín iniakmainiak aentsti tujintiamun túrartatui. ²³ Tura átum aneartarum. Aetak, túruntsain ujakchajrumek’ tímiai Jesus.

Aents Ajasu tutai tátintri

(Mateu 24.29-35, 42-44; Rúkas 21.25-36)

²⁴ Jesus tuke unuiniak juna tímiai: “Tura nu wáitsatin nanñkaasmatai, etsaasha nantusha etsantrashtatui. ²⁵ Yaasha nayaimpinmaya kakekartatui, tura nayaimpiniam kakaram ainia nu muchitrtatui. ²⁶ Nuyasha ashí aents Winia wáitkiartatui. Wí, Aents Ajasuitjiana ju, ti kakaran, ti wincha ajasan, yurañminiam winiáj wáitkiartatui. ²⁷ Nuñ nayaimpinmaya suntarun

akupkattajai, Wíi shuaran ashí nunkanmayan irurarat tusan. Arakaanija, nunkaanija, ashí nunka nánkatkamunmayan Wíi shuaran irurartatui.'

²⁸ 'Ikiu numi nakumea nu nekaatarum. Ni chinkimprj punkak nuke jeaku, "ju nunkanam esat jeatemaí" tátsurmek. ²⁹ Núnisurmek Wi tájarmena nu wáinkiumeka, ni tatintrj jeatemaí tu nekaattarme. ³⁰ Nekas tájarme, yamaí aents pujuinia nu kajin amuiniatsain, ashí Wi tájana nu túrunatniuiti. ³¹ Nayaimpisha nunkasha amukatniuiti. Tura winia chichampruka amuukashtiniaiti. ³² Tura tsawantcha nekanachminiaiti. Nayaimpinmaya suntarsha nékainiatsui; Wisha Yusa Uchiríntiatan nékatsjai. Aya winia Aparuk nékawai. ³³ Atumsha anearum enentáimprarum Yus aujsa pujustarum, tsawant nékachu asarum.'

³⁴ Tura Wikia ju shuarjai méteketjai. Ju shuarsha jechat weak, ni jeen iki-uawai. Ikiuak ni shuarjn wáitrukartí tusa apujas ikiuak ashí shuaran takatrjn súawai. Tura wáitin wáinniun, "ameja péñker wáinkiaata" tímiai. ³⁵ Wikia nu jea nérenniua núnisnak, urutai tátataj nékachu asarum anearum pujustarum. Kiarimpiash, tura ajapkeash, atash shiniukaimpiash, káshikiash tátatjai. ³⁶ Nérentin aya aneachmak taa, kanúu tepaj wáitkijai tusarum aneartarum. ³⁷ Wi atumin tájana nu, ashí shuaran tajai, anearum pujustarum" tímiayi Jesus.

14

Jesusan chichaman jurusarmiania nu (Mateu 26.1-5; Rúkas 22.1-2; Juan 11.45-53)

¹ Jímiarchikí tsawant ajasmiayi paskua tutai námper jeatin. Paskua námperinchá wakapruachu tantan yuatin námpernasha métek najanin ármiayi. Israer-patri uuntrisha, Israer-shuara jintinniurisha Jesusan ananchar achikiar maatai tusar wakeriarmiayi. ² Túrasha "Jista tsawantin túrchami, aents charaatum ajarain tusar" tiarmiayi.

Nuwá kunkuinian Jesusan ukatramiania nu (Mateu 26.6-13; Juan 12.1-8)

³ Jesussha Petania péprunam tunamaru Semunka jeen misanam pujan, nuwá tarimiayi. Nartu kunkuinian arapástru tutai kaya najanamunam pikun itiamiayi. Nu kunkuin ti kuitiiai. Mutí chuchuke kupik Jesusa muuken kunkuinian ukatramiayi. ⁴ Tura nuí pujuarmia nu, kajerar tunaiarmiayi "¿Urukamtaí ju kunkuinian ántar wasurea? ⁵ Júnasha súrakka, mainaiú sian kúitnium surukminiuyi. Nu kuitcha kuítrinchan súsanka maak" tiarmiayi. Tusa nuwan kajerkarimiayi.

⁶ Antsu Jesus chicharainiak "Iniaisatarum. ¿Urukamtaí au kajerarum? Winia shiir túrutayi, tímiayi. ⁷ Kuítrincha atumjai tuke íruntsuk. Wakerakrunka tuke péñker awajsatniuitrume. Antsu Wikia atumjai tuke pujushtatjai. ⁸ Ju nuwá ashí níi túramnia núnaka umikiai. Wi jákatin jeatsain, iwirsatin kunkuinian shiir ukatrurai. ⁹ Nekas tájarme, ashí nunkanam Yus-Chicham etsernaktatna nu, ju nuwá túramurisha etsernaktatui, nin kajinmatkjarain tusa" tímiayi.

Jútas Jesusan suruktaj timiania nu (Mateu 26.14-16; Rúkas 22.3-6)

¹⁰ Nuyá Jútas Iskariúti, Jesusa unuiniamuríntiat, Israer-patri uuntrjn werimiayi, Jesusan suruktaj tusa. ¹¹ Niisha nuna antukar, warasar "Kuit

amastajji” tiarmiayi. Jútassha Jesusan ititurak yúpchuch tsan̄kamkattaj tusa enentáimias wekaimiayi.

Jesusjai iruntrar yurumáwarmia nu

(Mateu 26.17-29; Rúkas 22.7-23; Juan 13.21-30; 1 Kurintiunam 11.23-26)

¹² Wakapruachu tantan yuatin jisat nan̄kama tsawant tsawarmatai, paskua námpertin yúatin murik máatin jeamtai, Jesusa unuiniamurj iniasarmiayi “Paskuatin murikiu yúatin iwiaratai tusar çtuñ wétataj. Tuñ yurumattam?” tiarmiayi.

¹³ Tutai Niisha jimiara unuiniamurj in akatar akupeak “Péprunam wetarum. Nuñ áishman̄ yumin jukí wéa wáinkiatarme. Nu áishman̄ nemarsatarum.

¹⁴ Wayana nuñ jeá nérenniurj títiarum “Uunt túramui, çwisha, unuiniamurjai tuñ yurumáttaj?” ¹⁵ Nu nérentin, yakí písunam uunt tesamunam ashí iwiamun iniakturmastatrum. Nuñ jisat ii najanatin iwiaratarum” tímiayi. ¹⁶ Ni unuiniamurj wear, péprunam jeawar, Jesus timia núnisan̄ wáinkiarmai. Tuma ásar paskua námperan iwiararmiayi.

¹⁷ Nuyá kíakui Jesus ni tuse unuiniamurjijai wayawarmiayi. ¹⁸ Niisha misanam pekaamak, yurumáiniak pujusar, Jesus tímiayi. “Nekas tájarne, chikichik shuar Wijjai yurumna nu, surutkattawai.”

¹⁹ Nujai kúntuts enentáimprarmiayi. Chikich chikich Jesusan aniasar “wáshitiaj” tiarmiayi.

²⁰ Jesus tímiayi “Ju misanam tuse irunar yurumprum nu, chikichik surutkattawai. Wijjai pinin̄num yurumkan ayak yuana núiti. ²¹ Nekas Wi, Aents Ajasuitjana ju, jákatniunam wéajai, áarturma áintsanak. Tura áishman̄ súrutna nu ti wáitsattawai. Niisha akiinmainchu ajakuiti” tímiayi.

²² Yurumainiak Jesus Yúsan yuminkias, yurumkan achik, puuk, chicharainiak “Achiktarum, jusha winia ayashruiti” tímiayi. ²³ Pinin̄nasha achik, Yúsan yuminkias, ni unuiniamurj in súsarmiayi. Ashí umararmiayi. ²⁴ Umararmatai Jesus tímiayi “Júiti winia numpar, untsurj in yáintajtsa puártinai nu. Nujai Yamaram Chichaman Yus najanaiti. ²⁵ Nekas tájarne, uwa yumirj ataksha juñ umarchattajai. Tura tsawant jeamtai, ukunmasha, Yus akupeana nuñ yamarman umartajai” tímiayi.

Pítur natsantratniua nuna Jesus ujakmiania nu

(Mateu 26.30-35; Rúkas 22.31-34; Juan 13.36-38)

²⁶ Yus-kantan kantámawar, jínkiar, Uriwiu náinnium wearmai. ²⁷ Nuñkia Jesus nin tiarmiayi “Ju kashi átum natsantrurtatrum. “Murikiu wáinnium máattajai, túramtai murik tsakin̄makartatui” tu aarchamukait. ²⁸ Tura ukunam Wi nantakin atumin Kariréanam émtuktiajrum” tímiayi.

²⁹ Tutai Pítur chicharuk “Ámin ashí natsantramainiakuisa, wikia natsantrashtatjame” tímiayi.

³⁰ Tutai Jesus tímiayi “Nekas tájame, ju kashi atash jimiara shiniatsaj in, natsantrurtatme. “Núnaka nékatsjai” menaintiú turuttiatme” tímiayi.

³¹ Tutai Pítur kakaram chichaak “Ámijjai métek máantuiniakuisha, núnaka pen̄ké tíchattajai” tímiayi. Ashí ni unuiniamurj in núnisan̄ tiarmiayi.

Jesus Jitsemaní ajanam Yúsan áujsamiania nu

(Mateu 26.36-46; Rúkas 22.39-46)

³² Nuyá Jitsemaní ajanam wearmai. Jeawar Jesus ni unuiniamurj in tímiayi “Juñ pujustarum, Yúsan áujsatasa pujai”. ³³ Pitrun, Jakupuncha,

Juánnasha jukimiayi. Tura Jesuska ti kuntuts enentáimiar wake mesek nekapsatasa nan̄kammiayi. ³⁴ Tura nin chicharuk “Wi ti kuntuts enentáimjai, tura jakamnia nekapeajai. Juí iimia pujutarum” tímiayi. ³⁵ Jessussha ishichik arantach we, nunká piniakumar tepes Yúsan aujmiayi. “Ju wáitsatin átatna nu, túrutatniuitkuñkia iniaitiusta” tu seamiayi. ³⁶ Tuke ájuk tímiayi “Apawá, ashí tujinchaitme. Piniñnumiá ashí umartinia áantsañ ti nekapsatajna nú wáitsatniun, jurutkitia. Antsu Wi wakeraj nucha, ame wakeramuram túrunati.” ³⁷ Tura ni unuiniamurin tarin, kanúu tepenan wáinkiamiayi. Pítrun tímiayi “¿Semun̄ka kánamek. Kanutsuk ishichkisha iimia pujustin tujinkiamek?” ³⁸ Anearum Yus áujstarum, tunaanum iniaaraj̄j tusarum. Atumí wakan̄in kakarmaitrume, antsu atumí ayash̄in kakarmachuitrume” tímiayi.

³⁹ Ataksha we, nuik Yúsan áujsama núnisan̄ áujsamiai. ⁴⁰ Ataksha waketruki, ni unuiniamurin kanúu tepenan tarimiayi. Kar̄j ti pujá asamtai, Jesusan áujsatniun tujinkiarimiayi. ⁴¹ Jesus ataksha we, tarí tímiayi “Kanmarum ayampratarum. Máakete. Jeayi. Wi, Aents Ajasuitjiana ju, tunáa shuarnum surukmaitjai. ⁴² Nantáktiárum, wemí. Iis, Winia súrutna nu nuntumsai” tímiayi Jesus.

Jesusan achikiarmiania nu

(Mateu 26.47-56; Rúkas 22.47-53; Juan̄ 18.2-11)

⁴³ Jesus nuna chicháa pujá unuiniamur̄j Jútas tarimiayi. Niijjai untsur̄j aents puniá takaku, tura numincha takaku káutarmiayi. Israer-patri uuntrī, Israer-shuara jintinniur̄j, tura Israer-shuara úuntrī akupkarma asa káutkarmiayi. ⁴⁴ Káuntsaj̄n Jútas chicharainiak, “Wi mukunattaj̄ áujkin núiti Jesus. Achirum, péñker emetarum jukitiarum” tímiayi. ⁴⁵ Tura Jesusan tarí, mukunuk áujas “Uuntá, Uuntá” tímiayi. ⁴⁶ Túramtai aencha Jesusan achikiar emetawarmiayi. ⁴⁷ Túruiniakui nūj wajatusha puniar̄j úkuitsañ, patri uuntrī takarniur̄j awati ni kuish̄in tsupirkamiayi.

⁴⁸ Túram Jesus áentsun tímiayi “Kasakaitiaj. Puniajaj̄ numijjaj̄, kasá nútiksarmek achirkatai tusarum tarutniurme. ⁴⁹ Ashí tsawant atumjaj̄ Yusa Uunt J̄eñ wayan̄ unuiniakun pujuchmakaj. Túmaj̄ nūj achirkachmarme. Tura Yus timia nu uminkiat tusa jū túrunayi.” ⁵⁰ Nuiñkia ni unuiniamur̄j Niniak ikiuniak pisararmiayi.

Natsa pisarmiania nu

⁵¹ Tura áishman̄ nátsaach aya tarachin penumas Jesusan atamprimiayi. Tura natsaach suntar achikiam ⁵² tarachrin̄ ajapa ikiuak misú tsékeñkimiai.

Patri uuntriin̄ Jesusan júkiarmiania nu

(Mateu 26.57-68; Rúkas 22.54-55, 63-71; Juan̄ 18.12-14, 19-24)

⁵³ Patri uuntriin̄ Jesusan ejeniarmiayi. Nūj Patri uuntrīsha, Israer-shuara jintinniur̄jsha, Israer-shuara uuntrīsha irunturarmiayi. ⁵⁴ Tura Pítiur íikian̄ nemarki Patri j̄eñ aach̄ jeá, Patri suntarijjaj̄ jinia anamuk pujumiayi. ⁵⁵ Patri uuntrī ashí naamka uunt armia nujaj̄ iruntrar maatai tusar wakeruiniak shuar Jesusan tsanumprurat̄ tusar eatkarmiayi. Nu chichamjaj̄ mantamnati, tiarmiayi. Túrash̄a wáinkiacharmiayi. ⁵⁶ Túrash̄a untsur̄j shuar Jesusan tsanumpruiniayatan̄ yapajj̄á yapajj̄á chichainia

ásarmatai wáinkiacharmiayi. ⁵⁷ Nuyá chíkich wajakiar wáitruiniak juna tiarmiayi ⁵⁸ “Yusa Uunt Jeen, aents jeamarmia nuna yumpuntiatjai. Túran menaintiú tsawantaj, chíkichan, aents jeamchamun jeamtatjai” tau antukmaji” tiarmiayi. ⁵⁹ Tura tuke yapajiáwar tiarmiayi.

⁶⁰ Nujsha Patri uuntri ajapén wajakí Jesusan chicharuk “¿Áimsatin penké tujintiamek. Warinia turamainia?” tímiayi.

⁶¹ Tura Jesus takamtak áimtsuk pujumiayi.

Patri uuntri atak chicharuk “¿Ame nekas Yusa Anaikiamurinkaitiam. Ii Yusri Uunt tajinia nuna Uchirinkaitiam?”

⁶² Tutai Jesus tímiayi “Ee, núitjai. Winia, Aents Ajasu tutaintiajna nu Kakaram Yusa untsuurini pujaj wáitkiattarme. Tura nayaimpinmayá yu-ranminiam winiaj wáitkiattarme” tímiayi.

⁶³ Tutai Patri uuntri kajek, ni pushirin jaak tímiayi “¿Chíkich títincha warí atsumaj?” ⁶⁴ Nii tana nujai Yúsán kátsekeamu antukurme. ¿Warintia enentáimprum?” tímiayi.

Takui “jakamniaiti” ashí tiarmiayi. ⁶⁵ Chíkich chíkich Jesusan usukiáwarmiayi. Jiin epetkar awatiar “¿Ya áitkiarma? etserkata” tiarmiayi. Patri suntarisha yapiniam awatiarmiayi.

Pítur Jesusan natsantramiania nu

(Mateu 26.69-75; Rúkas 22.56-62; Juan 18.15-18, 25-29)

⁶⁶ Núnaka túruiniaj Pítru nunká, jea aani pujan, nuwá Patri uuntri takarni-urija nu tarimiayi. ⁶⁷ Niisha Pitrun jinia anamu pujan wáinkiamiayi. Wáiniak, “Amesha Nasaretnumia Jesusaj wekaichukaitiam” tímiayi.

⁶⁸ Tutai Pítur chicharuk, “Nékatsjai. Ame támena nuna nékatsjai” tímiayi. Tura aa wáitaiiniam jinkimiayi. Tumai atash shiniukmiayi.

⁶⁹ Nu núwasha Pitrun ataksha wáiniak, shuáran nuj pujuinian tímiayi “Júiti ni shuari.”

⁷⁰ Tura ataksha “atsá” tímiayi.

Ishichik árusan, shuar nuj pujuarmia nu ataksha Pitrun chicharuk “Nekas ni shuarinme. Kariréanmayá shuárchakaitiam. Auyá shuara nuní chichaame” tiarmiayi.

⁷¹ Tutai Pítrusha kakantar chichaak, “Ju áishmannaka átum tárumna núnaka nékatsjai. Wáitruakuñkia Yus íirsati” tímiayi. ⁷² Nuyá ataksha atash shiniukmiayi. Pítrusha, Jesus nuik timian enentáimmiayi. Iis, Jesus nuik tíchamka “Atash jimiar shiniatsain, ame, núnaka nékatsjai, menaintiu turuttiatme” tíchamka. Pítru nuna enentáimias ti útmiayi.

15

Jesusan Piratú ejeniarmiania nu

(Mateu 27.1-2, 11-14; Rúkas 23.1-5; Juan 18.28-38)

¹ Tura kashin káshik Patri uuntri, Israer-shuara úuntriñjai, Israer-shuara jintinniurijñjai, ashí naamka armia nujai irunturar, chichaman jurusarmiayi. Túrawar Jesusan jinkiamun apach kapitían Piratujin ejeniarmiayi.

² Ejeniar matai Piratu aniasmiayi “¿Amesha Israer-shuara Uuntrin kaitiam?”

Tutai Jesussha “Amek tame” tímiayi.

³ Nuyá Patri uuntri ti tsanumprurarmiayi. ⁴ Ataksha Piratu aniasmiayi “¿Áimsatin penké tujintiamek? Ti untsurí etserturmainiatsuk.” ⁵ Tura Jesus nunasha áikchiamiayi. Túnakui Piratu ti enentáimpramiayi.

Jesusan, mantamnati, tíarmiania nu
(Mateu 27.15-31; Rúkas 23.13-25; Juan 18.38-19.16)

6-7 Shuar ámiayi, ni naari Parapás. Niisha ni shuarijijai meset ámanum, shuaran maa asamtai sepunam enkeamuyayi. Tura námper tsawantai Piratu sepunmaya chikichik shuarnak jiki akupniuyayi, aents seawarmia nuna. 8 Nuisha untsurí shuar Piratun káutkar tiarmiayi “Ame ju námpertin tuke túramna nu túratá. 9-10 Patri uuntri Jesusan kajeraru ásar surukarmiayi. Piratusha, nuna nekáa chicharainiak “Israer-shuarteram ¿atumí akupniurín jiki akupkattajak? ¿Nu wakerarmek?” tímiayi.

11 Tutai Patri uuntri áentsun chichainiak ““Antsu Parapás jikim akúpkatá” titiarum” tiarmiayi.

12 Tutai Parapásan seawarmatai Piratu ataksha chicharainiak “Jesusnasha, átum íi akupniurí tarumna nuna, ¿itiurkattaja?” tímiayi.

13 Ataksha ni kakantar tiarmiayi “Krúsnum mantamnati.”

14 Piratusha nin tiarmiayi “¿Warí tunaana túriniait?” tímiayi.

Takui niisha nú nankaamas kakantar tiarmiayi “Krúsnum mantamnati.”

15 Tuma asamtai, aents shiir enentáimprartí tusa, Piratu tunáa shuaran, Parapásan jiki akupkamiayi. Tura Jesusnasha katsumkarum krusnum ajintrutarum tusa suntaran tsankatkamiayi. 16 Tiniu asamtai suntar Jesusan jukiar, kapitiáni jeen awayawarmiayi. Nu jea naari Piritiúriuiti. Túrawar untsurí suntaran unsukarmiayi. 17 Ashí káunkar, pushin kapañniun Jesusan áentsarmiayi. Tawasap janí najanamun etsenkrumtikiarmiayi. 18 Nuisha Jesusan áujsar “Shíraitme, Jesúsá, Israer-shuara akupniuríya” wishikiainiak tiarmiayi. 19 Muuknumsha sapapjai awatiarmiayi; nuyá usukiawarmiayi, túrawar ántar tikishmatrarmiayi. 20 Tura Jesusan wishikrar amukar, kapañtin pushin áitkjar, ni pushirín áentsarmiayi. Túrawar krúsnum ajintrurtai tusar jikiarmiayi.

Jesusa jakamuri
(Mateu 27.32-44; Rúkas 23.26-43; Juan 19.17-27)

21 Semun Serini núñkanmaya shuáruyayi. Arijantruncha, Rupuncha aparíyayi. Semun kan takatnumiá winian suntar emetawarmiayi, Jesusa krusrín yanaki jukiti tusar. 22 Jesusnasha Kúrkuta náinnium júkiarmiayi. Kúrkuta, shuar chichamjainkia, muuka ukunch naint, tutainti.

23 Jeawarmatai, karía, mira kunkuinjai pachimprar áartaj tusa susarmiayi Jesusan. Túrasha umarchamiayi. 24-25 Nantu yakí jatemsantai krúsnum ayapar ajintrurar ikusarmiayi. Túrawar suntar yakí jukit tusar nakurutaijai nakurusar Jesusa pushirín yaruakarmiayi. 26 Urukantai máamuit, ashí aents nuna nekaawarat tusa, ni krúsín ju aarmauyayi: *ISRAER SHUARA AKUPNIURÍ*

27 Nu náinnium jimiará kasa shuaran Niiijai máawarmiayi. Chikichik Jesusa untsuurín krúsnum, chikichik ni menaarín krúsnum máawarmiayi. 28 Yus-Papiniun aarma ana nujai uminkiauyayi. Nui “tunáa shuarjai nekapmar-mauyayi” tu áarmaiti.

29 Shuar nankaamainiak, muuke pearar, Jesusan katsekainiak tiarmiayi “Íisia, amesha, “Yusa Uunt Jeen yumpuntiatjai, tura menaintiú tsawantai ataksha jeamkattajai” tíchakaitiam, tiarmiayi. 30 Amek krúsnumiá akaikim

uwemprata.” ³¹ Núnisan Patri uuntrisha, Israer-shuara jintinniurisha Jesusan wishikrar chicharnaisarmiayi “Chikichan uwemtikraitiat, Niñki uwempratniun tujintiawai. ³² Yusa anaikiamurj Krístuashit, ii akupniuriniashit, tiarmiayi. Wats, yamá krúsnumiá akáikití, iisha nu ísar Yus-shuar ajastai” wishikiainiak ántar nuna tiarmiayi. Jesusaj*aj* krúsnum ajintruamusha Nin wishikiarmiayi.

(Mateu 27.45-56; Rúkas 23.44-49; Juan 19.28-30)

³³ Tutupin jeamtai ti kiritin ajasmiai ashí nunñkanam. Tura, nantu nunñkaach ajasmatai ataksha tsaapnirmiayi. ³⁴ Nuñ Jesus kakantar untsumuk tímiayi “Iruí, Iruí, rama sapaktani.” Nuka shuar chichamjainñkia, “Yusrú, Yusrú, ¿urukamtai ajapa ikiurkiniam?” tawai. ³⁵ Shuar nuñ pujuarmia nu, nu chichaman nékachu ásar, nuna antukar “Eriasan untsúawai” tíarmiayi. ³⁶ Chikichik shuar churuinian uruchjaj*aj* ajamper, sapapjaj*aj* ijiú mukunati tusa susamiayi. Tura tímiayi “Wajastarum, Eriás Nin jukitaj tusa winishtimpiash. Iistai” tímiayi.

³⁷ Nuñkia Jesus kakaram untsamak jakamiayi. ³⁸ Túramtai Yusa Uunt Jeeñ ejamu niñki jaanakmiayi, yakíya nunñká. ³⁹ Suntara kapitíántrisha Jesusan ayamtus wajamia nu, Jesus kakaram untsamak jaamun iis tímiayi “Nuka ti nekas Yusa Uchiriyayi.”

⁴⁰ Nuwasha arant ii pujuarmiayi. Nu nuwajaj*aj* Máktara péprunmaya Marí, chíkich Marisha, Sarumáisha pujuarmiayi. Chíkich Marisha uchich Jakupuncha Jusenchá nukuríyayi. ⁴¹ Nu núwaka, Kariréa nunñkanam Jesus wekaimia nuj, Nin nemarsar yáintaitsar wekasarmiayi. Untsurí chíkich nuwasha Jesusaj*aj* Jerusaréñnum wear, nu nuwajaj*aj* arant ii pujuarmiayi.

Jesusan iwiarsarmiania nu

(Mateu 27.57-61; Rúkas 23.50-56; Juan 19.38-42)

⁴² Kiatemamtai, ayampratin tsawant jeatsaj*aj*, námper iwiaratin tsawant asamtai, ⁴³ Arimiatianmaya Jusé arantutsuk, kakaram ajas, Piratuí jeá Jesusa ayashin seatajtsa utuamiayi. Nu Jusenchá ashí irunin ainia nu anturin ármiai. Niisha Yus ju nunñkanam akupin ajasat tusa nákasmiayi. ⁴⁴ Tura Jesusa ayashin seam, Piratusha “wárik jaka” tímiayi. Tuma asa suntara kapitíántrin untsurak “¿Nekas jakayik?” tímiayi. ⁴⁵ Tutai kapitíán “Ee” takui, Jesusa ayashin Jusén tsanñkatkamiayi. ⁴⁶ Jusesha puju tarachin péñkeran sumarak, Jesusa ayashin itiar áepas penuarmiayi. Tura yamaram kaya táurmanum ikiusmiayi. Ikius wáitiniam kayan átutmiayi. ⁴⁷ Tura Máktaranmaya Marí, Jusé nukurí Marijaj*aj* ni ikiuamun ii wajarmiayi.

16

Jesus nantakmiania nu

(Mateu 28.1-10; Rúkas 24.1-12; Juan 20.1-10)

¹ Tura ayampratin tsawant nanñkaasmatai, Máktaranmaya Marisha, Jakupu nukurí Marisha, Sarumáisha, kunñuinian Jesusa ayashin kuer-tai túsar sumakarmiayi. ² Tura kashin Tumiñtin, ti káshik, nantu yáma jiñniai, iwiarsamunam jearirmiayi. ³ Wésar chichainiak “Iwiarsamu wáitiri kayancha ¿yaki akanñketramkattaj?” tiarmiayi. ⁴ Jear uunt kaya akanñkekman wáinkirmiayi. ⁵ Iwiarsamunam wayawar, natsan esaram puju pushin entsar, untsuurnumaan*aj* pujan wáinkiar ti ashamkarmiayi.

⁶ Túmainiakui natsa tímiayi “Ashamkairap. Nasarénumiá Jesus krúsnum jakama nu éarme. Iniantkimiuiti. Juí pujatsui. Wátsek, ju íkíusmanum ístarum. ⁷ Túrarum werum Pítrusha, chíkich unuiniamurísha ju ujaktarum. Kariréanam atumin émkíyi. Turammarmuna núnisaj túruna wáinkíattarme” tímiayi. ⁸ Niisha ti ashamainiak purushniarar iwíarsamunmayá tseke wearmiayi. Ti ashamainia ásar, chíkichkinkesha ujakcharmíayi.

Máktaranmayá Marin Jesus wantintíúkmiania nu
(*Juañ 20.11-18*)

⁹ Émkaka Tumiñtin ti káshik Jesus nantaki, Máktaranmayá Marin wantintíúkmíayi. Nu María enentáiyá siati iwianchin Jesus yaunchu ajapruyayi. ¹⁰⁻¹¹ Marisha Jesusa nemari kúntuts uutu matsatainian werí, “Jesus iwíiakui, imia wi wainkíajai” tímiayi. Támaiati anturkacharmíayi.

Jesus jimíará shuaran wantintíúkmiania nu
(*Rúkas 24.13-35*)

¹² Tura urum jimíara shuar Jerusarénumiá tsaniñ weenan, Jesus nusháa iira ajas tarimiayi. ¹³ Niisha Jesusan wáinkiar waketkiar, unuiniamurín ujakarmiayi, tura ni chichamencha anturkacharmíayi.

Jesus ni unuiniamurín akupkarmiania nu
(*Mateu 28.16-20; Rúkas 24.36-49; Juañ 20.19-23*)

¹⁴ Nuyasha Jesusa auntse unuiniamurín misanam pekaamkar pujuinian Jesus tarimiayi. “¿Atumí enentái urukamtai kátsuram ainia, urukamtai Winia nekas enentáimtursachuram?” tímiayi. Ni nantakmiarín wáinkiaru chichamen anturkacharu ásarmatai kakantramiayi. ¹⁵ Nuyá chichaak “Ashí nunkanam wetarum. Túrarum ashí shuarnum Yusa shiir chichame etserkatarum. ¹⁶ Shuar anturak imiani uwemprartatui. Shuar antukcharka, tuke sumamawartatui. ¹⁷ Shuar winia náarun pachis, Yúsan nekas enentáimtakka, juna túrawartatui, Yusa kakarmarín iniakmastaj tusa: iwianchin jjiiki akupkartatui; chíkich chichamjai chichasarukamtai Winia nekas enentáimturtatui; ¹⁸ napincha achiksha, tseasnasha úmaksha, jaa ajaschartatui. Jaa shuaran ni uwejejai antin, nu shuaran péñker awajsartatui.” Tu tímiayi.

Jesus nayaimpiniam wakamiania nu
(*Rúkas 24.50-53*)

¹⁹ Jesus chichas amukmatai, Yus nayaimpiniam jukimiayi. Túruna Yusa untsuurín pujusmiayi. ²⁰ Ni unuiniamurísha jíinkiar, ashí nunkanam Yus-Chichaman etserkarmiayi. Tura Uunt Yus nin yáinmiayi. Tura etserainiakui, ashí aents ni kakarmarín nekaawarat tusa, aentsti tujintiamun túratniun susamiayi. Nuke atí.

Yúsán Shiir Chichamēn

RÚKAS aarmia nu

¹ Nekaas iiní Jesús túramia nuna “ímiatrusan áartajai” untsurí aents tiarmiayi. ² Yámankamtaikniumian ísarmia nú shuar, tura Yus-Chichaman etserkatniun yáinkarmia nusha in unuitiamprarmia nútiksaran áartinian wakeriarmiayi. ³ Wisha núnisnak esetsaran enentáimsan, yámankamtaikniumiā nuna nekaamjai. Tuma asan túrunamia nuna ímiatrusnak amincha áatratajtsan wakerimjime, winia úuntur Tiupiru. ⁴ Jintinramawarma nú nankaamas nekaata tusan wakerakun áatjame.

Imiakratin Juan̄ka akiiniatniur̄in ujakmiania nu

⁵ Jutía nunkanam uunt akupin Erutis akupkama nú tsawantin Israer-shuar Yúsnan pujurin ámiayi, ni naar̄i Sakarías. Niisha Aptías weeauyayi. Ni nuwēsha Irisapít Aruñ weeauyayi. Irisapítia úuntrišha Israer-shuar Yúsnan pujurin ármiai. ⁶ Yúsjaishha Sakaríassha Irisapítcha máí-metek péñker ármiai. Yus akupkama nunasha umirin ármiai. Tuma asantai penkesha chíkich nin yajauch chicharkatin atsuarmiayi. ⁷ Yusjaj péñker wekainiyat Irisapít júrechuyayi. Túrasha mai úuntach ármiai.

⁸⁻⁹ Israer-shuar Yúsnan pujurin chíkich weeanmaya nuyá chíkich weeanam, an̄kant an̄kant Yusa jēen takáu ármiai. Chíkich tsawant, Sakarías weeá takastin amia nūj, Sakaríaska kun̄kuinian ekeemaktaj tusa inít wayatniuyayi. ¹⁰ Inít kun̄kuinian ekeemaj untsurí aents aani matsamsar Yúsán áujtak pujuarmiayi. ¹¹ Sakarías inít pujāj kun̄kuin ekeematainiam untsuurnumaan̄j aya aneachma nayaimpinmaya suntar wajamiayi. ¹² Nuna wajan wáiniak Sakaríaska purushnairmiayi. ¹³ Túrasha nayaimpinmaya suntar chicharuk tímiayi “Sapijmiakaip Sakarías. Nekaata. Ame seamna nuna Yus anturtamkayi. Tura ame nuwem Irisapít uchin takustatui. Nii akiiniamtai, “Juan̄” anaikiata. ¹⁴⁻¹⁵ Ame uchiram akiiniattana nuka Yusjaishha nankaamantu átatui. Tuma asantai akiiniamtai, amesha shiir enentáimsam warastatme. Tura chíkich aents untsur̄j warastatui. Ame uchirmesha karía áinia nuna umarchattawai. Tura áetak akiinchanak Yusa Wakan̄j pimiutkattawai, tímiayi. ¹⁶ Tura ni shuar̄in Israer-shuar áiniana nuna, ii Uuntr̄j Yusjaj ataksha nawamtikiartatui. ¹⁷ Uunt Yúsajya akatramu átatui. Yaunchu Yúsnan etserin Eriás kakaram etserkamia núnisan̄ niisha etserkattawai. Nujaj shuaran ni uchir̄j̄jaj nawamtikiartatui. Tura umichu áinia nuna eeser enentáimtikrartatui. Ni Uuntr̄j taakui ni enentá̄j iwiamamu arti tusa etserkattawai” tímiayi nayaimpinmaya suntar.

¹⁸ Nuna takui Sakarías nayaimpinmaya suntaran tímiayi “¿Nunasha war̄ij̄jaj̄n paant nekaataj? Wisha nuar̄jaj̄ máí-metek ti úuntchichukaitaj” tímiayi.

¹⁹ Tutai nayaimpinmaya suntar tímiayi “Wikia Kapriiraitjai, Yusa suntar̄intjai. Nii akatturmatai chichastájam tusan tura nu shiir chichaman ujaktájam tusan tarijme, tímiayi. ²⁰ Túrasha wi tájamna nu “nekasaiti” tu enentáimprachume. Tura asam uchiram akiintsaj̄n muut ajastatme. Chichastin pen̄ké tujinkiatame. Tura wi tajana nu, tsawant jeamtai túrunattawai.”

21 Nuna tumaj Yusa jeen aani pujusar, Sakaríasan nákas pujuarmiayi. “¿Urukamtaik init we imiá menkaka?” tu enentáimprarmiayi. 22 Nuyá Sakarías jiinkintai, áujsartaj tukamá tujinkiamiayi. Sakariáska, muut ajasu asa, aya úwijmiasañ chichamiayi. Túmakui, Sakarías init pujus Yúsaj wámiakun nekaawarmiayi.

23 Yusa jeen takastin tsawantrj amuukamta Sakaríaska ni jeen waketkimiayi. 24 Nuyá ukunam ni nuarj Irisapít ajaprukmiayi. Tura senku nantutin aya jeen pujusmiayi. 25 Jeá pujus, “Aents wishikruiniakui natsantan jurutki-tiaj tusa uchi takustinian Yus tsankatrukai” tu enentáimpramiayi Irisapít.

Jesusa akiiniatniurjñ nayaimpinmaya suntar etserkamiania nu

26 Nu senku nantu nankaasmatai Yus ni suntarjñ Kapriiran Nasarét péprunam akupkamiayi. Nu pepru Kariréa nunkanam pujawai. 27 Nasarénumiá nuwān, naari Marí, iyutí tusa akuptukmiayi. Nu núwaka áishmanjaj pujuchuyayi. Niisha Jusejaj nuatnaikiatsa anajmanair pujumiayi. Juseka uunt Tawit weeauyayi. 28 Wats, nayaimpinmaya suntar Marí pujamunam wayá tímiayi “Yus péñker enentáimturma asamtai, ámin winitjame, Mariya. Yuska ámin nemartamuk ashí nuwā nankaamas péñker awajtamui” tímiayi.

29 Tura Marisha nayaimpinmaya suntaran wániak, chichaamun nékatsuk “Urukamtaik tu chicháa” tu enentáimpramiayi. 30 Nuyá nayaimpinmaya suntar chicharuk tímiayi “Mariya, sapijmiakaip. Yus shiir enentáimturmawai. 31 Antukta. Amesha ajaprukatatme. Túram Uchi takustatme. Nusha “Jesus” anaikiata. 32-33 Niisha uunt átatui. Nincha “Uunt Nankaamaku Yusa Uchirj” tiartatui. Tura Uunt Yuska yaunchi Tawitian uunt akupniurj awajsamia núnisañ ame Uchirmin ame shuárumin Israer tutain Uunt akupin awajsat-tawai. Ni akupeamurjsha Yus susamu asa penké amuukashtiniaiti” tímiayi.

34 Nayaimpinmaya suntar nuna tutai Marí tímiayi “Nusha winia áishur atsajsha, ¿itiurak túrunataj?”

35 Tutai nayaimpinmaya suntar Marín tímiayi “Yusa Wakanj tarutramtatui. Tura yurañmia núnisañ Uunt Yusa kakarmarij ijirmattawai. Nu tuma asamtai Uchi akiiniattana nu Yúsajya asamtai, “Yusa Uchirjñti” tiartatui, tímiayi. 36 Tura Irisapít ame kaná kaimia nusha núnisañ weamtanam ajaprukai. Iis, “júrechuiti” tiarmia nu, yamaikia sais nantu pujawai ajamtin. 37 Yúsajñkia itiurchatka penké atsawai” tímiayi.

38 Tutai Marí tímiayi “Yus wakeramun túriniaitjai wikia. Ame tame nuna Yus wakerana nuna túrutati, tajai” tímiayi. Nuna tímiatai nayaimpinmaya suntarka wémiayi.

Irisapítian Marí iyumiania nu

39-40 Nu tsawant Marí wárikmas muranam Jutía nunkanam ni kaná kajñ Irisapítian iyutaj tusa wémiayi. Sakaríasaj jeá, ni jeen wayá, Irisapítian áujsamiayi.

41 Marí áujeamun antukmatai Irisapítia ampujéñ uchirj muchitkiamiayi. Tumaj Yusa Wakanj ni enentáin pimiutkamiayi. 42 Nuñkia kakantar chichaak Marin tímiayi “Yus amincha ti shiir awajtamsaiti. Tura Uchiram akiiniattana nusha Yus shiir awajsamuiti. 43 Kajrua, ame winia Uuntru nukurj áminin, Yus winia ti waitnentra asa, áujsata tusa ámin akup-tamkachaik, tímiayi. 44 Warí, wisha ame áujtamna nuna ántakui ampujrui

uchi waras muchitrukayi. ⁴⁵ Amesha Yus turámiania nu umikiu asam shiir pujame. Yus tímia nu túrunattawai auka” tímiaiyi.

⁴⁶ Nuna tinia iniaisamtai Marí júna tímiayi:

“Wikia tuke enentairjai “Yus timiá úntaiti” tajai. ⁴⁷ Tura Uunt Yuska winia Uwemtikruru asamtai ti waraajai. ⁴⁸⁻⁴⁹ Wisha péejchach aiñ ni wakeramurjñ umiktajtsan wakerakui winia enentáimturayi. Tuma asamtai ashí aents, “Marincha Yus shiir awajsaiti” tuke turutiartatui. Yuska imiá penker tura imiá kakaram ana nu winia ti uuntan túrutaiti. Tuma asamtai ashí aents “Marincha Yus shiir awajsaiti” turutiartatui. Núnaka yamáí nankamamunak tuke turutú ajartatui. ⁵⁰ Tura Nin umirkatniun wakerana nunasha Yus tuke waitnentrartatui. ⁵¹ Ti ituirchatan páchitsuk túraití Nii. “Nankaamantuitjai” tu enentáimtainia nuna nupetkaiti. ⁵² Ashí akupin ainia nuna awakkaruiti. Tura íksañ péejchach ainia nuna uunt awajsaruiti. ⁵³ Péñker ana nuna kitiainiakui Yus péñkeran súsaruiti. Tura antsu “ashí takakjai” tuinia nuna aya júñik awajsaruiti. ⁵⁴ Israer-shuar Niiniu ájinia núnaka waitnentratniun kajinmattsuk yáinmákuitji. ⁵⁵ Yaunchu ii Uuntrj Apraáman tura ní shuarnasha “túrattajai” timia nuna ímiatrusañ tuke túraití.” Nuní tímiayi Marí.

⁵⁶ Marikia Irisapítjai menaintiú nantu pujus ni jeen waketkimiaiyi.

Imiakratin Juaná akiiniamurj

⁵⁷ Nuyasha ni jurertin tsawantrj jeamtai Irisapítcha uchin áishmankan takusmiaiyi. ⁵⁸ Tura ni shuarjsha, ni írutramurjsha “Irisapítian Yus ti shiir yáinmiaiyi” tuíniak, nin iyuwearmiaiyi. Tura máí-metek warasarmiaiyi.

⁵⁹ Israer-shuar túrutai júñisaiti: uchi akiiniamurj uchu tsawant jeamtai, shunichirj nuapen tsupiktin awai, sirkunsisiún tutai. Yus nuna tú tiniu asamtai tuke túrin ármiaiyi. Wats, Irisapítia uchirj akiiniamurjñia uchu tsawant jeamtai tsupirkatai tusar ni jeen jearmiaiyi. Nuñkia ni aparj naarj Sakarías anaikiataitsar wakeriarmiaiyi. ⁶⁰ Tura ni nukurj tímiayi “Atsá. Antsu ni naarj Juan átatui.”

⁶¹ Tutai tiarmiaiyi “¿Nusha urukamtia? Amée shuarumsha nu náartincha áwak’ tiarmiaiyi. ⁶² Nuñkia uchi aparjñ “¿Warí anaikiatajtsam wakeram?” tusar aya úwejejaiñ iniasarmiaiyi.

⁶³ Tutai uchi aparjsha “Nakash surusta; áartaj tusan wakerajai” tusa aya úwejejaiñ iniakmamiayi. Takui nakash susam, ni naarj Juánkaiti, tu áarmiaiyi. Nuna wañkiar “Ayawá urukakuñ ta” tu enentáimprarmiaiyi. ⁶⁴ Nú chichamaik Sakarías chichatsuk pujamun chichakmiaiyi. Tura nuñ Yusa náarjñcha shiir awajsamiayi. ⁶⁵ Nuñkia ni írutramurjsha ashankarmiaiyi; tura ashí Jutía nuñka murá amia nuñ nu túrunamun ujakam ashí nekaawarmiaiyi. ⁶⁶ Nu túrunamun antukar ti enentáimsarmiaiyi. Tura “ju uchin Yus nekas pujurtsuk. Tuma asamtai uunt ajas ¿urukuk ati?” tu enentáimprarmiaiyi.

Sakarías Yus jintintiam tímiania nu

⁶⁷ Uchi aparj Sakarías, Yusa Wakaní pimiutkam tura Yus jintintiam, júna tímiayi:

⁶⁸ “Israer-shuartí ii Yusrj naarj shiir awajatsniuitji. Ii Yúsriisha tarutmitji. Tura uwemtikrampraitji. ⁶⁹ Yaunchu ii uuntrj Tawit Yusa wakeramurjñia uunt akupin áchamkia. Tura ni ukurjñ ti kakaram Uwemtikiartinian suramsaitji. ⁷⁰⁻⁷² Yuska ii nemasriya tura in

nakitramainiajnia nuyá uwentikrampratniun enentáimsamia nuna, yaunchu ni etserniurin péñker armia nuna ujakmiayi. “Winia ti penker chichamprun tájana nuna yapajitsuk umirkan tuke wáitnentratajrume” yaunchu ii úuntrin tímiania nunasha ni etserniurin ujakarmiayi. Yaunchu nu ujakma yamá iisha wainji. ⁷³⁻⁷⁵ Nu ujakman Yuska yámankamtaik imiá yaunchu ii uuntri Aprááman tíchamkia. Aprááman ujakmia nu júiti: “Wi wakeraj nútiksaran, Winia umirtukar péñker wekainia nuna ni nemasriya uwentikrattajai. Sapijmiatsuk winia tuke takartusarat tusan túrattajai” Yus tímiayi Aprááman. Iisha ni shuarj asakrin, nuna taku incha túramaji. ⁷⁶ Tura amincha, uchiru, “Uunt Yusna etserniuiti” turamartatui. Amesha ni tátintri iwirataj tusan Uuntaj émkim wétatme. ⁷⁷ Ni shuari, ni tunaari tsankurnar uwemprarat tusan túrattame. ⁷⁸⁻⁷⁹ Yuska ashí shuaran anea asa, incha wáitnentrak ni pujamunmaya ni tsáapnintrin suramsaitji. Ni enentáin kiritniunam wekainia nuna, mesertinnium jeatemá ásarmatai, ni tsáapnintri jeatⁱ tusa túraiti. Tura ashí incha ii enentáin imiatkinchanum wekasarmí tusa túraiti.” Nuní tímiayi Sakarías.

⁸⁰ Uchisha tsakarmiayi. Tura Yúsan nekaki-nekaki wémiayi. Israer shuar-num etserkatini tsawantri jeatsainkia atsamunam pujuyayi.

2

Jesusa akiiniamuri (Mateu 1.18-25)

¹ Wats, Juan akiiniamia nú uwitin uunt akupin Akustu ashí nunkanam áentsun nekapmarartí tu chichakmiayi. ² Nu nekapmartinian yaunchu túrushtain yamá túriarmiayi. Siria nunkanam Seriniu akupin pujái túrawarmiayi. ³ Ni naari áartaj tusa ashí shuar ni nunkenin wétin ármiayi. ⁴ Tuma asamtai Jusé Nasarét péprunmaya Kariréa nunkanam amia nuyá jiinki Piriñ péprunam Jutiá nunkanam amia nuí wémiayi. Juseka Tawit weeanam akiinia asa, ni nekas nunkenka Piriñkauyayi. ⁵ Nu asamtai, ni náarin áartaj tusa Jusé wémiayi Marijijai. Marisha Jusé núweyayi. Tura tsanincharuyayi. Túmaitiat Marisha Yusa Wakaní kakarmarijjai ajamtiniuyayi. ⁶ Tura nuí Piriñnum pujuiniaj Marí takustintri jeamiayi. ⁷ Nuí iwiairin uchin áishmankan takusmiayi. Tura uchi penutaijjai penuar, waaka yurumtainiam áepsamiayi. Írar kanutainiam pujustin ankant atsa asamtai túrawarmiayi.

Murikiun wáinnium nayaimpinmaya suntar Yus akatar akuptukmia nu

⁸ Tura Piriñnum tíjiuch murikiun wáinin kashi murikrin wáiniuk pujuarmiayi. ⁹ Túmainiaj nayaimpinmaya suntar murikiun wáinin matsatainian wantintiuksiayi. Tura Yúsnumiá tsáapnin ni matsatainiamunam etsantramiayi. Túrunamtai murikiun wáinniuka ti ashamkarmiayi. ¹⁰ Túrusha nayaimpinmaya suntar tímiayi “Ashamprukairap. Ashí áentsnum ti warastin atí tusan ti penker chichaman itiarjarme. ¹¹ Júiti: yamá tsawantaj uunt Tawitia péprurin Piriñnum yaunchu Yus anaikiamu KRISTU tutai, uwentikramprataj tusa akiinturmarme. Nu Uchisha ashí áentsun akupniuiti, tímiayi. ¹² Tura jujai nekaattarme: uchi penutaijjai penuarma waaka

yurumtainiam tepá wáinkiatarme. Nu wáinkiarum nekas júiti, tu nekaatarme.” ¹³ Nu chichamaik nayaimpinmaya suntar ti untsurí, nayaimpinmaya káunkarmiayi. Túrawar Yusa naarín shiir awajainiak júna tiarmiayi:

¹⁴ “Nayaimpinmasha Yus najkaamantuiti tu enentáimtusarti. Tura ju nunkanmasha Yusjaj nawamnaikiaru ainia nu imiatkinchanum pujusarti.” Tu tiarmiayi.

¹⁵ Tura Yusa suntari nayaimpiniam waketkiarmatai murikiun wáinin tiarmiayi “Wats, Pirinnum wárik wetái. Nu túrunamu Yus turamajnia nu iyumi” tiarmiayi.

¹⁶ Nuna tiar wárik wearmiayi. Tura Marincha Jusenchá wáinkiarmaiya. Tura uchinchá waaka yurumtainiam tepan wáinkiarmaiya. ¹⁷ Wear nuna wáinkiar, nayaimpinmaya suntar uchi túrunamurín tímia nuna etserkarmiayi. ¹⁸ Tura murikiun wáinin tiarmia nuna antukaruka ti enentáimtusarmiayi. ¹⁹ Túrasha Marikia ashí túrunamia nuna ni enentáijjainkia enentáimtu pujumiayi. ²⁰ Tura murikiun wáinniuka antukarmia nuna enentáimtusar, tura íisarmia nunasha enentáimtusar “Nayaimpinmaya suntar ujatmakmajnia tímiatrusan túrunayi” tiarmiayi. Tuma ásar Yusa náarin shiir awajsar kantampruawar waketkiarmiayi.

Uchin Jesusan Yusa Uunt Jeen itiarmania nu

²¹ Tura uchi akiiniamu uchu tsawant jeamtaí, ni túrutairín túrin ásar, ni shunichirí nuapen tsupirkarmiayi. Túrawar Marí ajapratsain nayaimpinmaya suntar tímia nútiksán “Jesus” anaikiarmiayi. ²² Tura Muisáis akiiniatniunam akupkamia núnisan, tsawantrí jeamtaí, Yusa Uunt Jeen Jerusarénum uchin Yus iiktustai tusar júkiarmiayi. ²³ Kame Yus-Papiniun jú aarma awai:

“Ashí uchi iwiajri áishman akiinkiuńka Yusna átatui.” ²⁴ Tuma asamtaí, Marí Yusa Uunt Jeen wáitsuk pujamu wayatniurí jeamtaí, uchin Yus iísti tusa Yusa Uunt Jeen Jerusarénum pujana nuí itiarmaiya. Tura yampitsan jímiaran súsarmiayi. Muisáis akupkamun umiiniak nuna túrawarmiayi.

²⁵ Nu túmaj Semeún naartin áishman Jerusarénum pujumiayi. Semeúnsha Yusa Wakani pujurma asa péńker áishmankauyayi. Yusan nekas enentáimtinuyayi. Yusa anaikiamuríjjai Israer-shuar ankant ajastin jeati tusa nákauyayi. ²⁶ “Winia anaikiamur KRISTU tutai wáintsuk jákashtatme” uunt Yusa Wakani tu jintintiamiayi. ²⁷ Nú Semeún Yusa Wakani “wetá” tutai, Yusa Uunt Jeen wémiayi. Tura nú tsawantaí Muisáis tímia núnisan umirkatai tusar Marisha Jusesha uchin Jesusan Yusa Uunt Jeen itiarmaiya. ²⁸ Itiariarmatai Semeún uchin jusa miniakas Yusan áujuk júna tímiayi:

²⁹ “Yamaikia, Uunta, Amín wi jeatin ankant atí. Turutmiamna nu ímiatrusmek umikiume. ³⁰⁻³¹ Ju Uchi ashí aents uwentikartá tusam susamna nuna yamá imia winia jiiirujai wáinkiajai. ³² Israer-shuarcha ainia nu tsáapniniun wekasarat tusa akuptukmaiti ju Uchi. Tura Israer-shuar Áminiuram ájinia nuna ashí aents shiir enentáimtikartí tusam ju Uchi akuptukmaiti. Nuna wáinkian shiir enentáimsan jákatniuitjai.”

³³ Tura Semeún Uchiniun tu chicharkui Jusesha Jesusa nukurísha ti enentáimprarmiayi. ³⁴ Semeúnsha chichaak “Yus shiir enentáimturmasartí” nin tímia. Nuyasha Marin chicharuk tímia “Nekaata. Ju Uchin Israer-shuartisha untsurí nakitrar iniarartatji. Tura chíkich Israer-shuartikia ju Uchin shiir enentáimtusar ti wararsartatji. Tura Uchiram Yusa kakarmarín

ti paant iniakmastatui. Tuma ain untsurí Aun yajauch chichariartatui. ³⁵ Nujai shuar ni enentáin warinia enentáimia nu, paant átatui. Maaj, ashí nu túmakui, ijiumua núnismek ame enentáimin ti wáitsattame, Mariya.” Tu chichasmiayi Semeún.

³⁶ Nuwasha Ana naartin nuí Yusa Uunt Jeen pujumiayi. Niisha Yúsnan etserniuyayi. Ni aparísha Panuíruyayi tura Aser shuarauyayi nu nuwa. Niisha ti úuntchiyayi. Niisha yama nuatnaikiamujai siati uwi ni áshrijiai tsanin pujusarmiayi. ³⁷ Tura wajemamiayi. Tura uchenta kuaru uwi takakuyayi. Tura ninkia Yusa Uunt Jeenia jíintsuk káshisha tsawajsha tuke Yúsan áujniuyayi. Tura yurumtsuk Yúsan áujniuyayi. ³⁸ Semeún tuasua amikmatai Anasha taa, Uchin wáiniak Yúsan yuminsamiayi. Tura Jerusarénum Yus uwentikrampratai tusa nákarmia nuna áujkunka uchin áujmat wémiayi.

Nasarénum waketiarmiania nu

³⁹ Nuyá Yus tímia nuna ashí túrawar amikiar Kariréa nuñkanam, kame nii pujumia nú peprunam Nasarénum Jusesha Marisha Uchisha waketiarmiayi. ⁴⁰ Uchi Jesus tsakaki, kakaram ajaki tura nú nankaamas nekaki wémiayi. Tura Yus Nin ti shiir awajsamiayi.

Jesus Yusa Uunt Jeen túrunamuri

⁴¹ Jusesha, Jesusa nukurísha tuke uwitin paskua námper jeakui Jerusarénum weu ármiai. ⁴² Ni túrutairi túruiniak, Jerusarénum weak Jesusan tuse uwi jeamtai júkiarmiayi. ⁴³ Námper amuukamtai ni nukurísha Jusesha nékachmanum Jesuska Jerusarénum juákmiai. ⁴⁴ Marisha Jusesha “wí shuarjai winiawai” tusa, núnaka eátsuk chikichik tsawant wekasarmiayi. Nuyá wáinkiataj tukamá, ni shuarin tura ni nékamunam eakarsha, ⁴⁵ wáinkiacharmiai. Nuinkia Jerusarénum ataksha waketruiarmiayi, eaktai tusar. ⁴⁶ Tura menaintiú tsawant eakar Yusa Uunt Jeen Yus akupkamun jintinnian anturak anintrú pujan wáinkiarimiayi. ⁴⁷ Tura nuí ashí Jesusan anturkarmiania nu, niisha ti nékakui tura áimtanash ti péñker áimkiui, ti enentáimturarmiayi. ⁴⁸ Ni aparísha nukurísha tumáa pujan wáinkiar, ti enentáimprarmiayi. Tura ni nukurí chichaak tímiai “Uchiru, zausha urukamtai itirchat enentáimtikruram? Ame apasha wisha urukayik tusar ti eakjame” tímiai.

⁴⁹ Tutai Jesus tímiai “¿Urukamtai eátrum? Winia Aparnan túratniuitjana nuka nékatsrumek” tímiai.

⁵⁰ Tura tímia núnaka penké nekaacharmiayi. ⁵¹ Nuyá Jesus niijjai Nasarénum waketiarmiayi. Ninkia tuke umiriarmiayi. Ashí nu túrunamun Marikia tuke enentáimtu pujumiayi. ⁵² Jesuska tsakaki, tura nekaki wémiayi. Yussha tura aencha Nin shiir enentáimtiarmiayi.

3

Imiakratin Juanka etserkamuri

(Mateu 3.1-12; Márkus 1.1-8; Juan 1.19-28)

¹ Tipiriu uunt akupin pujamu kinse uwi jeamtai, Jutía nuñkanam Punseu Piratu akupin pujumiayi. Tura Kariréa nuñkanam Erutis akupin pujumiayi. Itiurea nuñkanmasha Trakuniti nuñkanmasha ni yachi Jiripi akupin pujumiayi. Tura Apirinia nuñkanam Risania akupin pujumiayi. ² Tura nu uwitin Anasha Kaipíassha Israer-patri uuntri pujuarmiayi. Nu uwitin Sakariasa uchirí Juan atsamunam pujan Yúsaiya chichaman antukmiayi.

³ Nuyá Jurtañ entsanam supichik matsamarma nuna Juan wekaatusar juna tímiayi “Winia tunaarun Yus tsankurturat tusarum, enentai yapajjárum imi-antiarum.” Tu ujakmiayi. ⁴ Nu ujakman Isayas yaunchu juna áarmiyai:

Atsamunan wekaana nu untsunun ántuiniawai. Nii untsunuk juna tawai: Atumí enentái Uunta jinti iwiarturtarum; naka awajsatarum. ⁵ Jápaaka ainia nusha áimkiamu arti. Naint ainia nusha paka awajsamu arti. Jintia apijiaru ainia nusha naka jikmia arti. Tura pujutrin ainia nusha métekrak paka awajsamu arti. ⁶ Túrunamtai ashí nunkanmaya aents Yúsaiya uwempratin aan nekaawartatui.

⁷ Untsurí aents imiatit tusar tariarmia nuna Juan chicharainiak tímiayi “Napia áaniutirmincha, ti asutniátin jeatemáttana nuyá uwempratarum tusa çya ujatmakuram? tímiayi. ⁸ “Iikia Apraám weeitji, tuma asakrin Yus shiir enentáimturmaji” tu enentáimtumaisairap. Antsu enentáim yapajjámuikuiunkia péñker wekaamurmjjai paant iniakmatarum. Warí, Yus wakerakka, ju kayan Apraáma shuarin páchitsuk najankainti, tímiayi. ⁹ Aneartarum. Numi ajaktinian kampuwárin jacha atuttsamuiti. Numi péñker nereatsna nuka ajakar jinium apeamu ártatui” tímiayi.

¹⁰ Tutai aentska enentáimprar “¿Nuiunkia itiurkatjik?” tiarmiayi.

¹¹ Tutai Juan tímiayi “Jimiará pushin takakna nu, takaktsuna nuna chikichan súsatniuiti. Yurumkan takakna nusha takaktsuna nuna ajamsatniuiti” tímiayi.

¹² Uunt akupniu kuítrjin juu armia nú shuar imiantiaj tusar Juáñkan weriar aniasarmiayi. “Uunta, çiiisha warí itiurkatjik?” tiarmiayi.

¹³ Tutai Juan tímiayi “Kuit uunt akupin tana nu iniankasrum achikiairap.”

¹⁴ Suntarsha aniasarmiayi “Uunta, çiiisha warí itiurkatjik?”

Juansha tímiayi “Ame kakarmarmjjai chikichna jurukip. Tura nin tsanumpruraip. Tura uunt akupin akirmana nújain warasta” tímiayi.

¹⁵ “Ju Juan Yusa anaikiamurinchuashit” tu enentáimsar paant nekaataitsar nákarimiayi.

¹⁶ Tumai Juan tímiayi “Wikia aya ayashmin entsanam imiajrume. Tura wijiai nankaamas ana nu tátatui. Ni sapatrj jinkiamurinkisha atitrach-miniaitjai. Niisha taa, imiantinia áanis tura jiiya áanis Yusa Wakanin enketramprattarme. ¹⁷ Shuar aruusan awajtia núnisán, nusha yajauch ana nuna ajapa aya péñkernak júuktatui. Neren ikiustatui tura yajauchinkia ji tuke kajinchatainiam apeattawai” tímiayi.

¹⁸ Juan nu arant shiir chichaman áentsun ti núkap ujakarmiayi. ¹⁹ Tura nuyasha akupin Erutisan chicharkamiayi. Ni yachi Jiripi nuarin Jirutásan kasararak nuatkui tura chikich yajauchincha túrakui chicharkamiayi. ²⁰ Tura Erutis núnaka ántutsuk chikich yajauchin túramiyai. Juáñkan achik sepunam enkeamiayi.

Jesusa imianmiari

(Mateu 3.13-17; Márkus 1.9-11)

²¹ Nu túruntsain, Juansha ashí nú nunkanmaya áentsun imiak pujurainaj Jesusha imianmiayi. Niisha Yusan áujuk pujañ nayaimpisha uranmiayi.

²² Tura Yusa Wakaní yámpits najanar paant tarurmiayi. Tura Yus nayaimp-inmaya chicharuk “Amek winia aneamur Uchiruitme; Ámin ti wararjame” tímiayi.

Jesukrístu shuari
(Mateu 1.1-17)

²³ Jesus trainta (30) uwí takaku asa ni takatrĭn nanĭkamamiayi. “Jusé uchirĭnti” tiniu armiyayi. Jusésĥa Iriá uchirĭiyayi. ²⁴ Irĭsha Matata uchirĭiyayi; Matat Riwĭ uchirĭiyayi; Riwĭ Mirkĭa uchirĭiyayi; Mirkĭ Jana uchirĭiyayi. Jana Jusé uchirĭiyayi; ²⁵ Jusé Matatĭasa uchirĭiyayi; Matatĭas Amusa uchirĭiyayi; Amus Najuma uchirĭiyayi; Najum Esrĭ uchirĭiyayi; Esri Nakaia uchirĭiyayi; ²⁶ Nakai Maata uchirĭiyayi; Maat Matatĭasa uchirĭiyayi; Matatĭas Semái uchirĭiyayi; Semái Jusé uchirĭiyayi; Jusé Jutáa uchirĭiyayi; ²⁷ Jutá Juana uchirĭiyayi; Juana Resa uchirĭiyayi; Resa Surupapira uchirĭiyayi; Surupapir Saratiira uchirĭiyayi; Saratiir Nerĭ uchirĭiyayi; ²⁸ Nerĭ Mirkĭ uchirĭiyayi; Mirkĭ Atĭ uchirĭiyayi; Atĭ Kusama uchirĭiyayi; Kusam Irmutam uchirĭiyayi; Irmutam Ira uchirĭiyayi; ²⁹ Ir Jusué uchirĭiyayi; Jusué Irieséra uchirĭiyayi; Iriesér Jurema uchirĭiyayi; Jurem Matata uchirĭiyayi; ³⁰ Matat Riwi uchirĭiyayi; Riwĭ Semeúnka uchirĭiyayi; Semeún Jutáa uchirĭiyayi; Jutá Jusé uchirĭiyayi; Jusé Junańka uchirĭiyayi; Junań Iriakĭmia uchirĭiyayi; ³¹ Iriakĭm Mirea uchirĭiyayi; Mirea Mainiánka uchirĭiyayi; Mainián Matata uchirĭiyayi; Matata Natánka uchirĭiyayi; ³² Natan Tawitĭa uchirĭiyayi; Tawit Isái uchirĭiyayi; Isái Upitia uchirĭiyayi; Upit Puusa uchirĭiyayi; Puus Saramúnka uchirĭiyayi; Saramún Naasúnka uchirĭiyayi; ³³ Naasun Aminiatapa uchirĭiyayi; Aminiatap Arama uchirĭiyayi; Aram Esruma uchirĭiyayi; Esrum Paresa uchirĭiyayi; Páres Jutáa uchirĭiyayi; ³⁴ Jutá Jakupa uchirĭiyayi; Jakup Isaka uchirĭiyayi; Isak Apráama uchirĭiyayi; Apráam Tarea uchirĭiyayi; Taré Nakura uchirĭiyayi; ³⁵ Nakur Seruka uchirĭiyayi; Seruk Rakaua uchirĭiyayi; Rakau Pirikĭa uchirĭiyayi; Pirik Epera uchirĭiyayi; Eper Sará uchirĭiyayi; ³⁶ Sara Kainiánka uchirĭiyayi; Kainián Arpaksata uchirĭiyayi; Arpaksat Sema uchirĭiyayi; Sem Nuaiia uchirĭiyayi; Nuai Ramikĭa uchirĭiyayi; ³⁷ Ramik Matusarĭnkĭa uchirĭiyayi; Matusarĭn Euka uchirĭiyayi; Euk Jaritĭa uchirĭiyayi; Jarit Maararĭira uchirĭiyayi; Maararĭir Kainiánka uchirĭiyayi; ³⁸ Kainián Enusa uchirĭiyayi; Enus Seta uchirĭiyayi; Set Atánka uchirĭiyayi; tura Atań Yus najanamuyayi.

4

Jesusa nekapsamuri
(Mateu 4.1-11; Márkus 1.12-13)

¹ Jesusa enentáin Yusa Wakanĭ pimiutkamiayi. Jesussha Jurtan entsanmayá waketkimtai Yusa Wakanĭ aents atsamunam jukimiayi. ² Tura nuńsha kuarenta tsawant pujusmiayi. Tura íwianĥ Nin tunaanum ajuaraintajtai tusa pujurmiayi. Nu kuarenta tsawantĭn Jesus yurumsuk pujá asa ti tsukammiai. ³ Nuńkĭa íwianĥ chicharuk “Amesĥa nekas Yusa Uchirĭntkiunka ju kaya apatak najanata” tímiayi.

⁴ Tutai Jesus tímiayi “Yus-Papĭ tawai: “Aya apatkujain shuar iwiaaku pujuschamniaiti. Antsu ashĭ Yus-Chicham tana nujai nekas iwiaaku pujusminiaiti,” tawai” tímiayi.

⁵ Tura nuyá íwianĥ naint yakĭ wájakmanum jukĭ, ashĭ nuńka ainia nuna ju chichamaik iniaktusmiayi. ⁶⁻⁷ Tura chicharuk tímiayi “Ashĭ ju nuńka wáinmena nu wńiaitai. Tura wi wakerajna nú shuaran súsatniuitjai. Tuma asamtai tikishmatrurakminkĭa ju nuńkanam ashĭ akupkatniun susattajme. Tura nuĭ ni warirĭ ainia nusha áminiu átatui” tímiayi.

⁸ Tutai Jesus tímiayi “Yus-Papí tawai:

“Aya Niñki Yus ame Úntrum tikishmatram enentáimtustiniaitme.”

Tau asamtai, werumta, iwianchi” tímiayi.

⁹ Ataksha íwianch Jesusan Jerusarén péprunam jukimiayi. Tura Yusa Uunt Jee yakiini iwiak tímiayi: ¹⁰ “Yus-Papí tatsuk:

“Yuska ni suntarín wáinkiatá tusa akupturmaktatui. ¹¹ Kayanam ajintraín tusa wenkurmaktatui.”

Tuma asamtai nekas Yusa Uchirínkiumka juyá akaikim iniaata” tímiayi.

¹² Tutai Jesus áimiuk tímiayi “Yus-Papí junasha tawai:

Yus ame Úntrum nekapsataj tiip.”

¹³ Tuma asamtai íwianch penké tujintiak ishichik tsawant Jesusan ini-aisamiayi.

*Kariréa nunkanam Jesus ni takatrín nankamamiania nu
(Mateu 4.12-17; Márkus 1.14-15)*

¹⁴ Jesus ni enentáin Yusa Wakaní kakarmarij pimiutkamu ajas Kariréa nunkanam waketkimiayi. Nu nunkanam nankaamantu túramurín áujmatiarmiayi. ¹⁵ Nu nunkanam ashí péprunam Israer-shuar iruntai jea armia nuí unuiniarmiayi. Tura anturkarmia nuka ni náarin shiir awajsarmiayi.

*Jesus Nasarénum pujumiania nu
(Mateu 13.53-58; Márkus 6.1-6)*

¹⁶ Ni tsakarmariin Nasarénum Jesus wémiayi. Tura Israer-shuar ayam-pratin tsawantin iruntai jeanam wayamiayi, tuke turin asa. Tura wayá Yus-Papin újsataj tusa wajakmiayi. ¹⁷ Nuñkia Yúsnan etserin Isayasa áarmarin súsarmiayi. Nuna urak, nuí juna áarman wáinkiamiayi:

¹⁸ Yusa Wakaní winí pujurtawai. Shuar warainiachun shiir chichaman ujaktinian anaitiukuiti. Kúntuts enentáimiar wake mesek pujuinian tsuártinian akuptukuiti. Tura jii kusuruncha íimtiktinian, tura ya-jauch awajsamu ainia nuna péñker awajsatniuncha, ¹⁹ tura Uunt Yus, shuáran yaiñtin tsawantrí jeán etserkatniuncha akuptukuiti.

²⁰ Nu áarman aujsua amik papin nukukmiayi. Tura iruntai jeanam yáimin pujan susa iniais Niñkia etserkataj tusa pujusmiayi. Tura ashí shuar pujuarmia nu émamkes ii pujuarmiayi. ²¹ Jesussha chicharuk tímiayi “Yus-Chicham yamá antukurmena nu yamá tsawantin túrunayi.”

²² Jesusan ashí péñker áujmatiarmiayi. Tura Jesus ti shiir chichaakui ti enentáimprar “Juka Jusé uchirínchukait” tiarmiayi. ²³ Tu enentáimiaiakiui, Jesus chicharuk “Atumsha shuar tuke tuinia núnisrumek, “tsuákratniuitkiumka amek tsuámarta,” turuttiatrume. Kapernáum péprunam aentsti túrachmin túramamna núnismek juísha túrata tusarum nu turuttiatrume. ²⁴ Túrasha nekas tájarme, Yúsnan etserniun ni nunkenkikia nii tana nuna anturainiatsui.

²⁵ Nuyasha tájarme, Irías pujumia nú tsawantin, menaintiú uwí nankaamas yumí yutukcha asamtai ashí Israer núñkanam ti tsuka amia nuí ti untsurí waje irunmiayi. ²⁶ Tuma ain nu wajen yaiñti tusa Yus Iríasan akuptukchamiayi. Antsu chíkich nunkanmaya wajen Sarepta péprunam pujumia nuna yaiñti tusa akuptukmiayi. Sarepta pepru Sitiún péprunam tíjiuch pujawai.

²⁷ Núnisan ii nunqesha Iriséu pujumia nu tsawantin ti untsurí tunamaru iruniarmiayi. Tura núnaka tsuárcharmiayi. Antsu chíkich nunka, Sírianmaya Naamañkan tsuármiayi” tímiayi Jesus.

²⁸ Israer-shuarsha iruntai jeen pujuarmia nu, nuna antukar ti kajerfarmi-
ayi. ²⁹ Tura wajatkjar Jesusan jiiiki péprunmaya akupkarmiayi. Tura pepru
amia nu_i naint yakí nan₁katkamunam, nuyá akaki ajuatai tusar júkiarmiayi.
³⁰ Túrasha Jesuska irunar matsatainiamunman₁ etempraktak jiinki wémiayi.

Iwianchrukun Jesus tsuármiania nu
(Márkus 1.21-28)

³¹ Nuyá Jesus Kariréa nun₁kanam Kapernáum pepru amia nu_i wémiayi.
Tura Israer-shuara ayampratin tsawantrii₁n tuke etserki wémiayi. ³² Yusa
kakarmar₁n takaku asa nujai₁ etserkamiayi. Tuma asamtai “Yusa kakar-
marjijai₁ unuitiamtsujik” tiar ti enentáimprarmiayi.

³³ Chikich tsawantaj₁ áishman₁ iwianchruku Israer-shuar iruntai jeanam pu-
jumia nu untsumuk tímiayi, ³⁴ “Inikiartusta. Iikia Áminkia pachistin nakitijai.
¿Warí, incha amukratkataj₁ tusam táchamek? Wikia nékajme. Ámeka ti pen₁ker
Tunaarincha núitme” tímiayi.

³⁵ Tutai Jesus iwianchin kakantar chicharuk “Takamatsata. Ju áishman₁
ikiuktia” tímiayi.

Tutai nu chichamaik íwianch áishman₁numiá jiinki weak nun₁ká ajuant
ikiukmiayi. Túrasha nekas yajauch awajtsuk ikiukmiayi.

³⁶ Ashí pujuarmiania nu ti enentáimiar mai tunai ajar₁miayi. “¿Jusha warí
chichamait? Ju áishman₁ Yusa kakarmarjijai₁ iwianchin jiiiki awematsuk”
tiarmiayi.

³⁷ Tura ashí nú nun₁kanam Jesusa túramur₁n áujmatiar₁miayi.

Semun₁ Pitru tsatsar₁n Jesus tsuármiania nu
(Mateu 8.14-15; Márkus 1.29-31)

³⁸ Jesussha Israer-shuara iruntai jeeniá jiinki Semun₁ka jeen wémiayi.
Semun₁ka tsatsar₁ tsuer ti jáamiayi. Ti jaakui Jesusan “tsuárturtá” tiarmiayi.
³⁹ Jesussha jaa tepan tsunsumprua tsuemun “michatrata” tímiayi. Tutai
nú chichamaik nuwasha michatramiayi. Nú chichamaik nantaki nincha
ayurawarmiayi.

Untsur₁ jaan Jesus tsuármiania nu
(Mateu 8.16-17; Márkus 1.32-34)

⁴⁰ Etsa akaikín aj ni shuar₁ nan₁kamas sunkurjai₁ jaarmia nuna Jesu-
san ikiaatkarmiayi. Jesussha jáiniam chikichkiniak chikichkiniak uwejejai₁
antiñkiar tsuáarmiayi. ⁴¹ Ti untsur₁ iwianchruku armia nunasha iwianchr₁n
jii₁rkarmiayi. Jiinkiar íwianchkia untsumainiak “Ámeka Yusa Uchir₁nme”
Jesusan tiarmiayi. Tura niisha “Jesuska Yusa anaikiamur₁inti” tu nékainiakui
Jesus kakantar chicharak itiatmamtiarmiayi.

Kariréa nun₁kanam Jesus etserkamiania nu
(Márkus 1.35-39)

⁴² Kashin káshik tsawaak Jesus péprunmaya jiinki atsamunam Nin₁ki
wémiayi. Tura shuarsha eak₁iar ni pujamunam jeariarmiayi. Tura iijjai₁
tuke pujusat tusar emetataitsar wakeriarmiayi. ⁴³ Túmain₁ Jesus tímiayi
“Yus ii enentáin akupkatajtsa wakera nú shiir chichaman chikich péprunam
matsatainia nunasha ujaktinai₁tjai. Nu túrata tusa akupkamuitjai” tímiayi.
⁴⁴ Tuma asamtai Kariréa nun₁kanam Israer-shuar iruntai jeenam Jesus tuke
etserki wémiayi.

5

*Namakan ti untsurín achikiarmiania nu
(Mateu 4.18-22; Márkus 1.16-20)*

¹ Chíkich tsawantaj Jesus Jinisarít antumianka tutainium káanmatkari pujaj ti untsurí shuar, Yusa chichamen antuktai tusar wakeruiniak Jesusaj káunkarmiayi. Antuktai tusar wakeruiniak kaę ajattsarmiayi. ² Tura jimiara kanun antumiankan káanmatkarijn tepan wáinkarmiayi. Ni nérenniurjnkia jinkiar ni nekarjn niija pujuinia asamtai kánuka ankant ármiayi. ³ Tuma asamtai Jesus Semunka kanurjn enkempramiayi. Tura Semunkan chicharuk “Ishichik ajapén juruktía” tímiayi. Nuñkia kanunam enkemas áentsun káanmatkanam pujuinian unuiniamiayi. ⁴ Unuiniasua amik Semunkan chicharuk “Kanu kunanam jukim neka aj ajunkatarum” tímiayi. ⁵ Tuta Semun tímiayi “Túrasha, Uuntá, káshisha tuke ajų-junkuar tsawarji. Túrasha penkė achikchaji. Kame áankisha Ame támajaj ajunkatjai” tímiayi. ⁶ Tura ajunkar namakan ti untsurjn achikiarmiai. Túram nekasha jaanaki wémiayi. ⁷ Tuma asamtai ni írútkamurjn chíkich kanunam pujuinian uwejėjaj “winitia, yáintkiarniuram” tusar untsukarmiayi. Niisha táarmiayi. Túrawar jimiara kanunam métej awajsarmiayi. Tura kanusha init wayastatuk ajamiayi. ⁸ Nuna túramtai Semun Pítur Jesusan tikishmatar tímiayi “Uuntá, wikia ti tunaitjai. ¿Wíjjiaisha itirak pujustam?” ⁹ Semunsha ni írútkamurjijaj namakan timiá untsurjn wáinkiar ashamkarmiayi. Tuma asa Semunsha nuní tímiayi. ¹⁰ Tura Sepetéu uchirj Jakupusha Juansha Semunjaj pujuarmia nusha ashamkarmiayi. Tura Jesus Semunkan tímiayi “Ashamkaip. Yamaikia namaka-achinia áintsamek aents-ęau ajastatme.” ¹¹ Nuyasha kanurjn kukar júkiar, ashí takakmarjncha ikiukiar Jesusan nemarki wearmiayi.

*Tunamaru áishmankan Jesus tsuármiania nu
(Mateu 8.1-4; Márkus 1.40-45)*

¹² Ukunam Jesus chíkich péprunam pujaj tunamaru áishman taa Jesusan wáiniak tikishmatar nuñká shushuma pankái Jesusan tímiayi “Uuntá, wakerutakmeka páchitsuk tsuáramniaitme.”

¹³ Nuna tutai Jesus antjn tímiayi “Wakerajai. Tsuaajme.” Tura nú chichamaik tunamarusha péñker ajasmiayi. ¹⁴ Túrasha Jesus chicharuk “Ámeka nu etserkaip, tímiayi. Antsu Israer-shuar Patrij werim ame péñker ajasmanum Muisáis akupkamia núnismek susata. Nujaj ashí shuar ame péñker ajasmarmin nekaawartatui” tímiayi.

¹⁵ Tura Jesusa túramurj ti etsernamiayi. Túmakui untsurj aents anturkatakaj tusar káutkarmiayi. Tura ni sunkurjncha tsuámartaj tusar káutiarmiayi.

¹⁶ Núnisan Jesuska aents atsuiniamunam we ni Aparjn áujmiayi.

*Emearun Jesus tsuármiania nu
(Mateu 9.1-8; Márkus 2.1-12)*

¹⁷ Chíkich tsawantaj Jesus unuiniak pujaj Pariséu aents tura Israer-shuara jintinniurjsha Kariréa péprunmayasha, Jutia péprunmayasha tura Jerusarėnnumiasha káunkarmia nu antúu pujuarmiayi. Jaa tsuártinian Yusa kakarmarjn takakuyayi Jesus. ¹⁸ Nuñkia emearun tampumpuera kuaru shuar itiararmiayi. Jesus pujamunam init awayattsar wakeriarmiayi. ¹⁹ Tura shuar ti untsurj piaku asamtai wayamnia atsumiayi. Túmaitkui yakiinj wear jean urakar, aents kaę ajas matsatmanum Jesus pujamunam

emēarun tampunam nená itiararmiayi. ²⁰ Nin itiarmania nu, Jesus Yusa kakarmar̄in takakui, tú enentáimtamun Jesus nekáa em̄earun tímiayi “Ame tunaarum tsankuramuitme.”

²¹ Nuñkia Israer-shuara jintinniur̄isha, Pariséusha ni enentáin enentáimsar “¿Yusha yait Yúsa náar̄in yajauch awajtin? Warí, aya Yúsak tunaan tsankurachminkiait” tu enentáimsarmiayi.

²² Tura Jesus ni enentáimsamur̄in nekáa tímiayi “¿Urukamtai tú enentáimprarum átum? ²³ Nuñkia ¿warí imiá yúpichuchit, tsuártiniak, ni tunaar̄i tsankuratniuk? ²⁴ Wats, Aents Ajasu tutai Wissha tunaan tsankuratniun Yusa kakarmar̄in takakjai. Jujai nekaatarum tusan wats itirchat tárumna nuna túrattajai.” Nuyá em̄earun chicharuk tímiayi “Amesha wajakim, tampuram achikiam ame jēemiin wetá.”

²⁵ Nú chichamaik em̄earu niisha ímiainiamunmañ tampur̄in achik wajaki ni jēen Yúsan wararki wémiayi. ²⁶ Túmakui ashí shuar ti enentáimprar Yusa náar̄in shiir awajsarmiayi. Tura ashamainiak “aentsti tujinkiamu yamá wáinkiaji” tiarmiayi.

Riwin Jesus untsukmania nu

(Mateu 9.9-13; Márkus 2.13-17)

²⁷ Ukunam Jesus wekas akupniu kuítr̄in-juu, naar̄i Riwi, ni chíkich naar̄i Mateu, akupin akitiai jēenam pujan wáinkiamiayi. Wáiniak “nemartusta” tímiayi. ²⁸ Tutai Riwi wajaki takakmar̄inkia ikuak Jesusan nemarsamiayi.

²⁹ Nuyá ukunam Riwi namperan Jesusan najatamiayi. Tura antsuri akupniu kuítr̄in-juu tura chíkich shuarsha káunkar misanam pujuarmiayi. ³⁰ Tura Pariséusha Israer-shuara jintinniur̄isha Jesusan tsanumpruiniak Jesusa unuiniamur̄in tiarmiayi “¿Maaj, urukamtai atumsha akupniu kuítr̄in-juu ainia nújaisha tura chikich yajauch shuarjaisha iruntrarum yurumprum?”

³¹ Tutai Jesus áimkiamiayi “Shuar jaachu péñker ainiana nu ¿tsuákratniun atsumainiawak? Antsu jaa ainia nu tsuákratniun atsumainiawai. ³² “Wikia péñkeraitjai” tuinia nuna untsuktajsan táchaitjai. Antsu yajauch shuar ni enentáin yapajía Winia ajasat tusan untsujajai” tímiayi.

Yurumtsuk Yus áujsatniun Jesusan aniasarmiania nu

(Mateu 9.14-17; Márkus 2.18-22)

³³ Nuyá Jesusan aníak tiarmiayi “Juan̄ka unuiniamur̄isha, Pariséu unuiniamur̄isha yurumtsuk Yúsan áujainiatsuk. Tura ame unuiniamurmeka ¿urukamtai ijiarma Yúsan áujainiatsu?” tiarmiayi.

³⁴ Tutai Jesus tímiayi “Nuatma nampernum, ¿ipiaamu ainia nu ijiarmamniakait, yamá-nuatu pujaj? ³⁵ Atsá. Wats Wissha ukunam junaktiatjai; nuñkia ijiarmatin átatui” tímiayi.

³⁶ Tura junasha nujai métek-taku unuiniamiayi: “¿Yamaram pushí tsupikiar nujai arut pushiniam anujtukminkiait? Nu túramka yamaram pushí yajauch ajasaintui; túrasha shiir anujkam arut pushijjai mai metek yamaram wáinkiachminiati. ³⁷ Núnisan nijiamanch yamá nawamu nuap najanam arutnum yaraachminiati. Túramka nijiamanch kariak ijiakratniuiti; túmak nijiamchisha nuap najanamusha mai metek menkainiawai. ³⁸ Tuma asamtai nijiamanch yamá nawamu yamaram nuap najanamunam yaraatniuiti. Nu túramka mai metek péñker átiniaiti. ³⁹ Yaunchu nawamu úmana nuka yamarman nakitrattui. “Yaunchu nawamu imiá péñkeraiti” tiártatui” tímiayi Jesus.

6

*Ayampratin tsawantaj trikiu neren achikiarmiania nu
(Mateu 12.1-8; Márkus 2.23-28)*

¹ Ayampratin tsawantaj Jesússha unuiniamurijjai araamunam wekasar, unuiniamurisha trikiu neren majurkutak wekainiarmiayi; tura tishisar neren yuawarmiayi. ² Nuna túruiniakui Pariséu tiarmiayi “Maaj, atumsha ayampratin tsawantaj takaschatniua nu, ¿urukamtai takaarum?”

³ Takui Jesus ayak tímiayi “Yaunchu uunt akupin Tawitcha tura nemarniusha tsukamainiak túrawarmia nu ántichukaitrum. ⁴ Tawit Yusa Jeen wayá, Yus iniaktusma tantan yuámiayi; tura nemarniuncha ajamsamiayi. Tura nu tantancha aya Israer-shuara Pátriri yúatin ármiai. Tuma aın Tawitcha yajauchin túrutsuk achikmiayi, tímiayi. ⁵ Wisha Aents Ajasuitkiun ayampratin tsawantan Nérenniurıntjai” tímiayi Jesus.

*Shuara uweje jakaan Jesus tsuármiania nu
(Mateu 12.9-14; Márkus 3.1-6)*

⁶ Chíkich ayampratin tsawantaj Israer-shuar iruntai jeanam Jesus wayá unuinartasa nankamamiayi. Nuı shuar uweje untsuurja nu jakaa pujumiayi. ⁷ Tura Israer-shuara jintinniurisha, Pariséusha Jesusan “yajauch túrayi” titiai tusar wakeruiniak, “ju ayampratin tsawantaj nu shuaran tsuártimpiash” tusar ii pujuarimiayi. ⁸ Túrasha Jesuska ni enentáimmiarın nekariarmiayi. Túmayat uweje jakaan chicharuk “Juı ajapén wajasta” tímiayi. Tutai áishman ajapén wjasmiayi. ⁹ Nuıkia iruniarmiania nuna Jesus tímiayi “Enentáimpratarum. Ayampratin tsawantaj yajauch túratin, péıker túratniujai ¿tuá péıkerait? ¿Uwentikratin, máatniujajisha tuá péıkerait?” tímiayi. ¹⁰ Nuyá téntakarmia nuna iis áishmankan tímiayi “Uwejem takuitia.” Áishmansha uwejen takuimtai nú chichamaik péıker ajasmiayi. ¹¹ Tura chíkichkia ti kajerkarimiayi. Túrawar “Jesus warı itıurkamniakıt” tusar aniniaisarmiayi.

*Tuse unuiniamun Jesus anaikiarmiania nu
(Mateu 10.1-4; Márkus 3.13-19)*

¹² Nuyá Jesus Yúsan áıjsataj tusa náınnium wakamiayi. Tura nu kashi Yúsan au-ajkua tsawarmiayi. ¹³ Tsawarmatai unuiniamurın ikiankar tuse anaikiamiayi. “Winia akatramuruıtrume” tímiayi. ¹⁴ Ju ármiai: Emka, Semun chíkich naarı Pıtiur apujtusmia nu; tura nuyá ni yachı Antres, Jakupusha, Juansha, Jiripisha, Parturumısha, ¹⁵ Mateusha, Tumassha, Arpeu uchiriı Jakupusha, Ásump Semunsha, ¹⁶ Jakupu yachı Jútassha, tura Jútas Iskariúti Jesusan ukunam surukmia nu. Nu tuse achikma ármiai.

*Untsurı shuaran Jesus yáııkiarmiania nu
(Mateu 4.23-25)*

¹⁷ Niıjjai Jesus náınniumıa pakanam taawarmiayi. Nuı pujusarmiayi. Nuısha untsurı unuiniamurısha, tura Jútıa nunkanmaya, tura Jerusarėnnumıa tura nayaantsanam ayamach Tiru, tura Setun péprunmaya ti untsurı aents antuktaitсар pujuarmiayi. Jesus tsuarati tusar káunkarmiayi. ¹⁸ Iwianchrukusha tsuámararmiayi. ¹⁹ Jesus tsuártinian tujinkiachu asamtai ashi shuar antiıtaj tusar wakeriarmiayi.

*Náınnium Jesus etserkamu
(Mateu 5.1-12)*

²⁰ Ni unuiniamurın Jesus iis juna tímiayi: ““Yusan atsumajai” tárumna nu, Yus akupeamunam páchtıkiaıtrume; tuma asamtai warasminiaıtrume.”

21 ‘Yamáí tsukamarmena nu ukunam ejemartatrume. Tuma asamtai warasminiaitruma. Yamáí útrumna nu, ukunmaᅇka wishirtatrume. Tuma asamtai warasminiaitruma.’

22 ‘Atumin nakitramprarmatai, ajapramawarmataisha, tura Winia Aents Ajasu tutaiya nú shuar ajasuiti tusar tsanumprutmak katsekkramkarmataisha warasminiaitruma.’

23 ‘Túramtai nayaimpiniam ti shiir ana nu núkap sunastin átatui tu enentáimsarum ti warastarum. Warí, ju shuara uuntri yaunchu Yúsna etserniun nútiksaraᅇ yajauch awajsacharmakia.’

24 ‘Tura kufrinniutiram atumsha atumí waratairiᅇ aya yamaik waintrume. Ukunmaᅇka waraschattarme.’

25 ‘Atsumatsjai, tu enentáimprumna nu, ukunmaᅇka atsumattarme. Nuᅇkia waraschattarme. Yamáí wishíarmena nu, ukunmaᅇka wáitiakrum úttiatrume. Nuᅇkia waraschattarme.’

26 ‘Ashí aents atumin shiir awajtamkurmin aneartarum. Nujai waraschatniuitrume. Warí nuna uuntri ántar-yusna etserin armia nuna nútiksaraᅇ yaunchu shiir awajsarmiayi.’

*Ii nemasri aneatniun Jesus unuiniamiayi
(Mateu 5.38-48; 7.12)*

27 ‘Winia anturtarmena nuna juᅇna tájarᅇ: Ame nemasrum aneata, nakitramainia nusha shiir awajsata; 28 yajauch chichartamainia nusha shiir enentáimtusarta; katsekkramainia nusha Yus ájtusarta. 29 Ame yapimin ijiut-mamtaí áatú yapiruᅇsha ijiuti tusam iniaktusta; ame pushirmin jurutramkitiaᅇ tuᅇniakuisha sákurmencha jukiti tusam iniaisata. 30 Seatmana nu susata, tura áminiun jurutramainiakuiᅇsha ataksha awanturkitia tiip. 31 Chíkich winia túrutati tusam wakeramna nútiksamek chikichcha túrata.’

32 ‘Iista, aya atumin anenmainia nuke aneakmesha, ¿nusha warí péᅇkera túrarum? Yajauch shuarsha nuna túrin áiniawai. 33 Tura atumniasha péᅇker awajtamainia nuke péᅇker awajkurmesha ¿nusha warí péᅇkera túrarum? Yajauch shuarsha nuna túrin áiniawai. 34 Awanturkinniaiti tu enentáimtarum nuke íkiakrumsha ¿nusha warí péᅇkera túrarum? Yajauch shuar nuamtak yajauch shuarjai awanturkinniaiti tu enentáimsar ikianainiawai. 35 Tura atumsha nemasrum aneatniuitrume, tura péᅇker túratniuitrume, tura awanturkittiawai tu enentáimtsuk ikiastiniaitruma. Túrakrumᅇkia Uunt Yus péᅇker akirmaktatrume; tura ní uchirintjai tu iniakmastatrume. Yuska, “yumiᅇsajᅇ” ticha nunasha tura yajauch shuarnasha shiir awajeawai. 36 Ii Aparí waitnentramniua nútiksarmek atumsha waitnentratatum.’

*Chikicha túramuriᅇ ti enentáimtusairap
(Mateu 7.1-5)*

37 ‘Chikicha túramuriᅇ ti enentáimtusairap. Núnisaᅇ Yuska atumí tunaarᅇn iirtamsashtatui. Chikicha tunaarᅇn “nuke asutniatniuiti” tiirap. Núnisaᅇ Yus atumin sumamtikramashtatrume. Tsankurnairatarum. Núnisaᅇ Yus tsankurtamprattawai. 38 Chikichcha susata. Núnisaᅇ Yus atumin suramsattarme. Niisha péᅇker nekapma, tura núkap ati tusa teeka awajas tura patas núkap enkea emetsai amastatui. Atum chíkich túrarmena nútiksaraᅇ atumniasha túrutmattarme.’

39 Tura nuyasha juᅇna métek-taku chichaman ujakarmiayi: “Jii kusurusha ¿itiurak chíkich kusuruncha jukinniait. Mai metek waᅇnam iniaashtatuak? 40 Unuiniamua nu unuiniana nuna naᅇkaamas áchatniuiti. Túrasha niisha ti unuimiatar unuiniana nujai métek nekaamniaiti.’

41 ‘¿Itiurtsuk atumi jijn numi enketna auk ítskesha atumí yachí jijn tsuat enketusha iiyarum? 42 Ame jiiimjin numi tuke enketaisha ¿itiurtsuk ame yatsumi jiiya tsuátan jurustajme tame? ¡Ántrairume! Emka ame jiiimjin numi enketna nu jusata. Nuiñkia paant wáinkiatame yatsumi jijn tsuat enketna nu jurustin.’

Nerejai numi nekaainti
(Mateu 7.17-20; 12.34-35)

43 ‘Pénker numi yajauchin nereatsui; tura yajauch numi péñkeran nereatsui. 44 Numisha ni neren nékanui. Tsachikniumiasha kushinñkiap júukchamniaiti. Tura naranmaya shuinia júukchamniaiti. 45 Núnisan péñker shuar ni enentáí péñker asamtai péñkeran chichaawai; tura yajauch shuar, enentáí yajauch asamtai yajauchin chichaawai. Páantchakait. Enentáin pimiutkamu ana nuyan ni wenejai chichaawai.’

Jimiará jea ukurtin
(Mateu 7.24-27)

46 ‘Wi tájana nu túrachiatrumsha ¿urukamtai Winia, Uunta, túrutrum? 47 Shuar winia chichamprun ántuinia nu jea jeammajai méteketete. Winia anturtuk umiana nu jujai méteketete: 48 Shuar jean jeamuk emka init taur kayanam ukurmai. Tura yumi ti yutuk, entsa nujanñkrua tukummaitiat pukukachmai kayanam ukuamu asa. 49 Antsu Winia anturtukiati umiatsna nuka jujai méteketete: Shuar jean jeamuk aya naikminiam jeammai. Tura entsa nujanñkrua tukumpram nu jeaka pukukamai. Tura mash sántramai.” Tu unuiniamiyi Jesus.

7

Suntara yáintrin Jesus tsuármiania nu
(Mateu 8.5-13)

1 Jesus áentsun unuiniasua amik Kapernáum péprunam wémiayi. 2 Nui Rúmanmaya suntara kapitíántri pujumiayi. Nu kapitíáni takarniuri, ti aneamuri, jakamnia jaamiayi. 3 Tura Jesusan pachis áujmatainian antuk, ame shuarum Jesusan itiertiti tura winia takarniun tsuárturti tusa Israer-shuara úuntrin akupkamiayi. 4 Niisha Jesusan weriar, umirtukat tusa ti seainiak tiarmiayi “Ju kapitíán nekas yáintin péñkeraiti. 5 Niisha yajaya apachitiat in shiir enentáimturmají. Tura iruntai jean jeamtinniasha niñki chicharkaiti, tura yayawai.”

6 Nuyá Jesus niijjai wémiayi. Tura ni jeen jeastatuk jatemsamtaí kapitíáncha ni amikrin akatar ju titiarum tusa Jesusan akuptukarmiayi. Niisha Jesusan chicharuk juna tiarmiayi “Uuntá, ántram wayataj tu enentáimsaip. Ame ti nanñkaamaku asam winia jearuí wayachminiaitme. 7 Tuma asakmin imia wiki Amiin jeatniun arantukjame. Ayatik “pénker ajastí” tákumin winia takarniusha péñker ajatrustatui. 8 Wi nékajai. Winia úuntur winia akuptuiniawai. Tura wisha suntaran akupenajai. Nunasha wi “wetá” takui wéawai. Tura chikichnasha “winitíá” tutai winiawai. Tura winia takartinian “ju túratá” tutai umiawai.” Tu tímiayi.

9 Jesus nuna antuk ti enentáimias ni nemarainian tímiayi “Nekas tájarme Israer-shuar Yúsán tímiatrus enentáimtinian wáinchaitjai.”

10 Tura kapitiani akatramuri jea waketkiar, takarniuri péñker ajasun wáinkiarimiayi.

Wajé uchirín Jesus iniantkimiania nu

11 Nuyá ukunam chíkich pepru Naín tutainium ni unuiniamurijjaj tura chíkich untsurí aentsjaj Jesus wémiayi. 12 Tura péprunam nuntumas jakaan iwíarsatai tusar juńnian wáinkiamiayi. Jakáa nukurí wájeyayi, tura uchirí jakamia núchikiyayi. Tura ti untsurí nu peprunmayá nin nemarsarmiaayi. 13 Jesus nu wajen wáiniak tura waitnentar “úutip” tímiayi.

14 Nuińkia Jesus jakaa enkerman tarunt antinmiayi; nuna juńniasha wajasarmiaayi. Nuińkia Jesus jakaan chicharuk “Umpa nantaktia, tájame” tímiayi.

15 Tutai niisha nantaki pujus chichaamiayi. Tura Jesus ni nukurín “Jujú uchiram” tímiayi.

16 Tura matsamiarmia nu, nuna wáinkiar ashankarmiaayi. Tura Yusa náarín shiir awajarsarmiaayi. Tura chichainiak, “Yúsnan etserniuchukait Ni-sha. Ataksha Yúsnan etserin uunt ana nu tarutramji” tiarmiayi. Tura “Israer-shuarti Nińniu ájinia nuna yáinmaktai tusa Yus tarutramji” tiarmiayi.

17 Tura ashí Jutía nuńkanmayasha tura ni írutkamu nuńka ármia nuyasha Jesus túramia nuna nekaawarmiaayi.

Imiakratin Juan sepunam pujak ni amikrín akatar Jesusan akuptukarmiania nu

(Mateu 11.2-19)

18 Juan ni írutkamurí ujakam Jesus túramun nekaamiayi. Nekáa ni írutkamurín jímiaran untsukmiayi. 19 Tura Jesusaj akupkarmiaayi. “Atumsha Jesus aniastarum. ¿Amesha nekas Kristu Yus akupkamu tátinia núkaitiam. Kame chikichak nákastataj? titiarum. Nu nekáa ikiuutarum’ tímiayi.

20 Tutai niisha Jesusan werí jeariar tiarmiayi “Incha imiakratin Juan akatar akuptamkaji. ¿Amesha nekas tátinia núkaitiam. Chikichak nákastataj? Nu nekaatai tusar wakeraji” tiarmiayi.

21 Wats, nii jeawarmia nui Jesus untsurí jaan tsuártasa pujurmiayi. Iwianchrukuncha iwianchrín jíirki akupkatasa pujurmiayi. Tura kusuruncha ímtikmiayi. 22 Tuma asa Jesus akatramun júna tímiayi: “Waketkirum ashí átum antukurmena nusha, wáinkiarumna nusha ujaktarum. Kususrusha wáinmainiawai; shutuap ainia nu péńker wekainiawai; tunamarusha tsuámainiawai; empekusha ántuiniawai; jakaasha atak iwiaaku ajainiawai; tura kuítrinchannumsha uwempratin chicham ujakmaiti. Juan nu ujaktarum. 23 Yawetsuk Winia tuke shiir enentáimturna nú shuar shiir átatui” tímiayi Jesus.

24 Waketkiarmatai Jesus Juáńkan pachis áujmatman antuk shuar matsarmia nui júna tímiayi: “Shuar atsamunmasha ¿warí werimiarum. Pintiu nase umpúam atúu we júni we ajana nu iistai tusarmek wémarum? Juan núnichaiti. 25 Nuikia ¿warí werimiarum. Shuar péńker iwíarmampra íistai tusarmek wémarum? Warí, péńker iwíarmampraka uunt akupniu jéen pujuiniatsuk. 26 Nuińkia ¿warí werimiarum. Yúsnan etserniuk werimiarum? Maa, nú nankaamas wáinkiarne. 27 Yaunchu Yus-Chichamnum jú áarmaiti: “Winia akatramurun amjini emka akupeajai ame jintimin iwíariat tusan.” Juan nu akatramuiti. 28 Nekasan tájarme, Yúsnan etserin imiakratin Juanjaj nankaamas uunt atsuwiti. Túmaitiat Yus akupeamunam páchinia nu shuarka nekas imianchaitiat, Juanjaj nankaamas átatui” tímiayi. 29 Penké shuarsha, kuítian-juusha, Juan imiaimujaj imianiarmia nu, Jesus timian antukar

Yusa náarj̄n shiir awajsarmiayi. ³⁰ Túrasha Pariséusha Israer-shuara jintin-niurisha Yus yáintaj̄ támaiat Juan̄ imiaamujaj̄ imiancha ásar nakitrarmi-ayi. ³¹ Nuñkia Uunt Jesus tímiayi “Yamaiyá áentstiram, warijjaj̄n métek árum nuna paant títiatjarne. ³² Uchijjaj̄ métek árum. Ni aijjaj̄ iruntrar nakurustaj̄ tukamá tuíniawai “Námpera áinis nakurustaitsar peem umpuarji, túrasha jantsemáchure. Nuyá iwíarsatniua áinis nakurustaitsar iwíareakur kantamtaí kantamáaji, túrasha átum úutcharme.” Tu tuíniawai. ³³ Atumsha núnisaitrume. Kame Juan̄ núkap yurumtsuk úmutsuk wekaimiayi. Túmakui átumka “iwianchrukuíti” tímiarme. ³⁴ Nuyá Wisha Aents Ajasan támajai. Tura yurumá úmakuisha “ti yurumin tura ti nampenaiti; kame ashí yajauch shuaran tura kuítian-juu amikrinti” túrutrume. ³⁵ Wats, nekas neka ainia nu, Yusa nekatairj̄n iniakmainiawai.” Tu tímiayi.

Pariséu Semuñ náartin Jesusan ni j̄en ipiaamiania nu

³⁶ “Winí yurumáitia” tusa Pariséu Jesusan ipiaamiayi. Tutai Jesus ni j̄en werí misanam pujusmiayi. ³⁷ Nuñkia nu péprunmayá yajauch nuwá, Jesus Pariséu j̄en yurumátsa weyi táman antuk, kayá mutinium kunkuín asuítí áimkiamun takukí jearmiayi. ³⁸ Tura úutki Jesusa nawen pujuras neajkjijjaj̄ nijjarmiayi. Tura intiashijjaj̄ japirmiayi; nuyá nawenam mukuta kun̄kuinian ni nawen ukatramiayi. ³⁹ Pariséu Jesusan ipiaamia nu, nuna wáiniak j̄una enentáimsamiayi: “J̄u nekas Yúsnan etserniuitkiun̄ka, j̄u ya-jauch nuwá ántiana nuna nekaawainti. Warí, niisha netse nuwáchukait” tu enentáimsamiayi.

⁴⁰ Nuñkia Jesus Pariséun chicharuk tímiayi “Semuñká, ámin titiaj̄ tusan wakerajai.”

Tutai Pariséu chichaak “Turuttiá, Uuntá” tímiayi.

⁴¹ Tutai Jesus tímiayi “Kuítian ikiamniun jimiará áishmañ tumashmakarmi-ayi. Chíkich kiniantus (500) tura chíkichka aya senkuentak tumashmakmiayi. ⁴² Akiktin tsawant jeamtaí máí-metek takakcha ármiai. Tuma asamtaí kuítian ikiamin ni tumashrj̄n máí-metek asakátrarmiayi. Wats, turuttiá žtú áishmañka ikiamniun nekas aneamia?” tímiayi.

⁴³ Tutai Semuñ tímiayi “Enta, núkap tumashrj̄n tsan̄kuramia nu.”

⁴⁴ Tutai Jesus tímiayi “Nekas tame.” Nuñkia nu nuwān iis Semuñkan tímiayi “J̄u nuwá wáintsumek. Ame j̄eemj̄in wayamtaí winia nawer nijjartin entsa suruschamame; antsu j̄u nuwáka nawerun neajkjijjaj̄ nijjarturai, tura intiashijjaj̄ japirturai. ⁴⁵ Mukutam áujtusshamame; antsu niñkia nawerun tuke mukutuí. ⁴⁶ Winia muukaruisha asuítí ikiurtuschamame; antsu niñkia naweruj̄ kun̄kuín asuítin ukatrurai. ⁴⁷ Nu tuma asamtaí tájame, niisha Winia ti anentu asamtaí ni tunaarj̄ untsurí ana nu tsan̄kuramuiti. Tura tunaar ishichik awai tau tsan̄kuramu ana nuka ishichik anen̄kratniuiti.” Tu tímiayi Jesus.

⁴⁸ Nuñkia nuwān tímiayi “Ame tunaarum tsan̄kuramuitme.”

⁴⁹ Tura chíkich ipiaamu Jesusj̄ai misanam pujuarmiania nu “žj̄usha ya asañ tunaan̄cha tsan̄kurea?” nuamtak tunainiarmiayi.

⁵⁰ Tura Jesus nuwān chicharuk ““Uwemtikartiniaiti” tu enentáimturu asam uwempraitme. Shiir wetá” tímiayi.

¹ Nuyá untsurí péprunam Jesus wekaráktak Yus akupeana nuna shiir chichaman etserkini wekaimiayi. Tura ni unuiniamurí tuse ármia nu nemarsarmiayi. ² Yaunchu untsurí nuwá jaa armia nuna tura iwianchruku armia nunasha Jesus tsuáarmiayi. Nu nuwasha Nin nemarsarmiayi. Nusha ju ármiaayi: Maktaranmayá Marí, siati íwianch jíirkimiuyania nusha ³ tura uunt akupin Erutisa takarniurí Chusa nuwé Juancha, tura Susancha; tura chíkich untsurí ni takakmarín súsar Jesusan yáinkiarimiayi.

Atsaamin atsaampramun Jesus unuiniamiania nu

(Mateu 13.1-9; Márkus 4.1-9)

⁴ Untsurí péprunmayá Jesusan iistai tusar jíinkiarimiayi. Tura untsurí káunkarmatai ju métek-taku chichaman Jesus unuiniamiaayi:

⁵ “Atsaamin atsaamprataj tusa jíinkimiayi. Atsaamki wesa jinkiái jintiá iniaararmiayi. Túrnamtai weenak najakarmiayi. Nuyá chíngki tariar yuawarmiayi. ⁶ Chíkich jinkiái kaya írunmanum iniaararmiayi. Nu jinkiái tsapainiar, wárik nantu sukum káramiayi. ⁷ Chíkich jinkiái janíkiniam iniaararmiayi. Tura janíkisha jinkiáisha máí-metek tsapainiar, janíkanjar ajakramiayi. ⁸ Tura chíkich jinkiáisha péngker nuńkanam iniaararmiayi. Tura tsapainiar, péngker nerekar chíkichkia siansha (100) nerekararmiayi.” Tuasua amík kakantar chichaak Jesus tímiayi “Kuishim ákuinígia antuktarum.”

(Mateu 13.10-17; Márkus 4.10-12)

⁹ Nuyá ni unuiniamurí Jesusan aniak tiarmiayi “Ju métek-taku chicham tamena nu ¿warintkumea tame?”

¹⁰ Tutai Jesus tímiayi “Atumnia Yus ni akuptairín nekaachma ana nuna nekamtikramprume. Tura chikichnaka, wáiniainiyat kusurua núnin ártí tusan, tura ántuiniyat nekaacharat tusan aya métek-taku chichamjái jintintiatjái,” tímiayi.

Atsaampramu chichaman Jesus paant jintintiamiania nu

(Mateu 13.18-23; Márkus 4.13-20)

¹¹ ‘Wats, ju nekaatarum, tímiayi. Jinkiáisha Yusa chichamen nakumui. ¹² Jintiá iniaaru tana nuka shuar aya ántana nuna nakumui. Yúsan nekas enentáimtus uwempracharti tusa íwianch wárik taa nu chichaman ni enentáiyán júawai. ¹³ Kayanam iniaaru tana nuka shuar antuk waras umiana nuna nakumui. Tura nú shuar kaníkapé atsá asamtai, ishichik tsawantiniń umikiar itiurchatan wáinkiar wárik kanainiawai. ¹⁴ Janíkiniam iniaaru tana nuka tuke enentáijjái umiátsna nuna nakumui. Nu shuarsha ántuiniawai, túrasha ni wakeramuríjjái wekainiawai. Ju nuńkanman ana nuna ti páchiniakui, tura kuítian ti wakeruiniakui, warastinniak enentáimtuiniakui, Yus-Chicham ni enentáin takaatsui. Nujái kaníkarma ásar nerektinian tujintainiawai. ¹⁵ Tura jinkiái péngker nuńkanam iniaaru tana nuka shuar antuk umiinia nuna nakumui. Niisha antukarmia nuna péngker enentáimtusar, yawetsuk umirkar ti péngker nerenawai.’

Ashí iwianiakma átatui

(Márkus 4.21-25)

¹⁶ ¿Shiripkin ekeemak nukuktinkiait? Peaknum waaptak ikuschatniuiti. Antsu jeńnam wáiniana nu paant wáinkiarat tusa yakí ekentsatniuiti.

¹⁷ Núnisan ashí nekaachma ana nu paant átatui. Tura úukma ana nu nekanattawai. Tura iwianiakma átatui. ¹⁸ Tuma asamtai anearum péngker

antuktarum. Shuar takakna nu patatsamnia átatui. Túrasha takaktsuna nu, takakjai tu enentáimtumana nuka jurunkíttiawai.” Tu tímiayi.

Jesusa nukurí, Jesusa yachi
(Mateu 12.46-50; Márkus 3.31-35)

¹⁹ Jesus pujamunam nukurí ni yachísha tariarmiayi. ²⁰ Turamtai Jesusan tiarmiayi “Ame nukusha yatsumsha aá wajasar untsurmainiawai.”

²¹ Tutai Jesus tímiayi “Ee, nukurúiti, yatsurúiti, tura Yus tana nuna antuk umíana nusha winia nukurúiti, winia yatsurúiti.”

Nasesha entsasha Jesusan umirkarmiania nu
(Mateu 8.23-27; Márkus 4.35-41)

²² Chíkich tsawantai Jesus ni unuiniamuríjjai kanunam enkemprar “Antumian amaini wetai” tímiayi. ²³ Entsanam wesar Jesus kanarmiayi. Tura aya aneachma nase ti kakaram násentkui chíchimi tampá tukumar kanun inít awayastatuk awajmiayi. ²⁴ Túram nuńkia Jesusan ishintiainiak “Uuntá, iisha entsá wayaaji” tiarmiayi. Nuńkia Jesus nantaki nasencha entsanacha chicharkarmiayi. Nú chichamaik nasesha menkakarmiayi, tura entsasha niiaaku ajasmiai. ²⁵ Nuyá ni unuiniamurín chicharuk “¿Urukamtai Winia enentáimtursachuram?” tímiayi.

Tura niisha ashamainiak, ti enentáimprar “¿Ausha warí áishmankait? Nasesha entsasha Nii chicharkam umirainiatsuk” tiarmiayi.

Jatara nunkanam Jesus iwianchrukun tsuármiania nu
(Mateu 8.28-34; Márkus 5.1-20)

²⁶ Kariréa nunka amaini Jatara nunkanam jeawarmiayi. ²⁷ Kanunmaya Jesus jinkimtai nu péprunmaya áishman Nin taruntamiayi. Nu áishmansha yaunchu iwianchrukuyayi. Misú wekas, jeá pujutsuk aents iwiansamunam pujuyayi. ²⁸⁻²⁹ Íwianchkia nu aishmankan ti kakaram nupet wémiayi. Tura emetatai tusar uwejencha nawencha jirujai jinkia wearmiayi. Túrasha tu-jinkiararmiayi. Niisha jiruncha tsurí wémiayi. Tura íwianch aents atsamunam útsuk awemamiayi. Nu aishman Jesusan wáiniak tikishmatar kakantar chicharuk “¿Urukamtai winiisha tarutnium, Uunt Nankaamaku Yusa Uchirí Jesusa? Winia wáitkiarsaip tusan seajme” tímiayi. Íwianch nín pujurun Jesus jiki akupeam tu tímiayi. ³⁰ Jesus nu áishmankan anias “¿yáitiam?” tímiayi.

Tutai nii chichaak “Wikia Untsuríntjai” tímiayi. Untsurí íwianch nín purma asa nuna tímiayi. ³¹ “In uunt wáanam ii jinkimiai nún akuptukam amutkaip” íwianch seawarmiayi Jesusan. ³² Nuí ishichik arantach náinnium untsurí kuchi shushunmak yujaararmiayi. Tura íwianch chichainiak, “Antsu kuchiniam wayatin tsankatrukta” tiarmiayi.

Tutai Jesuska “Ayu, wetarum” tímiayi.

³³ Nuna takui íwianch áishmannumia jinkiar kuchiniam wayawarmiayi. Túram kuchisha nánatanam akaiki iniaawar entsanam utsanawarmiayi. Túrunawar jakekarmiayi.

³⁴ Kuchin wáinniusa túrunan wáinkiar, ashamkar, péprunmasha tura arantcha etserkatai tusar tseke wearmiayi. ³⁵ Etserkarmatai, iyutai tusar untsurí shuar wearmiayi. Tura Jesus pujamunam jeawar, íwianch jintiukiarmia nú áishmankan péńker ajas pushí entsar Jesusa nawen pujan wáinkiararmiayi. Tura ashamkararmiayi. ³⁶ Iwianchruku áishman tsuárman wáinkiaromia nu yama taan ujakarmiayi. ³⁷ Tura ti ashamainiak Jatara nunkanmaya aents ashí Jesusan “Wetá” tiarmiayi. Tutai Jesus kanunam

en̄kemar wémiayi. ³⁸ Íwianch jíintiukiarmia nú áishman̄ Jesusan, wisha ame wéamunam winitiaj tusa seamiayi. Tutai Jesus nuna suritiak, ³⁹ “Antsu ame jeem̄iin weme Yus ámin túrutma nu ashí etserkata” tímiayi. Tutai áishman̄ we Jesus nin túramia nuna ashí nu péprunam etserkamiayi.

*Jairu nawantr̄incha tura ch̄ikich nuw̄an̄cha Jesus tsuármiania nu
(Mateu 9.18-26; Márkus 5.21-43)*

⁴⁰ Tura Jesus katiñki Kariréanam tatí tusar nákas pujuarmiayi. Tuma ásar Nii waketki katiñki támatai nu aencha warasar áujarmiayi. ⁴¹ Tumaj Israer-shuara iruntai jeá uuntrī Jairu naartin támiaiyi. Nii taa, Jesusa nawen̄ tikishmatar “Winia jearuj waitneasam winitritiá” tímiayi. ⁴² Ni nawantrī chikichik amia nu, tuse uwí takaku, jakatasa pujakui nuna tímiayi.

Jesus “ayu” tinia weakui ti untsur̄i aents nemariarmiayi. Tura untsur̄i shuar kaé ajas weena ásar chanuawarmiayi.

⁴³ Nuñ nuw̄a páchtikia wémiayi. Niisha tuse uwí numpa ajapeak wáitias pujuyayi. Tsuákratniua nuñsha ni kuítrin ashí ajapaitiat tsuámarchauyayi. ⁴⁴ Jesusa úkuriini winiá weantuk ni pushir̄i nánkatramur̄in antiñmiayi. Nuna tura nú chichamaik numpé ajapeamuncha péñker ajasmiaiyi. ⁴⁵ Nuñkia Jesus chichaak “¿Ya Winia antintkia?” tímiayi.

Tura “pen̄kesha antiñchajme” tuñiakui Pítiur ni tsaniakmarjijaī Jesusan chicharuk “Uuntá, ti untsur̄i antiñmasha, tura ti untsur̄i chanunmainiasha çitiura “ya Winia antintkia” tame?” tíarmiayi.

⁴⁶ Tútaisha Jesus tímiayi “Nekas Winia antintkiayi. Winia kakarmarjaī tsuárajna nuna nékajai” tímiayi.

⁴⁷ Nuyá nu nuw̄asha, nekarayapi tusa kurañki taa Jesusa nawen̄ tikishmatramiaiyi. Tura ashí aents ántuiniamunam urukaku antiñkia tura itiura wárik péñker ajasmia nuna ujakmiayi.

⁴⁸ Nuñkia Jesus nuw̄an̄ tímiayi “Nawantrú, shiir wetá. Winia nekas enentáimtursa asam péñker ajasume.”

⁴⁹ Jesus tuke chichas pujaí uunt Jairu jea, ti untsur̄i antiñmasha, turenia taa, Jáirun tímiayi “Ame nawantrum jakayi. Unuikiartin tuke itit awajipia” tímiayi.

⁵⁰ Tura Jesus nuna antuk tímiayi “Ashamkaip. Áyatik Winia nekas enentáimtursata. Túrakmin nawantrum péñker ajastatui” tímiayi.

⁵¹ Jeá jeawar Jesussha Nijijaī untsur̄i wayatniun surimkiamiayi. Antsu aya Pítrun, Jakupun, Juán̄nasha tura nuw̄achi apar̄in nukur̄incha wayatniun tsan̄katkamiayi. ⁵² Ashí úutainiak atakka wáinkiashtatjapi tu úutiarmiayi. Túmainiakui Jesus pen̄ké jakaan nékayat tímiayi “Úutirpa. Nuw̄achkia jákachai, antsu kanarai” tímiayi.

⁵³ Jakaancha urukaku ta tusar wishikrarmiayi. ⁵⁴ Nuyá Jesus nuw̄achi uwején achik, kákantar chicharuk “Nawantru nantaktia” tímiayi. ⁵⁵ Túram niisha jakayat atak iwiaaku ajasmiaiyi. Tura nú chichamaik nantakmiayi; túrunamtai Jesus “ayuratarum” tímiayi. ⁵⁶ Nuw̄achi apar̄i nukur̄isha ti enentáimprarmiayi. Tura Jesus “Ju túramu pen̄ké etserkairap” tímiayi.

9

*Jesus ni unuiniamur̄in etserkati tusa akupkarmiania nu
(Mateu 10.5-15; Márkus 6.7-13)*

1 Ni tuse unuiniamurin ikiaanak ni chichamejai iwianchrukun enentáiyān iwianchin jiiirki akupkatniun tura sunkurjai jaa tsuártinnisha ni kakarmarin súsarmiyai. 2 “Yus akupin ajastin ujaktarum, tura jaa tsuártarum” tinia akupkarmiyai Jesus. 3 Nuyá tímiyai “Wéakrum áyatik wetarum. Ushukrustincha, uyuncha, yurumkasha, kuitcha penké jukiirap. Aya chikichik pushi jukitiarum. 4 Nánkamas jeanam jearum wayarmeka nuin pujustarum. Nuin pujusrumek chikich péprunam wéakrum jiiinkitiarum, tímiyai. 5 Tura atumin awaintiamatniun nakitiana nú péprunmaya jiiinkirum nawemiyā nunka akakekum ikiuktiarum. Awaintiamachma paant ati tusarum nu túratarum” tímiyai.

6 Nuyá jiiinkiar ashí péprunam uwempratin chichaman ujakiar wearmiyai; tura ashí péprunam jáiniancha tsuákiar wearmiyai.

*Erutis “Jesusan ístaj” tímiania nu
(Mateu 14.1-12; Márkus 6.14-29)*

7-8 Uunt akupin Erutis Jesus túramun antukmiyai. Nu túramun chikich shuarka “Juan jakamunmaya nantaki túrawai” tu wearmiyai. Chikichkia, “yaunchu Yúsnan etserin Erías wantiniak túrawai” tu wearmiyai. Chikichkia, “chikich yaunchu etserin nantaki túrawai” tiarmiiai. Tuma asamtai Erutis penké nekaachmiyai. 9 Tura tímiyai “Wiki, Juanka muuke tsupirkatarum, tíchamkaj. Tuma aisha, ¿ju shuar, ni túramurj ashí shuar chichainia nusha yátsukaiit?” Tu enentáimiuk “íistaj” tímiyai.

*Senku mir áishmankan Jesus ayuramiania nu
(Mateu 14.13-21; Márkus 6.30-44; Juan 6.1-14)*

10 Atak Jesusa akatramurj wakетки taar ni túramurj Jesusan ujakarmiyai. Nuinkia aents atsamunam Petsaitia péprunam tíjiuch weak nu júkiarmiiai. 11 Tura penké shuar nuna nekaawar nemariarmiiai. Túram Jesus nin shiir áujsamiyai. Tura Yusa akuptairj pachis unuiniamiyai. Tura jaa armia nuna tsuáararmiiai.

12 Tura kíkai, tuse unuiniamu Jesusan wériar tiarmiiai “Uuntá, shuar akupkachminiashit. Tíjiuch péprunmasha, shúarnumkesha wear ni yurumátniurj sumarmakarti, tura kanantintrin wáinkarti. Ju pujajnia juinkia penké atsawai” tiarmiiai.

13 Tutai Jesus tímiyai “Atumsha ayuratarum.”

Tutai chichainiak “Iisha aya senku tanta tura namaksha jímiarchik takakji. Ju shuar ayuratin sumaktaí tusar wétiniaitji” tiarmiiai.

14 Áishmansha ti untsurj senku mir (5000) jeeá ámiyai. Tura Jesus ni unuiniamurj chicharainak “senkuenta senkuenta kanaarum ankant ankant pujustarum,” titiarum” tímiyai.

15 Túrawarmatai ashí pujusarmiiai. 16 Nuyá senku tantan tura jimiará namknasha Jesus achik, yakiini ímias Yúsan yuminsamiyai. Nuyá ajamsarat tusa ni unuiniamurj súsarmiyai. 17 Ashí yurumáwar ejemararmiiai. Tura ampirman tuse chañkinnium áimkiarmiiai.

*Jesus Yusa anaikiamurinti ujakma amia nu
(Mateu 16.13-19; Márkus 8.27-29)*

18 Jesus ni unuiniamurjii ai áentsnumiā kanaki pujuarmiiai. Jesus Yúsan aujsua umik ni unuiniamurj tiarmiiai “¿Yáiti turutainia Winia?”

¹⁹ Niisha áimkiarmiayi, “Chíkich “Imiakratin Juánkaiti” turamainiawai; chikichcha “Iriásaiti” tura chíkichkia “yaunchu Yúsnan etserin nantakniua núiti” turamainiawai” tiarmiayi.

²⁰ Tutai “Tura atumsha zyáiti túrutrum?” tiarmiayi.

Takui Pítiur chichaak “Ámeká Yusa Anaikiamurj, Kristu tutai, núitme” tímiayi.

²¹ Tutai Jesus “Peñké etserkairap” tímiayi.

Ni jákatniurin Jesus ujakmania nu

(Mateu 16.20-28; Márkus 8.30-9.1)

²² Nuyá Jesus tímiayi “Wi Aents Ajasuitjiana ju ti waitsatniuitjai. Wí shuara uuntri, tura ni Pátriri úntrisha tura ni jintinniurisha nakitrurar mauntuáwartatui. Túrasha iwiartusarmatai menaintiu tsawant jeamtaí nantaktiatjai.”

²³ Nuyá ashí áentsun chicharuk juna tímiayi “Shuar Winia nekas nemartustajtsa wakerakka ni wakeramuriñkia iniaisati. Tuke tsawant ni krusri yanaki nemartusti. ²⁴ Kame shuar ju nuñkanam aya péñker pujustaj tákuñka nu shuar uwemtsuk jakattawai. Antsu Winia anentu asa péñker pujustinniak enentáimtsuna nú shuarka nekas iwiaakman wáinkiatawai.

²⁵ Iimiata, shuar ashí ju nuñkanam ana nuna súmakui tura jinium wétin ákuisha çitiurak péñker pujusat? ²⁶ Wi Aents Ajasuitjiana ju Winiasha tura winia chichampruncha shuar natsantraitkuñkia, winia wincharujai, winia Aparu wincharijjai tura nayaimpinmaya péñker suntara wincharijjai atak táakun shuar natsantrurmia nuna natsantrattajai Wi. ²⁷ Tura shuar Yusa akuptairin wáintsuk jákachartatna nu juí pujuiniawai. Nuna nekas tájarne” tímiayi.

Jesus nusháa iira ajasmiana nu

(Mateu 17.1-8; Márkus 9.2-8)

²⁸ Nuna tuasua amik nuyá chíkich semanatin Yúsan áujsataj tusa Jesus náinnium wakamiayi. Pítiur, Jakupu, Juanjai nemariarmiayi. ²⁹ Jesus auju pujus nusháa iira ajattsarmiayi. Ni pushirisha ti puju jítsumir ajasmiai. ³⁰ Nuñkia jimiara áishman Niijjai chicháa wajarmiayi. Nuka Muisáis Eriásjai ármiai. ³¹ Niincha wincha jítsumir téntakarmiayi. Tura Jesus wáitias Jerusarénum jákatniurin amia nuna áujmatarmiayi. ³² Pítiur ni tsaniakmarijjai kari ti pujainiain iwiáa pujuarmiayi. Tuma ásar Jesusan tura jimiara áishmanjai jítsumir ajas wajainian wáinkarmiayi. ³³ Tura nu áishman Jesusan ikiuki weenaj Pítiur Jesusan chicharuk “Uuntá, iisha ti shiir pujat-sjik. Menaintiu áakmaktai, Áminiusha, Muisaisnasha, Eriasnasha áakmaktai” tímiayi. Tura Pítrusha enentáimtsuk nuna tímiayi. ³⁴ Nuna chicháa pujaj yurañkim tarí kaput amuawarmiayi. Tura yurañkim amuam ti ashamkarmiayi. ³⁵ Nuñkia yurañminmaya ju chichaamun antukarmiayi: “Juka winia aneamu Uchiruiti. Nii anturkatarum.” ³⁶ Chichaamun antasua amikiar Jesus niñki wajan wáinkarmiayi. Nuñkia takamtak pujuarmiayi. Tura wáinkarmia nuna peñké etserkacharmiayi.

Uchi iwianchrkun Jesus tsuármiana nu

(Mateu 17.14-21; Márkus 9.14-29)

³⁷ Kashin tsawantaj, náinniumia táarmatai, ti untsurj shuar Jesus inkiuntai tusar wearmiayi. ³⁸ Nu shuarnumia chikichik áishman Jesusan untsuak tímiayi “Uuntá, waitneasam uchir írtústá. Uchirsha juchikiiti. ³⁹ Iwianch

achik núpeteam niisha náŋkamas untsumui. Tura chichichiŋtu ajas we-nunmasha saun kaput apaawai. Íwianch nin tuke yajauch awajas anŋkant awajsatniun nakitiawai. ⁴⁰ Túmakui ame unuiniamurmin iwianchin jírtukit tusan seamjai. Túrasha tujŋkiarmai” tímiayi.

⁴¹ Tutai Jesus tímiayi “Yus enentáimtichutirmin, tutupnik wekaichatirmin ħurutmá tsawanttsuk atumjai pujustaj. Urutmá katsuŋtratjatsuk? Uchiram jui itiatá” tímiayi.

⁴² Tura uchi winiaj íwianch nuŋká ajuant chichichiŋtu áepsamiayi. Tura Jesus iwianchin kakantar chicharkamiayi. Tura uchin péŋker awajas ni aparin awantuki susamiayi. ⁴³ Tura ashí pujuarmia nu ti enentáimprar “Yuska imiá úuntchakait” tiarmiayi.

*Jesus ni jákatniurin ataksha ujakmania nu
(Mateu 17.22-23; Márkus 9.30-32)*

Jesus túramun ti enentáimtu pujuiniaj Jesus ni unuiniamurin tímiayi ⁴⁴ “Wi tájarmena ju péŋker antuktarum. Winia Aents Ajasu tútain surutkartatui.”

⁴⁵ Tura Nii timia nuna unuiniamurj nekaacharmiayi. Nekaawarain tusa paantcha awajsamuyayi. Tura warinŋkit tusa anintrustinniasha aran-tukarmiayi.

*“Ĥyaki imiá nanŋkaamantuit?”
(Mateu 18.1-5; Márkus 9.33-37)*

⁴⁶ Nuyá ni unuiniamurj, yaki imiá nanŋkaamaku ati tusa, nuamtak mai tunai ajarmiayi. ⁴⁷ Tura ni enentáimsamurin Jesus nekaamiayi. Tuma asa uchin achik ni pujamunam itiamiayi. ⁴⁸ Itiá tímiayi “Winia anentuk ju uchin shiir awajeana nuka Winiasha shiir awajtai. Tura Winia shiir awajtana nuka Winia akuptana nunasha shiir awajeawai. Kame átum nanŋkaamantuchu tárumna nu ti nekas nanŋkaamantuiti” tímiayi.

(Márkus 9.38-40)

⁴⁹ Nuyá Juan tímiayi “Uuntá, shuar ame náarmin pachis iwianchin jiki akupea nu wáinkiamji. Tura in páchitkiachu asamtai nuka suritkiamji.”

⁵⁰ Tutai Jesus tímiayi “Antsu suritkaiarap. Shuar in nakitramachkuŋka in páchitkiawai.”

Jesus Jakupun Juáŋnasha chicharkarmiania nu

⁵¹ Jesus, nayaimpiniam waketitniurj jeatemantai, enentáimmia ímiatrusan Jerusarénum we-wémiayi. ⁵² Wesa, kanartinian wáinkiarat tusa akatar émtikiarmiayi. Tura niisha Samaria péprunam jeawarmiayi. ⁵³ Tura Samarianmaya aentska, Jerusarénum wéenan nekaawaru ásar itiaatniun nakitrarmiayi. ⁵⁴ Jesusa unuiniamurj Jakupusha Juansha nuna nekaawar, Jesusan tiarmiayi “ĤUuntá, Eriás yaunchu túramia núnisrik iisha túrat tusan wakeramek. Nayaimpinmaya ji tara Samarianmaya aentsun amukarti, títiatjik?”

⁵⁵ Tutai Jesus nin ísar kakantar chicharuk tímiayi “Atumsha atumi enentáj urukukit nuka nekamatsrume. ⁵⁶ Wi Aents Ajasu áentsun emesrattsan táchaitjai. Antsu uwemtikratajtsan táwitjai” tímiayi. Nuyá chíkich péprunam wearmiayi.

*Jesus nemarsatin
(Mateu 8.19-22)*

⁵⁷ Jintiá weenaj, chíkich áishmañ Jesusan chicharuk “Uuntá, tuí wétatam nuísha nemarsatjame” tímiayi.

⁵⁸ Tutai Jesus tímiayi “Kujanchmasha ni wáarín takaktsuk. Chiñkisha pasunken takaktsuk. Tura Wi Yusa Uchiríntian tepesan ayampratniur atawai.”

⁵⁹ Chíkich áishmañkan Jesus “Nemartusta” tímiayi.

Tutai nii chichaak “Antsu, Uuntá, winia apar jakamtai, iwiarsa ikuakun nemarsatjame. Nu tsankátrúktá” tímiayi.

⁶⁰ Tutai Jesus tímiayi “Jakaa ainia nu ni shuarín iwiarsatniunka enentáimtusarti. Tura ámeke weme Yus-shuar átin urukukit nu etserkata” tímiayi.

⁶¹ Nuyá chíkich tímiayi “Uuntá, nemarsataj tusan wakerajme. Túrasha wí shuaran emka áujsan ikuuweartaj tsankátrúktá” tímiayi.

⁶² Tutai Jesus tímiayi “Shuar arayata ukunmaañ apajas iimna nu, Yus akupeana nuñ takaschamniaiti.”

10

Ni unuiniamurín setenta armia nuna Jesus etserkatarum tusa akupkarmiania nu

¹ Júniamar jímiar anapatak émkítarum tusa ashí péprunam ashí nunkanam ni wétin amia nuñ akupkamiayi. ² Akupeak tímiayi “Nekas tájarme, Yus-Chicham étserkum, júuktinia núnisan, aents Yus-shuar awajsatin ti awai. Tura çyaki júukat, aya ishichik takainiasha? Tuma asamtai ni takarniurí akupkat tusarum Nerentin seatarum. ³ Wetarum. Átumka murikiua núninaitrume. Uunt yawá yujamua núninnium tsummai ámunam akupeajrume. ⁴ Yurumkasha, kuitcha, sapatcha júkiirap; shuarjai jintiá áujmamsatai tusarum wajasairap. ⁵ Jeá wayakrum emka ju titiarum: “Ju jeanam pujuinia nuna Yus shiir awajsarti.” ⁶ Nérentin “Ee, nuna wakerajai” tákuinikia túrunatawai. Tura “Atsá, wakeratsjai” tákuinikia, “nuinikia túrunashti” titiarum. ⁷ Jeá wayattarmena nú jeañmañ pujustarum. Tura ajampramsattarmena nu yuatarum. Warí, takaana nu akinkiashtinkiait. Chíkich jeanam nuñ werum nuñ werum ajairap. ⁸ Awaintiamawartatna nú peprunam jearmeke ajampramsartatna nu yuatarum. ⁹ Jaa ainia nu tsuáratarum. Túrarum “Yus juñ nunkanam akupin ajastin ishichik ajatemsai” nu peprunmayá shuar titiarum. ¹⁰ Íksarmek itiaarmachartatna nú peprunam jearum, jintiá wajasrum juñ titiarum, ¹¹ “Yusna nakitra asakrumin, atumi péprurinia nunka ii nawen peema japirar akakekji. Túrasha juñ paant nekaatarum: Yus juñ nunkanam akupkatin ishichik ajatemsai.” ¹² Yusa nekapsatin tsawantri jeamtai nu peprunmayá shuaran ti asutiáttawai. Yaunchu Sutumammayá shuaran asutiámia nuñ nujai nankaamas asutiáttawai. Núnaka paant tájarme tímiayi.

(Mateu 11.20-24)

¹³ Wáinkiatá, Kurasín péprunmayatiram. Wáinkiatá Petsaitia péprunmayatirmesha. Atumí péprurín aents tujintiamun ti túraitjai. Warí, yaunchu Tíru péprunmasha, Setun péprunmasha nu tujintiamu túramuitkuinikia yaunchu ni enentáin yapajiwaraayi. Túrawar kúntuts pujutai pushin entsarar yunñkunim ajakiarayi. ¹⁴ Tura atumsha aents tujintiamu túramu

wáiniatrum yapajiachu asakrumin Tirunmaya tura Setunnumiã aentsjaj nankaamas asutniãttarme. ¹⁵ Tura atumsha Kapernáumnumiãtirmesha, “ti nankaamantu ajaras nayaimpiniam jeattaji” tu enentáimtsurmek. Maaj, antsu jaka matsamtainium jeattarme, auka” tímiayi.

¹⁶ Tura Jesus ni unuiniamurj̄n junasha tímiayi: “Atumin anturtamainiakka Winiasha anturtuiniawai; atumin nakitramainiakka Winiasha nakitruiniawai; tura nú arant, Winia nakitrakka Winia akuptukua nunasha nakitiawai.” Tú áujas Jesus nin akupkarmiyi.

Setenta unuiniamu waketki táarmiania nu

¹⁷ Ukunam nu setenta unuiniamu warasar waketki táarmiyi. Tura chichainiak “Uuntá, ame náarmij̄n íwianch j̄iki akupeam umirtamkamji” tiarmiyi.

¹⁸ Tutai Jesus tímiayi “Ee, Wisha nayaimpinmaya peem peetna núnisã, uunt iwianch Satanásan akaiki iniaan wáinkiamjai. ¹⁹ Atumniaka winia kakarmarun susamjarme, napi najarmasha tit̄n najarmasha yajauch awajtamaj̄rum tusan; tura ii nemasrj̄ kakarmarj̄ nupetkatniuncha susamjarme. ²⁰ Túrasha íwianch umirtamkui nu enentáimsam warasairap. Antsu atumí naarj̄ nayaimpiniam aarma aa asamtai warastarum” tímiayi Jesus.

Jesus warasmiyi (Mateu 11.25-27; 13.16-17)

²¹ Nuinkia ni enentáin Yusa Wakanj̄ waramtiksam Jesus j̄una tímiayi: “Aparú, ashí nayaimpij̄j̄aj̄i nunka Úntrinme; tuma asam j̄u túrunamu ti unuimiaru enentáimtumainia nuyá úk̄uitme; antsu uchichia núnis nankaamantuchu enentáimtumainia nú shuar paant awajtusuitme. Ee, Aparú, núnik wakerichmakum. Tuma asamtai shiir enentáimtajme, Aparú” tímiayi.

²² “Winia Apar ashí surusuiti. Wisha ni Uchirj̄ asamtai Winia nékarui. Tura chikich Winia nekas nekarainiatsui. Yus Apancha Wiki nékajai. Tura Wi wakeraj̄ nú shuaran winia Aparun paant awajtajai. Nú shuarsha winia Aparun nékainiawai.” Tu tímiayi Jesus.

²³⁻²⁴ Nuyá ni unuiniamurj̄n iis tímiayi “Wi tájarme, untsurj̄ Yúsnan etserniusha tura uunt akupniusha átum yamá wáinrum nuna wáinkiatniun wakeruiniayatan wáinkiacharmiyi. Tura átum yamá ántarme nuna antuktinian wakeruiniayatan antukcharmiyi. Tura Yus achirmaku asakrumin, wáinrumna nu ti péñkeraiti” tímiayi.

Samarianmayã áishmanj̄ katsumkamun yainmia nuna Jesus unuiniamiania nu

²⁵ Nuyá akupkamun jintinkiertin Jesus warintiak chichakat tusa wajatki werimiyi. Werí iniimiyi “Uuntá, wi tuke iwiaaku átaj takun ¿warinia túratniuitaj?” tímiayi.

²⁶ Tutai Jesus ayak “¿Yús-Papinium Muisáis áarmanum waritia áarmait. Waritia enentáimiam?” tímiayi.

²⁷ Akupkamun jintinkiertin ayak tímiayi “J̄una tawai: Ti enentáimsam, tuke enentáimj̄aj̄i Uunt Yus aneeta. Ame kakarmaram, iwiaakmarmesha Yus íktusta. Tura ame ayashim aneamna núnismek ame írutramurmesha aneeta. Núchakait” tímiayi.

²⁸ Tutai Jesus tímiayi “Péñker áimsame. Nu túrakmeka tuke iwiaaku átatme.”

²⁹ Tutai akupkamun jintinkiertin ni anintramun kÍishtumaktajtsa wakerak “Winia írutramursha ¿ya ainia?” tímiayi.

³⁰ Takui Jesus tímiayi “Jerusarénnumiá jintia Jirikiú péprunam jeana nú jintianam áishman wean, kasa áishman tariar ni warirín, pushiríncha kasarkarmiayi. Tura katsumkar mayáí ashirak ajuantar ikiukiarmiayi. ³¹ Tura Israer-shuar Patri ukunman winis nu áishmankan wáiniak aya íkian iis ikiukmiayi. ³² Nuyá ukunam Patri yáinrisha nu jintianam wesa, nu áishmankan wáiniak, áyatik iis ikiuak wémiayi. ³³ Tura nuyá Samaria nunkanmaya áishmansha nu jintianman wesa, nu áishmankan wáiniak ní shuárinchunak wáitnéntramiayi. ³⁴ Nuyá nu áishmankan weantuk ni numpamnamurín asuitijíai tura wíniujai tsuar jaanchjiaí penuarmiayi. Tura ni kawairín ekenak jukimiayi. Tura írar kanutainiam juki ejé nu áishmankan péñker wáinkiamiayi. ³⁵ Tura kashin tsawarmatai Samarianmaya áishman weak jimiara kúitian jusa jeá nérenniurín susamiayi. Susa tímiayi “Jú áishman péñker wáitrukta. Tura wi amaaína jú táasmataisha wi wáketkun akiktajme” tímiayi. ³⁶ Ayu, ámijíaiisha, nu menaintiu áiniana nu, ¿tuá imiá nekas katsumkamun waitnéntramia?” tímiayi Jesus.

³⁷ Takui akupkamun jintinkiertin chichaak “Entá, katsumkamun wáitnéntramia núa” tímiayi.

Tutai Jesus tímiayi “Amesha weme núnismek túrata.”

Marta ni kajijíai Marí jeen Jesus pujusmiania nu

³⁸ Nuyá Jesus jintiá wesa chíkich péprunam jeamiayi. Nu péprunmaya nuwa naari Marta ni jeen itiaamiayi. ³⁹ Marta kají ámiayi ni naari Marí. Marisha unuiniamun anturkataj tusa Jesusa nawen pujursamiayi. ⁴⁰ Tura Mártaka ni takatrín ti enentáimtak Jesusan weantuk tímiayi “Uuntá Jesúsá, ¿winia kajir takatan winiak íiktursainia nuka enentáimtsumek? Winia yáintá turuttia” tímiayi.

⁴¹ Tutai Jesus tímiayi “Maaj Martí, untsurí túratin ana nu ti enentáimsam itit awajtamui. ⁴² Tura aya chikichik nekas túratniuiti. Marikia nekas péñker ana nuna achikiai. Nusha penké jurunkishtatui” tímiayi.

11

Jesus Yus áujsatniun unuiniamiania nu (Mateu 6.9-15; 7.7-11)

¹ Chíkich tsawantaj Jesus Yúsán áujsataj tusa atsamunam pujumiayi. Áuj sua amikmatai ni unuiniamurí chikichik Nin tímiayi “Uuntá, imiakratin Juan ni unuiniamurín unuiniamia núnismek Yus áujsatin unuitiurta.”

² Tutai Jesus tímiayi “Yus áujkuraam jú titiarum:

Aparu Yus, nayáimpiniam pujamna nu, ii Aparínme. Ame náarmincha shuar ántar pachischarti. Ashí áentsnum ame akupkatin tsawantrum wari jeati. Ame wakeramuram nayáimpiniam umikma ana núnisan jú nunkanmasha uminkiatí. ³ Aparú, ii yurumkarí ashí tsawant amasta.

⁴ Tura winia nemasrun tsanukurajna núnismek, Aparú, winia tunaaru tumashriha tsanukurta. Tunáa wakeruktin tsankatrukaip. Antsu ashí tunaanumiá uwemtikurta.”

⁵⁻⁶ Nuyá Jesus júna tímiayi. “Wats, jú titiái. Kashi ajapén amikrum werishtameash. Tura “Winia amikiur yajaya winia jearuí yama tayi. Tura ajamsatniun penké takaktsujai. Tuma asantai amikru, menaintiu apatuk

ajamprustá” tíchatameash. ⁷ Tura nii inít pujusan̄ chichaak “Warí, wáitisha epenmiaiti, tura winia uchirsha wijiái ashí tepeenawai. Itiur nantakniak amastaj. Itit awajtipia” turamchanpiash. ⁸ Wats, paant tájarme, niisha amikrum asa, nantaki ikiatmastinian nakitiayat, itit awajtiñ tusa nantaki ashí wakeramna nuna suramsattawai. ⁹ Tuma asamtai tájarme: Yus seatarum; túrakrumin suramsattarme. Eḡakrumka wáinkiatarme. “Winiájai” tákurmin awáintiamattarme. ¹⁰ Seana núnaka suńniatsuk. Eḡana nuka wáintsuk. “Winiájai” tuinia núnaka awáiniatsuk.’

¹¹ ‘Wats, átum uchirtintiram, ame uchiram apatkun seatmakui ḡkayaash súsaintiam? Namakan seatmakui ḡnapíash súsaintiam? ¹² Nujintian seatmakuisha ḡtitiñkiash súsaintiam? ¹³ Warí, átum imiá yajauchitirmesha atumí uchiriḡ péñker ana nu tuke súchakaitrum. Atumí Apariḡ nayaimpiniam pujana nu, seakrumniñkia nú nanḡkaamas ni Wakanḡin suramsattawai.” Tu unuiniamiayi.

*Jesusan “iwianchi kakarmarjijai túrawai” tiarmiayi
(Mateu 12.22-30; Márkus 3.19-27)*

¹⁴ Shuar iwianchruku asa chichachu ámiayi. Nuna enentáiyen nu iwianchin Jesus jiiḡki akupkamiayi. Íwianch jiinkimtai chichachu chichasmiayi. Túramtai shuar nuḡ pujuarmia nu ti enentáimprarmiayi. ¹⁵ Tura chíkich tiarmiayi “Juka iwianchi kapitániñri Satanásan, ni chíkich naariḡ Pirsepún umirniuiti. Tuma asa nuna kakarmarjijai iwianchin jiiḡki akupeawai.”

¹⁶ Tura chíkichkia, nekas Yúsnumiḡ taawashit tusar “Nayaimpinmaya kakaram ana nu iniakmasam aents tujintiamu túrata” Jesusan tiarmiayi.

¹⁷ Tura Jesus tu enentáimiainian neka asa tímiayi “Núu nuñkanmayaan shuar nuamtak kajernaiyakuñkia nú nuñka wárik meserchattawak; nuamtak shuarsha ni shuarjijai kajernaiyaksha amunaikchartatuak. ¹⁸ Winiaka “Pirsepú iwianchi kakarmarjijai iwianchin jiiḡki akupeawai” túruttsurmek. Tuma asamtai tájarme, uunt iwianch Satanás naartin, ni suntarijijai kajernaiyaksha ḡitiur tuke kakaram átiñki? ¹⁹ Tura Wi Pirsepú kakarmarjijai iwianchin jiiḡki akupeakuñkia, atumi shuarisha ḡyana kakarmarjijain iwianchin jiiḡki akupena? Niisha “iwianchi kakarmarjijai túrichuitji” tu iniajisha ḡitiura Winiasha, “iwianchi kakarmarjijai túraiti” turutminiaitrum? ²⁰ Wikia Yusa kakarmarjijai iwianchin jiiḡkin akupeajai. Nu nekaarum Yus atumḡ enentáin akupin ajaswana nu nékarme.’

²¹ ‘Kakaram áishman̄ kíshutumaktajtsa iwianar wajas jeen wáinkiu, ni wariri inít ana nusha tímatrusan̄ ániawai. ²² Antsu niijjai nanḡkaamas kakaram ana nu winiakka nupetkashtatuak. Tura kíshutumaktinian iwiar takakman jurawai. Tura kasamkámun ni amikriñ súawai. Kakaram áishman̄ iwianchin nakumeawai. Tura nujai nanḡkaamas kakaram áishman̄ Winia nakumprawai. ²³ Iista. Winia nemartatsna nu winia nemasruiti. Núnisan̄ Winia yáintsuna nuka aya itiurchat nájateawai.’

*Iwianch jiiḡki akupkamuitiat wáketna nuna ujakmiania nu
(Mateu 12.43-45)*

²⁴ Nuyá Jesus juna tímiayi: ‘Shuara enentáiyḡ íwianch jiinkii ayamprataj tusa yumi péñke yútatsna nuḡ wéawai. Tura ayampratniun wáincha asa ataksha waketitniun enentáimui. “Wi jiiñkimiaj nuññ waketitjai” tawai. ²⁵ Tura wakетки péñker iwiamun tura anḡkant aan wáiniui. ²⁶ Nuna wáiniak, ni aḡn siati iwianchin niijjai nanḡkaamas yajaunchin itiaḡ enḡkemáwartatui.

Túrnamtai nu shuar nuiki nuna nan̄kaamas yajauch ajastatui.” Tu tímiayi Jesus.

Nekas warastin

²⁷ Shuar iruniarmia nuí Jesus nuna chichaa pujaj, nuwá untsumuk “Ame nukun Yus ti yáin̄kiai. Ni ampujén ame pujuschamkam. Ámin amuntstamachmakam” tímiayi.

²⁸ Tutai Jesus tímiayi “Antsu ni chichamen antukar umirainia nuna, nukurjaj nan̄kaamas Yus ti yáin̄kiaru áiniawai, tajai” tímiayi.

(Mateu 12.38-42; Márkus 8.12)

²⁹ Shuar untsurí Njin káunkarmatai Jesus tímiayi “Yamaiya shuarka yajauch áiniawai. Yajauch ásar, chichartuiniak “Nekas Yúsnumiáitkiumka aents tujintiamua nu túram Yusa kakarmarí iniakmasta” turutainiawai. Túrasha áyatik yaunchu Junas túrunamujaj iniakmasmia nujaj̄n nekaatin áiniawai.

³⁰ Kame Junas túrunamujaj Níniwi péprunmaya shuaran yaunchu Yus ni kakarmar̄n iniakmasmia núnisan̄ yamaisha Aents Ajasu tutainjiana nu Wi túrunamujaj Yuska ni kakarmar̄n iniakturmastatrumé. ³¹ Yaunchu Sarumún uunt akupin pujaj Sepa núnkanmaya nuwá akupin Sarumúnka chichamen nekaataj tusa ti jeashtanmaya támiayi. Tura yamaikia Sarumúnjaj nan̄kaamas pujaj átumka anturtatsrumé. Tuma asamtai Wi tájarne, Yus ashí shuaran nekapsattana nu tsawant jeamtai nu nuwá, akupniun pénker anturka asamtai, Yus íimianum pénker átatui. Antsu atumsha Winia anturtukcha asakrumin Yus íimianum yajauch átatrumé. ³² Tura Yúsnan etserin Junas Níniwi péprunmaya shuaran Yus Chichaman etserkamtai nu shuar ni tunaar̄n enentáimtusar enentáin̄ yapajjáwarmiayi. Tura juí yamá Junasjaj nan̄kaamas etserin pujajai. ¡Tuma asamtai nekapsatin tsawant jeamtai Níniwinmaya shuar yamaiya shuar árumna nuna sumantikramat-tarme!

Ayashi tsáapniri

(Mateu 5.15; 6.22-23)

³³ ¿Shirikip ekeemakar úuktinkiai? Pitiaknumsha en̄keashtiniaiti. Antsu shuar jeá wayana nu paant íimsat tusar yakí ekensatniuiti. ³⁴ Ame jímijjaj wáinkiam nujaj̄ wekasatin nekaattame. Tuma asamtai ame jímijjaj pénker ana nu wáinkiumka pénker wekasattame; antsu ame jímijjaj yajauch ana nu wáinkiumka, kiritniunam wekasatniua núnisan̄ yajauchiniam wekasattame. ³⁵ Anearta. Enentáimin tsáapin ana nu kiritin̄ ajaschati tusam anearam wekasata. ³⁶ Ame ayashmj̄in kirit ajatsuk aya tsáapniain̄kiuinkia, shirikip paant awajea núnisan̄ ashí paant wáinkiatume” tímiayi.

Pariséuncha, Israer-shuara jintinniurisha “yajauchiitrumé” tímiayi Jesus

(Mateu 23.1-36; Márkus 12.38-40; Rúkas 20.45-47)

³⁷ Jesus chichasua amikmatai Pariséu shuar, winia jearuj̄ yurumáitia tusa untsukmiayi. Tutai Jesus wayá misanam pujusmiayi. ³⁸ Tura Israer-shuar ikijmartin ana nuna túrutsuk aya pujakuí Pariséusha nuna wáiniak “maa ¿urukamta tura?” tu enentáimsamiayi.

³⁹ Tura Uunt Jesus tímiayi “Pariséutirmeka atumí yurumtair̄i aya pátatek nijiahtin ti wakeriniaitrumé. Atumsha nu yurumtair̄jaj̄ méteketrumé. Pátatek pénker túrarme. Tura atumí enentáinkia kasamkatniusha tura yajauchia nusha piakuiti. ⁴⁰ ¡Enentáimcha! Warí, ashí pátatek wáinij̄i nuna Yus

najanachmakia; tura init paantcha ana nunasha Yúsak najanachmakia. ⁴¹⁻⁴² Aneartarum, Pariséutirmesha. Aya nuka méntasha, anissha tura aya apatkusha Yus súsatin ti enentáimprume. Nukasha tsuriasrum apatkusha tias ana nuyá chikichik achikrum, Yúsnaiti tátsurmek. Tura antsu nu túratin iniaitsuk péñker wekasatniusha, Yus anenmarmena nusha péñker enentáimsatniuitrume. Wats init, enentáimin ana nútiksarmek jusam susarta. Nuñkia ashí chamir átatui.'

⁴³ 'Tura aneartarum Pariséutirmesha. Yus áujtai jeanam penkeri pujutainium pujustin wakerarme. Tura jintiá aents ímiainiamunam ti shiir áujtusarat tusarum wakerarme.'

⁴⁴ 'Jintinniutirmesha, Pariséutirmesha mái-metek aneartarum. ¡Antar shiir chichamintinia! Iwiarsamu paantcha núniniaitrum. Shuar nu nankaamaksha nájamiat nékatsui. Núnisan shuar atumí chichame antukar yajauchia nuna nekartamturme.'

⁴⁵ Nuikia Israer-shuara jintinniuri chikichik Jesusan chicharuk tímiayi "Uuntá, nu tákum incha yajauch chichareame."

⁴⁶ Tutai Jesus tímiayi "Atumsha jintinniutiram aneartarum. Atumí akupkamurijjai káarak ti kijin entsakhamnia súarme. Tura átumka yáintaj tusarum atumí uwejejaisha penké ántiatsurme.'

⁴⁷ 'Aneartarum tájarme. Yaunchu atumí uuntri Yúsnan étersniun máawarmia nuna iwiarsamuri átum jeanniuirume nu etserin ti péñker ásarmatai kajinmatkishtin. ⁴⁸ Nu túrakrum atumí uuntri túrawarmia nu, "yajauchichuiti" tarume. Warí, niisha máawarmiayi, tura atumsha máawarai táyatrum niijjai méteketrum. Warí, Yúsnan etserniu iwiarsamuri jeankuram atumek sumamarme.'

⁴⁹ 'Atumí túramuri nekáa Yus juna yaunchu tímiayi: "Winia etsertuniun tura winia akatramurnasha niin akuptukartatai. Túramtai chikichnaka máawartatui, tura chikichnaka pataatukartatui." ⁵⁰ Tuma asamtai ashí ni etserniuri maamu ainia nuna, yamaiya áentstirmin Yus sumamtikramatarme. Nuñka najanamunmaya júki ⁵¹ yamá ímiajai maamu ainia nuna, kame Apir maamunmaya júki yamá Sakarías maamua tímiajai anintrustatui. Naman maar Yus sutai ámanum tura Yus-jea ámanum ajapén atenkamunam máawarmia nú Sakaríasan tajai. Nu tuma asamtai tájarme, ni etserniuri maantamnowarmia nuna yamá matsatrumna nútirmin aninmasartatui.'

⁵² 'Jintinniutiram aneartarum. Waiti asakatniua núnisrumek nekas nekaatin surimiarme. Atumkesha nékatsurme. Tura nekaataj tana nusha suritiarme" tímiayi.

⁵³⁻⁵⁴ Jesus nuna takui Pariséusha, jintinniusha ti kakerkarmiayi. Tura nii tana nujai "yajauch túrame" titiai tusar wakeruiniak untsuri anintriarmiayi.

12

¹ Nu tumaj shuar ti untsuri káunkarmiayi. Ti kaunka ásar nawen mai-najatnai ajarmiayi. Tura Jesus ni unuiniamuri títan juarkimiayi. "Pariséu ántar chichamtin ániawai. Nuka wakaprutaiya núnisaiti. Wakaprutaikia nijiamanch yumirniun yama enkeam páantchaiti. Tura ukunam nekaamni-aiti. ² Núnisan ashí paantcha ana nu iwiainiakma átatui. Uúkma ana nusha nekaamu átatui. ³ Nu tuma asamtai, kiritniunam tímiarmena nusha tsawái tsápin ajasmanum antunkattawai. Tura jea init pujusrum ishishmasrum tímiarmena nusha áa ti paant etsernaktatui.'

*Yusak ashamkatniuiti**(Mateu 10.28-31)*

⁴ ‘Amikrutiram, aya ayashmin main ainia nu ashamkairap, tájarme. Ayashmin maa nú arantka máashtatui. ⁵ Tura ya nekas ashamkatniuitrum, nuna paant jintintiattajrume. Ame ayashmí maa, nuyá ámin jinium akup-tamkatniun jintintiatsna nu ashamkatarum. Ee, Yus ashamkatarum, tájarme.’

⁶ ‘Jimiará chin̄ki ishitiúpchich ishichik kuitjaj surukchatniukait. Túrasha Yussha nu chin̄kin pen̄ké kajinmatkishtatui. ⁷ Wats, ashamkairap. Untsurí chin̄kijijaj nan̄kaamas Yuska atumin enentáimturmarme. Warí, ame intiashmin mash Yus nekapmaruiti.’

(Mateu 10.32-33; 12.32; 10.19-20)

⁸ ‘Ashí shuar ashí íimiainiamunam Winia Aents Ajasu tutain, Winia natsantruiniatsna núnaka, Wisha Yusa suntarí íimiainiamunam natsantrashtatjai; ⁹ antsu shuar íimiainiamunam Winia natsantrana núnaka Wisha Yusa suntarí íimiainiamunam natsantrattajai.’

¹⁰ ‘Winia, Aents Ajasu tutain, shuar yajauch chichartakuin̄kia nusha tsan̄kuramniaiti, tura Yusa Wakan̄incha yajauch chicharkuin̄kia nuka pen̄ké tsan̄kurachminiaiti.’

¹¹ ‘Wats, Israer-shuar iruntai jean̄masha, tura Israer-shuar kapitíanniumsha, uuntnumsha juramainiakui, aninmainiakui sha warintiajak tusam ti enentáimsáip. ¹² Ame áimkiatin jeamtai, Yusa Wakan̄í ame títiatmena nuna jintinramattawai,” tu timiayi.

Kuítiak enentáimtuschatniuitji

¹³ Chíkich áishman̄ Jesusan tímiayi “Uuntá, ii aparí ikiurtamkimiaj nuna yatsur winiasha nakak surustí, titia” tímiayi.

¹⁴ Tutai Jesus tímiayi “Áishman̄ka, atumin nu túratin anaikiamukaitiaj.”

¹⁵ Nuyá tímiayi “Pénker enentáimsatarum. Nii takakna nújain̄ shuar iwiaaku, áchatniuiti. Tuma asamtai kuítrintin ajastin aya nuke enentáimsaip.”

¹⁶ Nuyá júna métek-taku chichaman unuiniak tímiayi:

“Kuítrintin áishman̄ ní ajaríyan̄ arakan ti nukap juukmai. ¹⁷ Tura “¿Ti nukap asamtai tuin̄ ikiustaj. Itiurkatjak?” tu enentáimsamiai. ¹⁸ Wats, wi nékajai. Winia ikiutái-jearun ashiran nú nan̄kaamas úuntan najanatjai. Tura nuj ashí ikiustajai. ¹⁹ Nuin̄kia untsurí uwitin shiir pujustinian ikiusman takustatjai. Tuma asamtai, ayampran, yurumán, umaran shiir pujustatjai” timiai.’

²⁰ ‘Tura Yus nin chicharuk timiai “Netse. Yamái kashi jakattame. Nuin̄kia imía núkap ikiusumna nusha ¿yana átata?” timiai” tímiayi.

²¹ Nuyá Jesus tímiayi “Shuar nin̄ki kuítrin̄ ikiauntumna nu, núnisaiti. Túrasha Yusjaj ísmaka kuítrin̄chaiti.”

*Yus ni uchirín péñker wáinkiaiti**(Mateu 6.25-34)*

²² Nuyá ni unuiniamur̄in Jesus júna tímiayi: “Warí yuarik pujustají tura warin̄ entsartají tusarum nuke ti enentáimsairap. ²³ Yus iwiaaku átinian amasu asa yurumkancha amastatui. Tura jú ayashniasha najana asa entsataincha amastatui. ²⁴ Chin̄kisha enentáimsatarum. Niisha arakmainiatsui. Juuk yurumkan̄ ikiuiniatsui. Tuma ain̄ Yuska ni yurumátniurin̄ tuke súawai. Atumsha chin̄kia nú nan̄kaamaschakaitrum. ²⁵ Tura ya shuarak, ti enentáimtana nujají nú naya ajasminiait. ²⁶ Kame yúpichuch ana nusha túrachminiaitiaturumsha, ¿zurukamtai chíkich ainia nusha ti enentáimtarum?”

²⁷ ‘Iistá, kukujsha takaachitiat tura nájanchitiat ti shírmach ániawai. Yaunchu akupin Sarumún ti shiir iwiarmamniuitiat kukujia tímianchayayi. ²⁸ Iis, nupa yamá tsakaawai tura kashin aents tsupikiar jinium apeánawai. Tuma aiñ Yus ti shiir awajeatsuk. Nuna tura asa atumniasha nú péñker wáitmakchattawak. ¿Urukamtai Yus nekas enentáimtatsrum? ²⁹⁻³⁰ Ju nunkanam ana nu ti pachiiirap. Chíkich shuar, Yúsan nékainiatsna nu, warin yuataji, warin umartaji’ nuna ti pachiiinawai. Tura atumsha tu enentáimsairap. Urukattjak, tiirap. Ame Apa nayaimpiniam pujana nu, ashí atsumarmena nuna nékawai. ³¹ Antsu emka Yusna nu enentáimtustarum. Túrakrumniñkia atsumamna nuna Yus suramsattawai.’

Kúitian pachis Jesus unuiniamiania nu

(Mateu 6.19-21)

³² ‘Winia murikrutiram ashamkairap. Untsuríchuitrume. Túrasha atumí Apari ni akuptairiñ pachitmarktasa ti wakerutmarme. ³³⁻³⁴ Kuítrum tuj aa, nuñ tuke enentáimtittiarne. Tume asamtai takakrumna nu surukrum atsumainia nu susatarum. Nuka enketai arut ajatsna nuñ enkeatniua núniskete. Túrakrum nayaimpinmaya kuit amuatsna nu íkiauwearme. Nuñsha kasa nu kuitian kasamkataj tusa wayachminiaiti, tura kayaasha nu kuitian yuatniun tujintiawai.’

Anearar wekasatniuitji

³⁵⁻³⁶ ‘Ju enentáimsatarum. Ni uuntri nuatnaikiatin námpernumiã taa, “uraitia” takui, takarniuri jinia ekeemakar wárik urattiai tusar nakáa pujuiniawai. Atumsha núnisrumek Wi atumi Uuntri támatai, shiir itiaatai tusarum anearum wekasatarum. ³⁷ Ni uuntri taak iwiáa pujuinian wáinkiarai nuka shiir pujuiniawai. Nu úuntak iwiar, “misanam pujustarum” ni takarniuriñ títiatui tura yurumkan sústartatui. ³⁸ Kashi ajapén taaksha tura tsawaana aji taaksha ni takarniuriñ iwiáa pujuinian wáinkiuñka, nu takariñ shiir pujuiniawai. ³⁹ Tura jusha nekaatarum. Jeñniua nu, kasa táinian nékaitkiuñka, iwiáa pujusaayi. Kasa wayá kasamkatniun suritkiaayi. ⁴⁰ Atumsha núnisrumek, anearum pujustarum. Wi Aents Ajasu tutai aya aneachmanum tátatjai” tímiayi.

Pénker takarin yajauch takarniujai

(Mateu 24.45-51)

⁴¹ Nuyá Pítiur aniasmiayi “¿Aya ínkik unuiniartaj tusam nu métek-taku chicham támek. Kame ashí nekaawarat tusamek tame?” tímiayi.

⁴² Tutai Jesus tímiayi “Atumsha péñker takatan wáinnia núnisketrume. Takatan wáinin ni uuntri takatrin takainia nuna, yurumátin jeamtai, ayurkamna núiti ni úntrin shiir umirna nu, tura péñker enentáimtana nu. ⁴³ Ni uuntri taa, takatrin tímatrusañ túran wáinkiuñkia nu wáinniusha shiir enentáimsamniaiti. ⁴⁴ Umirin asamtai, ni uuntri ashí ni waririñ wáitrukat tusa apujstatawai. Nuna paant tájarme. ⁴⁵ Tura nu takatan wáinniusha “úuntur wau táchattawai” tu enentáimias, ni uuntri takarniuriñ yajauch awa-jeakuñkia tura niñki ti yurumá, ti umar nampeakuñkia, ⁴⁶ nuñkia ni uuntri ni nákachmanum aya aneachma taa ti asutiáttawai. Umichu pujuinia nuñ akupkattawai.’

⁴⁷ ‘Takarín ni uuntri wakera nuna nékayat, iwiartsuk umitsuk pujakka ti awatramu átatui. ⁴⁸ Túrasha takarin nékachu asa, asutniámnia túrakka, ishichik awatnartatui. Núkap susamu ana núnaka núkap seawartatui. Núkap ataksamu ana núnaka núnisañ nankaamas seawartatui.’

Jesujai shuar akannartatui
(Mateu 10.34-36)

⁴⁹ Jijiai nekapsatniua nútiksanak nunkanam jinia ikiapartaj tusan tamajai. Tura túrunat tusan ti wakerajai. ⁵⁰ Imiantinia núnisan itiurchat ukatrúktatui. Nusha wárik amuukat tusan ti wakerajai. ⁵¹ “Ashí shuar shiir pujusarat tusa táwiti” tu enentáimturumek. Núchaiti. Antsu shuar tesanairat tusan táwitjai. ⁵² Yamái jukimiutak chikichík shuarnum senku ainia nu akannakartatui; menaintiu shuar ni shuarin jímiarar nakitrartatui. Jímiarsha ni shuarin menaintiun nakitrartatui. ⁵³ Apasha ni uchirin nakitrattawai. Núnisan uchisha ni aparin nakitrattawai. Nukusha ni nawantrin nakitrattawai, nawantrisha nukurin nakitrattawai. Tsatsarisha ni najatin nakitrattawai; najatisha tsatsarin nakitrattawai.”

(Mateu 16.1-4; Márkus 8.11-13)

⁵⁴ Jesus áentsun chicharuk junasha tímiayi “Atumsha nantu akaatainmaani kjarматаi “yutuktatui” tátsurmek. Nusha nekas tárume. ⁵⁵ Tura anaaraniá nase násenkamtai “séejik átatui” tárume. Tura nekas tárume. ⁵⁶ Yuranminmasha nunkanmasha túruna nu nékarme. Túmaitiurumsha ju tsawantaj túrunattana nusha ¿itiura nékatsrum? ¡Maaj, ánthaitrume!”

Nemasrumjaisha nawamnaikiata
(Mateu 5.25-26)

⁵⁷ “Túrasha péñker ana nusha ¿urukamtai atumek enentáimsarum wáintsuram? ⁵⁸ Irutramuram úuntnum júramkuinikia jintia wésamek “nuamtak iwiarartai” titiá. Túrachkumnikia akupniunam juramkittiamé. Tura niisha surnatnum akuptamkattame. Tura niisha sepunam enketmattawai. ⁵⁹ Tura nekas tajai, nuí enkemamka ashí rearchisha akikmachkumka jíinkishtatme” tímiayi.

13

Ii enentái yapajíátniuitji

¹ Nu tsawantin chícham ujaktai tusar Jesusan tariarmiayi. Kariréa nunkanam Israer-shuar ni waakarín máawar Yus susatai tusar pujuiniáj, Pirátu nin maa, nuna numpen waaka numpejai pachimpramun ujakarmi-ayi. ² Tura Jesus tímiayi “¿Warí enentáimsarum? Kariréanmayá áishman tárumna nu, chíkich Kariréanmayá áishmanjai nankaamas yajauch ásar túrunawarai ¿tu enentáimprumek? ³ Atsá; atumí enentái yapajíáchkurmeka núnisrumek atumsha jakattarme. Nuna paant tájarme, tímiayi. ⁴ Tura tiasiúchu áishman yakí jea Seruí kupiniak iniaak nekenkarmiania nu, ¿warí enentáimtarum? Chíkich Jerusarénumiá shuarjai nankaamas tunáa ásar túrunawarai ¿tu enentáimprumek? ⁵ Atsá, tájarme. Atumí enentái yapajíáchkurmeka núnisrumek atumsha jakattarme.”

Iikiu numi nereatsna nu

⁶ Junasha Jesus métek-taku chichaman tímiauyi. Júiti:

Shuar ni ajarin iikiu numin araamun takakuyi. Nerekchiash tusa iyumai. Túrasha nere atsumai. ⁷ Nuinikia ni ajarin wáinniu timiai “Antukta, menaintiú uwitin juna nere átai tusan waketrú pujajai; túrasha penké wáinkichjai. Ajakta. ¿Urukamtai ánthash wajastata?”

⁸ Tutai ajá wáinin timiai “Atsá, uuntá; ju uwitin wajastí. Wajamurjin takarsatjai tura péⁿker nun^kan matsatkatjai. ⁹ Nujai nerechchampiash. Tura tuke nereachkuin^kia nuin^kia ajakta” timiai”, timiayi.

Nuwan punuá kaarun Jesus tsuármiania nu

¹⁰ Ayampratin tsawantaj Israer-shuar iruntai jeanam Jesus unuuniak pujumiayi. ¹¹ Nuisha nuwá pujumiayi. Nu nuwasha tiasiúchu uwitin tuke jaa pujumiayi. Íwianch nin yajauch awajas apuna tuke ikiaramiayi. Túramu asa pan^kái nakuenkataj tukamá pen^ké tujinmiayi. ¹² Jesus nuna wáiniak, chicharuk “Nawantrú, ame jaamurmiya ankant ajasume” timiayi.

¹³ Nuna tinia ni uwejejai antinmiayi. Tura nú chichamaik nuwasha pan^kái nakuenkamiayi. Tura Yusa náarin uunt awajsamiai. ¹⁴ Tura Jesus ayampratin tsawantaj tsuaru asantai, iruntai jea untrj kajak iruntrarmia nuna timiayi “Sais tsawantin takaschatniukait; ayampratin tsawantaj tsuámartaj tusarum táchatniuitrume. Sais tsawant ana nu^j tátiniaitrume.”

¹⁵ Tura Jesus timiayi, “¡Ántar chichamtinia! ¿atum^j waakarisha atum^j umpu-ururisha yumi aarta^j tusarum ayampratin tsawantin atiarum júatsrumek? ¹⁶ Tura ju nuwasha, atum^j shuarj Apraám shuarnumiá akiiniaiti. Nii tiasiúchu uwí Satanás yajauch awajsamujaj jinkimuyayi. Nincha ayampratin tsawant a^jn yajauch awajsamunmayá atiachminkiait” timiayi.

¹⁷ Jesus nuna takui ni nemasrisha natsa^aararmiayi. Tura pen^ké shuar ni péⁿker túramurjin wáinkiar warasarmiayi.

Mustasa jinkiaí

(Mateu 13.31-32; Márkus 4.30-32)

¹⁸ Nuyá Jesus timiayi “¿Yusa akupeamurj warijia^jn métek-takuit? ¹⁹ Mustasa jinkiaíjia^j métek-takuiti. Mustasa jinkia^jncha shuar ni ajari^jn araamiayi. Tsapai, tsakaak, uunt numi ajasmiayi. Ti uunt asantai chin^ki ni kanawen pasun^marmiai.”

(Mateu 13.33)

²⁰ Tura junasha timiayi: “¿Yusa akupeamurj warijia^jn métek-takuit? ²¹ Tanta wakaprutaia métek-takuiti. Arinia núkap ana nu^j nuwá wakaprutain ishichik en^keámiayi. Túram ashí wakapruamiayi.” Tu timiayi.

Yupikiach waiti

(Mateu 7.13-14, 21-23)

²² Jesus Jerusarénnum jeattsá weak untsurí peprunam wayá unuuniarku-^{tak wémiayi.} ²³ Weaj chíkich shuar aniasmiayi “Uuntá, ¿uwemainia nu ishichikiait?”

²⁴ Tutai Jesus timiayi “Yupikiach wáitiniam wayataj tusam ti wakeritiarum. Kame untsurí wayataj tusar wakeriartatui, túrasha tujinkiaratui, tájarne.

²⁵ Jeá nérenniurj wáitin epenmiatai, atumsha aa wajarum nu, wáitiniam wajasrum untsúakrum “Uuntá, uratritia” títiatrume. Túrasha “Nékatsjarne. ¿Tuyantskaitrum?” turamtatrume. ²⁶ Nuyá átum títiatrume “Túrasha, uuntá, iisha ámijia^j yurumámji, ámijia^j umarmaji. Tura ii péprur^jncha unuiniame.” ²⁷ Túrasha nii títiatui “Tuyantskaitrum, nékatsjarne, tátsujrumek. Yajauch túrintirreka winiyan^ka kanaktiarum.”

²⁸ Nuyá Apraámsha, Isaksha, Jakupsha tura ashí Yúsnan etserin Yus akupeana nu^j wayawaru wáinkiarum tura aa ajapam pujusrum ti úutkuram naim tásarara ajattarme. ²⁹ Tura Yus akupeana nu^j, nantu tatainmaaniyasha

nantu akaatainmaaniyaṣha, arakiyaṣha, nunkaaniyaṣha taar, imia Israer-shuarchaitiat yurumátaí tusar pujusartatui. Tura atumsha, “Apraám shuáraitjai” táyatrum, wayaṣhtatrumé. ³⁰ Nuḷisha yamáí ukunmaani ainia nusha emka ártatui; tura yamáí emka ainia nusha nuḷisha ukunmaanĵ ártatui.”

Jerusarénnumaani Jesus wémiayi

(Mateu 23.37-39)

³¹ Nu tsawantaj̄ Pariséu aents Jesusan tariar tiarmiayi “Erutis mantamattsa wakerutmawai. Tuma asamtaí juyaṅka wetá.”

³² Tutai Jesus tímiayi “Werum nu kujancham ju titiarum: “Íistá. Yamaisha ishichik tsawant iwianchin j̄iĵin akupkartajai; túran jaancha tsuárartajai. Tura ukunam amuktatjai.” ³³ Tura Jerusarénnumaanĵ ishichik tsawant tuke wétiniatjai. Yúsnan etserin aya Jerusarénnumaanĵ jákatniuiti.”

³⁴ “ĵerusarénnumiátiram, Yúsnan etserin máiniaitrumé; tura Yus akatar akupturmakmania nusha kayajaj̄ tukurum máiniaitrumé! Tuma aĵin atash ni shiamprĵin etektana núnisnak Wisha weaktasan wakerimjiarme, túrasha nakitramarme. ³⁵ Iistarum. Atumniasha Yus ajapramaitrumé. Tura “Yusa náariĵin winiana nu, shiir atí” tútiatrumna nú tsawant jeatsaĵin penké wáitkiastatrumé. Nuna tájarne” tímiayi Jesus.

14

Áishmanĵ eaak-jaan Jesus tsuármiania nu

¹ Ayampratin tsawantaj̄ Pariséu uuntri j̄een Jesus yurumáttsa wémiayi. Tura chíkich Pariséu wariniak túrat tusar ii pujuarmiayi. ² Nuĵi áishmanĵ eaak-jaa Jesus pujamunam naka pujumiayi. ³ Jintinniuncha Pariséuncha Jesus aniasmiayi “¿Warí tárum? ¿Ayampratin tsawantaj̄ jaa tsuárminkiait. Tsuárchamniakait?” tímiayi.

⁴ Tura niisha áimtsuk pujuarmiayi. Nuñkia jaan antĵin tsuármiai. Tura “shiir wetá” tímiayi. ⁵ Nuyá Pariséun chicharuk, “Atumí umpuuarisha, waakarisha waĵ táurmanum akaiki iniamtaí, ayampratin tsawant aĵin nu chichamaik júatsrumek” tímiayi.

⁶ Takui áimkiatniun penké tujinkiarmiayi.

Nuátnaikiatin nampernum ipiaamu ármia nu

⁷ Ipiaamusha penkerĵi pujutainium pujustaitsar ti wakeruiniakui, Jesus nuna wáiniak j̄una jintinramiayi:

⁸ “Nuátnaikiatin nampernum penkerĵi pujutainium pujusaip. Nuĵi pujakminkia, chíkich ámijiaĵi nankaamas penkerĵi táchatpiash.”

⁹ “Tura ipiatmania nu chichartamuk “Chíkich iiktusta” turamchatpiash. Nuñkia chíkich nánkatkamu pujutainium wéakum natsartatme. ¹⁰ Antsu ipiatmakmin, nánkatkamu pujutainium pujustá. Nuñkia ipiatmamnia nu chichartamuk “Amikru, ámeká juĵi penkerĵi pujutainium pujustá” turamartatui. Nuĵaj̄ chíkich ipiaamu ainia nu, “nekas penkerinti” turamartatui. ¹¹ Iimiata, “penkerintjai” tu enentáimtuma nuka péejchach awajnastatui. Tura ímianchach enentáimtúmana nuka waantu ajastiniatui.”

¹² Nuyá Nin ipiaamua nuna chicharuk tímiayi “Amesha yurumáití tusam untsuktajtsam wakerakmeká, ame amikrumsha, yatsumsha, ame shuarumsha, írutramuram kuítrintin ainia nusha ipiaawaip. Nii ipiaamka, ataksha íksaĵin ámin ipiatmashtatuak. Nuĵaj̄ akikma átatme.

¹³ Antsu yurumáití tusam untsuktajtsam wakerakmeká, kuítrincha,

wekaicha, shutuapsha, kusurusha ipiaawarta. ¹⁴ Niisha akirmaktinian tujintiainiawai. Péñker shuar nantakiartatna nuĵi akinkiattame. Nu tuma asantai warastatme” tímiayi.

Uunt namperan Jesus nekapmá chichasmiania nu

¹⁵ Nu misanam pujuarmia nuyá, chikichik Jesus chichaamun antuk, Jesu-san tímiayi “Yus akupeamunam pachiiniak, yurumkunĵa ti shiir ainti.”

¹⁶ Nuna takui Jesus ĵuna jintintiamiayi: “Áishman namperan nájanuk, untsurĵi shuaran taartí tusa akatar akupkamai. ¹⁷ Yurumátin jeamtai “Wini-tiarum, yurumátin jeayi” tu tiarta tusa ni takarniurĵin akupkamai. ¹⁸ Tura winichminiaitĵi tusar ashí ujakarmai. Chikich timiai “Nunĵan yamáĵi sumarmakĵai. Iyutaj tusa wéakun winishtatĵai. Tsanĵkurturti” timiai. ¹⁹ Tura chikich chichaak “Wisha tias waakan sumarmakĵai. Nekapsatsan wakerajai. Tuma asan winishtatĵai. Tsanĵkurturti” timiai. ²⁰ Tura chikich chichaak “Yamáĵi nuatnaikĵai. Tuma asan winishtatĵai” timiai. ²¹ Takarin wakетки ni úntrĵin ashí nuna ujakmai. Nuna antuk niisha kajekmiayi. Tura ni takarniurĵin timiai “Ĵu péprunam péñker jintianmasha tura uchich jintiachin-masha weme, kuĵtrincha tura wekaichasha, shutuapsha, kusurusha itiaarta.” ²² Nuyá ukunam ni takarniurĵi taa chicharuk “Uuntá, ame turutmiamna nútĵksanak túramĵai; túrasha tuke anĵkant awai” timiai.’

²³ “Tutai ni uuntrĵi chichaak “Jintianam weme, chikich jintiachiniam weme, wáinmena nu ashí awayawarta. Winia jearuĵi piakat tusan wakerajai. ²⁴ Emka ipiaawarmajnia nuka penĵké chikichkíksha winĵkia yurumáchartatui, tajarme’ tímiayi.”

Kristu nemarsatin yúpichuchichuiti

²⁵ Untsurĵi aents Jesusĵai irunki wearmiayi. Niisha nuna apajás iis ĵuna tímiayi:

²⁶ “Shuar ni aparĵncha, ni nukurĵncha, nuarĵncha uchirĵncha, yachĵncha, umajncha Wijĵai nanĵkaamas enentáimtakka, tura shiir puĵustinian wakerak Winí winitĵun nakitiakka winia unuĵniamur ajaschamniati. ²⁷ Ni wakeramurĵin ajaĵeak ni krusĵi yanakĵi nemartatsna nu winia unuĵniamur ajaschamniati.’

²⁸ ‘Ĵeá yakí jeamtaj tusam wakerakmeka, kuĵtian urutmak ajapawaintĵaj tusam tura urutmajainĵk’ amukaintĵaj tusam emka enentáimsashtatmek. ²⁹ Túrut suk aya ukura iniaisam amuktin tujĵnkiamĵnĵkia, nuna wáiniainia nu, wishikiainiak ĵuna tiartatui: ³⁰ “Ĵiskua. Nu shuar jeamtinian nanĵkamamiayi. Túrasha amuktinian tujĵnkiamiayi.”’

³¹ “Tura uunt kapitíán chikich kapitíánĵai mesetan najanatin áchatpiash. Emka, niisha puĵus, tias mir (10.000) suntarĵai painti mir (20.000) suntar winiana nuna nupetkaintĵash tusa enentáimsashtatuak. ³² Tujĵntiakka, chikich kapitíán jeachat puĵaanak, nawamnaikiatai tusa akatar akupkashtatuak. ³³ Wats, “Kristu unuĵniamurĵi ajastinĵai, wi takakĵana ĵuna warí winia itiurtawa” tu enentáimsatniuitrume. Túrachkurmeka winia unuĵniamur ajastin tujĵnkierme.’

Wee michumarka yajauchiiti

(Mateu 5.13; Márku 9.50)

³⁴ ‘Weeka jeaku péñkeraiti. Tura michumarka ĵitirak atak péñker ati? ³⁵ Wee michumarka araaĵmatniunmasha yayaĵtsui. Tura tsuatnum ikius-masha ántrai. Aya ajapatniukete. Kuishim ákuĵkia antuktatum” tímiayi.

15

Jesus murik menkakamu chichaman unuiniamiania nu (Mateu 18.10-14)

¹ Akupniu kuítrín-juu tura yajauch shuarsha Jesusan anturkatai tusar tarú wearmiayi. ² Tuma asamtai Pariséusha, Israer-shuara jintinniurísha Jesusan áujmatainiak “Jusha tunáa shuaran itiaawai tura níjjaj yurumáiniawai” tiarmiayi.

³ Nuna tuiniakui Jesus ju métek-taku chichaman jintintiawarmiayi:

⁴ “Shuar sian (100) murikiun takuschampiash. Nu siánnumiá chikichik menkakamtai nuwintia nuíwinkia ni matsatmarín ikiuak, menkaka nuna ti eakchattawak. Wáintsuk iniaisashtatui. ⁵ Tura wáiniak yakainium awankek waras jeen wáketui. ⁶ Tura jeen jeá ni amikrín, íruramuríncha ikiaanak “Wíjjaj warastarum. Murikiur menkaka nuna wáinkiajai” tawai. ⁷ Wats, nuwintia nuiwi pénger shuar akui nayainpiniam warastin awai. Tura antsu chikichik yajauch shuar ni enentáin yapajíamtainkia, nú nankaamas warastin átatui, tájarne’ tímiayi.

Kuit emenkakman Jesus unuiniamiania nu

⁸ ‘Nuyá chíkich enentáimsatai. Nuwá tias kuítian takakna nuna chikichik menkakamtai, wáinkiatay tusa jinia ekeemak, jean japimiak émamkes eakchattawak. ⁹ Tura wáiniak ni amikrín, íruramuríncha ikiaanak, “Wíjjaj warastarum. Kuit menkakamia nuna wáinkiajai” tawai. ¹⁰ Núnisan yajauch shuar ni enentáin yapajíamtai, Yusa suntari matsatmanum ti warastin awai” tímiayi.

Uchi ni aparíin waketkitniun Jesus unuiniamiania nu

¹¹ Nuyá Jesus juna unuiniamiayi:

“Áishman jimiará uchin takakuyi. ¹² Tura pátatka uchi ni aparín timiai “Apawá, surustiniaitmena nu yamá surusta.”

“Tutai ni aparí ni kuítrín jímiapetek nakak mai uchin susamai. ¹³ Ishichik tsawant nankaamasaj pátatka uchi ni warirín írur jukí jeachat chíkich núnkanam wémai. Nuísha nánkamas yajauchin túrak kuítrín ashí ajapamai. ¹⁴ Ni kuitri ashí amuuka ajn nu nunkanam ti tsuka ámai. Niisha núnisan tsukarín wáitsamai. ¹⁵ Túmak takatan eaktajtsa nu nunkanmayá apachiin werimiai. Nu áishmansha kuchirín wáitrukta tusa akupkamai. ¹⁶ Uchi ti tsukamak kuchi ukatramun niisha yuátajtsa ti wakerimiai. Túrasha penké súchamai. ¹⁷ Tumáa pujus nuínkia enentáimpramai. “Winia aparuj takau shuar péngeran ti yurumáiniawai. Tura wikia juí tsukaruj wáitajai. ¹⁸ Wats, aparuj waketkitjai. Tura aparun chicharkun “Apawá Yúsjaisha ámijjaisha tunaan túrajai, titiajai. ¹⁹ Ame uchiram áchamniaitjai yamaikia. Ame takarni-urmea áantsanak átaj tusan wakerajai” titiajai” tu enentáimsamai. ²⁰ Tura wajaki ni aparíin waketkimiai” tímiayi.

“Tura ni aparísha jeachat winian wáiniak waitnentramai. Aparí tsékenki ínkiun miniakak mukunámai. ²¹ Nuínkia uchirísha timiai “Apawá, Yúsjaisha ámijjaisha tunáan túrajai. Ame uchiram áchamniaitjai.”

²² “Túrasha ni aparínkia ni takarniurín chicharuk “Ti pénger pushí itiarum áentsratarum, timiai. Tura uwejnum aweetaisha aweemtikiatarum. Tura sapatcha aweemtikiatarum. ²³ Túrarum waaka nueram ana nu maatarum.

Námper nájankur shiir enentáimsar yurumámi. ²⁴ Warí, ju winia uchir jakaapi-tia tu enentáimsamjai. Túrasha iwiaakui. Menkakama nuna wáinkiajai." Nuínkia ti warasarmai' tímiayi.

²⁵ 'Tumaj iwiaí úchikia takatnum pujumai. Tura wáketuk, jeá nuntumas jantsemáiniak túntuyamun antukmai. ²⁶ Nuínkia yaintri matsatun chikichiniak untsuk "¿Warimpait?" timiai.'

²⁷ 'Tura nii chichaak "Ame yátsum tayi. Túramtai ame apa waaka nueram maatai tawai, ame yatsum péñker tau asamtai" timiai.'

²⁸ 'Tura iwiaí uchi kajek wayatniun nakitramai.'

'Tuma asamtai ni aparí jiintiuki "wayata" timiai.'

²⁹ 'Tura uchisha aparín chicharuk "Wisha ámin umirkun untsurí uwitin ame takatrumin túraitjai. Nu nékame. Túrasha winia amikrujai námper najanatin chiipiuksha penké surichuitme. ³⁰ Tura ju ame uchiram nuwajai yajauchin túrak ame kuítrumin wasurkania nu támatai, waaka nueram máachumek" timiai.'

³¹ 'Takuí aparí chicharuk "Uchirú, ámeke wijiai tuke pujame. Tura wi takakjana nusha ashí áminuiti. ³² Tura ame yatsum jákaiti tu enentáimsamiai nu iwiaakuiti. Menkaka nu yamaikia wáinkiajai. Tuma asamtai námper najanar waraschatniukaitiai" timiai" tímiayi.

16

Takatan wáinin

¹ Ju métek-taku chichamnasha Jesus ni unuiniamu7 'Tura nii chichaak "Ame yátsrín unuiniamiayi.

"Kuítrintin áishmanka takatrin wáinniuri ámai. Tura nérenniun ujainiak "Ame wáinniuram ame kuítrumin nankamasa ajapeawai" tiarmai.'

² 'Nuna antuk ni wáinniurín untsuk "¿Warinia jusha turamainia? timiai. Yamaikia winia wáinnur áchattame. Tuma asamtai winia kuítrujai ititurkamea nu iniaktursata" timiai.'

³ 'Tutai takatan wáinin enentáimsamai. "Maaj, wisha ititurkatjak, timiai. Nunka táurtinniasha jeatsjai. "Kuit surusta" títinniasha natsamajai. ⁴ Winia takatur atsakui yurumkan ajamprusarat tusan túratajna nuna nekajai" tu enentáimsamai. ⁵ Nuyá nérenniun tumashmaku armia nuna ankant ankant untsukarmai. Emka tamia nuna chicharuk "¿Winia úuntur urutma tumashmakuitiam?" timiai.'

⁶ 'Niisha ámiuk "Asuitin sian taru tumashiitjai" timiai.'

'Tutai takata wáinin chicharuk "Pai. Papinium tumashrum ana nu juá: wárikmasmek pujusam, nu papí jaakam, chíkich papinium aya senkuentachik aarta" timiai.'

⁷ 'Nuyá chíkich tumashmaku támatai "¿Amesha urutmá tumashiitiam?" timiai.'

'Tutai nii chichaak "Shana sian taru tumashiitjai" timiai.'

'Tutai "Pai. Papinium tumashrum ana nu júiti. Chíkich papinium aya uchentak aarta" timiai.'

⁸ 'Nuyá takata wáinniu uuntri nuna nekáa "Nii yajauch túriniaiat imiá enentáimniuiti" timiai' tímiayi.

Nuyá Jesus tímiayi 'Yus-shuarjai nankaamas Yus-shuarcha ajjiai ni túratniriniak takainiak imiá enentáimkia ániawai.'

⁹ 'Ju nunkanam anankatin átsuk. Tura kuitsha aya ju nunkanmayankete. Tuma asamtai atumsha kuítrumjai "shuaran yaintaj" tu enentáimsatarum.

Kuitjaj yaĩntin amuukamtaĩ atumsha amuicha jeǵnam ipiaamu átaj tusarum túratarum.”

¹⁰ ‘Shuar ishichik takakna nujaj péńker túrakka, núkap takakna nujajsha péńker túrattawai. Tura ishichik takakna nujaj péńker túrachkunka, núkap takakna nujajsha péńker túrashtatui. ¹¹ Tuma asamtaĩ ju nuńkanmaya anańkartin kuitjaj péńker túrachkurmeka, tuke átin ana nujaj takastincha ĵitiur takastarumek? ¹² Takakme nuna Yus ikiatmasuiti. Nujaj péńker túrachkurminkia, atumnia átinia nuna ĵitiurak suramsat?’

¹³ ‘Takarniurj jimiara úuntrintin ajastinian tujintiawai. Warí, chikichnaka aneak chikichnaka nakitrashta túrattawai. Turya seńkuentachik aarta” timi-aituak. Chikichan umiruk chikichnaka umirkashtatui. Yussha kuitcha máimetek enentáimtuschamniaitrume” timiayi Jesus.

¹⁴ Pariséusha kuítian anen armia nu, ashí ni táman antukar Jesusan wishikrarmiayi. ¹⁵ Túmakui Jesus nin timiayi “Atumsha aents íimnianum péńker awajmamprume. Túrusha atumí enentáincha Yus péńker nékawai. Kame winia “nańkaamantuiti” turutit tusa wakera nuna Yuska nakitiawai.’

Yaunchu etserkamu, yamá etserkamu

¹⁶ ‘Juan étsertsain Muisáis aar akupkamia nunasha tura Yúsnan etserin unuiniarmia nunasha antuktin ármiai. Tura yamaisha tímianiaj ti shiir chicham awai. Yus akupeana nuj urukukit nuka paant etserkamuiti. Tura ashí shuar nuj pachiinkiataj tusar ni kakarmarjijajin’ ti takainiawai.’

¹⁷ ‘Túrusha yaunchu akupkamu ashí chicham uminkiatniuiti. Nu chicham uminkiashtinkia nayaimpisha nuńkasha amukatniujaj nańkaamas itiurchataiti.’ *

¹⁸ ‘Áishman nuarjĩn ajapa chikichan nuátkunka tsanirmawai. Tura nuwa ajapamu niiniurtakka nusha núnisan tsanirmawai.’

Kuítrintin áishman Rásarujaj

¹⁹ ‘Áishman kuítrintin ámai. Niisha imiá shiir pushin ti kuit ainia nujaj iwiarmamniuyi. Tura tuke tsawant yurumak ti kuit amia nujaj namperan najanniuyi. ²⁰ Tura kuítrincha ámai ni naarj Rásaru. Niisha kuchapruku tunamaruyi. Tuke tsawant kuítrinniu wáitirjĩn pujuyi. ²¹ Ti tsukamak kuítrinniu misarinia kakekan yuattsa wakerimiai. Tura yawasha ni kuchaprjĩn nukatiarmai. ²² Kuítrincha jakamai. Jakamtaĩ jaka shiir pujutainium, Apraám pujumia nuj nayaimpinmaya suntar júkiarmai. Kuítrinniusha jakamai. Jakamtaĩ iwiarsarmai. ²³ Jaka pujutainium wáitias pujus, pańkái íimias, Rásarun Apraámjaj pujuinian wáinkiamai. ²⁴ Wáiniak untsumuk “Apawá Apramá wáitnentrurta, timiai. Rásaruka tsara uwejejaj entsan uchupir winia iniarun imichturat akupturkata. Wisha juj jinium pujusan ti waitiajai” timiai.’

²⁵ ‘Tutai Apraám timiai “Uchirú enentáimpratá. Ame nuńká iwiaaku pujusam ti shiir pujumame. Antsu Rásaruka nuj ti yajauch pujumai. Tura niisha yamaikia juj áyamui tura ámeke wáitiame. ²⁶ Tura nú arant nánata ti uunt awai. Tuma asamtaĩ juyá aj wétinian wakeruiniayat tujintiainiawai. Tura aya juj tátinian wakeruinia nusha tujintiainiawai.”’

²⁷ ‘Nuńkia kuítrintin timiai “Nuńkia apawá Apramá, juna seajme. Winia aparu jeǵn Rasaru akupturkata. ²⁸ Nuńsha winia yatsur seńku matsatainiawai. Niisha ju wáitsatniunam tácharat tusa ujákartí, tájame” timiai.’

* 16:17 Mateu 19.1 ya seńkuentachik aarta” timiai-12; Márkus 10.1-12

29 ‘Tutai Apraám timiai “Muisáis áarman tura Yúsnan etserin áarman takakainiawai. Nuna umikiarti.”’

30 ‘Tutai kuítrintin áimkiamai “Túrasha apawa Apraamá, antsu jakamunayá nantaki, shuar we ujakam enentáin yapajíáwarainti.”’

31 ‘Tura Apraám timiai “Muisáis áarman tura Yúsnan etserin áarman an-turainiachkuŋka jaka nantaki we ujakmasha antukchartatui” timiai.” Tu áujmatsamiayi Jesus.

17

Yajauch túrumtikiatin ti tsúumainti

(Mateu 18.6-7, 21-22; Márkus 9.42)

1 Jesus ni unuiniamurj̄n juna tímiayi, “Aentsun yajauchin túrumtikiattana nu tuke átatui. Tura shuar ni áin tunaan wakerumtikna nu aneartí. 2 Ju shuar uchich ainia nuna yajauchinium túrumtikna nuna Yus imiá asutiáttawai. Tuma asantai nuna túratsaj̄n uunt kayajaj̄i kuntujnum jin̄kiá nayaantsanam ajunkam maak ainti. 3 Túrasha atumek íimiastarum. Ame yatsum ámin tunáa túrutmamtainkia chicharkata; tura niisha “tsaŋkurturta” túramkuin̄kia tsaŋkurata. 4 Chikichik tsawantiniŋ siati túrutmamtai, tura “tsaŋkurturta, atakka túrashtajai,” siati túramkuin̄kia, tuke tsaŋkurata.”

Yus nekas enentáimtakria tujinkiashtatji

5 Jesusa unuiniamurj̄ Nin chicharuk “Yus enentáimtajnia nú nan̄kaamas enentáimtustin yáinmaktá” tiarmiayi.

6 Tutai Jesus tímiayi “Mustasa jinkíá ti ishitiúpchich ana núnisaŋ ishichkisha Yus enentáimtaikurmeka, sikiumuru numi wajana nu, “Wajamurmj̄yan̄ka ukuiniakam nayaantsanam wajasta” tákurmin nú numi umirtamkainti.’

Yusa takatrj̄ takasar “ti pen̄ker túraitji” tíchatnuiitji

7 ‘Atumí takarniurj̄ arakmasua amik, waakancha iis támatai, ¿nú chichamaik amesha, “Winitíá, yurumáitiá” tíintmek? 8 Atsá. Antsu, “yurumak iwiarturata. Wi yurumátiŋ tura umartincha surusminiam iwiarnarta. Nuyá ame yurumátá.” Nu tíchaintmek. 9 Nii túratin ana nunak túratsuk. Tuma asantai yuminsashtatme. 10 Atumsha núnisrumek Yus túramna nu ashí umikiam “ti pen̄ker túraitjai” tíchatnuiitme. Antsu “aya ii túratniurj̄ ana nuke tura asar íikia ántrajtji” títiniaitme.” Tu tímiayi Jesus.

Tias áishmaŋkan tunamarun Jesus tsuáarmiania nu

11 Jesus Jerusarénnum wesa Kariréa nun̄ka ikiuki Samaria nun̄kanam nan̄kaamakmiayi. 12 Tura péprunam jeamtai, tias áishmaŋ ripra suŋkurjaj̄ tunamaru armia nu, arant wajasarmiayi. 13 Tura untsumainiak “Uunt Jesusá, waitnenturta” tiarmiayi.

14 Jesus nin wáiniak, “Pátrij̄ werirum iniaktumastarum” tímiayi.

Tura wésar pen̄ker ajasarmiayi. 15 Nuyá chikichik ni tsuamarman nekáa kakantar chichaki Yusa náarj̄n uunt awajki wakетки Jesusan tarimiai. 16 Yuminsataj tusa Jesusan tikishmatar piniakumar tepesmiayi. Nu áishmaŋka Samarianmayáuyayi.

17 Nuna wáiniak Jesus tímiayi “Tsuámaru tiáschakait. ¿Chikich nuiwisha tui pujuinia? 18 ¿Ju yajaya áishmaŋ níŋkik Yusa naarj̄ uunt awajsataj tusa wakетки tai?” 19 Nuyá áishmaŋkan tímiayi, “Winia nekas enentáimtursa asam pen̄ker ajasume. Wajakim shiir weta” tímiayi Jesus.

¿Yusa akupeamurj urutaik ati?

(Mateu 24.23-28, 36-41)

²⁰ Pariséu aents Jesusan aniak “¿Yusa akupeamurj urutaik ati?” tiarmiayi.

Tutai Jesus tímiayi, “Yusa akupeamurj paant wáinkiachminiaiti. “Yamaí nanƙamnai” tichamniaiti. ²¹ “Juí awai, nuísha awai” tíchamniaiti. Warí, Yusa akupeamurjinka atumjín pujawai” tímiayi.

²² Nuyá ni unuiniamurj chicharuk juna tímiayi: “Tsawant jeattawai atumsha Winia Aents Ajasu tutain “aya chikichík tsawantkesha Nii wáinkiarƙia mak” turuttiatrume. Túrasha tujinkiatarme. ²³ Aents Ajasu tutai “juí pujawai, nuísha pujawai” tuíniakui weriirap. Tana nu nemariirap. ²⁴ Wi, Aents Ajasuitjiana nu tátiniur tsawantur jeamtai paant wáitkiattarme. Peem péetuk ashí nayaimpin tsáapnin awajna núnisan wi taamu paant átatui. ²⁵ Tura nu túrunsañ yamaí pujuinia nu Winia nakitruiniakui ti wáitsatniuitjai. ²⁶ Winia atak tátiniur jeamtai, yaunchu Nuái pujumia nú tsawantin túrunamia núnisan túrunattawai. ²⁷ Yurumáwarmiayi, umararmiayi, nuatnaikiarmiayi, ni nawantrj nuatnakat tusa surukarmiayi. Tumáa pujuiniaí Nuái uunt kanunam enƙemprantai, amarak nu aentsnasha mash amuukarmiayi. ²⁸ Tura Sutuma péprunmasha Rauta írutramurjsha núnisan Yusa asutiátniurj enentáimtutsuk pujuarmiayi. Yurumáwarmiayi, umararmiayi, sumakarmiayi, surukarmiayi, ajancha ajamarmiayi, jeancha jeammarmiayi. ²⁹ Tura Raut Sutuma péprunmaya jinkintai asupri tutai kaya keek yútana ántsañ nayaimpinmaya kakeetuk nu áentsun mash máawarmiayi. ³⁰ Núnisan winia atak tátiniur jeamtai enentáimtutsuk pujusartatui.’

³¹ ‘Nu tsawant jeamtai jea yakiinj pujana nú shuar ni warirj achik-taj tusa akaikishti. Jeá wayashti. Tura kampunniunam wekaana nú shuar ni jeen waketkishti. ³² Rauta nuarj túrunamu enentáimpratarum. ³³ Aya ju nuñkanmayañ enentáimias “iwiaku átaj” tana nu ni iwiakmarj emenƙáktatui. Tura ju nuñkanam ni iwiakmarj emenƙana nu nekas iwiakma ana nuna wáinkiatƙawai. ³⁴ Paant tájarme. Nú káshitin jimiará áishmañ nuu peaknumañ kanú tepeartatui. Chikichik junaktiatui, chikichikia ikiunkittiwai. ³⁵ Jimiará nuwa máí-metek nekée pujuartatui. Chikichik junaktiatui, chikichikia ikiunkittiwai. ³⁶ Jimiará áishmañ kampuniunam wekaniartatui. Chikichik junaktiatui, chikichikia ikiunkittiwai.” Tu tímiayi.

³⁷ Nuna antukar “Uunta ¿tuj túrunatta?” tiarmiayi.

Tutai ni chichaak “Jaka tepana nuj chuan ƙautkartatui.”

18

Shuar yawetsuk Yúsan tuke áujsatniuiti

¹ Shuar yawetsuk Yúsan tuke áujsatniua nuna unuiniartaj tusa Jesus ju métek-taku chichaman tímiayi:

² “Chíkich péprunam shuaran akupin amai. Nú áishmañ Yúsnasha asham-chauyi; shuárnasha péñker enentáimtichuyi. ³ Tura nú péprunam waje amai. Niisha shuáran akupniur chicharuk “Áishmañ winia yajauch awajtusmania nu írtusta” tusa tuke waketrú pujuyi. ⁴ Yámankamtaikkia nin anturkatniun nakitmiiai. Tura ukunam enentáimias “Wisha Yúsan ashamachiatnak shuárnasha péñker enentáimtichuiatnak ju waje tana nuna túrattajai. ⁵ Warí niisha tuke taa itit awajtatsuk. Tuma asamtai nin kakerkaj tusan wárik túrattajai” timiai” tímiayi.

6 Nuyá uunt Jesus tímiayi “Shuaran akupin yajauchiitiat nuna timiai.
7 Tura Yus ti péñker asa, ni achikmarin tsawajsha, káshisha untsuamka
nú nan̄kaamas anturkashtatuak. ¿Yáitsuk men̄kakatuak? 8 Atsá, wárik
yáinkiatatui, tájarne. Tura Wi Aents Ajasuitjiana jū atak támatai, ¿shuaran tuke
Winia nekas enentáimturainia nuna wáinkiatjash?” tímiayi Jesus.

Pariséusha, kuítian-juuncha Yúsan áujšarmia nu

9 “Péñkeraitjai” tu enentáimtumainiak chikichnaka yajauch enentáimtiarmia
nuna Jesus nekapmá chichasmiayi. Juna tímiayi:

10 “Jimiará áishman̄ Yusa Uunt Jéen Yus áujšatai tusar wearmai. Chíkichkia
Pariséuuyi, chíkichkia kuítian-juuyi. 11 Pariséusha wajaki Yúsan áujuk júnis
tímiayi: “Yusrú, chíkich áishman̄ kasa, yajauch, tsanirmau ainia nujají métekcha
asan yumĩnsajme. Tura jū kuítian-juu wajana jújajšha métekchaitjai. 12 Warí,
Ame akupkamna nuna iniankasan wisha chikichík semanatin̄in̄ jimiará
tsawant ijarman̄ áujeajai; tura wi achiajna nuna tiásnumiá chikichkiniak
Yúsnaiti tusan akankan súajai.” Tu tímiayi.

13 “Tura kuítian-juusha arant wajas, nayaimpinmaan̄i pankájí ímsatniunkesha
natsaam̄ak, tsuntsuma, ni netsepen awatí “Yusá, ti tunaitjai. Waitnétrurtá”
tímiayi.”

14 “Wats tájarne, nu kuítian-juu shuar Yus ímmianum ni enentáí péñker
awajnas ni jéen waketkimiai. Tura Pariséuka tamia núnisan̄ waketkimiai.
Nekaatarum. Shuar nan̄kaamantu enentáimtumana nuka péjchach awajnas-
tatui. Tura antsu péjchach enentáimtumana nu, nan̄kaamantu awajnatatui”
tímiayi Jesus.

Uchisha Jesusna áminiaiti

(Mateu 19.13-15; Márkus 10.13-16)

15 Jesus antiñkiarat tusar uch̄in̄ itiararmiayi. Tura Jesusa unuinia-
murjsha nuna wáinkiar suritkiarmiayi. 16 Tura Jesus nin untsukar tímiayi
“Uchi Winí winitin̄ tsan̄kamkatarum, surimkairap. Enentáimsatarum.
Uchichia áintsan̄ enentáimtumana nú shuárak Yus ni enentáin̄ akupin ajas-
miniaiti. 17 Uchi ni úuntrin̄ umira núnisan̄ shuar Yúsan umiáchkunka Yus ni
enentáin̄ akupin ajaschamniaiti.” Tu tímiayi Jesus.

Kuítrintin áishman̄ Jesusjají áujmatsamiania nu

(Mateu 19.16-30; Márkus 10.17-31)

18 Shuara uuntrī Jesusan̄ tarí áujšamiayi. “Uuntá, amesha péñkeraitme.
Tuma asam, turuttia, ¿warinia túrakna tuke iwiaaku átataj?” tímiayi.

19 Tutai Jesus, “¿Urukamtia Winia, péñkeraitme, túrutam? Aents péñkerka
atsawai. Aya Yusak péñkeraiti. 20 Tura Yus akupkamu ana nu péñker nékame.
Tsanirmawairap, man̄kartuawairap, kasamkairap, tsanumprurairap, ame
apasha, nukusha shiir̄ enentáimtustarum. Nusha nékame” tímiayi.

21 Tutai áishman̄ tímiayi “Uuntá, úchichik mash umiki tsakaruitjai.”

22 Jesus nuna antuk “Chikichik taatramsaí, tímiayi. Ame takakmena nu ashí
surukam kuítrinch̄a ainia nu susarta. Nuiñkia nayaimpiniam kuítrum átatui.
Túram nemartustaj tusam winitia.”

23 Tura nuna antuk, nu áishman̄ ti kuítrintin̄ asa ti kuntuts enentáimpramiayi.

24 Tura kúntuts enentáimpram̄tai Jesus nuna nekáa “Kuítrintin̄ ainia nu Yus
akupeamunam pachiinkiatin̄ ti iturchataiti, tímiayi. 25 Kamiriuka, uunt ana
nu, auja j̄in̄ wayat̄in̄ iturchataiti. Tura shuar kuítrin̄ ti enentáimtana nu Yus
akupeamunam pachiinkiatin̄ nú nan̄kaamas iturchataiti.” Tu tímiayi.

²⁶ Tura nuna antukarmia nu tiarmiayi “¿Nuinkia yaki uwempramniait?”

²⁷ Tutai Jesus tímiayi “Aents tujintiainia nuna Yuska páchitsuk túramniaiti.”

²⁸ Nuyá Pítur Nin chicharuk tímiayi “Uuntá, iikia Ámin nemarsataj tusar ii takakmaaka ikiukji.”

²⁹⁻³⁰ Tutai Jesus tímiayi “Shuar Yus akupeana nuna túrataj tusa ni jeen ikiuakka tura núnisaj ni aparíncha, nukuríncha, yachínkisha, nuwenkeshá, uchirínkisha ikiuakka ju nuñkanmasha núkap wáinkiatstawai nu shuar. Tura tuke iwiaaku pujustinniasha wáinkiatstawai.”

Ataksha ni jákatniurín Jesus ujakmiania nu

(Mateu 20.17-19; Márkus 10.32-34)

³¹ Jesus ni tuse unuiniamurín akanki ikiaanank juna tímiayi:

“Jerusarénum jeatemaji. Juisha Jerusarénum Winia, Aents Ajasu tutaín, túrunatniurun Yúsna etserín yaunchu átrurarmia nu uminkiatstawai.

³² Apachnium surutkartatui. Túrawar wishikrurar, katsekrukar usukru-awartatui. ³³ Awatiar mantuáwartatui. Túramaitatnak menaintiú tsawantaj nantaktiatjai” tímiayi.

³⁴ Tura Nii tímiania nuna nekas túrunattawai, tícharmiai. Wariniak ta tusar nekaacharmiayi.

Jirikiúnmayá áishmankan Jesus ímtikmiania nu

(Mateu 20.29-34; Márkus 10.46-52)

³⁵ Jesus Jirikiú péprunam nuntumsaj, nuí áishman jji kusuru, kuítian surusarat tusa jintiá pujumiayi. ³⁶ Untsurí aents nankaamainian antuk “¿war-ínkit?” tímiayi.

³⁷ Tutai, “Nasarénumiá Jesus nankaamawai” tiarmiayi.

³⁸ Kusurusha nuna antuk unsumuk “Jesusá, Uunt Kapitián Tawit weeachukaitiam. Tátiniuya núchakaitiam. Winiaja waitnentrutra” tímiayi.

³⁹ Eemak wearmiania nu chicharainiak “takamatsata” tiarmiayi.

Tutaisha nú arant unsumuk “Tawit weeachukaitiam; winiaja waitnentrutra” tímiayi.

⁴⁰ Nuinkia Jesus wajas “ítitarum” tímiayi. Tura nii támatai, ⁴¹ “¿Warí itirtukat tusamea wakerutam?” tímiayi.

Tutai kusuru áimiuk “Uuntá, ímtiasan wakerajai” tímiayi.

⁴² Tutai Jesus chichaak “ímtia. Winia nekas enentáimtura asam péñker ajasume” tímiayi.

⁴³ Nu chichamaik kusuru íimmiayi. Tura Yusa naari uunt awajki Jesusan nemarmiayi. Tura ashí aents nuna wáinkarmia nusha Yusa náarín uunt awajsarmiayi.

19

Sakú Jesusjai

¹ Nuyá Jirikiú péprunam wayá nuí wekaikini ajamiayi. ² Nuí kuítrintin áishman ni naari Sakú pujumiayi. Nu Sakú kuítian juu úuntriyayi. ³ Aents ti káunkámtai, Sakú ti sítarach asa, Jesusan ístaj tukamá tujinkiamiayi. ⁴ Tuma asa Jesus nuke nankaamaktin asamtai, eemki tsékiniki sikiumuru numi wajamunam wakamiayi iistaj tusa. ⁵ Jesus nuí nankaamak pankáí ímias chicharuk “Sakú wárik akáikitiá. Ame jeemjin yamá kanartiniatjai” tímiayi.

⁶ Tutai Sakíusha wárik akaiki, shiir enentáimias Jesusan itiaamiayi. ⁷ Ashí aents nuna wáinkiar “Maaj, Jesus tunáa áishman̄ka jeen pujawai” tusa mai tunaim ajarmiayi.

⁸ Nuyá Sakíu wajaki Jesusan chicharuk “Ístá Uuntá, wi takakjana juna jímíapetek nakakan kuítrincha ainia nuna susartatjai. Tura wáitruan chíchian kasarkaitkiuncha menaintiu patatsan awainkittiajai” tímiayi.

⁹ Tutai Jesus tímiayi “Ju áishman̄ Apraáma shuárintiat yamá niisha núniujai uwempra asa nekas Apraáma shuarī ajasuiti. ¹⁰ Wisha Aents Ajasu asan men̄kakarú ainia nuna eakan uwentikrartaj tusan táwitjai.” Tu tímiayi.

Kuítian nekapmá chichasmiayi

¹¹ Nu aents Jesusan anturkarmia nu “Jerusaré̄num jeawakrin Nii, Yus anaikiamu asa, wárik akupin ajastatui” tu enentáimsarmiayi. Tuma asamtai wésar Jerusaré̄num nuntumsaraī, nuna enentáimsaraīn tusa Jesus juna métek-takun chichasmiayi:

¹² “Áishman̄ penker̄j amai. Nu áishman̄sha jeachat chíkich núnkanam kapitián náamkan tátaj tusa wemai. ¹³ Tura wétsuk ni takarniur̄in tias armia nuna untsukarmai. Tura an̄kant an̄kant kuit kurij̄jai nan̄kaamas pé̄nker armia nuna sūniak “Ju kuit̄jai wi táatsaīn takakmá ajatarum” timiai.’

¹⁴ “Tura ni nun̄kéniā shuarka nakitiarmai. Túmainiak “nu áishman̄ ii kapitián̄trī ajasaīn tusar nakitiaji” nu titiá tusar áishman̄kan akatrar akuptukarmai.’

¹⁵ “Tuma aīn kapitián náamak ni nun̄kén waketki tamai. Taa “winia kuítruj̄jai warí túrarum” títiáj tusa ni takarniur̄in kuitia súsarmania nuna untsukarmai.’

¹⁶ “Ni takarniur̄i emka chikichik taa “ame kuítrum̄jai takakmasan tias patasan achikmajai” timiai.’

¹⁷ “Tutai kapitián chichaak “Pé̄nker túrame. Ishichik susamjamna nújain̄k̄i wi tímiajna tímiatrusmek túrame. Tuma asakmin tias pé̄prun akupin awajsattajme” timiai.’

¹⁸ “Chíkich taa “Ístá Uuntá, ame kuítrum̄jai takakmasan sen̄ku patasan achikjai” timiai.’

¹⁹ “Nunasha chicharuk “Amincha sen̄ku pé̄prun akupin awajsattajme” timiai.’

²⁰ “Nuyá chíkich taa “Uuntá, ame kuítrumin paniij̄jai ijian ikiusmajai.

²¹ Amesha kakaram chichau asakmin, ikiuschiatam achin asakmin tura arakmachiatam juu asakmin ashankamjame” timiai.’

²² “Tutai kapitián timiai “Maaj, amesha ti yajauchiitme. Ame támena nuke makurmawai. Wi kakaram chichau aisha, ikiuschiatan achin aisha tura araknasha arakmachiatan juu aisha, ²³ nuin̄kiā z̄urukamtia kuit-ikiutainiam ikiuschamam? Nuin̄kiā wi atak táakun patasan achikiāajna” timiai. ²⁴ Tura nūj wajarmia nuna chicharuk “Kuítian takakmar̄i juruktiarum; túrarum tias takakna nú shuar susatarum” timiai.’

²⁵ “Tura niisha chichainiak “túrasha Uuntá, tias takakja” tiarmai.’

²⁶ “Tutai kapitián chichaak “Takakna nuj̄ai takaakuin̄kia patatnastatui tájarme. Tura takakna nuj̄ai takaachkuin̄kia ishichik takakkuisha jurunkit-tiawai. ²⁷ Tura winia nemasur kapitián ajasaīn tusar nakitrurarmania nu itiatarum. Tura wisha íimiān máatárum” timiai.” Tu tímiayi Jesus.

Jerusaré̄num Jesus wayamiayi

(Mateu 21.1-11; Márkus 11.1-11; Juan̄ 12.12-19)

²⁸ Nuna tuasua amik Jesus Jerusarénnumaani wémiayi. ²⁹ Petpajái pepru tura Petania péprusha Uriwiu náinnium tjiuchiayi; nuí jeastatuk ajatemas ni unuiniamuriñ jímíarun chicharuk, ³⁰ “Tjiuch péprunam wetarum. Túrarum nuí umpuuruch ekemtukchamu jínkiamu wájá wáinkíattarme. Nu atíarum itíatarum. ³¹ Tura “¿urukamtai atíarum?” turamainiakuisha, “ii uuntri wak-erawai” títiarum” tímiayi.

³² Tutai unuiniamuriñ wear, Jesus timia ímiatrusañ wáinkíarmiayi ³³ Tura umpuuruchin atíakui nérentin chichainiak “¿Urukamtai umpuuruchsha atíarum?” tiarmiayi.

³⁴ Tutai unuiniamusha “Ii uuntri wakerawai” tiarmiayi.

³⁵ Tura umpuuruchin Jesusan itíariarmiayi. Túrawar ni pushiriñ umpuuruchiniam awantkar Jesusan ekenkarmiayi. ³⁶ Tura Jesus wétinnium ni pushiriñ jintianam ayaparar áintrarmiayi. ³⁷ Tura Uriwiu naint awañkénamunam tjiuch ajasarmatai untsuriñ aents Jesusan nemariarmia nu warainiak kakantar untsumainiak aents tujintiamun untsuriñ túran wáinkiaru ásar Yusa náariñ uunt awajsarmiayi. ³⁸ “Yusa náariñ winiana ju ii uunt Akupniuti. Nincha Yus shiir awajsati. Nayainpiniam pujuinia nu shiir enentáimsar Yusa náariñ uunt awajsati” tiarmiayi.

³⁹ Tura Pariséu aents nuí páchitra pujuarmia nu Jesusan chicharainiak “Uuntá, nemartamainia nu “takamatsata” tiarta” tiarmiayi.

⁴⁰ Tutai Jesus tímiayi “Nuínkia ju takamatsarmataínkia, kayasha untsumkarainti. Nuna paant tájarme” tímiayi. ⁴¹ Jerusarénnun tjiuch ajatemas péprun wáiniak útuk júnis tímiayi: ⁴² “Jerusarénnunmiá shuártiram, ju tsawantinkesha shiir pujustintrum nekaarmeka maak. Túrasha yamaikia nekaatin nankaamasai. ⁴³ Kame ti itíurchat tsawant jeartamtatrum. Atumí nemasriñ nuñkajai aa-tanishan tanishmarar téntatramkattarme. Mesetan najatramattarme, tura áatusha junisha mash árenmaktatrum. ⁴⁴ Túrutma nuñká ajuñmartatrum. Tura atumíin pujuinia nuna máawartatui. Tura ashí emesrarmatai ishichkisha kaya irumpramusha penké atsuttawai. Wi Yusa anaikiamuriñ tarijrumna nu nekaachu asakrumin túrutmattarme.” Tu tímiayi.

*Yusa Uunt Jeeñ suruktinían Jesus surinkiamiania nu
(Mateu 21.12-17; Márkus 11.15-19; Juan 2.13-22)*

⁴⁵ Nuyá Jesus Yusa Uunt Jeeñ wayá suruktasa pujuarmia nuna sumaktasa pujuarmia nunasha jiki awemarmiayi. ⁴⁶ Túrak juna tímiayi:

“Yús-Papiniun yaunchu aarma awai: “Winia jearka Yus áujsatin jeaiti” tu áarmaiti. Túrasha átumka kasáa matsamtaiya nútikiarme” tímiayi.

⁴⁷ Tuke tsawantin Yusa Uunt Jeeñ Jesus uwempratin chichaman unuiniak pujai Israer-patri úntrisha, Israer-shuara jintinniurisha, tura pepru úntrisha, itíur máamniakit tusar ti enentáimsarmiayi. ⁴⁸ Túrasha ashí aents émamkes aturainiakui máatniun tujinkíarmiayi.

20

*Yusa kakarmarijajai Jesus takasmiania nu
(Mateu 21.23-27; Márkus 11.27-33)*

¹ Yusa Uunt Jeeñ Jesus uwempratin chichaman unuiniak pujai Israer-patri úntrisha, Israer-shuara jintinniurisha, Israer-shuara úntrisha táarmiayi.

² Taar Jesusan chicharainiak “¿Yana chichamejají ju túram? ¿Ya ju túratniuncha akuptamkait?” tiarmiayi.

³ Tutai Jesus tímiayi “Wisha aniaštajrum tusan wakerajrume. ⁴ ¿Ya Juágnasha imiakrattia tusa akupkamia? ¿Yusak? ¿Aentsuk? Turuttiarum” tímiayi.

⁵ Tútaisha niisha nuamtak warintiajik mai tunai ajarmiayi. ““Yus akupkaiti” tákurniñkia, “¿urukamtai enentáimtuscharum?” turamtatji. ⁶ Túrasha “aents akupkaiti” tákurnisha ashí aents kayajají tukurmar mantamattaji. Warí “Juan Yúsnan etserniuiti” tuíniatsuk” tiarmiayi. ⁷ Nuñkia Jesusan ániak “Iisha nékatsji, Juan imiakratinniasha yátsuk akupkamia” tiarmiayi.

⁸ Tutai Jesus tímiayi “Wisha núnisnak winia akuptukua nuna tíchattajrume” tímiayi.

Pénker-takachu armia nu
(Mateu 21.33-44; Márkus 12.1-11)

⁹ Nuyá Jesus ju métek-taku chichamjají aentsun jintintiamiayi:

“Áishmaní ni ajarín uwa araa amuk, shuaran takartusti tusa ikiukmiai. Tura niñkia wau táchataj tusa jeachat wémai. ¹⁰ Tura júuktin tsawant jeamtai juukman akanak jurumkit tusa takarniurín takau shuarijn akuptukmai. Tura takarniuríncha katsumkar áyatik awainkiarmai. ¹¹ Nuyá nérentin chikich takarniurín akupkamai; tura nunasha núnisan katsekkar, awatíar, sútsuk akupkarmai. ¹² Nuyá ataksha chikichan akupkamai. Tura nunasha takau shuar katsumkar akupkarmai.’

¹³ ‘Nuyá ukunam ajá nérenniurí “Itiurkatjak, timiai. Winia aneamu uchirun akupkattajai. Nin wáinkiar shiir enentáimtuschartimpiash” timiai.’

¹⁴ ‘Túrasha takau shuar nuna wáinkiar, nuamtak chichainiak “Juka ajá nérenniurí ajastatui. Maatai. Nuikia aja iiniu átatui” tiarmai. ¹⁵ Nuna tuíniak ajanmaya jíiki máawarmai.’

Nuyá Jesus aniasmiayi ‘Wats ¿warí enentáimsarum, ajá nérenniurí itiurkat-tawa? ¹⁶ Niisha taa, nu takau shuaran máawartatui. Tura núnkanka chikichan susattawai” tímiayi.

Nuna anturkar “Yus núnaka tsan̄katkashti” tiarmiayi.

¹⁷ Tura Jesus nin émamkes ísar tímiayi “¿Nuikia Yus-Papinium áarma nu warintiu? Ju áarmaiti:

Kayan pénkernak jea jeamin “yajauchiiti” tusar ajapawarmia nu ashí kayajají nan̄kaamas péñker apujsamuiti. ¹⁸ Nu kayan tukumainia nuka kupinrattawai. Tura nu kaya shuarum iniarka nu shuaran tsai tsai awajsattawai. Tu áarmaiti.

Pariséu achiktai tusar wakeriarmiania nu
(Mateu 21.45-46; 22.15-22; Márkus 12.12-17)

¹⁹ Israer-patri uuntri tura Israer-shuara jintinniurísha “nu métek-taku chichamjají in túramji” tu nekaawar nuikí Jesusan achikiar emetatai tusar wakeriarmiayi. Tura untsurí shuar Jesusan wakeruiniakui, ashamainiak túracharmiayi. ²⁰ Tura Kapitíánnium suruktai tusar wakeruiniak mamik-mau shuaran Jesusan akuptukarmiayi. Nu shuar péñker shuara núnisan jeariar, Jesus nékatsuk yajauch chichakat tusar, aniaštaj tusar wearmiai. Ni chichakmaríjjají uuntnum suruktai tusar túrawarmiayi. ²¹ Tu enentáimsar tíarmiayi “Uuntá, ame tuke nekas chicham chichaame, nu nékaji. Aents pátatek íiyatsme, antsu nekas Yusa jintí jintintiami. ²² Wats turuttia,

¿Rúmanmayá uunt akupin ii kuitrī akiktin péñkerkait? ¿Akiktinkiait? ¿Suritkiat-niukait? Nu nekaatai tusar wakeraji” tiarmiayi.

²³ Tura Jesuska ni yajauch enentáimsamurīn nekáa chicharainiak, ²⁴ “Kuit itiatarum. ¿Yana yapī tura yana naarī jūī áarmait?” tímiayi.

Tutai nii tiarmiayi “uunt akupniunu.”

²⁵ Tutai Jesus tímiayi “uunt akupniunu átinia nu uunt akupin susatarum. Tura Yusna átinia nu, Yus susatarum.”

²⁶ Aents ántamunam ni chichakmarijīai achiktinian penké tujinkiarimiayi. Antsu aya ímprarmiayi tura takamtak pujusarmiayi.

*Satuséusha achiktai tusar wakeriarmiania nu
(Mateu 22.23-33; Márkus 12.18-27)*

²⁷ Nuyá Satuséu “jakamunmayá penké nantakchamniaiti” tuinia nu, Jesusan aniaatai tusar tariarmiayi. ²⁸ Aniiniak tiarmiayi “Uuntá, Muisáis juna áartampramijai: “Áishman ni nuarī júreatsān jakamtānkiā ni yachī nu wajen nuátkatī, yachīn yajutmatsa.” Tu áarmaiti, tiarmiayi. ²⁹ Wats, siati yachī áрмаi, tiarmiayi. Iwiajri nuwan nuatak yajutmatsuk jakamai. ³⁰ Ni yachī wajen akintiak, nuátak, niisha yajutmatsuk jakamai. ³¹ Nuna yachīsha núnisañ nu wajen nuátkamai; tura núnisañ ashī siati nuna patānki nuátkarmai. Yajutmatsuk yajutmatsuk kajīnkiarmai. ³² Tura ukunam nuwasha jakamai. ³³ Nantaktin tsawantāi, nantakiarmatai, ¿yana nuarīn ati? Ashī siati nuátkacharmaka” tiarmiayi.

³⁴ Tutai Jesus tímiayi “Ju nunkanman nuatnaikiatin awai. ³⁵ Tura nantakiar atak iwiaaku ámin ainia nuka nuatnaikiachartatui. ³⁶ Warī, jákashtin ániatsuk. Nayaimpinmayá suntara áintsān ajasartatui. Tura nantakiaru ásar Yusa uchirī ajasartatui. ³⁷ Tura jákaru nantakiartin ainia nuna imia Muisáis jintiarmiayi. Warī, numichiniam ji wajái keamunan Yus niijīai chichaamun, Yus-Papinium Muisaiska áarmiayi. Nú áarmanan Uunt Yus Apráama, Isaka tura Jakupu Yúsrīnti, tímiayi. Nú áishman yaunchu jákaru aīñ “ni Yúsrīnti” tímiayi. Nuna taku nantaktin awai tu jintiarmiayi. ³⁸ Kame jaka menkakatniunam pujuinia nuna Yúsrīnchuiti. Tuma asamtai jakáa Yúsrīnti tíchamniaiti. Antsu iwiaaku ainia nuna Yúsrīnti. Ashi Niiniun iwiaarkainiawai” tímiayi.

³⁹ Nuna antukar Israer-shuara jintinniurī “pénker tame, Uuntá” tiarmiayi.

⁴⁰ Tura nuyánka aniastinian arantukarmiayi.

¿Kristu tutai yana uchirimpiait?

(Mateu 22.41-46; Márkus 12.35-37)

⁴¹ Nuyá Jesus tímiayi “Yus anaikiamu Kristu tutaisha, ¿itiura “Aya Tawit weeaiti” tárur? ⁴² Warī, Sarmu papinium Tawit niñki juna tátsuk:

“Uunt winia Úntrun “Akupin pujutainium Winia untsuuruinī pujustá, tímiayi. ⁴³ Ame nemasrumin núpeteatsān nuī pujustá” tímiayi.” Tú áarmaiti.

⁴⁴ Kame Tawitkia, Krístun chicharuk, “winia Úntur” tājisha, ¿itiurak Kristu tutai Tawitia pampanmarī átiñki?” Tú tímiayi Jesus.

Israer-shuaran jintintin ainia nuyá aneartarum

(Mateu 23.1-36; Márkus 12.38-40; Rúkas 11.37-54)

⁴⁵ Ashí aents Nin anturkatasa pujuiniañ ni unuiniamurīn Jesus juna tímiayi:

⁴⁶ “Israer-shuaran jintintin ainia nuyá aneartarum. Niisha esaram pushin entsasar wekasataisar wakeruiniawai. Tura jintiá ti shiir áujtusarat

tusar wakeruiniawai; tura iruntai jeanam penkeri pujatanium pujustinian wakeruiniawai. Tura nampernumsha uunt pujatanium pujustaj tusa wakeruiniawai. ⁴⁷ Túrasha waje jeencha atantainiawai. Túrawar aents nekaracharat tusar ti esaram chichamjai Yúsán áujainiawai. Nincha chikichjai nankaamas Yus asutiáwartatui.”

21

Waje ni kuítrín susamia nu

(Márkus 12.41-44)

¹ Yusa Uunt Jeen kuítrintin kuit enketainiam kuítian enkeenan Jesus wáinkiamiyi. ² Tura waje kuítríncha jimiará uchich kuítian, reara áaniun, enkean wáinkiamiyi. ³ Wáiniak tímiayi “Nekas tájarme, ju waje kuítrínchaitiat, ashí enkeena nú nankaamas núkap enkeayi. ⁴ Warí, chikichcha ampirma nuna enkeenawai. Tura niisha aya núchiniak takurmakman ampirmatsuk ashí enkeayi.”

Yusa Uunt Jeen saanaktinian Jesus ujakmiania nu

(Mateu 24.1-2; Márkus 13.1-2)

⁵ Yusa Uunt Jeen kaya shíirmach armia nuna tura chikich shíirmach susamu armia nunasha chikich shuar áujmatuk pujuarmiayi. Nuyá Jesus tímiayi:

⁶ “Átum yamáí shiir wáintrumna nu ashí emesnartatui. Kaya ekenramusha mash yumpuntrartatui” tímiayi.

Amuukatin tsawantin uruku áata nu nekaatin

(Mateu 24.3-28; Márkus 13.3-23)

⁷ Nuyá Jesusan chicharainiak “Uuntá, nusha ¿urutak túrunatí? ¿Kame ju túrunatin jeatemamtaisha warijajin nekaattají?” tiarmiayi.

⁸ Tutai Jesus tímiayi “Aneartarum; anañnawairap. Nekaatarum. Winia náarun pachisar; “wi Krístuitjai” tau ti untsurí jíintrartatui. “Nunka amuukatin jeayi” tu etserkartatui. Tuíniakui anturkarum nemariirap. ⁹ Tura meset chichamsha, kapitián mesetan nájanmasha antukrum sapijmiakairap. Nusha emka túrunatniuiti. Túrasha nú chichamaik amuukatin tsawant jeashtatui.”

¹⁰ Nuyá tuke chicharuk tímiayi ‘Shuar chikich nunkanmaya shuarjai mesetnum ti nekas maaniawartatui. ¹¹ Ti uurkattawai; untsurí nunkanam tsukasha, sunkursha ti átatui. Nayaimpinmasha ti ashammai nánkamas túrunattawai. Nujai Yus ni kakarmarin iniakmastatui.’

¹² ‘Tura ju túruntsajin atumin pataaturmakar achirmakartatui. Iruntai jeanmasha makurmartai tusar juramkiartatui. Sepunmasha enketmattarme. Tura winia naar páchia asakrumin, akupniunmasha, úuntnumsha juramkiartatui. ¹³ Nuinkia atumin túrutmakrumin wi túramu etserkatin arutmattarme. ¹⁴⁻¹⁵ Tura atumí nemasri nakitramainiak “wáitiatí” titinian tujinkiarat tusan, winia nekatairjai chichastinian amastatjarme. Tuma asamtaí “Jurakuisha warinia tiniak kísthumaktaj tusan áetak enentáimsashtatjai” titiarum.’

¹⁶ ‘Tura imia atumí aparisha surutmakartatui. Atumí yachisha, atumí shuarisha amikrumsha núnisaran surutmakartatui. Tura máamunka máawartatui. ¹⁷ Tura Winia ajasaru asakrumin ashí aents nakitramprartatui. ¹⁸ Tura penké ishichkisha yajauch awajtamsachartatui. ¹⁹ Katsuntrarmeka iwiaaku átin wáinkiatarme.’

²⁰ ‘Ju pepru Jerusarenka aa tanishrijin suntar téntakar matsatu wáinkiumeka, emesratin jeá nekaattarme. ²¹ Nuikia juí Jutía nunkanam

pujuinia nu, náinnium pisartin áiniawai; tura juí Jerusarénum pujuinia nusha juyanka jiinki wétin ainiawai. Tura ajanam pujuinia nusha, péprunam waketkishtin áiniawai. ²² Nu tsawantincha Yús asutiámun wáinkiertatui. Yús-Papinium nu túrunatin yaunchu aarma nu uminkiattawai nu tsawantin. ²³ Nunkanam ti wáitsatin átatui. Tura juí aents ti asutniawartatui. Tuma asantai nuwá ajamtin ainia nusha, tura uchi kuírchin takakainia nusha imiá itiruchatan wáinkiertatui. ²⁴ Tura juyá aents mesetnum jákartatui. Tura chikichnaka ashí nunkanam misaawar júkiartatui; tura yajaya apach, Yúsnan enentáimtuiniatsna nu, juí Jerusarénum wayawar najakartatui. Nu túratniunka Yús tsan̄katkana nuñ̄ túrawartatui.’

Aents Ajasu tutai tátinri

(Mateu 24.29-35, 42-44; Márkus 13.24-37)

²⁵ ‘Nuñkia etsanmasha, nantunmasha, yáanmasha Yuska ni kakarmarín iniakmak nusháa túrattawai. Nunkanmasha ashí aents páchim enentáimprartatui. Tura nayaantsanam chíchimi ti aku tantáa ajakui ti ashamkartatui. ²⁶ Tura túrunatin ana nuna enentáimsar mayáí ashinkiertatui. Warí, nayaimpiniam kakaram ainia nusha peantrartatui. ²⁷ Nuyá Winia, Aents Ajasu tutain, yurañminiam ti shiir ajasan winiaí wáitkiartatui. ²⁸ Nu túrunatin nánkamkui uwempratín jeatemayi tusarum kakaarum shiir enentáimsatarum.’

²⁹ Tura juí chichamnasha nekapmamiayi. ‘Ikiu numi tura nánkamas numisha enentáimsatarum. ³⁰ Juí nunkanam ni nuké yama puñkakmatai “esat jeatemayi” tátsurmek. ³¹ Núnisan̄ Wí tájana nu wáinkiumeka, Wí juí nunkanam akupin ajastin jeatema nu nekaatarum.’

³² ‘Tura aents yamaí pujuinia nu jáatsaín nusha ashí túrunattawai. Núnaka paant tájarne. ³³ Nayaimpisha nunkasha amuukartatui. Tura winia chichampruka amuukachminiati. ³⁴⁻³⁵ Nu tsawant aya aneachma jeattawai. Ashí aents juí nunkanam pujuinia nu, nuna enentáimsuk pujuiniaí jeattawai. Tuma asantai atumsha anearum wekasatarum. Yajau-chiniam emetnarum, aya yurumátniuk, aya umartiniak enentáimtusrum, juí nunkanam ana nu ti wakerakrumniñkia péñker enentáimsatin tujinkiat-tarme. Nu atsutí tusarum tura nu tsawant aya áwaktamkaj̄ tusarum péñker wekasatarum. ³⁶ Anearum wekasatarum. Túrunattana nuí katsuntrataj̄ tusarum Yus aujsa pujustarum. Túrarum Aents Ajasu tutai ímmianum péñker átaj̄ tusarum túratarum.”’

³⁷ Tuke tsawant tsawajsha Yusa Uunt J̄eñ Jesus unuiniamiayi. Tura káshikia Uriwiu náinnium we-wémiayi. ³⁸ Tura tuke tsawant Yusa Uunt J̄eñ Jesus chichaamun anturkatai tusar káshik tariarmiayi.

22

Jesus achiktin chichaman jurusarmiania nu

(Mateu 26.1-5, 14-16; Márkus 14.1-2, 10-11; Juan 11.45-53)

¹ Wakaprutai enketaachma tanta yuatin námper, paskua tutai, jeatemamiayi. ² Israer-shuara Pátrirísha Israer-shuara jintinniurísha áentsun ashamainia ásar, itíurak máawaintiaí¹ tusar ti enentáimsarmiayi.

³ Nuñkia Iskariúti Jútasan enentáin íwianch wáintiamiayi. Nú Jútaska Jesusa unuiniamuríñ páchitkiauyayi. ⁴ Israer-patri úuntrín tura Yusa Uunt J̄eñ kapitíán pujuarmia nuna werimiayi. Tura Jesusan tu surukminiati tusa

niijjaj chichasarmiyai. ⁵ Niisha nuna antukar warasar “kuit amastatji” Jútasan tiarmiayi. ⁶ Niisha “ayu” tinia, aents nékachmanum suruktaj tu enentáimsamiayi.

Kristu jakamu enentáimtustin námper

(Mateu 26.17-29; Márkus 14.12-25; Juan 13.21-30; 1 Kurintiunam 11.23-26)

⁷ Wats, wakaprutai enketaachma tanta yúatin námper jeamiayi. Paskua tutainium murikchin máatin ármiai. ⁸ Tura Jesus Pitruncha, Juánnasha akupeak “Paskua tutai námper iwiaratarum” tímiayi.

⁹ Tutai niisha chichainiak “¿Tují iwiarat tusamea wakeram?” tiarmiayi.

¹⁰ Tutai Jesus juna tímiayi “Péprunam wetarum. Jearum áishman yumin takaku wekáa wáinkiatarme. Nú áishman nemarsatarum. Tura jeá wayaakui, ¹¹ nú jeá nérenniuri chichareakrum “Uunt chichartamuk unuiniamurjai paskua yurumátin ¿tují aa? turamui” titiarum, tímiayi. ¹² Tákurmin nu nérentin yakí písunam uunt kuártun ashí iwiarumun iniakturmastatrum. Nují ii yurumátin iwiaratarum” tímiayi.

¹³ Tutai niisha wear Jesus tímiania tímiatrusan wáinkiarumi. Tura paskua namperan nují iwiarumi.

¹⁴ Yurumátin jeamtai ni unuiniamurijjai Jesus misanam pujusarmiyai. ¹⁵ Pujusarmatai, Jesus chichaak “Wisha játsuk atumjai jü paskua najanatniun ti wakerimjai, ¹⁶ atakka jü nunkanam atumjai najanashtin asan. Tura antsu Yus akupeana nují jear atak najanattaji” tímiayi.

¹⁷ Nuyá piniñkian achik, Yúsan yumiñkias, ni unuiniamurin tímiayi “Jü piniñ achikrum sunaisatarum. ¹⁸ Atakka jü nunkanam uwa yumin atumjai umarchattajai, tajarme. Tura antsu Yus akupin ajastin jeamtai atak iijjai umartatji” tímiayi.

¹⁹ Nuyasha yurumkan achik, Yúsan yumiñkias puuk susarmiyai. Tura chicharainiak “Juka winia ayashruiti. Winia ayashur atum péñker pujustinium surunkattana núiti. Winia enentáimtursarum yuatarum” tímiayi.

²⁰ Tura yurumsua amikiarmatai piniñkian achik, “Jü piniñ winia numparun nakumea asa uwempratin yamaram chicham najanamun nakumeawai. Winia numpar atumnian puartampattawai” tímiayi.

²¹ ‘Túrasha winia surutkattana nu Wijjai métek jü misanam pujawai. ²² Kame Wi, Aents Ajasuitjiana jü, Yus iwiarumua nútiksanak jakattajai. Túrasha Winia surutkana nu nekaatí. Ti asutniattawai” tímiayi. ²³ Nuna antukar “Wíashitiaj, yákit” tunaim ajarmiayi.

Nañkaamantu ana nu

²⁴ “¿Iijjai yakí imiá nañkaamantu aint?” tunaim ajarmiayi. ²⁵ Tura Jesus tímiayi “Jü nunkanam akupin ainia nu, waantu enentáimtumasar akupenawai. Tura akupenakuí “péñker túrin áiniawai” tuñiawai. ²⁶ Tura atumjainkia nuka atsutí. Antsu nañkaamantu ana nu, uchichia núnik ajastiniaiti; akupeana nusha takarniua núnik ajastiniaiti. ²⁷ Enentáimsatarum. Misanam pujus yurumna nu, yurumkan ajamana nujai ¿tuá imiá nekas nañkaamantuit? ¿Yurumna nu nekas nañkaamantuchukait? Tura Wisha atumin yurumkan ajamna núnisnak pujajai.’

²⁸ ‘Winia itiurchatrun wáinmiaj nují atumsha Wijjai tuke pujumarme. ²⁹ Tuma asakrumin akupin ajastinian winia Apar surusu asantai Wisha

nútiksanak akupkatniun súajrume. Wi akupkatjana nuĵi atumsha Wijĵai yurumáttarme, tura Wijĵai umartatrume, tájarme. ³⁰ Tura akupin pujutainium pujusrum, Israer-shuar tuse írutkamu akupkattarme tajai.” Tu tímiayi.

*Pítur “atsá nékatsjai” títinian Jesus ujakmania nu
(Mateu 26.31-35; Márkus 14.27-31; Juan 13.36-38)*

³¹ Nuyá Uunt Jesus tímiayi, “Nekaatá, Semunká. Trikiu neré tsatsamátniua áintsan Satanás atumi enentáin páchim enentáimtikramprataj tusa seayi. ³² Tuma ain Yus enentáimtustinian kajinmatkiin tusan Wisha Yúsan seamjai. Tura Yúsnum waketkim ame yatsum ikiakárarta” tímiayi.

³³ Tutai Semun tímiayi “Uuntá, sepunam enketmainiakuisha wisha nersatájme. Tura mantamainiakuisha métek jakatjai” tímiayi.

³⁴ Tutai Jesus tímiayi “Pitrú, nekas tájame, yamaik atash shiniatsajn ame menaintiú natsantrurtatme” tímiayi.

Itiurchat winiawai

³⁵ Nuyá Jesus tímiayi “Wisha yurumkajainchu, kuítjainchu, sapatjainchu akupkamjarmena nuĵi táatramsamkarum?”

Niisha “Atsá penké táatramsachmaji” tiarmiayi.

³⁶ Tutai Nii tímiayi “Antsu yamaikia yurumkan takakkuŋka takustí, kuítniasha núnisan; tura puniancha takakchakka ni pushirĵin suruk punian sumakti. ³⁷ Nekaatarum. Yus-Papinium yaunchu aarma ana nu wi túrunamujai uminkiattawai. Juíti aarma: Yajauch shuarnum pachikiarmiayi.

Warí, Yus-Papinium ashí Winia aarma ana nu uminkiatniuiti.”

³⁸ Tutai ni unuiniamurĵi tiarmiayi “Uuntá, juĵi jimiara puniá awai.”

Tutai Niisha “Asati” tímiayi.

*Jitsemani ajanam Jesus Yúsan áujsamania nu
(Mateu 26.36-46; Márkus 14.32-42)*

³⁹ Nuyá Jesus jĵinkimiayi. Tura tuke túrin asa Uriwiu náinnium wémiayi. Ni unuiniamurĵisha nemariarmiayi.

⁴⁰ Ai jeá nin chicharuk “Itiurchat winiakui iniarajĵi tusarum Yus áujsatarum” tímiayi. ⁴¹ Tuasua amik arantach, kaya nankimiam jeana núnik Jesus wémiayi. Tura Yúsan áujsataj tusa tikishmarmiayi. ⁴² Tikishmar juna tímiayi “Apawá, pininnum yapá umartinia ántsaj Wi wáitsattajna nu wakerakmekka jurutkitia. Tura Wi wakerajna nucha antsu Ame wakeramna nu atí, tajai” tímiayi.

⁴³ Nuyá, ikiakártaj tusa Yusa suntariĵi nayaimpinmaya tarimiayi. ⁴⁴ Tura Jesus imiá wáitias pujak nú kakaram Yúsan áujsamiayi. Tura ni searmarĵisha numpá ántsaj nunká kitiawarmiayi.

⁴⁵ Yúsan aujsua amik wajaki ni unuiniamurĵin werimiayi. Tura kúntuts enentáimmarĵijai ti pimpiki kanúu tepenan tarimiayi. ⁴⁶ Nuinĵkia chicharainiak “ĵUrukamtai kanúu teparum? Itiurchat winiakui iniarajĵi tusarum nantakrum Yus áujsatarum’ tímiayi.

*Jesusan achikiarmiania nu
(Mateu 26.47-56; Márkus 14.43-50; Juan 18.2-11)*

⁴⁷ Jesus tuke chichaa pujajĵi, untsurĵi shuar táarmiayi. Tura nuní eemka Jesusa unuiniamurĵi Jútas naartin winimiayi. Tura Jesusan mukunatajtsa

tarunmiayi. ⁴⁸ Támatai Jesus chicharuk “Jútasá, ¿Aents Ajasu tutai muku-namek surutkattam?” tímiayi.

⁴⁹ Jesusjái pujuarmia nu, túmamun wáinkiar “¿Uunt puniajái ljiuartatjik?” tiarmiayi. ⁵⁰ Tura chikichik Patri uuntri takarniurí kuishin untsuurin tsupirkamiayi.

⁵¹ Tura Jesus tímiayi “Iniaisatarum.” Nuna tinia ni kuishin antin tsuármiai. ⁵² Nuyá Israer-patri úuntrin, Yus-jea úuntrincha, tura pepu úuntrincha, Nin achiktaj tusa tariarmia nuna chicharuk “¿Wisha kasakaitiaj. Úrukamtai puniajaisha numijajisha tarutniuram? ⁵³ Nuik Yusa Uunt Jeen tuke tsawant atumjai pujumaj nuí achirkachmarme. Túrasha átum kiritniumiá kakarmajai nupetkatin yamá tsawantin tsankatkamuitrume” tímiayi Jesus.

Pítur “Jesusnaka nékatsjai” tímiania nu

(Mateu 26.57-58, 69-75; Márkus 14.53-54, 66-72; Juan 18.12-18, 25-27)

⁵⁴ Nuinikia Jesusan achikiar emetawar Israer-patri uuntri jeen júkiarmiayi. Tura Pítrusha íkian nemarki wémiayi. ⁵⁵ Tura aach jinia ikiapármiai. Túrawar anamuk pujuarmiayi. Pítrusha niijiai pujusmiayi. ⁵⁶ Tura nuwa, Patri takarniurí amia nu, Pítur jinia anamuk pujan wáiniak “Ju áishmansha Niijiai pujumiayi” tímiayi.

⁵⁷ Tutai Pítur chichaak “Nuwá, Nin nékatsjai” tímiayi.

⁵⁸ Tura árusan chikich nin wáiniak “Amesha Njin páchitkiaitme” tímiayi.

Tutai Pítur tímiayi “Atsá. Wikia áinkia páchitkiatsjai” tímiayi.

⁵⁹ Chikichik ura nankaamasmatai chikich apach chichaak “Nekas ju áishmansha Niijiai pujumiayi. Warí, niisha Kariréanmayançhakait” tímiayi.

⁶⁰ Tutai Pítur chichaak “Ame támena núnaka nékatsjai” tímiayi. Nú chichamaik Pítur chicháa pujajnk¹ atash shiniukmiayi. ⁶¹ Tura nuinikia Uunt Jesus Pítrun apajas ísmiayi. Túra “atash shiniatsain ame menaintiu natsantrurtatme” Uunt Jesus tímia nuna enentáimpramiayi. ⁶² Nuyá Pítur jiinki ti útmiayi.

Jesusan wishikrarmiayi

(Mateu 26.67-68; Márkus 14.65)

⁶³ Áishman Jesusan wáiniarmiania nu ti wishikiainiak awattiararmiayi. ⁶⁴ Jjin epetkar yapiniam awattiar chicharainiak “Nekamata, ya awatama” tiarmiayi. ⁶⁵ Tura katsekainiak ti untsurí chikichnasha nançkamas tiarmiayi.

Uunt Iruntainiam Jesusan ejeniarmiania nu

(Mateu 26.59-66; Márkus 14.55-64; Juan 18.19-24)

⁶⁶ Tsawarmatai, Israer-shuara úuntriasha, Israer-patri úuntriasha, Israer-shuara jintinniurisha iruntrar ni iruntairin ejeniarmiayi. Nuí chicharainiak ⁶⁷ “Paant titiá. ¿Yus anaikamu Kristu tutaia núkaitiam?” tiarmiayi.

Tutai Jesus tímiayi “Wi “ee” tákuisha, “nekasaiti” tíchattarme. ⁶⁸ Tura Wi aniamsha áirkashtatrume, túrasha akuptukchattarme. ⁶⁹ Tura wárik Wisha Aents Ajasuitjiana nu, ashí nankaamaku ajasan, Yusa untsuuriní pujustajai” tímiayi.

⁷⁰ Tutai niisha tiarmiayi “¿Nuinikia amesha Yusa Uchirínkaitiam?”

Tutai Jesus tímiayi “Ee, Witjai, átum Winia túrutrum núnisnak.”

⁷¹ Tutai niisha tiarmiayi “Warí, ¿iisha chikich ujatkat tusar atsumajik? Imia niniki chichaamu antukhajik” tiarmiayi.

23

*Piratuĵ Jesusan júkiarmiania nu**(Mateu 27.1-2, 11-14; Márkus 15.1-5; Juan 18.28-38)*

¹ Nuyá ashí Uunt iruntrarmia nu wajatkiar Rúmanmaya akupin Piratuĵ Jesusan júkiarmiayi. ² Nuĵ jeawar, Piratun chicharainiak “Ju áishman ĩi shuaran awajimtikiar enentáimtikiaiania nu nekaamĵi. Rúmanmaya uunt akupin Sésaran kuit akiktinian suritramaji. Tura nu arant Niŋki, akupin Kristu tutaintjai, tawai” tiarmiayi.

³ Tutai Piratu Jesusan chicharuk “¿Ame Israer-shuara akupniurinkáitiam?” tímiayi.

Tutai Jesus tímiayi “Ee, núitjai, ame támena núnisnak.”

⁴ Nuyá Israer-patri úuntriŋcha tura aents nuĵ iruntrarmia nunasha Piratu chicharainiak “Ju áishman tunaan túran penké wáinkiachuitjai, tajai” tímiayi.

⁵ Túrasha niisha nú kakantar chicharainiak “Antsu nekas ashí Jutía nunkanmaya aentsun ni unuiniana nujaj akajenawai. Kariréa nunkanmaya nankaamas ímiajajsha tayi” tímiayi.

⁶ Piratusha nuna antuk “Nu áishman ¿Kariréanmayankáit?” tímiayi.

⁷ “Ee” tuiniakui, Erutisan akuptukarmiayi. Erutiska Kariréanmaya aentsun akupniuyayi. Túmaitiat nu tsawantin Jerusarénum ishichik tsawant pujusmiayi.

⁸ Erutiska Jesusan ístaj tusa ti wakerimiayi. Jesusa túramurĵin áujmatman ti antukmiayi. Tuma asa, “Wi ímiaj aents tujintiamun túrashtimpiash” tusa Jesusan wáiniak warasmiayi. ⁹ Jesusan ti nukap aniasmiayi; túramsha penké áimkiachmiayi. ¹⁰ Nuĵsha Israer-patri úuntriŋsha, tura Israer-shuara jintinniurĵsha yajauchiiti tusar charaatum awajarmiayi. ¹¹ Tura Erutissha ni suntarĵĵĵĵĵ Jesusan yajauch enentáimtuiniak Nin wishikiainiak ti penker pushin, akupni uentsatairĵya ánniun, áentsrarmiayi. Nuyasha Erutis ataksha Piratuĵin akupkamiayi. ¹² Túram nu tsawant Piratu Erutisĵaj nawamnaikiarmiayi. Kame yáunchuka nemasnaikiau ármiai.

*Jesusan “mantamnati” tiarmiania nu**(Mateu 27.15-26; Márkus 15.6-15; Juan 18.39-19.16)*

¹³ Nuyá Israer-patri úuntriŋ aentsu úuntriĵĵĵ tura penké aentsĵaj Piratu ikiaanank tímiayi ¹⁴ “Ju áishman aentsu awajimtikuii tusarum itirtin-trume. Túrasha átum ímprumniŋ anintrusan yajauch átum tárumsa nuna penké nekarachjai. ¹⁵ Erutissha núnisan yajauchin nekaachai. Warí, juĵ awainkichmaka. Nuikia páantchakait jú aishman jakamnia tunaanka túrichuiti” tímiayi.

¹⁶⁻¹⁷ Túraitiat tuke túrutai asamtai, ĵisat jeakui sepunmaya chikichik áishmanĵkan Piratu anĵkant akupkatin ámiayi. Tuma asamtai, níi chichaak “ĵuna asutián awematjai” tímiayi.

¹⁸ Tura aencha iruntrar ti unsumainiak “Atsá; ĵucha. Ju nakitijai. Antsu Parapás akupkata” tiarmiayi. ¹⁹ Nu Parapássha akupniun nakitiak mesetan najana asa tura manĵartin asa sepunam enkeamuyayi.

²⁰ Piratuka Jesusan akupkattsa wakerak ataksha aentsun áujarmiayi. ²¹ Túrasha nú arant unsumainiak “Atsá. Krúsnum mantamnati” tiarmiayi.

²² Tura ataksha Piratu chicharainiak “¿Urukamtai. Warí tunaan túrait? Jakamnia tunaan túrachias tusan, aniasan penké nekarachjai. Asutián akupkatjai” tímiayi.

²³ Tura niisha kakaram untsumainiak “Jesus mantamnati” tiarmiayi. Kame aencha tura Patri úuntriṣha ti untsumaina ášarmatai ni wakeramurĭ tsan̄katnakarmiayi. ²⁴ Nii wakeriarmia nuna Piratu “túrattajai” tímiayi. ²⁵ Tuma asa Parapásan, mesetan najanin tura maṅkartin amia nuna akup-kamiayi. Tura Jesusnaka ni wakeramun túrawarti tusa íktusarmiayi.

*Jesusan krúsnum ajinrurarmiania nu
(Mateu 27.32-44; Márkus 15.21-32; Juan 19.17-27)*

²⁶ Jesusan jukitiasa pujuiniaj Serini nun̄kanmaya Semun̄ ni pépruriya Jerusarénnun̄ yama jeamiayi. Nin achikiar, Jesusa krusrĭ ayantkar “ni ukurĭ wetá” tiarmiayi.

²⁷ Untsurĭ aents Jesusan nemariarmiayi. Tura untsurĭ nuwasha ti kuntuts enentáimiainiak útkiar tura wa-wa ajakiar wearmiayi. ²⁸ Túmainiakui Jesus nin iis, “Jerusarénnun̄mĭa nuwátiram Winia enentáimtursarum útttiirap. Antsu atumniak tura atumĭ uchirĭ enentáimtursarum útttiarum. ²⁹ Warĭ, ti iturchat tsawant jeawartatui. Tuma asamtai “Uchirtichu ainia nu, ajaprukchana nu tura amuntsachu ainia nu, chíkich aentsjaj nan̄kaamas péṅker pujuiniawai” tiartatui. ³⁰ Nu tsawantaj aents chicharainiak “Náint in nekentmak yuturmaartai” tiartatui. ³¹ Warĭ, numi sameka áinis yajauch aya nan̄kamna ajṅsha jū itiurchat átsuk. Tura numi kukaru ainkiamtai itiuurak nú yajauch túrunachat.” Tu tímiayi Jesus.

³² Tura Jesusjaj krúsnum maatai tusar jímiar yajauch áishmaṅkan júkiarmiayi. ³³ Karawír nain tutainium jeawar Jesusan krúsnum ajinrurarmiayi. Tura Jesusa untsuurĭnjĭ chíkichĭk yajauch áishmaṅkan tura ni menarĭnjĭ chíkich yajauch áishmaṅkan núnisan̄ krúsnum ajinrurarmiayi.

³⁴ Tura Jesus krúsnum ajinraku pujuram, chichaak “Apawá, tsan̄kurarta. Nii áitkiainia nuna nékainiatsui” tímiayi.

Tura suntar pujuarmiania nu, yaki Jesusa pushirĭ jukit tusar naku-rusarmiayi. ³⁵ Péprunmaya aents ii wajatiarmiayi. Tura uunt armia nusha Nin wishikiainiak “Chíkichnaka uwentikniuiti. Wats, yamáí nekas Yusa anaikiamurĭ Kristu tútainiun̄ka imia Niṅki uwémpratĭ” tiarmiayi.

³⁶ Suntarsha Nin wishikrarmiayi. Tariar churuńian aartai tusar awajiararmiayi. ³⁷ Tura chicharainiak “Amesha nekas Israer-shuara uunt akupniurĭnkiumka amek uwemprata” tiarmiayi. ³⁸ Tura muuknumaani, Kriaku chichamjaj, Rúmanmaya apach chichamjajisha tura Israer chichamjajisha jū áarar anujkamú ámiayi: *JÚITI ISRAER-SHUARA UUNT AKUPIN*

³⁹ Chíkichĭk yajauch áishmaṅ nuĭ ajintruamu amia nu kátsekeak chicharuk “Amesha nekas Yusa anaikiamurĭntkiumka amek uwemprata tura incha uwentikramprata” tímiayi. ⁴⁰ Tura chíkich ni tsaniakmarĭnjĭ kakantar chicharuk “¿Amesha Niĭjjaj métek asutniátasa pujayatam, Yus ashamsmek? tímiayi. ⁴¹ Iikia yajauch asar waítsatniuitji; ii tunaarĭ akimaktur waítiaji. Antsu jū áishmaṅka yajauchin túrichuiti” tímiayi.

⁴² Nuyá Jesusan chicharuk “Amesha akupin ajasam winiasha enentáimtursata” tímiayi.

⁴³ Tutai Jesus chicharuk “Nekas tájame, jakar shiir pujutainium yamáí tsawant Wijjaj pujustatme” tímiayi.

*Jesusa jakamurĭ
(Mateu 27.45-56; Márkus 15.33-41; Juan 19.28-30)*

⁴⁴ Tutupin aḷ ashí nunḷkanam ti kirit ajasmiaiyi. Tura menaintiú ura nanḷkaamasu aḷn, nantu nunḷkaach ajassha tuke kirit ámiaiyi. ⁴⁵ Tsawái nantusha mushatmarmiaiyi. Tura Jerusarénnun Yusa Uunt Jēencha tarach ajamu aa jímiapetek nakaakamiyai. ⁴⁶ Nuyá Jesus untsumuk “Apawá, winia wakantrun Amiḷn ikiuajai” tímiyai. Nuna tinia jakamiyai.

⁴⁷ Suntura kapitiántri nu túrunamun wáiniak, Yusa náarḷn shiir awajeak “Jusha imiá nekas péñker áishmanḷkuyi” tímiyai.

⁴⁸ Tura untsurḷ aents pujuarmia nu, nu túrunamun wáinkiar ti kuntuts enentáimiaiiniak ni netsepen paat awatiar waketkiarmiaiyi. ⁴⁹ Tura Jesusa amikrḷsha tura nuwá Kariréanmaya Nin nemariarmia nusha íkiaḷn wajasar ii wajarmiaiyi.

Jesusan iwiarsarmiania nu

(Mateu 27.57-61; Márkus 15.42-47; Juan 19.38-42)

⁵⁰ Naka enentáimin péñker áishmanḷn ámiaiyi ni naari Jusé. Arimatéa pepru Jutía núñkanam ana nuyauyayi. Israer-shuara Uunt Irunḷtairḷn páchitkiauyayi. ⁵¹ Yus ju nunḷkanam akupin ajasat tusa Jusé nakas pujumiyai. Tuma asa Uunt Irunḷtainium Jesusan túrawarmia nuna nakitmiyai. ⁵² Tuma asamtai Piratuḷ we Jesusa ayáshin seamiyai. ⁵³ Piratu “ayu” takui, Jesusa ayáshin krúsnumiá jusa tarachjajai penuar kaya táurmanum iwiarsamiyai. Nu táurmanum chíkich iwiarsachmauyayi. ⁵⁴ Iwiaratin tsawantajai, ayampratin tsawant tsawastatuk ajasmatai túrunamiyai.

⁵⁵ Tura nuwá Kariréanmaya jukiniutak Jesusan nemarsarmia nusha iwiarsamunam weriar, Jesusa ayáshḷ itiuur ikiusmait nuna iisarmiaiyi. ⁵⁶ Iisar ikiuak ni jēen waketkiarmiaiyi. Tura Jesusa ayáshḷ mejeeninḷn tusar kunḷkuinian iwiarmiaiyi. Tura ayampratin tsawantajai, Israer-shuar akupkamun umikiar ayamprarmiaiyi.

24

Jesús nantakmiania nu

(Mateu 28.1-10; Márkus 16.1-8; Juan 20.1-10)

¹ Tumintin káshik kunḷkuinian iwiaramun júkiar nu nuwá Jesus iwiarsamunam weriarmiaiyi. Tura chíkich nuwásha atampriarmiaiyi. ² Tura iwiarsamu kaya atutkamu urani aan wáinkiararmiaiyi. ³ Tura wayawar uunt Jesusa ayáshin wáinkicharmiaiyi. ⁴ Wáinkichu ásar ashamkarmiaiyi. Tura “itiurkatjik” tiarmiaiyi. Tumaj jimiará áishmanḷkan pushin wincharpatniun entsaru nin ayaámach wajainian wáinkiararmiaiyi. ⁵ Nuna wáinkiar ti sapijmiainiak tsuntsumawarmiaiyi. Túmakui nu áishmanḷn chicharainiak “¿Iwiaakusha urukamtai jakaantumsha egrum? tiarmiaiyi. ⁶ Jui pujatsui. Antsu nantakni. Nékatsumek. Niisha Kariréanam tuke pujus ⁷ “Wi, Aents Ajasuitjiana nu, yajauch aentsnum surunkattajai. Túran krúsnum mantamnattajai. Tura menaintiú tsawantajai nantaktiatjai” turamchamkarum” tímiyai.

⁸ Nuna takui Jesus timian enentáimprarmiaiyi. ⁹ Tura iwiarsamunmaya waketki taar, Jesusa unuiniamurḷn auntse armia nuna tura chikichnasha ashí nu túrunamun ujakarmiaiyi. ¹⁰ Jesusa unuiniamurḷn ujakarmia nu ju ániawai: Maktaranmaya Marí, Juánasha, Jakupu nukurḷ Marisha, tura chíkich nuwajajai. ¹¹ Tura Jesusa unuiniamurḷsha nuwá tuḷniakuisha nekasaiti tu enentáimtsuk “wáuruk tuḷniawai” tiarmiaiyi.

¹² Túrasha Pítrusha jiinki Jesus iwiarsamunam tsékeŋki werimiayi. Jeá, init iis, aya tárachik tepenan wáinkiamiayi. Tura túrunamia nuna ti enentáimiar ni jeen waketkimiayi.

*Emaús wetai jintianmaani túrunamia nu
(Márkus 16.12-13)*

¹³ Nu tsawantaik Jesusa nemarniuri jímíar Emaús péprunam wéarmiayi. Emaúska Jerusarénumiá auntse kirumitru jeá pujawai. ¹⁴ Túrunamia nuna chichaki wearmiayi. ¹⁵ “Itiurkit” tu aujmatki weenaj imia Jesus taa nuj páchiniak niijiai wearmiayi. ¹⁶ Tura wáinkiarat nekaashtin asamtai yait nekaacharmiayi.

¹⁷ We-wénakua Jesus chicharainiak “Jintiaша ¿warí áujmatkirum wéarum? ¿Urukamtai kúntuts enentáimprum?” tímiayi.

¹⁸ Chikichik, Kreupas náartin chicharuk “Jerusarénum túruna nuna ashí nékainiawai. ¿Ámeke amekék túrunamia nu nékachu páchitkiam?” tímiayi.

¹⁹ Tutai Jesus tímiayi “¿Warí urukait?”

Tutai tiarmiayi “Entá, Nasarénumiá Jesusa túrunamuri taji. Niisha Yúsnan etserin asa Yusa kakarmarjijai chichasmiayi tura nuna kakarmarjijai takasmiayi. Núnaka ashí aents nékainiawai. ²⁰ Tura ii Pátriri uuntri tura ii pépruri uuntri “tunáa jakamnia túrayi” tusar “krúsnum mantamnati” tiarmiayi. ²¹ Tura ii Israer-aentstin uwentikrampratin tu enentáimsamji. Tura ni maa-musha menaintiú tsawant nankaamasai. ²²⁻²³ Túrasha ii nuwá ni iwiarsamunam yamaí káshik weriar ni ayashin wáinkiacharmai. Tura “Yusa suntari wáinkiaji tura “Jesus iwiaakuiti” túramji” tiarmai. Nuna tu ujatmakakrin ti enentáimpraji. ²⁴ Nuyá íi shuar iwiarsamun weriar, nuwá tiarmia tímiatrusan wáinkiarimiayi. Tura Jesusnaka wáinkiacharmai.” Tu ujakarmai Jesusan.

²⁵ Nuyá Jesus nin chicharainiak “Enentáimchaitrume. Ashí Yúsnan etserin tiarmia nu wau enentáimtatsrume. ²⁶ ¿Yusa anaikiamuri, Kristu tutai, shiir awajnatsuk ti wáitsashtinkiait?” tímiayi.

²⁷ Tura nuyá Yus-Papinium Muisáis aarmia nuyá jukin ashí Yúsnan etserin ni túrunatniuriñ áararmia nuna jintintiatasa nankamamiayi.

²⁸ Ayu, nii wearmia nú peprunam jeawarmiayi. Tura Jesuska nuj nankaamaki wétaj tau ajamiayi. ²⁹ Tura niisha chicharainiak “Weep. Iijiai pujustá. Warí, nantu akaikiyi, kirit ajatemsai” tiarmiayi.

Tutai Jesus niijiai pujustaj tusa wayamiayi. ³⁰ Tura niijiai irunar misanam pujus, yurumkan achik, Yúsán yuminkias nincha puuk súsarimiayi. ³¹ Nu chichamaik, ni jii uranniua núnikiarmatai Jesusan nekaawarmiayi. Tura Niisha nú chichamaik menkakamiayi. ³² Tura nu shuarsha mai tunai ajainiak “Jintia winis Niisha Yus-Papin jintintramuk nekas ii enentáin shiir enentáimtikramprachmakaji” tiarmiayi.

³³ Nuyá, Emaúsnumiá wárik jínkiar Jerusarénum waketkiarmiayi. Nuñ Jesusa unuiniamuriñ auntse armia nuna tura chikich shuar Jesusan nemari-armia nunasha iruntrar pujuinian wáinkiarimiayi. ³⁴ Auntse armia nusha tiarmiayi “Uunt Jesus nekas nantakni. Semun Nin wáinkiaiti.”

³⁵ Tutai niisha jintiá túrunamun ujakarmiayi. “Jesus yurumkan ajaamakui nuñ nekaamji” tiarmiayi.

*Ni unuiniamuriñ Jesus wantintiukmiania nu
(Mateu 28.16-20; Márkus 16.14-18; Juan 20.19-23)*

³⁶ Nuna áujmatuk pujuiniaĵ Jesus aya aneachma ajapén wajas “Shiir enentáimsatarum” tímiayi.

³⁷ Nuna antukar, ti sapijmiakar, wakanchashit, enentáimsarmiayi.

³⁸ Tura Jesus chicharainiak “¿Urukamtai sapijmiakrum wakanchashit, tu enentáimsarum? ³⁹ Winia uwejrusha, nawersha lírtustarum. Wíkiitjai. Takarsa írsatarum. Warí, wakancha ayashtinkiait, ukunchtinkiait” tímiayi.

⁴⁰ Nuna tinia ni uwejéncha nawencha iniaktusarmiayi. ⁴¹ Warainiyat sapijmiainia ásar, Niimpiashit tu enentáimtusarmiayi. Tuma asamtai, nin chicharainiak “¿yurumak takakrumek?” tímiayi. ⁴² Takui, namaknasha, míshkincha súsarmiayi. ⁴³ Tura Jesus nuna achik niisha ímiainiamunman yuamiayi. ⁴⁴ Tura nin tiarmiayi “Winia túrutawarma nuna, Wi atumjai nuik pujusan tímiajrume. Nekas uminkiatniuyayi. Iis, wi túrunatniurun Muisáis aarmia nusha, Yúsnan etserin aarmia nusha, tura Sarmu papinium aarma ana nusha ashí uminkiatniuyayi” tímiayi.

⁴⁵ Nuyá Yus-Papinium aarman jintintiawarmiayi. ⁴⁶ Jintintiuk juna tímiayi: “Yusa anaikiamurĵ Kristu tutai jaka menaintiú tsawantai jakamunmaya nantaktinia nu yaunchuk áarmauyayi. Tura Wi nú Kristuchukaitai. ⁴⁷ Winia náarun pachisar, Jerusarénumia nanĵkama ashí nunĵkanam nu chicham etsernaktinia nu áarmauyayi. Shuar ni tunaari tsaĵkurnarat tusar enentáin yapajiátniuiti. Tura tu etserkatniua nusha yaunchu áarmauyayi. ⁴⁸ Tura wi túrunamu neka asarum etserkatniuitrume, tímiayi. ⁴⁹ Tura winia Apar, winia Wakantrun susartatjai, turammarumna nuna akuptuktatjarne. Tura nayaimpinmaya táatsain jui Jerusaréĵ péprunam pujústárum. Taa ni kakar-marĵin suramsattarme.” Tu tímiayi.

Jesus nayaimpiniam wakamiania nu

(Márkus 16.19-20)

⁵⁰ Nuyá Jesus Jerusaréĵ péprunmaya júkiar Petania péprunam ejeniarmiayi. Tura nuĵ ni uweĵe takuí, “Yus yáinmakarti” tímiayi. ⁵¹ Nuna tu pujus, niĵya kanakmiayi. Tura nayaimpiniam junakmiayi. ⁵² Ni unuiniamurĵsha Nin imiá shiir enentáimtusarmiayi. Tura nuyá ti warasar Jerusaréĵnum waketkiarmiayi. ⁵³ Tura Yusa Uunt Jĵĵĵĵ pujusar Yusa náarĵin shiir awajú pujuarmiayi. Aukete.

Yúsan Shiir Chichamen JUAN aarmia nu

Chícham aents ajasmiania nu

¹ Ashí nan̄kamamia nú yaunchu Yusa Uchirí tuke pujuyayi. Niisha Yúsan ti paant awajeakui, Chícham tímíniati. Chichamsha Yúsajai pujuyayi. Chichamsha Yúsauyayi. ² Yáman̄kamtaik Niisha pujuyayi Yúsajai. ³ Ashí najanamu ainia nu Niijjai najanamuiti. Nii najanachmaka pen̄ké atsawai. ⁴ Niisha iwiaaku átinia nérenniuti. Nu iwiaaku atincha tsáapninia áinis Yusna ana nuna ashí shuaran paant nekamtikiamniati. ⁵ Nu tsáapnin kiritniunam tsáapniawai. Tura kiritniusha tsáapninian ikiajniaktinian tujinkiaiti.

⁶ Áishman̄ ámiayi, Yus akupkamu, ni naari Juan̄. ⁷ Niisha tsáapnin chichaman etserkatajtsa támiayi. Nuna étseruk ashí umirkarat tusa támiayi. ⁸ Juan̄sha nu tsáapninchauyayi. Áyatik akupkamuyayi tsáapnin chichaman etserkat tusa. ⁹ Nu tsáapninkia nekas tsapniniati. Jū nun̄kanam taa ashí shuaran enentáin tsáapniartiati.

¹⁰ Chichamsha taramiayi jū nun̄kanam. Tura nun̄kasha ni najanamu ain, nun̄kaya aents Nin nekaacharmiayi. ¹¹ Támiayi ni nun̄kén tura ni shuarsha ni enentáin itiaacharmiayi. ¹² Tuma ain̄ chíkich shuar Nin enentáimtuiniak ni enentáin itiaawarua nuna Yusa uchirí ajastinian Yus tsan̄katkarmiayi. ¹³ Niisha Yusa uchirí ajasar ataksha numpentin ayashímkiacharmai. Áentsnúmiā akiiniachu áiniawai niisha. Áishman̄ wakeramujajisha akiiniacharmai. Antsu Yúsnumiā akiiniawaru ásar Yusa uchirí áiniawai.

¹⁴ Nú Chichamsha ayashtin ajas iijjai núkap tsawant pujumiayi. Yusa anen̄kratairijjai piakuyi. Aya nekasa nunak chichaamiayi. Núnisan̄ ni pen̄kerin̄, aya Yusa Uchirí chikichkia nu takusminia nuna iniakmamiayi. Nusha iisha paant wáinkiaitji. ¹⁵ Juan̄sha Nin neka asa, étseruk tímiayi “Júiti wi tímiaj nu: “Winia ukuruinj winittiana nu wíjiainkia émkaiti. Maa, wi atsajisha tuke pujuyayi” tiniujai.” Tu etserkamiayi.

¹⁶ Chichamsha ti anen̄kartin asa ashí pen̄ker ana nuna iniaitsuk súrámji. ¹⁷ Yusa akupeamurjn Muisais yaunchu jintintraiti, antsu aneatniuncha tura ashí nekas ana nunasha Jesukrístu jintintraiti. ¹⁸ Chikichkisha Yúsan pen̄ké wáinkiachuiti. Tura ni Uchirí chikichkia nu tuke Niijjai tsaniaku asa Yúsan paant awajturmasuitji.

Imiakratin Juan̄ Jesukrístunun etserkamiania nu

(Mateu 3.11-12; Márkus 1.7-8; Rúkas 3.15-17)

¹⁹ Jerusarénnumiā Israer-shuar ni Pátririn̄cha Riwi-shuarjai Juan̄kai akupkarmiayi yákit tusar.

²⁰ Inin̄truiniakui paant ujakmiayi. “Wikia Krístuchitjai” tímiayi.

²¹ Takui ataksha aniasarmiayi “¿Nuikia yáitiam. Yúsnan etserin yaunchu amia nú Eriáskaitiam?” tiarmiayi.

Juan̄sha “Atsá, núchaitjai” tímiayi.

Nuyá ataksha aniasarmiayi “Nuikia ¿Yúsnan etserin tátinia núkáitiam?” tiarmiayi.

Niisha “Atsá” tímiayi.

²² Takui “¿Nu arantcha yáitiam. In akuptamkajnia nusha warí títiataji. Warintia enentáimiam?” tiarmiayi.

²³ Juansha tímiayi “Yúsnan etserin Isayas yaunchu timia núitjai. Niisha áarmiayi “Aents atsamu nunkanam shuar untsumui “Ti uuntrí jintí naka awajsatarum,” tu untsumui.” Núnaka Isayas áaruiti. Tura wikia untsumna núshuaraitjai” tímiayi.

²⁴ Juanjai chichainiakka Pariséu akupkarma áarmiayi.

²⁵ Niisha tiarmiayi “Nuikia Krístuchuitatmesha, Eríaschaitatmesha, Yúsnan etserin tátinia núchaitatmesha ¿urukamtai imiakratam?” tiarmiayi.

²⁶ Juansha tímiayi “Wikia entsajain imiakratjai. Tura átum írutramunam shuar átum nékatsrumna nu wajaawai. ²⁷ Niisha winia ukuruñi winiyat wíjiainkia ti nankaamantuíti. Nii ti péñker asamtai wisha ni sapatrí jiníkiamuríncha atitrachminiaitjai” tímiayi.

²⁸ Nuka Petapara peprunam túrunamiayi. Petaparasha Juan imiakratmia nuí Jurtañ entsa amain amai.

Jesus Yusa Murikrinti

²⁹ Nuyá kashin Juan Jesusan winian wáiniak tímiayi “Iistarum. Núiti Yusa Murikrj ashí aentsu tunaarñ júana nu. ³⁰ Núiti wi tímiaj nu, “Winia ukuruñ winiana nu wíjiainkia nankaamantuíti. Tura wi atsaísha tuke pujuyayi” tímiajai. ³¹ Wisha Nin nekaachmajai. Tura ashí Israer-shuar Nin nekaawarat tusan imiakín támajai” tímiayi.

³² Nuyá tímiayi “Yusa Wakanin yámpitsa núnin nayaimpinmayan táarun wáinkiámjai. Tura ekemsamai. ³³ Nu túruntsain tuke Nin nekaachmajai. Tura Yuska winia imiakrattinian akuptak turutmiai “Chikichik shuarnum Yusa Wakanj tara ekemsa wáinkiam, nujai nekaattame. Yusa Péñker Wakanjiaj imiakratniua núiti” túrutmiayi. Tura nujai Nin nekaamjai. ³⁴ Yamaikia wainkia asan ti paant nékajai tí nekas Yusa Uchirínti” tímiayi Juan.

Jesusa unuiniamurj emka armia nu

³⁵ Kashincha ataksha Juan nuí wajasmiayi ni unuiniamurj jímiarjai. ³⁶ Jesussha nuí nankaamakui Juan tímiayi “Iistarum, Yusa Murikrj áuwiti.”

³⁷ Juanka unuiniamurj nuna antukar mai Jesusan pataatukarmiayi.

³⁸ Jesussha úkumur ímias nu jímiaran wininian wáinkiámiai.

Tura tímiayi “¿Ya earum?”

Niisha “Uuntá, ¿tuj pujam?” tiarmiayi.

³⁹ Jesussha tímiayi “Wats, iitiarum.”

Niisha wear ni pujutairin wáinkiarimiayi. Tura áañkú ajasmatai nu tsawan-taj nuí kintiamprarmiayi.

⁴⁰ Juanka chichamen antukar Jesusan pataatukaruka jímiar áarmiayi. Chikichik Antresauyayi. Niisha Semun Pitru yachijiyayi. ⁴¹ Antressha wárik ni yachj Semunkan eaktajtsa wémiayi. Tura wáiniak “Misias wáinkiaji” tímiayi. Misíaska ni chichamen “Kristu” tawai. Krístuka Israer-shuaran yainkíarat tusa Yus anaikiamuíti.

⁴² Nuyá Antres ni yachj Semunkan Jesus pujamunam jukimiayi. Jesussha wáiniak tímiayi “Ámetme Semun, Junasa uchirí. Túrusha Sépas átatme.” Sépaska Israer-shuar chichamnum kaya tawai. Tura Kriaku chichamnum nuka Pítruiti.

Jesus Jiripijai tura Natanaérjai chichasmiania nu

⁴³ Kashincha Jesus Kariréa nunkanam wétajtsa pujumiayi. Tura Jiripin wáiniak “Nemartusta” tímiayi.

⁴⁴ Jiripisha Petsaitia péprunmayayuyayi. Antressha Pítrusha nu péprunmayayuyayi. ⁴⁵ Nuyá Jiripi Natanaéran eakmiayi.

Tura wáiniak tímiayi “Muisais Yus akupkamu papinium “Anaikiamu tátatui” tu áarchamkia. Yaunchu Yúsnan etserniusha ujakcharmakia. Nu shuar wáinkiaji. Jesusaiti, Jusé uchirí. Nasarét péprunmayaiti.”

⁴⁶ Natanaérsha tímiayi “¿Nasarénumia péñker shuar áminkiait?”

Jiripisha “Winim ítiá” tímiayi.

⁴⁷ Jesussha Natanaéran tíjiuch winian wáiniak tímiayi “Ju shuar iistarum. Ti péñker Israer-shuaraiti. Penké anañkartichuiti.”

⁴⁸ Natanaérsha tímiayi “¿Itiur nékaram?”

Jesussha tímiayi “Jiripi tuke untsurmatsain wáinkiajme iku numirin eamkam wajamin.”

⁴⁹ Natanaér nuikia tímiayi, “Uunta, nekas Yusa Uchirínme. Israer-shuar akupniuitme” tímiayi.

⁵⁰ Tura Jesus tímiayi “¿Aya wi “Iku numirin eamkam wajamin wáinkiajme” takui Winia enentáimturamek? Antsu nuna nankaamas nekaachmin ana nusha wáinkiaátame” tímiayi. ⁵¹ Nuyasha Jesus tímiayi “Wi nekas tájarme, Aents Ajasu asan atumsha nayaim uranmianum Yusa suntari Winin tara waka ajainia wáinkiaátarme.” Tu tímiayi.

2

Nuatnaikiatin jísat Kaná péprunam ámiania nu

¹ Menaintiu tsawant nankaasmatai nuatnaikiatin jísat Kaná péprunam ámiayi. Kaná péprusha Kariréa nunkanmayuyayi. Jesusa nukurísha nu pujumiayi. ² Jesussha ni unuiniamurísha nu nuatnaiyamunam ipiaamu ámiayi.

³ Umutai amuukamtaí Jesusa nukurí tímiayi “Umutai amuukai. Penké takakainiatsui.”

⁴ Tura Jesus tímiayi “Nukuá, ¿urukamtaí Winia túrutam? Iniáitiústá. Winia kakarmar iniakmastein jeaatsui.”

⁵ Nuyá umutain wáinmainia nuna ni nukurí tímiayi “Ashí ni tana nu umiktárum.”

⁶ Nuí kayajai najanamu yumi-yaraatai sais (6) ámiayi. Nu yaraatainmayá Israer-shuar ni ewejéncha ni nawéncha nijiamau ámiayi Yus shiir enentáimtursatí tusar. Chíkich chíkich yaraatainimum uchenta (80) rítrusha, siañ (100) rítrusha yumi wayamniauyayi.

⁷ Nuyá Jesus umutain wáinmaun “Ju yaraatai áimpratarum” tímiayi. Takui mete áimprarmiyai. ⁸ Áimprarmatai Jesus tímiayi “Pai, ishichik shikikrum námper chicharu suutarum.” Tutai nútiksañ túrawarmiyai.

⁹ Jista chicharusha nu umutai ajasun nekáprámiayi. Yaraatainmayá yumi jusamun nekaachmai niisha tura umutai ajamau yasar nékarmai. Jista chicharusha nuwáñun untsuk ¹⁰ tímiayi “Jístanmañka péñker umutain emka suiniatsuk. Tura jémararmatainikia tímianchan suiniatsuk. Túrusha ámeke péñker umutai ikusam yamá jíkchamek” tímiayi.

¹¹ Jesus túramu Kananum Kariréa nunkanam túrunamiayi. Nújainkia Jesus emka ni kakarmarın paant iniaktusmiayi. Nuna íisar ni unuiniamurısha Nin enentáimtusarmiayi.

¹² Nuyá Kapernáum péprunam wémiayi. Ni nukurısha ni yachısha ni unuiniamurısha nemariarmiayi. Nuısha untsurı tsawant pujusarmiayi.

Yusa Uunt Jeen suruktinian Jesus surinkiamiania nu (Mateu 21.12-13; Márkus 11.15-18; Rúkas 19.45-46)

¹³ Israer-shuara namperı, paskua tutai, ishichik ajasmatai Jesus Jerusarénum wémiayi. ¹⁴ Nuı jeá Yusa Uunt Jeen súruinian wáinkíamiayi. Turuncha murikniasha yampitsnasha súrin ármiayi. Chikichcha ni misarın pujusar kuítian yapajıniancha wáinkíamiayi.

¹⁵ Nuna wáiniak yarańken chapikmar asutkiartutain najana nujai ashı waakartiuk murikrintiuk aa jíirmiayi. Kuítian yapajniu misarıncha ayantar ni kuítrin nunká utsańkarmiayi. ¹⁶ Yampitsan súrinniasha tímiayi “Nuka juyá jíıtiarum. Winia Aparu Jeen surutai jea najanawairap” tímiayi.

¹⁷ Nuna íisar ni unuiniamurı yaunchu Yus-Papinium áarman enentáimprarmiayi. Ju áarmaiti: “Ame Jeem shiir atı tusan ti wakerukuitjai.”

¹⁸ Nuikia Israer-shuara uuntrı Jesusan aniasarmiayi “Juına túramniaitjai tusan ¿warı kakarmak iniakmastatam?”

¹⁹ Jesussha tímiayi “Ju Jeá sáakiakrumin menaintiú tsawantaı iniantaittiajai Wikia.”

²⁰ Israer-shuarsha tiarmiayi “Kuarentisáis (46) uwitin juna jeamtinian pujursarmiayi. Amesha menaintiú tsawantaı jeamtámeash.” ²¹ Kame Jesus “Jeá” chichayat ni ayashın tímiayi. ²² Tuma asamtaı Jesus ukunam jakamunmaya nantakmiatai ni unuiniamurı ni timian enentáimprarı ni chichamencha tura yaunchu Yus-Papinium áarmancha “Nekasaiti” tu enentáimtusarmiayi.

Jesus ashı shuara enentáın nékawai

²³ Paskua námpertin ti untsurı Jerusarénum pujuarmia nu, Jesus aents tujintiamun túramtaı, nuna wáinkiar Nin nekas enentáimtusarmiayi. ²⁴ Tuma ain Jesus ashı neka asa ninkia enentáimtuscharmıayi. ²⁵ Nińki ashı shuara enentáın neka asa chíkich ujatkat tusa atsumchamiayi.

3

Jesus Nikiutémuıai

¹ Shuar ámiayi ni naarı Nikiutému. Niisha Pariséu asa nii tuinia áintsarı Yúsan takauyayi. Niisha Israer-shuara uuntriıyayi. ² Niisha kashi Jesusajı irastajtsa wé tímiayi “Uuntá, shuáran unuiniarat tusa Yus akúptámkaiti. Nu paant nékaji. Yúsaiıanchuitkiumka aentsti tujintiamu túramna nu tujinki-aintme’ tímiayi.

³ Jesussha tímiayi “Tı nekas tájame. Atak yamaram akiiniachuka Yus akupeamunam pachiinkiashtatui.”

⁴ Tutai Nikiutému aniasmiayi “¿Itiurak shuar uunta nu ataksha akiiniat. Ataksha ni nukurı ampujén enkempramniakait atak akiiniatniuna?”

⁵ Ataksha Jesus tímiayi “Tı nekas tájame. Shuar entsayasha tura Wakanniumiasha akiiniachuka Yus akupeamunam penké pachiinkiashtatui. ⁶ Ayashniumiá akiinia nuka ayashchakait. Núnisan

Wakanniúmiá akiinia nuka wakanchakait. ⁷ Wi “atak yamaram akiiniatniuiti” takui itiuichat enentáimpraip. ⁸ Nase enentáimpratá. Nase nan̄kamsan umpúawai. Amesha ántame tura tuyan winiá túrasha tuin̄ weti nékatsme. Núniskete ashí Wakanniúmiá akiinia nu.”

⁹ Tuma asamtai Nikiutémusha atak anias “¿Jusha itiuirak áminiait?” tímiayi.

¹⁰ Jesus áikmiayi “Ame Israer-shuara jintinniurintiatmesha ¿itiura nékatsmea? ¹¹ Ti nekasana tájame. Nekas nékatur chichaaji. Ísmajnia nusha ujaaji. Tuma ain̄ ii chichame ántatsrume. ¹² Aya jū nun̄kanmaya túramu ujaam ántachkurmeka ¿itiurak nayaimpinmaya túramusha antuktaram?”

¹³ ‘Shuar chikichkisha nayaimpiniam waka atsawai. Aya Wiki, nayaimpinmaya taran Aents Ajasu asan, túraitjai. Tura Wikia nayaimpinmayaitjai.

¹⁴ Tura Winiasha, Aents Ajasu ain̄, mantuawartatui. Iis, yaunchu Israer-shuar atsamunam wekainiak napijjaī ti jáiniakui tuke tsuamarti tusa Muisais napin jirú najana yakí numiniam awajimiayi. Núnisnak Wisha awajnitniuitjai. ¹⁵ Nujain̄kia ashí Winia enentáimturna nuka jinium wétsuk Yusaj̄ tuke iwiaaku pujustatui.”

Yuska ashí shuaran ti aneawai

¹⁶ Yuska ashí shuaran ti anea asa, ni Uchir̄in chikichik ana nuna shuáran uwemtikrarat tusa tsan̄katkamiayi. Ashí shuar Nin enentáimtana nu, jinium wécharat tusa, antsu Yúsnun̄ tuke iwiaaku pujusarat tusa ni Uchir̄in akúpturmakmiayi. ¹⁷ Yus áentsun kakerak jinium surukat tusa ni Uchir̄in akupkachmiayi. Antsu uwemtikrarat tusa akupkamiayi.

¹⁸ Yusa Uchir̄in enentáimtana nuka jinium pen̄ké surunkashtiniaiti. Tura Nin enentáimtatsna nuka, Yusa Uchir̄in chikichik ana nuna enentáimtachu asa, páchitsuk jinium surukmaiti. ¹⁹ Yusa Uchir̄i tsáapninia áintsan̄ ii tunaar̄i paant awajturmajai. Nu tsáapnisha jū nun̄kanam taraiti. Shuar tunáa ti tura ásar tsáapninian nakitr kiritniun wakeriarmai. Nuna tura ásar jinium surunkaruiti. ²⁰ Ashí tunaan túruinia nuka tsáapninian mūjiainiawai. Túrawar yupitainiawai ni tunáa túramu paant ajasaj̄ tusa. ²¹ Antsu ashí nekas túratniun umiiniana nuka tsáapninian weantainiawai. Yus ni enentá̄i pujuram tsáapninium takainiawai. Nuka ti paantaiti.

Imiakratin Juan̄ ataksha Jesusnan chichasmiania nu

²² Nuyá Jessusha ni unuiniamurijjiaisha Jutía nun̄kanam wear nūj pujusar imiakratiarmiayi. ²³ Juansha Enun̄ nun̄kanam, Sarim tíjiuchia nūj, imiakratuk pujumiayi entsa nūj núkap aa asamtai. Tura aents táarmatai imiainiarmiayi. ²⁴ Nusha Juán̄kan sepunam en̄kenatsain̄ túrunamiayi.

²⁵ Tura Juán̄ka unuiniamur̄i Israer-shuarjaī jianaiktinian nan̄kamawarmiayi. “¿Ya imiakratma imiá pen̄kerait?” tusār áujmatiarmiayi. ²⁶ Juán̄kaj̄ inintrustai tusār wéarmiayi. “Uunta, ame nuik Jurtan̄ entsa amain̄ pujakum shuar nūj pujá “núiti Yusa Murikr̄i” tíchamkum. Yamaikia imiakratui tura ashí shuar Nin nemarainiawai” tiarmiayi.

²⁷ Tutai Juan̄ tímiayi “Ashí kakarmaka aya Yúsaiyan̄chakait. ²⁸ Wisha paant tímiajai “Wikia Krístuchuitjai antsu ni jintin̄ iwiarat tusan emka akupkamuitjai.” Nusha antukmarme. ²⁹ Kame shuar nuwan̄ nuatna nuna áishrinti. Nuatnaiyak áishman̄ nuwejaī áujnainiakui, ni amikr̄isha nuna antuk ti waraatsuk. Wisha núnisnak aents Jesusaj̄ wénakui ti waraajai. ³⁰ Niisha tuke nan̄kaamaku uunt ajastiniaiti antsu wikia tuke tímiancha ajastiniaitjai.” Juan̄ tu chichasmiai.

Nayaimpinmaya tara nu

³¹ Nayaimpinmaya tara nuka ashí nankaamakuiti. Nunḡaya nuka, nunḡaya asa jú nunḡanmayanak áujmatui. Nayaimpinmaya tara nuka ashí nankaamakuiti ³² tura nuḡ antukmancha ísmancha áujmatui. Túrasha ni chichamen ántuiniatsui. ³³ Antsu ni chichamen ántana nuka “Yusa chichame imía nekasaiti” tawai. ³⁴ Yus akupkamuka Yusa chichamen étserei. Yuska ni Wakanín ementutsuk susa asantai tu étserei. ³⁵ Yus Apa ni Uchirín anea asa ashí ana nuna iistí tusa ataksaiti. ³⁶ Shuar Yusa Uchirín enentáimta nuka yamaram iwiaakmanum akiinia asa tuke Yusaj shiir pujustiniaiti. Antsu Yusa Uchirín enentáimtatsna nuka nu iwiaakmanum akiiniachuiti antsu Yus tuke nin kajerkaiti.

4

Jesus Samaria nunḡanmaya nuwajaj chichasmiania nu

¹ “Jesus untsurí shuaran ni nemanin awajeawai; kame Juanjaj nankaamas untsurí imiaawai” taman Pariseu shuar antukarmiayi. ² Nekaska Jesus imiakratchamiayi, antsu ni unuiniamurí túrawarmiayi. ³ Pariséu nu chichaman antukarman Jessussha nekáa Jutía nunḡanmaya jiinki Kariréa nunḡanam waketkimiai.

⁴ Wáketuk Samaria nunḡanmaaní nankaamaktiniuyayi. ⁵ Samaria nunḡanam wéak Sekar péprunam jeamiayi. Nu pepru jeastatuk Jakupa nunḡe ámiayi. Jakupsha nu nunḡan ni uchirín Jusen tí yaunchu susamiayi. ⁶ Nuḡsha yumirmat ámiayi. Jakup taurma asantai “Jakupa yumirmatrí” tiarmiayi. Tutupin jeamtai Jessussha pimpiki winis yumirmat ayamach pujusmiayi. ⁷ Nuḡ pujaj Samarianmaya nuwá yumí shikiktajtsa támiayi. Tura Jesus “Entsa surusta” tímiayi. ⁸ Jesusa unuiniamurísha yurumkan péprunam sumaktajtsa wéaru asantai aya Jesusak pujumiayi.

⁹ Samarianmaya nuwá Jesusan tímiayi “¿Itiura Israer-shuaraitatmesha Samarianmaya nuwá aisha entsa seatam?” Kame Israer-shuar Samarianmaya shuarjainkia penḡé chichachu ásar nuna tímiayi.

¹⁰ Jessussha tímiayi “Yus súamu nékakmeka tura entsa surusta tájam nusha nékakmeka ame antsu seattínme tura Wikia iwiaaku entsan amasaintjai.”

¹¹ Nuwasha tímiayi “Uunta, entsasha ti iniaiti tura shikiktincha takaktsume. ¿Tuyan iwiaaku entsasha surustam? ¹² Ii uuntrí Jakup jú yumirmatan taur juyanak niisha ni uchirísha ni waakarísha umararmiayi. Nuyá ikiur-tamkimiaji. ¿Amesha Jakupjaj nankaamas kakarmakaitiam?”

¹³ Jessussha tímiayi “Ashí shuar jú entsan umarka ataksha kitiamtiatui. ¹⁴ Antsu Wí súajna nú entsan umarka penḡé kitiamchattawai. Antsu nu entsa Wí susamuka ni enentáin púkunia áintsan tuke pajamtiatui nujaj tuke iwaaku pujustí tusa.

¹⁵ Tutai nuwá tímiayi “Uuntá, winiasha nu entsa surusta. Wisha kitiamcha átaj. Tura jú entsanacha shikiktinian táchataj” tímiayi.

¹⁶ Nuyasha Jesus tímiayi “Áishrum untsukam utitia, turam juí tatá.”

¹⁷ Nuwasha “Winia áishur atsawai” tímiayi.

Tutai Jesus tímiayi “Maa, nekas tame. Áishrum atsawai. ¹⁸ Kame ame áishrum senḡu (5) takusuitme. Yamái takakmena nusha ame áishrumchaiti. Nekas tame.”

19 Nuna antuk nuwasha tímiayi “Uunta, ame Yúsnan etserniuchukaitiam. 20 Ii úntrin̄kia tuke Samarianam pujuarmia nu jú nainnium Yúsna tikishmatrarmiayi. Antsu átum Israer-shuar árumna nu aya Jerusarénum Yus tikishmátratniuiti tárume.”

21 Jesus tímiayi “Nuwá, enentáimsata. Tsawant jeattawai átum jú náinniumsha tátsuk tura Jerusarénumsha wétsuk Yus Apa tikishmatratin. 22 Átum tikishmatrum nuka nékatsrume. Iikia tikishmatrajnia nu nékaji. Israer-shuarnumiá Uwemtikkiartin winiakui nékaji. 23 Tsawant winittiana nu yamá jeayi. Ashí shuar Yus Apan nekas tikishmatainiakka tuke wakanjaj̄ tuke enentáijjaj̄sha awajitsuk tikishmatrartatui. Núnisañ̄ tikishmatrurat tusa wakerawai Yus Apa. 24 Yuska Wakaniiti tura ashí Nin tikishmatainia nuka tuke wakanjij̄aj̄ tura tuke enentáijjaj̄ awajitsuk tikishmatratin áiniawai.”

25 Nuwasha tímiayi “Anaikiamua nu tátiniaiti. Nusha Krístuiti. Niisha taa ashí jintinramattaji.”

26 Jesus tímiayi “Wiitjai. Ámin chichaaajmena nú Kristuitjai.”

27 Nuiñ̄ ni unuiniamurj̄ táarmiayi tura nuwajaj̄ chichaa pujan wáinkiar ti enentáimprurarmiayi. Tumaitiat “¿Warí wakerakmea nuwajaj̄ chichaaam?” titinian arantukarmiayi. 28 Nuyañka nuwá ni yumir̄in ikiuki péprunam we ashí áentsun tímiayi 29 “Winiirum íitiarum, shuar ashí wi túramun túruta nu. ¿Juka Krístuittiya?” 30 Tutai péprunmayá j̄inkiar Jesus pujamunam wearmiayi.

31 Jeainiatsaj̄n̄ ni unuiniamurj̄ seak tiarmiayi “Uunta, yurumáta.”

32 Tura Jesus tímiayi “Wi yúatniunka takakjai átum nékachman.”

33 Ni unuiniamurj̄sha nuámtak anniasarmiayi “¿Chíkich shuar yurumak itiarim tátsuash?” tiarmiayi.

34 Tura Jesus tímiayi “Winia akuptukua nuna wakeramurj̄ túrakun tura ni takatr̄in̄ takaakun Wj̄j̄aj̄n̄kia yurumátniua áintsañ̄ ikiakáatui. 35 Átumka “Tuke kuaru nantu árak júuktin taasai” tátsurmek. Túrasha Wi tájarne, shuar wininia nu iistarum. Yus-Chicham ni enentáin̄ araamuiti. Tura júuktin tsawant jeayi. 36 Arakan júaka akinkiatniuiti. Júukmataisha nu shuar uwemprar tuke iwiaaku pujusartatui. Núnisañ̄ arakan araana nusha júana nusha mai metek warasartatui. 37 Tiniu armia nuka nekasaiti: “Chikichik araawai chikichcha júawai.” 38 Iis, chíkich araakmamu júuktinian akupkaitjarne. Átum araachiatrumek chíkich takasmanum atumsha pachiiñtiukuitrume” tímiayi.

39 Tura núwaka péprunam jeá “Ashí wi túramun ujatkeyi” takui untsurj̄ shuar Jesusan ti shiir enentáimtusarmiayi. Niisha Samarianmayá shuar ármiai. 40 Nu asamtai ashí Jesusaj̄ taar niijjaj̄ pujusát tusa seawarmiayi. Tutai Jesus jimiara tsawant nuj̄ pujusmiayi. 41 Nú shuar untsurj̄ ni chichamen antukar Jesusan ti shiir enentáimturarmiayi. 42 Nuyá nuwaj̄n̄ tiarmiayi “Yamaikia aya ame chichammijjaj̄n̄ Jesus enentáimtatsji antsu imia iisha ni chichamen anturkaji. Tura nékaji nekas Krístuiti, ashí shuaran Uwemtikin.”

Jesus akupniu takarniurj̄ uchir̄in̄ tsuármiania nu

43 Jimiara tsawant nan̄kaasmatai Jesus Samaria nun̄kanmayá j̄inki Kariréa nun̄kanam wémiayi. 44 Kariréasha Jesusa nun̄ke asamtai, añsha Jesus timia áintsañ̄ ámiayi: “Yúsnan etserniun ashí shuar péñker anturainiawai antsu nuna nun̄keyañka nin anturainiatsui.” 45 Tuma añ̄ Kariréa

nunƙanam jeamtai auya shuarsha Jerusarénnum paskua námpernum wearu ásar tura ashí ni túramun nuĵ wainkia ásar ti shiir awajsarmiayi.

⁴⁶ Nuyá Jesus Kaná péprunam atak támiayi. Nu péprunmasha nuik Jesus yumin umutai awajsarmiayi. Jesussha nuĵ puĵaj yajá péprunam Kapernáumnum akupniu takarĵn ámiayi. Ni uchirĵsha jaa tepemiayi. ⁴⁷ Niisha Jesus Jutíanmaya Kariréa nunƙanam taman antuk Jesusaj wémiayi. Tura ni uchirĵ jákatin tepakui ni jeĵen we ni uchirĵn tsuarat tusa Jesusan seamiayi.

⁴⁸ Jesussha tímiayi “Aya aents túrachminian túrakui ísrum aya núĵajĵ Winia enentáimtarne.”

⁴⁹ Tura takarĵn tímiayi “Uunta, winia uchir jáatsajĵ wari winitia.”

⁵⁰ Nuĩnkia Jesus tímiayi “Jeĵemĵin waketkitia. Yamaikia ame uchiram péƚker ajasai.” Tutai nú aishmaƚ Jesus táman antuk wémiayi.

⁵¹ Ni jeĵen jeátémamtai ni takarniurĵ inĵkiuƚ tiarmiayi “Yamaikia uchiram péƚker ajasai.”

⁵² Apasha inintrusmiayi nantu urukaim péƚker ajasma.

Niisha tiarmiayi “Yau, nantu pukuntamta, tsuemun michatramai” tiarmiayi.

Nuna antuk uchi aparĵsha enentáimsamai. ⁵³ Nantu pukunta aj Jesus “Ame uchiram péƚker ajasai” timia nuní aĵn michatrait. Tuma asamta niisha ashí ni shuarĵsha Jesusan nekas enentáimturarmiayi.

⁵⁴ Jesus nu túramuĵaj ni kakarmarĵn jimiará iniakmasmiayi. Nunasha Jutíanmaya ĵiinki Kariréa nunƙanam jeá túramiayi.

5

Petesta amia nuĵ tampemaruƚ Jesus tsuármiania nu

¹ Nu nanƙaasmatai, Israer-shuar namperan najanianiakui Jesus ataksha Jerusarénnum waketkiemiayi. ² Jerusarén yama wayamunam murik wayatĵn waiti tĵiĵuch amia nuĵ entsa pajamtai jeammauyayi. Nu pajamtain Petesta tiarmiayi. Nuna wáitirĵsha seƚku (5) ármiayi. ³ Nuĵ untsurĵ jáiniak nunƙanam tepearmiayi. Kusurusha shutuapsha tampemakusha tepesar entsa miartukat tusa nákasarmiayi. ⁴ Kame ni tátaj taku Yusa suntarĵ táuyayi entsan umuchkiatts. Nuyanƙa emka shuar entsá wayá nu ni jáamuriya tsuámarmiayi. ⁵ Áishmaƚ traintiúchu (38) uwi jaa tepá nuĵ ámiayi.

⁶ Jesussha nu shuaran nuĵ tepan wáinkiámiayi. Tura untsurĵ uwitin jaa tepan nekáa aniasmiayi “¿Shiir ajastiniak wakeram?”

⁷ Tutai jaasha tímiayi “Uunta, entsa muchitkiui ¿winia yaki enƙétát? Kame wi enƙemátaj tai chíkich emka enƙemániawai.”

⁸ Nuyá Jesus tímiayi “Nantaktia. Ame peakrum jukim wetá.”

⁹ Nu chichamtaik áishmaƚ shiir ajasmiayi. Tura ni peakrĵn jukí wémiayi. Nusha ayampratin tsawantaj túrunamiayi. ¹⁰ Tuma asamta Israer-shuar shiir ajasun tiarmiayi “Yamá ayampratin tsawantaiti. Peakrum ĵúkshtiniaitme” tiarmiayi.

¹¹ Áishmaƚsha tímiayi “Winia tsuara nu “Peakrum jukim wetá” turutni” tímiayi.

¹² Nuĩnkia aniasarmiayi “¿Ya “Peakrum jukim wetá” túramam?” tiarmiayi.

¹³ Tura áishmaƚsha Nin tsuárun nékachmiayi. Untsurĵ shuar nuĵ aa asamta tura Jesus weu asamta nin nekaachmiayi.

14 Atak Jesus Yusa Uunt Jeen áishmanġkan wáiniak tímiayi “Antukta. Ya-maikia shiir ajasume. Atak tunáa túrawaip; nu arant ajasáim” tímiayi. 15 Nuñġkia áishman Jesus nin tsuárman nekáa Israer-shuaran ujakmiayi. 16 Tuma asamtai ayampratin tsawantaj túramtai Israer-shuar Jesusan maatai tusar áintrarġmiayi. 17 Tura Jesus tímiayi “Wina Apar tuke yamaisha takawiti. Núnisnak Wisha takaajai.” 18 Tutai Israer-shuar nuna nanġkaamas maatai tusa wakeriarġmiayi. Ayampratin tsawantaj takaakui kajerkarġmiayi. Tura nu arantcha “Yus winia Aparuiti” takui Yusġaj métek enentáimtumawai tusar nu arant kajerkarġmiayi.

Yusa Uchirí túramnia nu

19 Nuyá Jesus tímiayi “Ti nekas tájarme, Yusa Uchirínġkia ni enentáijġain takaatsui. Antsu aya winia Apar takaana nuna ísan métek takaajai. Ashí winia Apar túramun Wisha ni Uchirí asan métek takaajai. 20 Ni Uchirí asamtai winia Apar anentui tura ashí tura nuna iniakturui. Tura nuna nanġkaamas tujinkiamnġin iniaktursattawai Wisha túratniun. Tura nuna túrakui ashamkattarme. 21 Winia Apar jakamunmayan iwiaaku ajasat tusa Ni wakerana nuna inianteatsuk. Núnisnak, ni Uchirí asan, Wi wakeraj nuna iwiaaku awájsámġaitġai. 22 Winia Aparka súmamtiktui antsu shuar súmamtikiatniun ni Uchirín súsaiti. 23 Tuma asamtai ashí shuar Yus Apan shiir awajainia áintsan ni Uchiríncha métek shiir awajsatin áiniawai. Yus Apa ni Uchirín akupka asamtai, Uchin shiir awajeatsna nuka Yus Apancha shiir awajeatsui’ tímiayi.

24 “Ti nekasaiti. Winia chichamprun ántana nú shuarka Winia Akuptukun enentáimtak ni iwiaakmarġn tuke amuukashtġinġin takakui. Nu shuarsha ayashí iwiaakuitiat jákauyi antsu yamá nekas iwiaakuiti. Tuma asa sumamashtatui. 25 Ti nekasaiti. Tsawant winittiana nu jeayi. Nu tsawant jaka ainia nu Wi unsumman antukar umirkarka iwiaaku ajasartatui. 26 Iis, winia Apar iwiaaku awajsatniun takakui. Tura Winiaasha, ni Uchirí asamtai, iwiaaku awajsatniun surusuiti. 27 Nu arantcha wi Aents Ajasu asamtai, shuaran súmamtikiatniun surusuiti. 28 “ġu chicham itirchataiti” enentáimprairap. Atak tsawantaj wi unsumman ashí jákaru ainia nu antukartatui. 29 Tura ashí iwiansamunmayá ġinkġartatui. Péñker túrawarusha nantakiar tuke iwiaaku pujusartatui. Antsu tunáa túrawarusha nantakiar ġiniun surunkartatui’ tímiayi.

“Jesus nekas Yúsaiġaiti” tu áġmatainia nu

30 “Imia Wíki takaatsġai. Antsu Yus tana núnisnak súmamtikeajai. Wi wakeraj nuna enentáimtsuk antsu winia Apar wakera nuna wakerukan, Nii akupta asamtai, awajġtsuk súmamtikġai. 31 Aya Wíki “Yúsaiġaitġai” tákunka winia chichamur ántar ainti. 32 Chikichcha awai. Niisha “Yúsaiġaiti” túrutui. Ni chichamesha imiá nekasaiti. 33 Atumsha Juankaj wi túramu inintrusmarme tura nii timia nu nekasaiti. 34 Tuma ain aents táman atsumatsġai. Antsu Juanka chichame enentáimkiuram uwempratarum tusan tájarme. 35 Juansha ġiya núnis keame. Atumsha ishichik tsawantin nú tsáapnġinium warastin enentáimpramarme. 36 Tura Winia “Yúsaiġaiti” túrutna nu, Juanjaj nanġkaamas péñkeran takakġai. Wi takasma núiti. Winia Apar takastġinġin surusma nuna takaakun nujaj páantaiti Yus Apa akupkamuitġai. 37 Winia Aparsha, akuptuku asa, ayamprutui. Túrasa átumka ni chichamesha antukchaitrume

jíinkiarmai. ¹⁸ Tura nase ti umpúkui chíchimi ti wajaiamiyi. ¹⁹ Ajapén ajarar Jesus entsá pátatek nanamas tíjiuch winian wáinkiar ashamkarmiai. ²⁰ Tura Jesus “Wíitjai. Ashamprukairap” tímiayi. ²¹ Nújainkia ti shiir warasar kanunam itiaawarmiayi. Tura nu chichamtaik ni wéamunam jeawarmiayi.

Shuar Jesusan eak wekainiawai

²² Kashincha chíkich shuar amain ayuramunam kanararu nekaawarmai. Jesusa unuiniamurj Jesúsainchu chikichik kanu amia nujai wéarun nekaawarmai. ²³ Nu jichichak matsataj Tipirias péprunmaya chíkich kanu táarmiayi. Yau Jesus Yúsan yuminkias tantan ayuramunam tíjiuch táarmatai ²⁴ nu shuar, Jesussha ni unuiniamurisha nu atsuuniakui, nu kanunam enkemáwar Kapernáum péprunam Jesusan eaktajtsa wearmai.

Jesus apatkua áintsankete

²⁵ Entsa amain Jesusan wáinkiar aniasarmiayi “Uunta, ¿urutía juisha támam?”

²⁶ Jesussha tímiayi “Ti nekas tájarne. Aents tujintiamu nekáa asarum éatsurme. Antsu tanta yuarum jémaru asarum éatrume. ²⁷ Juyá yurumak amuukatin asantai ti pachisairap. Antsu amuukashin yurumak tuke iwiaaku pujustinian amaana nu takarsatniuiti. Nú yurumkanka Wi, Aents Ajasu asan, susattajrume. Yus Apa nuna túratniun surus “Juka shuáran Yáinkiertiniaiti” túrutui” tímiayi.

²⁸ Tutai inintrusarmiayi “¿Warí túratniuitiaj Yus wakerana nu umiktin?”

²⁹ Jesussha tímiayi “Yus akupta asa Winia enentáimtursarat tusa wakerawai.”

³⁰ Tutai aniasarmiayi “¿Aentsti tujintiamuka warí túrattam ii ísar Ámin nekas enentáimtustin? Chikichcha túratá. ³¹ Yaunchu ii uuntri aents atsamunam maná yurumkan nayaimpinmaya susamun yurumáwarmiayi. Yus-Chichamnum núnik áarmaiti: “Nayaimpinmaya yurumkan Yus susamiayi.” Tu áarmaiti” tiarmiayi.

³² Jesussha tímiayi “Wi tájana nu nekasaiti. Muisais atumí úntrin nayaimpinmaya yurumkan súsachmiayi. Antsu winia Apar yamá nekas apatkun nayaimpinmaya súrui. ³³ Iis, Yusajya apatkunka, nayaimpinmaya tára nu súrui tura nekas apatuk asa ashí shuwaran nekas iwiaakman súawai.”

³⁴ Tutai “Uunta, nu apatuk tuke amasta” tiarmiayi.

³⁵ Tura Jesussha tímiayi “Wíitjai nu apatuk nekas iwiaakman sána nu. Winí winiana nú shuar penké tsukamashtatui, tura Winia enentáimturna nusha tuke kitiaarchattawai. ³⁶ Túrasha wí túramu wáinkiuymesha winia chichamur enentáimratsrume. ³⁷ Ashí shuwaran winia Apar tsankatrakarmiania nu, Wí shuar ajasartatui. Winin winiana núnaka penké nakitrashtatjai. ³⁸ Wí wakeraj nuna túratniun táchaitjai antsu Winia akuptukmia nuna umirkatniun táwitjai. ³⁹ Winia Apar akuptukuiti tura juna wakerawai. Ashí winia tsankatrakman emenkátsuk amuukatin tsawantaj iniantkiarat tusa wakerawai. ⁴⁰ Yus Apa wakerana nu júiti. Ashí shuar Winia “Yusa Uchirinti” tu enentáimturkui yamaram iwiaakman tuke takusat tusa wakerawai. Nú shuarnaka amuukatin tsawantaj iniantkittiajai” tímiayi Jesus.

⁴¹ Tura Jesus “Wíitjai, nayaimpinmaya apatuk akupkamu” takui Israer-shuar Jesusan áujmatiarmai.

⁴² Tura tiarmiayi “Ju Jesuschakait, Jusé uchiríya nu. Iikia ni aparísha nukurísha nékatsjik. ¿Itiurak “Nayaimpinmaya táraitjai” ta?” tiarmiayi.

⁴³ Jesussha tímiayi “Tu áujmatrukairap. ⁴⁴ Shuáran winia Apar akúpturkachuikuiñkia penké weanturkachainti. Tura Winia akupturna nuna amuukatin tsawantaj iniántkítiajai. ⁴⁵ Yúsnañ etserniu áarmarín tawai “Ashí Yus jintintiamu ártatui”. Núnisañ ashí Yusa chichamen antukar unuimiatiniakka Winí táiniawai” tímiayi.

⁴⁶ ‘Aya Wiki Yúsaiya tau asan Yúsnañ wáinkiaitjai. Chíkichka penké wáinkiachuiti. ⁴⁷ Ti nekas tájarne. Winia enentáimturna nú shuarka yamaram iwiaakman amuukashtinian takakui. ⁴⁸ Wikia iwiaakman súana nú apatkuitjai. ⁴⁹ Iis, atumí uuntri aents atsamunam maná yurumkan yúawariatcha ashí jákarmiayi. ⁵⁰ Antsu Wi tájana nú apatkun shuar yúakka jákachartatui. ⁵¹ Wikia nayaimpinmaya iwiaaku apatkuitjai. Nu apatkun shuar yuakka tuke iwiaaku átiniaiti. Nu apatkun Wi susattaj nusha winia ayashruiti. Ashí shuar Yusaj iwiaaku pujusarti tusan winia ayashrun susattajai” tímiayi Jesus.

⁵² Nuyá nuámtak áujmattsar tiarmiayi “¿Itiurak ni ayashínkesha ayurtamat-taj?” tiarmiayi.

⁵³ Jesussha tímiayi “Ti nekas tájarne, Wi Aents Ajasu asamtai winia ayashur yúatniuirume. Winia ayashur yúachmeka tura winia numpar umarchamka nekas iwiaaku pujatsrume. ⁵⁴ Winia ayashrun yúana nuka tura winia numparun úmaka yamaram iwiaakman amuukashtinian takakui. Tura nu shuaran amuukatin tsawantaj iniántkítiajai. ⁵⁵ Winia ayashruka nekas yurumkaiti tura winia numparsha nekas umutainti. ⁵⁶ Winia ayashruncha yúaka tura winia numparnasha úmaka Wijijaj tsanin pujawai tura Wisna nu shuarjaj tsaninjian pujajai. ⁵⁷ Yus Apa, Winia akuptukuka, nu iwiaakma nérenniuiti. Tuma asamtai ni iwiaakmarín iwiaaku pujajai. Núnisañ Winia yurakka winia iwiaakmaruj iwiaaku pujustatui. ⁵⁸ Nayaimpinmaya apatkun tajai. Ju apatuk maná yurumka áintsachuiti. Atumí uuntri maná yurumkan yuawarsha ashí jákarmiayi. Antsu ju apatkun shuar yúakka tuke iwiaaku pujustatui” tímiayi Jesus. ⁵⁹ Núnaka Jesus Israer-shuar iruntainiam unuiniarmiayi.

Iwiaaku chicham

⁶⁰ Nu chichaman antukar Jesusa unuiniamurj chicharainiak “Nii tana nu ti itiurchat asamtai ¿yaki antukminiait?” tiarmiayi.

⁶¹ Jesussha ni áujmatman nekáa tímiayi “Átum “ju chicham itiurchataiti” tárume. ⁶² Wátsek, Wi nayaimpiniam pujumiaj nuj waketkimtaisha ¿urukawaintrume? ⁶³ Warí, aya wakanik iwiaakman súwaiti. Ayashkia penké áantraiit nekas iwiaaku awajsatniun. Wi tájana nujaj imiá nekas wakankia iwiaaku awajsamniaiti” tímiayi Jesus. ⁶⁴ Tura Jesus Nin enentáimtachun tura Nin suruktatna nunasha yaunchu neka asa ni unuiniamurjín tímiayi “Atumíncha winia chichamprun enentáimtachu tuke awai. ⁶⁵ Nu asamtai tímiajrumé “Shuáran winia Apar akupturkachamaitkuiñkia penké weanturkachainti” tímiajai” tímiayi Jesus.

⁶⁶ Nuyasha ni nemarniurj untsurj armia nu Jesusan ikiukiari atakka Niijijaj wekasacharmiayi. ⁶⁷ Nuyá Jesus ni tuse (12) unuiniamurjín chicharainiak “¿Atumsha wétin wakerarmek?” tímiayi.

68 Semun̄ Pítrusha áíkmiayi “Uunta, ¿yáiniñ wetaj? Ame chichammijaiñ nekas iwiaaku áminiaiti. 69 Ame Kristu asam nekas iwiaaku Yusa Uchir̄nme. Nuka enentáimtusar ti paant nékaji” tímiayi.

70 Jesussha tímiayi “Ashí tuse (12) árumna nu achikiuitjiarme nekas Wíi shuar ajastin. Tuma aiñ atum̄iñ chikichik iwianchiiti” tímiayi. 71 Nuna taku Jútassha Iskariütin, Semun̄ka uchir̄n, enentáimtusar tímiayi. Jútassha ni unuiniamur̄ntiat Jesusan ukunam surukmiayi.

7

Jesusa yachisha Nin enentáimtuscharmiaiyi

1 Nu nan̄kaasmatai Jesus Kariréa nun̄kanam wekaimiaiyi. Jutía nun̄kanam wéchamiayi Israer-shuara uuntr̄j nuñ máataj tutai. 2 Tura Israer-shuar aak aakmatai namper̄j jeatemamtai 3 Jesusa yachi wishikiainiak tiarmiayi “¿Urukamtai juisha pujam? Jutía nun̄kanam wetá, aisha ame unuiniamuram túram nuna ísarar. 4 Ashí shuar nekaawarat tákumka úukam túrawaip. Ti tujintiamu túriniaitkiumka ashí shuar ímmianum túratá” tiarmiayi. 5 Ni yachisha ishichkisha Nin enentáimtachu ásar tiarmiayi.

6 Tura Jesus tímiayi “Winia tsawantur nampernum wétin jeatsui. Atumjain̄kia nán̄kamas tsawant wétin péñkeraiti. 7 Ju nun̄kanmayá aents atumniaka kajertamstrume. Antsu ni tunaar̄n etsertin asamtai Wíniaka kajertuiniaiwai. 8 Átumka nampernum wetarum. Wikia tsawantur jeachkui wéatsjai.” 9 Juna tinia Jesuska Kariréa nun̄kanam juákmiayi.

Aak aakmatai nampernum Jesus timia nu

10 Ni yachi wearmatai Jesussha nampernum wémiayi. Tura nekarawarain̄ tusa úumak wémiayi. 11 Israer-shuara úuntriñsha námper irunturmanum eakar “Nu aishman̄sha ¿tuin̄ pujá?” tiarmiayi. 12 Ashí shuarsha Nin áujmatiarimiayi. Chíkich “péñkeraiti” tiarmiayi. Tura chikichcha “Péñkerchaiti. Aya anan̄kartawai” tiarmiayi. 13 Tura Israer-shuara úuntriñ ashamainiak uuk áujmatiarimiayi.

14 Nampersha ajapén ajasmatai Jesus Yusa Uunt Jeen wayá shuaran unuiniamiaiyi. 15 Israer-shuara úuntriñsha nuna ísar ti enentáimsar chichaak “Jusha unuimiátrachiatcha ¿itiurak imiá neka?” tiarmiayi.

16 Jesussha tímiayi “Wi unuiniajna nu winia chichampruchuiti antsu Winia akuptukua Núnan unuiniajai. 17 Yus wakerana nuna shuar nekas umik-tinian wakerakka winia chichamprun nekaattawai. Nekas Yúsnaitkiuin̄kia, nuna nekaattawai. Aya wi enentáimmiajaiñ chichaakuisha, nuna nekaattawai. 18 Ni enentáimmiajaiñ chichaana nuka ashí shiir enentáimtursarti tusa chichaawai. Antsu nin akupka nuna shiir awajsarti tusa wakerak, nekas wáitratsuk tawai. 19 Muisais Yusa akupkamur̄n atum̄i uuntriñ amaschamka. Tuma aiñ nu umitsuk mantuatin wakerutarne” tímiayi Jesus.

20 Nu shuarsha tiarmiayi “Wáurtsmek. ¿Ya mantamataj tusa wakera?”

21 Jesussha tímiayi “Ayampratin tsawantaj chikichkí túramtai ti enentáimtsurmek. 22 Muisais ashí tsupirnaktinian akupkachmiayi. Antsu ni uuntriñkia nuna akupka ániawai. Tuma aiñ átumka Muisais akupkamu umiktai tusarum ayampratin tsawantajsha uchi áishman̄ tsúpirnaitrume. 23 Wátsek, Muisais akupkamu uminkiatu tusarum ayampratin tsawantajsha uchi áishman̄ tsúpirkurmekaka ¿urukamtai Wi ayampratin tsawantaj áishman̄ka ayashí takamtsuk tsuármatai kajertarum? 24 Shuar túrana nu ísam wárik

súmamtikiawaip. Antsu inintrúsam paant nekaam, nekasa nu enentáimtusta" tímiayi Jesus.

Jesus Yúsnumiá akupkamuiti

²⁵ Nuyá Jerusarénnumiá shuar tiarmiayi “Maatai tuinia núchakait. ²⁶ Tura nuí ashí ántamunam étserei tura suntar páchiniatsui. ¿Ii uuntrišha “Nekas Krístuiti” tu enentáimtuiniawash? ²⁷ Antsu nekas Krístu taa tuyan winiá nekanashtatui tura ju pujamuka ashí nékaji” tiarmiayi.

²⁸ Jesus nuna antuk, Yusa Uunt Jeeen waja kakaram chichaak tímiayi “Winia nekararum tuyá winiay nu nékarme. Kame núnisrum enentáimprume. Tura winia enentáirjai táchaitjai antsu winia Apar akuptukuiti. Niisha ti nekas akupniusha átumka nékatsrume. ²⁹ Antsu Winia akuptukuitkiui aiyá tau asan Wikia nékaji” tímiayi. ³⁰ Nuyá sepunam enkeataj táyat achikcharmiayi ni tsawantri jeachu asamtai. ³¹ Tura untsurí shuar Nin enentáimtusar “Krístu ta ¿nuna nankaamas aentsti tujintiamun túratpiash?” tiarmiayi.

“Eátkáttarme tura wáitkiashtatrume” tímiayi Jesus

³² Pariséusha Israer-patri úuntrišha Jesusnan timian antukar suntaran akupkarmiayi Jesusan achikiar sepunam enkeawarat tusar. ³³ Nuyá Jessusha tímiayi “Aya ishichik tsawant atumjai pujustatjai. Nuyá ataksha Winia akuptuku pujana nuí waketkittiajai. ³⁴ Átumka eátkáttarme tura Wi wéajna nuí wéchamniaitkiuram wáitkiashtatrume.”

³⁵ Israer-shuarsha nuamtak aniniaisarmiayi “¿Jusha tui wéakuin iisha wáinkiashtataji. Israer-shuar apachnium pujuinia nuí we apachin unuiniar-tatuak. ³⁶ Nii timia nu iturkit. “Átumka eátkáttarme tura Wi wéajna nuí wéchamniaitkiuram wáitkiashtatrume” tana nu iturkit?” tiarmiayi.

Yamaram iwiaakman súana nú entsa

³⁷ Jista amúamunam ti shiir najanawarmia nu tsawantaj Jesus wajaki kakaram chichaak tímiayi “Shuar ni enentáin kitiamakka Winin taa umar kitiakén imikráti. ³⁸ Winia enentáimturna nuka ni enentáiyá entsa wa áintsan yamaram iwiaakman súana nú entsa jiinkittiwai.”

³⁹ Nuna taku Jesus “Ashí Yusan enentáimtusarun Yusa Shiir Wakaní súsatniuiti” tímiayi. Tura núnisar Yus-Papiniunmsha áarmaiti. Antsu Jesus tuke nayaimpiniam wéatsain Yusa Wakaní shuar súasachmauyayi.

Shuarsha niisháa niisháa enentáimprarmiania nu

⁴⁰ Chikich shuarsha nuna antukar “Ju nekas Yúsna etserin tátinia núiti” tiarmiayi. ⁴¹ Chikichcha “Ju nekas Krístuiti” tiarmiayi. Tura chikichkia Jesus Kariréanmayaiti tu enentáimiainiak tiarmiayi “Wari, ¿Kariréa nunkanmaya Krístu áminkiait? ⁴² Yus-Papinium paant tawai “Krístuka yaunchu uunt akupin Tawit weeanmaya akiniatniuiti, tawai. Tura Tawitia pépruriya Pirinnumiá átiniaiti” tawai” tiarmiayi. ⁴³ Tuma asamtai shuar niisháa niisháa enentáimprar kanakiarmiayi. ⁴⁴ Chikich aiyá nuka “sepunam enkeatai” tiarmiayi túrasha túracharmiayi.

Israer-shuara uuntri Jesusan enentáimtuscharmiania nu

⁴⁵ Suntarsha waketkiarmiayi. Tura Pariséusha Israer-patri uuntrišha “¿Urukamtai itiachuram?” tiarmiayi.

⁴⁶ Suntarsha tiarmiayi “Chikichkisha ju áishman chichaa áanis chichaschaiti” tiarmiayi.

⁴⁷ Nuyá Pariséu tiarmiayi “Atumsha anan̄narume. ⁴⁸ Pariséutisha uuntcha nuna enentáimtuiniawash. ⁴⁹ Penké shuarka yaunchu akupkamun nékachua nuka yajauchiniam yum̄n̄kramu áiniawai” tiarmiayi.

⁵⁰ Nikiutémusha, kashi Jesusan tarimia nu, Pariséuitiat tímiayi ⁵¹ “Ii shuar-tikia, shuar ni túramun etserkamu ántutsuk súmamtikiachminiaiti” tímiayi.

⁵² Nuñkia niisha tiarmiayi “Wats, amesha Kariréanmayan̄chuashitiam. Yus-Chicham áusam nekaattame. Kariréanmayá Yúsnan etserin penké táiniatsui” tiarmiayi.

Nuwa wáinmakman Jesusan itiararmiania nu

⁵³ Nuyá ashí ni jeen waketkiarmiayi.

8

¹ Tura Jesuska Uriwiu náinnium wémiayi. ² Tura kashin tsawar Yusa Uunt Jeen atak támatai ashí shuar Nin káutkarmiayi. Túrawarmatai Jesus pujus unuiniarmiayi. ³ Nuyá Israer-shuara jintinniurjisha Pariséusha nuwān wáinmakman Jesusan itiararmiayi. Tura ashí iruntramunam ajapén awajsrarmiayi. ⁴ Tura Jesusan tiarmiayi “Uunta, ju nuwā tsanirma pujá achinkiyai. ⁵ Muisais akupkamunmasha nuna túraka “kayajai tukurar máatniuiti” tawai. ¿Amesha warintmea?” tiarmiayi. ⁶ Aya mamikmar nekapsatai tusar tiarmiayi. Nin sumamtikiatniun wakeriarmiayi.

Nuyá Jesus tsunsumá ni uwejéjai nuñká áarmiayi. ⁷ Tura tuke iníam wajaki tímiayi “Ayu, atum̄iyá tunáa túrichu ákuñka kayan achik nin emka tukuti” tímiayi. ⁸ Tura nuna t̄i, ataksha tsunsumá nuñká áimiayi.

⁹ Tura ni chichamen antukar ni enentáin sumamawar úuntnumiá júki chikichik chikichik j̄in̄ki wéarmiayi.

Ashí wéarmatai Jesus Niñki nuwájai juákmiayi. ¹⁰ Jesussha wajaki aya nuwānak wáiniak tímiayi “¿Ámin súmamtikramainia nusha tuñ̄ pujuinia. Chikichiksha áwak?” tímiayi.

¹¹ Niisha “Atsá, Uunta. Chikichiksha atsawai” tímiayi.

Nuyá Jesus tímiayi. “Ayu. Wisha súmamtikisjame. Yamaikia weme atakka tunáa túrawaip” tímiayi.

Jesus tsáap̄nia áintsan̄kete

¹² Ataksha Jesus Yusa Uunt Jeen iruntrarun tímiayi “Ju nuñkanam Wi tsáap̄nia áintsan̄ shuara enentáin tsáap̄niajai. Ashí Wij̄jai tsan̄in̄ wekaana nú shuar ni enentáin kiritniunam wekasashtuai antsu tsáap̄nin yamaram iwiaakman súana nujai wekasattawai.”

¹³ Pariséu nuikia tiarmiayi “Ame p̄n̄kerum tau asam támena nu áantraiit.”

¹⁴ Jesus tímiayi “Tuyá winiaj tura tui weaj nu nékatsrume, tura Wikia nékajai. Tuma asan winia p̄n̄kerun táyatnak tájana nu p̄n̄keraiti. ¹⁵ Ju nuñkanmayá aents enentáim̄miajai enentáimtakrum ti súmamtikrume. Tura Wikia chikichinkesha súmamtiktsujai. ¹⁶ Tura súmamtikkiunka awajitsuk túrajai. Iis, Wiki shuar túramun p̄n̄kerashit tusan enentáim̄tsujai antsu winia Apar Winia akuptukua nusha Wij̄jai métek shuar túramun nékawai. ¹⁷ Atumí akupkamur̄j̄in̄ áarmaiti: “Jimiará shuar mai nú chichamnak tákuñkia nu chicham nekasaiti.” ¹⁸ Wátsek Wisha winia Aparsha mai métek taji. Winia Aparsha akuptukuiti” tímiayi.

¹⁹ Tutai “¿Ame apasha tūj̄ pujá?” tiarmiayi.

Jesusha tímiayi “Átumka Winiasha winia Aparsha nékatsrume. Winia nékarkurmeka winia Aparsha nekaawaintrume.” ²⁰ Nuna Yusa Uunt Jēen Yusa kuítrīn suinia nuī tímiayi. Tuma aiñ sepunam enkeatniun achikcharmī-ayi ni tsawantrī jechu asamtai.

“Wi wéajna nuī wéchamniaitrumē’ tímiayi Jesuś

²¹ Jesuś ataksha tímiayi “Wikia wéajai. Atumsha eátkáttarme tura wi wéamunam wéchamniaitkiuram atumí tunaarjjiain jakattarme.”

²² Israer-shuarsha tiarmiayi “Wi wéamunam wéchamniaitrumē” tutai, nuñkia máamatpiash” tiarmiayi.

²³ Nuñkia Jesuś tímiayi “Átumka nunḱayaitrumē antsu Wikia nayaimpin-mayaitjai. Ju nunḱayaitrumē tura Wikia juyanchuitjai. ²⁴ Tuma asamtai tájarme “Atumi tunaarjjiain jakattarme.” Nekas Wi tájana núitjai. Tura nu enentáimtachkurmeka atumi tunaarjjiain jakattarme” tímiayi.

²⁵ Niisha aniasarmiayi “¿Amesha yáitiam?”

Jesusha tímiayi “Yaunchu tájarme. ²⁶ Nu arantcha atumin súmamtikiatjarum tusan ti tíminiaitjai. Winia Apar akuptukua nuka tuke nekasa nuna tawai. Tura aya ni taman antukan ashí shuaran nunak tajai” tímiayi. ²⁷ Tuma aiñ ni Aparīn áujmatman penḱé nekaacharmiayi. ²⁸ Tuma asamtai tímiayi “Aents Ajasuitjiana ju, numiniam ajintruarum yakí takuriakrumin nūjainḱia nekarattarme. Wi tájana núitjai tura winia enentáirjain takatsuk aya winia Apar unuiturmanak tájai. ²⁹ Winia akuptukua nuka tuke Wíjjain pujawai. Winia Apar wakeramun tuke shiir túrakui ikiurkichuiti” tímiayi. ³⁰ Tutai untsurí shuar Nin nekas enentáimtusarmiayi.

Yus-shuarsha tura tunaanum emetamusha

³¹ Israer-shuaran Nin shiir enentáimtusarmia nuna Jesuś tímiayi “Wi tájarmena nu yawetsuk túrakumka nekas winia unuiniamur átatrumē. ³² Nūjainḱia timiá nekas ana nu nekaattarme tura nekas anḱant ajastatrumē” tímiayi.

³³ Niisha tiarmiayi “Iisha Apraám weeitji. Chikicha takarniur átai tusar penḱé emetachmaitji. ¿Urukamtai “Anḱant ajastatrumē” tame?” tiarmiayi.

³⁴ Jesuś tímiayi “Timiá nekasaiti, ashí shuar tunaan túruinia nuka nu tunaajai emetamuiti. Tuma asa takarniua núnisañ ajasuiti. ³⁵ Takarniusha ajapnannia asamtai Yus atumin ajapramanniaitrumē. Tura Akupniu Uchirínḱia ni Aparjjiain tuke pujawai. ³⁶ Tuma asamtai Akupniu Uchirí anḱant awajtamsamtaínḱia imiá nekas anḱant pujustatrumē. ³⁷ Átum Apraám weeitrumē nékajai. Túmaitiatrum winia chichamur ántachu asarum mantuataj tárume. ³⁸ Winia Apar iniaktursamun áujmatjai. Átumka atumí uuntri timia túrarme” tímiayi.

³⁹ Tutai niisha tiarmiayi “Iikia Israer-shuar asakrin ii úntrinḱia Apraámaiti” tiarmiayi.

Tura Jesuś tímiayi “Nekas enentáimin Apraám weeitkiurmeka níya núnis túrawaintrume. ⁴⁰ Nekas ana nuna Yus iniaktursamtai nuna ujakjarme, tuma aiñ mantuataj tarume. Apraámka nuní túrachmiayi. ⁴¹ Antsu atumí uuntri túrana áintsarum túrarme” tímiayi.

Tutai niisha tiarmiayi “Warí, tsanirnumiá akiiniachuitji. Ii uuntri Yúskete. Niisha ii Aparīnti.”

42 Tura Jesus tímiayi “Yus nekas atumi Aparíntkiuin¹kia Winiasha anentáintrume Yúsnumiá tau asamtai. Wisha winia enentáimmarjaj² jui táchaitjai antsu Yus akuptukuiti. 43 ¿Urukamtai Wi tájana nu imiá nékatsrum? Wi tájana nu nakitia asarum winia chichamur ántatsrume. 44 Atumí aparí³nkia úunt iwianchiiti. Tura niiniu asarum nii wakera nu túrarme. Yámankamtaiksha úunt iwianchkia tuke mankartiniaiti. Nekas ana nunasha nakitiawai tuke wáitrin asa. Wáittraksha níiniunak chichaawai. Iis, waitia uuntri⁴ asa tuke wáitri⁵nai⁶iti. 45 Tura Wikia nekas takui átum enentáimturtsurme. 46 ¿Yaki chikichki tunaajaj⁷ súmamtikruamniait? Nuikia Wi nekasa nuna tau aisha ¿urukamtai enentáimturtsuram? 47 Yús-shuarka Yus timian ántawai tura átum Yús⁸nachu asarum Wi tájana nu nakitiarme” tímiayi.

Apráám akiintsajin Jesus pujumiayi

48 Nuikia Israer-shuar tiarmiayi “Maa, ti nekas tátsujik “Ame Samarianmayá shuáraitme. Tuke yajauch ániawai nusha. Nu arantcha iwianchrukuitme amesha” nekas taji” tiarmiayi.

49 Jesussha tímiayi “Iwianchrukchaitjai. Áyatik winia Aparun shiir enentáimtikiajai. Tura átumka yajauch chichartarme. 50 Wikia “shiir enentáimturarti” tátsujai túrasha Yuska ashí shuar Winia shiir enentáimturat tusa wakerawai. Niisha Yus asa ashí shuar túramun penkerashit tusa nekaattawai. 51 Ti nekasa¹iti. Wi tájana nuna enentáimta nú shuarka penké jákashtiniaiti” tímiayi.

52 Nu²nkia Israer-shuar tiarmiayi “Pai, yamaikia ti paant iwianch takakme. Apráámsha ashí Yús³nan etserniusha jákaruiti tura Ame “Wi tájana nuna enentáimtaka penké jákashtiniaiti” tátsumek tiarmiayi. 53 ¿Nu⁴nkia ii uuntri⁵ Apráám nan⁶kaamaskaitiam. Niisha tura Yús⁷nan etserniusha jákacharuk áinia. Itiurak imiá nan⁸kaamantu enentáimtumam?” tiarmiayi.

54 Jesussha tímiayi “Wiki shiir enentáimtumaknaka penké áantrai¹ti. Antsu Winia shiir enentáimturna nu winia Aparuiti. Nusha átumka “winia Yúsruiti” tár²umna núiti. 55 Nusha táyatrum Nin nékatsrume. Wikia Nin nékajai. “Nin nékatsjai” tákunka atumjai³ métek wáitrin áintjai. Tura Nin neka asan Nii tana nuna tuke túriniaitjai. 56 Apráámka, atumí uuntri⁴, imiá yaunchu jákaitiat Wi ju nun⁵kanam tátinian wararas nákasmiayi. Tura wáitiak ti shiir waratusmiayi” tímiayi.

57 Nuyá Israer-shuar Jesusan tiarmiayi “Warí, sen¹kuenta (50) uwí takakt²sume túmaitiatam Aprááman wáinkiamjai tame.”

58 Jesussha tímiayi “Ti nekas tájarme, Apráámka pujatsajin Wikia pujajai” tímiayi Jesus.

59 Nuna takui kayan achikiar “Jesusan tukutai” tiarmiayi. Tura Jesus ú¹umak ni matsatmanum ajapénin² weak Yusa Uunt Je³eniá jinki wémiayi.

9

Kusuru akiinian Jesus tsuármiania nu

1 Jesus ni unuiniamurijjai¹ wesa áishman²kan kusuru akiinian wáinkiamiayi.

2 Ni unuiniamurijsha aniasarmiayi “Uunta, jusha ¿urukamtai kusuru akiiniawit. Yana tunaarijjai³ kusuru akiiniait. Niiniuajaimpiash, aparíniujaimpiash túrunawit?” tiarmiayi.

3 Jesus tímiayi “Ni tunaarijjai¹inchusha ni aparíniujai²inchusha túrunaiti. Antsu Yus ni ayashín túratniua nu paant atí tusa túrunaiti. 4 Tsawaj³ikia takastiniaiti. Yamaikia Winia akuptukua nuna takatrin túratniuitjai. Kashi

ajasmatai takastin atsuttawai. ⁵ Jú nunkanam pujakun shuara enentáin tsáapnimitkratniuitjai" tímiayi. ⁶ Nuna chichas nunká usukmi nunkajai pachimiar kusuru jün yakarmiayi. ⁷ Nuyá chichaak "Siruí pajamtai entsanam nijiamauta" tímiayi. Siruísha nu chichamnum "akupkamu" tawai. Kusurusha we nijiamar péñker íimiar támiayi.

⁸ Nuyá ni írutkamurísha nuik wáinin ármia nusha tiarmiayi "Juka pujus tuke kuítian seamniyuwa núchakait." ⁹ Chíkich "Ee, núkete" tiarmiayi. Chíkichcha "Atsá, núchaiti; kame nuash tumainti" tiarmiayi.

Tura niñki "Ee, wíitjai" tímiayi.

¹⁰ Tutai aniiniak "¿Itiurak yamaikia íimiam?" tiarmiayi.

¹¹ Niisha tímiayi "Áishman Jesusa nu tsakusan jüirun yakartur "Siruí pajamtai entsanam nijiamauta" turutmiai. Takui wena nijiamaran paant íimpramjai" tímiayi.

¹² Tutai "Nu áishmansha tuin pujá" tiarmiayi.

Niisha "Cha, nékatsjai" tímiayi.

Pariséu kusuru tsuárman inintrusarmiania nu

¹³ Nuyá kusuru tsuárman Pariséunam júkiarmiayi. ¹⁴ Kame Jesus kusurun tsuarmia nuí ayampratin tsawantauyayi. ¹⁵ Tuma asamtai Pariséusha itiurak íimnium tusar aniasarmiayi.

Niisha tímiayi "Jüiruín tsakusan yakaarámatai, nijiamaran paant íimjiai."

¹⁶ Nuyá chíkich Pariséu shuarnumiá nuamtak tunaiyar "Juna tsuáruka Yúsajyanchuiti. Kame ayampratin tsawantai túraití" tiarmiayi.

Tura chíkichcha "Tunáa shuaraitkiuñkia júnišan túratniun tujinkiaayi" tiarmiayi. Nujai akanaikiarmiayi.

¹⁷ Tsuármancha ataksha aniasarmiayi "Ámin tsuármarua nu ¿warí enentáimtam?" tiarmiayi.

Tutai "Wikia "Yúsnan etserniuiti" tajai" tímiayi.

¹⁸ Tura Israer-shuar nekas kusuruiat yamá íimui tu enentáimtuscharmiayi Pariseu. Tuma ásar ni aparíncha untsukar ¹⁹ inintrusarmiayi "¿Ame uchiram kusuru akiinia tárumna nukait. Itiurak yamaikia íimia?" tiarmiayi.

²⁰ Ni aparísha tiarmiayi "Íi uchirínkia kusuru akiiniam nu nékaji. ²¹ Tura iisha nékatsji itiurak yamaikia íimia. ¿Yátsuk péñker tsuáruit? Niisha úuntchakait, nii aniastrarum. Niñki ujatmakarti" tiarmiayi. ²² Sapijmiak tiarmiayi. Israer-shuara úuntrínkia "Jesus Yus akupkamu asa nekas Krístiti" tuinia núnaka Israer-shuara íruntainmaya jüiki akupnakti tiniu ásmatai tsuarma aparí ashamkarmiayi. ²³ Nu asamtai ni aparí "Niisha úuntchakait, nii aniastrarum" tiarmiayi.

²⁴ Nuñkia Israer-shuara uuntri kusuru tsuárman ataksha untsuk tiarmiayi "Yus íimmianum nekasa nu titiá, jú áishmanikka tunaarinniuiti nékaji" tiarmiayi.

²⁵ Tutai tímiayi "Kame tunaarinchashit. Nékatsjai. Antsu junak nékajai. Yaunchu kusuruiatian yamaikia íimjiai."

²⁶ Ataksha aniiniak "¿Itiurtámkama. Itiur íimtikrammia?" tiarmiayi.

²⁷ Niisha tímiayi "Yaunchu tájarme tura anturtatsrume. ¿Urukamta ataksha titi tusa wakerarum. Niiniu ajastin enentáimprurmek?" tímiayi.

²⁸ Nuñkia katsekkar "Ámeka ní shuarínme. Tura iikia Muisaisa shuaríntji, tiarmiayi. ²⁹ Yus Muisaisan akupkaiti iikia nékaji antsu nu áishman nékatsji. ¿Tuyantskait?" tiarmiayi.

³⁰ Áishman tsuarma tímiayi “¿Ausha itiuartsuk áminiait? Winia ímtikrurma nu átumka nékatsrume tuyankit. ³¹ Paant nékaji tunaarinnium Yus anturtsui. Tikishmatar ni wakeramun túruinia nunak anturui. ³² Yáunchusha kusuru akiinian tsuáruka tuke atsuwaiti. ³³ Ju áishman Yúsaiyanchuitkiunka penké túrachaayi” tímiayi.

³⁴ Nuñkia tiarmiayi “Ámeka tunaarintin akiiniaiatmesha ¿in jintintin átaj tamek?” Nuna tiar jiki awemarmiayi.

Wakanjin kusurua nu

³⁵ Kusuru tsuárman jiki awemarma nuna Jesus nekaamiayi. Tura wáiniak “Yusa Uchirja nu enentáimtamek” tímiayi.

³⁶ Tsuarma tímiayi “Uunta, turuttia wisha nekaan enentáimtustaj.”

³⁷ Jesussha tímiayi “Wainme. Wiitjai ámijjai chichaaajna nu.”

³⁸ Tutai, tikishmatar “Uunta, enentáimtajme” Jesusan tímiayi.

³⁹ Nuyá Jesus tímiayi “Shuara enentáin nekaan, akantratajtsan táwitjai. Ni enentáin kusuru ain iimtikinian tura ananmamuk “Yusnan nekaan paant iimjai” tana nuna ukusturtinian táwitjai” tímiayi.

⁴⁰ Tutai Pariséu shuar nuí pujuarmia nu nuna antukar “¿Nuñkia iikia kusurukaitiaj?” tiarmiayi.

⁴¹ Jesussha tímiayi “Átum kusuruitkiurmeka atumí tunaari wáinchakrum sumamachu áintrume. Tura “paant iimjai” tau asarum sumamaitrume” tímiayi.

10

Iikia murikiua áintsar aji

¹ Jesus tímiayi “Wi tájana nu ti nekasaiti. Shuar murikiun takakna nu ni murikrin wenuimiumam kashi ikiauawai. Tura murik wenuimiumam pujuiniakui yajauch shuar murikiun kasamkatniun wakerakka wáitiniam wayachmin asa tanishnum waruk yajá wayawainti. ² Antsu murikiu wáinniuka wáitiniam wayawawai. ³ Waiti wáinniuka nekas murikiun wáinnium wáitin uratui. Muriksha ni wáinniuri chichamen nékainiawai. Niisha ashí ni murikrin chikichik chikichik náarin anaitius untsúawai. Tura tsawaikia ni murikrin jiki ayurtainiam yarumui. ⁴ Tura ashí ni murikrin jir émtuki wéawai. Muriksha ni chichamen ántuiniak untsuam nemarainiawai. ⁵ Chikich shuárnaka nékachu ásar nemarainiatsui. Antsu ni chichamen nékainiachu ásar pisainiawai.” ⁶ Nu métek-taku chichamnaka Jesus áujmatsamiayi tura shuar antukar nekaacharmiayi.

Pénker wáinniuka Jesusaiti

⁷ Nuyá Jesus tímiayi “Ti nekasán tájarme. Wenuimiu wáitiri murik wainia nuka Wiitjai. Shuarsha murikiu áintsar Winí wayamin ániawai. ⁸ Wi táatsain ashí táaruka kasa ániak winia shuarun kasamkatai tusa wakeriarmiayi. Tura winia murikiur Wí shuar ániak nu shuaran anturkacharmiayi. ⁹ Wikia wáititjai. Ashí Winin wayaaka uwemprattawai. Tura murikiua áintsan wenuimiummay jinki penker yurumáttawai tura atak wayá ayamprattawai” tímiayi.

¹⁰ Kásaka aya kasamkatniuncha máatniuncha emesratniuncha wakerawai. Antsu Wikia yamaram iwiaakman tuke shiir atsumtsuk takusarti tusan táwitjai. ¹¹ Wikia penker wáinniuitjai. Penker wáinniuka ni murikrin uwemtikrartaj tusa jakattawai. ¹² Antsu aya kuitjai takauka ni murikrichu

áiniakui tura nekas wáinniuchu asa péñker wáintsui. Kame uunt yawá winiakui murikiun ikiuki pisaawai. Uunt yawásha murikiun achik tsakinmawai. ¹³ Nu shuarsha akikiam takáa asa murikiun enentáimtatsui. Nu asamtai aya pisaawai' tímiayi.

¹⁴⁻¹⁵ 'Wikia péñker wáinnuitjai. Winia Aparsha nékarui. Wisha Aparun nékajai. Núnisnak murikrun nékajai tura winia murikrusha nékarui. Wisha murikiun uwemtikrataj tusan jakattajai. ¹⁶ Chíkich muriknasha takakjai. Nusha ju wenuimiummayanchu áiniawai. Nunasha itiattajai. Nu muriksha Winia umirtukar ashí métek matsamsar chikichik wenuimiummayá ajasartatui tura chikichik wáinin átatui' tímiayi.

¹⁷ 'Winia murikrun uwemtikrataj tusan jakattajai turan atak nantaktiatjai. Nu asamtai winia Apar anentui. ¹⁸ Wi wakerakun jakattajai. Wi wakerachkuinikia chikichkia mantuachminiati. Jákatniuncha tura nantaktinniasha winia Apar surusuiti" tímiayi Jesus.

¹⁹ Israer-shuarsha nuna antukar niisháa enentáimprar kanakiarmiayi. ²⁰ Untsurí tiarmiayi "¿Urukamtai ántarum wáuruk tausha. Yajauch wakanin takaksuk?" ²¹ Tura chikichcha tiarmiayi "¿Yajauch wakantrinniusha núnisan chichasminkiait. Yajauch wakantrinniusha kusurun ímtikramniashit?" tiarmiayi.

Israer-shuarka Jesusan nakitiarmiania nu

²² Micha nantutin Israer-shuar Jerusaréñnum namperan najanainiawai. Nu nampernumsha Yusa Uunt Jee atak jeamman enentáimtuiniawai.

²³ Jesussha Yusa Uunt Jee áchiniam wekasamiayi Sarumúnka wáitirja nuí.

²⁴ Israer-shuarsha Nin téntakar tiarmiayi "¿Ame nekas Krístukaitiam? Ju chichamaik etserkata. ¿Urukamtia nekas paant tátsum?" tiarmiayi.

²⁵ Tutai Jesus tímiayi "Yaunchu tiniu ajñ enentáimturachmarme. Winia Apar akupkamun takaajna nu ti paant awajtawai. ²⁶ Tura átumka winia murikruchu asarum enentáimturtsurme. ²⁷ Wisha winia murikrun unsuam anturtuiniak nemartuiniawai. Wisha winianak mash nékajai. ²⁸ Tura yamarum iwiaakman tuke jákashtinian súajai. Nu asamtai niisha menkakachartatui antsu Wi wainkia asamtai ¿yaki jurutkit? ²⁹ Winia Apar murikiun surusuiti. Niisha ashí nankaamas kakaram asamtai ¿yaki uwejeýan atankit? ³⁰ Wisha winia Aparjai iisha aya chikichkiitji" tímiayi Jesus.

³¹ Tutai Israer-shuarsha atak kayan achikiar tukutaj tiarmiayi.

³² Jesussha tímiayi "Winia Aparu kakarmarjijai ti untsurí péñkera nuna takasuitjai. ¿Tújajimpia mantuattarum?"

³³ Israer-shuarsha Nin tiarmiayi "Péñker túra asakmin máataj tátsuji antsu Yus yajauch chicharkumin túrattaji. Ámeka shuáraitiatam Yusa nuke enentáimtumame" tiarmiayi.

³⁴ Nuyá Jesussha tímiayi "Atumí akupeamurijn Yus timia nu áarmaiti: "Átum yúsaitrume" tawai. ³⁵ Kame Yus-Papinium aarma nu tuke nekaschakait. Tuma asamtai ni chichamen antukarun Yuska "yúsaitrume" takui nuikia ti nekaschakait. ³⁶ Niisha yúsaitkiuinikia nuikia Yus Apa anaikia ju nunkanam akupkamu asan ti nekas Yúschakaitaj. Nújainkia wi "Yusa Uchiríntjai" takui ¿itiurak "Yusan yajauch chicharui" túrutrum? ³⁷ Winia Apar túramu túrachkuinikia enentáimtursairap. ³⁸ Tura nekas túrakuinikia enentáimtursatarum. Tura Winia nakitrakrumsha nuikia wi túramu

enentáimtustarum. Nujainkia winia Apar Winin pujamu ashí nekaattarme. Núnisnak Wisha Njín pujajai. Iisha chikichkiitji.” ³⁹ Tutai ataksha sepunam enkeatai tiarmiayi. Túrasha Jesus uwempramiayi.

⁴⁰ Nuyá Jesus Jurtañ entsa amain wé yaunchu Juan imiakrattainium pujusmiayi. ⁴¹ Ti untsurj shuar iyuwar tiarmiayi “Nekas Juanka aentsti tu-jintiamun túrachiat ashí Jesusnan tímia nu nekasaiti” tu tiarmiayi. ⁴² Nuisha untsurj Jesusan enentáimtusarmiayi.

11

Rásaru jakamu

¹ Petania péprunam áishman, ni naari Rásaru, jaa pujumiayi. Nu péprunam Marí ni kajijai Mártañai pujumiayi. ² Niisha Rásaru umai ármiai. Nu Marisha ukunmanka kunkuinian sumak Jesusan kuer ni intiashijjai japirmiayi. ³ Tura Rásaru jaaku ni umaj Jesusan chichaman akuptuiniak tiarmiayi “Uunta, ame amikrum jaawai.”

⁴ Jesussha nuna antuk tímiayi “Tuke jakataj tusa jaatsui. Antsu Yusa kakarmarisha tura ni Uchiri kakarmarisha jú sunkur tsuármanum paant atí tusa jaawai.” ⁵ Jesus Mártañcha ni kajincha tura ni umaj Rásaruncha nekas aneemiayi. ⁶ Túmaitai Rásaru jaawai taman antukiat ni pujamunam jimiará tsawant pujusmiayi. ⁷ Nuyá ni unuiniamurin “Ataksha Jutía nunkanam wetái” tímiayi.

⁸ Tura ni unuiniamurisha tiarmiayi “Uunta, nuiksha Israer-shuar kayajai tukurmar mantamatai tícharmaka. ¿Nuj ataksha wetai támek?”

⁹ Jesussha jú métek-taku chichaman tímiayi “Tsawajkia páantchakait. Tsawai wekaana nu paant asamtai tukumkashtatui. ¹⁰ Tura kashi wekaana nusha kirit asamtai tukumkátawai. Núnisan Wíi tuke pujakun winia takatrun takastiniaitjai. Túraknasha itirchatan wáinkiashtatjai.” ¹¹ Nuyásha Jesus atak tímiayi “Íi amikrj Rásaru kanarai. Wí ishintiartatjai.”

¹² Tutai ni unuiniamurj tiarmiayi “Uunta, aya kanarka nuinikia péñker ajastatui.” ¹³ Jesuska Rásaru jakamu nékayat “kanarai” tímiayi. Tura ni unuiniamurj Rásaru kajinmakua áintsan kanarai enentáimprarmiayi.

¹⁴ Jesus nuikia ti paant tímiayi “Rásaru yamaikia jakayi. ¹⁵ Tura nuj pujuscha asan kúntuts pujatsjai. Jean túrattajna nu íisrum ti nekas enentáimtusattarme. Nuna nekaan shiir enentáimjai. Wátsek, iyutai.” ¹⁶ Nuyá Jimiampramu Tumas chikich unuiniamurj nuj armia nuna “Íisha weri Nijijai métek jakatai” tímiayi.

Iwiaaku áinnisha jaka nantaktinnisha Jesus nérenniuiti

¹⁷ Nuj taa, Rásarun kuaru tsawant ikiusman wáinkiamiayi. ¹⁸ Petania pépruka Jerusarénnumia menaintiú kirumitru áinis tíjiuchiiti. ¹⁹ Tuma asamtai untsurj Israer-shuar Mártañcha Marisha, ni umaj jakamtai uutkuí atsankrataj tusa weriarmiayi. ²⁰ Mártañcha Jesus tíjiuch ajasun nekáa inkiuntajtsa wémiayi. Antsu Marikia jeá pujumiayi. ²¹ Tura Marta Jesusan inkiun tímiayi “Uunta, Ame pujakmikia winia umar jákachaayi. ²² Tura tuke nékajai ashí Yus seamna nuna súramui.”

²³ Jesussha tímiayi “Ame umaimisha nantaktiatui.”

²⁴ Mártañcha tímiayi “Nekas, ashí amuamunam jákaru nantaktin tsawantaj nantaktiatui. Nuna nékajai.”

²⁵ Nuyá Jesus tímiayi “Iwiaaku átinia nérentin asan Wikia iniantkartiniait-jai. Winia enentáimturna nuka jakasha nantaktiatui. ²⁶ Tura ashí iwiaaku pujana nusha Winia enentáimturaka penke jákashatui. ¿Nu nekasaiti tu enentáimtamek?”

²⁷ Niisha “Ee, Uunta, ame Yusa Uchirínme. Krístuitme, uwemtikkiartin jú nunkanam tátinia nu” tímiayi.

Jesus Rásaru iwiansamunam taa úutmiania nu

²⁸ Mártasha nuna tí, ní kaj Marin untsook úukan tímiayi “Uunt juí taa unturmawai.” ²⁹ Marisha nuna antuk wárik wajaki Jesusa iyuttsa wémiayi. ³⁰ Jesussha péprunam jeatsuk Marta inkiunmanum pujumiayi. ³¹ Marí wari wajaki wématai Israer-shuar nu jeanam atsankrattsa pujuiniasha nuna ísar weriarmiayi. Iwiansamunam úuttiasa wéatsush tusa weriarmiayi. ³² Marisha Jesus pujamunam jeá tikishmatar tímiayi “Uunta, Ame pujakminkia winia umar jákachaayi.”

³³ Jesussha Marincha tura niijiai úutuncha wániak wáitnentaimta asa ti kúntus pujusmiayi. ³⁴ Tura “Tuí iwiansamarum” tímiayi.

Niisha “Uunta, iitia” tiarmiayi.

³⁵ Jesussha úutmiayi. ³⁶ Israer-shuarsha “Ti aneatsuk” tiarmiayi. ³⁷ Tura chíkich “Kusuru tsuáruchukait. Nii pujakuisha Rásaru jákaampiash” tiarmiayi.

Rásaru iniantkimiu

³⁸ Jesussha ti kuntuts enentáimiar iwiansamunam weankámiayi. Náinnium asa paka taurma áuyayi. Tura kaya atutkamuyayi. ³⁹ Tura Jesus “Kaya jurustarum” tímiayi.

Rásaru umaj Marta tímiayi “Uunta, kuaru tsawant jákai. Mejeatsuk’ tímiayi.

⁴⁰ Tura Jesus tímiayi “Yus enentáimtakmeke Yusa kakarmari wáinkiatame tíchamkajam.” ⁴¹ Nuikia kayarin uratiarmatai Jesus nayaimpin iis tímiayi “Aparu, Winia anturtakmin yumisajme. ⁴² Winiasha tuke anturtame tura ju shuaran penker enentáimtikrataj tusan tajai. Ame akuptukuitmena nuna nekarmawarti.” ⁴³ Nuna tinia kakaram untsook “Rásaru jínkitia” tímiayi. ⁴⁴ Nujainkia penuarmartiuk jínkimiai. Yapinmasha jaanchjiai ijamuyayi. Tura Jesus “Atirtarum. Wéti” tímiayi.

Jesusan achiktin chichaman jurusarmiania nu

(Mateu 26.1-5; Márkus 14.1-2; Rúkas 22.1-2)

⁴⁵ Untsurí Israer-shuar Marin nemariaru Jesus túramun ísar enentáimtusarmiayi. ⁴⁶ Tura chíkichkia Pariséunam wear Jesus túramun ujakarmiayi. ⁴⁷ Nuna antukar Pariséusha Israer-patri úntrisha ashí naamka uunt armia nujai iruntrar tiarmiayi “¿Warí ituirkamniat? Nu shuarka aentsti tujintiamun ti túratsuk. ⁴⁸ Aya júnik iniaiyakrinkia ashí shuar Nin enentáimtuschartatuak. Nuyá Rúmanmaya apach taar mesetan najanawartatui tura in amutmakar Yusa Uunt Jeencha emesrartatui.”

⁴⁹ Nu uwitin Kaipias Israer-patri untriyayi. Niisha tímiayi “Átumka nékatsrume. ⁵⁰ ¿Ashí Israer-shuar mesertin penkerkai. Antsu aya chikichik shuar jákatin penkerchakait?” tímiayi. ⁵¹ Kaipiaska aya ni enentáimmiajain tíchamiayi. Antsu nu uwitin Israer-patri untrí asantai Yus nuna enentáimtikramiayi. Nujainkia Israer-shuar Jesus jaruktinian ujakmiayi. ⁵² Tura aya Israer-shuarnakcha antsu niijiaisha ashí nunkanam Yus-shuar

ajasarun irurtajtsa jákatniuyi. ⁵³Tuma asamtai nu tsawantiniñ Israer-shuara uuntri Jesus máatai tusar áujmatsarmiayi.

⁵⁴ Nu asamtai Jesus paant wantiniak Israer-shuarnum wekaichmiayi. Antsu Jutía nunkanmaya jinki atsamu nunkanam Eprain pepru tjiuch wémiayi. Tura nuí pujusmiayi ni unuiniamurjijai.

⁵⁵ Israer-shuara namperi paskua ishichik jatemsamtai untsurí shuar yajá péprunmaya Jerusaréñnum káunkarmiayi. Kame paskua jeatsain Mui-sais timia núnisan ni ayashísha enentáisha iwiarnarat tusa wakeriarmiayi.

⁵⁶ Jesusnasha eak yujarmiayi. Tura Yusa Uunt Jeen pujusar nuamtak aniniaisar “¿Warí enentáimiam. Jístanam tatimpiash?” tiarmiayi. ⁵⁷ Pariséusha Israer-patri uuntri sha akupainiak “Jesus pujá nekaamka ujatkata” tiarmiayi. Jesusan sepunam enkeatai tusar tiarmiayi.

12

Marí Jesusan kunkuinian kuérmiania nu (Mateu 26.6-13; Márkus 14.3-9)

¹ Paskua jisat jeatin sais tsawant ajasmatai Jesus Petania péprunam wémiayi. Jesus jakamunmaya iniantkimia nú Rásaru nuin pujumiayi. ² Jesus jeamtaí ayurawarmiayi. Rásarusha niijjai yurumámiayi. Mártasha yurumkan iwiasmakmiayi. ³ Tura Marikia kunkuinian ti kuitjai ritru ajapén sumak itiamiayi. Tura Jesusa nawen kuer ni intiashijjai japirmiayi. Jeasha nu kunkuinjai ti shiir kunkuñmiayi. ⁴ Jútas Iskariúti, Semunka uchirí, nuí pujumiayi. Niisha Jesusa unuiniamurjintiat ukunam Jesusan surukmiayi máawarat tusa. Niisha tímiayi ⁵ “¿Urukamtaí nu kunkuinian ti kuitjai surukchama kuítrinchán súsatniun?” ⁶ Kame kuítrinchán enentáimtak tíchamiayi. Antsu unuiniamu kuítrin wainkia asa yúpichuch kasamkamniuyayi. Tuma asa nuna tímiayi.

⁷ Tura Jesus tímiayi “Iniaisata. Wi iwiarnakui kuératniun sumak ikiurusuítí. ⁸ Kuítríncha tuke atumjai íruntsuk. Antsu Wikia atumjai tuke puschattajai” tímiayi.

Rásaruncha máataj tiarmiania nu

⁹ Israer-shuarsha Jesus Petania péprunam pujan antukar Jesus ístaitsar we-riarmiayi. Rásaruncha Jesus jakamunmaya iniantkimia nusha iyutai tusar wearmiayi. ¹⁰ Túramtai Israer-patri uuntriñkia chichaman jurusarmiayi Rásaru maatai tusar. ¹¹ Untsurí Israer-shuar Rásaru iniantkimion nekaawar Israer-patrin ikiukiar Jesusan enentáimtusarmiayi. Túrawarmatai Rásaruncha máatniun wakerukarmiayi.

Jesus Jerusaréñnum shiir wayamiania nu (Mateu 21.1-11; Márkus 11.1-11; Rúkas 19.28-40)

¹² Paskua namperan pachiintuiktajtsa ti untsurí shuar Jerusaréñnum wearmiayi. Kashin tsawar Jesus nú peprunam tátinian nekaawarmiayi. ¹³ Niisha tintiuki nuké áinis nukan júurar Jesusan inkiuntai tusar jinkiarmiayi. Túrawar untsumainiak “Shiir tati, tiarmiayi. Yusa kakarmarjijai winiana nu tí péñkeraiti. Israer-shuara uuntri asa shiir atí” tu untsumiarmiayi. ¹⁴ Jesussha umpuurun wáiniak entsamkamai. Núnisan áarmaiti Yus-Chichamnum:

¹⁵ “Seun péprunmaya shuara, ashamkairap. Atumí Akupniuri umpuurunam entsamak winiawai.”

¹⁶ Nu chichamaik Jesusa unuiniamurí nu túrunamun nekaacharmiyai. Tura ukunam Jesus nayaimpiniam shiir waketkimtai enentáimprarmiyai. Ashí Jesusna aarma núnisan túrunamiyai.

¹⁷ Jesus Rásarun iwiarsamunmaya iniantkimiun wáinkiarua nú shuar nuna áujmatiararmiyai. ¹⁸ Tuma asamtai shuar Jesus nu tujintiamun túramtai nekaawar Jesusan inkiunktaj túsar jíinkiararmiyai. ¹⁹ Tura Paríséusha nuamtak tiarmiyai “Iis, penké tujinkiaji. Maa iista, ashí shuar Nin nemarainiatsuk.”

Kriaku apach Jesusjai chichastinian wakeriarmiania nu

²⁰ Paskua nampernum Yus shiir awajsatniun Jerusarénum weriaruka untsurí nunkanmaya shuar ármiyai. Kriaku apachcha ármiyai. ²¹ Niisha Jiripin weantukarmiyai. Kame nu Jiripi Petsaitia péprunmayauyayi. Petsaitia péprusha Kariréa nunkanam awai. Nincha Kriaku apach seainiak “Uunta, Jesusjai chichastaitsar wakeraji” tiarmiyai. ²² Jiripisha Antresan werí ujakmiyai. Nuyá níijjai métek tsaninkiar Jesusan weriar ujakarmiyai.

²³ Jesussha tímiyai “Wi Aents Ajasuitjiana ju tsawantur jeayi. Túramtai shiir awájnástajai. ²⁴ Wi tájana nu ti nekasaiti. Jínkiaia ántsanketjai. Araachmaka níñki pujatsuk. Antsu araamka tsapain jínkiaichirí kaushmariat nerek ti untsurí ajatsuk. Núnisnak Wi jakamtai ti untsurí shuar yamaram iwiaakman takusartatui. ²⁵ Shuarsha jinkiaia nuke aya ju nunkanam péñker pujustinian enentáimkiunka ántar pujak nekas iwiaakmarín emenkkattatui. Tura ju nunkanam péñker pujustinian enentáimtsuk jákatniuncha ashamchaa nú shuarka nekas iwiaakman wáiniak tuke iwiaaku átatui. ²⁶ Shuar winia átaj takunka nemartusti. Túranka Wi pujajna nú Wí shuar tuke átatui. Núnisan Wí shuar winia takatrun takáa nuna winia Aparsha shiir enentáimtustatui’ tímiyai.

Jesus ni jákatniun étserei

²⁷ “Yamaikia enentáiruí ti itiurchat pujajai. ¿Warittiajak. “Aparu, ju túrunatniunmaya uwemtikrurta” titiajash? Antsu jú túrunatniun táwitjai. ²⁸ Aparu, wí túramujai ashí shuar ame náarmin shiir enentáimturarti” tímiyai Jesus.

Tutai nayaimpinmaya chichaman antukarmiyai. “Winia náarun shiir awajsaitjai tura ataksha shiir awajsattajai” tímiyai.

²⁹ Shuarsha nui pujuinia “ipiamtachuashit” tiarmiyai. Tura chikichcha “Nayaimpinmaya suntar Nin chichasai” tiarmiyai.

³⁰ Jesussha tímiyai “Wi antuktinian chichaschayi antsu átum nekaatarum tusa chichasai. ³¹ Yamaikia nunkanam makumatin jeayi. Tura íwianch ju nunkanam akupniua nu nupetnak ajapnattawai. ³² Tura numiniam awajnántai ashí nunkanmayanika shuar enentáimturartatui” tímiyai. ³³ Juna taku krúsum jákatniun ujakmiyai.

³⁴ Shuarsha awajirar tiarmiyai “Yaunchu Yus akupkamu papiniuníia áujsar nékaji. Kristu tutai tuke jáatsuk iwiaaku pujustiniaiti. ¿Itiurak nuikia “Aents Ajasu numiniam awajnáitniuiti” tame? Aents Ajasuka Krístuchukait, Yus anaikiamu. Núchaitkiuinikia Aents Ajasuka yait?” tiarmiyai.

³⁵ Nuínkia Jesus tímiyai “Wi tsáapninia ántsanketjai. Tsáapnisha atumín aya ishichik tsawantín tsáapniartatui. Tsáapin ana juik wekasatarum kirit ajatsajin. Kame kiritniunam wekaana nusha nékatsui itiuranimpia wea. ³⁶ Tsáapnin wáinkiuaram nin enentáimtustarum. Túrakrum winia tsáapninruí wekasattarme.” Jesussha nuna ti wémiyai uumak pujustaj tusa.

Untsurí Israer-shuar Jesusan enentáimtuscharmiania nu

- ³⁷ Jesus aentsti tujintiamun ti untsurí túramtaisha Nin enentáimtuscharmiaiyi.
³⁸ Yúsnan etserin Isayas yaunchu aarma uminkiatniuyi:
 “Uunta, ¿ya ii ujam antukuit. Yusa kakarmarjsha yana iniaktusuit?” tu áarmaiti.
³⁹ Nuna uminiak Jesusan enentáimtuscharmiaiyi. Tura nu arantcha Isayas áarmiaiyi:
⁴⁰ “Yus nin kusuru awajsaiti tura ni enentáincha kátsuram awajsaiti. Ni jiiijai ímsain tusa tura ni enentájjai nekaawain tusa túrait. Kame ni tunaari iisar enentáimtuiniakui Yus nin tsuárait” tu áarmaiti.
⁴¹ Isayas yaunchu Jesusan nayampiniam ti shiir pujan wáiniak nuna tímiayi.
⁴² Tuma ajn untsurí Israer-shuarsha tura ni uuntrinmayasha Jesusan nekas enentáimtusarmiaiyi. Tura niisha Pariséun ashamainiak paant tícharmiaiyi. Israer-shuara iruntairiya jiki awetamajj tusa ashammarmiaiyi.
⁴³ Yus shiir enentáimtursati tutsuk antsu shuar shiir enentáimtursati tusar túwarmiaiyi.

Shuaran sumantikiatniun táchaitjai antsu uwemtikratniun táwitjai, timiania nu

- ⁴⁴ Jesus kakantar untsumuk tímiayi “Winia enentáimturuk aya Winiak enentáimturtsui antsu winia Aparun Winia akuptukua nunasha enentáimtai. ⁴⁵ Winia wáitkiusha Winia Aparnasha wáinui. ⁴⁶ Wikia tsáapnin asan Winia enentáimturania nuka kiritniunam wekasain tusan ju nunkanam táwitjai. ⁴⁷ Shuaran sumantikiatniun táchaitjai antsu uwemtikratniun táwitjai. Tuma asantai shuar winia chichamprun antuk umiachkunka sumamaiti. Tura Wikia sumantikiachuitjai. ⁴⁸ Winia nakitrur chichampruncha enentáimtachuka sumantikiamuiti. Wi timiaj nuka amuukatin tsawantaj nin sumantikiattawai. ⁴⁹ Wi enentáimmiajjain chichaatsjai. Winia Apar akattur akuptukuiti. Tura chichastinia nuna surusuiti. ⁵⁰ Wisha nékajai, ashí winia Apar akupeamuka yamaram iwiaakman tuke amuukashinian súawai. Tuma asantai winia Apar túrutmia núnisnak tajai” tímiayi Jesus.

13

Jesus ni unuiniamurí nawen nijiatramiania nu

- ¹ Paskua jísat jeatin chikichik tsawant ajasmatai Jesusa tsawantri jeatemayi. Túramtai ju nunkan ikiuki ni Aparin wétiniuyi. Jesussha nuna nekaamiayi. Ashí Niiniun ju nunkanam pujuinian tuke anea asa amúamunmasha yapajitsuk tuke aneemiayi. ² Nu tsawantajsha murikiun yúatin ármiaiyi. Tura yurumátin jeatsain, uunt iwianch Semunka uchirí Jútas Iskariúti enentáin Jesusan surukat tusa enentáimtikramiaiyi. ³ Tura Jesus Yusajya tau asa waketkitniuyi. Tura Yus Apa ashí mash susamiayi akupin atí tusa. Jesussha nuna nekáa ⁴ chikich yurumuk pujuiniaj wajakmiayi. Tura pushirín áimiak awankéman emenmamamiayi. ⁵ Nuyá nijiaamatainiam entsan yará ni unuiniamurí nawen nijiatramiaiyi. Tura awankémjaj japirmiayi. ⁶ Semun Pítrunam jeamtai Pítiur tímiayi “Uunta, ¿Winia nawer nijiertaj tamek?”

⁷ Jesussha tímiayi “Wi túrajna nu yamá nékatsme tura ukunam nekaat-tame.”

⁸ Tura Pítiur tímiayi “Penké winia nawer nijiarhattame.”

Jesusha tímiayi “Wi nijaachkuñkia Wijjaj tsaniñkia pujuschamniaitme.”

⁹ Tutai Semuñ Pítiur tímiayi “Nuñkia, Uunta, aya nawerkechu antsu uwejrusha tura muukarsha nijiatrurta.”

¹⁰ Tura Jesus tímiayi “Yamá mainkia ayashí shiir asamtai aya naweniñ nijiamártiniaiti. Atumí enentáin ashí péñkeraitrume. Túrusha ashí shuarcha” tímiayi. ¹¹ Kame Jútas Nin suruktinian nekáa “ashí shuarcha” tímiayi.

¹² Jesusha nijiar umik ni pushirín entsarmiayi. Tura atak pujus tímiayi “¿Atumsha Wi túrajna nu nekaarmek? ¹³ Wi atumí Uuntri asamtai nekas “Uunta” túrutrume. Nusha péñkeraiti. ¹⁴ Tura Jintinniuiti-atan tura Úntaitiatan atumí nawen niijarchajak. Atumsha núnisrumek nuamtak náwem niijatnairatarum. ¹⁵ Atumin nekapruatsan túramjai. Atumsha núnisrumek túratarum. ¹⁶ Ti nekas tajai. Takarniuka ni uuntri nankaamaschaiti. Akupkamusha akupea nuna nankaamaschaiti. ¹⁷ Nu nekaarum túrukumka shiir átatrume.”

¹⁸ “Tura tájana nuna ashí tátsujrume. Anaikiaitiaj núnaka Wi nékajai. Tura Yus-Chicham uminkiatniuiti, nékajai. Ju aarmaiti:

“Wijjaj yurumna nu winia nemasur ajasai.”

¹⁹ Nuka túmatsajñ ujaajrume. Nuyá túrunamtai Yusa Uchiríntjai nusha paant nekaattarme. ²⁰ Wi tájana nu nekasaiti. Shuar Wi akupeaj nuna shiir itiaakka Winiasha shiir itiaarui. Tura Winia shiir itiaarna nusha Winia Akuptukuncha itiaawai” tímiayi.

Jesus Jútas Nin suruktinian étserei

(Mateu 26.20-25; Márkus 14.17-21; Rúkas 22.21-23)

²¹ Nuna tí, Jesus ni enentáin ti itiuurchat enentáimpramiayi. Tura paant tímiayi “Nekas tajai, chikichik juj atumjai pujana nu Winia surutkattawai.”

²² Tutai ni unuiniamurj nuamtak íniaisar “¿Yanak ta?” tiarmiayi. ²³ Chikichik unuiniamurj, Jesus ti aneamu, Nijjaj tsaniñ yurumuk pujumi-ayi.

²⁴ Tuma asamtai Semuñ Pítiur ni uwejéjaj iniakmas “Aniasta, ¿yanak áujmata?” tímiayi.

²⁵ Tutai Jesusan áyanmatsan aniasmiayi. “¿Yait, Uunta?” tímiayi.

²⁶ Jesusha ayak “Tantan túmniium ajunñkan susattaj núiti” tímiayi. Nújajñ tantan túmniium ajunñ Semuñka uchirín Jútas Iskariútin susamiayi. ²⁷ Tura wárik Jútas tantan achikmatai íwianch ni enentáin wayamiayi. Nuyá Jesus tímiayi “Túratamna nu wárik túrata.”

²⁸ Tura ashí nuj yurumainiak pujuarmia nusha wariniak ta tusa nekaacharmiayi. ²⁹ “Kuítrincha kuit súsarta” tátsuash tu enentáimprarmiayi. Tura chikichcha “nampernum yurumátin atsumajnia nu sumakta” tátsuash, tu enentáimprarmiayi. Jútas kuítian wáinin asamtai tu enentáimprarmiayi.

³⁰ Jútas tantan yua kashí ajasmanum jíinkimiayi.

Yamaram akupkamu

³¹ Jútas jíinkimtai Jesus tímiayi “Wi Aents Ajasu asamtai winia kakarmar yamaikia paant átatui. Tura wi túramujaj Yusa kakarmarisha ti paant átatui. ³² Wi Yusa kakarmarín paant awajeakui Wisha ni Uchirí asamtai winia kakarmarnasha Yuska wárik paant awajsattawai. ³³ Uchichiru, atumjai ti untsurj tsawant pujuschattajaj yamaikia. Wi Israer-shuaran tímiaj nútiksanak atumin tájarne. Atumsha Winia eátkáttarme tura wi wéamunam winishtatrume. ³⁴ Ju yamaram akupeamun amaajaj nuamtak mai anenai

ajatarum tusan. Wi atumin aneajrumna núnisrumek atumsha nuamtak mai anenai ajatniuitrume. ³⁵ Anenaiyakrumniñkia nujaj ashí shuar “Kristu unuiniamurj áiniawai” túramartatui.

Pítur Nin natsantratniun Jesus ujakmiania nu
(*Mateu 26.31-35; Márkus 14.27-31; Rúkas 22.33-34*)

³⁶ Semun Pítur Jesusan aniasmiayi “Uunta, ¿tua wéam?”

Jesussha tímiayi “Wi wéajna nuj yamaikia winichminiaitrum. Tura ukunam winittiarne.”

³⁷ Nuyá Pítur tímiayi “Uunta, ¿urukamtai yamaikia winichminiaitaj? Ámin yáintajtsan jakataj tajai.”

³⁸ Jesussha tímiayi “¿Nekasmek táme? Ti nekas tájame, atash shiniatsain Winia menáintiú natsantrurtatme” tímiayi.

14

Jesus Yus-jintiaiti

¹ “Kúntuts pujusairap. Yus enentáimustarum, Winiasha enentáimtursatarum. ² Winia Aparuj átum pujustin ti ankant awai. Tura nuna iwiarataj tusan Aparuj wéajai, nekasaiti. Nekaschaitkiuñkia ¿itiurak ujakajrum? ³ Tura iwiaaran amukan ataksha tátatjai. Tura tana yaruaktatjarne, wi pujamunam atumsha pujusúk tusan. ⁴ Wi wéaj nu nékarme tura jintiasha nékarme” tímiayi Jesus.

⁵ Tumas tímiayi “Uunta, Ame weam nu nékatsji. ¿Jintiasha itiurak nekaat-taj?”

⁶ Jesussha tímiayi “Wi nekas jintiaitjai. Wíjjaínchu wekaana nuka winia Aparuj jeatniun penké tujintiawai. Tura Wisha tuke nekas tiniu asan nekas ana nuna shuáran nékantikijai. Wisha shuáran yamaram iwiaakman tuke amuukashtinian súwitjai. ⁷ Winia nékarkurmeka winia Aparsha nekaawaintrume. Yamaisha Nii wáinkia asarum nékarme” tímiayi.

⁸ Nuñkia Jiripisha tímiayi “Uunta, Apasha wáinkiarka maak.”

⁹ Jesussha tímiayi “Jiripi, atumjai ti pujusu aisha ¿tuke nékartsumek? Winia wáitkia nuka Winia Aparnasha wáinkiaiti. ¿Itiurak, nuikia, “Apasha wáinkiarka maak” tame? ¹⁰ Winia Aparjai tsaniñkian pujakun tura winia Aparsha Wíjjaj pujakui tuke chikichkiitji. ¿Nu nékatsrumek? Wi tájarmena nu Winia chichampruchuiti. Yus Apa Winí pujak ni wakeramun takaawai. ¹¹ Nekaatarum. Wisha winia Aparjai tsaniñkia pujakur nekas chikichkiitji. “Nu chicham itiurchataiti” enentáimkiurmeka wi túramu nuikia enentáimpratarum. Wi túramujaj chikichik ájinia nu páantchakait. ¹² Wi tájarmena nu ti nekasaiti. Winia enentáimturna nu Wi túrajna nuna túrattawai. Tura winia Aparuj wéakui nuna nankaamas tujintiamun túrattawai. ¹³ Ashí Winia enentáimtursarum seatrumna nuna amastatjai. Nújajñkia winia Aparshiir awajnastatui. ¹⁴ Winia enentáimtursarum seakrumniñkia ashí túrattajai” tímiayi.

Jesus Yusa Wakanín akupkattawai

¹⁵ ‘Atumsha anentkurmeka winia chichamur umiktarum. ¹⁶ Tura wéakun winia Aparun chikanchan akupturmakti tusan seattajai. Niisha atumjai tuke pujak atsantamprartatui. ¹⁷ Nusha Yusa Wakaníinti. Yus-shuarcha Nin nekaachmin áiniawai. Tuma asamtai ni enentáin wayachminiaiti. Antsu átumka atumi enentáin pujakui Nii nékarme. Niisha atumí enentáin

tuke pujustatui. ¹⁸ Mitiaikia áitkiasnak ikiukchattajrume. Atumín atak tátatjai. ¹⁹ Ishichik tsawant nan^{ka}asmatai chíkich shuar irunna nu wáitkiachartatui. Tura Wi iwiaaku asamtai átumka nu iwiaakmajai pujustatrum. Tuma asarum wáitkiattarme. ²⁰ Tura nu tsawantai ju nekaattarme. Wisha winia Aparjai tsaniⁿkia pujakur chikichkiitji. Núnisnak Wisha atumjai tsaniⁿkian pujajai. Tura atumsha Wijjai tsaniⁿkia pujarme. ²¹ Shuar Winia anentuka wi akupkamun nekáa umíawai. Nú shuarnaka winia Aparsha aneawai. Wisha nin anejai tura nekarati tusan iniaktustatjai.” Jesus nuna tímiayi.

²² Chíkich Jútas, Iskariúti^{ch}u, tímiayi “Uunta, ¿urukantai ashí shuarnum iniaktutskesha aya in iniaktustatam?”

²³ Jesus tímiayi “Winia anentuka tájana nuna enentáimtai. Winia Aparsha nu shuaran aneatawai. Tura Wisha winia Aparnum nu shuarjai tsaniⁿkia pujustatji. ²⁴ Antsu Winia anentchaka tájana nuna enentáimtatsui. Átum ántarmena nú chichamka wíniachuiti, antsu Yus Apa Winia akuptukua Núnaiti’ tímiayi.

²⁵ ‘Atumjai tuke pujakun nuna tájarme. ²⁶ Yus Apa ni Shiir Wakanin atumin yáinmak atsan^{ta}mp^{ra}rat tusa akupturmattatrum. Wi seam túrattawai. Nu Wakancha ashí Wi ujakjarmena nuna atak enentáimtkram^{pr}ar ashí unuit^{am}pr^{ra}tatui’ tímiayi.

²⁷ ‘Imiatkinchanum pujustarum. Imiatkinchanum pujajna núnisrumek pujustarum tusan amaajai. Jú nun^{ka}man^{ka} warastin wáinkiashtatrum. Antsu itiurchatnum pujayatr^{um}kesha Wijjai imiatkinchanum pujustatrum. Ashamtsuk pujustarum. Itiurchat enentáimprairap. ²⁸ Nuik timiaj nu antukmarme. Aparuí wena atak atumín tátatjai. Winia Aparka Wijjai nan^{ka}amas úntaiti. Tuma asamtai ti nekas anentkurme^{ka} “Aparuí wéajai” takui ashí warasa^{ar}me. ²⁹ Nuka túmatsain ujaajrume. Túrunamtai nuyá Winia enentáim^tursattarme” tímiayi.

³⁰ Jú nun^{ka}mayan akupin winiakui atumjai núkap chichaschattajai ya^{ma}ika. Wíniaka nupettukhamniai. ³¹ Tura Wikia winia Aparun anejai tura Nii akupturkama nuna tuke túrajai. Ashí shuar nuna nekaawarti tusa ashí túrunatniuiti. Wajaktiarum. Juyá wetái’ tímiayi.

15

Numi arakma áintsan^{ket}jai

¹ ‘Winia iwiaakmarun amaakun numi arakma áintsan^{ket}jai. Wikia kampu^{int}jai atumsha kanawentrum. Winia Aparsha arakan wáiniu núnisaiti. ² Winia kanawernasha nereatsna núnaka tsupik ájapeawai. Tura nereana núnaka púruawai nú nukap nerekat tusa. ³ Wi ujakjarmena nujai puruar^{ma}itrum. ⁴ Numi kanawesha kampuⁱⁿ áchitkiachkun^{ka} nin^{ki} nerechamniai. Núnisrumek atumsha Winí áchitkiachkurme^{ka} nerechamniaitrum. Wi atumjai áchitkij núnisrumek atumsha Winí tuke áchitkia atarum’ tímiayi.

⁵ ‘Wikia kampu^{int}jai atumsha kanawentrum. Kampuⁿkia kanawen áchitkia núnisnak achiakjarme. Tura kanawe ni kampuⁱⁿ áchitkia núnisrum Winí áchitkia atarum. Túrakrumka núkap nerektatrum. Antsu Wíjjaⁱⁿchuka péⁿker túratin péⁿke^{te} tujintiar^{me}. ⁶ Winí áchitkiachuka ajapam kukartatui. Kanawesha kukarmatai shuar irumkar áesawartatui’ tímiayi.

7 ‘Tuke Winí áchitkaiatkurmeka tura winia chichamprusha kajinmattsuk emetarmeka átum wakerarmena nu seakrumin amastatjai. 8 Átum núkap nereakrumniñkia ashí shuar “Nekas Jesusa unuiniamurinti” túramartatui tura winia Aparnasha shiir awajsartatui. 9 Winia Apar anenna nútiksanak Wisha atumin aneajrume. Winia aneamur tuke atarum. 10 Winia Aparu akupkamurin umiakun tuke ni aneamurintjai. Núnisrumek winia akupkamar umiakrumka tuke winia aneamur átatrume’ tímiayi.

11 ‘Wi waraajna áintsarmek warastarum tusan nuna tájarme. Tura ti shiir warastatrume. 12 Wi akupkamu júiti: “Wi aneajrumna nútiksarmek ashí anenaitiarum.” 13 Shuar ni amikrin yáintaj tusa jakañka ti anenkartichukait. 14 Wi akupeamu takaakrumka atumsha winia amikruitrume. 15 Takarniuka ni uuntri takaana nuna nékatsui. Tuma asamtai “winia takarniuruitrume” tátsujrume. Antsu ashí winia Apar táman ujaku asan “winia amikruitrume” tájarme. 16 Aya atumi enentáimsamurijjain Wíi shuar ajaschamarme. Antsu akatramur ajastarum tusan atumniaka achikjarme Wi. Winia takatur takastiniaitrume. Túrarum penker túratniuitrume nerektinia áintsarmek. Tura nu nere amuutsuk tuke átiniaiti. Tuma asamtai winia Apar searmena nuna amastatui. 17 Júnaka akupeajrume: Nuamtak mai anenai ajatarum’ tímiayi.

Yus-shuarcha Jesunasha Níniuncha nakitiainiawai

18 ‘Ju nunkanmaya shuar Winia emka nakitrurar atumniasha nakitramarme. 19 Atumsha ju nunkanmaya shuaraitkiurminkia niiniua nútiksán anenmaintrume. Antsu Wíi shuar ajastarum tusan ju nunkanmaya achikmajrume. Túramtai nekas ju nunkanmayanchuitrume yamaikia. Nu asamtai nu shuar nakitramainiawai. 20 “Takarniuka ni uuntri nankaamaschaiti” tíchamkajrum. Shuar Winia yajauch awajtusaru ásar atumniasha yajauch awajtamsartatui. Chikichcha umirtukaru ásar atumniasha umirtamkartatui. 21 Winia Akuptukun nékachu ásar Winia enentáimturkurmin yajauch awajtamsartatui’ tímiayi.

22 ‘Wi tana Yus-Chichaman nin ujakchamtañkia tunaanum sumamacharaayi. Antsu ujakma ásar “Nékachkun túraitjai” tíchamin áiniawai. 23 Winia nakitruinia nuka winia Aparnasha nakitiainiawai. 24 Aents penké túrachman túrachuitkiuñkia tunaanum sumamacharainti. Antsu wi túramun wáinkiaru áiniayat Winiasha tura winia Aparnasha nakitiainiawai. 25 Yaunchu Yus akupkamanum áarmaiti: “Penké ántar nakitruarmai.”

Nu chicham uminkiatu tusa túrunaiti’ tímiayi.

26 “Tura atsantamprattsa yáinmana nuna winia Aparujya akuptuktatjarme. Niisha tuke nekas tiniu Wakaniiti. Niisha Yusajya taa atumin nekamtükramprattarme. 27 Atumsha yaunchu Wijjai pujusu asarum nekamtikiattarme’ tímiayi.

16

1 ‘Átum kanartukajrum tusan júnika tájarme. 2 Israer-shuar iruntainiumia jiji akuptamkattarme. Nu arantcha mantamainiaksha “Yúsan shiir awajsattsan túrajai” tiártatui. 3 Nu shuar Winiasha tura winia Aparnasha nékachu ásar túrutmawartatui. 4 Núnaka yamáí tájame. Tura túrunamtai “núnisan átiniaiti” timiaj nu nekaarum itirchat enentáimprairap’ tímiayi.

Yusa Wakaní túrana nu

'Atumjaj tuke pujá asan núnaka yaunchu ujakchamajrume. ⁵ Antsu ya-
maikia wáketjai winia Akuptukmia nujaj pujustaj tusan. Tuma áin wéajna
nu ininratsrume. ⁶ Antsu nuna takui ti kuntuts enentáimprarme. ⁷ Tura
Wi wématai atumjajnkia nuna nankaamas péñker átutui. Iis, Wi wéaknaka
atumin yainmaktinia nuna akupkattajai tura wéachkuinkia táchattawai. Nuka
ti nekasaiti. ⁸ Yusa Wakaní taa ashí jú nunkanmaya aentsun ju menain-
tium nekamtikiattawai. Ni tunaari aan nekamtikiattawai. Péñker tu-
naajainchu wekasamniana nunasha nekamtikiattawai. Tura Yus tunaanum
súmamtikiamniana nunasha nekamtikiattawai. ⁹ Winia enentáimturainiachu
tunáarintin ániawai. ¹⁰ Winia Aparuí wáketkui wáitkiashtatume. Tuma
asantai ashí shuar wi péñker tunaajainchu wekaamun nekaawartatui.
¹¹ Tura ju nunkanam akupniunka Yus tunaanum súmamtikia asa shuarnasha
súmamtikiamniami. Nuna paant nekaawartatui' tímiayi.

¹² 'Nu arantcha núkap tíntjiarme túrasha átumka nekaachaintrume. ¹³ Yusa
Wakaní ashí nekas tiniu asa ashí nekasa nuna unuitiamprattarme. Ni
enentáimmiyajai tichattawai antsu winia Aparuí antukma nuna ujatmaktatui.
Ukunam átatna nunasha ujatmaktatui. ¹⁴ Ashí Wínian ujatmak Winia shiir
awajtustatui. ¹⁵ Ashí winia Apar takakna nusha Wíniaiti. Nu asantai "ashí
Wínian ujatmaktatui" tajai' tímiayi.

Kúntuts pujuiniayat ukunam warasartatui

¹⁶ 'Ishichik pujusrum Winia wáitkiashtatume. Nuyá ataksha ishichik pu-
jusrum ataksha wáitkiattarme. Wisha winia Aparuí wéajai' tímiayi.

¹⁷ Nuyá ni unuiniamurj nuamtak aniniaisarmiayi "¿Jú chichamsha
warimpait? "Ishichik pujusrum wáitkiashtatume tura ataksha ishichik pu-
jusrum wáitkiattarme tura Aparuí wéajai" tátsuk. ¹⁸ "Ishichik pujusrum" tana
nusha ¿warimpait? Nii tana nu ántatsji" tiarmiayi.

¹⁹ Jesussha nin aniaistai táman nekáa tímiayi "Ishichik pujusrum
wáitkiashtatume nuyá ataksha ishichik pujusrum wáitkiattarme" tímiyajai.
¿Núchakait átum inintrustin wakerarmena nu? ²⁰ Ti nekas tájarme: Átumka
kúntuts pujusrum úttiatrume tura Yus-shuarcha warásártatui. Tuma ajnk'
átum kúntuts pujayatrume ukunam warastatume. ²¹ Iis, nuwasha jurertin
tsawant jeamtai najaimiak wáitiatsuk. Tura uchin jurerka ti waraak
wáitsamunka enentáimtsui. ²² Atumsha núnisrumek yamaik kúntuts pujarme.
Tura atak ítjjarum tusan winiakui ti shiir atumí enentáin warastatume. Nu
warastinian jurutramkichminia ániawai.'

²³ 'Nu tsawantinkia penké ininsashtatume. Ti nekas tájarme Winia
enentáimtursarum winia Apar searum nuna ashí amastatui. ²⁴ Yamaisha
Winia enentáimtursarum winia Apar seachurme. Seakrumninkia amastatui
ti shiir warasaruk tusa' tímiayi.

Jesus jú nunkanmayan nupetkaiti

²⁵ 'Métek-taku chichamjai nakumkan nuna tímiyajai. Tura ukunmanka nujaj
chichatsuk winia Aparnan paant ujakattarme. ²⁶⁻²⁷ Nu tsawantaj átumka
Winia enentáimtursarum winia Apar seattarme. Winia Aparsha atumin anea
asantai Wi Nin áujsatin atumashtatume. Winia anentu asarum tura winia
Aparuíya taman enentáimtakrumin Niisha anenmawai. ²⁸ Winia Aparuíya
jíinkin jú nunkanam táwitjai. Yamaikia jú nunkanmaya jíinkin ataksha Aparuí
wáketjai' tímiayi.

²⁹ Nuyá ni unuiniamurj tiarmiayi “Yamaikia métek-taku chichamjainchu chichaame. ³⁰ Mash nékaitme. Shuar Ámin ininmatsajin péñker áimkiatin nékame. Nu nekaar Ame nekas Yúsnumiáitme tu enentáimtaji” tiarmiayi.

³¹ Tura Jesus tímiayi “¿Nekasash enentáimtarum? ³² Ti warik átumka ashamkarum niisháa tsakinmaktatrum tura Winiak ikiurkittiarne. Antsu winia Apar pujaku Wiki pujatsjai. ³³ Winia enentáimturkuram imiatkinchanum pujusarat tusan tájarme. Jú nunñanam ti wáitsattarme. Tura Wi jú nunñanmayan nupetka asamtai warastarum” tímiayi Jesus.

17

Jesus ni unuiniamurj in Yúsán áujtawai

¹ Nuna ti Jesus nayaimpinmaanji límias tímiayi “Aparu, yamá jeayi ame Uchiram shiir awajsatin. Núnisan ame Uchirmisha péñker awajtamsattawai. ² Ashí shuara Akupniurj najataitme. Nujainkia Winia surusumna nú shuaran yamaram iwiaakman tuke amuukashtinian súsaitjai. ³ Aparu, chikich atsawai. Amek nekas Yúsaitme. Wisha Jesuskristuitjai Ame akuptukmamna nu. Nu asamtai ashí shuar nuna enentáimtak yamaram iwiaakman tuke amuukashtinian takakui.’

⁴ ‘Ashí túratniun akuptukmamna nuna amukuitjai. Túran ju nunñanam shiir awajsaitjame. ⁵ Nuna túramtai, Aparu, ti yaunchu jú nunñka atsáisha Ámijijai pujaku shiir awajtusmamna núnismek yamaisha shiir awajtusta.’

⁶ ‘Ashí jú nunñanmayá surusmamna nú shuaran Ámin nekamtikiamjai. Áminiu ániakui surusmame. Niisha ame chichammin umirtámkaruiti. ⁷ Ashí Wi takaajna nu Amek surusuitme. Niisha nuna nékainiawai. ⁸ Ame chichamem surusmam nuna ujakam niisha umirtámkaruiti. Ame akuptukakmin Amijiniyá táwitjai. Nu nekasaiti tu enentáimtuiniawai.’

⁹ ‘Nin yainkiarta tusan seajme. Jú nunñanmayá shuaran Ámin enentáimturmainiatsna nuna seattsujai. Antsu Ame surusmam nuna, Áminiu ajasarmatai, yainkiarta tusan seajme. ¹⁰ Ashí Winia ainia nuka Áminiuiti. Tura ashí Áminiu ainia nuka Winia ániawai. Winia péñkerusha ni túramunam paant awajsaiti.’

¹¹ ‘Wikia yamaikia jú nunñanam pujuschattajai. Tura nu shuarka juju pujuartatui. Antsu Ámijijai pujustajtsan winiakui ashí surusumna nuka, Aparu, ti shiir asam ame kakarmarmijijai wáinkiaata. Wisha Ámijijai chikichik ájinia núnisan niisha ashí iruntrar chikichik ajasarti. ¹² Jú niijjai pujakun ame kakarmarmijijai ti péñker wáinkiamjai. Antsu Yus-Chichamnum aarma uminkiat tusa aya chikichik menkakaiti. Niisha tuke emesnartinia núiti.’

¹³ ‘Yamaikia Amijini winiajai. Tura juju tuke pujakun juna tájame. Niisha Wi waraajna núnisar ti shiir warasarat tusan tajai. ¹⁴ Wi jú nunñanmayanchuitjai. Niisha núnisan jú nunñanmayanchu ániawai. Tuma asamtai ame chichammin Wi susamtai jú nunñanmayá shuarka nin naki-tainiawai. ¹⁵ Jú nunñanmayá jikj tusan seatsjame. Antsu íwianch nin nupetkain tusan seajme. ¹⁶ Wi juyanchuitiaj áintsan niisha juyanchu ániawai. ¹⁷ Ame chichammin ti nekasa nuna ántuiniakui péñker awajsata. ¹⁸ Juyá shuarum akuptukmam áintsan Wisha nin chikich shuarum akupeajai. ¹⁹ Aya Áminiunak takastaj tusan enentáimtimjai. Túra asamtai niisha aya Áminiunak takastinian enentáimpratin ániawai’ áujtak tímiayi.

²⁰ ‘Aya níniunkeka seatsjame antsu ashí ni chichamen antukar Winia enentáimtursartatna nusha ame yáin_hkiarta tusan seajme. ²¹ Ashí niisha chikichkiniak enentáimtusarti tusan seajme. Wisha Amesha, Aparu, chikichik ájiniá núnisa_n niisha Iijjaj_i iruntrar chikichik ajastai túsar seajme. Wíi shuar chikichik najanata tusan seajme. Nuyá ju_n nun_hkanmaya_n shuar akuptukuitmena nuna nekaawartatui. ²² Ame shiir awajtursamna núnisnak Wisha nin shiir awajsaitjai. Iikia chikichik ájiniá núnisa_n niisha chikichik ajasarti tusan túraitjai. ²³ Wíi ni enentáin pujakui Amesha Winin pujakmin penké chikichik ajasarti. Túramtai ashí shuar ju_na nekaawartatui: Ame akuptukuitme, tura Winia anenmena áintsam nu shuarsha aneame. Wíi shuar chikichik ajasmajaj_i ashí shuar nuna nekaawartatui.’

²⁴ ‘Aparu, shuar surusmam nu, Wíi pujustatjana nu_j pujusarti tusan seajme. Tura ti shiir awajtusmamna nuna ísarti tusan nuna seajme. Ju_n nun_hka najanchamunman_n tuke anentin asam ti shiir awajtusuitme. ²⁵ Aparu, ti pé_nker ámini_n ju_n nun_hkanmaya_n shuar nekarmainiatsui. Antsu Wíi nékajme. Ju_n shuarsha ame akuptukman nékainiawai. ²⁶ Nú shuaran Ámin nekarmawarti tusan jintintiaitjai. Tura nu arantcha jintintiattajai. Nújaj_hnkia Wisha ni enentáin pujurkui Winia anenmena áintsan_n niisha anen_hkratin ajasartatui” áujtak tímiayi Jesus.

18

Suntar Jesusan achikiarmiania nu

(Mateu 26.47-56; Márkus 14.43-50; Rúkas 22.47-53)

¹ Jesussha nuna tinia amuk ni unuiniamurijjaj_i Setrun_n entsá katin_n numi arakmanum wémiayi. ² Jútassha Nin suruktajtsa pujumia nuka nu ajan nekaamiayi. Untsurj_i tsawant Jesus ni unuiniamurijjaj_i nu_j iruntramtai Jútas Jesusan nu_j wáinkiatniun enentáimpramiayi. ³ Tura untsurj_i suntarjaj_isha Jesusan tariamiayi. Pariséusha Israer-shuar Patri uuntrj_isha suntarnasha Yusa Jé_n wáiniuncha Jesusan achikiarat tusa akupkarmiayi. Niisha machitniasha nan_hkincha rámparancha jiniasha júkiar weriarmiayi. ⁴ Jesussha ashí átinia nuna neka asa jiintiuki “¿Ya e_harum?” tímiayi.

⁵ Niisha “Nasarénumiá Jesus” tiarmiayi.

Jesussha “Wiitjai” tímiayi.

Jútassha Jesusan surukua nu niijjaj_i pujuarmiayi. ⁶ Tura Jesus “Wiitjai” takui ti ashamkar úkumur waketainiak iniaararmiayi.

⁷ Ataksha Jesus “¿Ya e_harum?” tímiayi.

Niisha “Nasarénumiá Jesus” tiarmiayi.

⁸ Nui_nkia Jesus tímiayi “Wiitjai, tájarme. Winia e_haturmekka Wíi shuar ainia júka waketkiarti” tímiayi. ⁹ Jesus nuik aujuk “Winia Apar surusma nu men_hkakacharai” timia nu uminkiat tusa Jesus “waketkiarti” tímiayi. ¹⁰ Nuyá Semu_n Pítiur machitian jusa Marku kuish_hn untsuurnumaan_i tsupirkamiayi. Markusha Israer-patri uuntrj_i takarniurjyayi. ¹¹ Túramtai Jesus Pítrun tímiayi “Machitrumka awain_hki ikiusta. Winia Apar wáitsatniun surakuin_hkia ¿wáitsastinkaitiaj?”

Israer-patri úuntrj_iniam júkiarmiania nu

(Mateu 26.57-58; Márkus 14.53-54; Rúkas 22.54)

¹² Nuñkia apach suntarsha ni kapitiántrisha Yusa Jeen wainniusha Jesusan achikiar jin̄kiawarmiayi. ¹³ Nuyá Anasa jeen júkiarmiayi. Anassha Kaipiasa wear̄iyayi. Tura Kaipias nu uwitin Israer-patri uuntr̄iyayi. ¹⁴ Kaipiasa nuik “¿Ashí Israer-shuar mesertin péñkerkait. Antsu aya chikichik shuar jákatin péñkerchakait?” timia núiti.

Pítiur Jesusan natsantramiania nu

(*Mateu 26.69-70; Márkus 14.66-68; Rúkas 22.55-57*)

¹⁵ Semun̄ Pítiur chíkich unuiniamujai Jesusa aku weriarmiayi. Israer-patri uuntr̄i nú unuiniamunka nékauyayi. Tuma asamtai ni jeen jeawar, suntar Jesusjai aa tanishnum wáiniakui niisha wayamiayi. ¹⁶ Tura Pítiur aa wáitiniam wajaamiayi. Túramtai chíkich unuiniamu jiinki wáitin wáinia nú nuwajai chichas Pitrun awayamiayi. Nuñ nékanu asa yúpichuch awayamiayi. ¹⁷ Waiti wáinniusha Pitrun aniasmiayi “¿Amesha nuna unuiniamurinchukaitiam?”

Pítrusha “Atsá, núchaitjai” timiayi. ¹⁸ Tsetsek asamtai suntarsha tura nuñ takarniusha jinia ikiapárar ni nawen anaak pujuarmiayi. Pítrusha nuñ pachiniak anamuk pujumiayi.

Kaipias Jesusan aniasmiania nu

(*Mateu 26.59-66; Márkus 14.55-64; Rúkas 22.66-71*)

¹⁹ Israer-patri uuntr̄i Jesusan aniasmiayi “Ame unuiniamurmesha ¿ya ainia. Tura warí nin jintintiaitiam?”

²⁰ Jesussha timiayi “Ashí íimiainiañ tuke etserniuitjai. Israer-shuar iruntainmasha Yusa Uunt Jeencha Israer-shuar irunainia nuñ arantutsuk tuke etserkaitjai. ²¹ ¿Urúkamtai Winia inintiam? Winia chichamprun antukua nu aniastarum. Wi timian nii ujatmakarti. Wi timiancha niisha nékainiatsuk.”

²² Jesus nuna takui Yusa Jeen wáiniua nu nuñ pujá Jesusan yapiniam awati timiayi “¿Núnisañ nekas úuntnum chichastinkait?”

²³ Jesussha timiayi “¿Warinmampa yajauch aa? Turuttia. Tura tájana nu péñkeraitkiuin̄kia ¿urukamtai awattiniam?” ²⁴ Nuyá Anas Jesusan jinkiá Kaipias takaamunam akupkamiayi Kaipias Patri uuntr̄i asamtai.

Pítiur ataksha Jesusan natsantramiania nu

(*Mateu 26.71-75; Márkus 14.69-72; Rúkas 22.58-62*)

²⁵ Tuke Anasa jeen chichainiañ Pítiur jinia anamuk pujáñ shuar aniak “¿Amesha Jesusa unuiniamurinchukaitiam?” tiarmiayi.

Pítrusha “Atsá, wíchaitjai” timiayi.

²⁶ Chíkich takarin, Marku shuari, nuñ pujumiayi. Pítiur Marku kuish̄in̄ tsupirkamia nuna shuari asa timiayi “¿Ajanam Jesusjai wekaamin wáinkichmakajam?”

²⁷ Pítrusha ataksha “atsá” taiñ atash shiniukmiayi.

Piratu Jesusan aniasmiania nu

(*Mateu 27.1-2, 11-14; Márkus 15.1-5; Rúkas 23.1-5*)

²⁸ Nuyá Kaipiasaiya Jesusan júkiar tsawant tsawaamunam apach kapitián Piratu takatai jeenam ejeniarmiayi. Israer-shuarsha ni uuntr̄i akupkama núnisar wapik ajasaj̄i tusar nu jeenam wayacharmiayi. Wayawarka paskua nampernum yurumáchmin armiayi. ²⁹ Nu asamtai Piratu niñjai chichastaj tusa jiinki timiayi “¿Jú áishmansha warí tunáa túrait?”

³⁰ Niisha “Tunaarinchaitkiuin̄kia am̄jini itiachaj̄i” tiarmiayi.

³¹ Tutai Piratu timiayi “Atumek júkirum atumí akuptammarijai ni tunaari nekaatarum.”

Israer-shuarsha tiarmiayi “Antsu iikia Israer-shuartikia tunáa shuarsha máachminiaitji.” ³² Yaunchu Jesus ni jákatniurin enentáimtus “Wi awajnitniuitjai” tímiayi. Niisha krúsnum awajnnain asamtaí apach máatajjijai Nii timia nu uminkiamiayi.

³³ Piratusha atak jeá wayá Jesusan untsuk “¿Ámeke Israera Uunt Akupniurinkaitiam?” tímiayi.

³⁴ Jesussha tímiayi “¿Ameke nu inintram. Kame chíkich túramainiatsuash?”

³⁵ Piratusha tímiayi “¿Wi Israer-shuarkaitiaj? Ameer shuarak Israer-patri uuntrijjai winin itiarmai. ¿Warí tunáa túraitiam?”

³⁶ Nuinkia Jesus tímiayi “Wi jú nuñkanam akupniuchuitjai. Juyaitkiuinikia Winia nemartuiniana nu máanaikiaraayi. Túrawarmatai Israer-shuarnum surutkacharaayi. Antsu juyán akupniuchuitjai.”

³⁷ Piratusha “¿Nuikia ame nekas uunt akupniukaitiam?” tímiayi.

Jesussha tímiayi “Ee, ame támena nu nekasaiti. Jú nuñkanam akiinian ashí shuaran nekas ana nuna ujaktinian táwitjai. Ashí shuar nekas ana nuna umirniuka Wi táman ántawai.”

³⁸ Tura Piratu “¿Nekasa nusha warimpiait?” tímiayi.

*Piratu Jesusan mantamnatniun tímiania nu
(Mateu 27.15-31; Márkus 15.6-20; Rúkas 23.13-25)*

Piratusha nuna tí, atak Israer-shuarjai chichastajtsa jiinki tímiayi “Jú aishmanka tunaarin penké wáittsujai. ³⁹ Tura ashí uwitin paskua nampernum sepunmayá shuar ankant akupkatniuiti. Núnisrum tuke searme. Tuma asamtaí, ¿yamaikia Israera Uunt Akupniurin ankant akupkattajak?” tímiayi.

⁴⁰ Nuinkia ashí kakantar untsumainiak “Jú akupkaip; antsu Parapás akupkatá” tiarmiayi. Nu Parapássha kásauyayi.

19

¹ Nuyá Piratu suntaran akupkamiayi Jesusan asutiáwarat tusa. ² Suntarsha Jesusan wishikrar tawasap janí najanamun etsenkrumtikiarmiayi. Yamakai pushincha uunt akupniua áintsan áentsrarmiayi. ³ Nuyá “Israera Uuntria, kakaram ajasta” tiar yapiniam awatiarmiayi. ⁴ Nuyá Piratu atak jiinki tímiayi “Átum wáinkiarum nekaatarum tusan Jesusan jiiiktijatjai. Wikia tunaarinkia penké wáittsujai.” ⁵ Tímiatai Jesussha janin etsenkruku tura pushin yamakairman entsaru jiinkimiayi. Tura Piratu nuí káunkarun tiarmiayi “Pai jüiti, íistarum.”

⁶ Israer-patri uuntrisha suntarsha Jesusan íisar ataksha ataksha kakantar untsumainiak “Krúsnum jakati” tiarmiayi.

Piratusha “Átum júkiirum máatarum. Ni tunaarin penké wáittsujai” tímiayi.

⁷ Tura Israer-shuar tiarmiayi “Nu shuar “Yusa Uchirintjai” takui jákatniuiti. Iiniu akupeamu aarma nuí núniskete” tiarmiayi. ⁸ Nuna antuk Piratusha nu nankaamas ashamkamiayi. ⁹ Ataksha inít wayá Jesusan aniasmiayi “¿Tuyampaitiam?” Tura Jesussha penké áikchamiayi. ¹⁰ Nuyá Piratu tímiayi “¿Urukamtia winia airtsum. Wi jeajna nu nékatsmek? Wakeraknaka krúsnum máatniuncha tura ankant akupkatniuncha jeajai.”

¹¹ Tutai Jesussha tímiayi “Yus nuna amashaitkiuinikia penké tujinkiaintme. Nu asamtaí amjin surutka nu ámin nankaamas tunaarinniuiti.”

¹² Piratusha nú chichamtaik Jesusan ankant akupkattsa wakerimiayi. Antsu Israer-shuar untsumainiak tiarmiayi “Jú ankant iníakmeke ame úunt

akupniu amikr̄inchuitme. Juka “úunt akupniuitjai” taku atumí uunt akupniur̄i nemasrinti” tu untsunkarmiayi.

¹³ Piratusha taman antuk akupin pujutainium pujus Jesusan untsukmiayi. Nūi kaya ukatkamu asamtai Israer-shuara chicham̄en Kapata anaikiarmiayi. ¹⁴ Paskua jisat jeatsān̄ nantu tutupin ajatsān̄ Piratu Israer-shuaran tímiayi “Uunt akupniuram ístarum.”

¹⁵ Tura ashí “Jakati, jakati, krúsnum máatá” tu untsunkarmiayi.

Tura Piratu “¿Atumí uunt akupniur̄in krúsnum máattajak?” tímiayi.

Tura Israer-patri uuntri tiarmiayi “Atumí uunt kapitíántrumek in akup-tamji. Chikichka atsawai.”

¹⁶ Tutai Piratu Jesusan krusnum mantamnati tusa tsankatkarmiayi. Tutai niisha Jesusan júkiar wearmiayi.

Jesusa krúsnum máawarmiania nu

(Mateu 27.32-34; Márkus 15.21-32; Rúkas 23.26-43)

¹⁷ Jesussa ni krus̄r̄i yanaki Kúrkuta náinnium wémiayi. Kúrkuta naar̄isha Israer-shuara chicham̄en “muuka ukunch” tawai. ¹⁸ Nūi krúsnum ajintrurar awajainiarmiayi. Tura mai pāe jimiará shuaran chikichik chikichik awajainiarmiayi. Tura Jesus ajapén ámiayi. ¹⁹ Piratusha Jesusa krús̄r̄in uunt áarman anujkamiayi. **NASARETNUMIĀ JESUS, ISRAERA UUNT AKUPNIUR̄I** Tu áarmauyayi. ²⁰ Israer chicham̄jāisha Kriaku chicham̄jāisha Rúmanmayā chicham̄jāisha áarmauyayi. Menaintiu chichamnum aarma asamtai tura Jesusar̄ēn̄ pepru tíjiuch̄ asamtai Israer-shuar ti untsur̄i áujiarmiayi. ²¹ Nu asamtai Israer-patri uuntri Piratun jeariar “Israera Uunt Akupniur̄i” áaraip. Antsu “Israera Uunt Akupniur̄intjai tawai” tu aarta” tiarmiayi.

²² Tura Piratu nincha ákiar “Wí áaraj nuke átatui” tímiayi.

²³ Suntarsha Jesusan krúsnum awajainiar ni entsarmar̄in kuátru akankar an̄kant an̄kant júkiarmiayi. Tura ni pushir̄in apatsuk najanamai asamtai jáaktinian nakitrarmiayi. Kame yakíya nun̄kaan̄i apaiyiachma takamt-sukuyi. ²⁴ Tuma asamtai suntar tiarmiayi “Juka jáakchatai. Antsu nakurakrin yának ati nu jukiti.” Nújain̄kia yaunchu Yus-Chichamnum aarma nu uminkiamiyi:

“Winia entsarmarun akantrarmiayi tura nakurusar awakmakua nuna winia pushirun súsararmiayi” áarmaiti.

²⁵ Krúsnumsha Jesusa nukur̄isha Kriúpasa nuar̄i Marisha tura Máktaranmayā Marisha wajaarmiayi. ²⁶ Jesus ni nukur̄incha tura ni ti aneamu unuiniamur̄incha nūi wajan wáiniak ni nukur̄in tímiayi “Nukuru, jū ame uchirnea áintsan̄ atí.” ²⁷ Nuyá ni unuiniamur̄incha tímiayi “Jū ame nukua áintsan̄ atí.” Nu tsawantaik nu unuiniamur̄i ni j̄ēn̄ júki awayámiayi.

Jesusa jakamuri

(Mateu 27.45-56; Márkus 15.33-41; Rúkas 23.44-49)

²⁸ Nuyá ashí uminkiamtai Jesus nuna nekáa yaunchu Yus-Papinium aarma uminkiatu tusa “kitiamajai” tímiayi. ²⁹ Nūisha piniñnum churuín ámiayi. Tura shuar nuna uruch̄jai ejampar sapap̄jai ijiu mukunaati tusa susamiayi. ³⁰ Jesussa churuínian najekaa “ashí túrunatniua nu mash uminkiai” tímiayi. Nuna tí, muuken nená jakamiayi.

Suntar Jesusan paenam nan̄kijaī ijiumiania nu

³¹ Nu tsawant̄ai, kashinkia paskua námper uunt tsawantri asamtai tura ayampratin tsawant̄ aa asamtai, Israer-shuar jaka ayashí nūi paant̄ ān̄

tusa nakitrarmiayi. Nu asamtai Piratun seainiak “Krúsnum ajintrurma ainia nuna kañkajin suntar kupirkarti. Nuyá wari jákarmatai krúsnumiá júkiarti” tiarmiayi. ³² Nuyá suntarsha weriar emka krúsnum amia nuna kañkajin kupirkarmiayi. Nuyá chikichnasha Jesusjaj atsankiar ajintrurma nuna kañkajincha kupirkarmiayi. ³³ Tura Jesusan weantuk yaunchu jákaiti tusa kañkajin kupirtsuk ³⁴ suntar aya paenam ijiumiayi. Ijiumentaisha nu chichamtaik numpa yumijajai puarmiayi. ³⁵ Wi, Juan, nuna wainkia asan nekas tajai. Atumsha Yus enentáimustarum tusan tí nekas tajai. Wi áarajna nu nekasaiti nékajai. ³⁶ Yaunchu Yus-Chichamnum aarma uminkiatu tusa túrunaiti:

“Ni ukunchjn kupirkachartatui” tu áarmaiti.

³⁷ Tura chikichcha:

“Ijiuarmiania nuna wáinkiertatui” tu áarmaiti.

Jesus iwiarsamu amiania nu

(Mateu 27.57-61; Márkus 15.42-47; Rúkas 23.50-56)

³⁸ Nuyá Arimatéanmayá Jusé Jesusa ayashín jukitiaj tusa Piratun seamiayi. Nu Jusé Jesusan enentáimtaiat Israer-shuara úuntrjn ashamak paant nemarsachmiayi. Niisha seamtai Piratu “Jukitia” tímiayi. Tutai Jusé Jesusa ayashín jukimiayi. ³⁹ Nikiuté musha Jesusjaj chichastaj tusa kashi tarimia nu jimiara kunkuin pachimpramun ti nukap sumak itiamiayi. Mira kunkuinniasha aruí kunkuinniasha sumakmiayi. ⁴⁰ Nuyá Jusé Nikiuté mujaj Jesusa ayashín júkiar kunkuinian kuérar jaanch esarmajaj penuararmiayi. Israer-shuar tuke nunisar ikiúu ármiayi. ⁴¹ Jesus krúsnum maamua nuí aja tíjiuch ámiayi. Nu ajanmasha wáá náinnium paka taurma ámiayi. Nusha yama taurma asamtai jaka nuí ikiuschamuyayi. ⁴² Nu wáasha tíjiuch asamtai tura Israer-shuara ayampratin tsawantrj jeatemamtai Jesusa ayashín nuí iwiarsarmiayi.

20

Jesus nantakmiania nu

(Mateu 28.1-10; Márkus 16.1-8; Rúkas 24.1-12)

¹ Tumintincha káshik kirit ajn Máktaranmayá Marí Jesus iwiarsamunam ístajtsa wémiayi. Jesusan iwiarsar kaya uuntjaj wáan atutkarmiayi. Tura Marí nuí jeá nu kaya uraimiun wáinkiamiayi. ² Nuna wáiniak Semun Pítiur pujamunam tsékenki wémiayi. Chíkich unuiniamurj Jesus ti anemia nusha nuísha pujumiayi. Tura Marí tímiayi “Iwiarsamunmayá ii Úuntrjn júkiai. Tura ¿tuínsuk ikiusara?” ³ Pítrusha chíkich unuiniamurjijaj jíinkiar iwiarsamunam iyuwarmiayi. ⁴ Mai métek tsékenkiar Pítiur jeatsaj chíkich unuiniamurj iwiarsamunam emka jeamiayi. ⁵ Niisha wayatsuk tsuntsumá iis penuarmarinkia nuí tepan wáinkiamiayi. ⁶ Nuyá Semun Pítiur ukunam jeá iwiarsamunam wayá penuarmarj nuí tepan wáinkiamiayi. ⁷ Chíkich jaanchcha Jesusa muuken penuarma nusha nanerma niisháa tepan wáinkiamiayi. ⁸ Nuyá chíkich unuiniamurj emka tamia nusha iwiarsamunam wayamiayi. Niisha túruna wáiniak “Jesus nekas nantakni” tu enentáimpramiayi. ⁹ Nuna wáintsuk Yus-Chichamnum “Jesus jakamunmayá nantaktiniaiti” áarman áusariat nekaacharmiayi. ¹⁰ Nuyá mai ni jēen waketkarmiayi.

Máktaranmaya Marincha Jesus wantintiukmiania nu
(Márkus 16.9-11)

¹¹ Tura Marikia iwiarsamunam juak úutu pujumiayi. Niisha úutiatañ tsuntsumá iwiarsamunam ímsamiayi. ¹² Tura Jesusa ayashí nuik tepesmanum nayaimpinmaya suntar puju entsaru jímiar pujan wáinkiamiayi. Chikichik múuknumaaní tura chíkichka nawenmaaní pujumiayi. ¹³ Nayaimpinmaya suntarsha “¿Urukamtaí úutam?” tiarmiayi.

Marísha tímiayi “Winia Úuntrun jurutkiarai tura ¿tuintsuk ikiusara?” ¹⁴ Nuna tí ayanmar Jesusan wáiniak Nin nekaachmiayi.

¹⁵ Jesus aniak “¿Urukamtaí úutam. Ya eëam?” tímiayi.

Marisha ajan wáinnua nùiti tusa tímiayi “Uunta, ame ni ayashí jukimkia, tui ikiusmam ujatkata wi jurumkitiaj” tímiayi.

¹⁶ Nuyá Jesus “Mariya” tímiayi.

Tutai niisha ayanmar “Rapuni” tímiayi. Nusha Israer-chichamnum “Uuntá” tawai.

¹⁷ Jesussha tímiayi “Emetruawaip. Winia Aparuí wáatsjai. Antsu weme Wíi shuar titiá “Winia Aparuí nayaimpiniam wéajai. Niisha atumí Aparínti. Winia Yúsruiti tura atumí Yúsrinti” tawai titiá” tímiayi.

¹⁸ Nuyá Máktaranmaya Marisha Jesusa unuiniamurín wáiniak “Wi Úuntan wáinkiajai, tímiayi. Niisha júna mash túrutui” tu ujakarmiayi.

Jesus ni unuiniamurín wantintiukmiania nu
(Mateu 28.16-20; Márkus 16.14-18; Rúkas 24.36-49)

¹⁹ Nu tsawantaj, tumíntin, ni unuiniamurí Israer-shuara úuntrin ahamainiak kashí iruntrar waiti epeni pujuarmiayi. Túrasha Jesus áyatik wayamiayi. Tura ajapén wajas “shíir pujustarum” tímiayi. ²⁰ Nuna tí, nuyá ni uwejen ajintruamuncha ni paen íjiumuncha iniakmasmiayi. Ni unuiniamurísha Úuntrin wáinkiar shíir warasarmiayi. ²¹ Ataksha Jesus “Shíir pujustarum, tímiayi. Winia Apar akatar akuptukma núnisnak Wisha akatran akupeajrume” tímiayi. ²² Nuyá ni matsatmanumaaní umpuí tímiayi “Yusa Shíir Wakaní atumí enentáin wayati. ²³ Shuara tunaarínkia átum “asakárti” tákurminkia tsan̄kurnartatui. Tura nu shuar “sumamati” tákurminkia tuke sumama pujawai” tímiayi Jesus.

Tumas Jesus nantakiun wáinkiamiania nu

²⁴ Tura chikichik unuiniamu, Jímiampamu Tumas, Jesus tamia nuí pujuchmiayi. ²⁵ Tura ukunam chikich unuiniamurí ujainiak “Íi Uuntri wáinkiaji” tiarmiayi.

Tura Tumas tímiayi “Ajintruamurí wáinkian uwejrún awáintiatnuiitjai. Tura paenumsha awáintiatnuiitjai. Penké jaka asamtaí aya nujai iní-antkimiun enentáimtustatjai” tímiayi.

²⁶ Chíkich tumíntin ataksha Jesusa unuiniamurí iruntrarmiayi. Nuínkia Tumassha níijjai pujuarmiayi. Tura waiti epenmianuman̄ Jesus wayá ajapén wajas “Shíir pujustarum” tímiayi. ²⁷ Nuyá Tumasán tímiayi “Winia uwejúr íisam ame uwejem awáintiuata. Núnismek winia paeruí uwejem awáintiuam íistá. Tura arantutsuk nekas enentáimtursata.”

²⁸ Nuyá Tumas “Winia Úuntrua, nekas winia Yúsruítme” tímiayi.

²⁹ Jesussha tímiayi “Winia wáitkiam nuín enentáimtura. Antsu Winia wáittsuk enentáimturaru nekas shíir ániawai” tímiayi.

Shuar Yusa Uchirín enentáimtusarti tusa ju papí áarmaiti

³⁰ Aentsti tujintiamuncha Jesus túramu ti untsurí ju papinium áarchamu áiniawai. Tura ni unuiniamurí mash wáinkiarmai. ³¹ Antsu Jesuska Kristu asa Yusa Uchirínti tu enentáimtustarum tusan júnaka áarmajai. Tura enentáimtakmin Jesus ni iwiaakmarín yamarma nuna amastatui.

21

Entsá yantamnum Jesus siati (7) unuiniamurín wantintiukmiania nu

¹ Tipirias antumianka káanmatkarín Jesus ni unuiniamurín wantintiukmiyai. Júnisan ámiyai. ² Semun Pítrusha Jímiampramu Tumassha Kananmaya Natanaérsha Sepetéu uchirísha tura chíkich jímíar unuiniamurísha métek iruntrar pujuarmiayi. ³ Semun Pítrusha “Namakan nekajai naníkiattsan wéajai” tímiyai.

Chíkich mash “Isha winittiaji” tiarmiayi.

Wéar uunt kanunam enkemprar nu kashi achitsuk tsawararmiayi. ⁴ Káshik aín Jesus entsá káanmatkarín wantinkiamiyai tura ni unuiniamurísha Jesusan nekaacharmiayi. ⁵ Jesussha tímiyai “Uchiru, ¿namak achikiurmek?”

Niisha “Atsá” tiarmiayi.

⁶ Tutai Jesus tímiyai “Neka untsuurnumaaní ajunkatarum. Nui achiktrume.”

Nii timia núnisan túrawar namakan ti achikiar nekan júsatniun tujinkiarimiayi. ⁷ Nújainkia Jesusa unuiniamurí Jesus ti aneemia nu Pítrun tímiyai “Íi Úuntrinti.” Takui Pítrusha ámiaku asa ni pushirín entsar entsá inianmiyai yukuak jeataj tusa. ⁸ Chíkich unuiniamurísha jeachat pujuiniachuk nekan japiki kanujai káanmatkanam jeawarmiayi. ⁹ Káanmatkanam jeawar ji kair ámanum namakan jíámun wáinkiarimiayi. Tantanha wáinkiarimiayi. ¹⁰ Jesussha “Átum achikiurmena nuyá jíátin itiatarum” tímiyai. ¹¹ Tutai Semun Pítur kanunam we nekan nekartiuk káanmatak japiki itiamiyai. Itiar namaknasha siantu senkuenta nuyá tres (153) nekapmararmiayi. Ti untsurí áyat nekasha jáankachmiayi. ¹² Nuyá Jesussha “Yurumáitiarum” tímiyai. Ni unuiniamurísha “aya ii Uuntrí áminiaiti” tusar inintrustinian natsantiarmiayi. ¹³ Nuyá Jesus wajaki tantan juki súsarmiayi. Núnisan namaknasha súsarmiayi.

¹⁴ Jesus jakamunmaya nantaki jujai menaintiu ni unuiniamurín wantintiukarmiayi.

Jesus Semun Pítrujai chichasmiania nu

¹⁵ Nuyá yurumáwar Jesus Semun Pítrun aniasmiyai “Junasa uchirí Semunka, ¿ju shuar naníkaamas anentmek?”

Pítrusha tímiyai “Ee, Uunta, wi wakerajam nu Ame nékame.”

Jesussha “Nuínkia winia murikiur ayuratniua áintsam Winia enentáimturainia nu yaíntá” tímiyai. ¹⁶ Ataksha aniasmiyai “Junasa uchirí Semunka, ¿Winia anentmek?”

Pítrusha “Ee, Uunta, wi wakerajam nu Ame nékame” tímiyai.

Jesussha “Winia murikiur wáinkiatá” tímiyai. ¹⁷ Nú ataksha aniasmiyai “Junasa uchirí Semunka, ¿winia wakerutamek?”

Pítrusha menaintiu iníam kúntuts enentáimiar tímiyai “Uunta, ashí nékame. Wi wakerajam nu Ame nékame.”

Jesussha tímiayi “Winia murikiur ayurata. ¹⁸ Maa, nekas tájame. Natsa asamka iwiarmampram ame wakeramunam wéuyame. Tura úuntach ajasmeke ame kunturam ayaparakmin chíkich aentstampattawai tura ame wétin nakitiam núj juramkiartatui.” ¹⁹ Jesus nújainkia Pítuur máatniun ujakmiayi. Tura núnisan jakamtai shuar Yúsán shiir awajsatniun ujakmiayi. Nuyá Pítrun “Nemartusta” tímiayi.

Juan túrunatniun Pítuur Jesusan aniasmiania nu

²⁰ Pítrusha ayanmar chíkich unuiniamurín Jesus ti anea nuna némarun wáinkiamiayi. Kame nu unuiniamuka nuik Jesus jáatsain yurumáiniakui “Uunta, ¿ya surutmaktata?” timia núiti. ²¹ Nincha Pítuur wáiniak Jesusan aniasmiayi “Uunta, ¿jusha warí urukatniuit?”

²² Jesussha ayak “Wi wakeraknaka iwiaaku pujain tátatjai tímíniitjai. Nuna tákuisha ¿warí itiurtama? Ámeka nemartusta” tímiayi. ²³ Nújainkia “Nu unuiniamurí jákashtatui’ tusa Yus-shuarnum áujmatiarimiayi. Túrasha Jesus “jásashtatui’ tíchamiayi antsu áyatik “Wi wakeraknaka iwiaaku pujain tátatjai takuisha ¿warí itiurtama?” tímiayi. ²⁴ Wikia nú unuiniamuríntjai. Ju papincha aaru asan “mash nekasaiti’ tajai. Ashí shuarsha núnisan tuíniawai.

²⁵ Nu arantcha juí áarchamusha ti awai. Kame ashí áamka ti untsurí papí asa ashí nunkanam ikiuschamnia ainti. Nuke atí.

Jesusa Akatramurí Yusa Wakaníjiaí

TÚRAMU

Yusa Wakanín nákasarmiania nu

¹ Amikiur Tiüpiru:

Nuik akupkamiaj nú papinium ashí Jesus túramia nuna áatramiajme. Tura unuitiampramij nunasha áatramiajme. Yámankamtaiknumia, ² nayaimpiniam wétsuk, ashí Nii túramia nuna tímiajme. Jesuska, nayaimpiniam wakétsuk Yusa Wakaní kakarmarijiaí túratniua nuna ni akatramurín jintintiawarmi-ayi. ³ Tura jaka nantaki, Jesus tímiajaik wantintiukmiayi ni akatramurín. Tura kuarenta (40) tsawant nin wantintiukarmiayi. Nuna tura nekas iwiaakjai tusa iniakmasmiayi, nekaawarat tusa. Tura Yusa akupeamurí urukukit nuna mash ujakmiayi.

⁴ Jesuska ni akatramuríjiaí tuke pujus, nin chicharuk “Jerusarénumia wéerap, tímiayi. Winia Apar “amastatjai” tímia nuna, paant ujakchamkajrum. Nu túrunat tusarum Jerusarénum nákastarum, tímiayi. ⁵ Tuke enentáimsatarum. Juan entsajai atumí ayashín imiatmimiarme. Túrasha wárik Yusa Wakanísha atumniasha tarutmar, atumí enentáin enkemprutmattarme. Nusha enentái imiantin áintsankete” tímiayi.

Jesus nayaimpiniam wakamiania nu

⁶ Tura Jesusjai irunar matsamas anintriarmiayi “Uunta, Israer-shuar ájinia nu, ankant ajasakrin iiniuk Akupin atak naamkatin yamaí jeayash” tiarmi-ayi. ⁷ Jesus áimiuk tímiayi “Winia Apar túrattana nu warí tsawantinik túrunatí nu nekaatniusha atumniachuiti. Apar Nínki neka asa ni kakarmarijiaí túrattawai. ⁸ Tura atumsha Yusa Wakaní kakarmarín sunastatrum. Nii taa enkemprutmamtaí kakaram ajasrum, Wíi túramu etserkattarme. Emka juí Jerusaréñ péprunam etserkattarme. Nuyá ashí Jutía núnkanam, tura arant Samaria nunkanmasha, tura nú arant ashí núnkanam werum, Wíi túramu etserkattarme” tímiayi Jesus.

⁹ Nuyá chichas amir, ashí ni akatramurí ii wajainiaí, Jesus nayaimpin-maaní junakmiayi. Wéa-wéakui yurankim mash Nin amúamiayi. Tuma asantai ni akatramurí Nin wáinkiacharmiayi. ¹⁰ Tura Jesus waakkui ni akatramurísha yakí ii wajainiaí, jimiará áishman puju entsaru nuí wantin-tiukarmiayi. Tura ayamach wajattsarmiayi. ¹¹ Nu áishmansha Jesusa aka-tramurín tiarmiayi “Kariréanmaya áishmanka, ¿urukamtaí nayaimpinmaaní imiá íimprum? Ju Jesusak atumíya nayaimpiniam wea wáinkiarumna núnisan ataksha winittiwai” tiarmiayi.

Matíasan anaikiarmiania nu

¹² Tuasua amikmataí Jesusa akatramurí Uriwiu náinniumia akaikiar Jerusarénum waketiarmiayi. Uriwiu naincha Jerusarénumsha tíjichiiti, chikichik kirumitrua núnisan. ¹³ Tura Jerusarénum jeawarmiayi. Nuí jeawar, jeá wayawar yakí wakararmiayi. Nuí Pítrusha, Jakupusha, Juansha, Antressha, Jiripisha, Tumassha, Parturumísha, Mateusha, tura Arpeu uchirí Jakupusha, nuyá ásump Semunsha, Jakupu yachí Jutassha, tímian wayawarmiayi. ¹⁴ Jusha mash tuke iruniarmiayi Jesusa yachíjiaí. Tura Jesusa nukurí Maríjiaí, nuyá chikich nuwajajsha tuke iruniarmiayi,

Yus áusatai tusar. ¹⁵ Nuĵi siáñtu painti (120) aents iruntrarmia nuĵi Pítur chichastaj tusa wajakmiayi.

¹⁶ Pítur ĵuna tímiayi “Yatsurtírmesha, umarutírmesha antuktarum. Yuska yaunchu ni Papirĵin Jutasnan áantikramiayi. Jútas akiintsajñ Tawitkia, Yusa Wakanĵi jintintiam Jutasnan áarmiayi. Jesusan achik surukarmia nú shuaran nekapruiamia núti. Kame Tawitia áarmarĵi Yus-Chicham asa tímianak uminkiatniuyi. ¹⁷ Nú Jutaska ii írutramuiat, ii takaamurĵin páchitkiaiat, ¹⁸ tunáa tura nuĵaj kuítian achik nunĵan sumakmiayi. Tura piniakum iniaañ tantane páttimiayi. ¹⁹ Tuma asamtai ashí Jerusaréñnum pujuarmia nu, nuna nekaawar nú nunĵan “Numpa Nunĵa” anaikiarmiayi. ²⁰ Kame Sarmu papinium Tawitkia ĵuna áarchamkia:

“Ni ĵeasha itiarak atí.

Nu ĵeānmanĵa penĵé pujuschartí.” Tura

“Ni takatrĵi chĵikich atankiti.”

Tu aarmaiti’ tímiayi.

²¹ ‘Tuma asamtai yamaikia chĵikich anaikiatniuitĵi. Tura nánkamas achikchatniuitĵi. Antsu ii nemartamkau atí. Uunt Jesus iĵĵaj pujumia nuĵi tuke Nin nemarsamia nu atí. ²² Juanĵi Jesusan imiaimiania nú tsawantnumia ĵukí, Jesus nayaimpiniam wémiania nú tsawantan tímianu eĵé tuke Niĵĵajĵi wekaimia nu atí. Nu shuar enentámtusar, chĵikich achiktai. Iisha iruntrar Jesusa nantakmarĵi etserkamĵi tusar túramí’ tímiayi Pítur.

²³ Tura nuyá ĵimiará shuaran anaikiarmiayi. Matíasan anaikiarmiayi. Tura chikichnasha Jusen, ni chĵikich naarĵi Parsapas, tura apach náarinĵia Justu, nunasha anaikiarmiayi.

²⁴⁻²⁵ Tura nuyá Yus-shuar Yúsan áujainiak ĵuna tiarmiayi “Ii Uuntrĵi, Amesha ashí shuara enentáĵi nékame. Juĵi awai ĵimiará áishmanĵ. Jútas tunáa túrak jákatniunam wéak akatramu takatan ikiukmiayi. Yamaikia Jútas takatrĵi achikiat tusam, ĵtuá achikium, Uunta? Paant iniakmasta.” Tu aujsarmiayi.

²⁶ Tura Israer-shuara túrutairĵi núnisanĵ, wats yaki nupetmakat tusar túrawarmiayi. Tura Matías nupetmakmiayi. Túrunamtai Matíasnak pachikiarmiayi.

2

Yusa Wakanĵi taramiania nu

¹ Pintikiustis náartin ĵisat ĵeamtai, chĵikichĵi ĵeānmanĵ nuñ Yus-shuar tuakarmiayi. ² Tumaj aya aneachma nayaimpinmaya nasea áintsan téter ajaki winian antukarmiayi. Ashí mash ĵeá pujuarmia nuka antukarmiayi.

³ Tura nuĵi puĵuiniaĵi ĵi wajaĵi kea áaniun wáinkirmiayi. Túruna anĵkant anĵkant puunak tarurarmiayi. ⁴ Tuma asamtai Yusa Wakanĵi ashí ni enentáĵin pim-iutkarmiayi. Túram chichasarat tusa Yusa Wakanĵi ni nekatairĵi súsarmiayi. Tuma asamtai nuĵaj niisha chĵikich chichaman chichasarmiayi.

⁵ Nuĵi Jerusaréñnum Yus táman umirin Israer-aents áarmiayi. Ashí nunĵanmaya Jerusaréñnum taar matsarmarmiayi. ⁶ Tura túrunamia nuna antukar káunkarmiayi. Tura ashí shuar ni chichameĵajñ chichaamun antukarmiayi. Tuma ásar, warinkit, tu enentáimsarmiayi. ⁷ Nekaachar ashamkarmiayi. “Warinĵit, tunaim ajarmiayi. Ju aents chĵikich chĵikich chichaman chichainia nu, ashí Kariréanmayanĵhukait, tiarmiayi. ⁸ Tura iisha anĵkant anĵkant ii chichamenĵka ántatsĵik. Ausha urukainiakua, nunak

chichainiawa, tiarmiayi. ⁹ Juí ashí nunċanmaya aents pujuiniatsjik. Partianmaya, Eramnumiasha, Misiuputámianmayasha, Puntanmayasha, tura Asia nunċanmayasha, ¹⁰ Príjianmayasha, Pampirianmayasha, Ejiptunmaya tura Ápriċianmaya Serinia nú nanċaamasnumiasha pujuiniatsjik, tiarmiayi. Nuyasha ii shuarsha Ruma péprunmaya yaunchu taar juí matsatainiawai. Chikichcha tuke Israer-shuar áiniawai. Tura chikichcha Israer-shuar ajastaj tusa Israer túrutairċin mash túruiniawai. ¹¹ Kritianmayasha Arapiannmaya pujuiniaji. Tura ashí mash ii chichamejaisha Yusa pénker túramurċi ántaji” tiarmiayi.

¹² Ashí aents nuna nékachu ásar ashamkarmiayi. Tura nuámtak aniniais-armiayi “¿Warinminiait ju?” ¹³ Tura chikichcha wishikiarmiayi. “Namepeku ániatsush” tiarmiayi.

Pítur ujakmia nu

¹⁴ Nuñkia Pítur, chíkich áuntse Jesusa akatramurċijai wajaki, kakantar chichasmiayi. Chichaak tímiayi “Jutíanmaya shuartiram, Jerusarénumiagtirmesha antuktaram. Wi títiatjana nu antukrum pénker enentáimpratarum. ¹⁵ Ju áishman, nampekarai, tárumna nu, nampekcharai. Warí, nantu imiá ishichik takunċi. ¿Aisha itiurak? ¹⁶ Antsu Yúsnan etserin, ni naarċi Juér, yaunchu áarmia nu, yamá túrunayi, tímiayi.

¹⁷ Juna áarmiayi: “Yus tawai “Jú nunċa amuukatin jeatemamtai, winia Wakantrun ashí áentsnum akupkattajai, yumi yaraanua áintsan. Atumċi uchirċi, atumċi nawantrisha Yusa chichamen áujmatartatui. Tura nátsaka íimiarartatui. Tura uuntka mesekramiartatui. ¹⁸ Tura áishmansha nuwasha winia takartin ainia núnaka winia Wakantrun akuptukartatjai. Túram níisha Wíi túramun áujmatartatui. ¹⁹ Yaki nayaimpiniam, aents túrachminian iniakmestatjai. Tura nunċanmasha winia kakarmarun iniakmastaj tusan numpancha, jiniasha, mukuintiuncha yurañmia áintsan akupkattajai. ²⁰ Tura tsawái nantusha kajinkiattawai. Tura nantusha mushatmar numpa núniktatui. Uunt tsawant achikmiajna nu jeatsan, túrunattawai. Nú tsawantcha imiá nekas uunt átatui. ²¹ Nuñkia ashí shuar nekas winia kakarmarun seana nuka uwemprartatui” tímiayi Yus.”

Núnis Juér áarmiayi’ tímiayi Pítur.

²² Tuke chichaak: ‘Israernumiá shuartiram, wi títiatjana nu antuktaram. Nasarénumiá Jesusnan tajai. Nú Jesusan Yus shiir enentáimtawai. Yuska, átum ti enentáimprarum ni kakarmarċin paant nekaatarum tusa, nú Jesusan ti ikiakármiai. Tura Jesusjai aentsti túrachminian Yuska túramiayi, átum íimianum. Nuka ti paant nékarme, tímiayi. ²³ Tura Jesus surunkamia nuna Yuska yaunchu, túruntsan, paant nekaamiayi. Túrasa Yus enentáimmia nujai métek túrawarmiayi. Tura atumek emetarum Jesus jukimiarme. Nú arant, krúsnum máatarum, tunáa shuar tímiarme. ²⁴ Túramunak Yus Jesusan jákatniun nupetmamtik iniantkimiayi, tuke jákachmin asamtai. ²⁵ Iimiata, ii uunċri Tawit Jesusnan kantamprua juna áarmiayi:

Úuntan tuke pujurtan wáinmiajai. Winia pujurtakuċi awajkamú áchattajai.

²⁶ Tuma asamtai winia enentáirjaisha Nin shiir enentáimtusmiajai. Tura wenurjaisha shiir chichaman chichamiajai. Jáknasha shiir enentáimsan jakattajai, aneantiniapitjia tusan.

²⁷ Winia wakaniur, Yusru, jákatniunam ikiurtuschattame. Wi ame Uchirmet-jai, Tunaarincha. Túmaitkui anentu asam ayashur káurtin tsanka-trukchattame.

²⁸ Tura iwiaaku átin jintia jintintrutamame. Tura tuke pujurtakum waramtikrustatme.

Tu áarmiayi Tawit' tímiayi.

²⁹ Pítieur tuke chichaak: 'Páantchakait. Ii uuntri Tawit yaunchu jákai. Tura iwiansamuiti. Ni iwiansamuri iinj pujatsuk. ³⁰ Túrasha Tawitkia Yúsnan etserniuyayi. Tuma asa Yus tímia nuna nekaamiayi. Yus Tawitian chicharuk tímiayi "Ame akupniuitme. Nekas tájame, ukunam ame iniannamurminian Kristu akiiniattawai. Niisha Akupin anainiaktatui, amea áintsan." Nuna Yus táman Tawit nekaamiayi. ³¹ Neka asa, túruntsain Tawit, wainkia nútiksán, Kristu nantaktintriin áarmiayi. Kristu túrunatniuriin chicharuk tímiayi "ni wakanincha jákatniunam ikiukchatniuyi. Ayashincha káurtinian tsankatkashtiniuyi." ³² Au Krístun tímia nu Jesusaiti. Nu Jesusnak Yus iniantkimiayi. Nuka iisha neka asar étsereaji. ³³ Yuska, Jesus nankaamantuiti tusa ni untsuuriin apujsaiti. Tura ni Wakanin Jesusan súsaiti, Nii yaunchu tímia nútiksán. Tuma asamtai júsha átum antukurmena nuna, tura ísurmena nunasha Yus suramsaiti. ³⁴ Tawitkia ayashtiuk nayaimpiniam wákachmiayi. Tura nú Tawitiak juna áarmiayi:

"Uunt Yus winia Úuntrun tímiayi "akupin pujutanium, winia untsuuriin pujustá.

³⁵ Ame nemasrumin nupetkattajai. Nu túruntsain jui pujustá' tímiayi."

Nuní áarmaiti Jesusnan, tímiayi. ³⁶ Tura ii, Israer áentsti, Jesus krúsnum maaitji, tímiayi. Jú Jesus máamjinia nuna Yuska Uunt Akupin anaikiamiayi. Túrasha Jesussha in uwemtikkiartin Krístuiti. Ashí áentstíram nu pénger nekaatarum" tímiayi Pítieur.

³⁷ Nuna antukar wake mesekarmiayi. Tura Pitruncha chíkich akatramun-cha aniasarmiayi "Yatsuru, ¿nuiñkia itiurkatjik?" tiarmiayi. ³⁸ Tutai Pítrusha chichaak "Atumí tunaari ikiuktiaj tusarum Yus nekas enentáimtustarum. Tura ashí shuartiram Jesukristu naari pachisrum imiantiarum. Nuiñkia atumí tunaariin Yus tsankurtamprattarme. Túrunawakrumin Yuska ni Wakanin suramsattarme, tímiayi. ³⁹ Yus tímia nuka atumin túramprume. Atumí uchirincha tura ashí arant matsatainia nunasha tawai. Kame ii Yusri áentsun untsuktaj tusa wakerana nuna tawai" tímiayi.

⁴⁰ Nú chichamjai tura nuyasha Pítieur tuke jintintiuu tímiayi "Yajauch shuara asutiániuri áatna nuyá uwempratarum" tímiayi. ⁴¹ Tuma asamtai nuna antukarmia nuka imianiarmiayi. Nú tsawantaj menaintiú mir (3000) aents Yus-shuar ajasarmiayi. ⁴² Ashí nu shuar Jesusa akatramuri jintin-tiarmia nuna tímiatrusan antukarmiayi. Tura irunar shiir enentáimtunaisar yurumin áarmiayi. Túrawar, Kristu enentáimtustin namperiin najanin áarmiayi. Túrawar Yúsán áujiarmiayi.

Yus-shuar pampararmiania nu

⁴³ Tura Yuska aentsti túrachminian Jesusa akatramurijjai túramiayi ni kakarmariin iniakmastaj tusa. Tuma asamtai ashí aents nuna wáinkiar ashakarmiayi. ⁴⁴ Yúsnan umirkaruka ashí métekrak pujuarmiayi. Tura ashí niiniu armia nuna sunaisarmiayi. ⁴⁵ Ni nunken surukar, ni takakmarincha surukar, atsumainia nuna súarmiayi. ⁴⁶ Tuke tsawantak Yusa Uunt Jeen káuniarmiayi. Tura ni jeencha iruntrar warainiak Kristu enentáimtustin

námper najanin ármiaiyi. Tura nan̄kaamantu enentáimtumatsuk, yurumkan ajamnainiarmiayi. ⁴⁷ Túrawar, Yuska ti úuntaiti, tu wearmiayi. Tura ashí aents nin shiir enentáimtiarmiayi. Tura Uunt Yus tuke tsawant shuaran uwemtikiar Yus-shuar írumanum íkiaun̄ki wémiayi.

3

Wekaicha wekasamiania nu

¹ Chíkich tsawantaj, nantu nun̄kaach ajasmatai, Pítiur Juan̄jai, Yusa Uunt Jēen Yus áusatai tusar wearmiayi, Israer-shuar tuke turin armia nútiksaran. ² Tura áishman, ni akiiniamuriniá wekaicha amia nu, nūj aa wáitiniam tuke tsawant pujumiayi. Nu áishman̄nasha ni shuar̄i entsakí júkiar nú wáitiniam apujin ármiaiyi, nūj shuar wayan̄ kuítian seat tusar. Nú wáitisha, Shiir Waiti, tutajyayi. ³ Tura nú shutuapsha Pitrun Juan̄jai wayan̄ wáinkiamiayi. Wáiniak kuítian seamiai. ⁴ Tura Pítiur Juan̄jai apajas ísarmiayi. Tura nú áishman̄nasha chicharuk “Íirsata” tímiayi. ⁵ Aishman̄sha, surustatuapi, tu enentáimias, íimsamiayi. ⁶ Nuyá Pítiur chichaak “Kuítrusha atsawai, tímiayi. Kurisha atsawai. Antsu kuítjaj nan̄kaamas takakjana nuna amastajai. Wats, Nasarénumiá Jesukristu kakarmarjijaj wajakim wekasata” tímiayi.

⁷ Tinia iniais, Pítiur ni untsuurinj̄ achik awajkimiaiyi. Túram ni nawēsha, wanusesha kakaram ajasmiaiyi. ⁸ Tura niisha wajaki nantent ajakmiayi. Nuyasha wekasamiayi. Tura Pítrujajsha Juán̄jajsha Yusa Uunt Jēen wayawarmiayi. Nuik shutuapka wayá nantent nantent ajak Yusa náarin̄ shiir pachimiayi. ⁹ Ashí aents pujuarmia nu, nin wekaan wáinkiarimiayi. Tura ni chichamen anturkarmiayi. ¹⁰ Tura chichainiak “Nuik Yusa Uunt Jēen wáitirin̄, Shiir Waiti tutainium, nu áishman̄ tuke pujuuya núchaka” tiarmiayi. Tura ni túrunamurinj̄ nekaawar, ti ashamkar nusháa enentáimsarmiayi.

Pítiur ujakmiania nu

¹¹ Shutuapka péñker ajasu asa Pítrujaj Juán̄jajsha pen̄ké tsurachmiayi. Tura aents nūj pujuarmia nu, warinkít tusar, jeáshkirj̄ tséken̄ki wearmiayi. Nuka Sarumún̄na tiniu ármiaiyi. ¹² Aents káunkarun Pítiur wáiniak, chicharuk “Israer-shuartiram, ¿urukamtaí winiasha imiá írur? tiarmiayi. ¿Iisha péñker asarik’ tsuarmaj? ¿Ii kakarmarjijajinkik’ ewekamsamaj? ¹³ Atsá. Antsu Yuska ni Uchirinj̄ Jesusan ashí nan̄kaamantu awajsaiti. Ii uuntri Apraamsha, Isaksha tura Jakupsha enentáimtin armia nú Yusan tajai. Átumka Jesus nakitrarum kapitián Piratú surukmarme. Tura Piratu akupkataj tau atumsha suritkiarmarme. ¹⁴ Jesus péñker náak enentáimniuyana nu “akupnakchati” tímiarme. Antsu shuáran main̄ akupnakat tusarum wakerimiarme. ¹⁵ Túrarum iwiaaku átinian Amaana nu maamarne. Tuma ain̄ Yuska Nin jakamunmayá iniantkimiayi. Nuka iisha neka asar étsereaji. ¹⁶ Tura jū aishman̄ jūj wajaana jū tura nékarmena jū, Yusa Uchirinj̄ naarī enentáimta asa kakaram ajasuiti. Jesus enentáimtususu asa nekas péñker ajasuiti. Nusha wáinniu asarum nékarme’ tímiayi.

¹⁷ ‘Wats, yatsurtiram, wi nékajai. Atumsha atumí úntrijijaj Jesusan túramarmena nu nékatsuk túramarme. ¹⁸ Tura nu túramurmijijaj Yus yaunchu tímia nu tímianak umikiurme. Ni Krísturij̄ wáitsatniuya nuna Yuska ashí ni etserniurinj̄ áamtikramiayi. ¹⁹⁻²⁰ Wats, yamaikia tunaaruminiá kanak-tiarum. Túrarum Yúsnumaanj̄ ayantártarum, tunaarun asakarat tusarum.

Túrunawakrumniḱia, atumin uwemtikramprarat tusa Yus yaunchu anaiki-
amia nuna akupturmaktatrome. Nusha Jesukristuiti. Tura Niijiaí
enentáimin ayampratin átatui. ²¹ Tura yamaikia Jesukristu nayaimpiniam
pujustiniaiti, ashí iwiarnatsaiḱ. Yuska ukunam ataksha nunḱan shiir awa-
jsattawai. Nuna ni etserniurḱin tsáapin enentái takaku armia nuna yaunchu
áamtikramiayi. ²² Tuma asa Muisais ii aparḱin tímiayi:

“Atumi Uunt Yusrḱi ukunam etserniun akupturmaktatrome, winia
akuptukmia núnisaḱ. Nuámtaktirminia achik akupturmaktatrome.
Tura nii títiatna nu umirkatarum” tímiayi. ²³ Nánkamas aents nu
etserniun chichamen umíachkunḱa emesnartatui. Tura Israer-
shuarnum páchitkia áchattawai.

Núnisaḱ áarmiayi Muisaissha' tímiayi.

²⁴ Pítiur tuke chichaak 'íimiata, Yúsnan etserin Samuer ju tsawantin
túratniurḱi etserkamiayi. Nuyá ashí Yúsnan etserniusha tuke nuna etseri-
armiayi. ²⁵ Eteriarmia nuka atumin túramprume. Tuma asa átum péḱer
pujustinian Yuska ii uuntri Apráaman ju chichaman susamiayi. “Nekas
tájame, ame shuarum akiiniattana nujai ashí áentsnasha shiir awajsattajai’
tímiayi. Tura ii úuntriḱin tímia núnaka incha túramji, tímiayi. ²⁶ Íimiata, Yus
ni Uchirḱin iniantkimia nuḱ, atumin emka akupturmakmiarme. Atumsha,
atumí tunaariya kanaktiarum tusa, tura atumin shiir awajtsamatiun wak-
erak túramiayi.” Nunak tímiayi Pítiur.

4

Pitruncha Juánmasha kajerkarmiania nu

¹⁻² Pítrusha Juanjai Yusa chichamen áentsun jintintiainiak pujuarmiayi.
Jesu nantakin asamtai aencha nantaktin ániawai, tiarmiayi. Tura chichaak
pujuiniaí Israer-patri táarmiayi. Tura Yusa Uunt Jeen wainniu úuntriḱsha
Satuséu aentcha táarmiayi. Taar Pitruncha Juánmasha kajerkarmiayi, niisha
Jesusa nantakmiari chichaman jintintinia asamtai. ³ Yamaikia kíawai,
kashin iismí tusar achik sepunam enḱea iniaisarmiayi. ⁴ Tura Pitrun nuik
anturkarmia nú aents untsurḱi Yus-shuar ajasarmiayi. Nuik Yus-shuaraim
tura yamaiyaim iruram ti untsurḱi ajasarmiayi. Aya áishmanḱak, senḱu mir
(5000) aents áarmiayi.

⁵ Kashin tsawarmatai Israer-shuara akupniurḱi, ni úuntriḱsha, tura ni
jintinniurḱsha Jerusarénum iruntrarmiayi. ⁶ Nuḱsha Anassa, Israer-patri
uuntri anaikiamu amia nu, tura Kaipiassha, Juansha, Arejantrusha, tura
Israer-patri kapitiantri shuarḱsha tímian iruntrarmiayi. ⁷ Iruntrar Pitruncha
Juánmasha utitiarum tusar akupkarmiayi. Tura itiarmatai, ajapén awa-
jsarmiayi. Tura aniasarmiayi “Kame zyana kakarmarjijai, yana chichamejai
túrarum?” tiarmiayi. ⁸ Tutai nuyá Pítiur, ni enentáin Yusa Wakanḱi pim-
iutkamu asa tímiayi “Akupniutiram, tura úuntirmesha antukturum. ⁹ Ju
áishmanḱ nuik shutuap amia nu péḱer ajasmarḱi anintrarme. Kame itiurak
péḱer ajasuit tátsurmek. ¹⁰ Urukamtia úuktataj. Anintrakrumin iisha paant
títiatji, Israernumia shuar ashí nekaawarat tusar. Ju áishmanḱ Jesukristu
kakarmarjijai péḱer ajasuiti. Nasarénumia Jesukristun, átum máamurmena
nuna, tura Yus jakamumaya iniantkimiania nuna tajai, tímiayi. ¹¹ Nú
Jesuska kayaa áintsanḱete. Atumsha jeamniutiram, nú kaya yajauchiiti,
tímiarme Jesusna. Túrusha túramaitatanḱ Niisha jeanam emka apujsamua
núnisaḱ ajasuiti, tímiayi. ¹² Tura chíkichjai uwempratin penḱé atsawai.

Ju nunkanam ii chikicha naarj pachisar uwempratin atsaji. Jesuskete ii uwemtikrampratniun Yus suramsamaj nu" tímiayi Pítíur.

¹³ Pítrusha Juansha nánkamas shuara áintsan ármiai. Núkap unuimiar-charu ármiai. Tura unuimiarchaitiat, arantutsuk etseriarmiai. Aentsu uuntri núnaka nekaawar "Nékachuitiat, itiura sapijmiatskesha chichainia" tiarmiai. Tura, jusha Jesusa neparin ármia núiti tiar nekaawarmiai. ¹⁴ Nuyasha áishman péñker ajasmia nu níijjai nuí wajamiai. Tuma asamtai, níisha aī wajakui, Israer-shuara úuntriñkia, péñker ajaschaiti tíitai tukamá tujinkiarmai. ¹⁵ Tuma ásar, iik nuamtak áujmatsatai tusar, Pítrusha Juansha shutuapsha aā awemartai, tiarmiai. ¹⁶ Tura áujmatainiak tiarmiai "Ju Pítrusha ju Juansha iturkatjik. Ju uunt túrunamun Jerusarénnum matsatainia nu ashí nékainiatsuk. Wáititai titin tujintiaji, tiarmiai. ¹⁷ Tura, ashí aents nekaawarain tusar yamaik jiaktai. "Ju Jesusa naarj pachisrum penké jintin-tiawarairap," titiai" tiarmiai.

¹⁸ Tura árusan Pítruncha Juánasha shutuapnasha ataksha untsukarmiai. Tura chicharkarmiai. "Jesusa naarj penké áujmatsairap. Tura Jesusa túramurj penké jintintiarap" tiarmiai. ¹⁹ Tutai Pítíur Juanjai áimkiarmiai "Enentáimpratarum. ¿Yus warinia wakera? ¿Iikia Yus umirtsuk atumí chichamen umirkatniukaitiaji? tiarmiai. ²⁰ Nekaatarum. Iisha íisjinia nu, tura antukjinia nusha ii etsertsuk pujustin tujintiaji." Tu áimkiarmiai.

²¹⁻²² Shutuap péñker ajasmia nu kuarenta (40) uwi nankaamas takakuyayi. Ni péñker ajasmarin aents nekaawar, "juka aentsti túrachminiaitji" tusar Yusa naarin uunt awajsarmiai. Tuma asamtai aentsu uuntri Pítruncha, Juánasha asutiátai tukamá aentsun ashamainiak áyatik chicharkar iniais-armiai.

Yus-shuar Yusa kakarmarjñ seawarmiania nu

²³ Pítíur Juanjai ankant ajasar ni írutramurjñ wakеткиarmiai. Tura jeawar Israer-patri uuntri tura aentsu úuntriñsha nin tiarmia nuna mash etserkarmiai. ²⁴ Nu ukam antukar métekrak Yusan áujuk tiarmiai "Winia Uunt Yusrú, Amesha nayaimpisha nunkasha najanaitme. Nayaantsasha tura juí írunna nusha najanamiamé, tiarmiai. ²⁵ Tura Tawit ámin umirtamin amia nu ju áamtikramiamé:

"¿Urukamtai ashí nunkanmayá aents charaatum ajainia? ¿Tura Israer-shuarsha urukamtai ántar chichaman enentáimiamia?

²⁶ Uunt kapitíán ármia nuka chichaman jurusarmiai Uunt Yusan.

Tura pepru úuntriñsha iruntrar Uunt Yusan kajerarmiai. Ni anaikiamurjñ Krístun nútiksñ kajerarmiai."

²⁷ Tu áarmaiti, Uunta, tura nekasaiti. Erutis apachi kapitíántri Punsu Piratujaj jú péprunam iruntrararmiai. Níisha yajayá shuarjai tura Israer-nu-miá shuaraim nuim iruntrararmiai. Ame Uchirmin Jesusan tunaarinchan kajerarmiai. Jesuska Ame anaikiamiamé, winia takatrun túrat tusam.

²⁸ Tura ame enentáimjai iwíaramamna nu uminkiatniúiti. Tura apachcha Jesusan kajerainia ásar, Ame iwíaramamna tímianak umikiarmiai. ²⁹ Uunta, íisia kajertamainiaj nu. Jes, Áminiu asakrin áujmatramtsujuk. Túmaitkuisha ame chichamem ii ashamtuk etserkatín ame kakarmaram amasta. ³⁰ Tura ame kakarmarmijaj jaasha tsuártin amasta. Ame Uchiram Jesu tunaarincha nujaj ii aentsti túrachmin túratniusha amasta. Aents Yusa kakarmarjñ nekaawarat tusam túrata" tiarmiai.

³¹ Tura Yúsan tú áujas umikmatai nuñ irunar pujuiniañ úurkamaia. Túrunamtaí ashí shuara enentáñ Yusa Wakaní pimiutkarmaia. Túmaitkiui ashamsuk Yusa chichamēn etserkarmaia.

Wíniakete, tícharmiania nu

³² Yus-shuar ajasarmia nu, ti untsuritiat, ashí chikichík enentainiak enentáimainiak, ni takaku armia nuna, aya wíniakete tútsuk, júsha ashí iiniu ainiawai, tiarmiia.

³³ Tura Jesusa akatramurísha, Yus ti yayamu ásar, Yusa kakarmaríjiaí Uunt Jesusa nantakmarín tuke etseras pujuarmaia. ³⁴ Tura ashí Yus-shuarka nuñkan takakusha jeñ takaku armia nusha, núnaka surukar kuítian itiar-armiaia. ³⁵ Tura itiaar Jesusa akatramurín súarmaia. Akatramusha susam, niisha atsumainia nuna súarmaia. Tuma asamtaí shuar atsumaka penké atsuarmaia. ³⁶ Chikichík shuar, ni naarí Jusé, nuñkan takakuyaya. Jesusa akatramurísha Jusén chíkich náarín apujtusarmaia, Pirnapín. Nu náarísha, shiir enentáimtikkiartin tawai. Tura Pirnapísha Riwí áentsuyaya. Tura ni akiiniamurí núñkenka Chípriiayai. ³⁷ Niisha ni nuñken surukmaia. Tura nu kuítian itiaí Jesusa akatramurín súarmaia.

5

Ananíasa tunaarí

¹ Tura chíkich áishman, ni naarí Ananías, ni nuwē Sapirjái ni nuñken surukarmaia. ² Niisha nuñkan suruk kuítian emeenak akanak júkí Jesusa akatramurín werí takamtsukea nútikias susamaia. Ni nuwēsha, Sapir, nuna túran nekaamaia. ³ Túramtaí Pítiur chichaak “Ananíasa, ¿urukamtaí uunt iwianch enentáimin enkemturmataí, Yusa Wakanín anañkataj tusam nuñka surukam kuit achikiurna nu akankam ikuurmasam? tímiayai. ⁴ Entá, nuñkia nuñka áminiuchukait. Surukumna nu kuitcha áminiuchukait. Nusha, ¿urukataj tusamea tu enentáimpram? Amesha aya áentsnum wáitruachume. Antsu Yus-numsha wáitruame” tímiayai Pítiur. ⁵ Tutai Ananías nuna antuk nú chichamaik jakamaia. Tura ashí shuar nuna antuk nekaawar ti ashamkarmaia. ⁶ Nú turunamtaí áishman tariat Ananías jakan penuararmaia. Túrawar iwarsatai tusar júkiarmaia.

⁷ Tura Ananíasa nuwē arur, menaintiú ura nañkaamasaj támiayai. Túrusha ni áishrj jakanka nekaachmaia. ⁸ Támatáí Pítiur nuwan tímiayai “Turuttia. Átum nuñka surukurmena nuí, ¿kuit itiarurna núnikik surukuram?” tímiayai. Tutai nuwā tímiayai “Ee, núnik surukjí.” ⁹ Tutai Pítiur tímiayai “¿Urukamtaí atumsha Uunt Yusa Wakaní nekapkamsatai tusarum imiá enentáimprarum? Pai, iisiá. Ame áishrumin iwarsatai tusar júkaria nu wininiawai. Tura yamaikia amincha juramkiartatui” tímiayai. ¹⁰ Tutai nu chichamaik niisha imia Pitru wajamunam jaka iniaantmaia. Aishman wayaj tukamá jaka tepan wáinkarmaia. Túramtaí júkiar ni áishriniñ ayamach iwarsarmaia. ¹¹ Tura ashí Yus-shuar armia nu tura ashí aencha nuna antukarmia nu ti ashamkarmaia.

Yusa kakarmaríjiaí túrawarmiania nu

12-14 Tura ashí Yus-shuar Yusa Uunt Jeen shikirjin irunin ármiai. Nu shikirjsha, Sarumúnna, tu anaikiamuiti. Tura chíkichmamtinkia nuim iruntratniun ashamiarmiayi. Túmainiyatan, ti péñker ániawai, tu wearmiayi. Tura Yus-shuar Yusa kakarmarjin iniakmasarmiayi. Túra asamtai imiá untsurí aents Yus-shuar ajasarmiayi. ¹⁵ Tura chíkich aents ni shuarí jainia nuna jintiá amamtikiarmiayi. Peakjai júkiar, tampunmasha enkeawar júkiar jintiá ayamach áepsarmiayi. Pítiur nankaamak ni wakaninsha enkemprutmawainti tusar nu shuar túrawarmiayi. ¹⁶ Núnisan arantiá shuarsha ti untsurí ni shuarí jáinian tura iwianchrukuncha nuí Jerusarénum itiararmiayi. Tura ashí nuí táaruka tsuámararmiayi.

¹⁷ Israer-patri uuntri, tura Satuséu aencha niijjai pujuarmia nu suiir iiniak ¹⁸ Jesusa akatramurjin achikiar enkeawarmiayi. ¹⁹ Túrasha kashi Uunt Yusa suntari nayaimpinmaya tara sepú wáitirin uraimiayi. Tura Jesusa akatramurjin aa jíikiarmiayi. ²⁰ Tura tímiayi “Wetarum. Tura Yusa Uunt Jeen wajasrum Yusjai tuke iwiaaku átinia nu etserkatarum” tímiayi.

²¹ Nuna antukar kashin tsawar káshik Yusa Uunt Jeen wayawar jintintiawarmiayi.

Nu túmainiai Israer-patri uuntri, tura niijjai pujuarmia nusha iruntrarimiayi. Tura Israer-shuara uuntri, naamka armia nuna iruntrami tusa untsukarmiayi. Ashí iruntrar akatar akupkarmiayi, Jesusa akatramuri sepunmaya ifiatarum tusar.

²² Tura suntarsha sepunam jeariar Jesusa akatramurjin wáinkicharmiayi. Atsawai tukam táarmiayi. ²³ Taar chichainiak “Sepú waiti asakamua tímianisan aa wáinkiaji, tiarmiayi. Tura suntar wáitin iimpru wajainia wáinkiaji. Tura waiti urair wayaji tukamar atsá wáinkiaji” tiarmiayi.

²⁴ Israer-patri uuntri, tura Yusa Uunt Jeen wainniu úuntrisha, nu chichaman antukar, “tsej ausha ¿urutiak nunasha iniaisarar?” tiarmiayi. ²⁵ Nu chichamaik áishman taa tímiayi “Aishman átum sepunam enkeamarmena nu, Yusa Uunt Jeen wajasar áentsun jintintiuk pujuiniawai” tímiayi.

²⁶ Túrunamtai Yusa Uunt Jeen wainniu uuntri ni suntarjijai wear achik itiarimiayi. Túrasha penké aents kayajai tukurmarajj tusar, yajauch awajtsuk itiarimiayi. ²⁷ Tura achik itiaar Israer-shuar naamka pujamunam naka awajsarmiayi. ²⁸ Tura Israer-patri uuntri tímiayi “Iisha atumin chicháa chicharu awajsar, Jesusa naari pachisrum etserkairap tusar akupkachmakajrum. Túrasha, ¿antukurmek? Atsá. Mash Jerusarénum átum etserkamu pampankai. Jes, átum, Jesusan máawarai, in tátsurmek. Nusha in makuutai tusarum tárume” tiarmiayi.

²⁹ Nuyá tutai Pítiur chíkich Jesusa akatramurjijai chichainiak “Iikia aentsjainkia iniankasar Yus emka umirkatniuitji, tiarmiayi. ³⁰ Jesus atumek krúsnum máamurmena nuna ii iwiaaku Yusri Nin iniantkimiayi. ³¹ Yus ni kakarmarjijai Nin nankaamantu awajsamiayi. Tura nekas Akupniuiti tusa ni untsuurjini apusamiayi. Tura áentsun Uwemtikniuiti. Israer-shuar enentái yapajíawar tunaarjiniá uwemprarat tusa Yus túraiti. ³² Nu tuma asamtai iisha nu nekar átsereaji. Tura Yusa Wakanisha nuna étsereawai. Túrasha aya Yusa umirkarua nunak ni Wakanin súsaruiti” tímiayi Pítiur.

³³ Tutai nuna antukar ti kajerarmiayi. Túrawar, maatai tusar wakeriarmiayi. ³⁴ Tura nuí Israer-shuara uuntri pujumiayi, ni naari Kamarír. Niisha Pariséunam páchitkiauyayi. Tura akupeamun jintinniuriyayi. Túmakui ashí

aents nin shiir enentáimtin ármiaiyi. Tura niisha wajaki túmiayi “Ju áishmaṇ ḡḡ ishichik wajasarti” túmiayi. ³⁵ Nuyásha irunar matsamarmia nuna chicharuk “Israer shuartiram, ju áishmaṇ tú túratai tu enentáimsarumna nu aneartarum. ³⁶ Enentáimsatarum. Nuik áishmaṇ Tiútas wantinkiachmakia. Niisha kapi-tiániitjai takui, kuaru siáṇtu (400) shuar nemarkarmiaiyi. Tura ukunam nin maawarmatai, ni némarkamurisha pisararmiaiyi. Túrunawar nuní amuukami-ayi. ³⁷ Ukunmasha, irunrar nekarmartin tsawantincha Kariréanmaya Jútas wantinkiachmaka. Tura nincha nútiksaṇ ti untsurí nemarkarmiaiyi. Túman máawarmiaiyi. Nu túrunamtaí nútiksaṇ ni némarkamurisha pisararmiaiyi. ³⁸ Jes, tuma asamtaí nu áishmaṇ ḡḡ wajainia nu iniaisatarum. Auka pachisairap. Au tumainia nu aya áentsnaketkuinḡkia amuukattawai. ³⁹ Tura antsu Yúsnaiktuinḡkia atumsha amuktai tukamarum tujinkiatarme. Aneartarum. Iniaiyachkurmeka nu tumá pujusrum Yusjái máanikchattarmeash” túmiayi Kamarír.

⁴⁰ Tú tutaí tímianak umikiarmiaiyi. Túrusha Jesusa akatramurín untsukar asutiáwarmiaiyi. Tura chicharuk “Jesusa naarí pachisrum penḡé ishichiksha etserkairap” tiarmiaiyi. Tú tiar akupkarmiaiyi. ⁴¹ Jesusa akatramurisha Israer-shuara uuntri pujamunmaya júnkiarmiaiyi. Tura wáitsamniaitru me tusa Yuska Jesusa naarí pachia asakrin ii natsantin wáitsatniun tsanḡkatramkaitji tusar ti shiir enentáimsar wearmiaiyi. ⁴² Tura Jesukristunum áujmatsatniun penḡé iniaisacharmiaiyi. Antsu tuke tsawant Yusa Uunt Jeeṇcha tura chíkich jeanmasha páchitsuk etseriarmiaiyi.

6

Yus-shuaran yainian siati anaikiarmiania nu

¹ Nú tsawantin Yusan umirkaru ti kawenḡkar ármiaiyi. Tura tuke tsawant yurumak súsatin ámiaiyi. Túmakui Yus-shuar Kriaku chichaman chicharmia nu, Israer-shuara kajeriarmiaiyi. “Tuke tsawantin yurumak súarmena nuḡ atumí waje ti nukap súarme. Tura íniuka ishichik súarme” tiarmi-ayi. ² Túruinia Jesusa tuse akatramurí ashí Yus-shuaran irurar tiarmiaiyi “iisha Yus-Chicham etserkatin iniaisar yurumak súsachminiaitji. ³ Tuma asamtaí yatsurtiram, atumíniá siati áishmaṇ eáktarum yurumkan súsarat tusarum. Penḡker wekainia nu, tura neka shuar, Yusa Wakaní pimiutkamu ainia nu achiktarum. ⁴ Iikia antsu Yus áujkir unuiniakratkir Yusa chichame etserkir wétatji” tiarmiaiyi. ⁵ Akatramu tiarmia nuna ashí aents enentáimsar pujuarmiaiyi. Túmainiak Estepanḡkan anaikiarmiaiyi. Estepanḡsha Yúsán tuke enentáimtiniuyayi. Tura Yusa Wakanísha pimiutka-muyayi. Chíkich áishmaṇkan anaikiarmiaiyi, niisha Jiripi, tura nuyá Pu-rukuru, Nikianúrsha, nuyá Temuṇ, Parmenasha, Nikiurássa. Nikiurássa Antiukía nunḡkanmayaitiat Israernanacha ashí umirniuyayi.

⁶ Tura nu siati áishmaṇkan Jesusa akatramurín itiararmiaiyi. Táarmatai, akatramusha, Yus áujtusar, anaikiaji tusar múknunmsha ni uwejen awantsarmiaiyi. ⁷ Túrusha Yusa chichamenka tuke pampanḡki wémiayi. Nuḡ Jerusarénnumsha Yus-shuar ti kawenḡkarmiaiyi. Tura imia Israer-patrisha untsurí Yus-Chichaman umiriarmiaiyi.

Estepanḡkan Israer-shuara uuntriin júkiarmiania nu

⁸ Estepanḡsha Yusa waitnenkartutairí pimiutkamuyayi. Tura Yusa kakar-marísha pimiutkamuyayi. Tuma asa aentsti túrachminian shuar írunmanum

Yus némarkauyayi. ¹⁰ Tuma asa, ashí ni itiruchatrijiniá uwemtikramiayi. Tura waitnenkartutairincha nekatairincha susamiayi. Tuma asamtai Ejiptunam uunt akupin Paraún Ejiptu nunkaa akupniuri ajasat tura ni jeen wáinniuri ajasat tusa anakiamiayi.”

¹¹ ‘Tímiatam tsuka tura itiruchatcha ámiayi Ejiptu núnkanam. Tura juí Kanaan nunkanmasha núnisan ámiayi. Tuma asamtai ii uuntri yurumkan penké wáincharmiayi. ¹² Tura Jakup, Ejiptunam yurumak ikiusma awai taman antuk ni uchirin akupkarmiayi. Túrasha wekaicha wearmiayi. Wats, ii úuntrinun ujaajrume. ¹³ Tura ii uuntri atak Ejiptunam wéenak Jusesha, wíitjai takui ni yachí Jusén nekaawarmiayi. Tura Jusé “Yatsur ániawai” takui Paraún, antuk “au shuarapitia” tímiayi. ¹⁴ Nuyanka Jusé ni yachin chicharuk “Apar itiatarum uchirtuk” tímiayi. Nu shuarsha untsurí, setenta senku (75) matsarmiamiayi. ¹⁵ Nuní tutai Jakupshi ni shuaríjiaí Ejiptunam pujustai tusar wearmiayi. Tura ukunam nú nunkanman jakamiayi. Tura ni uchirísha ii uuntri ainia nu, núnisanan nú nunkanman jákarmiayi. ¹⁶ Tura atak ukunam ni shuari Sikiam nunkanam ni ukunchin júkiar iwiarsarmiayi. Kame Sikiam nunkanam Apraámka yaunchu játsuk Amura uchirí nunken sumakmiayi. Túramtai nuí iwiarsarmiayi’ tímiayi.

¹⁷ ‘Yus, Apraáman chicharuk “Nekas wi susattajme” tímiania nú tsawant jeatemantai, Ejiptu nunkanam Israer-aents pampañki ti kawenkarumiayi. ¹⁸ Nu tsawantincha Ejiptunam chikich akupin naamka ámiayi, tura Jusén nekaachumiayi nii. ¹⁹ Nu akupin ii yaunchu úuntrin anankawar yajauch awajjarmiayi. “Atumí uchirí kuírchich ana nu ajapa ikiuktiarum” tu wémiayi. Pampankarain tusa tímiayi. ²⁰ Tiri iniaisamunam Muisais akiiniamiayi. Muisaisnaka Yus shiir enentáimtimiai. Tura ni nukurí menaintiu nantu takusumiayi. ²¹ Tura nuyá ajapa ikiuktin jeamtai entsá apujsamiamiayi. Uunt Paraúnka nawantri Muisaisan wainiak jukumiayi. Achik, ni uchirinia tímiatrusan júki tsakatmarmiayi. ²² Tuma asa Muisais unuimiátrauyayi ashí Ejiptu aents nékarmia nuna. Túraturísha chichamesha kakarmauyayi.’

²³ Estepan tuke étseruk juna tímiayi: ‘Nuyá Muisais kuarenta (40) uwi takaku asa Israer áentsun iyutaj tusa wakerimiayi, ni shuari asamtai. ²⁴ Nuyá we Ejiptunmaya áishman ni shuarin máatasa pujurun wáinkiamiayi. Tura Muisais ni shuarin ayamprak Ejiptunmaya áishman kan máamiayi. ²⁵ Wíi turamujai Yuska Israer-aentsun uwemtikrattawai, tu nekaamiayi Muisais, Yus timia asamtai. Tura Israer-aencha áintsaran nékainiawai tu enentáimsamiayi. Túrasha níñkia nekaacharmiayi. ²⁶ Kashin tsawar Muisais ni shuari jímiar maani pujuinian wáinkiamiayi. Tura nawamnaikiarat tusa “¿Urukamtai nuamtak yatsumjaisa yajauch awajniarum?” tímiayi. ²⁷ Tutai emka nanakaama nu Muisaisan kárut shitiá “¿Ya amincha ii akuptamin tura ii chichartamin anaitiamkamam? ²⁸ ¿Winiasha maantuátaj tusam wakeramek, yau Ejiptunmaya áishman máamamna nútiksamkea?” tímiayi. ²⁹ Nuna antuk Muisaiska Matian nunkanam pisar, nú nunkanam kuarenta (40) uwi yajaya áintsan pujumiayi. Nú nunkanam pujus, nuatak, jímiará uchin yajutmarmiayi.’

³⁰ ‘Kuarenta uwi nanakaamas, nu atsamu nunkanam Senai náinnium tíjiuch Yusa suntari nayaimpinmaya taa Muisaisan wantintiukumiayi. Numi uchich ukat-ukatin keamunam wantinkiamiayi. ³¹ Muisais, nuna kean wainiak ashamkamiayi. Tura weantuk iistaj tukamá Uunt Yusa chichamen antukumiayi. ³² Yus tímiayi “Wiitjai Yus. Ame úuntrumí Apraáma Isaka, Jakupa

Yúsrintjai” tímiayi. Tutaí antuk Muisaiska ti kuraimiayi sapijin. Tura íistinian tujinmiayi. ³³ Nuyá Uunt Yus tímiayi “Úuntrun shiir awajsataj tusam, ame sapatrum ukuñkiam ikiuktia, wajamna nuí Wi pujakui. ³⁴ Nuyá nekaata, tímiayi. Wíi-aents Ejiptunam wáitias pujuinia nuna wáinkiajai. Tura úutainia nunasha antukjai. Tuma asamtai uwemtikrataj tusan tarajai. Wats, akupkatjame ámin. Ejiptunam waketkitia” Yus tímiayi Muisaisan.’

³⁵ Estepañ tuke étserek: ‘Jú Muisaisan ni shuari “¿Ya amincha ii akuptamin tura ii chichartamin átinniasa anaitiamkamam?” tiarmia nuna Yuska akupniun anak uwemtikrarat tusa awainki akupkamiayi. Numiniam ni suntarij wantintiuksia nuna chichamejai Yuska Muisaisan akupkamiayi, tímiayi. ³⁶ Muisaisaiti Israer-aentsun Ejiptunmayan uwemtikramia nu. Yusa kakarmarín nekaawarat tusa, aentsti túrachminian untsurín túramiayi Ejiptu nunkanam. Nuyá Kapañtin Nayaantsanmasha, tura nuyá kuarenta (40) uwitin atsamunam pujuiniaisha ti kakarman iniaktusmiayi. ³⁷ Jú Muisaisak Israer-shuaran chicharuk “Atumíniñanak etserniun Yus ukunam anaikiat-tawai, winia anaitiukma ántsaj. Tuma asamtai nu shuarsha umirkamni-uram” tímiayi. ³⁸ Jú Muisais Israer-aentsjai atsamunam pujumiayi. Senái nainniun Yusa suntarij níjiaisha pujumiayi. Tura Muisaiska ii úuntrijjai pujumiayi. Níyaiti iwiaaku pujustín chichaman sunasmia nu. In ujatmak-tinian sunasmiai.’

³⁹ ‘Túrasha ii yaunchu uuntri Muisaisan umirkatniun nakitiarmiayi. Áaniuk imiá umirtaint tusar Ejiptunam waketkitniun wakeriarmiayi. ⁴⁰ Túmainiak Muisais Yusjai chichastajtsa murá wématai nu shuar Muisaisa yachín Arunkan tiarmiayi “Ii yusri najanatá, ii nemarsatin. Áaniusha Muisaissha Ejiptunmaya in juramkiyatcha tútsuk weruma” tiarmiayi. ⁴¹ Nuyá wáakachia ánian najanawarmiayi. Túrawar, júiti ii yusri tusar, kuntinian maantuwarmiayi, nu susatai tusar. Tura ni uwejejai najanamun íisar ti wararsarmiayi. ⁴² Nuna túruinian wániak Yus, iniaisajai taku, níyá kanakmiayi. Nii wakerak yaan tikishmatrarti, tímiayi. Tuma asamtai, yaunchu Yusa etserniurj juni áarmiayi:

“‘Israer-aentsu, kuarenta (40) uwitin atsamunam wekaimiarmena nuí, ¿Winiak kuntin maanturtuamarum? Winia surustai tusarum penké túrachurme, tímiayi Yus. ⁴³ Antsu, Muruk naartin ántar-yusa pujamurín jukimiarme. Tura chikich ántar-yussha, ni naarij Rempañ, yaa ánin najanarum nusha jukimiarme. Júkin asakrumin atumí nunkeya jukin, tímiaj Papirúnia nunkan nankaiki akupkatjarne” tímiayi Yus.”

Nuní áarmaiti’ tímiayi.

⁴⁴ Estepañ tuke étserek: ‘Yus Muisaisan tímiayi “Wi akupeamu chicham ikiunsatin jeá ánian Wi iniaktusjamna tímatrusmek atsamunam najánatá” tímiayi. Tutaí Muisais Yus tímianak umikmiayi. Nu jean ii uuntri yaunchu takaku árimiayi. ⁴⁵ Nu jean ni uchirj akintkiar akintkiar wearmiayi. Ukunam, jú nunka achiktin jeamtai, Yuska kapitíán Jusuejai jú nunkanmaya aentsun jiki akupkarmiayi. Tura ii uuntri kapitíán Jusuejai winiarmia nu, nu jeancha jú nunkanam itirmiayi. Tura Tawit uunt akupin náamtsain, ii úuntrisha nu jean takaku árimiayi. ⁴⁶ Kame Yus Tawitian yáju enentáimitchiayi. Tuma asamtai Tawit Yus shiir pujustinian jean jeamtinian seamiai. ⁴⁷ Túrasha antsu Tawitia uchirj Sarumún Yusa jeen jeammiai. ⁴⁸ Túrasha aents jeammanuman Uunt Yus pujuschamniaiti. Jes, yaunchu Yusa etserniurj Yus tímia nuna áarchamkia. ⁴⁹ Juna áarmiayi:

“Nayaimpikia winia pujutairuiti. Nunkanmasha nawer tarimiui.

¿Warí jea najatruatai tusarme tarum? tímiayi Uunt Yus.

Tura Wi ayampratniusha, ¿tui aa?

⁵⁰ Wiki winia uwejruiñ ashí najanachmakiaj” tímiayi.

⁵¹ Estepañ tuke éteruk: “Tura átumka Israer-shuartirmeka atumí enentáijjaj tuke umichuitrume. Atumí kuishisha weaktsui tura Yus nékachua núniniatrume. Yusa Wakanjjaisha tuke nemasnaikiaitrume. Tura atumí yaunchu úntrijjaj métek túrarme’ tímiayi.

⁵² ‘Isia, atumí úntrisha Yusa etserniurñ tuke kajerin ármiayi, tímiayi. Tura nú arant atumí úntrisha Tunaarincha tátatui tu etseru wekaan, máacharmakia. Jes, nútiksarmek yamaisha, Tunaarincha támania nusha atumek anañkarum máachmakuram, tímiayi. ⁵³ Tura Yusa suntariñ nayaimpinmayá Yusa chichamen susamuitiatrum atumsha penké umikchamarne” tímiayi Estepañ.

Estepañka jakamuri

⁵⁴ Israer-aencha Estepañ tu chichaamu antukar imiá kajerkar nain kátetete awajarmiayi. ⁵⁵ Tura Estepañsha imiá Yusa Wakaní pimiutkamuyayi. Tuma asa nayaimpinmaani íimias, Yusa wincharñ, tura Yusa untsuurññiñ Jesusan wajan wáinkiamiayi. ⁵⁶ Tumá wániak Israer-áentsun tímiayi “Núá íiskua, nayaimp uranniun wáinjai. Tura Jesusan, Aents Ajasu tutaiya nuna Yusa untsuurññiñ wajan wáinjai” tímiayi. ⁵⁷ Támaiat niisha kuishñ akiriarmiayi, tura achiktai tusar charáa tiar ashí wajatkarmiayi. ⁵⁸ Túrawar, péprunmayá arant júkiarmiayi. Tura antuk etserkarmia nu pushirñ áikiar, natsa Sauru wajamunam au iisti tusar áeprusarmiayi. Tura máawartai tusar kayajaj tukurarmiayi Estepañkan.

⁵⁹ Tura Estepañka tukamaitiat Yúsan áujsamiayi. Tura áujuk “Uuntru Jesúsá, winia wakantrusha jurutkitia” tímiayi. ⁶⁰ Tura tikishmar áujuk “Uunta, ju winia túrutainiana ju makuip” tímiayi. Tura nuna ti iniais, jakamiayi.

8

Sauru Yus-shuaran kajerkarmiania nu

¹⁻² Estepañkan máawarmatai Sauru, péñkeraiti, tímiayi. Tura áishman Yúsan péñker enentáimta armiania nu, Estepañka ayashñincha iwiarsarmiayi, tura aneenak ti uutiarmiayi. Tura nú tsawantaj Yus-shuaran Jerusaréñnum pujuarmia nuna ti kajerkatin nanñkamnamiayi. ³ Sáuruka Yus-shuaran kajerkat ti pataat wémiayi. Túmak nuí jeá wayá, nuí wayá áishmannasha nuwancha wáinkiañka japiki júki sepunam enkeataj tusa túrimiayi. Tumakuí Yus-shuar Jerusaréñnumiá pisarar Jutía nunñkanam, tura Samaria nunñkanmasha jeawarmiayi. Jesusa akatramurñkia antsu Jerusaréñnumañ juakarmiayi.

Samaria nunñkanam etserkarmiania nu

⁴ Túrasha Jerusaréñnumiá aents pisararmia nu, arant wénaksha tuke Yusa chichamen etserkini yujarmiayi. ⁵ Tura Jiripi Jerusaréñnumiá we tura chikich péprunam Samaria núnñkanam ámanian nuí jeá, chichaak “Yus anaiki-amu ana nu Jesusaiti” tu etsermiayi. ⁶ Túrakui aents iruntrar chikichik enentáijjaj Jiripi étsereamun titiú pujusar antukarmiayi. Yusa kakarmarñ nekaawarat tusa aentsti túrachminian túrimia nunasha wániarmiayi. ⁷ Ti untsurí aents iwianchruku ármia nuna Jiripi nu iwianchin jjiirki akup-tiarmiayi. Tura íwianch jíiniainiak kakantar charáa tiar jíiniarmiayi. Tura ti

untsurí emearusha shutuapsha péñker ajasarmiayi. ⁸ Tuma asamtai nú péprunmayan̄ka ashí shuar ti warasar pujuarmiayi.

⁹ Tura nú nun̄kanam uwishin Semun̄ pujumiayi. Nuikkia wi ímianaitjai tusa Samarianmayā aentsun anan̄niuyayi. ¹⁰ Tuma asamtai ashí aents úmamkesar uchichisha, uuntcha, nin anturiarmiayi. Tura tiarmiayi “Ju Semun̄sha Yusa kakarmarjijaī áitkiawai.”

¹¹ Tura ti untsurí uwí wawekratmarjijaī anan̄karta asamtai, umirkarmiayi nu aents. ¹² Túrasha Jiripi Yusa akupeamur̄in, tura Jesukristununcha shiir chichaman etserkamiayi. Tura, nuna antukar nuwasha áishman̄sha umikiar imian wearmiayi. ¹³ Semun̄sha imia uwishniuitiat Yus-Chichaman enentáimtus imianmiayi. Tura Jiripijjaī tsan̄in wekaimiayi. Yusa kakarmar̄in shuar nekaawarat tusa Jiripikia aentsti túrachminian túrimiayi. Nuna wániak Semun̄ ti enentáimsamiayi.

¹⁴ Tura Jesusa akatramur̄isha Jerusaréñnum pujuarmia nūj Samarianmayā aents Yusa chichaman̄ umirainiawaī taman nekaawarmiayi. Tuma asamtai Pitruncha Juán̄nasha nekáa ikiuutarum tusa akupkarmiayi. ¹⁵⁻¹⁶ Tura Samarianmayā Yus-shuarsha aya Uunt Jesusa náarīin imianiarmiayi. Yusa Wakan̄in̄kia tárachmiayi. Tuma asamtai Pítrusha Juan̄jaī nūj jeawar Samarianmayā Yus-shuara enentáin̄ Yusa Wakan̄í pimiutkarat tusan Yusan áujtsarmiayi. ¹⁷ Tura áusua umikiar Pítur Juan̄jaī ni uwején nú Yus-shuara awantsarmiayi. Nuñkia Yusa Wakan̄í taramiayi.

¹⁸ Jesusa akatramur̄i uweje awasmanum Yusa Wakan̄í taramtai, Semun̄sha nuna wániak, kuitjaī nu kakarman sumaktaj, tímiayi. ¹⁹ Tura Jesusa akatramur̄in chicharuk tímiayi “Winiasha kuitjaī surustarum nu kakaram. Wisha nútiksanak nán̄kamas aentsnum winia uwejur awantsam Yusa Wakan̄í tarurat tusan tajaī” tímiayi. ²⁰ Tutai Pítur tímiayi Semun̄kan “Ámeka kuítrumjaī métek men̄kakatniuitme. Warí, Yus amaana nu ¿kuitjaī sumaktinkiait? ²¹ Yus esetram enentáimtachu asam nu túramu pachistincha pen̄ké tujinkiamé, tímiayi. ²² Enentáimprata. Túram Yus seata. Enentáimtamna nuna Yus tsan̄kurtamprashtimpiash. ²³ Nékaime, tsaan̄kea áintsan̄ yapá enentáimin̄ pimiutramkaiti. Tura tunaarm̄in̄ jinkiamua núniniaitme” tímiayi.

²⁴ Tutai Semun̄ áimkiamiayi “Uunt Yus aujtursatarum. Túrutrumna nuna túrunawaj̄ tusan tajaī” tímiayi. ²⁵ Nuyasha Jesusa akatramur̄i Jesusa túramur̄in nú áentsun ujakarmiayi. Tura wésar Samaria nun̄kanam pepru ámunman̄ka Yus-Chichaman nūj etserkiar, nūj etserkiar Jerusaréñnum wakеткиarmiayi.

Jiripi Yus-Chichaman etserkiamania nu

²⁶ Tura Yus ni suntar̄in nayaimpinmayan̄ Jiripincha akuptukmiayi. Niisha chicharuk tímiayi “Wátskea. Juyā j̄inkim Jerusaréñnumīa j̄intia En̄kasa péprunam wea nuní weme, anaraan̄i wetá. Nú j̄intiaka atsamu nun̄kanam nan̄kaamawaī’ tímiayi. ²⁷ Tutai Jiripisha wémiayi. J̄intiá wesa Itiupianmayā áishman̄kan wáinkiamiayi. Nú áishman̄sha Itiupia nun̄ka akupniur̄in, ni naarī Kantasen takarniuyayi. Kantaseka núwauyayi. Tura nu áishman̄ ti neka asa nuna kuítr̄in̄ írniuyayi. Nú áishman̄sha Yúsán áusataj tusa Jerusaréñnum wéu wáketmiayi. ²⁸ Karetanam en̄kamar wesa, Yusa etserniur̄i Isayas armia nuna aujki wémiayi. ²⁹ Wats, Jiripi nú j̄intianam wéakui, Yusa Wakan̄í nin tímiayi “Nú kareta amayán̄ta.” ³⁰ Tura Jiripisha amayán̄, Yusa etserniur̄i Isayasa áarmar̄in̄ ájun antuk, chicharuk “¿Aujeamna nu nékamek?” tímiayi.

³¹ Tutai nú áishmañ tímiayi “¿Itiurak nekaataj? ¿Yaki jintintruat?” tímiayi. Tura antsu iijjai wetái tusa, Jiripincha enker jukimiayi karetanam.

³² Nu papí áarman áujmia nu júuyayi: “Murikua áitkiasañ jákatniunam júkiarmiayi. Tura uchich murik, ure tsúpiram chichaatsna núnisañ niisha chichakchamiayi. ³³ Nincha iniatsáarmiyayi. Túrasha penké chichamnaka tútsu tsañkamakmiayi. Niisha nunkanam iwiaaku pujá maamu asamtai, ¿yaki nuna áujmatkat?” Nuní aarma ámiayi.

³⁴ Kantase takarniurj Jiripin aniasmiai “Waitneasam turuttia, tu aarma nusha, ¿yana ta? ¿Yusa etserniurj níñkik túmama? ¿Chikichnash ta?” tímiayi.

³⁵ Nuyá Jiripi nu aarman áujtus “Juka Jesusnan tawai” tímiayi. Tura nú arantcha Yus-Chichaman ujakmiayi.

³⁶ Nuyá entsa ámanum nankaamak áishmañ Jiripin chicharuk “Juí entsá jeaji. Wikia juí imianchamniakaitiaj” tímiayi.

³⁷ Tutai Jiripisha tímiayi “Tuke enentáimjai Jesus nekas enentáimtakminkia túramniaitjame.”

Tutai áishmañ chichaak “Ee nekasaiti, Jesukrístuka Yusa Uchirínti tajai” tímiayi. ³⁸ Tura, kretan awajas mai jíinkiar entsá wearmiayi. Nuí Jiripikia Kantase takarniurj iniaimiayi.

³⁹ Tura kukar jíinkiar matai Uunt Yusa Wakanj Jiripinkia jukimiayi. Tuma asamtai Kantase takarniurjsha Jiripin wáinkiachmiayi. Túrasha níñkia waras wémiayi. ⁴⁰ Jiripisha jeachat Asutu péprunam wantinkiamiayi. Tura nuyá jíinki péprunam nuí wayá, nuí wayá Yus-Chichaman etserki we, Sesaria péprunam jeamiayi.

9

Sauru Jesusan umirkamiayi

(Túramurj 22.6-16; 26.12-18)

¹ Nuna tumaj, Jerusaréñnum Uunt Jesusan umirkarmia nuna máataj tusa áujmattan Sáuruka penké iniaichamiayi. Tuma asa Israer-patri uuntri iyutaj tusa werimiayi. ² Tura jeari tímiayi “Papí ame naarmjijaj áaram surusta. Wi nuna papí jukin timiaj Tamasku péprunam jean, Israer-shuar iruntainiam wayattajai. Túran nú papijaj Jesusan umirkaru ainia nuna, nánkamsan achikiartatjai. Túran áishmañnasha nuwancha achikian jinkian, juí Jerusaréñnum enkeataj tusan ikiaankattajai” tímiayi. ³ Tura papí susam Sauru jintiá wéaj, Tamasku péprunam nuntumsaj nuí aya aneachma nayaimpinmaya tsápin jíitsumir téntakmiayi nin. ⁴ Túranamtai Sauru nunká iniaarmiayi. Tura nayaimpinmaya chichaamun antukmiayi. “Sauru, Sauru, ¿Urukamtai yajauch awajustaj tusam imiá pataaturam?” tímiayi.

⁵ Táman antuk “¿Amesha, yáitiam, uunta?” tímiayi Sauru. Tutai ataksha áimkiamiayi “Wikia Jesusaitjai. Ame pataaturmena núitjai, tímiayi. Wíi aents pataatamna nuí, amek enentáimin yajauch awajmamsame, waaka sankanmiak numin ijiuna núnismek” tímiayi.

⁶ Nuyanka Sauru sapijin kurañki tímiayi “Nuiñkia Uunta, ¿wi warinia iturkat tusamea wakeram?” tímiayi.

Tutai Uunt chichaak “Wajakim weme péprunam wayatá, tímiayi. Nuí jeawakmin ame túratamna nuna turamiartatui” tímiayi.

⁷ Tura Sáurujaj irunar wearmia nu, chichaamun antukarmiayi. Tura áentsnaka penké wáinkiacharmiayi. Tuma ásar ti ashamkarmiayi. ⁸ Nuyá Sauru nunká tepá nantakmiayi. Tura wáinmaktaj tukamá wáinmakchamiayi. Tuma

asamtai chíkich shuar uwejn̄um en̄kekiar júkiarmiayi Tamaskunam. ⁹ Nūj jeá menaintiu tsawant íimtsuk tura yurumtsuk pen̄ké úmutsuk pujumiayi.

¹⁰ Nūj Tamaskunam Yus-shuar Ananías ámiayi. Nin mesekranam Uunt Jesus tímiayi “Ananíasa.”

Tutai “¿Warí wakeram, Uunta?” tímiayi.

¹¹ Nuyá Uunt Jesus tímiayi “Wajakim jintia, Naka tutaiya nūj wetá. Nūjsha Jutasa jeen jeam, Társunmaya Sáurun eaktaj tusan winijiai, titiá, tímiayi. Niisha Yúsán áujuk pujawai. ¹² Tura juna mesekranam ipiatkamjai Sáurun. Aishman wayá ni uwejējai ántiawai, ataksha íimit tusa. Nú áishman̄ka ámetme, Ananíasa” tímiayi Jesus.

¹³ Táman antuk Ananías chichaak “Túrasha Uunta, jū áishman̄ ame áentsrumin Jerusaré̄nnum ti yajauch awajchakait. Ni yajauch túramur̄in ti untsur̄i aents ujatainiawai, tímiayi. ¹⁴ Tura yamaisha Israer-patri chicharniun papir̄in takakai. Tura nūjai ame náarmin páchiaj nuna achik jukitiaj tusa tímiajaisha tarutramji” tímiayi Ananías.

¹⁵ Tutai Uunt Jesus tímiayi “Áankisha wetá. Jū áishman̄kan winia etserniur atí tusan achikjai Wi. Niisha Israer-shuarchancha tura kapitíánniasha tura Israer-shuarnasha wínian etserin átatui, tímiayi. ¹⁶ Tura Sauru winia náarun páchia asa ti wáitsattana núnaka nin iniaktustatjai” tímiayi Jesus.

¹⁷ Tura Jesus táman umirak Ananías Sauru pujamunam wémiayi. Tura jeari wayá uwején awantas tímiayi “Yatsuru Sauru, Uunt Jesus jintiá wantintur-makmamna nusha ame ataksha íimiat tusa, tura Yusa Wakan̄jsha enentáimn pimiutramkat tusa winia akuptukai” tímiayi.

¹⁸ Nu chichamaik ni jiiya namaká saepeya áanin iniaarmiayi. Túrunamtai ataksha íimmiayi. Túruna wajaki we imianmiayi. ¹⁹ Nuyasha yurumámiayi. Tura yurumásha kakaram ajasmiayi. Tura Yus-shuarjai Tamaskunam wárumchik tsawant pujusmiayi.

Sáuruka Tamasku péprunam Yus-Chichaman etserkamiania nu

²⁰ Nuyanka Sauru Israer-shuara iruntair̄in wayá Jesusa túramur̄in et-serkamiayi. Eteruk tímiayi “Nekasaiti, jū Jesus Yusa Uchir̄inti” tímiayi.

²¹ Nuna ashí anturú pujuiniaka “¿Ausha urukakua aania? tiarmiayi. Entá jū áishman̄sha Jerusaré̄nnum Jesusan enentáimtuinian ti pataatimia núchakait. Tura tímiajaisha nuna achik Israer-patri akupniur̄in jukitiaj tusa tamia núchakait” tiarmiayi.

²² Tura Sáurusha sapijmiatsuk etsermiayi. “Jū Jesus nekas áentsun Uwemtikniuiti” tu etsermiayi. Tura ti paant étserkui, Tamaskunmaya Israer-aents, nekaschaiti titiaj tukamá tujinkarmiayi.

²³ Tura ukunam, Israer-aents Sáurun maatai tusar chichaman jurusarmi-ayi. ²⁴ Tura Sáurusha nu chicham jurusman nekamamiayi. Israer-aents pepru jínmanum tuke tsawaisha, káshisha achikiar maatai tusar jintian akirtiarmiayi. ²⁵ Nuna antukar Yus-shuar Sáurun chíiknium kashi en̄keawar itiararmiayi. Pepru tanishnum itiarar awemarmiayi.

Sáuruka Tamaskunmaya Jerusaré̄nnum wémiania nu

²⁶ Tura Sauru Jerusaré̄nnum jeá Yus-shuarjai irunratsa wakerimiayi túrasha niñkia ashiamiarmiayi. Sáurusha nekas Yus-shuar ajaschaiti tusar ashiamiarmiayi. ²⁷ Túmainiajin̄ Pirnapí Jesusa akatramur̄i matsatmanum jukimiayi Sáurun. Tura nūj ēje tímiayi “Jū Sauru jintiá wesa Uunt Jesusan

wáinkiaiti. Tura Yus chicharkaiti. Tuma asa Sauru Tamaskunam sapijmiatsuk Jesusa náarín etserkaiti” tímiayi. ²⁸ Tura Sauru Jerusarénnunm juákmiayi. Tura Yus-shuarjají irunar pujumiayi. ²⁹ Nuyasha Yus, etserkata tutai, sapijmiatsuk Jesusa túramurín etsermiayi. Tura Israer-shuar Kriaku chichaman chichau ármia nu, nuí pujuarmiayi. Sáurusha nu shuarjají áujmatsarmiayi. Túrasha nu shuar Sáurun itíur máatjik túsar chichaman juriarmiayi. ³⁰ Tura Yusají yachi ármia nu, chicham jurusman nekaawarmiayi. Neka ásar Sáurun Sesaria peprunam júkiarmiayi. Tura nuyasha Tarsu péprunam akupkarmiayi. ³¹ Tura Jútíanmaya, Kariréanmayasha, Samarianmayasha Yus-shuar shiir tímiajnisan ajasar kakaram ajasarmiayi. Yúsán ashmainia ásar, tura Yusa Wakaní yayamu ásar kawenki kawenki wearmiayi.

Pítíur Eneasan yáimiania nu

³² Tura Pítíur Yusají yachi armiania nuí iráa wekaimiayi. Wekaak Yus-shuar Rítíanam matsamarmia nuísha iraumiayi. ³³ Nuísha Rítíanam jeá áishmankan Eneas náartínan wáinkiamiayi. Niísha emearu asa wekaicha uchu uwí aya tépenuyayi. ³⁴ Tura Pítíur chicharuk “Eneasa, Jesukristu tsuármawai. Nantaktia. Tura esekmatairam iwiarata” tímiayi. Tutai Eneas nu chichamaik nantakmiayi. ³⁵ Nuna túman wáinkiar Rítíanmaya aents tura Sarunmaya aencha enentáimprar Uunt Yusan nemarsarmiayi.

Nuwa Túrkas nantakmiania nu

³⁶ Túrasha Jupe péprunam nuwa Yus-shuar pujuyayi, ni naarí Tapitia. Tura nusha Kriaku chichamjainkia Túrkas tuiniawai. Nu nuwasha nuí pujus tuke péñker túriniuyayi. Tura niísha nútiksán yají wémiayi. ³⁷ Nu tsawantínik Túrkas sunkuran jateemak jakamiayi. Túrnamtai ayáshin nijiarar yakí tesaamunam áepsarmiayi. ³⁸ Jupe péprusha Rítíanmaya tíjiuch ámiayi. Júpenmaya Yus-shuar Rítíanam Pítíur pujan nekaawar jimiará áishmankan akatrar akupkarmiayi, Júpenam wari winití túsar. ³⁹ Nuí tutai Pítíur níijíají wémiayi. Tura támatái jaka tepemia nuí awayáwarmiayi. Nuí wayamtai waje pujurmia nu útúkiar Pítrun téntakarmiayi. Túrawar pushirín, Túrkas iwiaaku pujuar najankamia nuna iniaktusarmiayi.

⁴⁰ Nuyanka Pítíur áá akupkarmiayi ashí. Tura niísha níñki tikishmar Yúsán áujjamiayi. Nuyasha nuwan jaka tepaan iis tímiayi “Tapitia nantaktia.” Tutai niísha íimi Pítíur wajaan wáiniak nantaki pujusmiayi. ⁴¹ Tura Pítrusha nuwan uwejnun achik awajkiimiayi. Tura iniaís Yus-shuar ármia nuna tura wajencha untuskar Túrkas iwiaaku ajasun iniaktusarmiayi. ⁴² Nu túrunamun ashí aents Jupe péprunmaya nekaawarmiayi. Túrawar untsurí aents Uunt Jesusan umirkarmiayi. ⁴³ Tura Pítruka Jupe péprunam untsurí tsawant nuapen-iwiarin Semunka jeen pujusmiayi.

10

Pítíur Kurniríujají

¹ Sesaria péprunam Kurniríu naartin suntara kapitíántrí pujumiayi. Ni suntarí Itiaria nunkanmaya ármiai. ² Nu kapitíán Kurniríu ni shuarjijíají, Yuska nankaamantuiti, tu enentáimtiarmiayi. Tuma ásar Yúsán enentáimtin ármiai. Tura nútiksán kuítniasha takakchan yáintaj tusa Israer-shuaran súuyayi. Tura tuke tsawant Yúsán áujtiniuyayi. ³ Chíkich tsawantaj, nantu aanku ajasají Kurniríu íimiarmiayi. Yusa suntarí Yus nayaimpinmaya akupkamu, ni pujamunam utuá “Kurniríuá” tímiayi.

4 Kurniriuá tutai, Yusa suntarj̄n ashamak ímia pujumiayi. Tura “¿Warimpiait, Uunta?” tímiayi.

Tutai Yusa suntarj̄ tímiayi “Ame seamun Yus anturtamkai. Tura at-sumainia nu yayakmin Yus shiir enentáimturmawai’ tímiayi. 5 Tura Yusa suntarj̄ Kurniriun tuke chicharuk “Wats, áminiuram Júpenam akupkata. Semun, chíkich naari Pítur, tatí túsam akuptukta, tímiayi. 6 Nu Semunsha chíkich Semunjaí pujawai. Nuka nuapen-iwiarin Semunkaiti. Tura ni jeesha nayaantsanam ayaamach pujawai, tímiayi. Nuí jeawakmin, ame túratamna nuna Semun Pítur turamtatui” tinia ikiukmiayi. 7 Tura Yusa suntarj̄ waketkimtai, Kurniriuka ni takarniurj̄n jímieran itiamiayi. Tura suntaran chikichkiniak nemarsat tusa itiamiayi. Nu suntar ni írutramuriyayi. Tura Yúsan enentáimtiniuyayi. 8 Kurniriusha ni túrunamurj̄n ashí ujáa-já awajas Jupe péprunam akupkarmiayi.

9 Kashin tsawantaj̄ Kurniriu suntarj̄ Júpenam nuntumsaraj̄, tutupin aij̄ Pítur jea yakí wáakunam Yúsan áusatajtsa wakamiayi. 10 Pítrusha ti tsukamak yurumátaj̄ tusa wakerimiayi. Túrasha yurumkan iniarainiaij̄ Pítur íkij̄tiusmak, 11 nayaimp uranmianum wan̄karam tarachia áanin tura nuna tsakarj̄n jin̄kiakman tárun wáinkiamiayi. 12 Nu tarachniun yajasma irunmiayi. Wekainiusha, nanamtincha, tura napisha en̄kemiarmiayi. 13 Tumaj̄ Yus Pitrun chicharuk “Pítur, wajakim maam yuata” tímiayi.

14 Tutai Pítur tímiayi “Átsá Uunta. Ii Israer-shuartikia yajauch yajasma áinia nu tura yúatin surimkiamu ana nuka pen̄ké yúchaitji. Tuma asamtai júnaka wikia yuashtatjai” tímiayi.

15 Túrasha Pitrun atak Yus chicharuk “Wi, pen̄keraiti, tájana nu, yajauchiiti, tiip” tímiayi.

16 Nuka menaintiú túrunamiayi. Tura nuyasha tarach ataksha nayaimpiniam wakamiayi. 17 Nuna túrunan wáiniak Pítur wariniak áaniuncha wáinkiaij̄ tusa enentáimia pujaj̄ kapitíán Kurniriu ayakma armia nu, anintruiniak jeawariayi. 18 Tura jeawar kakantar untsummiar “¿Semun, Pítur, juin̄ pujá?” tiarmiayi.

19 Tura Pítuka ímiarmarj̄n tuke enentáimia pujaj̄ Yusa Wakaní chichaak “Menaintiu áishman̄ untsurmainiawai, tímiayi. 20 Wajakim akaikim arantut-suk au nemariarta, Wi akupkamu asamtai” tímiayi.

21 Nuna antuk Pítur taramiayi. Tura áishman̄kan Kurniriu akupkama nuna wajainian wáiniak “Wiitjai Pítur. Átum eátrumna núitjai. ¿Warí tarin-trum?” tímiayi.

22 Tutai niisha tiarmiayi “Iisha kapitíán Kurniriu akupkamu taji. Kurniriuka áishman̄ pen̄keraiti. Yúsan enentáimtiniiaiti. Tura Israer-aencha nin shiir enentáimtuiniawai. Níiyá winiaji, tiarmiayi. Kame nuik, Yusa suntarj̄, nayaimpinmaya akupkamu, ii kapitíántrj̄n tímiayi “Pitrun untsukát akupkata. Nii tatí. Tura nii títiatna nu pen̄ker anturkata” tímiayi. Nuna ii kapitíántrj̄n takui iisha winiji” tiarmiayi.

23 Tutai Pítur jeá awayámiayi. Tura nu kashi nuí kanararmiayi.

Kashin tsawarar Pítur niij̄j̄j̄j̄ wearmiayi. Túrasha Júpenmaya Yus-shuarsha nin nemariarmiayi. 24 Nuyá tsawarar Sesaria péprunam, Kurniriu nákamun jeariarmiayi. Kurniriuka ni shuarj̄n tura ni nekas amikrj̄n, nekaatarum tusa untsuk ikiaankamiayi. 25 Tura Pítrusha jeamtai Kurniriu aá j̄iintiuki Pitrun tikishmatramiayi. 26 Túrasha Pítur awajki tímiayi “Wajaktia. Wisha

aya áentsketjai. Ámea núnisketjai” tímiayi. ²⁷ Tura chichasar jeá wayawarmiai. Tura wayá, untsurí aents matsatun wáinkiamiayi. ²⁸ Nuyá Pítiur chichaak tímiayi “Amikrua, atumsha nékarme. In Israer áentstinkia, chíkich áentsjai pachiniarchatniuitrume, tura ni jeencha wayashtiniaitrume in jintintramín turamainiaji, tímiayi. Túrasha Yuska ni enentáimsamurín wíniaka paant iniak-tur-sayai. Túmaitkiui wikia náńkamas áentsun yajauchiiti, tura auka wapikiaiti, tíchamniaitjai, tímiayi. ²⁹ Tuma asamtai, untsurkurmin, páchitsuk wínimjai. Túmaitkiui nekaataj tusan wakerajai. ¿Urukamtai untsurkamarum?” tímiayi.

³⁰ Tutai Kurniriu tímiayi “Kuatru tsawant nankaamasaj tura nantusha juní aj, wikia yurumtsuk Yúsan áujsamjai, kíaraj áujsatin ana nuna. Túran chichaj, áishman, ni entsatairí wincharpatniun, naka wajatran wáinkiamjai, tímiayi. ³¹ Niisha chichartak turutmiai “Kurniriu, Yus ame áujman anturtamkayi. Tura shuar atsumainia yáńmamna nunasha nekarmayi, turutmiai, tímiayi. ³² Tuma asamtai, Jupe péprunam akatramuram akupkata. Semun Pítrun itiatí. Nu Semun Pítrusha, chíkich Semunjaj pujawai. Nuapen-iwiarin Semunkaiti nuka. Tura ni jeesha nayaantsanam ayamach pujawai. Niisha taa ámin chichartamkattawai” turutmiai, tímiayi. ³³ Túrutkui, wí umikian áentsun wárikmasan ámin akuptukjame utitia tusan. Tura nékaseń taume. Tuma asamtai iisha jui Yus ímmianum pujuiniaji. Tuma asamtai, ashí Uunt Yus ámin au ujakarta túramna nu, iisha antuktai tusar pujaji” tímiayi Kurniriu.

Kurniriu jeen Pítiur etserkamia nu

³⁴ Nuyá Pítiur chichaak “Ayu. Yus ímmianum ashí aents métekrak áiniawai nekas nékajai, tímiayi. ³⁵ Antsu ashí nunkanam náńkamas aents Yúsan umirak péńker tura nuna, Yus nú aentsun shiir enentáimtawai, tímiayi. ³⁶ Yuska shiir chichaman Israer-aentsun akuptukmiayi. Nuí chichaak “shuar Jesukrístu naarín páchiakka, Yusjaj nawamnaikiatin átiniaiti, tímiayi. Nú Jesukrístu ashí shuara Úuntrinti’ tímiayi Yus. ³⁷ Túrasha Kariréa nunkanam nankamak ashí Israer nunkanam túrunamia nu paant nékarme. Imiakratin Juan ímiaak etserak amukmia nú tsawantin nankamamiayi. ³⁸ Tura jusha nékatsrumek, tímiayi. Nasarénumia Jesús, Yus Anaikiamu asa, Yusa Wakaní kakarmarjijaj péńker túriniuyayi. Iwianchruku wáitias pujuarmia nuna péńker awajsamíayi. Yus Níin pujurma asa ashí nuna túriniuyayi. ³⁹ Tura Israer-aents matsatkamunam tura imia Jerusaréń péprunmasha Jesús túramia nu, iisu asar, iisha étsereaji. Tura ayu, Nin achikiar krúsnum máacharmakia, tímiayi. ⁴⁰ Tura menainti tsawant jeamtai Yus Nin iniantkimiayi. Tura ataksha iwiaintiurtamkachmakaj, tímiayi. ⁴¹ Ashí áentsnumka wantinkiachmiayi. Antsu íniak nuik, etserín atarum tusa Yus achirmakmij nú áentstiniak wantinturmakmij, tímiayi. Au nekas jakamunmayá nantakmiatai iisha Níijaj tsanńkiar yurumámji, tímiayi. ⁴² Tura Jesussha in akuptamkaitji. Jesuska “Wíitjai Yus Anaikiamun, tímiayi. Ashí áentsun, júka makuumawai, túrasha júka makuumatsui, Wiki útiniaitjai. Kame ashí áentsun, jaka áinia nuna tura iwiaaku áinia nunasha, Wíkiitjai nuna títinian” tímiayi Jesús. Nusha átum werum ujatruktarum, Jesús turammaji, tímiayi. ⁴³ Ya shuarak Jesusa náarín pachia nú shuarnaka tunaarín tsanńkurattawai, nuna ashí Yúsnan etserniusha yaunchu etseriarmiayi” tímiayi.

Israer-shuarchan Yusa Wakaní tarurarmiania nu

⁴⁴ Tura Pítiur tuke chichaak pujaj, tura chikichcha antúu pujuiniaj Yusa Wakaní tarurarmiayi. ⁴⁵⁻⁴⁶ Tuma ásar ankant ankant chíkich chichamjai

chichasarmiyai. Túmainiak, Yus ti péñkeraiti, tiarmiyai. Tura Israer-shuar, Yus-shuar armia nuka Pítrujai táarmia nu, nuna antukar ti enentáimsarmiyai. Maa, Yusa Wakanísha Israer-shuarcha ainia nunasha tarurcharaik, tu enentáimsarmiyai ⁴⁷Túmakui Pítiur chichaak “¿Yaki surimkiat ju aents imintinian? Warí nincha ínia áintsan Yusa Wakaní tarurcharaik” tímiyai. ⁴⁸Nuyá Pítiur, Jesukrístu náariin imiantiarum tusa akupkarmiyai. Tura nuyasha Pitrunka, niijjai ishichik tsawant pujustinian seawarmiyai.

11

Ni túrunamurin Pítiur ujakmiania nu

¹ Israer-shuarchasha Yusa chichamen umirkarai táman Jesusa akatramurísha tura Jutíanmayá Yus-shuarsha antukarmiyai. ² Túmainiak Pítiur Jerusarénum jeamtai, Israer-shuar Yus-shuar ármia nu chichainiak ³ “¿Urukamtia Israer-aents ániachusha iyumam? ¿Tura aujai tsaninkiam urukamtai yurumámum?” tiarmiyai.

⁴ Tutai Pítiur ashí yámankamtaiknumiá túrunamun ujakmiyai. ⁵ Chichaak tímiyai “Wikia Jupe péprunam pujumjai. Tura nuí Yusan auju pujusan ímiarmajai. Tura wan̄karam tarachia áanin kuaru tsakarín jin̄kiakma, nayaimpinmayá táarun wáinkiamjai. Tura wi pujamunam jeartimiai, tímiyai. ⁶ Tura nuí iyaj tukaman inít yajasman, napincha, nanamtinniasha en̄ketainian wáinkiamjai, tímiyai. ⁷ Tura chichaman antukmajai “Pítru wajakim maam yuata” túrutun antukmajai, tímiyai. ⁸ Túrutkui “Atsá, Uunta, áanin wapiknaka, Israer-aents yuatin surimkiamu ana núnaka tuke yúchaitjai” tímajai, tímiyai. ⁹ Atak nuyá túrutuk “Wi, péñkeraiti, tájana nu, ámeke, yajauchi-iti, tiip” turutmiyai, tímiyai. ¹⁰ Nunasha menaintiú túrunan wáinkiamjai. Túruna nayaimpiniam mash waketikimiai, tímiyai. ¹¹ Nuí túruna pujai menaintiú áishman̄ Sesarianmayá akupkamu, winia ēataniak wi pujamunam tarutiarmiai, tímiyai. ¹² Tura nuí Yusa Wakaní chichartak “Arantutsuk aujai wetá” túrutkui, wémajai. Tura ju sais Yus-shuarjai wi wémajai. Túrunar ashinkiar Kurniriu jēen wayam̄ji, tímiyai. ¹³ Niisha chichaak “Jēaruí Yusa suntarī nayaimpinmayá taa wajan wáinkiamjai, tímiyai. Tura niisha chichartak “Jupe péprunam Semun̄ Pítiur tatí tusam áishman̄ akatram akupkata. ¹⁴ Pítrusha taa, itiura amesha tura áminiurmesha tunaarminiá uwemprattam nuna turamtatui.” Yusa suntarī nuní turutmiyai” tu ujakkamiyai Kurniriu’ tímiyai.

¹⁵ “Wi chichastasan júarai, Yusa Wakaní tarurarmiyai, yámankamtaik in tarutrampramijai nútiks̄an, tímiyai. ¹⁶ Nuiñkia Uunt Jesus timian enentáimpramjai. Niisha tíchamka “Juan̄ entsajain̄ imiakratmiyai. Tura antsu Yusa Wakanínkia imiantinia áintsan̄ atumí enentáin̄ en̄kemprutmattarme.” Nu timian enentáimpramjai, tímiyai. ¹⁷ Atumsha enentáimpratarum. Uunt Jesukrístu umirkamijai nuí, incha Yuska ni Wakanín̄ suramsamijai. Tura in suramsamijai núnisan̄ Yus nincha ni Wakanín̄ súsarmiyai. Nuna tura asamtai, wikia, túrashtiniaiti, Yúsan̄ títinkiaitiaj” tímiyai Pítiur.

¹⁸ Tura Pítiur taman antukar mitiat wáinkiar “Nekasaiti, Israer-shuarchancha ni enentáin̄ yapajíawarmatai tuke iwiaaku átinian Yuska nin súsaruiti” tiarmiyai. Tusar Yusa náariin̄ ti shiir awajsarmiyai.

Yus-Shuar Antiúkia péprunam wearmiania nu

¹⁹ Estepan̄kan máawarmia nūi, chíkich Yus-shuarnasha maatai tusar pataa-tiarmiayi. Túram chíkichkia pisarar Pinisia nun̄kanam, Chipri nun̄kanmasha, tura Antiukia péprunmasha wearmiayi. Tura nūi jeawar Yus-Chichaman chikichnaka ujatsuk aya Israer-aentsnak ujakarmiayi. ²⁰ Tura niijai Chipri nun̄kanmaya pisarmia nu Serini nun̄kanmayasha Yus-shuar ármiai. Nuka Antiukianam jeawar Israer-shuarchan Uunt Jesusa túramur̄in ujakarmiayi. ²¹ Tura Uunt Jesus ikiakárma ásar, nú nun̄kanmaya aents ti untsur̄i yaunchu túrutair̄in iniaisar Jesusan enentáimtuiniak Yus-shuar ajasarmiayi.

²² Tura nu chichaman antukar, Jerusarénumiã Yus-shuar, ame iyutá tusar, Pirnapín Antiukianam akupkarmiayi. ²³⁻²⁴ Pirnapísha jeá, Yus nú shuaran uwentikrarma nuna wáiniak warasmiai. Pirnapísha pénker áishmañkayayi. Yusa Wakanísha pimiutkamuyayi. Tura Yúsan nekas umirkauyayi. Tuma asamtai nu shuaran mash jintintiainiak chicharuk “Tu ke enentáimjái umirkarum Yus nemarsatarum.” Tu chicharak ikiukmiayi. Tura nūisha nú arant untsur̄i aents Yusaj kawen̄karmiayi.

²⁵ Nuna turasua amik Pirnapí Tarsu péprunam wémiayi Sáurun wáinkiataj tusa. Tura wáiniak Antiukia péprunam jukimiayi. ²⁶ Tura nūi jeawar, nú péprunmaya Yus-shuarjái iruntrar chikichík uwí pujusarmiayi. Yus-Chichaman untsur̄i shuaran ujaak pujuarmiayi. Tura nūi Antiukia péprunmañka Yus-shuaran émkaka, Kristu shuari, tiarmiayi. ²⁷ Nuyá Yusnan etserin Jerusarénumiã táarmiayi Antiukianam. ²⁸⁻³⁰ Túmainiã chikichík etserin, ni naari Akaapu, Yus-shuar matsatmanum ajapén wajaki chichasmiai. Tura Yusa Wakaní nekatairijjái chichaak “Ti tsuka ashí núnkanam átatui” tímiayi. Tuma asamtai Antiukianmaya Yus-shuar chichainiak “Jutía nun̄kanmaya Yus-shuar ainia nu yáintai” tiarmiayi. An̄kant an̄kant ni wakeriarmia núnik súsarmiayi. Tura nú kuítniasha Jutianmaya Yus-shuara úuntriñ akuptukarmiayi. Pirnapísha Sáurusha nú kuítian júkiarmiayi. Tura Akaapu tímia núnisan̄ túrunamiayi, akupin Krautiu pujái.

12

Pitrun sepunam en̄keawarmiania nu

¹ Nu tsawantaj akupin Erutis Yus-shuaran máataj tusa chichaman jurus áentsr̄in ishiakmiayi. ² Tura Juañka yach̄in Jakupun suen tsupirkar máawarmiayi. ³ Nuna tura máawarmatai Israer-aents wáinkiar “júka pénkeraiti” tiarmiayi. Erutissha nuna antuk, Pítrusha achikrum itiatarum tusa akupkarmiayi. Núnaka wakapruachu tanta yuat̄in nampert̄in túrawarmiayi. ⁴ Pítruncha achik itiamatai, Erutis sepunam en̄keata tusa akupkamiayi. Tura sepunam suntarsha an̄kant an̄kant, kuaru kuaru, ashikia tiasisáis (16) irunar Pitrun téntakarmiayi. Tura, jū jísat nañkaasmatai, mantamnatí tusan jík̄tiatjai aents irunramunam, tu enentáimsamiayi Erutis. ⁵ Túramu asa Pítruka sepunam pujumiayi. Tura suntarsha mijjatruitsuk iiyarmiayi. Túramunak Yus-shuarka, Pitrun yáin̄kiat tusar iniaitsuk Yúsan ti áujiarmiayi.

Yusa suntari Pitrun uwentikramiania nu

⁶ Wats, Erutis, kashin jík̄tiatjai takui, nú kashi Pítruka jimiará suntar wajamunam etema tepes kanarmiayi. Tura jimiará jirujái jin̄kiamuyayi.

Tura chíkich suntarka jínmanum ii wajarmiyai. ⁷ Tumaj aya aneachma Yusa suntari nayaimpinmaya taa ajapén wajasmiyai. Túrunamtai jeanmanka tsáapin ajasmiyai. Tura Yusa suntarisha Pitrun páenum antiñ ishintiarmiyai. Tura jirusha Pitru uweyéya sayat atiniamiyai. ⁸ Tura Yusa suntari tímiyai “Kaki emenmamata. Túram sapatrumsha aweekata” tímiyai. Tutai Pítiur túramiyai. Nuyá chichaak “Pushiram entsarta. Túram nemartusta” tímiyai. ⁹ Tutai Pítiur nemarsamiyai. Túrusha Pítruka, mesekranmaapi júniaja, tu enentáimsamiyai. ¹⁰ Túrusha emka suntar íimia wajan nankaikiarmiyai. Tura nuyasha chíkich suntar íimia wajan nunasha nankaikiarmiyai. Tura nuyasha jiiintiainium jiru waiti ámanum jeawarmatai, nú wáitisha íimia-niñki kuat uranmiyai. Túrunamtai jíinkiarmiyai. Tura jintiá ishichik wésañ, Yusa suntari Pitrun níniak ikiukmiyai.

¹¹ Túram Pítiur enentáimiar tímiyai “Yamaikia nékajai. Mesekranmachuiti. Antsu Uunt Yus ni suntariñ nekas akupturkayi. Erutis mantuataj tusan pujurtana nuyá Yusa suntari winia uwemtikrurai. Tura Israeraents túrutatajtsa wakermia nuyasha uwemtikrurai” tímiyai. ¹² Nuna tu enentáimias nekáa, Marí jeen wémiyai. Nú Marisha Juan Márkusán nukuríyayi. Nú jeanam untsurí aents irunar Yúsán auju matsatainiá Pítiur jeamiyai. ¹³ Tura jeá aá wáitin tuntuimiyai, wayataj tusa. Túmakui nuwá uchich, ni naari Ruti, yákit tusa iyumiyai. ¹⁴ Tura jeari, Pitru chichamen anturak ti shiir enentáimsamiyai. Túmak wáitin urattsuk ikiuki, inít matsatanián werí “Pítiur taa wáitiniam wajaawai” tímiyai.

¹⁵ Tutai “Wáurtsmek” tiarmiyai.

Tútaisha núwaka “Atsá nekasaiti” tímiyai.

Tútaisha nú arant “Níchuiti. Antsu ni wakaní túratsuash” tiarmiyai.

¹⁶ Tu chichainiañ Pítruka tuke tuntuí wajamiyai. Tura wáitin uraj tukamá Pitrun wáinkiar ashamkarmiyai. ¹⁷ Ashamak chichainiakui Pítiur, uweje takuí itiatmantiarmiyai. Tura nuyá Uunt Yus sepunmayan uwentikramun ujakmiyai. Tura “Jü chicham Jakupu tura chíkich Yus-shuarsha ujaktarum” tímiyai. Nuna ti iniais jíinki arant wémiyai.

¹⁸ Kashin tsawar suntarsha Pitrun atsá wáinkiar “Chuwa urukakua menkaka. Áyaŵa urukattajia” tiarmiyai. Pítiur túrunamun nékachu ásar nuna tiarmiyai. ¹⁹⁻²⁰ Túrunamtai Erutis chichaak Pítiur eaktarum tusa akupkarmiyai, túrusha wáinkiacharmiyai. Túrunamtai Erutis suntaran untsukar, Pitrun ísarmia nuna aniasarmiyai “¿Pítiur itiura menkakama?” tímiyai. Niisha áimainiachkui, nu suntaran mantámnatí tusa akupkamiyai.

Erutis jakamiania nu

Erutissha Tirunmaya tura Setúnmaya áentsjaisha nemasnaikiarmiyai. Túmayatan Jutía nunkan ikiuki Sesaria péprunam pujustaj tusa Erutis wémiyai. Sesaria péprusha Tiru péprunam tíjiuchiiti. Setúnmaya aents Tirunmaya áentsjai Erutisa nunkeyan yurumkan súmainia ásar, Erutisjai nawamnaikiatniun wakermiyai. Tuma asamtai métekrak enentáimsar, Erutisa takarniurí penkeri, ni naari Parastu, niijai emka amikmawar nuyá Erutisan weriar shiir matsamsatniun seawarmiyai. ²¹ Tuma asamtai tsawant jeamtai Erutissha akupin entsatai pushin entsarmiyai. Tura akupin pujutainium pujus áentsun ikiaanak áujmatmiyai. ²² Nuñ pujus chichaakui aents untsumainiak tiarmiyai “Jü chichaa pujana júka áenchaiti. Antsu nekaska yúsaiti” tiarmiyai.

²³ Tumaĵ nuyajk Yusa suntariĵ nayaimpinmayaĵ tariĵ Erutisanĵ jaa awajsamiayi. Tumaĵ asamtai nusha aka yuamĵ jakamiayi. Erutissha Yusan waantu awajtsuk niŋki waantu enentáimtumasa asa túrunaĵ jakamiayi. ²⁴ Túrunamtaisha Yusa chichamenka nú arant pampaŋki wémiayi. Túmakĵ ashí núnkanam anturamiayi.

²⁵ Tura Pirnapísha Sáurusha ni takatrĵn amukar Jerusaréŋnumiá Antiukíanam waketaĵniak Juanĵ Márkusanĵ júkiarmiayi.

13

Yus-Shuar Pirnapíncha Sáuruncha Yus-Chichaman etserkarat tusar akupkarmiania nu

¹ Antiukíanmayaĵ Yus-shuarnum Yusnan etserin páchitra ármiayi. Nútiksaj Yus-Chichaman jintinniurisha ármiayi. Pirnapísha tura Mukusa Semunsha, nuyá chíkich, Serinianmayaĵ Rúsiusha tura akupin Erutisa tsakatkeŝha, ni naariĵ Manaen, Sáurusha tímianu ármiayi. ² Tura chíkich tsawantajĵ niisha yurumtsuk Yusan áujeak pujuĵniajĵ Yusa Wakanĵ tímiayi “Pirnapísha, Sáurusha akanturkitiarum, tímiayi. Wi takatan súsaitjiana nuna takasarat tusarum túratarum” tímiayi. ³ Tutaiĵ ijiarma Yusan aulsua amikiar, shiir wetarum tusar ni uweĵén Sáurun Pirnapíncha awantkarmiayi. Túrawar Antiukíanmayaĵ akupkarmiayi.

Chipri nunkanam jeawarmiayi

⁴ Tura nuyanka Yusa Wakanĵ akupkam Pirnapísha Sáurusha jíinkiar Serusia péprunam jeawarmiayi. Tura nuyá uunt kanunam enkemprar Chipri nunkanam jeawarmiayi. ⁵ Juansha yáintaj tusa némarkauyayi. Nuĵ Saraminia péprunam jeawar Israer-shuar iruntaiĵ jeanam wayawar Yus-Chichaman etseriarmiayi. ⁶ Tura Chipri nunkanam pepru ainia nuĵ wáirkutak Papus péprunam jeawarmiayi. Nuĵ jeawar Israer-aents uwishin ni naariĵ Parjesúsan wáinkiarimiayi. Ni chíkich náarĵnkia Erimiasauyayi. Niisha uwishniuitiat, Yúsnaĵ étseraejai, tíniuyayi. ⁷ Akupin Serjiu Páuruĵajĵ pujuyayi. Nu akupniusha tí péŋker enentáimniuyayi. Tura Pirnapin Sáuruncha chichaman akuptukmiayi, taarti tusa. Kame Yus-Chichaman antuktaj tusa wakerak untsukmiayi. ⁸ Tura uwishin Erimias nuna nakitiak “Auka péŋkerchaiti” tímiayi. Akupniusha Yúsnaĵ umirkajĵn tusa nuna tímiayi. ⁹ Nuyanka Sauru, ni chíkich naariĵ Papru, Yusa Wakanĵ pimiutkamu asa, nu uwishniun úmamkemas iis tímiayi ¹⁰ “Ámeke wáitaitme. Anaŋkartiniaitme. Yajauchiitme. Maaj, iwianchiitme. Tura ashí péŋker ana nuka imiá nakitniuitme. Tsej, ĵurukamtai Yusa jintĵ naka ana nu emeskim weam? ¹¹ Paij, yamaikia Uunt Yus asutiámattawai. Yamaikia amesha jíimi kusurmatai untsurĵ tsawant tsáapnin penké íschattame” tímiayi. Tura nú chichamaik jíi kusurmatai kirit ímiuk chikichan eamiayi enkeki jurukit tusa. ¹² Nu túrunamtai akupin nuna wáinak, tí enentáimpramiayi. Túruna Uunt Yusa chichamen enentáimtur umikmiayi.

Chíkich Antiukíanam etserkarmiania nu

¹³ Nuyá Juanĵ wakетки Jerusaréŋnum wémiayi. Tura antsu Pápruka ni tsaniakmarĵiĵai kanunam enkemprar Pápus péprunka ikiukiar Pirji péprunam jeawarmiayi. Nusha amaini Pampiria nunkanam pujawai. ¹⁴ Nuyá Pirji péprun naŋkaikiar Antiukia péprunam jeawarmiayi. Nú Antiukíasha Pisi-tia nunkanam pujawai. Nuĵ jeawar Israer-shuar ayampratin tsawantin, nuka sáwartin, Israer-shuar iruntaiĵ jeanam wayawar pujusarmiayi. ¹⁵ Tura

núj Yus-Papinium yaunchu áarman áujas aminkiamtai, Israer-shuar iruntai jeanam írniuri Páprun tiarmiayi “Yatsuru, jintiátin chicham takakkurmeka yamaik titiarum. Antukarmí” tiarmiayi.

¹⁶ Tutai Papru wajaki uweje takumiayi. Tura chichaak “Israer-shuartiram, tura Yúsan umirkataj tusa wakerarmena nu antuktarum, tímiayi. ¹⁷ Ii Yusrj ii yaunchu uuntrin Israer-shuartin achikmiayi. Tura niisha írara núnik Ejiptunam matsatainaij Yuska nin páchiniaik uunt awajsarmiayi. Yus ni kakarmaríjiaí nú nunkanmaya ii yaunchu uuntrin uwentikrarmiayi. ¹⁸ Túrasha atsamu nunkanam ii uuntrin kuarenta (40) uwitin Yuska aya kátsuntramiayi. ¹⁹ Tura nuyanka siati áentsun mátsatkainian, Kanaan nunkanam matsamarmia nuna amukarmiayi. Nú nunkan ii yaunchu úntrin susataj tusa Yus túramiayi. ²⁰ Nuyanka ii uuntri akupniurín, juís tútain, anaikiamiayi. Tura chikichan ukunam anaiki anaiki wémiayi. Nuna tura túraakua kuaru siántu senkuenta (450) uwí ejemiayi. Samuersha Yúsnan etserin náamtsáin nuna túrimiayi Yus. ²¹ Tura nuyanka áencha juísan nakitiainiak, uunt akupin náamkat tusar Yúsan seawarmiayi. Tuíniakui Yuska Sesa uchrín Saúran anaikiamiayi. Nú Saúra úntrin kía Pinjamínkiauyayi. Tura Saúrsha kuarenta (40) uwí nú áentsun akupkat tusa Yus tsanekatkamiayi. ²² Tura Saúr náamkan ataksha Yus awainkimiayi. Tura nuyá iiksan nú nunkanam uunt akupin atí tusa Tawitian anaikiamiayi. Tura Yuska juna Tawitnian tímiayi “Isaí uchrín Tawitian winia enentáir jeamtai achirmakjai. Tura Winia umirtin átatui” tímiayi. ²³ Wats, Tawit weeanmaya Jesusaiti. Tura Yuska Israer-aentsun Uwentikrartinian Jesusan anaitiukmiayi, yaunchu timiarín uminkiát tusa. ²⁴ Jesuska táatsain Juan ashí Israer-shuaran tunaarínia enentáimtumar imiantinian ujakmiayi. ²⁵ Tura Juansha ni jákatniuri jeatemamtai, chichaak “Átum enentáimtarmana núchaitjai. Wikia Yusa anaikiamurj, Kristu tutai, náarmena núchaitjai. Antsu Niñkia winia ukunmaruj winittiwai. Tura Niisha wíjiainkia ti nankaamantu asamtai wikia sapatrincha atitrataj tichamniaitjai” tímiayi.”

²⁶ ‘Pai, yatsurtiram, Apraám weeatiram, tura ashí Yus ashamkarum umirkaitrumna nu, antuktarum. Ju uwempratin chichamka íniuiti, tímiayi. ²⁷ Iis, Jesusa túrunatniurín Yuska yaunchu ni etserniurín áamtikrakhmakia. Tura ukunam Jerusarénumiá shuar ni akupniuríjiaí tuke sáwartin nuna áujeatskesha penké nekaacharmiayi. Tuma ásar Jesuska Yusa Uchrínti ticharmiayi. Tura, jakatí, tiarmia nuj, Jesusa túrunatniurín, Yus yaunchu chichakmia nuna, tímiatrusaraj umikiarmiayi, tímiayi. ²⁸ Jesuska penké tunaamkachunak yamaikia mantamnatí tusar Piratun seawarmiayi, tímiayi. ²⁹ Tura Yusa Papirín ashí Jesusnan tímia nuna tímiannak umikiarmiayi. Tura nuyá krúsnumiá itiarar iwiarsarmiayi. ³⁰ Túramunak Yus jakamunmayan iniantkimiayi. ³¹ Jesuska jakamunmaya nantaki, yaunchu Kariréanmaya Jerusarénum Niijiaí irutka wéarmia nuna núkap tsawantin pujus wantin-tiukmiayi. Nú shuaraiti yamaikia Jesusa túrunamurín etserainia nu’ tímiayi.

³² ‘Iisha núnisrik shiir chichaman Yus yaunchu ii apachrín tiarmia nu étsereaji. ³³ Iisha Israer-weeá asakrin, Yuska Jesusan iniantkímia nujai ii apachrín anajmatramia nuna yamá uminkiaiti. Kame Sarmu Jímiar papinium ju áarmaiti:

“Ámeke winia Uchiruitme.

Túmaitkiui yamaikia winia iwiaakmar susamuitme.”

34 Tura Yuska Jesusa nantakmiarj̄n jintintiaik, tura ni ayashj̄ káurchatnium jintintiaik, chíkich Sarmu papinium juna áamtikramiayi:

“Nekas penkeran Tawitian anajmatramaj nuna atumin amastatjai.”

35 Tura nú arant, nú paant atí tusa, chíkich Sarmu papinium ju aarma awai: “Yusa, ame Uchiram aneamna nuna ayashj̄ káurtincha tsankatkashtatme.”

36 “Nekaatarum, yatsurtiram, Yuska Tawitia ayashj̄n tichamiayi nuna. Tawitkia Yusa tímian amuk jakamiayi. Túrasha ni ayashj̄n káurmiayi. 37 Tura antsu Yus iniantkimia nuna ayashj̄nka penké káurchamiayi. 38 Tuma asamtai, yatsurtiram nekaatarum. Jesusjainkete tunáa asakártin. 39 Tura Muisais yaunchu akupkamia nujai tunáa tsankurnarchamnia nu, yamaikia Jesusjai tsankurnartiniaiti. 40-41 Yúsnan etserin juna áarmiayi:

“Enentáimpratarum wishikkiartintiram. Ashamkatarum. Túrarum menkatumpratarum. Wi Yus asan, átum pujarmena nu, aents túrachminian túratajna nusha penkesh nekaashtatrum, chíkich ujatmainiakuisha.” Tu áarmaiti.

Tuma asamtai yatsurtiram, aneartarum atumin nuna túrutmawajrum, Yusnan etserin aarma tana nútksan.” Nuna chichaak amukmiayi Papru.

42 Tura nuyá Papru Pirnapíjjai jiinki wéenakui aents chichainiak “Chíkich sáwartincha jútiksarmek etserkatarum” tiarmiayi. 43 Tura nuyá iruntsua tsenkeenak Israer-shuarsha, tura chíkichkia Israer ajasarusha, Yúsan umirkatajtsa wakeriarmia nuka, Páprun Pirnapíncha nemarsarmiayi. Niisha nu áentsun chicharuk “Yusa anenkrattairj̄ enentáimtusrum kakartarum” tiarmiayi.

44 Tura chíkich sáwartinkia nu péprunmayá ti untsurj̄ aents Yus-Chicham antuktai tusar tuakarmiayi. 45 Tura Israer-shuarka ti untsurj̄ áentsun tuakarun wáinkiar, suir iiniak, ti kajerarmiayi. Tuma asamtai Páprun katsekkar “Ju chichaana juka ántar tawai” tiarmiayi. 46 Támaitiat Pápruka Pirnapíjjai arantutsuk chichainiak tiarmiayi “Israer-aentstirmin, atumin emka Yus-Chicham ujaktiniuji. Túrasha átum támaitiatrum nakitramarme. Tura atumsha nakitia asarum, Yúsnun tuke iwiaaku pujuschamnia ajasurme, tímiai. Tuma asamtai iikia yamaikia Israer-aencha ujaktai tusar weraji, tiarmiayi. 47 Nu túratarum tusa, Uunt Yus akuptamtsujik. Jes, ni Papirjin juna tawai:

“Israer-shuarcha Winia nekarawarat tusan anaitiukjame. Tura ashí nunkanmayá aents uwemprarat tusan akuptajme.”

Tu áarmaiti” tímiai. 48 Nú chichaman antukar Israer-shuarcha ti wararsar “Uunt Yus tana nuka imiá penkeraiti” tiarmiayi. Tura, tuke iwiaaku pujusmin armia nu Yus-shuar ajasarmiayi. 49 Tú tumakj̄ Yus-Chicham nú nunkanam ashí jamarmiayi. 50 Túrasha nuwan, Yúsan penker enentáimtuinian tura penker wekainian, Israer-shuarka yajauch enentáimtikrarmiayi. Áishman penkerj̄ armia nunasha, yajauch enentáimtikrarmiayi. Túram Páprun Pirnapíncha katsekkar, chichaman irunturar najatawarmiayi. Tú-turukiar ni nunkeyá jiki awemarmiayi.

51 Túram Papru Pirnapíjjai, ju aentska yajauchiiti tusar, wéenak naweyan nunkan akakekiar ikiukiarmiayi. Túrawar Ikiuniu péprunam wearmiayi.

52 Yusa Wakanísha pimiútkamu ásar Yus-shuarka ti warasarmiayi.

¹ Ikiuniu péprunam Papru Pirnapíjiaí jeawar Israer-shuar iruntai jeanam wayawarmiayi. Túrunawar Yus-Chichaman etserkarmiayi. Túram ti untsurí Israer-shuar ármia nu, Israer-shuarcha ármia nusha Yúsan umirkarmiayi. ² Tura chíkich Israer-shuar, Yúsan umirkacharu ármia nu, Yus-shuaran kajerkarat tusar Israer-shuarchan yajauch enentáimtikrarmiayi. ³ Tuma asamtai Papru Pirnapíjiaí nú núñkanam ti nukap tsawant pujusarmiayi. Tura Uunt Yúsan enentáimtuinia ásar, arantutsuk Yusa waitneñkratairjñ etserkarmiayi. Tura, etserinia nu winia kakarmarjainti tusa, Yuska aents túrachminian najanmamtekiawarmiayi. ⁴ Tura Ikiuniunmaya aentska jímiar kanakarmiayi. Chíkichkia Israer-shuar tuinia nu nekasaiti, tiarmiayi tura chíkichkia Jesusa akatramurí tuinia nu nekasaiti, tiarmiayi. ⁵ Tura nuyá Israer-shuarchajáí Israer-shuarka chichasar pepru uuntrijiaí chichasarmiayi. Tura Papru Pirnapíjiaí katsekkar tura kayajai tukurar, yajauch awajsatniun nan kamawarmiayi. ⁶ Túrasha Papru Pirnapíjiaí nuna anturmamkar, Ristra péprunam wearmiayi. Nuyasha Tirpi péprunam wearmiayi. Nu péprusha mai Rikiaunia nuñkanam pujuiniawai. ⁷ Tura Yus-Chichaman etserkarmiayi.

Ristra péprunam Páprun kayajai tukurarmiania nu

⁸ Ristra péprunam tunamaru áishman pujumiayi. Ni akiiniamurija tuke wekaichauyayi. ⁹ Nú áishman Papru chichaamun antúu pujumiayi. Túman Papru úmamkemas nin íismiayi. Niisha, Yusa kakarmarjiaí tsuamartatjai, tu enentáimium Papru nekaamiayi. ¹⁰ Tura Pápruka kakantar chicharuk “Wajakim wewe ajasam wajasta” tímiai. Tutai áishman wiut kutsuar wajakí wekaimiai. ¹¹ Papru túramia nuna aents wáinkiar Rikiaunia chichamjai untsumainiak “Yuska áishmanka áanin ajasaru in tarutramarji” tiarmiayi.

¹² Pirnapínkia, Júpitir náartin yúsaiti, tiarmiayi. Tura Páprunka, Mirkiuriu náartin yúsaiti, tiarmiayi. Pápruka chichau asamtai tu anaikiarmiayi. ¹³ Nú pepru jeamunam Júpitir náartin yusa jeen pujumiayi. Tura Júpitir náartin yusa pátrirí kukujñ iwiarkamun, wákajai itiamiayi. Tura niisha ni áentsrijiaí wáakan maatai tusar pujuarmiayi. Tura tikishmatrar ajamsatai, tiarmiayi. ¹⁴ Tura Jesusa akatramurí Pirnapísha Páprusha nuna nekaawar, auka nakitaji tusar, ni pushirjñ jaararmiayi. Túrawar aents írunnam pachiniawarmiayi. ¹⁵ Tura tiarmiayi “Shuara, çurukamtaí áitkiarum? Iisha yúschaitji. Atumea áankiiti, tiarmiayi. Penké ánrarum túrarmena nu ikiukrum, nekas Yus nemarsatarum tusar iisha taji. Nekas Yuska nayaimpincha, nuñkancha, nayaantsancha, tura ashí nuí írunna nunasha najanaiti, tiarmiayi. ¹⁶ Jes, aents ni enentáimmiarjiaíñ wekasarat tusa Yuska yaunchu tsan katkamiayi. ¹⁷ Tuma ain shuaran péñker awajsamujai Wiitjai Nekas Yus tusa paant awajmamsamiayi. Kame yumi yutuktinian nayaimpinmaya akupturamai. Tura ejemarrar warasarmi tusa yurumak nerektinniasha súramji” tímiai.

¹⁸ Túrasha Pápruka tímianu támaitiat, nuna anturtsuk wáakan maawar nin tikishmatrar ajamsataitsa wakeriarma nuna suritkiachminiak suritkiarmiayi nu áentsun.

¹⁹ Tura nuyá Antiukiánmaya Ikiuniunmayasha Israer-shuar táarmiayi. Taar nuyá áentsun Páprun yajauch awajsatniun enentáimtikrarmiayi. Tú tutai Páprun kayajai tukurarmiayi. Tura jakayi tiar péprunmaya japiki júkari arant áepsarmiayi. ²⁰ Túrasha Yus-shuar Páprun tariar téntakararmiayi. Túram nuñkia Papru wajakí wé ataksha péprunam wayamiayi. Tura kashin tsawarar Papru Pirnapíjiaí Tirpi péprunam wearmiayi.

²¹ Tírpinium pujusar uwempratin chichaman etserkarmatai untsurí shuar Yúsan umirkarmiayi. Nú shuaran Yus-Chichaman jintintia amuukar Rístranam, Ikiuniunam, Antiukíanmasha wakеткиarmiayi. ²² Waketainiak “ashí Yus tana nu tímiatrusumek tuke umirkatarum” tuíniak Yus-shuaran ikiakármarmiayi. Tura nin tiarmiayi, “Yusa akupeamurijn pachiinkiatataj tákurkia ti wáitsatniuitji.” ²³ Tura Yus-shuar irunmanum Yus-shuaran wáinnium anaikiarmiayi. Yurumsuk Yúsan áujсар chicharainiak, “umirkarumna nú Yus iirmasarti” tiar ikiukiarmiayi.

Yaunchu jíinkiarmla nú Antiukíanam wakеткиarmiayi

²⁴ Nuyá Pisitia nunkanam nankaamakiar Pampiria nunkanam jeawarmiayi. ²⁵ Nuí jeawar Pirji péprunam Yus-Chichaman etserkar nuyá Ataria péprunam wearmiayi. ²⁶ Nuí kanunam enkemprar, yaunchu jíinkiarmla nú Antiukía péprunam wakеткиarmiayi. Páprusha Pirnapísha tuke jíintsajin nú Antiukíanmaya Yus-shuar chichainiak, Yusa takatři túrattarmena nuna Yus waitnentramak yáinmakarti, tiar akupkarmiayi nuikⁱ. ²⁷ Nú Antiukíanam jeawar, Yus-shuaran irurar, ashí Yus nin yáinkiarmla nuna ujakarmiayi. Tura nútiksaj Israer-shuarchan Uunt Yus uwentikrataj tusa untsukmla nunasha ujakarmiayi. ²⁸ Tura nuyá Yus-shuarjaj Papru Pirnapíjaj núkap tsawant pujusarmiayi.

15

Jerusarénum Yus-shuara úuntrijaj iruntrarmiania nu

¹ Nu tsawantin áishman Israer nunkanmaya wear, Antiukíanam jeawar Yus-shuaran jintintiainiak “Muisais tímia nútiksarmek tsupirnaktin ana nu túrachkurmeka uwemprashatrumé” tiarmiayi. ² Tuma asamtai Papru Pirnapíjaj, núchaiti tusar, nú áishmanjaj ti kakaram chicharnaikiarmiayi. Túrasa nuu enentáiniak enentáimsatniun tujinkiarmlai. Tuma asamtai Antiukíanmaya Yus-shuar Páprun Pirnapíncha, atumsha chíkich áentsaj Jerusarénum wétarum tusar akupkarmiayi. “Tura nuí Jesusa akatramurísha Yus-shuaran wáinniusha iniasrum itiumainkit tusarum pénker nekaatarum” tiarmiayi. ³ Papru Pirnapísha akupkamu ásar wéenak Pinisia nunkanam, Samaria nunkanmasha nankaamainiak Israer-shuarcha Yus-shuar ajasman Yus-shuaran ujakarmiayi. Tura Yus-shuarsha nuna antukar ti warasarmiayi.

⁴ Tura Páprusha Pirnapísha Jerusarénum jeawarmatai Jesusa akatramurísha Yus-shuara wáinnurísha tura penké Yus-shuarsha itiwarmiayi. Tura niisha túrunamia nuna mash etserkarmiayi. ⁵ Túrasa Pariséu aencha, Yus-shuar ajasarmiania nu, wajakar chíchainiak “Muisais tsupirnaktinian akupkamlia nuna tura nú arant ashí Muisais tímia nunasha Israer-shuarchasha umirkatin áiniawai” tiarmiayi. ⁶ Nuyasha Jesusa akatramurísha Yus-shuaran wáinniusha nu chichaman nekaatai tusar iruntrarmiayi. ⁷ Chichasua umikiarmatai Pítur wajakí tímiai, “Yatsurtiram, Yus nuik winia chichartak “Israer-shuarchasha winia chichamprun antukar umikiarat ujakarta” tu anaitukmlia nu nékarme. ⁸ Tura Yus Niñki ashí aentsu enentáin neka asa, Wíi shuar ajasmin áiniawai tusa, ni Wakanjin Israer-shuarchan susamiayi, in suramsamaj nútiksaj. ⁹ Yus incha aushatka awajtamsachmaji, tímiai. Antsu métekraketji. Tuma asamtai niisha Yúsan enentáimtuiniakui, Yuska enentáiyaj ni tunaarjin japirarmai, tímiai.

10-11 Tura iikia nékaji niya áantsarik Jesukrístu waitnenkartutairijiai uwempraitji. Nuñkia ¿urukamtia Yus uwempraru áiniawai tajsha, átum Muisais yaunchu akupkamtia nu umikiarat tusarum wakerarum? Nu túrakrumka Yus túrana nu jeatsui tarume. Tura nuka kaarka áintsançhakait. Warí, ii úuntrişha tura iisha ashí Muisais tímia nu umiktin tujinkiamji. Tuma asamtai, ¿urukamtai nú káarkasha Israer-shuarchasha áentskatin wakerarum?" tímiayi Pítieur.

12 Pítieur nuna tutai Pirnapísha Páprusha chichainiak, "Israer-shuarchasha ni kakarmarın nekaawarat tusa aentsti túrachminian túratniun Yuska ti yáinmakmaji" tú ujuam mitiat wáinkiar antúu pujuarmiayi. 13 Nuna ujasua amikmatai, Jakupusha tímiayi "Yatsurú, antuktarum. 14 Nuik túrachman Yus túramia nuna ii yachi Semuñ Pítieur ujatmakji. Júiti: Yuska Israer-shuarcha waitnentak Winia ajasarat tusa chikishtarchiniak achikiuiti" tímiayi. 15 Júsha Yúsnan etserin yaunchu áarmia nu tímiatrusañ túrunayi. Júiti aarma:

16 "Israer-aents meserar, jea sáanakniua áintsan áiniawai. Tura ukunam ataksha tana, Tawitia jeen sáanaki ana nuna, ataksha najanattajai. Juakai nuna achikian ataksha awajrattajai. 17 Ashí nuñkanmaya aents, Israer-shuarcha ainia nu, winia náarun pachinia nu, Winia eątkarat tusan túrattajai. 18 Uunt Yus nuna yaunchu ujakmiayi."

Tu áarmaiti' tímiayi.

19 "Tuma asamtai, yatsurtiram, wi tájarme: Israer-shuarcha Yus-shuar ajasaru áiniana nu, imiatik awajsachmi. 20-21 Iimiatarum, ashí péprunam Israer-shuar iruntainiam yáunchuyan tuke sáwartin Muisaisa áarmarın jintintainiatsuk. Tuma asamtai, áyatik áatratai ju "Ántar-yus susamu ana nu ini-aisatarum. Ántar-yusan susamu asamtai yajauchiiti. Tura tsanirmawairap. Tura kajemtikramua nu yuawairap. Tura numpasha umarairap." Tu áatratai' tímiayi Jakupu.

22 Nuyá Jesusa akatramurışha Yus-shuaran wáinniusha nuyá ashí Yus-shuaraim enentáimsarmiayi. "Papru Pirnapíjiai wéakui, shuar niijiai nenakar Antiukíanam akupkakai" tiarmiayi. Tuma ásar Jútas Parsapasan, Sérasnasha anaikiarmiayi. Niisha mai uunt Yus-shuar ármiai. 23 Tura niijiai ju papin áarman akupkarmiayi:

"Iisha Jesusa akatramurı tura Yus-shuara wainniurı tura ashí Yus-shuaraitjinia nu, atumin Israer-shuarcha árumna nu, Antiukíanam, Sírianam, tura Sirisianmasha, ju papı akupeaji. 24 Juyá aents ii chichamejainchu atumiın jeartamarai. Túrawar, tsupirnaktin ana nu, tura ashí Muisais akupkamtia nu túratarum, turammiarıme. Nunasha ni chichamejain turarmarmayi. Nu chicham atumsha antukrum nushá enentáimparum "entá nuyanka iturkatjik" tárume. 25 Tuma asamtai nu nekaar, iisha métekrak enentáimsar, jimiara áishman akupkatin anaikiamji. Ju áishman ii aneamu yachi Páprujai Pirnapíjiaisha atumin írmasarat tusar akupeaji. 26 Papru tura Pirnapísha ii Uuntri Jesukrístunam surumakarmiayi, ni takatrısha tsummai aiın túrami tusar. 27 Niijiai Jútassha tura Sérassha akupeaji. Ii chichaajnia nuna niisha ni wenejajı atumin ujatmakartatui. 28-29 Kame túratın asamtai iisha Yusa Wakanıjıjıı ju áartin enentáimsaji. Naman ántar-yus susamu ana nu yuawairap. Tura numpasha umarairap. Kajemtikramu ana nusha yuawairap. Tura penké tsanirmawairap. Nuyasha chikichkia

nú nankaamas tíchattaji. Tura antsu nu iniaisarmeka, pé₂ker átatrume. Ayu, Yus wáitmakarti.” Tu áarman akupkarmiyai.

³⁰ Tura Antiukíanam akupkam wearmiyai. Nu₁ jeawar Yus-shuaran irurar, papin súsarmiyai. ³¹ Tura Antiukíanmaya Yus-shuarsha nu papin áujsar, pé₂ker jintíamu chichaman áarman wáinkiar, ti shiir enentáimsarmiyai. ³² Tura Jútassha, Sérassha, ímia niisha Yus-Chichaman etserin ásar, Yus-Chichaman núkap jintintiawar, Yus-shuaran ikiakármiyai. ³³ Tura nu₁ ishichik tsawant pujusarmatai, Yus-shuarka, pé₂ker waketkitiarum, tiar akupkarmiyai. ³⁴ Tura Séras juáktinian wakerukmiyai. ³⁵ Páprusha Pirnapíjia₁ juakarmiyai Antiukíanam. Niisha chíkich aentsja₁ Yus-Chichaman étseruk pujuarmiyai.

Papru atak Yus-Chichaman ipiampártasa wémiania nu

³⁶ Nuyá ukunam Papru tímiyai Pirnapín “Ashí péprunam iisha Yus-Chicham etserkamaj nu₁ Yusa₁ ii yach₁ ainia nusha urukák pujuinia iyutai” tímiyai.

³⁷ Pirnapí₁ka Juan Márkusan iijja₁ winiti tusa wakerimiya₁. ³⁸ Tura Pampiria nunkanam Juan Márkussa niisháa weu asamtai tura Yusa takatrín iniaisa asamtai, Pápruka ayatniun nakitramiyai. ³⁹ Papru Pirnapíjia₁ ti kakannairar kanakarmiyai. Tura Pirnapí₁ka Márkusan ayá₁ki Chípriniam wémiyai. ⁴⁰ Pápruka Sérasan ayá₁ki wéakui Yús-shuar Yus yáinmakarti tinia akupkarmiyai. ⁴¹ Tura Siria nunkanmaani wekaráktak, Yus-shuaran ikiaká₁rkutak Sirisianam jeamiyai.

16

Páprusha Sérasja₁ Timiutéun júkiarmiania nu

¹ Papru Sérasja₁ Tirpí pepu ír₁kutak Ristra péprunam jeawarmiyai. Tura nu₁ Ristranam Yus-shuaran wáinkarmiyai, ni naar₁ Timiutéu. Ni nukurín₁kia Israer-shuar Yus-shuara₁yayi. Tura ni aparín₁kia Kriaku áentsuyayi. ² Tura Ristra péprunmaya₁ Ikiuniu péprunmayasha Yus-shuar ármia nu, Timiutéu pé₂ker wekaawai, tiarmiyai. ³ Kame Pápruka Timiutéun uyuuntusat tusa wakera asa, Timiutéu apar₁ Kriaku-apachin nekaawarmatai Israer-shuar nu₁ pujuarmia nu yajauch enentáimprara₁n tusa tsupirmamtikiamiyai. ⁴ Tura nuyá Papru Timiutéuja₁ ashí péprunam nu₁ sétur nu₁ sétur wé₁nak Jesusa akatramurísha Yus-shuaran wáinniusha Jerusaré₁num nuik jintintian umiktarum tusa ujarkutak wearmiyai. ⁵ Tu ujamu ásar Yus-shuar nú arant Yúsán enentáimturar kakarmiyai. Tura ashí tsawant kawen₁ki wearmiyai.

Papru iimiarmia nu

⁶ Tura Yusa Wakaní₁ka Páprun Yus-Chichaman Asia nunkanam ujak₁tinian tsan₁katkachmiyai. Tuma asamtai Pirijia nunkanam tura Karasea nunkanam a₁rkutak, ⁷ Misia nun₁ka jeatniunam jeawarmiyai. Túrunawar “Pitínia nunkanam wetai” tiarmiyai. Túras₁ha Yusa Wakaní₁ nuísha wétinian suritkiarmiyai. ⁸ Tuma asamtai Misia nunkanam menantki Truas péprunam pachiniawarmiyai. ⁹ Nu₁ jeawar Papru kashi iimiarmiyai. Masetú₁nia nunkanmaya₁ áishman₁kan wajan wáinmiyai. Nu áishman₁ Páprun chicharuk “Winitritia. Yáin₁tkiamniun” tímiyai. ¹⁰ Nuyán₁ka tu iimiarmatai, wisha Pápruja₁ wetai tusar iwiarnarmiyai. Tura Yus incha nú nunkanam ni chichame₁ etserkat tusa ti nekas untsurmakrin wé₁aji, tími₁aji.

Jiripius Péprunam túrunamia nu

11 Tura nuyañka kanunam enkemprar Truas péprunmaya jíinkir Samutrásia nunkanam jeamiaji. Tura kashin tsawar nuyañka katíarar Niápuris péprunam jeamiaji. 12 Tura Niápurisnumiã náwek Jirípiusnum jeamiaji. Nuí Jirípius péprunmanka Rúmanmaya aents matsamsa ármiai. Tura nú péprusha Masetúnia nunkanam nekas uunt pepruyayi. Tura nuísha seturmaji. 13 Nuyá sáwartin tsawármatai pepru ikiukir entsá supichik wémiai. Yus áujsatniun iruntrarmia nuí pujusar; nuwá iruntrarmia nu Yus-Chicham ujakarmiaji. 14 Nuí Tiatira péprunmaya nuwá, ni naari Ritia wáinkiamiaji. Niisha tarach yamakain péñkeran súriniuyayi. Yúsnasha shiir awajniuyayi. Yus-Chichaman Papru etserkamia nuna niisha péñker anturkamiai. Túman, Uunt Yus Papru chichaamun umirkat tusa ni enentáin takasmiayi. 15 Túruna nú nuwá níniuríjjai imianiayi. Tura nuyasha chichaak “Yus-shuar nekas ajasáí túrutkurmeke winia jeáruí winitiarum” tímiayi. Tura nuí jeawakrin setumtikrampramiai.

16 Tura nuyá ukunam Yus aujsatai tusar wekaamar nuwách nekaamin-iwianch enkemtuamu inkiunmakmiaji. Nu nuwáchikia misatkauyayi. Ni-isha nékamkui nérenniurísha ti kuitriniawarmiai. 17 Tura nú nuwách incha Pápruncha pataaturmamiai. Tura kakantar untsumuk “Ju áishmanísha nekas Úunt Yúsan umirkaru ániawai. Tuma asa niisha atumin uwempratin chichaman ujatmarme” tímiayi. 18 Tura nú nuwáchisha ti núkap tsawant tu wekaimiai. Titmakui, Papru ayanmar iwianchin chicharuk “Jesukristu naaríjjai tájame: jíinkitiá ni enentáiyá” tímiayi. Tutai íwianchkia nú chichamaik jíinkimiai.

19 Tura nuwáchí nérenniurísha, íwianch jíiki awematniun nekaawar, Páprun Sérasnasha kajerak achikiar pepru untri ísarat tusar ajapén júkiarmiai. 20 Tura pepru úuntriin ejeniar tiarmiai “Ju áishmaní Israer-shuar ániawai. Tura in páchim enentáimtikramainiai. 21 Tura iisha Rúmanmaya aents árin, ii túrachminian, iikia asumprachman jintintramainiai” tiarmiai. 22 Tura nuyañka ashí aents Páprun Sérasnasha kajerkararmiai. Túramtai pepru untri chichainiak “Pushirí áitkiarum numíjjai asutiátarum” tiarmiai. 23 Tura nuyá ti asutsua amikiar sepunam enkeawarmiai. Tura sepú-iinian chicharuk “Ti péñker iistá písararain” tiarmiai. 24 Nu chichaman antuk, sepú-iin ti inít awayámiayi, tura nawen numi najanamujai tee chanuntamiayi. Tú tura ikiukmiayi. 25 Tura kashi ajapén Papru Sérasjai Yusan áujainiak kantampriarmiai. Tura chíkich enkeamusha nuna antúu pujuarmiai. 26 Tu pujuiniáj aya aneachma ti kakantar uúrkamiai. Tura sepusha muchitramiai. Túrunamtai sepú wáitirísha ashí urantrarmiai. Tura aents jirujai enkekar jíinkiamusha mash atiniakarmiai. 27 Túrunamtai sepú-iin shintiarmiai. Tura wáitisha mash uranar aan wáiniak, enkeamusha jíiniar shiákchariash tusa ni puniariniak ukuiniak máamattsa pujumiayi. 28 Tura Papru untsuak “Amek yajauch awajmamsaip. Ashí pujuiniaji” tímiayi.

29 Tutai sepú-iincha jinia ekeemak tsékenki wayámiayi. Tura Papru Sérasjai pujamunam kurañki jearmiayi. 30 Tura áá jíiki aniasmiayi “Uunta, ¿warí itíurkattaj uwemprataj tusana?” tímiayi. 31 Tutai niisha tiarmiai “Uunt Jesukristu nekas enentáimustá. Túrakmeke amesha, tura áminiurmesha uwemprattarme” tiarmiai. 32 Tura nuyá ashí ni jeen pujuarmia nunasha Yus-Chichaman ujakarmiai. 33 Tura tsawant irankaj sepú-iincha Páprun Sérasjai numpamnamurín nijiararmiai. Túramtai nuyasha sepú-iincha nuaríjjai uchiríjjai imianiarmiai. 34 Túramtai nuyasha ni jeen júkiarmiai. Tura

nujsha ayurawarmiayi. Tura sepú-iincha niiniurjijai Yus-shuar ajasu ásar ti shiir warasarmiayi.

³⁵ Kashin tsawar pepru uuntri, Páprun Sérasjai akupkata tusar suntaran sepú-iinian akuptukarmiayi. ³⁶ Tura nuyanka sepú-iin Páprun tímiayi “Yamaikia pepru uuntri chichaman akupturmakai, átum wétinian. Tuma asamtai yamaikia péñkerak jíinktiarum” tímiayi. ³⁷ Túrasha Papru suntaran chicharuk tímiayi “Warí, iisha Ruma aents árinin, niisha chichaman iwiart-suk ashí shuar íimiainiain asutiámamji. Túrawar sepunam enketmamji. Tura çurukamtai yamaikia uuk akuptamkataj tusa wakeruinia? Atsá. Antsu uuntcha niñki taar jíirmaktiai” tímiayi.

³⁸ Tutai suntarsha wakеткиar nuna ujakarmiayi pepru úuntriñ. Tutai niisha ti ashamkarmiayi Ruma aentsun nekaawar. ³⁹ Túmak ashamainiak Páprun Sérasan weriarmiayi tsankurturtarum titiai tusar. Nuyasha sepunmaya jíikiar “Yamaikia wáitneasrum wetarum” tiarmiayi. ⁴⁰ Papru Sérasjai nuyá jíinkiar Ritia jeen wearmiayi. Tura Yus-shuaran ikiakárar ikiukiarmiayi.

17

Tisarúnikianam charaatum ajarmia nu

¹ Papru Sérassha wéenak Ampipuris péprunam Apurunia péprunmasha nankaamakutak Tisarúnikia péprunam jeawarmiayi. Nuí Israer-shuara iruntai jeé ámiayi. ² Tura Pápruka nuna tuke túrin asa nu jeanam wémiayi. Tura nuísha menaintiu sáwartin Yus-Chichaman paant etsermiayi. ³ Tura Páprusha Yus-Chicham tana tímiatrusañ jintintiarimiayi. Tura Krístusha wáitias jákatniuyi, tura nuyasha jakayat nantaktiniuyi, tímiayi. Tura nuyasha chicharuk “Wi Jesusnan atumin ujaajrumna nusha Yusa anaikiamurin Kristu tútain tájarne” tímiayi Papru.

⁴ Nuna takui Israer-aents chikishtarchik umikiarmiayi. Túrawar Paprujai Sérasjaisha tsaniñkiarmiayi. Tura Kriaku aencha ti untsurí Yúsan umirkarmiayi. Tura nuwá peñkerí armia nusha nútiksarañ umikiarmiayi. ⁵ Tura Israer-shuarka Yus-shuar ajascharmia nu, Páprun Sérasnasha suiir íisarmiayi. Túrawar chíkich yajauch áishmañ naki yujáu armia nujai chichasar nu peprunam charáa charáa ajarmiayi. Tura Páprun Sérasnasha achikiar aentsu úuntriñ suruktai tusar Jasunka jeen árenkarmiayi. ⁶ Túrasha Páprun Sérasnasha awetrar, Jasunkan tura chíkich Yus-shuarnasha achikiar japirkutak júkiarmiayi. Tura pepru úuntriñ juñiak tiarmiayi “Ju áishmañsha ashí nunkanam charaatum ajá wekarmia nu yamaikia tímiajai tarutramarji. ⁷ Tura ju Jasun ni jeen itiaarmiayi. Tura niisha ashí mash Rúmanmaya uunt akupniú chichamen nakitiainiawai, tiarmiayi. Tura jes, chíkich akupin awai, tuiniawai. Niisha Jesusaiti, turamainiaji” tiarmiayi. ⁸ Nu chichaman antukar, aents nuí pujuarmia nu, úuntriimiak charaatum ajarmiayi. ⁹ Tura Jasun chíkich Yus-shuarjai Papru nekas awemattaji tusar, paj, kuit ikíuaji, tiarmiayi. Nuna takui pepru uuntriñ nin akupkarmiayi.

Piríanam

¹⁰ Nuñkia nú kashi Yus-shuar Páprun Sérasnasha Piría péprunam akupkarmiayi. Tura nuí jeawar Israer-shuar iruntai jeenam wearmiayi. ¹¹ Piríanmaya aentska Tisarúnikianmaya áentsjainkia nankaamas péñker enentáimkia ármiai. Tuke enentáijijai Yus-Chichaman ántiarimiayi. Túrawar tuke tsawant imia niñkisha Papru tana nuna nekasashit tusar Yusa papirin ii

wearmiayi. ¹² Tuma ásar untsurí shuar Yus-shuar ajasarmiayi. Tura Kriaku aents nuwá penkerí armia nusha áishmansha umikiarmiayi. ¹³ Túrasha Tisarúnikianmayá Israer-shuarka Papru Yus-Chichaman Piría péprunam éterun antukar nuí weriar charaatum awajarmiayi. ¹⁴ Túmainiakui Yus-shuar Páprun árutsk nayaantsanam akupkarmiayi. Tura Séraska Timiutéujai nuín Piríanam juakarmiayi. ¹⁵ Tura Páprun nemariarmia nu Atenas péprunam nin ejejarmiayi. Tura niisha waketainiakui, Papru chichaman akatar akupkamiayi, Sérassha Timiutéusha wárik winiartí tusa.

Atenasnum

¹⁶ Tura Papru Atenas péprunam pujus Sérasnasha Timiutéuncha nákamiayi. Nuí nú péprunam ántar-yus ti írunkui Páprusha kúntuts enentáimmiayi. ¹⁷ Tuma asa Israer-shuar iruntai jeñam Israer-shuarjai tura chíkich aents Yúsán enentáimtiarmia nujai chichasmiayi. Tura tuke tsawant pepru ajapén aentsjai inkiunaikiar chichasarmiayi. ¹⁸ Nuyá chichaman jintin chíkich naari, ipikiuriu, armia nu, tura chikichcha, ni naari, estuikiu, armia nusha Páprun áujmatsarmiayi. Chikichcha tiarmiayi “Imiá chichamtincha jusha waritramtajik.” Tura chikichcha tiarmiayi “Yajaya yusnan etserniuchuashit.” Páprusha Jesusa túrunamurín tura aents jakamunmayá nantaktinian étserkui nuna tiarmiayi. ¹⁹ Nuyañka aents iruntainiam, naari Ariupaku támanum Páprun júkiarmiayi. Nuísha tuke irunin ármiai. Nuí Páprun aniasarmiayi “Iisha ame yamaram támena nu nekaatai tusar wakeraji, tiarmiayi. ²⁰ Amesha nusháa chicham jintinaitme. Túmaitkiui ju chichamsha warintuak tusar nekaatai tusar wakeraji” tiarmiayi.

²¹ (Atenasnumiá aencha tura chíkich nunkanmayá shuar nuí pujuarmia nusha aya yamaram chicham amia nunak ántiarmiayi. Tura aya nunak áujmatiarmiayi.) ²² Nuyañka Papru Ariupakunam ajapén wajaki tímiayi “Atenasnumiá áishmantíram, wi nékajai, atumsha atumi yusrí ainia nuyá tsurakchamniaitrumé, tímiayi. ²³ Kame wi nuik atumí yusrí enentáimtutainiam ístaj tukaman nuí jeachin iwíaramun, JU NEKAACHMA YUSNAITI, tu áarman wáinkiamjai. Wátsek, ju Yus átum nékachatrum tikishmatrumna nuna ujektajrumé’ tímiayi.

²⁴ ‘Nekaatarum, nu Uunt Yuska ashí nunkan tura nuí írúnna nuna najanaiti. Tura Niisha nayaimpin nunkanhá nérenniurinti. Tura aents najanamu jeñam nú Yuska pujuchuiti. ²⁵ Niisha aents yáinkiat tusa atsumatsui. Warí, imia-nínki Niisha ii iwíaaakmarín, ii mayattairíncha tura ashí írúnna nunasha súrantsujik, tímiayi. ²⁶ Nekaatarum. Nu numpanmayanak ashí áentsun najanamiayi ashí nunkanam matsamsarat tusa. Tura Yuska ii tsawantrín nekapmaiti; ii pujustinniasha nútiksán nakakmiayi. ²⁷ Winia éátkar wáitkiar tusa Yus nuna túrayi. Túrasha Yus jeashbaka pujurtamtsuji, tímiayi. ²⁸ Jes, iisha Yusjai iwíaaakji. Yusjai nuichitijai. Tura Yusjai ii kakarmari takakji. Nútiksán atumí papí-aintrí tíchamka “Ashí incha Yus najatmaitji.” ²⁹ Tura iisha Yus najatma asakrin kuri najanamusha, yúsaiti, tu enentáimsasthinaitji, tímiayi. Tura kuit-yussha, kaya-yussha aents enentáimsar najanamuka, yúsaiti tu enentáimsasthinaitji, tímiayi. ³⁰ Aents Yúsán nékainiachuk túrawarmiania nuna Yuska yáunchuka pachischamiayi. Túrasha yamaikia Yus ashí aentsun chicharuk “Tunaaruminiá enentáimpratarum” túramji, tímiayi. ³¹ Yuska áishmankan anaikiaiti. Nú áishman ashí aentsti, yáki penkeran túriniait, yáki yajauchin túriniait núnaka nekarmattaji. Nú áishman Yus akupkamun tuke enentáimtakui Yus nin

anaikiaiti. Tura tsawant nú túrunatin átatna nuna Yus Nínki achikiuiti. Túrasha nekas anaikiajai tusa, tura ashí áentstiram nekaatarum tusa nú áishmankan jakamunmaya iniantkimiayi” tímiayi Papru.

³² Tura nuna jakamunmaya nantaktinian áujmatun antukar chikichcha wishikiarmiayi. Tura chíkich “Yamaikia máakete. Antsu chíkich tsawantin antukmí” tiarmiayi. ³³ Tutai Papru iniaisamiayi. ³⁴ Tura chíkich aentska Papru táman umikiar nin nemarsarmiayi. Nuísha Tiuníseu páchitkiauyayi. Niísha Ariupaku áentsuyayi. Tura nuyasha nuwa, ni naari Támaris, tura chíkich aencha nútiksarā nemariarmiayi Páprun.

18

Kurintiu péprunam

¹ Nuyanka Papru Atenas péprun ikiuki Kurintiu péprunam wémiayi. ² Tura nuí Israer-shuaran ni naari Akiran wáinkiamiayi. Akiraka Puntu nuñkanam akiiniauyayi. Tura ukunam Itiaria nuñkanam pujai uunt akupin Krautiu ashí Israer-shuaran Ruma péprunmaya awemarmiayi. Rúmaka Itiaria nuñkanmaiti. Nuí awemamu ásar Akira Kurintiunam nuik támiayi nuwe Pirisírajai. Tura Pápruka Akiran chichastaj tusa werimiayi. ³ Akirasha Páprusha mai juna takau ármiai, tarach ti núparman jeā najantain najanin ármiai. Tuma asantai Papru Akirai seturmiayi nu takat túrawartai tusa. ⁴ Tura tuke sáwartin Papru Israer-shuar iruntai jeān wéuyayi. Nuísha Israer-aentsun Kriaku-aentsnasha nútiksarā Yus-Chichaman ujakar enentáimtikrarmiayi.

⁵ Tura nuyá Séras Timiutéujai Masetúnianmaya táarmatai Pápruka mijiatrutsuk Yus-Chichaman éteruk “Yusa anaikiamurj Kristu, atum nákarmana nu Jesusaiti” tímiayi. ⁶ Tura támaitiat nú chichaman nakitiarmiayi. Túmainiak Páprun katsekkarmiayi. Tuma asantai Papru, nuñkia ikiaujrume tusa, ni pushirjīn pear tímiayi “Atumek makuumarme. Tura wikia Yusai makuumatsjai. Yamaikia Israer-shuarcha ainia nuna Yus-Chichaman ujakartaj tusan werajai” tímiayi.

⁷ Tura nuyanka Israer-shuar iruntai jeānmaya jīinki, Yúsan enentáimtin áishman Justu jeēn wémiayi. Ni jeēnka Israer-shuara iruntai jeēn ayamach pujumiayi. ⁸ Israer-shuar iruntai jeā chicharniurj, Krispu, Uunt Jesusan nekas enentáimturmiayi. Túruna nuarjijai uchirjijajsha Yúsan umirkamiayi. Tura chíkich aencha Kurintiunmaya armia nu nútiksarā Yus-Chichaman antukar, Jesusan enentáimtusar imianiarmiayi.

⁹⁻¹⁰ Nuyá Uunt Yus Páprun mesekran ipiatkiamiayi. Chicharuk “Penké ímiatik awajtamsachartatui Wi ámijjai pujakui. Ju péprunmasha untsurj aents Winia ajasartin írunui. Tuma asantai ashamsuk winia chichamur tuke etserkata” tímiayi Yus.

¹¹ Tura nuí Kurintiu peprunam jimiará uwí ejesattuk Yus-Chichaman éteruk pujumiayi. ¹² Tura Kariun, Akaya nuñka akupniurj anaikiamu ai, Israer-aents Páprun kajerkarmiayi. Tura kajerainiak akupniunam irunturarmiayi. Túrawar Páprun júkiar ejeniarmiayi. ¹³ Tu túrawar akupniun chicharainiak “Ju áishman Yúsan umirkatniun Muisais akupkamia núnaka íkias ausháa jintiawai” tiarmiayi. ¹⁴ Tura Páprusha chichastaj táunak, Kariunka Israer-shuaran tímiayi “Júsha nekas tunáa túrakuñkia, tura akupniun umirchakuñkia, tárugna nuna anturkaintjarne. ¹⁵ Túrasha aya chichamnak tura aya náarjiniak atumí uuntrj akupkamia nunak tau asantai, atumek nuámtak

ístarum tájarme. Wikia nu chichamnum pachinkiatniun nakitiajai” tímiayi. ¹⁶ Taku aa jíkmiayi. ¹⁷ Tura nuyanka Kriaku aents Israer-shuar iruntai jea úntrin Sústinisian achikiar awatiarmiayi akupniusha ímmianuman. Túrasha akupin Kariunka túranak penké pachischamiayi.

Papru Antiukíanam waketki, nuyá atak Yus-Chichaman ipiampartasa wémiania nu

¹⁸ Tura ni jeen wakеткиarmatai, Papru nu péprunam untsurí tsawant pujusmiayi. Tura nuyasha ukunam Yusaj yachi ármiania nuna áujas ikiuak Pírisirajai ni aishri Akirajai Senkrea péprunam wearmiayi. Nuí Israer-shuar túrutain umiak Papru ni intiashin awampramiayi, nuik Yúsan tímiaj nuna yamá umíajai tusa. Nuńkia kanunam enkemprarmiayi Siria nuńkanam waketkítai tusar. ¹⁹ Tura nuyá Ipiisu péprunam jeawar Pápruka Pírisíran tura Akiran ikiukmiayi. Tura Israer-shuar iruntai jeanam wayá Israer-shuar irunar pujuarmia nujai chichasmiayi. ²⁰ Tura niisha Páprun juin pujustá tusar seawarmiayi. Túrasha támaitiat, tujintiajai, tímiayi. ²¹ Nuyanka áujas ikiuak “Wisha Jerusarénnum námper átatna nuna pachíntiuktiniaitjai. Tura Yus akuptakuńkia atak tatajai atumin ístaj tusan” tímiayi. Tura kanunam enkemar Ipiisiumaya jínkimiayi.

²² Nuyá Pápruka Sesaria péprunam jeá, nuyanka Jerusarénnum wémiayi, Yus-shuaran nuí áusataj tusa. Tura nuyá Antiukíanam wémiayi. ²³ Tura Antiukíanam ishíchik pujus ataksha weak Karasea nuńkanam tura Pírijia nuńkanmaani wekaráktak wémiayi. Tura weak Yus-shuar matsamarmia nuna chicharak ikiakáarmiayi.

²⁴ Tumáa pujai Arijiántria péprunmaya Israer-aents Apurus Ipiisu péprunam jeamiayi. Niisha Yusa yaunchu papirin ti penker nekaamiayi. Etserkatni-uncha ti nékauyayi. ²⁵ Uunt Yus tímia nunasha unuimíátrauyayi. Tura tuke enentáijjai chichasmiayi. Jesusa túramurin penker jintinniuyayi. Túrasha aya Juan imiakratmanak nekaamiayi. ²⁶ Ju Apurus arantutsuk Israer-shuar iruntai jeanam chichamiayi. Tura Pírisíra Akirajai ni étserman anturkar, nincha akanki júkiar Yusa chichamen ni nekaachmia nuna núkap jintin-trarmiayi.

²⁷ Nuyá ukunam Apurus, Akaya nuńkanam wétaj takui, Ipiisiumaya Yus-shuar yáinkiar papí áarar atakas akupkarmiayi. Nú áentsnum penkerak jeat tusar túrawarmiayi. Tura Akayanam jeá, nú áentsun Yusa waitnenkratairjijai uwempraru ármia nuna ti yáinkiarimiayi. ²⁸ Tura Apurus Israer-aentsjai paant chichasmiayi. Túrasha Yusa Papirijjai, Jesussha nekas Yusa anaikiamurinti tusa paant jintiak nincha nupetkamiayi.

19

Papru Ipiisiuma jeamiayi

¹ Tura Apuruska Kurintiunam pujai Pápruka náinniumaani wekaráktak, Ipiisiuma jeamiayi. Tura nuisha Yus-shuaran wáinkiamiayi. ² Tura aniasmiayi “Atumsha Yus-shuar ajasmarmena nuí, ¿Yusa Wakaní atumí enentáin enkemturmakaitrum?”

Tutai niisha tiarmiayi “Atsá. Iikia nuka penke áyatkisha ántichuitji Yusa Wakaní awai támaka” tiarmiayi.

³ Tutai Papru aniasmiayi “Entá, ¿nuikia atumsha warí enentáimsarmea imianmiarum?” tímiayi.

Tutai niisha tiarmiayi “Juan jintintramamaj nu iisha enentáimsar imianmaji” tiarmiayi.

⁴ Tutai Papru tímiayi “Juansha, tunaarminia enentáimprarum imiantiarum, tíchamka. Nuyá tíchamka, winia ukuru winittiana nu nekas enentáimustarum. Niisha Jesus Yusa anaikiamurinti, tu ujatmakchamka” tímiayi Papru.

⁵ Nuna antukar niisha Uunt Jesusa náarin enentáimtusar ataksháa imianarmiayi. ⁶ Tura Papru ni uwejejai nin antinmatai Yusa Wakanj tarurarmiayi. Túram chíkich chichamjai chichasarmiayi. Túrunawar Yus-Chichaman etseriarmiayi. ⁷ Nusha tuse (12) áishman áirmiayi.

⁸ Tura nuisha menaintiu nantutin Papru Israer-shuar iruntai jeanam weri Yusa akupeamurin pachis arantutsuk etsermiayi. Túrak nú áentsun ujaak Yúsna nekasaiti tu enentáimtikrarmiayi. ⁹ Tura chíkichka ni enentáin tu iki-atsúárarmiayi. Túrunawar umiktinian penké nakitiainia ásar aents ántamunam Yusa jintin penké yajauch chicharkarmiayi. Tuma asamtai Papru Yus-shuarnaka akanki yaruak Tiranu iskuirarijn tuke tsawant Yus-Chichaman ujaarmiayi. ¹⁰ Nuna túruki jimiará uwí etserkamiayi. Túramu asamtai ashí Asia nunkanmayá aents Israer-shuar tura Israer-shuarcha Uunt Jesusa túramurin antukarmiayi. ¹¹ Tura aentsti túrachminian túrat tusa Yuska ni kakarmarjn Páprun susamiayi. ¹² Jáanchniasha pushincha Papru antinman júkiar, nánkamas jaa shuaran ejetim, nú jaa shuarsha nuna antinmiar penker ajaarmiayi. Iwianchrukusha nuna antinmiar, íwianch jíinkimtai ankant ajaarmiayi.

¹³ Tura chíkich Israer-aents uwishin áirmiayi. Tura niisha chíkich chíkich péprunam wear iwianchrukun iwianchrin jíirki akuptin áirmiayi. Tuma asa niisha Jesusa náaríjiai iwianchin jíiktiai tusar, iwianchin chichartuiniak “Nu Jesus Papru ujaana nuna náaríjiai jíinkitiarum tájarne” tiarmiayi. ¹⁴ Tura Israer Patri uuntri Eswia náartin, siati uchirj ármia nu, nuna túriarmiayi. ¹⁵ Túrasha Jesusa náaríjiai jíinkitia, tuiniakui, iwianchcha tímiayi “Jesusnaka nékajai. Tura Pápruncha nékajai. Tura atumsha, zyátsukaitrum?” tímiayi. ¹⁶ Nuna tinia iwianchruku áishman tsékenki nú áishman kanakam katsumak nupetkarmiayi. Túram ti katsumam niisha misú tura numpamnawar jíinkiar pisararmiayi. ¹⁷ Nusha Ipisiu péprunam túrunamiayi. Túrunamtai Ipisiu péprunmayá Israer-shuarsha tura Israer-shuarchasha nuna túrunamun nekaawar ti ashankarmiayi. Tura Uunt Jesusa náarin shiir awajsarmiayi.

¹⁸ Túmainiai untsurj shuar Yúsna umirkaru Yus-shuar ajatsuk tunáa túrawarmia nuna paant ujarkarmiayi. ¹⁹ Tura untsurj uwishniunawarmia nu, wawekratai papí ármia nuna itiararmiayi. Itiar, júka iniaiyaji tusar, ashí ímianiajn áesawarmiai. Nú papí áesawarmia nuna kuírisha senkuenta mir (50.000) nankaamasauyai. ²⁰ Tu túrunamtai Uunt Yusa chichame pampanki tura nupetmaki wémiayi.

²¹ Tuma asamtai nuyasha Pápruka Masetúnia nunkanam Akaya nunkanmasha irautjai tu enentáimsamiayi. Tura nuyasha Jerusarénum waketkitjai, tímiayi. Tura nuyá ukunam Ruma péprunmasha wetajai, tu enentáimsamiayi. ²² Masetúnia wétin asa Papru ni tsaniakmarjn Masetúnia nunkanam emka akupkamiayi. Timiutéun Erastujai akupkarmiayi. Tura ninikia Asia nunkanam seturmiayi.

Ipisiunam ti charaatum ámiania nu

²³ Pápruka tuke Ipisiunam pujai, nuyá aents Yus-Chichaman nakitiainiak charaatum ajarmiayi. ²⁴ Iis, nuj Ipisiunam kaya-yusa jee ámiayi. Nu yus

núwəuyayi, Tiana naartin. Tura áishman, Timitriu naartin, nú jean naku-
mak uchichin najanniuyayi kuitjai. Tura niisha nú takatjai ti kuítrintin
ajasmaiyi. Tura chíkich áishman nú takatan takarmia nunasha ti kuítrintin
awajsarmiyai. ²⁵ Timitriusha níjjai takarmia nuna ikiaanak, chikichnasha
níjjai métek-taku takarmia nunasha ikiaanak níjjai charaatum ajarmiyai.
Timitriusha tímiyai “Winia írutramutiram antuktaram. Iisha ju takat takaajnia
jujai ti kuit achíatsjik. ²⁶ Tura atumsha ju Papru wáintrumna nu tura ántarmena
nu chichaak “Ashí aents najanamu yuska ántar ániawai” tatsuk. Nuna tau
asa, ju Ipisiunam, tura arant ashí Asia nunkanam, ni yúsrin iniaisarat tusa
enentáimtikrarai. Tuma asantai untsurí aents, ii yusrí Tiánan ikiuniak,
Papru tana nuna umirainiatsuk. ²⁷ Papru tu étserkui, iisha ititurchat pu-
juschattajik. Kuit ii achiaj nuka menkakashtatuak. Tura nú arantcha ii yusrí
Tiana jeen shuar iniaisachartatuak. Tura nuyá Asia nunkanmayasha tura
ashí nunkanmayá aencha, ii yusrí Tiana shiir awajainia nuna yapajáwar
aun nakitrachartatuak” tímiyai Timitriu.

²⁸ Nuna antukar aencha ti kajekar charaatum ajarmiyai. Túmainiak “Ipisiu
shuartikia, aya Tianak wakeraji” tu untsummiarmiyai.

²⁹ Nuñkia aents páchim enentáimprarmiyai. Túmainiak Masetúnianmayá
Kayuncha Aristárkuncha Páprun nemarín ármia nuna achikiar japirkutak
iruntai jeanam júkiarmiyai. ³⁰ Tura Pápruka iruntai jeanam wayá chichas-
taj taun, nuyá Yus-shuar ármia nu, nuna suritkiarmiyai. ³¹ Tura Asia
nunkanmayá uuntri, Páprun amikri ásar, añkia wayawain tusar chichaman
akuptukarmiyai. ³² Túrasha irunar pujuarmia nu, páchim enentáimprar,
chíkichka nusháa untsummiarmiyai. Tura chikichcha nútiksarañ ausháa
untsummiarmiyai. Tura chíkichka ti untsurí, nekaachar “wariniak iruntu-
rara” tiarmiyai. ³³ Chíkich nuí wajarmia nu charaatum amia nuna Israer-
shuaran Arejántrun jintintr eem shitiawarmiyai. Arejántrusha Kayun
tura Aristárkuncha ayampruktinian wakerak takamatsatarum tusa uwejen
takuimiayai. ³⁴ Túrasha aents iruntrarmia nu, júka Israer-shuaraiti tusa
nekaawar, nú arant charaatum ajainiak “Ipisiu shuartikia aya Tianak waker-
eraji” ímia-imiatainiakua tí nukap pujursarmiyai.

³⁵ Ipisiu pepu papí-aintrisha áentsun ítiatmamantik tímiyai “Ipisiu shuártiram
antuktaram. Ii uunt yusrí Tiana jeé íistinia íichukaitiaj¹. Tura ni nakumka-
murjsha nayaimpinmayá iniarmiania nusha íischatniukaitiaj¹. Tura nunasha
ashí aents paant nékainiatsuk, tímiyai. ³⁶ Warí, núnaka ashí aents nékainia
asantai atumsha itiatkatarum. Túrurum enentáimtsuk yajauch túrawairap,
tímiyai. ³⁷ Ímiatarum. Ju áishman átum itiarumna nu, ii yúsrin yajauch
chicharkacharai. Tura ni jeen yajauch awajsacharai. ³⁸ Wats, Timitriu
tura níjjai takainiana nu tunáa túramun ujaktai tusar wakeruniakka pepu
penkerin werishtinkiait. Nuñkia máimtek iwiainiakartí. ³⁹ Tura chíkich
chicham ákuñkia péñker iruntrarum iwiatarum. ⁴⁰ Kame ju yamá
túrunamun nekaawar Rúmanmayá kapitíán “Ii uunt kapitíántri yajauch awa-
jsatai tusarum túrachurmeash” turamchatjias. Warí, niisha “¿Urukamtai
charaatum ajarum?” takuisha, áimkiatin penké tujinkiattaji” tímiyai. ⁴¹ Tura
papí-aint nuna tuasua amik “Áukete. Wétarum” tímiyai.

20

Papru Masetúnia nunkanam Krisia nunkanmasha wémania nu

1 Charaatum ajasua amikiarmatai Papru Yus-shuaran untsuk Yusnan jintintrataj tusa ikiaankarmiayi. Tura áujas ikiuki Masetúnianam wémiayi. 2 Nú nunñkanam wekaráktak, Yus-shuaran jintintrar ikiakárrarmiayi. Tura nuyasha Krisia nunñkanam jeamiayi. 3 Nuñ menaintiu nántuk pujusmiayi. Tura nuyañka kanujají Siria nunñkanam wétasa pujus Israer-shuar chícham jurusman anturmakak “antsu nunñkan Masetúnianmaaní wetajai” tímiayi. 4 Tura Piríanmaya áishmañ Súpater naartin Páprun atampriamiayi. Tura Tisarúnikianmaya Aristárkusha Sekuntusha Tírpinmaya Kayusha Timiutéusha Asianmaya Tíkikiusha, Trújimiusha ashí nu shuar Jiripius peprunam Páprun atampriamiayi. 5 Túrawar niisha emki wear Trúas péprunam jeawarmiayi. 6 Tura iisha wakapruachu tanta yutai jisat amuukamtai, iisha Jiripius péprunmaya jíinkir, kanunam enñkemprar Masetúnia nunñkanmaya jíinkimji. Tura senku tsawant nanñkaamasman emki wearmia nu amaiyankarmiayi Trúasnum. Tura nuñsha siati tsawant pujusarmiaji.

Trúas péprunam túrunamia nu

7 Tura tumiñtin kíarai Jesukrístu enentáimtusar yurumátaí tusar iruntrarmiaji. Tura Papru Yus-shuaran jintintramiayi. Kame Pápruka kashinkia wétin asa chichaa-chichaakua kashi ajapén ejemiayi. 8 Tura yakí menaintiu pátaranam, tesaamu ámia nuñ iruntrarmiaji. Nuñsha ji ekemarma untsurj irunmiayi. 9 Tura nuñsha natsa Eutikiu, áañkamunam ayamas pujusmiayi. Tura Papru ti esaram chichaakui nu nátsasha karj pujumiayi. Tumáa pujus kanaki yakí pátanmaya akaiki iniaamiayi. Tura penké jakan júsarumiayi. 10 Tura Papru akaatuki tsuntsumpra miniakkamiayi. Tura Yus-shuaran chicharainiak “Ashamkairap. Ataksha iwiaakui” tímiayi. 11 Nuyá ataksha Papru wakamiayi. Tura tantan puukar yurumáwarmatai, tuke chichaa-chichaakua tsawantmarmiayi Papru. 12 Eutikiuncha iwiaakun ni jeen júkirmiayi. Tura ashí aents shiir enentáimsarmiayi.

Miritiunam wearmiayi

13 Wats, Papru Asuñ péprunam nunñkan we jeatajtsa wakerimiayi. Tura incha, átumka kanunam wétarum, turamkurin, ilkia emkir wémaji Asuñnum. 14 Nuñ Asuñnum inñkiunaikiar, Páprusha kanunam enñkempramtai, Mitiríniniam jeamji. 15 Tura nuyá jíinkir, kashin tsawarar Sámus péprunam jeamji. Tura nuyañka Trujiriunam jear ayampjamji. Nuyasha kashin tsawarar Miritiunam jeamji. 16 Pápruka Jerusaréñnum wari wétajtsa wakerimiayi, pinitiustís naartin jístatin pachiiñkiataj tusa. Tuma asamtai, Asia nunñkanam ti núkap pujustinian nakitiak “Ipisiunam wéhattajai” tímai.

Papru Ipisiunmaya úuntrin áusamiania nu

17 Túrusha Papru tuke Miritiunam pujus, Ipisiunmaya Yus-shuara úuntrin winitiarum tusa untsukarmiayi. 18 Ni taarmatai Papru tímiayi “Atumsha wi Asia nunñkanam pujusan itiura túraj nu nékarme. 19 Atumjají tuke tsawant pujumaj nuñ, nanñkaamantuchu enentáimtumasán, úutchim winia Úuntrun takatrin takasmiajai. Tura Israer-shuar yajauch awajtustinian wakerutainiañ tuke takasmiajai. 20 Ashí péñker ana nu nekaatarum tusan mijjatrutskuj jintintiamjarne. Iruntramarmena nuñ tura añkant añkant atumí jeen pujumarmena nuñsha Yus-Chichaman ujakmajrume, tímiayi. 21 Tura Israer-shuarnasha Israer-shuarchancha nútiksanak, enentai yapajjárúum Uunt Jesukrístu umirkatarum, tímiajrume. 22 Tura yamáí Jerusaréñnum wéajai, Yusa

Wakaní túrutkui. Nuísha túrunatana nunasha nekamatsuk wéajai. ²³ Tura Yusa Wakaní iniakturkui júna nékajai, ashí pepru wi jeattajna nuí enketátai tusar nákarainiawai. Tura ti wáitsatniun nekapsattajai. ²⁴ Kame wikia jákashtajash. Túrusha warí winia itiurtawa. Wikia Yusa jintiín warasan wekasataj tusan wakerajai. Yusaí wea-wéakuan jáakun iniaisataj tajai. Tura nuyá takatan Uunt Jesus surusmia nuna péñker amuktaj tusan wakerajai. Jes, Jesus chichartak “Yus wáitnenkartana nú chicham tuserkata” turutchamka’ tímiayi.

²⁵ “Tura, yatsurtiram, ashí Yúsnan atumin paant ujakjarme. Yamaikia wíniaka atakka wáitkiashtatrome. ²⁶⁻²⁷ Nekaatarum, ashí Yusa wakermurín wisha penké úrtsuk ujakjarme. Tuma asamtai atumin titiajtsan wakerajrome, chikichík shuara wakaní jinium wéakuisha wikia penké makuumashtajai. ²⁸ Tuma asamtai emka atumek ímiastarum. Túrarum nuyá chíkich Yus-shuar íistarum. Yus-shuaran wáinin ajastarum tusa, Yusa Wakaní achirmakurme. Yus-shuar ainia núnaka ni numpejain Uunt Jesus sumakchakait. ²⁹ Kame wi wématai, chíkich táartatui. Núnaka nékajai. Tura niisha, Yus-shuaran amukartajtsa wakeriartatui, uunt yawasha murikiun amuinia áintsan. ³⁰ Túrusha nemartusarat tusar wakeruiniak atumjinián wait chichaman unuikiartin wantinkiartatui. ³¹ Tuma asamtai yatsurtiram, aneartarum. Wisha menaintiú uwitin tsawajsha káshisha úutchim ankant ankant unuiniamajrumna nu kajinmatkiirap’ tímiayi.

³² Pai, yamaikia, yatsuru, Yus yáinmakarti. Yusa anenkrattairí nékaitrumna nú chichamsha kakarmaiti. Nú chicham átum katsuqarar kakaram wekasatniun yainmakarti. Kame nú chicham atumí enentáin pujakuí, Yus ni shuarin matsamsatniun anajmatramia nuí pachiiinkiatarme. ³³ Wats, wisha chikichík shuara kuítrín wariríncha wakerutkachuitjai. ³⁴ Antsu winia uwejrui takasan wi atsummiaj nuna sumarmakmajai. Tura winia írutkamuru atsumamuríncha wiki sumakmiajai. Nuka paant nékarme. ³⁵ Kame átum takasrum, atsumainia nusha yáintarum tusan jintintiajrome. Wats, Uunt Jesusa chichame enentáimsami. “Achána nujaínkia nankaamas, súana nuka shiir waraawai” tíchamka’ tímiayi.

³⁶ Nuna tuasua amik Papru tikisharmiayi. Tura ashí niijai iruntrarmia nú shuar Yúsan áujarmiayi. ³⁷⁻³⁸ Tura Papru nuik chichaak “Atakka wáitkiashtatrome” tiniu asamtai, ti kúntuts pujuiniak, úutchim Páprun miniak-sarmiayi. Túrawar kanunam ejeniarmiayi.

21

Papru Jerusarénum wémiania nu

¹ Tura nuyá Yus-shuar aujsa ikiukir kanunam enkempramji. Tura ínkiuasmak Kus péprunam jeamji. Tura kashin tsawarar Rútas péprunam jeamji. Tura nuyanka Patara péprunam jeamji. ² Tura nuí Pataranam pujusar, chíkich kanu Piniisia péprunam wea wáinkiamji. Túmakui nuí enkemprar wémaji. ³ Nuí wésar Chipri nunakaka wáinkiamji. Chíprika menanmaaní aa ikiuakur Sírianam jeamji. Kánuka Tiru péprunam jeá pujustiniuyí, káarak núkap ikiuktin akui. Tuma asamtai iisha Tirunam jear kanunumaya jáinkir péprunam wayamji. ⁴ Nuí Yus-shuar wáinkiar nuín siati tsawant pujusmaji. Tura Yus-shuaran Yusa Wakaní ujakam Páprun chicharainiak “Jerusarénumka wéchatniuitme” tiarmiayi. ⁵ Tura siati

tsawant nan̄kaasmatai j̄in̄kimji. Ashí Yus-shuar ármia nu núwentuk uchir-tiuk nemartamkamji, péprunam inian̄katmaktiai tusar. Káanmatkanam jear tikishmarar Yus áuj̄samji. ⁶ Tura nu amikiar nuin̄kia áuj̄naisar ikiukiarmaji. Tura iikia kanunam en̄kemprakin̄ niñkia ni j̄eñ waketkiarmiayi.

⁷ Iisha Tirunmaya entsak wea-wéakuar Turumáitianam nuñ̄ j̄in̄tramji. Tura nuñ̄ jearsha Yusaj̄ yachí ármia nu chichasar nuñ̄ chikichkí tsawant puj̄umaji. ⁸ Kashin tsawarar nuyá j̄in̄kir nun̄kan̄ weri Sesaria péprunam j̄eamji. Nuñ̄ Jiripi j̄eñ jear puj̄umaji. Jiripikia Yus-Chichaman etserni-uayai. Nuik Jerusaréñnum siati áishman̄kan Yusa takatr̄in wáinkiarat tusar anaikiarmia nú Jiripiiti. ⁹ Jiripisha kuaru nawantr̄in yarumkauyayi nu-atnakchan. Niisha Yusa chichamen̄ etserin ármiai. ¹⁰ Tura iisha Jiripi j̄eñ wárum tsawantak pujarin̄ Jutía nun̄kanmaya aents Yusa etserniur̄i, Akapu náartin̄ támiayi. ¹¹ Niisha taa Papru emenmamkar̄in achikmiayi. Tura achik niñki ni nawen tura uwej̄encha j̄in̄kiamamiayi. Nuna tura tímiayi “Yusa Wakan̄i tawai, j̄una emenmamka nérenniur̄in Israer-aents j̄útkia j̄in̄kiáwar Israer-shuarchanum surukartatui, tawai” tímiayi. ¹² Iisha nu antukar Papru tímiayi “Jerusaréñnumka weep.” Sesarianmaya Yus-shuarsha núnisan̄ Páprun tiarmiayi. ¹³ Tutai Papru tímiayi “¿Urukamtaí útkuram winia enentáiruñ̄ kúntuts awajtarum? tímiayi. Wi Jesusna asamtai Jerusaréñnum j̄in̄kiataniakuisha mántuiniakuisha ashamsaj̄ai” tímiayi. ¹⁴ Tura iisha Papru emetatai tukamar tuj̄inkiar “wats, nuin̄kia Uunt Yus wakera nu tímianak atí” tiarmaji.

¹⁵ Nu tiri iniaisar iwiarnarar Jerusaréñnum wémaji. ¹⁶ Chíprinmaya yaunchu Yus-shuar Manasuñ̄ ni j̄eñ Jerusaréñnum takakuya nuna ikiat-mastinian wakerimiayi. Tuma asamtai Sesarianmaya ishichik Yus-shuar nemartamainiak Manasuñ̄nasha júkiarmiayi.

Papru Jakupu j̄eñ irastaj̄tsa wémiania nu

¹⁷ Tura iisha Jerusaréñnum jeawakrin, nuñ̄ warasar Yus-shuar ti shiir áuj̄tamsarmiji. ¹⁸ Tura kashin tsawar Papru íimiak Jakupu j̄eñ wémiaji. Nuñ̄sha Yus-shuara uuntr̄i matsamarmiayi. ¹⁹ Páprusha áuj̄as amik, Israer-shuarchanum ni étermaj̄ai Yus túramia nuna yámankamtaikniumiá j̄ukí chikichimias ujakar ujakar awajsamiayi. ²⁰ Papru taman antukar “Yus ti péñkerchakait” tiarmiayi. Tura Páprun ju chichaman tiarmiayi “Támena nu péñkeraiti, yatsuru, túrasha Israer-shuar timiá untsur̄i Yus-shuar ajasu áiniyat, “ashí Muisais akupkamia nu umiktinaij̄i” tuiniawai. ²¹ Nú arant yajaya aents taar, chichartamainiak “Pápruka nusháa jintintui, turamainiawai. Israer-shuar ch̄ikich nun̄kanam pujuinia nuna Muisaisa akupkamur̄i umirkashtin Pápruka jintintui, turamainiawai. Israer-shuarti tsupir-naktin ana nu túrashtinian tura ashí Israer-shuar túrutai iniaisatniun Papru imia Israer-shuaran jintintui, turamainiawai.” ²² Wátsek, yatsuru, nuin̄kia iturmain̄kít. Ame tátinrumin aents nekaawarka juñ̄ kajertamainiak káutramkachartauak. ²³ Wats, antsu nuin̄kia, ju túrata yatsuru. Juñ̄ kuaru áishman̄ Yúsán yaunchu tiarmia nuna umiktasa pujuiniawai. ²⁴ Nii júkiarta. Túram niisha Muisais akupkamia nuna umikiar nijiaamainiakui, amesha nijiaamarta. Núnisemek kuñ̄niasha ni susatin ana nu amesha akikmatkarta. Niisha ashí umikiarmatai, ni intiash̄in awampratin áchattawak. Nu áishman̄ka intiash̄in awampran Israer-aents wáinkiar, anturtamkarainia nu, nekaschaiti, turamartatui. Antsu, Pápruka Muisais akupkamia tímianak

túrawai, turamartatui. ²⁵ Túrasha yatsuru, nekaata, Israer-shuarcha Yus-shuarka papí yaunchu akuptukmiaji. Israer-shuarti túratin ana nu ashí mash túratarum tátsuji, tu áatramji. Tura antsu namañken máawar ántar-yusan susamu yúashtiniaitrume, tímiaji. Tura numpasha umarchatniuitrume, kajemtikramusha yúashtiniaitrume. Tura tsanirmashtiniaitrume. Tu áatramji” tiarmiayi.

Páprun achikiarmiania nu

²⁶ Nuyá tiniu asamtai Papru nú kuaru áishmañkan júkiarmiayi. Tura kashin tsawarar nímiak níjiaamararmiayi, Muisais timia nútiksaraj. Tura Yusan tiarmia nuna wárik umiktinian tura Muisais timia nuna Yus súsatniun ujaktajtsa Papru Yusa Uunt Jeen wayamiayi. ²⁷ Túrasha nu siati tsawant amusattuk ajatemsaj, Ásianmayá Israer-aents Paprun Yusa Uunt Jeen pujan wáinkiararmiayi. Túrawar charaatum ajakiar Páprun achikiarmiayi. ²⁸ Achikiar untsumainiak “Israer-shuártiram in yáinmaktarum. Ashí nunñkanam Muisais akupkamuríncha Israer-shuarti túrutairíncha, ju Yusa Uunt Jeencha yajauch chicharea nu achikji, tiarmiayi. Warí, Kriaku áentsun awayáshstinia nuna awayá nujaj yamá ju Jeencha yajauch awajturmajj” tiarmiayi.

²⁹ Jes, nuik Ipisiunmayá Trúpimiu Páprujaj péprunam wekaan wáinkiaruyi. Wáinkiaru ásar, Yusa Uunt Jeen wayaji, tu enentáimsar tiarmiayi. ³⁰ Tuiniakui aents ashí mash charaatum ajakiar tseke táarmiayi. Túrawar Páprun achikiar japirkutak Yusa Uunt Jeeyá júkiarmiayi. Túrawar wáitíncha nú chichamaik epeptrarmiayi. ³¹ Tura maatai tusal matsamtuiniáj suntara kapitíántri Jerusarénumiá aents ashí charaatum ajainian antukmiaji. ³² Kapitíáncha ní suntarín tura sarjentuncha irur tseke weriarmiayi aents pujuarmia nuj. Aencha suntaran tura kapitíánin wáinkiar, Páprun asutíniayat iniaisarmiayi. ³³ Kapitíánka Páprun jeari achikmiaji. Tura jimiará jirujaj jinñkiamiaji. Nuyasha aniasmiaji “¿Niisha yait? ¿Warinia túrait?” tímiaji. ³⁴ Túrasha aencha untsurj chichaman untsummiarmiayi. Túmainiakui kapitíáncha penké nekaachmiaji. Tuma asamtai Páprunka suntar pujamunam júkiarmiayi. ³⁵ Tura suntar pujamunam wáitíniám jeawar Páprun entsaki júkiarmiayi aents imiá kajerainia asamtai. ³⁶ Tura aencha ukunmaanij pataakar, mantamnatí, tu untsummiarmiayi.

Papru chichastinian seamiania nu

³⁷ Tura Papru suntarnum awayám, Páprusha kapitíánin Kriaku chichamjaj chichaak “Wí ishichik chichasaintjame” tímiaji.

Tutai kapitíán chichaak “Warí, ¿amesha Kriaku chicham chichastin nékamek? tímiaji. ³⁸ Nuñkia amesha ¿Ejijiptunmayá shuárchakaitiam? ¿Nuik kuaru mir (4000) aents, mañkartin tutai atsamunam yaruakchamkam? ¿Kapitíánjaj meset najanataj tusa túrachmakum?” tímiaji.

³⁹ Tutai Papru tímiaji “Núchaitjai. Antsu wikia Israer áentsuitjai. Sirisia nunñkanam uunt pepru Tarsu náartin ana nuj akiiniaitjai. Tura waitneasam ju aents chichastin tsañkatrukta” tímiaji.

⁴⁰ Tura kapitíán, ayu, tutai, Papru watainiam wajas, mitiat pujustarum tusa uwején takuimiayi. Tura aents itiatkarmatai Israer-chichamjaj chichasmiaji.

¹ Papru chichaak juna tímiayi: “Yatsurtiram, tura úuntur árumna nu antuktarum. Wikia Pápruitjai. Kíshtumaktaj tusan títiatjana nu waitneasrum anturtuktarum” tímiayi. ² Tura Papru Israer chichaman chichaakui, aents nuna antukar nú nankaamas itiatkarmiayi. ³ Nuj Papru chichaak “Wikia Israer-shuaraitjai. Tarsu pepru Sirisia nunkanam ana nuí akiiniaitjai. Túmaitiatnak juí Jerusarénum tsakaruitjai. Tura unuikiartin Kamaríran chichameñ unuimiaruitjai. Tuma asan ii uuntri akupkarmia nuna ashí umirkaitjai. Tura átum yamáí túrarmena nuna wisha nútiksanak Yusna ana nuna tuke enentáijjai wakerukuitjai. ⁴ Tura Jesusan umirkaru ármia nuna máataj tusan pataatukni wekaimiajai. Túran áishman kan nuwancha achikian sepunam enkeataj tusan túrimiajai. ⁵ Israer-patri uuntrisha Israer-shuara uuntrisha Tamaskunam íi-shuar susatá tusar papin ataktusar akuptukarmia nuna nin kía nékainiawai. Jesusan umirkarun achikia ikiaankan juí Jerusarénum asutniáwarat tusan werimjai’ tímiayi.

(Túramurj 9.1-19; 26.12-18)

⁶ Tura wi jintia wéai Tamaskunam jeastatuk ajasai nantu tutupin ai aya aneachma nayaimpinmaya newaat wajantruntmiayi. ⁷ Túrunamta wisha nuká iniaarmajai. Nuyanka chichaamun antukmajai. Chichartak “Sauru, Sauru, ¿urukamtia imía pataaturam?” turutmiai.

⁸ Takui wi aniasmajai “¿Amesha yáitiam, Uunta?”

Tutai “Wikia Nasarénumia Jesusaitjai. Ame pataaturmena nútijai” turutmiai.

⁹ Wijjai pujuarmia nu, newaat wajantun wáinkiar ti ashamkarmai. Túrasha nin kía túrutun antukcharmai. ¹⁰ Tura wi tímiajai “¿Nuín kía, Uunta, warí iturkattaj?” tímiajai.

Tutai Uunt chichartak “Wajakim Tamaskunam wetá. Nuísha ame túratamna nuna ujatmakartai” turutmiai, tímiayi. ¹¹ Kame wikia nú newaat ajaku íisan jiru kusurmai. Tuma asantai winia tsaniakmar enkeki jurukiar Tamaskunam ejetiarmai’ tímiayi.

¹² Papru tuke aujmatki wéawai. “Tura nuí Tamaskunam áishman Ananías pujumai. Niisha Yúsan aneak, Muisais akupkarmia nuna umirkauyi. Tura nú péprumaya Israer-shuar ármia nu nin péñker enentáimtiarmiai. ¹³ Nú Ananías winia íirsataj tusa támai. Taa turutmai “Yatsuru Sauru, péñker iimtia.” Túrutkui nú chichamaik péñker iimtiajai. Túrunan Ananíasnasha wáinkiamjai. ¹⁴ Tura Ananías chichaak “Iwiaaku Yus, winia wakeramurun nekartuat tusa winia Uchirnasha, tunaarinchaa nuna, íisat tusa, winia chichampruncha antukat tusa ámin yaunchu Yus anaitiamkaiti. ¹⁵ Amesha Papru, Yusna ana nu ísumna nusha antukumna nusha ashí aents ujakartatme. ¹⁶ Tuma asantai yamaisha ¿warí nákam? Tunaarun asakátrurat tusam Uunt Jesus enentáimtusam weme ni náari pachisam imiantia” turutmai.’

¹⁷ Tura Jerusarénum waketkin Yusa Uunt Jeen wémajai Yúsan áujsataj tusan. Nuí íimiar majai. ¹⁸ Nuí Jesus chichartak “Juí Jerusarénum Wí túramur etserkattamna nuna antukchartatui. Tuma asantai warí jíinkim wetá” turutmiai.’

¹⁹ Túrutkui wi tímiajai “Túrasha Uunta, juyá aents wi Israer-shuara iruntai jeen wayan Ámin umirtamkarmia nuna nuí matsatun achikian awatin sepunam enkeawarmia nuna nékainiawai. ²⁰ Tura nuyá Áminiu etserniun

Estepañkan máiniakuisha wisha wajamjai. Túruiniakui, “pénkeraiti” tímiajai. Nú arantcha ni pushirín írsamjai” tímiajai.

²¹ Túrasha Uunt Jesus winia turutmai “Wetá. Israer-shuarcha matsatania nuñ akupkatjame” turutmai” tímiayi Papru.

Suntara kapitíánriñ túrunamia nu

²² Nuñ matsamarmia nu, núnaka antukarka untsuntan juáriarmiayi. “Juķa mantamnatí. ¿Urukamtaik iwíiakusha pujusat?” tiarmiayi. ²³ Tura aentska Paprun kajerainiak, ti untsumainiak pushirín tujaat ajapawar nuñkancha nañkimkiamaiķa ajarmiayi. ²⁴ Tura kapitíán nuna wáiniak Páprun suntar pujamunam awayámiayi. Tura suntaran chicharuk “Átum asutiárum áimtikiatarum. ¿Urukamtaik aents nin kajerainiak imiá untsumainia? Nekaatarum” tímiayi. ²⁵ Tura Páprun asutiátať tusar jinķiárar awajsam Pápruka kapitíánin chicharuk “¿Rúmanmayá aents áyatik asutiámniakait, ni túramurj nekartsuk?” tímiayi.

²⁶ Nuna táman antuk kapitíáncha uunt kapitíánin ujaktaj tusa werí chichaak “Maaj, túrataj tamena nu anearta. Ju áishmañ Rúmanam pachitkaiti” tímiayi.

²⁷ Nuna antuk uunt kapitíán Páprun werí aniasmiayi “¿Amesha nekasmek Rumanam pachitkaitiam?” tímiayi.

Tutai Papru “Ee” tímiayi.

²⁸ Tutai “Wikia ti kuítian akikmakmiajai Rúmanam pachinķiatniun” uunt kapitíán tímiayi.

Tutai Papru tímiayi “Túrasha winia aparka Rúmanam pachitķia asamtai, wisha Rúmanam pachinķian akiinīaitjai” tímiayi.

²⁹ Nuna takui Páprun asutiátať tiarmia nuna wárik iniaisar jīiniar wearmiayi. Tura imia uunt kapitíáncha Rúmanam pachitķian jinķiá asa ashamkamiayi.

³⁰ Tuma asa kashin tsawar uunt kapitíán, urukamtaik Páprun imiá kajerainia, nekaataj tusa wakerak Paprun werí jinķiámun atirmiayi. Tura Israer-patřj uuntrjñ chīkich naamka armia nújajsha ikiaankamiayi. Tura nuñķia ni matsatmanum Páprun itiar ajapén awajsamiai.

23

Israer-aentsu Úuntrjñ Papru timiania nu

¹ Papru Israer-patřj naamkarjñ úmamkes iis “Wíi shuartiram antuktarum. Úchichik tuķe yamaisha Yus íimmianum péńker wekainuitjai” tímiayi.

² Papru nuna takui Israer-patřj uuntrj Ananías, ni suntarjñ Papruj ayamas pujuarmia nuna “Wenunam awatiarum” tímiayi.

³ Tutai Papru tímiayi “Tsej, jimiará chichamtinia íimiatá, Yus amincha asutiámattawai. Muisais akupeana nuna umiatsui tusam yajauch turutattsam pujame. Entá, ¿nuñķia urukamtia Muisais tímia nuka iniaisam ame suntarum winia asutiátarum tame?” tímiayi.

⁴ Tura nuna takui nuñ wajarmia nu Páprun tiarmiayi “¿Maaj, amesha Patri uuntrj imiá yajauchisha chichaream?”

⁵ Tutai Papru tímiayi “Yatsuru, wisha Patri uuntrj áutskaitia tíchamjai. Néķaitķiunka núnaka tíchaajai. Kame wisha néķajai, Yus-Chichamnum tawai “Atumí uuntrj yajauch chicharkairap” tawai” tímiayi.

6-8 Israer-aentsu úuntriya jimiará írutka ármiai. Satuséu aents tura nuyá Pariséu aents nusháa írutkan Pápruka nekaamiayi. Kame Satuséu aentska, jakamunmayá nantaktincha Yusa suntarijsha aentsu wakanísha tura iwianchcha atsawai, tiniu ármiai. Antsu Pariséu aentska, nuka ashí awai, tiniu ármiai. Nuna nekáa Papru kakantar chichaak “Wikia Pariséu áentsuitjai. Wíi shuarsha Pariséu áiniawai. Wikia ashí shuar jakamunmayá ukunam nantaktin átatui tu jintiamun, nekaatai tusar itiaríarmiayi” tímiayi. Tura Papru nuna takui Pariséu aents tura Satuséu aencha nuámtak kajernaikiarmiayi. Túrunawar kánasaraṅ nusháa nusháa enentáimprarmiayi. ⁹ Nuñkia ashí aents charaatum ajarmiayi. Tura Israer-shuara jintinniurj Pariséunam írutka armia nu wajakiar tiarmiayi “Ju áishmaṅ tunaan penké túrichuiti. Yusa suntarij chíkich wakancha nin nekas chichaschamashi. ¿Ya neka?” tiarmiayi. ¹⁰ Ti charaatum ajainiakui suntara kapitíántri Páprun achiarchartimpiash tusa suntaran untsuk, “Jíktiarum, túrarum suntar pujamunam awayátarum” tímiayi. ¹¹ Nuyá kashi Papru Uuntri mesekra ipiatuk “Kakaram ajasta, Papru. Juí Jerusaréñnum winia ujakarumna núnismek Rúmanmasha ujaktatme” tímiayi.

Páprun máatniun wakeriarmiania nu

¹² Nuyá kashin tsawarṁmatai Israer-aents Páprun maatai tusar chichaman jurusarmiayi. “Papru máachkurkia yurumtsuk tura penké úmutsuk matsamsattaji. Máachrikia yajauchiniam yumiṅkramu atai” tiarmiayi. ¹³ Nuna tiarmia nuka kuarenta (40) nañkaamas ármiai. ¹⁴ Tura Israer-patri úuntriñ tura Israer-aentsu úuntriñcha weriar “Papru máachkurkia penké yurumtsuk pujustatji. Máachrikia yajauchiniam yumiṅkramu atai” taji. ¹⁵ Tuma asamtai ashí Israer-patri naamkarjijai suntara kapitíántri seatarum, Papru tati tusarum. “Kashin Papru itiata, titiarum. Papru tana nu iisha nekas nekaatai tusar wakeraji” titiarum. Túrawakrumin iisha maatai tusar niñkia táatsaiñ nákkattaji” tiarmiayi.

¹⁶ Tura Papru awę nú chichaman antuk suntar pujamunam taa Páprun ujakmiayi. ¹⁷ Tuma asamtai Pápruka suntara kapitíántriñ untsuk “Ju uchi uunt kapitíánnum jukitia. Niisha chichaman takakui” tímiayi.

¹⁸ Kapitíáncha uchin uunt kapitíánnum ejé tímiayi “Papru enkeamu pujana nu winia untsurak “Ju uchi uunt kapitíánnum jukitia. Chichaman takakui” túrutui” tímiayi.

¹⁹ Uunt kapitíáncha nú uchin enkeki arantach jukí chicharuk “¿Warí turut-taj tame?” tímiayi.

²⁰ Tutai uchi tímiayi “Israer-aents Páprun chichaman jurusarai. “Papru túramuri ti paant nekaatai tusar kashin Israer-shuara uuntriñ ejetarum” turamartatui. ²¹ Tura amesha nuna takui anturkaip. Kuarenta (40) nañkaamas jintiá akirtua pujurainiawai. Tura “Papru máachkurkia yurumtsuk tura úmutsuk matsamsattaji” tuiniawai. Tuma asamtai yamaisha ámin titi tusa nákarṁmainiawai” tímiayi uchi.

²² Tura uunt kapitíáncha uchin chicharuk “Ame túrutmena nu chíkich aents penké ujakaraip’ tímiayi. Nuna ti, uchin akupkamiayi.

Akupin Piriksaj ejetiarmiania nu

²³ Nuyañka uunt kapitíáncha chíkich kapitíánin jímiarán itia chichaak “Urum, kashi ajapén ajastatuk aj, untsurí suntar ikiaankarta. Jimiará siñ (200) aya náwek, setenta (70) kawainium eketka, nuyá chíkich jimiará siñ

(200) nánkijjain Sesaria nunkanam wétin iwiarata. ²⁴ Páprusha kawainium ekemkatin iwiarturta. Túrarum péñkerak ejetarum akupin Piriksají tîmiayi. ²⁵ Tura niijjai ju chichaman áatrar akuptukmiayi:

²⁶ “Ti péñker akupin Píriks, wikia Krautiu Rísias ju papin áatjame. ²⁷ Israeraents ju áishman kan maatai tusar wakeruiniak achikiarmiayi. Tura niisha Rúmanmayá áentsuitkui wikia nuna nekaan suntarjai werin jukimjai. ²⁸ Wikia çurukamtaik achikiaruít? tusan Israer-patri naamkarin jukimjai nin. ²⁹ Páprunka ii uuntri akupkamurin umiatsui tusar nin kajerarmiayi. Pápruka yajauch túrachu asa mantamnachminiuyayi. Sepunmasha enkemachminiuyayi. ³⁰ Tura wisha Israeraents nin máatniun chichaman jurusman nekaan amiin akuptajme. Nuyasha nin kajerainia nunasha tajai “Atumsha Piriksají werum átum warinma kajerum nu títiarum” tajai. Ayu. Júchiniak tájame.” Nuna tu áatar akuptukmiayi.

³¹ Tura suntarsha ni uunt kapitiantri tîmia nútiksaran Páprun kashi júkiarmiayi Antipatris péprunam. ³² Kashin tsawarar suntar aya náwek wearmia nuka waketrarmiayi. Tura kawainium eketrainiaka Páprujai wearmiayi. ³³ Sesaria péprunam jeawar papin Piriksán súsararmiayi. Tura Pápruncha nu j ejenarmiayi.

³⁴ Akupniusha papí ajsua amik Páprun aniasmiayi “Amesha, çtuí akiini-aitiam?”

Tutai “Sirisia nunkanmayaitjai” tîmiayi.

³⁵ Nuna takui akupin tîmiayi “Wátskea kajertamainia nu taar turamainiakui anturkatjame” tîmiayi. Tura nuyanka uunt akupin Erutisa jéen awayá apujsamiai, suntar ísarát tusa.

24

Papru Píriksají áujmatsamiania nu

¹ Tura senku tsawant nankaamasaj Israer-patri uuntri, ni naari Ananías, Sesarianam tîmiayi. Tura Israeraentsu uuntri tura ti unuimiaru chichamtincha, ni naari Térturu nujai táarmiayi. Ju aents Páprun kajerainia ásar akupniunam wearmiayi. ² Nuí Páprun itiar matai Térturu chichatan juarmiayi. “Uunt akupin Píriks, amesha yaimiu asakmin iisha shiir matsatainijai. Tura imiá neka asakmin ashí aents tímiatrusrik matsatainijai. ³ Tuma asakmin iisha ashí matsatmanum tuke tsawant ti shiir yuminsamajme, uunta. ⁴ Tura amesha ti núkap chicham antuktin nakitiatspash. Tuma asamtai antsu ishichik waitneasam anturtukta, tîmiayi. ⁵ Ju áishman Papru, sunkura ut-sukratniua núniinai. Niisha ashí nunkanam mesetan najanatniun Israer áentsun ikiakáiniati. Tura Jesusa aentsri, Nasarénu tuinia nuna úntrinti. ⁶ Nú arantcha Yusa Uunt Jéen yajauch awajsataj tusa pujuru wáinkiar achikmaji. Ii uuntri tana nujai métek asutiátaj tusar wakerimji. ⁷ Túrarin nuyanka kapitian Rísias taa tapit achik jurutramkimijai. ⁸ Tura atumek akupin Piriksají werum nuí aujmatkatarum, turamaji, tîmiayi. Tuma asamtai amesha Píriks, Papru aniata. Nuñkia ii tájainia nu nekasaiti, nu nekaattame” tîmiayi Térturu.

⁹ Tura Israeraents pujuarmia nu “Nekasaiti ashí ni tana nu” tiarmiayi.

¹⁰ Nuyá Píriks, uwejejai, Papru chichasat tusa iniaktusmiayi. Túram Papru tîmiayi “Amesha uunta, ju aentsu akupniuri ti untsuri uwitin pujusuitme. Tuma asamtai nuikia shiir enentáimsan páchitsuk chichastatjai. ¹¹ Wats, wi

túramur nekartuata. Yúsan áusataj tusan Jerusarénum wi wémajna nu tuse (12) tsawant nankaamasai. ¹² Nuisha yajauch áujmatki weaj wáitkiacharmai. Yusa Uunt Jeencha tura Israer-shuara aujtai jeencha tura pepru jintianmasha áentsnum charáa charáa ajá wekaaj penké wáitkiacharmai, tímiayi. ¹³ Ju aents juu matsataina nu wíniaka penké turutchamnia áiniawai. ¹⁴ Túrasha júna paant ujaajmie. Jesus yamarman jintiana nuna umíajai. Kame Israer-aentska wáitíaiti tuinia nuna wikia umíajai. Túrasha nuna túran ii uuntri Yusri akupkamia nunak umiktasan pujajai. Jes, ashí Muisais aar akupkamia nuna tura ashí Yúsnan yaunchu etserin aar akupkarmia nunasha umini-aitjai. ¹⁵ Tura jakaasha nantaktin átatuí, tajai. Wari, pénger aents nútíksan yajauch aencha nantakiartatuí imia Israer-shuar tuíniatsuk. Tura wisha nútíksanak túrunatniuiti tajai. ¹⁶ Tura wisha tiniu asan, wikia winia enentáiruj Yus ímmianum makuumatsuk wekasataj tajai. Tura áentsnumsha nútíksanak penké makuumatsuk wekaajai' tímiayi.

¹⁷ 'Tura, uunta, untsurí uwitin chíkich chíkich nunkanam wekaasuan amikian winia shuaruj támajai. Kuítrinchan kuítian susataj tusan tura Yusa kuítrincha nin susataj tusan támajai. ¹⁸ Túran wisha, Muisais jintin-mia nútíksanak níjiaamaran, Yusa Uunt Jeen pujumíajai. Untsurí aents charaatum ajainiasha atsumíayi. Nuju wíki pujái Ásianmayá Israer-aents wáitkiarmiayi. ¹⁹ Tura wi yajauch túraitkuínkia winia wáitkiarainia nu táchatniukait ámin ujatmaktasa. ²⁰ Túrachkuínkia juu pujuinia nu, Israer-patri naamkarí matsatmanum wi pujumajna nuju yajauch túramun nékainiakka turutiarti. ²¹ Kame, "jakamunmayá nantakminíaiti" tau asantai maku-urtiajtsarum pujarme" matsatmanum tímiyaj nujai turutchartimpiash. Nú arantka yajauch túramun penké nekartuacharmai" tímiayi Papru.

²² Táman antuk Píríks, Kristu shuarí túramun paant nekáa, áanik iniaisami-ayi. "Antsu kapitíán Rísias támatai nuínkia nu chíchaman nekaatjai" tímiayi. ²³ Tura nuyá suntara kapitíántrin chichaak "Ju Pápruka tuke emetnati. Tura ishichikíka ankant apujtsarum. Tura nuyá ní amikri taa yáintaj takui suritkiairap" tímiayi.

²⁴ Tura nuyá chíkich tsawantaj ataksha Píríks ní nuwejai Tursirajai támíayi. Núwenka Israer-shuarauyayi. Píríkska "Papru itiatarum" tímiayi. Papru Jesukristunún étserkui antímiayi. ²⁵ Tura Pápruka yajauchinia wekasashtincha naka wekasatniuncha, tura ukunam Yus tunaan áentsnaka asutiátniuiti takui Píríkska ashamak tímiayi "Antsu yamaikia máakete. Tura ataksha wi ankant pujakun untsukmíjiam" tímiayi. ²⁶ Tura, ankant ajastaj tusa Papru kuítian akirkashtimpiash, tu enentáimias, Píríks tuke untsúu wémiayi, chichastai tusa. ²⁷ Tura nuyanka jimíará uwí nankaasmatai Píríks akupin náamkamu ajapnamiayi. Tura chíkich aents, ní naari Pursiu Jistu akupin náamkamiayi. Tura Píríkska, Israer-aents pénger enentáimtursarat tusa wak-erak, Páprun sepunan tuke ikiukmiayi.

25

Papru Jístujai áujmatsamiania nu

¹ Jístusha akupkatin takatan nankaamataj tusa Sesaria péprunam támíayi. Tura menaintíu tsawant nankaasmatai nuyá we Jerusarénum jeami-ayi. ² Nuisha Israer-patri uuntri tura Israer-aentsu penkerísha Páprun tsanumprurtaí tusar Jístun weriarmiayi. ³ Tura tiarmiayi "Waitneasam

Páprusha Jerusarénnun akupkata” tiarmiayi. Jintiá maatai tusar wakeru-
iniak nuna tiarmiayi.

⁴ Tutai Jistu tímiayi “Atsá. Páprusha Sesaria péprunam sepunam enkeamu
pujawai. Tura wikia nuǐ wárik waketkittijai” tímiayi. ⁵ Nuyá nin tímiayi
“Atumsha penkerǐ árumna nu, wijiǐ Sesarianam wétiniaitrueme. Tura nú
áishmaṅka tunaarǐ ákuinǐkia nuǐsha títiniaitrueme” tímiayi.

⁶ Jístuka Jerusarénnun ishichik tsawant pujusmiayi. Kame uchu tsawant
tura tias tsawantcha pujuschiawash. Nuyá ataksha Sesarianam waketkimi-
ayi. Tura nuǐ jeá kashin tsawar, akupin pujutainium pujus “Papru itiatarum”
tímiayi. ⁷ Tura Papru wayamtai, Israer-aents Jerusarénnunǐa taarmia nu
káunkarmiayi. Túrawar ti nukap chichainiak “Tunáa túraitǐ Pápruka” tu tiarmi-
ayi. Túrasha penké uyumantikiacharmiayi.

⁸ Pápruka chichamprumak tímiayi “Wisha tunaan penké túrachuitjai. Is-
raera uuntri áarmarincha umirkaruitjai. Tura Yusa Uunt Jeecha yajauch
awajsachuitjai. Tura uunt kapitíanniasha yajauch penké chicharkachuitjai”
tímiayi.

⁹ Jístuka Israer-aents péñker enentáimtursarat tusa wakerak, Páprun tímiayi
“Wakerakminǐkia Jerusarénnun wemí. Wisha nuǐ ame túramurmin nekaat-
jai” tímiayi.

¹⁰ Tutai Papru tímiayi “Amesha paant nékame, Israer-áentsnum tunaan
penké túrachjai. Tuma asamtai Rúmanmaya uunt akupniun wisha winia
túramurun ujaktiniaitjai, nekartuati tusan. ¹¹ Wisha jakamnia tímianu tunáa
túranka, jákatniuncha ashamatsjai. Tura antsu turutainia nu nekaschaitk-
iunǐkia wíniaka Israer-shuarnum surunkachminiaitjai tajai. Tuma asamtai
seajme, wíi túramun uunt akupin Sésar nekartuati” tímiayi.

¹² Tutai, nuyá ni írutramurijǐ chichasua amik, Jistu Páprun tímiayi “Uunt
akupniunǐ wétaj tusam seame. Tuma asamtai nuǐ wétatme” tímiayi.

Papru uunt akupniujǐ áujmatsamiania nu

¹³ Tura ishichik tsawant nankaamasmatai akupin Akripia ni nuwejai
Pirinísejai Jístun áujsatǐ tusa Sesarianam wearmiayi. ¹⁴ Tura untsurǐ tsawant
pujusarmiaayi. Tura nuǐ pujuiniaǐ Jístuka Papru túrunamun akupniun ujaak
tímiayi “Juǐ áishmaṅ pujawai. Píríks nin achik enkea ikiukmiayi, tímiayi.
¹⁵ Kame wikia Jerusarénnun pujǐ Israer-patri uuntri tura Israer-aentsu
úuntriṣha, Papru yajauchin túraitǐ tusar káutrukarmiayi, tímiayi. Mantamnati
tusam akupkata, tu seattiarimiayi. ¹⁶ Takui wi tímiajai “Iisha Rúmanmaya
áentstikia chícham nékatsuk, mantamnati tusar akupeatsji. Tsanumpruinia
nu, emka táartin áiniawai. Tura nuyá chichamprumatsǐn mantamnati tusar
akupeatsji iisha” tímiajai. ¹⁷ Tiníu asan, táarmatai, wikia nákatsuk kashin
tsawaran akupin pujutainium pujusan, Papru itiatarum tusan akupkamjai.
¹⁸ Tura Páprun tsanumprurtai tusar taar chichainiaksha, wi enentáimmiajna
núnaa tícharmiayi. ¹⁹ Antsu áyatik Yus umirkar túmatairǐn Papru nuna
túrachai, tiarmiayi. Tura nuyasha áishmaṅ Jesus naartin nantaki iwiaakui
tawai Pápruka, tiarmiayi. Nunak tiarmiayi. ²⁰ Tura wikia nú chichaman
túratniun nékachu asan, Páprun aniasmajai “¿Amesha Jerusarénnun wétaj
tusam wakeramek? Nuǐ nu chichaman nekartamawarti” tímiajai. ²¹ Túrasha
“Atsá. Juǐn pujustajai. Rúmanmaya uunt akupin Akustu Sésar nekartuati”
tímiayi Papru. Takui, “nuinǐkia tuke sepunam pujustá. Tura wi ukunam uunt
akupniun akuptuktatjame” tímiajai” tímiayi Jistu.

22 Nuyá Akripia chichaak “Wisha itiursanak nu áishman chichaamun anturkaj” tímiayi. Tutai Jistu tímiayi “Amesha kashinkia anturkattame”. 23 Tura kashin tsawar Akripia Pirinsejai taar, iwiaa-iwiarmamu ajas wayawarmiayi. Suntara úuntrijiai tura nú péprunmaya úuntrijiai wayawarmiayi. Tura nuí Jistu, “Papru itiatarum” tímiayi. 24 Tura Papru támatai Jistu tímiayi “Uunt Akripia, tura ashí áentstiram matsatrumna nu, pai, ju áishman íistarum. Ti untsurí Israer-aents Jerusarénumsha tura juí Sesarianmasha ju áishman kan Páprun kajerainiak yajauch chichartuiniawai. Tura tuke iniaitsuk, mantamnatniuiti, turutainiawai. 25 Túrasha wíjiainkia tunáa jakammianka túrachuiti. Kame niisha “uunt akupin Akustu Sésar nekartuati” takui, wisha nin akupkataj tusan wakerajai. 26 Tura wariniak uunt akupniun áatrataj nuna nékachu asan, Páprun atumin itiarjarme. Tura nekaska, Akripia, ame iniasta tusan itiarjame. Túrawakmin wi wariniak áartaj nuna nekaatjai. 27 Warí wisha, ni yajauch túramurín áattsuk, uunt akupniunam akupkashtiniaitjai” tímiayi.

26

Papru Akripiaí chichamprumakmiania nu

1 Jistu nuna tutai Akripia Páprun tímiayi “Wats, amesha tu timi chichamprumakta” tímiayi. Tutai Papru uweje takuí chichatan juarmiayi. 2-3 Chichaak tímiayi “Uunt Akripia, ii Israer-shuarti túrutai ainia nu amesha nékame. Tura ashí ii chicharnaiyajina nusha nékame. Tuma asamtai yamá wisha ámin chichamprumaktaj tau asan shiir enentáimjai. Israer-aents turutainia nuna mash ujaktatjame. Waitneasam péñker anturtukta’ tímiayi.

Papru ni yaunchu túrutairín ujakmiania nu

4 Wi úchichik winia nunkarui tura Jerusarénumsha pujusan wi túramajna nuna ashí wí aents Israer ainia nu nékainiawai. 5 Pariséu ajasan, ni akupea-murín itiurchat aín ashí takamtsuk tuke umirniuitjai. Nunasha nékainiawai tura wakeruiniakka etserkamnia aintui. 6 Túrasha wikia, jakamunmaya nantaktin átatui, tiniu asamtai wíniaka emetruawar itiararmiayi. Túrasha núnaka Yuska ii úuntrín yaunchu tímiayi. Yus tímia nuna túrunattawai wisha tiniu asamtai itiararmiayi, tímiayi. 7 Tura ashí mash Israer-shuarti, tuse (12) aents matsatka ájina nu, ju nantaktin chichaman Yus tímia nuna túrunati tusan nákainiaji. Tuma asar Yus újukur¹, tsawaisha káshisha nú enentáimtuiniaji. Tura wisha nú chichamnak enentáimta asamtai wíniaka kajertuiniawai, uunt Akripia. 8 Warí, atumsha “Yus jakancha iniantkimniaiti” tátсурmek’ tímiayi.

9 Tura wisha yáunchuka Nasarénumiá Jesusnan umirkaruka kajerkatniuiti, tu enentáimniuyajai. 10 Tura Jerusarénum Yus-shuar ármia nuna kajerkarmiajai. Israer-patri untrí chichamejai untsurí áentsun Jesusnan umirkarmia nuna sepunan enkeamiajai. Tura nú shuara máiniakuisha wikia péñkeraiti tu wémiajai. 11 Tura Israer-shuara íruntai jeen wayan ti asutiármiajai, Jesusnan umirkatniun iniaisarat tusan. Tura imiá kajerkaran chíkich nunkanmasha pataatu wearmiajai achiktaj tusan’ tímiayi.

Tamasku jintianam túrunamun ujakmiania nu (Túramurí 9.1-19; 22.6-16)

12 Tura Israer-patri untrí tsankatrukmatatai, papin ni surusarmia nujai, Tamasku péprunam wétaj tusan jíinkimiajai. 13 Tura, uunta, nantu tutupin

aj, jintiá wéaj newaat ajaki ti tsáapin, tsawái nantujaj nan̄kaamas etsantru-tramiayi. Tura wijjaj wearmia nunasha núnisan̄j etsantrurarmiayi. ¹⁴ Tura túrunamtai ashí nun̄ká tepetar wáinkiarmai. Wiki Israer-chichamjaj túrutun antukmajai “Sauru, Sauru, ¿urukamtai imiá pataaturam? Amek enentáimin yajauch awajmamsame, wáaka san̄kanmiak numin ijiuma núnismek. Wí aents kajera asam túruname” turutmai.’

¹⁵ “Túrutkui wisha “¿Amesha yáitiam, Uunta?” tímiyai.

Tutai Uunt turutmai “Wisha Jesusaitjai, ame pataatamna nútijai. ¹⁶ Tura nantakim wajaktia. Winia takartusminiam tusan wantintiukjame. Tura ame wáinkiamna nusha etserkattame. Tura ukunam wantintiuktatjame. Wáinkiatamna nusha etserkamniun, turutmai. ¹⁷ Tura nuyasha turutmai, Wats yamaisha Israer-shuarchanum akupkatjame. Tura Israer-shuar kajertamainiakuisha, tura chíkich aents kajertamainiakuisha ayampruktatjame, turutmai. ¹⁸ Péñker jintintiata tusan akupeajme. Kame aencha kiritni-umiá jíinkiar tsáapnium wekasarat tusan, tura iwianchin umirtsuk Yúsna umirkarat tusan akupeajme. Tura Winia enentáimtursarmatai Wisha ni tu-naar̄in tsankurattajai. Nuna túran Yusna ajasaru áiniana nujaj apusattajai.” Nuna Jesus turutmai’ tímiyai.

Papru mesekrampra umikman ujakmiania nu

¹⁹ “Tuma asamtai, uunt Akripia, Uunt Jesus nayaimpinmayá wantintiu-rak turutmia nuna umirkataj tusan pujajai. ²⁰ Enentai yapajjáwar Yus-shuar ajastinian, emka Tamaskunam pujuarmia nuna ujakarmiajai. Tura nuyasha Jerusarén̄numian, Jutía nun̄kanmayancha tura nútiksanak Israer-shuarchancha nuna ujakarmiajai. Tura ujainiakun “Yus-shuar ajasmarum paant ajasat tusarum, péñker túratarum” tímiyai ashí shuaran. ²¹ Tura wi Yusa Uunt Jeen pujáj, Israer-shuar achirkar emetruawar mántuatai tukamá tujintrukarmiayi, Yus winia yaintiu asamtai. ²² Yus winia yaintiu asamtai, iniaitsuk tuke Yus-Chichaman ujainiajai. Uunt ainia nunasha, tura pééjchach ainia nunasha ujainiajai. Tura Muisaissha, Yúsna etserniusha tiarmia nunak étsereajai. Nú arantka tátsujai. ²³ Krístuka wáitsatniuyayi, tura jakasha émak nantaktiniuyayi, ii uuntrī tiniu ármiai. Tura Krístuka nantaki Yusa chichamen̄ í áentsun tura Israer-shuarchancha nútiks̄n̄ ujaktiniuyayi. Nuna tu tiarmiai. Tura núnaka wisha tu ujainiajai” tímiyai Papru.

Papru Akripian Yus-shuar awajsataj tusa wakerimiania nu

²⁴ Tura nuna takui Jistu kakantar tímiyai “Maaj, Papru, wáurme. Imiá unuimiatu asam wáurkame” tímiyai.

²⁵ Tutai Papru tímiyai “Atsá uunt Jistu, wáurtsujai. Antsu wi tájana nuka ti nekasaiti. ²⁶ Wi tájana nuna, uunt Akripia juī pujana nuka nékawai. Tuma asamtai arantutsuk nin chichareajai. Kame jū túrunamu ti paant asamtai niisha nékawai, tajai” tímiyai.

²⁷ Nuyá Akripian chicharuk “Yaunchu Yúsna etserin áarmari, nekasapitia tátsumek, uunt Akripia. Wikia nékajme. Nekasaiti, tame” tímiyai.

²⁸ Takui Akripia chichaak “Maaj, ishichik awajtame Papru, Yus-shuar ajastin” tímiyai.

²⁹ Tutai Papru tímiyai “Tura ishichík chichamjaj̄isha untsur̄i chichamjaj̄isha, amesha uunt Akripia, tura ashí winia anturtukurmena nu, wijjaj̄i métek ajasúk tusan wakerajai. Tura antsu wia núnisan̄ jin̄kiámua núnaka wakerats-jai” tímiyai.

30 Papru nuna tuasua amikmatai akupniusha, uunt kapitíáncha, Pirínísesha, tura nuĵi ashí pujuarmia nu wajakiarmiayi. 31 Tura arant wear, túrunamun chichasarmiayi. Tura tiarmiayi “Ju áishmañ mantamnamnian tunaamkachuiti tura penkesha sepunmasha enkeachminiaiti” tiarmiayi.

32 Tura Akripia Jístun tímiayi “Ju áishmañ “uunt akupin nekarati” tíchaitkuñkia akupmai makuitji” tímiayi.

27

Páprun Rúmanam akupkarmiania nu

1 Tura Páprun Ruma péprunam akupkatniun enentáimsarmiayi. Rúmaka tímiaĵ, Itiaria nuñkanam pujawai. Wisha Páprujai wémiajai. Pápruncha tura chikichnasha achikma ármia nunasha Akustunu tutai suntara kapi-tiántrijaiĵ nenakar akupkarmiayi. Nú kapitíáni naariĵ Júriiiti. 2 Tura Atramitiunmaya kanu Asia nuñkanam pepru ármia nuĵ wétasa pujumia nu enkemprarmiayi. Tura Tisarúnikianmaya áishmañ, ni naariĵ Arístárku, in páchitkiauyayi. Tisarúnikiasha Masetúnia nuñkanamaiti. 3 Nuĵ enkemprar kashin tsawarar Sitiun péprunam jeamiajai. Nuĵ jeawakrin kapitíán Juriu, Páprun waitnentak tímiayi “Ame amikrumiĵin wetá. Au íirmasarti” tímiayi. 4 Tura Sitiunnumiaĵ jíinkir, kanujai wesar nase tukumpramprakrin Chipri núñkaka menanmaani aa ikiukmiajai. 5 Tura nayaantsanam wesar Sirisia tura Pampiria nuñkanam ayamchik nankamakir Mira péprunam jeamiajai. Nuka Risia nuñkanamaiti. 6 Nuĵ jear nú kanu ikiukmiajai tura chíkich kanu Ar-ijíántrianmaya taa Itiaria nuñkanam wétasa pujumiajai. Nú kanunam suntara kapitíántriĵ, enkempratarum, turammiajai. 7 Tura untsurĵ tsawant yáitmataik we-wémiajai tura ti wiántkar Nítionam jeastatuk ajasmiajai. Tura nuĵsha nase tuke tukumkarta asamtai Sarmuñ nuñkanam ayamchik nankaamakir, Kritia nuñkanam ágwinini ayamchik wémiajai. 8 Tura Kritia nuñkanam ayamchik wesar itiuřchat akui wáitsar wea-wéakuar “Shiir Pujutai” tu-tainium jeamiajai. Nusha Rasea péprunam tíjuchiiti. 9 Yáitmataik wea asar ti táasmaji. Tura yumi yututai jeatema asa ti tsúmainiuyayi nayaantsanam wétin. 10 Tura Papru chicharuk “Amikru antuktarum. Wi nékajai, yamai wéakrikia ti tsúumainti. Kanusha tura káarak kanunam enketainia nusha menkarattawai. Tura iisha núnisrik kajinchatĵiash” tímiayi. 11 Suntara kapitíántriñkia Páprunka anturtsuk, kanú wianniurĵin kapitíántriñcha tura kanú kapitíántriñcha chichamen anturkarmiayi. 12 Tura nuĵ Shiir Pujutai tutainium yumitin pujustin péñkerchaitkui “Nuñkia juyañka wéartai. Pinise péprunam jeamainchuashit” ashí tiarmiayi. Nú péprusha Kritia nuñkanam nayaants ayamach pujawai. Nú péprunam yumitin pujustinian wakeriarmi-ayi, arakia nuñkaani kakaram nase nú péprunam jeachu asamtai.

Tsúmainium wekasarmiania nu

13 Tuma asamtai ukunam nase nuñkaaniaĵ tápiriri ajakui, ii wétin ya-maikia péñkeraiti, tu enentáimsarmiayi. Túmakui kanu emetai jiru júusar jíinkir Křitiam ayamchik wearmiajai. 14 Túřasha árusañ arakiaĵ kakaram nase, Nuristi tuinia nu tukumpramiayi. 15 Nase kanun tukumpra asamtai iisha atsantratin penké tujinkiamiajai. Túmakui, áankisha juramkitiai tusar iniaisamiajai. 16 Tura Kritia nuñkanam ágwinini nankaamakur nuñkia nase ishichik mijiantmatai, uchich kanu japikir wémiaĵ nu ti takasar uunt kanunam enkermiajai. 17 Tura enkerar chapikjaiĵ uunt kanun jinĵiármiajai

wewe najanatai tusar. Tura náikim mukutniunam, Serti tutainium nase juramkishtajiash tusar, kanunam yakí tarach aan itiararmiayi. Nu tarach nase útsuktin tusar nenarma ármiai. Túrawar áyatik nase juramkitiai, tiarmiayi. ¹⁸ Tura kashin tsawarḡmatai nasesha chíchimisha tímiatrusaḡ kakaram aa asamtaí kanunmaysaḡ káarak irunmia nuna nayaantsanam ajapawarmiayi. ¹⁹ Nenaintiú tsawant naḡkaasmatai iisha ii uwejejaḡ kanunam káarak iruniarmia nusha entsá utsaḡkarmiayi. ²⁰ Tura untsurí tsawant tsawajsha etsantrachmiayi tura káshisha yaasha tsaparcharmiayi. Tura nasesha ti kakantar tukumpramkurin “Yamaikia uwempratin atsawai” tiarmiayi. ²¹ Tura iisha ti untsurí tsawant yurumtsuk matsatu asakrin, Papru ajapén wajaki tímiayi “Amikru winia nuik Kriḡianmaysaḡka jíintsuk anturtukuítki-urmiḡkia yamá jü itiurchatnum pujutsuk tura emeḡkatmatsuk pujaajaí’ tímiayi.’

²²⁻²⁴ ‘Yamá kashi winia Yusru suntarí nayaimpinmaysaḡ wantintiurkayi. Nú Yúsan umirkaitjiana nu akupturkayi. Tura nu taruti “Ashamkaipia Papru, turutui. Amesha Ruma péprunam uunt akupniunam jeattame. Tura chikichnasha ámiijaḡ kanunam eḡketainia ásmatai uwempratniun Yus tsaḡkatkarai” turutui. Tuma asamtaí, amikru, shiir enentáimsatarum. Atumsha mash uwemprattarme. Túrasa kánuka mesertatui. ²⁵ Wisha winia Yúsrin nekas enentáimtajai. Yusa suntarí turutainia nuna nekas tu túrunattawai, tajai. Tuma asamtaí kakartarum. ²⁶ Tura chíchimisha nunka uchich pújakmanum nuí patatmittiaji” tímiayi.

²⁷ Ayu, katurse (14) tsawant naḡkaasmatai nú kashi Atria nayaantsanam jeamiaji. Nuí nase náḡkamas juram wémiaji. Nuyasaḡ kashi ajapén wiantin armia nu nunka ámunam jeateman nekaawarmiayi. ²⁸ Tura urutmá kúnakit tusa nekapmamiayi. Túram tráinta sais (36) mítruuyayi. Nuyasha ékemaḡ ataksha nekapmamiayi. Nuḡkia painti siati (27) mítru nekapmamiayi. Tuma asa nunka anumsatuk ajasun nekaawarmiayi. ²⁹ Tura kayanam ijiukaj tusar ashamainiak kuatru jirun kijinian chapikjaj kanú senkarin jinjáwar entsá ajunḡkarmiayi. Kijin asamtaí, inít tepeámtai nase juramkichmi tusar túrawarmiayi. Tura wake mesekar, tsawarḡti tusar matsamarmiayi.

³⁰ Tura matsatainaj wiantin armia nu, iikia uchich kanunam eḡkemprar pisarchatjiasht tu enentáimsarmiayi. Túmainiak kanú nujinia chíkich jirun ajuntaí tawa nútksaraḡ uchich kanun ajuntaí tusar pujuarmiayi. ³¹ Tura tuma wáiniak Papru suntara kapitántrín tura ni suntaríncha ujakmiayi. “Ausha uunt kanunmaḡ eḡketainiachkuḡkia atumsha uwemprashtatrume” tímiayi. ³² Tutai suntarsha uchich kanú chapikrín tsupirkar entsá ajunḡkarmiayi.

³³ Tura kashin káshik Papru ikiakártasa wakerak tímiayi “Ishichkisha yurumátarum. Atumsha katurse (14) tsawant kánutsuk yurumtsuk pujarme. ³⁴ Seajrume, ishichkisha yurumárum kakaram ajastarum, uwemprataj tusarum. Iimiata, nekaatarum, imiatkisha túmatsuk péemkattarme” tímiayi.

³⁵ Nuna tuasua amik Papru apatkun achik Yúsan yumínsamiayi ashí ímmianumaḡ. Tura puuk yuamiayi. ³⁶ Tura apatkun yuan wáinkiar, ashí aents shiir enentáimsar yurumáwarmiayi. ³⁷ Nusha ashí aents irurmaka jimiará sían nuyá ataksha setenta sais (276) ármiai. ³⁸ Yurumáwar ejemakar, yurumkanka entsá utsaḡkarmiayi, uunt kanu wampú ajasat tusar.

Kanu penké mesermiania nu

³⁹ Tura tsawarmatai wiantin armia nu, nunkan nekaacharmiaiyi. Túrasha énkentamunam káanmatak aan wáinkiar “*Ai kanu anun̄tai*” tiarmiayi. ⁴⁰ Nuyá jiru entsá ajuñman chapikr̄in tsupirkar entsá ikiukiarmiayi. Tura kanait j̄ink̄iárma ármia nuna chapikr̄in tsupirkarmiayi. Tura tarach kanú nuj̄iin amia nuna nenakarmiayi. Túram kanu káanmatkanam anumsatuk ajasmiaiyi. ⁴¹ Tura wainchi jímiar ámunam jeá kanu entsá wayá tepeamiayi. Tura kanú senkar̄inkia chíchimi yakí takuir ajámu asa kupintramiayi. ⁴² Suntarsha, achik júamu armia nú shuaran máataj tusa wakeriarmiayi, yukuak pis-araraj̄in tusar. ⁴³ Tura kapitíáncha Páprun uwemtikrataj tau asa nuna túratniun tsan̄katkachmiayi. Antsu chichaak “Emka yukuaktin nékarmena nu yukuakrum péemkatarum, tímiayi. ⁴⁴ Nuyá chíkichkia kanunmayá numi, kame náñkamas numi achikrum awamkarum péemkatarum” tímiayi. Tu túrawar ashí iwiaakuk jíintrarmiayi.

28

Marta nunkanam túrunamia nu

¹ Tura ashí iwiaakuk jíintrar, nu nunka Marta naartin nekaamiaji. ² Tura nūj matsamin armia nu, shiir awajtamsarmiaji. Tuma asamtai iisha tsetsema asakrin, tura yumisha yútakui, uunt jinia ikiapárrarmiayi. Tura “anamaitiarum” turammaji. ³ Pápruka jinia kukaru ikiaanank j̄inium pataamiayi. Túmawaj napi tsuéran ashamak jíinki, Papru uwején nemaramiaiyi. ⁴ Tura nú nunkanmayá aents, Papru uwején napi nemaran wáinkiar “*Ju áishmansha shuáran majchuashit*, tiarmiayi. Nayaantsanmayá uwempraitiat̄an̄ ni yusri iwiaaku átinian suritiawai” tiarmiayi. ⁵ Páprusha ni uwején pear napin j̄inium awan̄miayi. Tura penkesha yajauch ajaschamiayi. ⁶ Tura niisha eárchatpiash tusar ii pujuar̄miayi. “Túmatkesha jaka inianchatpiash” tiarmiayi. Túrasha ti núkap pujussha penké najawechmiayi. Túrunamtai, nuñkia nusháa enentáimprar “Pápruka yúschashit” tiarmiayi.

⁷ Nú nunkanam aentsu penker̄i ámiayi ni naarī Pupriu. Nú Pupriu ni j̄een in itiaarmamiaji. Tura menaintiú tsawant yurumkan̄cha suramsarmiaji. ⁸ Tura nūj pujarin Pupriu apar̄i tsuer, numpaj̄ai ijiarki jáamiayi. Túmakui Papru weri iyumiayi. Tura Yúsan áujtus amik uwején nin awantkamiayi. Túram penker̄ ajasmiaiyi. ⁹ Nu túramun nekaawar, nú nunkanmayá aents jaa armia nu tariar, niisha penker̄ ajasarmiayi. ¹⁰ Túram incha ti shiir enentáimturmasar núkap ajampramsamiaji. Túram ukunam ii wétin jeamtai ashí ii atsumamun suramsarmiaji.

Rúmanam jeawarmiania nu

¹¹ Ii wétsuk nú nunkanam menaintiú nantu pujusmiaji. Tura nuyá chíkich kanunam en̄kempramiaji. Nu kanusha Ariján̄trianmayá yaunchu tau menaintiú nantu yumi yútakui nūj pujumiayi. Nú kanu nuj̄iin numi-yus najankamu jímiar ekemiarmiayi, ni náar̄inkia Kástur tura Púruks. ¹² Iisha nūj en̄kemprar weri Serakúsa péprunam jeamiaji. Nūj menaintiú tsawant pujusarmiayi. ¹³ Tura jíinkir nuyañka nayaantsa ayamach weri Rijiu péprunam jeamiaji. Nūj kanarmiayi. Tura kash̄in anarīa nase suut umpuuntí támiayi. Tuma asamtai nú kash̄inkia Putiuri péprunam jeamiaji. ¹⁴ Nūj jeawakrin Yusshuar pujuar̄mia nu, ni j̄een juramkimiayi. Tuma asamtai nūj̄n chíkichkí tumiñ pujusmiaji. Tura nuyañka nunkan̄ Rúmanmaani wémiayi. ¹⁵ Tura

Rúmanmaya Yus-shuar, ii jeatniurin neka ásar jintiá inkiunmaktai tusar winiarmiayi. Chíkichkia Apiu pepru támanum táarmiayi, tura chíkichkia, Menaintiu Jeá tutainium táarmiayi. Nuna káunkan wáiniak Papru shiir enentáimias Yúsan yuminsamiayi.

16 Tura ii Rúmanam jeawakrin kapitíán Juriu achikia yarumman Rúmanmaya uunt kapitíáinín ejetimiyai. Túrasha, Pápruka jeá ikiamas niisháa pujustí, tiarmiayi. Tura Páprun ísat tusa chikichík suntarnak ni jeen apujtusarmiayi.

Rúmanam Papru Yus-Chichaman etserkamiania nu

17 Nuyá menaintiú tsawant nankaasmatai Pápruka Rúmanmaya Israer-áentsu penkerin untuk ikiaanak “Yatsurtiram antuktarum. Wisha Israer-áentsun yajauchin penké túrachmiajai. Tura ii uuntri akupkarmia nunasha yajauch chicharkachmiajai. Tuma ain Jerusarénum winia achirkar Rúmanmaya áentsnum surutkarmiayi. 18 Tura nu aencha winia anintsar, akupkatai, turutiarmiayi, wisha penké yajauchin, mantamnamnia tímianu túrachu asantai. 19 Túrasha Israer-shuarka “Atsá, akupkairap” turutiarmiayi. Nu tuma asantai, “antsu uunt akupin nekarati” tímiajai. Wikia wí shuara tunaarín kapitíáinín ujaktinían táchaitjai. 20 Tuma asantai, yatsurtirmin, atumin untukjarme chichastaj tusan. Yusa anaikiamurí, Israer-shuarti nákaunia nu táwiti wí tu étserkui, juí achikiar jiníkiámu pujajai” tímiajai Papru.

21 Tutai niisha tiarmiayi “Iisha Jutiá nunkanmaya aentsti, ame yajauch túramu papí penké wáinkiachuitji. Tura ii shuar nuyá táarainia nusha “au yajauch túraití” tu ujatmakcharmaji. 22 Túrasha ashí nunkanam yamaram chichaman jintinían yajauch chicharainiawai tama antukji. Tuma asantai amesha nu warintia enentáimtam nekaatai tusar wakeraji” tiarmiayi.

23 Nú tsawantai iruntrami tiarmia nú tsawant jeamtai, ti unturí aents Papru pujamunam iruntrarmiayi. Papru jintintiainiak Muisais yaunchu aar akupkamia nujai tura chíkich Yúsnan etserniu aarmaríjjajisha, Jesus nekas Yusa Anaikiamurínti tusa paant jintintiawarmiayi. Nuna tura káshik nankaama Yus akupeamunam pachiinkiatniun éte-étserkua kíarai iniaisamiayi. 24 Tura Papru táman antukarmia nu, chíkichkia, nekasaiti tusar umikiarmiayi. Tura antsu chíkichkia, nekaschaiti tusar umikcharmiai. 25 Chikichíkí enentaik' enentáimsatin atsá asantai, jünki weartasa pujuarmiayi. Túmainiakui Papru chichaak “Nékaseñ Yusa Wakaní yaunchu Yúsnan etserniu, Isayas naartin áarmaríjjají ii úuntrin chicharuk juna tímiajai:

26 “Ame weme au aents ju titia:

“Ántutka ántakrumsha nekaashtatrume,

Íitkia iyakrumsha wáinkiashtatrume.

27 Warí, au shuara enentái katsuárai;

Kuishíjjají ántaksha ántichua núnin áiniawai,

Jjisha epetkamua áanin áiniawai,

Iyaksha wáinkiajin tusa, ántaksha antukajin tusa

Enentáimkiusha nekaawajin tusa,

Winí uwemprajin tusa, tura Winí tsuamarajin tusa túrunayi”.

Nuní áarmaiti. 28 Tuma asantai, nekaatarum. Yamaikia Yusaj uwempratín ana nuna Israer-shuarsha susamuiti. Tura niníka nekas umikiartatui” tímiajai. 29 Tura Papru nuna tí iniaisantai Israer-shuar nuamtak núkap chicharnaiyasua wearmiayi.

³⁰ Tura Pápruka nuḵḵ jeḵ ikiamsamunam jimiará uwí pujusmiayi. Tura ashí aents nin iyutaj tusa wearmia nuna ni jeḵ itiaamiayi. ³¹ Tuma asantai Papru arantutsuk urukuk Yus akupeamunam ati, Uunt Jesukrístu túramurḵncha ashí etserkamiayi. Nútiksḵ etserkatniuncha Páprun penḵé suritkiacharmiayi.

Papru RÚMANMAYA SHUARAN papi akuptukma

Papru Rúmanmaya Yus-shuaran áatramania nu

¹ Wi Papru Jesukristu takarniuitjai. Núnisan Yus achirak ni Shiir Chichamen etserkat tusa akatar akuptukmiayi.

² Nu Chichamun Yus yaunchu “akupkattajai” tímiayi. Núnaka Yúsnan etserin Yus-Papinium paant ujakarmiayi. ³ Nu Chichamnum Yus ni Uchirín áujmatui. Ayashijjiainkia Tawit weeanum akiiniamiayi. ⁴ Tura ni tishiir wakanjjiainkia Yusa Uchirínti. Tura ti kakarmaiti. Jakamunmaya nantakmiajajai nekas Yusa Uchiríja nu, paant nekanamiayi. Niisha ii Uuntri Jesukristu. ⁵ Ni túramujai Yus shiir enentáimturuk nu Shiir Chichaman etserkat tusa akuptukmiayi. Núnisan ashí nunkanmaya shuar nu chichaman umirkar Jesusa náarín shiir awajsarat tusa akuptukmiayi. ⁶ Atumsha nuyá shuarairume. Tura Jesukristunu ajasarat tusa Yus achirmakuitrume.

⁷ Ashí Yus aneamutirmincha Rúmanam matsatrum nuna ju papin áateajrume. Yus ti péñker awajtamsatniun wakerutmarme. Ii Aparí Yussha ii Uuntri Jesukristusha waitnentramainia ásar imiatkinchanum ti shiir pujustinian yainmakarti.

Papru Ruma péprunam irautinian wakerimiania nu

⁸ Émkasha, átum Yus nekas enentáimtamun ashí nunkanam áujmatenan nekaan Jesukristun pachisan Yúsan ti shiir yumñsajai. ⁹ Tuke enentáirjai Yusa Uchirín ashí shuarnum etsertajai. Túrakui wi atumin ti Yus aneamutirmincha Rúmanam matsatrum nuna ju papin áateajuke áujtamun Yus nékarui. ¹⁰ Ashí tsawant ni wakerutakuinkia íitjarum tusan Yúsan sea-jai. ¹¹ Nekas íitniun wakerajrume. Nuí jean wakanmin yainkian Yusjai kanakchamin ajasúk tusan wakerajrume. ¹² Kame atumsha tura wisha Yus nekas enentáimtuinia asar mai ikiakánai ajatai tusan wakerajai.

¹³ Yatsurú, tuke íitjarum tusan wakerimjarme. Túrasha iyatsjarme. Kame Yus-Chichaman ujaakun chíkich shuarnuma áintsan atumíncha Yus kakaram takasman wáinkiatniun wakerajai. ¹⁴ Wikia Yus akuptuku asamtai ashí shuaran ujákartiniaitjai. Unuimiaruncha tura unuimiarchancha, ti nékainia nunasha tura nékachuncha, métekrak ujakartiniaitjai. ¹⁵ Tuma asan atumniasha Rúmanam pujarmena nunasha Uwempratin Chichaman ujointjarum tusan pujajai.

Uwempratin Chicham kakarmaiti

¹⁶ Nu Shiir Chicham Yusa kakarmarjjiai ti kakaram asa ashí shuaran uwemtikramniaiti. Tuma asamtai natsantatsjai. Nekas Israer-shuarnasha tura chíkich shuarnasha núnisan uwemtikramniaiti. ¹⁷ Nu chichamnum Yus enentáimsamia nu páantaiti. Júíti: Áyatik Yúsan nekas enentáimtuiniakui Yuska “péñkeraitme” tíminiaiti. Yus-Papiniumsha núnisan tawai: “Yúsan nekas enentáimta nuna Yus “péñkeraitme” tutai tuke Yusjai shiir wekasattawai.” Tu áarmaiti.

Aentsu tunaari

18 Shuar nekas chichaman nakitrar yajauchin túrataj tusar suriimiaini-awai. Túrawar tuke tunaarintin áiniawai. Nu shuaran Yus ti kajerkar ti asutiátniun nayaimpinmaya paant awajsaiti. 19 Tura nu shuarka ashí Yusna nekaamnia nuna Yus paant awajsa asamtai péñker nékainiawai. 20 Kame yámankamtaikniumiá Yus wáinchataitiat ni najanamurijjai júka paant nekaamniati: Nekas Yus asa tuke kakarmaiti. Nusha ti paant asamtai nu shuar tsankurnarchartatui. 21 Yúsan nékainiyat shiir awajsacharmiayi tura yuminsacharmiayi. Tuma ásar aya ánta nunak enentáimtuiniak ni enentáí tunaajai piakai. 22 Tura ti nekajai tuiniyat enentáimcha núnin ajararai. 23 Túmainiak jákachmin Yus imiá shiira nuna iniaisar shuar jakamnia nakumkamun shiir awajenawai. Tura nu arant namantinniasa napincha kuntinniasa yajasmacha nakumkar nuna shiir awajenawai.

24 Nu asamtai imiá yajauch enentáimiainiakui “áanik asati” tímiayi Yus. Túramtai ti natsanmainian túrunainiawai. 25 Yusna imiá nekasa nuna nakitrar antsu wait-chichaman anturkar nuna túrin áiniawai. Tuke Yúsak shiir awajsatniun iniaisar antsu ni najanamun tikishmatainiak shiir awajenawai. “Antsu tuke Yúsak shiir awajnastí” tajai.

26 Nuna túrin ásar matai Yus natsanmainia nuna wakeruktinian tsankatkarmiayi. Túramtai nuwasha áishmanjai tsanintinian nakitrar nuamtak yajauch awajnainiawai. 27 Núnisan áishmansha nuwajai tsanintinian iniaisar nuamtak áishmankak tsanirmanainiawai. Ti wakerunainiak ti natsanmainia nuna yajauch túrunainiawai. Tura yajauch túruiniak ni ayashí wáitsatniunak sumamawarmiayi.

28 Tura tuke Yúsan nakitiainia asamtai ti yajauch enentáimiainiak penké túrachminia nuna túrawarti tusa Yus tsankatkarmiayi. 29 Nu shuar ti tunaajai piaku áiniawai. Tsanirmausha aya kuítiak wakerincha tura yajauch awajin áiniawai. Nu arantcha awakmakun kajerniusha mankartincha tuke máanaincha anankartincha péñkercha awajkartincha, tsanumniusha áiniawai. 30 Nu arantcha chikichnasha yajauch áujmatin áiniawai. Yúsnasha nakitiainiawai. Áimniusha áiniawai. Tura “pénkeraitjai” tiar nankaamantu enentáimtumainiawai. Tunáa túratniun eainiawai. Aparíncha nukuríncha umirainiatsui. 31 Enentáincha áiniawai. Tana nuna umichu áiniawai. Anenkartichu ásar waitnenkartichu áiniawai. Tsankurcha áiniawai. 32 Yuska “Shuar nuna túrinkia jákatniuiti” taman nékainiyat tuke túrukin wénawai. Tura nu arantcha chikich yajauch túramtai ti shiir wararenawai.

2

Shuar tunáa túramun Yus paant nékawai

1 Amesha enentáimtumastá. “Shuar nu yajauchin túrana nu imiá tunáa shuaraiti” tákumka amesha métek túrakum imiá nekas sumamame. 2 Yuska nu tunaan túrin ainia nuna súmamtikiashtinkiait. 3 Amesha nuna túrin “imiá yajauchiiti” táyatam amesha métek túrakunkia Yus sumamtikiattana nuyá çitiurak uwemprattam? 4 Yus ti waitnentra asa nu tunáa ikiukim Nin enentáimtustinian katsuntramuk nákarmawai. Tura péñker asi wárik asutiámchakui sumamashtiniaitjai çtu enentáimtumamek? Tu enentáimkium ni waitnentramarj ántar awajsaitme. 5 Tura tunaarum enentáimtutsuk

tuke túrakmeke súmamtikiatin tsawantaj ti tunáa irutmampramujaj ti asutniátame. ⁶ Nu tsawantaj ni túramujaj métek Yus ashí shuaran akirartatui. ⁷ Shuar tuke péñker túrak ashí shiira nunasha tura tuke amuukachmin ainia nunasha wakeruiniana nuna Yus tuke iwiaaku Nijjaj shiir pujustinian súrsartatui. ⁸ Antsu péñkera nuna wakerutsuk antsu aya yajauchin wakeruiniak Yúsán nakitiainia nuna Yus ti kajerak asutiáwartatui. ⁹ Nekas Israer-shuarsha tura núnisan Israer-shuarchasha tunaan túrin áiniakka ti wáitsartatui. ¹⁰ Antsu nekas Israer-shuarnasha tura núnisan Israer-shuarchancha péñker túrin áinia núnaka Yus ti shiir imiatkinchanum apujarsartatui. ¹¹ Yus ashí shuaran akantsuk mai metek iyawai. ¹² Shuar Muisais akupkamun nékatsuk tunaan túraka aya júnisan sumamawartatui. Tura shuar Muisais akupkamun nékayat tunaan túranaka nu akupkamujaj sumamawartatui. ¹³ Akupkamun aya antukarua nuka Yusaj péñker áiniatsui antsu antukar umirainia nuna Yuska “péñkeraiti” tawai. ¹⁴ Israer-shuarchaka Muisais akupkamun takakainiachkusha aya ni enentájjaj nu akupkamun umirainiak ¹⁵ nu umireamujaj Yus nu akupkamun ni enentáin ikúirsarua nuka paant nekaamniati. Nujaj métek túruiniak shiir enentáimiaiawai. Tura métek túruiniachkunaka péñkercha enentáimiaiawai. ¹⁶ Wi Uwempratin Chichaman étsereaj nu ashí shuar uukrishá túramun ashí paant awajarsartatui. Tura nuna etserkatniun Jesukristun anaitiukmiayi. Nu tsawantaj tunaan túrin sumamawartatui.

Israer-shuarsha Muisais akupkamun umircha áiniawai

¹⁷ Ámeke “Tura Israer-shuaraitjai. Muisais akupkamun takakkui winia Yúsruka ti shiir enentáimturui, tátsumeash. ¹⁸ Yus wakeramuncha nékajai. Tura akupkamun nekaan péñkera nuna wakerajai, tátsumeash. ¹⁹ Wakannium kusuraru áinia nunasha jintintiamniatjai. Tura tsáapninian nekamtikiawarminiati, tátsumeash. ²⁰ Akupkamu ti penker neka asan nekasa nuna unuimiaruitjai. Tuma asan nékachuncha ántuiniachuncha jintintiamniatjai” tátsumeash. ²¹ Pai, chíkichka unuiniatiatmesha ¿urukamtai imia ámeke unuimiatsum? “Kasamkashtiniati” tu étsereatsmek. Táyatmesha ¿urukamtai ámeke kasamam? ²² “Tsanirmashtiniati” tátsumek. Enta, ¿urukamtai ámeke tsanirmam? “Ántar-yusan nakitijai” tátsumek. ¿Urukamtai ámeke nu yusa jéeniá kasamam? ²³ Akupkamun takakjai tusam shiir enentáimtumayatam nu akupkamu umireachkum Yus yajauch awajeatsmek. ²⁴ Yus-Papiniumsha núnis áarmaiti: “Átum péñker umirchamujaj Israer-shuarcha Yúsán yajauch chicharainiawai.”

²⁵ Muisais akupkamia nu ashí umireakmeke nii timia núnismek tsupirnaktin péñkeraiti. Tura takamtsuk umireachkumka tsupirnakcha núnisketme. ²⁶ Chíkich shuarsha tsupirnakchaitiat Muisais akupkamun umireakka tsupirnatskesha tsupirnakua áintsankete. ²⁷ Nu shuar tsupirnakchaitiat akupkamun ashí umireak atumin tsupirnakutirmin akupkamu takakuiti-atrum umircha asakrumin súmamtikramawartatui. ²⁸⁻²⁹ Kame nekas Israer-shuarka aya pátatkechu antsu tuke enentájjaj Yúsán wakera núiti. Núnisan nekas tsupirnakinka aya ayashjjajinchuít antsu enentáiniam shiir áinia núiti. Nekas akupkamu aya áarchamuít antsu nekas enentájjaj umirkamua núiti. Nekas tú tura núnaka aents shiir enentáimtuiniachkuisha Yus shiir enentáimtai.

3

1 Núnis ajsa Israer-shuar ainia nu çwarí pênkernak takakainia? Tura tsupirnaktincha çwariniak yayá? 2 Ti pênkeraiti. Warí, émkaka, Yus ni chichamen Israer-shuaran súсахarmakia. 3 Kame chíkich chíkich umichu ániakui Yus tsankatkamia nuna nú shuaran súсахmatainkia nuikia “Yus umichuiti” çtítinkiait? 4 Pênkea. Antsu Yuska nekas túratniua nujaj métek ashí túriniaiti. Shuar umichu ániakuisha ni támarin mash umiktatui. Ni tamajaj shuáran wáitrin awajeakka nusha pênkeraiti. Núnisan atí. Yus-Papisha métek tawai:

“Támena nuna “imiá nekasaiti” tiartatui, tura súmamtikramataj tuíniakuisha nupetmaktatme” tawai.

5 Nu arantcha, “Wi tunaan túramujaj Yus imiá pênkera nuna paant awajeakka çurukantai winia asutiua? çNuka pênkerkait?” tíchatapash. (Kame aents chichainia núnisnak tajai.) 6 Warí, Yus pênkerchaitkiunka çitiurak ashí shuara tunaarín súmamtikiawarat? Kame imiá pênkeraiti.

7 Núnisan, “Wi umirkachmajaj Yus tuke umiiniana nuna paant awajeakka nuikia nujaj in shiir awajsantai çurukantai “tunaitme” túruta?” tíchatapash. 8 Warí, “tunáa túramujaj Yúsán pênker awajeajaj,” tú nekas enentáimpramniaitkiuinikia shuar nuikia “Wats, ashí pênker áti tusar tunáa túratai” tumin ainti. Kame chíkich shuar in kajertamainiak “nuna jintintiainiawai” túramji. Nu shuar sumamawartin áiniawai.

Ashí shuar tunáa túraitji

9 Nuikia Israer-shuartikia chikichjaj nankaamas çpênkerkaitiaj? Penkesha. Warí, Israer-shuartisha Israer-shuarchajajisha ashí métekrak tunaan túrin áiniawai. Núnaka jú áarmajaj paant awajsaitjai. 10 Yus-Papisha núnisan tawai:

“Pênkeran túrin chikichkisha atsawai.

11 Yúsán nekaatniur nakitiainiawai. Yusnasha eqiniatsui.

12 Yusnumia kanakiar menkakatniunam wénawai. Chikichkisha pênkeran túrin penké atsawai.

13 Ashí yajauch chichainiak iwiarsamu yama urainiua núnisan áiniawai. Ni chichamejaj tuke anankartin áiniawai. Chichame napía áintsan najamin áiniawai.

14 Aya yajauchin kakaram áujmatin áiniawai.

15 Máataj tusa wárik yujarin áiniawai.

16 Aya ti itiurchat ti yajauch awajin áiniawai.

17 Shiir pujustinian nékainiatsui.

18 Ishichkisha Yúsán ashamenatsui.”

19 Yaunchu akupkamun umirkatin ainia nú shuar aya takamtak umirkatin áiniawai. Tuma asamtai ashí shuar umirkachu ásarmatai Yus nujaj súmamtikiawartatui. Túrakui niisha pachischamin áiniawai.

20 Akupkamuka aya ii tunaarín paant awajturmaji. Tuma asamtai akupkamu pênker umirkatniujaj Yus “pênkeraitme” turamchamniaitji.

Aya Yus shiir enentáimtusar uwempramniaitji

21 Yus-Chicham yaunchu áarmanum itiura Yus in “pênkeraitme” túramniaitaj nuna paant tawai. Kame akupkamujajinchuiti. 22 Antsu iisha ashí shuarsha núnisan aya Jesukrístu shiir enentáimtakrin Yus “pênkeraitme” túramniaitji. 23 Kame ashí shuarti tunáa túraitji. Tuma asar Yusjaj métek pênker ajastin penké jeatsji. 24 Tura Yus in waitnentrama asa kuítchajaj

“pénkeraitme” túramji. Jesukristujai uwentikrampra asa túramji. ²⁵ Tura Kristun akupkamiayi ni jakamujai ashí tunaan asakátratniun. Túramtai shuar Nin nekas enentáimtuiniakui Yus tsan̄kuramniati. Yaunchu tunáa túramun katsunteak enentáimtuschemiayi. Yamái tsan̄kuramnia nuna yaunchu nekáa, nuna túramniuyayi. ²⁶ Tura yamaiya tunaancha tsan̄kureak ashí shuar Jesusan nekas enentáimtuinia nuna “pénkeraitme” tuke tíminiati. Kristu jakamujai nuka paant ajasai.

²⁷ Nújain̄kia ii pénker ajasjini nu “winia kakarmarjai túrunajai” tíchamnia asar çnan̄kaamantu enentáimtumarminkaitiaji? Pen̄keshá. Warí, akupkamu umitsuk aya Kristu nekas enentáimtakrin Yus “pénkeraitme” túramji. ²⁸ Nujai páantaiti. Akupkamu umirtsuk aya Jesukristu shiir enentáimtakrin Yus “pénkeraitme” túramminiatiji.

²⁹ Warí, Yuska Israer-shuarnasha tura núnisan̄ Israer-shuarchancha mai ni Yúsriñchukait. ³⁰ Kame aya chikichik Yúschakait. Tura tsupirnakuncha tsupirnakchancha mai metek aya Jesukristun nekas enentáimtuiniakui “pénkeraitme” tíminiati. ³¹ Shuar Yúsan shiir enentáimtamujai pénker ajastin ániakui nujai çakupkamu ántar awajsamukait? Atsá. Antsu nuna nan̄kaamas umirkatin awajsamúiti.

4

Apraámsha Yúsan shiir enentáimtamujai pénker ajasmiania nu

¹ Ashí Israer-shuara uuntri Apraám enentáimtustai. Niisha çitiurak Yusjai pénker ajasma? ²⁻³ Ni pénker takasmajai Yusjai pénker ajasuitkiun̄ka nan̄kaamantu enentáimtumarainti. Antsu Yus-Papí tawai: “Apraám Yúsan shiir enentáimtakui Yus “pénkeraitme” tímiayi” tawai. Nu túramu asa Apraámsha Yus ímmianum nan̄kaamantu enentáimprachminiatiti. ⁴ Shuar íniamna nu takasmatai çaya tsan̄ka asam akiktatmek? Warí, ni takasmanum páchitsuk akikchatniukait. ⁵ Antsu shuar ni pénker turamuri enentáimtsuk áyatik “Yus tunáa shuaran pénker awajniuiiti” tu enentáimtakui Yuska tsan̄ka asa “pénkeraitme” tawai. ⁶ Tura pénker túrachunak Yus “pénkeraitme” takui nu shuar shiir warasminiatiti. Núnisan̄ tawai uunt akupin Tawit:

⁷ “Shuar ashí ni tunaar̄in Yus asakátar tsan̄kuramu ana nuka shiir enentáimpramniati.

⁸ Uunt Yus ni tunaar̄in enentáimtachma asa ti warasminiatiti.” Tu tímiayi Tawit.

⁹ Çaya tsupirnakukeash warasminiatit? Tura tsupirnakchasha waraschamniakait. Warí, Apraám Yúsan shiir enentáimtakui Yus “pénkeraitme” tímiayi. ¹⁰ Tura Apraám tuke tsupirnat̄sain̄ Yus nuna tímiayi. Emka Yus “pénkeraitme” timia nú ukunam Apraám tsupirnakmiayi. ¹¹ Apraám tsupirnat̄suk Yúsan shiir enentáimtusmatai Yus “pénkeraitme” tusa “tsupirnak̄tiniatme” tímiayi. Nújain̄kia ashí Yúsan shiir enentáimtuinia nú shuar tsupirnat̄skeshá Apraám weeá ániawai. Tura nu shuaran Yus “pénkeraitme” tawai. ¹² Tsupirnakusha aya tsupirnakusa Apraám weeá ániatsui antsu nu arant Apraámjai métek Yúsan shiir enentáimtuinia nuka Apraám weeá ániawai. Kame Apraám tuke tsupirnat̄suk Yúsan shiir enentáimtusmiayi.

Yus shiir enentáimtamujai Nii timia nu uminkiat̄tawai

¹³ Yaunchu Apraáman Yus chicharuk “Amincha amée weeá shuarnasha jú nun̄kan susattajai” tímiayi. Nunasha Apraám Yus akupkamun umireakui tíchamiayi. Antsu Apraám Yúsan nekas enentáimtakui Yus “pénkeraitme” taku

nuna tsan̄katkamiayi. ¹⁴ Kame aya akupkamun umirniun súsatniuitkiuñkia nuikia Yus enentáimtustin ánrtraiti. Tura Yus Apraáman timia nusha ánrtraiti. ¹⁵ Akupkamu akui shuar umirkachka ti asutniáshtatuak. Tura atsakuñkia ¿asutniátniukai? ¿Itiurak umirtsuk ikiuktiñ?

¹⁶ Tuma asamtai Yus ti anen̄kartin asa Nin nekas enentáimtuinian ashí tsan̄katkaiiti. Nújajñkia Apraám weeasha Yus Apraáman timia nuna páchitsuk wáinkíártatui. Iisha Apraámjaj métek Yus nekas enentáimtakur ní weeaitji. Tuma asamtai Muisais akupkamun umirniuncha tura umirniuchuncha mai metek ashí in Yus ashí Apraáman timia nuna tsan̄katramkattaji. ¹⁷ Kame Yus-Papiniun Apraám áatramuiti: “Untsurí shuarsha amée weeá ajasartatui.” Nu asamtai iisha Apraámjaj métek Yus shiir enentáimtakrinkia Yus incha Apraám weeá áintsan̄ írmaji. Nú Yuska ti kakaram asa jakancha iwiaaku awajniuiti; tura atsana nunasha ana nútksan̄ nájaniu.

¹⁸ Yus “ti pampantatme” takui Apraám ti uuntach áyat Yus timian enentáimtak yajutmartinian nákasmiayi. Nujaj untsurí shuar ní weeá ajasarmiayi, Yus timia áintsan̄. ¹⁹⁻²⁰ Apraámsha sian̄ (100) uwí takakuiiat tura ni nuwé Sarasha júretsuk uunt ajasmataisha tuke iniaitsuk Yus timia nuna nekas enentáimtusmiayi. “Yus nekasash ta” tútsuk shiir awajsamiai. Nujajsha nuna nan̄kaamas kakaram ajasmiai. ²¹ Tuma asa “nekas Yus tana nuna páchitsuk umiktatui” tu enentáimpramiayi. ²² Nu asamtai Yus “pénkeraitme” tímiayi.

²³ Tura Yus nekas enentáimtamunam Yus “pénkeraitme” tana nu aya Apraám̄nak áatrachmaiti. ²⁴⁻²⁵ Antsu incha túramji. Iisha núnisrik ii Uuntrj Jesus nekas enentáimtakrinkia Yus incha “pénkeraitme” turamtatji. Jesuska ii tunaar̄in jarutramkatniun surunkamiayi. Tura nujaj Yus in “pénkeraitrume” taku Jesusan ataksha iniantkimiayi.

5

Yus “pénkeraitme” túramkurin shíiraiti

¹ Tuma asamtai Yus nekas enentáimtakrin Yus “pénkeraitme” túramji. Nujaj iisha Yusjaj shiir nawamnaikar pujaji. Núnaka ii Uuntrj Jesukristu ni jakamujaj sumartamkamiayi. ² Tura Nii shiir enentáimtakur Yusaj weankaitji. Tura Kristu jarutramkakrin Yus ti anen̄maji. Tura tuke anenma asakrin Nijijaj métek shiir ajastin nákakur waraaji. ³ Nu arantcha yamá itiuichat pujayatrik nu itiuichatjaj unuimiartatji tusar waraaji. Katsuntratniuncha unuitiamji. ⁴ Tura nu unuimiarar ii katsuntram paant átatui. Tura nuyá Yus ti shiir awajtamsattajnia nuka shiir enentáijjaj nákastatji. ⁵ Nu ti shiir enentáimsar nákamujaj anan̄mamsuji. Yuska ni Shiir Wakan̄in ii enentáin pujurtamuk ni anen̄kartutair̄in ti paant awajturmajji. Tuma asamtai Yus túratin nákejnia nu imiá nekas wainkiattaji.

⁶ Iikka pen̄ké uwemprachmin asakrin tsawant jeamtai Kristu ashí shuara tunaar̄in jarukmiayi. ⁷ Shuar chikich shuaran uwemtikratniun ¿jaruktatuak? Pénker shuar añ jarukchattawai. Kame ti pen̄keraitkiuñkia jarukchaintiash. ⁸ Antsu ii tuke tunáa áriniñ Kristu jarutramkamiayi. Nujaj in ti anen̄majnia nuna ti paant inakturmaji. ⁹ Tura ni numpejaj tunaar̄incha awajsamu asar imiá nekas Yus asutiámamnia nuyá uwempraitji. ¹⁰ Yusa nemasrj áyatar Yusa Uchirí jakamujaj yamaikia Yusjaj shiir nawamnaikar pujaji. Nu arant nuñkia Kristu tuke iwiaaku asa iijjaj tsaniñkiu asa ashí yajauchinmayá

uwemtikramar tuke shiir awajtamsattaji. ¹¹ Ii Uuntr̄i Jesukr̄istu jakamujai Yus̄jai shiir nawamnaikia asar ti waraaji.

Ataṅsha tura Kr̄istusha túrawarma

¹² Ayu. Yámankamtaik emka áishman̄ Ataṅ nin̄ki tunaan túramtai nú tunaajai ashí shuar tunaarintin ajasarmiayi. Tura ashí tunaarintin ajasar mash jákatin ániawai. ¹³ Akupkamu atsakuin̄kia umirkachma nekaachminiaiti. Tuma ain̄ Muisais akupkamu atsaisha tuke tunaan túrin ármiai. ¹⁴ Ataṅ pujumia nuyá Muisais tuke akupeatsain̄ shuara tunaari paantcha ain̄ ashí shuar tunaan túrawar jákarmiayi. Kame ni tunaari Ataṅna áintsachauyayi. Ataṅka Yus akupkamu paant ujakman umirkachmiayi. Antsu nu shuar Yus akupkamu paant nékainiachiatan̄ tunaan túrin ániak jákarmiayi. Tura Ataṅka Kr̄istujai apatkar enentáimpratai.

¹⁵ Ataṅ tunáa túramia nujai apatka iisam, Yus in tsankatramaj nuka nan̄kaamas péṅkeraiti. Kame Ataṅ nin̄ki tunaan túramujai ashí aents untsur̄i armia nu, tunaarintin ániak, jákarmiayi. Tura Yus in ti anenma asa chikichik áishman̄jai nuna nan̄kaamas tí shiiran tsan̄katramaji. Jesukr̄istujain̄kia untsur̄i shuaran uwemtikrar ti shiiran tsan̄kateawai. ¹⁶ Ataṅka tunaari imiá yajauch ain̄ nuna nan̄kaamas péṅkeran Yus tsan̄katramkaitji. Iis, aya chikichik tunaan túramujai aents sumamawarmiayi. Antsu Yus uwempratniun tsan̄katramaj nujain̄kia ti untsur̄i tunaan asakárui, tura “péṅkeraitme” túramji. ¹⁷ Chikichik áishman̄ tunaan túramujai aents jákatin ániawai. Tura nuna nan̄kaamas chikichik áishman̄ Jesukr̄istu túramujai ti shiir pujustatji. Kame Yus ti anenma asa ii péṅker túratsrin̄i “péṅkeraitrume” túramji. Nu asantai yamaram iwiaakmanum kakaram ajaji.

¹⁸ Ataṅ tunaan túramujai ashí tunaarintin ajasar jákarmiayi. Núnisan̄ Jesukr̄istu péṅker túramujai ashí shuar Yus “péṅkeraitme” timia nuka yamaram iwiaakmajai tuke pujusartatui. ¹⁹ Núnisan̄ chikichik áishman̄ umirkachmajai untsur̄i tunaarintin ajasarmiayi. Tura chikichik áishman̄ umirkamujai untsur̄i shuar péṅker awajnasarmiayi.

²⁰ Wats, tunáa ti paant atí tusa Yus ni akupkamur̄in susamiayi. Túrashá ti tunáa pampaakuí Yus nuna nan̄kaamas waitnentrak nu tunaan asakátramji. ²¹ Shuar tunaan túrin ásar jákatin ármiai. Tura núnisan̄ ii Uuntr̄i Jesukr̄istu túramujai Yus in “péṅkeraitrume” túramkurin iisha tuke iwiaaku pujustinaiatji.

6

Kr̄istujai jaka asar tunáa túrachminiaitji tura Kr̄istujai tsan̄in̄kiu asar iwiaakuitji

¹ Núnisaitkiuin̄kia Yus nan̄kaamas waitnentrakpratai tusar ¿tunáa túrattajik? ² Péṅkea. Warí, iikia tunáa túrashtin jákaitji. Jáka ¿itiurak tunaan túramniait? ³ Imianniutikia Kr̄istujai tsan̄in̄kiu asar imianir Niijjai métek jaka áintsar aji. ⁴ Tura imianir Kr̄istujai jaka áintsar métek iwianrasuitji. Tura Yus ti kakaram asa Kr̄istun jakan iniantkimia núnisan̄ incha nu kakarmajai yamaram enentáijjai péṅker wekasatniun iniantankimiaji.

⁵ Kr̄istujai tsan̄in̄kiu asar Niijjai métek jaka áintsan̄ketji. Tura núnisan̄ Niijjai métek nantaktiniaitji. ⁶ Yaunchu enentáimtain̄kia Kr̄istujai métek jaka asantai ii yajauch wakerutain emen̄kátrutmakuitji. Tuma asantai yamaikia pen̄ké umirkashtiniaitji. ⁷ Kame ¿jáka itiuurak tunaan túrat? Yamaikia

an̄kant ajasuitji. ⁸ Iisha nekas Krístujai jákaitkiurkia Niijjai métek tuke iwiaaku pujustin enentáimji. ⁹ Kame Krístuka chikichki jaka nantakin asa atakka jákashtatui. Túmaitkiui atakka ajakrachminiati. ¹⁰ Kristu chikichki jaka asa ashí tunaajai itit awajsachmin ajasuíti. Tura yamaikia iwiaaku pujá asa Yúsan shiir awajsatniun pujawai. ¹¹ Atumsha núnisrumek jaka áintsarum tunáa túrachmin enentáimtumastarum. Antsu ii Uuntri Jesukrístujai tsaniñkiu asarum iwiaaku pujakrum Yus shiir awajsatarum.

¹² Nu asamtai tunaaka ayashmijn akuptamkashtiniaitrume. Ayashí wakeramuri umirkashtiniaitrume. An̄kantaitrume. ¹³ Atumi ayashí tunaan túrat tusarum ikiasairap. Antsu jakamunmaya nantakin asarum Yus wakeramu túratin surumaktarum. Tura ayashmisha aya péñkernak túratí tusarum Yus íktustarum. ¹⁴ Akupkamu umirkatniujai iwiaaku pujatsrume. Antsu atumin Yus ti anenma asa yamaram iwiaakman suramsaitrume. Tuma asamtai yamaikia tunaaka nupettamkachminiati.

Tuke umireajnia nuna takarniur̄ntji

¹⁵ Nuikia akupkamu umirtsuk antsu Yus ti anenma asakrin iwiaaku pujakur ¿“Páchitsuk tunaan túramniaitjai” títiatjik? Péñkea. ¹⁶ Tuke umireajnia nuna takarniur̄ntji. Nuka nékatsrumek. Tura ni takar̄in ajasam umirkatniuitme. Tuma asamtai tunáa umirkurkia ni takarniur̄ntji tura umirkar jakattaji. Tura Yus umirkurkia péñker wekasattaji. ¹⁷ Atumsha yáunchuka tunáa umirniuitatrum ikiukrum yamaikia nekas chicham antukurmena nu nekas atumí enentáijjai umirkaitrume. Tuma asamtai Yus ti yum̄nsatniuiti. ¹⁸ Yamaikia tunaanumiã an̄kant ajasu asarum ti péñker wekasatniunam pachĩnkiaitrume. ¹⁹ Paant nekaak tusan takarniun pachisan tájarne. Wats, yaunchu atumí ayashí mūjmiainian tura ashí yajauchin túrat tusarum tsan̄kamakmarne. Núnisrumek yamaikia atumí ayashí péñkeran túrat tusarum tura tuke Yusjai shiir wekasat tusarum tsan̄kamaktarum. ²⁰ Atumsha tunáa umirniuyarne nuikia péñker wekaichauyarne. ²¹ Tura nujajisha ¿warí péñkerna yáinmakmarum? Iista, yamá natsanmainchakait. Nusha jákatniunam júawai. ²² Antsu yamaikia, tunaanumiã uwempra asarum Yus umirniuitrume. Antsu júka Yusjai shiir wekasatniunam júawai tura nuyá tuke iwiaaku pujustatrume. ²³ Tunáa takarkumka tuke jákatniun akirmaktatui. Antsu Yuska iikia takaatsriniñ pen̄ké ántar tuke iwiaaku pujustinian suramsattaji. Ii Uuntri Jesukrístujai tsaniñkia pujá asakrin nuna túrutmattaji.

7

Akupkamujai an̄kantaitji

¹ Enentáimpratarum yatsuru. Jáka akupkachminiati. Aya iwiaakna nu akupkamniati. Nu paant nékatsrumek. ² Wats, nuwá nuátkamu ni aishri iwiaakku niijjai tsaniñ pujustiniati. Tura aishri jakamtai an̄kant ajawai. ³ Tuma asamtai aishri iwiaakain̄ chikich áishman̄jai tsaniñkia tsanirmawai. Tura ni aishri jakamtai chikich áishman̄jai páchitsuk nuatnakminiati tura nuikia tsanirmatsui.

⁴ Núnisrumek atumsha, yatsuru, Kristu ayashí muchitmarí ajasu asarum akupkamu emettachmin jaka áintsarum ajasuitrume. Túrakrum Krístujai nuatnaikiatin áintsarum an̄kantaitrume. Niisha jakamunmaya nantakniuiti. Yamaikia Krístunu ajasu asar Niijjai tsaniñkiar Yus wakeramu péñker túratniuitji. ⁵ Yaunchu wakerutai umirniuyaj nuí akupkamu enentáimtusar

nuna nan̄kaamas yajauchia nu wakerimji tura jákatniunam juramkimji. ⁶ Antsu yamaikia akupkamu emettachmin jaka asar an̄kant ajasuitji. Túrunar akupkamu yaunchu áarma nu iniaisar yamaikia Yusa Wakaníjjai tsańiakur yamaram iwiaakmajai péńker wekasamniaitji.

Winia enentáiruj tunáa ana nu

⁷ Núnisaitkiuin̄kia “Akupkamu yajauchiiti” ¿titiájash? Atsá. Warí, akupkamuka tunaan ti paant awajeawai. Akupkamu “Chikichna wakerukaip” táchakuin̄kia wakerukchajai. ⁸ Tura nu akupkamun enentáimtakui winia enentáiruj tunáa ana nu ashí yajauchin ti wakerumtikrimiayi. Kame akupkamu atsakui tunaan ti enentáimtichaintjai. ⁹ Yaunchu akupkamun nékachkun nan̄kamsanak enentáimniuyajai. Tura akupkamun nekaan tunaan nekaamjai tura jaka áintsanak ajasjai. ¹⁰ Tuma asamtai akupkamujai péńker wekasatniuitiatan umirkatniun tujintiakui aya jákatniunam jurukni. ¹¹ Kame tunáa wakerutain̄kia nu akupkamujai anan̄krua péńker iwiaaku pujustiniian surutsuk nu akupkamujai jákatniunam jurukmiayi.

¹² Tuma asamtai akupkamuka Yusna asa ti peńkeraiti. Yajauchichuiti. ¹³ Nuikia ¿peńkera nu jákatniunam júrawak? Atsá. Antsu tunáa wakeruktin jákatniunam jurukmiayi. Nuna tura asa tunáa imiá yajauchia nu nekaamniaiti. Tura tunáa wakerutai péńker akupkamujai jákatniunam jurukmiatai, nujai Yus “tunáa wakerutai imiá yajauchiiti” tusa paant awajsamiayi. ¹⁴ Akupkamuka Yúsnaiti. Nu paant nékaji. Antsu wikia ayashna nuna wakerakun tunaan umireajai. ¹⁵ Kame túrajna nuna itiurchat enentáimtajai. Péńker túratniun wakeraj nuna túratsjai. Antsu nakitiaj nuna nekaska túriniaitjai. ¹⁶ Akupkamu péńkeran nekaan umirkatniun wakerajai. Túrayatnak umirchaitjai. ¹⁷ Tuma asamtai wíchaitjai tunaan wakerakun túrajna nuka. Antsu winia enentáiruj tunáa wakerutai pujá asa nu túrumtikriniaiti. ¹⁸ Yaunchu enentáimtai winia enentáiruj pujana nu peńké yajauchiiti. Nuna ti paant nékaji. Tuma asamtai péńker túratniun wakerayatnak peńké tujintiajai. ¹⁹ Péńker túratniun wakerayatnak túratsjai. Antsu tunaan nakitiaj nuna túrajai. ²⁰ Nu asamtai nakitiaj nuna túrakun wíchaitjai antsu winia enentáiruj tunáa wakerutai pujana nu túriniaiti.

²¹ Júnisaiti. Péńker túratniun wakerakun aya tunaan ínkiuajai. ²² Nekas enentáijjai Yusa akupkamurín wakerajai. ²³ Tumaj yaunchu enentáimtai winia enentáiruj pujurtak nupettawai tura nekas wakeraj nuna akirturui.

²⁴ Maa, ti waitiajai. Jú ayash wakeramujai jákatniunmaya ¿yaki uwemtikrurat? ²⁵ Yuska ii Uuntrí Jesukristujai túrummniaitji. Tuma asamtai Yúsan ti yumińkijai. Ayu. Winia enentáirjai Yus akupkamun umirniuitjai. Antsu winia ayashrujai tunaan umireajai.

8

Yusa Wakaníjjai péńker wekasatin

¹ Jesukristujai tsańińkiarun Yuska “tunaan túrawar jákatniunam wémin áiniawai” tatsui. Nu shuar ni ayashí wakerana nuna umirtsuk Yusa Wakaní wakerana nuna umirainiawai. ² Jesukristujai tsańińkiu asakrin Yusa Wakaní nekas iwiaaku awajtamsaitji. Tuma asamtai tunáa túratniunmaya tura jákatniunmayasha an̄kant ajasuitji. ³ Ayash wakerutain̄kia, wi akupkamun enentáimtakui, nuna nan̄kaamas tunaan wakerumtikrimiayi. Tuma asamtai akupkamuka yáinkiachminiuyi. Antsu akupkamu tujinkiamia nuna Yus

túraiti. Ni Uchirín ayash̄tin awajas tunaan jarukat tusa akupkamiayi. Tura nujai ayash̄ tunáa wakeramun nupetkamiayi. ⁴ Túramtai ii yamaikia ayash̄ wakerana nu umirtsuk tura Yusa Wakaní wakeramu túrar akupkamu tana nu umirniuitji. ⁵ Ayash̄ wakeramun umirainia nu, ayash̄nia nunak enentáimtuiniawai. Antsu Yusa Wakaní wakeramun páchinia nuka Yúsnan enentáimtuiniawai. ⁶ Ayash̄nia nuna enentáimtuinia nú shuar jákatniunam wénawai. Antsu Yúsnan enentáimtuinia nuka Yusjaj shiir nawamnaikar tuke pujusartatui. ⁷ Aya ayash̄ wakeramun enentáimtuinia nú shuar Yusa nemasrj áiniawai. Yus akupeamun nakitiainia ásar ni taman umirkatniun penké jeainiatsui. ⁸ Tuma asamtai shuar ni ayash̄j wakeramurj warareakka Yúsna shiir awajsachminiati.

⁹ Tura átumka ayash̄ wakeramu umirtsuk tura Yusa Wakaní pujurtamkurmin ni wakeramu enentáimtiniaitrueme. Ashí shuar Krísturtin ainia nu ni Wakanin takaku áiniawai. Takakchaitkiunka nuikia Krístunuchiiti. ¹⁰ Tura Kristu átumin pujurtamkurminkia atumí ayash̄j tunaajaj jakamnia ajñ Yus “penkeraitme” túramu asamtai atumí wakanin̄kia nekas tuke iwiaakuiti. ¹¹ Yus Jesukrístun jakan iniantkimiayi. Tuma asamtai ni Wakaní atumí enentáin̄ pujurtamkurminkia Jesusan iniantkimia núnisañ nu Wakanjaj yamaram iwiaakmajaj iniantamkittiarne.

¹² Tuma asamtai, yatsuru, ayash̄ wakeramu penké umirkashtiniaitji. ¹³ Ayash̄ wakeramu umirniuitkiurmeka jakattarme. Antsu Yusa Wakaní pujurtamkurmin ayash̄ wakeramu nupetkarmeka penker wekasarum nekas iwiaaku átatrueme.

¹⁴ Ashí shuar Yusa Wakaní timiajaj métek wekainia nu, nu shuar nekas Yusa uchirinti. ¹⁵ Yusa Wakaní in̄ pujurtamkurin̄ Yusa uchirj̄ ajasar sapijmiatsuk Yusaj weamkar “Aparú” tímimniaitji. ¹⁶ Nu Wakan “nekas Yusa uchirin̄me” ii enentáin̄ túramji. ¹⁷ Tura ni uchirj̄ ajasu asakrin̄ Yus tímia núnisañ ashí Níiniun suramsattaji. Krístun ashí susattana núnisañ incha suramsattaji. Yamái Krístunu takaakur wáitiakrikia ukunam Krístujaj métek ti shiir awajnastaji.

¹⁸ Maa, yamáti ti wáitiakrish̄a ukunman̄ka nayaimpiniam ti shiir pujakur nu wáitsamu kajinmatkittiaji. ¹⁹ Tsawant̄ jeamtai Yus ashí ni shuarin̄ Niijiaj̄ métek ti shiir awajsartatui. Nuiñ nekas Yusa uchirj̄ ainia nu ti paant nekanattawai. Nu tsawantan wáinkiatniun ashí Yus najanamu írunna nu ti nákeinaiwai. ²⁰ Ashí Yus najanamia nuna yámankamtaik ti penker najanamiayi. Túras̄ha yajauch ajasmiayi. Nusha ní neaskeka túrunachmiayi. Antsu Yus ukunam ataksha iwiarnartin̄ atí tusa tunáa wayámunam yajauch ajasat tusa tsan̄katkamiayi. Tuma asamtai iwiarnartin̄ tsawantan nákwai. ²¹ Nu tsawantaj̄ ashí Yus najanamu emesnartinniumiã uwemprattatui. Tura ashí Yus najanamuka shuar Yusa uchirj̄ ajasarua nujaj̄ métek shiir awajnasar an̄kant̄ ajasartatui. ²² Yamaisha ashí Yus najanamu ainia nu, nuwã jatema wáitia nunis̄ ti wáitiainiawai. ²³ Yus najanamuka ashí wáitiainiawai. Iisha Yusa Wakaní takakiatar ti wáitiaji. Tura Yusa Wakaní takakkur ashí Yus suramsattajnia nu nékaji achiktin̄. Tuma asar nekas Yusa uchirj̄ paant awajnastin̄ tsawant̄ nákaji. Nujs̄ha ii ayash̄j̄sha an̄kant̄ awajnastatui. ²⁴ Nu tuke enentáimtuki wéakur takamtsuk uwemprattaji. Yamái nu wáinchiatar tuke nákaji. Warj̄, ¿wáinj̄inia nu nákajik? ²⁵ Tuma asar tuke waincha asar katsuntrar nákaji.

²⁶ Nu arantcha ii kakarmachu nekapeakrin Yusa Wakaní yáinmaji. Kame Yus áujtsatniusha nékachkurin in yáinmaji. ¿Warí seattají tura itiur seatjik? Nu nékatsji. Tura itirchat pujakur ti wáitiakrincha Yusa Wakaní in áujturmaji. ²⁷ Tura Yus ii enentáin enentáimtaj nuna nékaiti. Tuma asa ni shuarí asakrin ni Wakaní ni wakeramujai métek seatramkurin ántawai.

Ti nupetmakuitji

²⁸ Yus anea asakrin ashí nankaatamjinia nujai Yus pujurtamji. Tura nujai péñker awajtamji. Nu paant nékaji. Tura Ni wakerimia núnisan Ni shuar awajtamsaitji. ²⁹ Yámankamtaiknumiá in nekarmak ni Uchirí Jesukristujai métek ajasat tusa achirmakmiaji. Nujai Yusa uchirí untsurí ajasji. Tura Kristu ii iwiajrinti. ³⁰ Tura Yus achikmia nuna Niiniu awajsamiayi. Tura nu shuaran “péñkeraitrume” tímiayi. Tura ti shiir awajsamiayi.

³¹ Wats, nuikia Yus in yáinmakrin ¿yaki in nupettamkattaj? ³² Ni Uchiríncha suritramkachmiaji antsu in jarutramkat tusa akupturmakmiaji. Tura asa ni Uchiríjjai métek ti shiira nuna ashí suramsashtatjik. ³³ Yus achikmia nú shuaran ¿yaki sumamtikiat? Yus Ápaka “péñkeraitrume” tiniu asa penké túrashtatui. ³⁴ Tura ¿yaki “jiniium apenáti” titi? Warí, Kristu penké túrashtatui. Antsu nu shuaran jarukmiayi. Tura nantaki Yusa untsuuriní ekemas in áujturmaji. ³⁵ Kristu ti anenma asakrin in akantamkitin atsawai. Wáitiakrishá, itirchat ínkiuakrishá, shuar áinframkurnisha, tsukamakrishá, entsatai atsakuisha, tsúumainjaisha, tura mantamnakrishá, nujai “Kristu anentsui” tíchamniaitji. Nuka Kristu anenkrattairiya akantamkitin jeatsui. ³⁶ Yus-Papniumsha júnis áarmaiti:

“Amée-shuar asar tuke mantamnatin pujaji. Murik máatniua áintsan enentáimturmají.”

Tu áarmaiti.

³⁷ Tuma ajñ Kristu in anenma asakrin Niijjai ti nupetmakuitji. ³⁸ Kristu anenkrattairiya akantamkitin penké atsawai. Nuna ti paant nékajai. Jákatniusha, iwiaakmasha, nayaimpinmaya suntarsha, ashí nayaimpinmasha tura nunkanmasha akupin ainia nusha, yamáí Írunna nusha, ukunam átatna nusha, ³⁹ yakí Írunna nusha, nunká Írunna nusha, kame ashí Yus najanmu Írunna nusha Yusa anenkrattairiya penké akantamkichminiaitji. Yusa anenkrattajsha ii Uuntrí Jesukristu túrunamujai paant wainji.

9

Yus Israer-shuaran ni shuarí arti tusa achikiarmiania nu

¹ Yamái tájana nu Kristu shuarí asan imiá nekasan wáitruitsuk tájai. Winia enentáirsha tura Yusa Wakanísha “nekas tawai” turutainiawai. ² Israer-shuaran waitnentakun ti kuntuts enentáimjai. ³ Wíshuar áiniakui Krístonmaya kanakin yumínnaraintjai nujai wíshuaran yáinminiaitkiunka. ⁴ Israer weeá shuar áiniawai. Tura ni uchiría áinis Yus achikiaruiti. Yusa wincharísha níjjai pujumiayi. Yaunchu Chicham ni weatríjjai iwíaramuncha tura Muisais akupkamuncha susamiayi. Tura Yusa Jeeñ Nin shiir awajtsatniun jintintiamiayi. Tura ukunam shiir tsankatkattana nunasha ujakmiayi. ⁵ Ni weatríin Yúsan ti péñker enentáimtin irunmiayi. Krístusha aents ajas nú shuarum akiiniamiayi. Krístuka Uunt Yus asa tura ashí akupin asa Niñki tuke shiir awájnastí. Núnisan atí.

⁶ Kame Yus ashí Nii timia nuna Israer-shuaran súsachmataisha nujají “Yus timia nu uminkiachuiti” tíchamniaiti. Antsu junis enentáimpratniuiti: ashí Israer weeá ániayatan Yusjají íismaka ashí nekas Israer-shuar ániatsui. ⁷ Núnisan Apraám weeá shuarsha ashí nekas ni shuar ániatsui. Iis, Yus Apraáman tímiayi “Aya Isak pampanma amee shuarum ártatui.” ⁸ Nujají páantaiti. Shuar aya Apraám weeá akiinia asa Yus timian wáinkiashtiniaiti. Antsu Yus timiaijají métek akiinia nu nekas Apraám weeá shuar ániak Yus timian wainkiattawai. ⁹ Kame Yus Apraáman tímia nu júiti: “Tsawant jeamtai jeartiatjame, tura ame nuwem Sara uchin takustatui.” Tu tímiayi.

¹⁰ Nu arantcha, ii weatrí Isaka nuwé Ripikia jimiampramiayi. ¹¹⁻¹³ Nu uchisha akiiniainiatsajín péñkernasha tura yajauchincha túruiniatsajín Yus Ripikian tímiayi: “Iwiairia nu ni patajín umirkattawai.” Ataksha núnisan Yus ní Papirjín chíchak “Jakupan aneakun Esauñ nakitramjai” tímiayi. Nujajínkia páantaiti. Yus wakerak aya ni enentáijajín shuaran achikminiaiti. Nu shuar túrunamu enentáimtutsuk túramniaiti.

¹⁴ Túriniaitkiui “Yus péñkerchaiti” ¿títiajiash? Atsá. ¹⁵ Yus Muisaisan júnis tímiayi:

“Wi wakerajna nunak waitnentratatajai.”

¹⁶ Tuma asamtai shuar ti wakerakuisha tura kakaram takaakuisha aya nujají Yus waitnentatsui. Antsu aya ní enentáijajín wakerak waitnentawai.

¹⁷ Ataksha Yus-Papininum tawai “Yus Ejiptu nunka akupniurín tímiayi “Ámijají ashí nunkanam winia kakarmarun nekaawarat tusan uunt akupniun awajsamjame” tímiayi” tawai.

¹⁸ Tuma asamtai Yus Nii wakera nuna waitnentawai. Túrasha Ejiptu akupniurín túramia núnisan Nii wakera nú shuaran enentáin kátsuram awajatawai.

¹⁹ Tura “Núnisaitkiuinikia ¿urukamtai shuaran Yus súmamtikia? turutchatapash. Nii wakerakuinikia ¿itiurkattajik?” turutchatapash. ²⁰ Warí, aents asam Yusjají ¿tunaiminkiaitiam? Nuwá pininikian nájankui núweka “¿urukamtai júnis najatam?” tíminkiait. ²¹ Nuwá wakerakka nu nuwejai amamkuncha tura yukunnasha nusháa takakmastinian mai najanachminkait.

²² Yajauch shuar ti asutiátin ániak emesnartinnium wétin ániawai. Yus nu shuaran asutiá ni kakarmarín iniaktustaj tayat ti katsuntramiayi.

²³ Tura katsunteak ni anenkrattairín iniakmasmiayi. Nú arant núkia in waitnentramak shíir enentáijají péñker awajtamkur ni anenkrattairí ti paantchakait. Nekas shíir enentáijají péñker ajasat tusa yaunchu iwiartampramiayi. ²⁴ Tura incha, Israer-shuarnumiasha Israer-shuarchanumiasha, ni shuarí ajasat tusa achirmakmiayi. ²⁵ Núnisan yaunchu Yúsnan etserin Useas Yus-Papininum tawai:

“Wíshuarchan Wíshuar awajsattajai. Aneachmancha aneamu awajsattajai.

²⁶ Tura Yus “Wíshuarchaitrume” tímia nú shuaran “Nekas iwiaaku Yusa uchiriniuitrume” ukunam títiatui.”

Tu áarmaiti. ²⁷ Antsu Isayas Israer-shuaran páchis tímiayi:

“Israer weeá ti nankaamas untsurí ániayat péñké ishichik uwemprartatui. ²⁸ Kame Yus yajauchin akupkataj tímia nuna takamtsuk wárik umiktatui.”

²⁹ Núnisan Isayas ataksha tawai:

“Ashí akupeana nú Yus in waitnentramachkurinikia Sutuma péprusha Kumura péprusha takamtsuk jákarmia núnisan jákajají.”

Israer-shuar uwempratin chichamjai tujinkiarmania nu

30 Wátsek, Israer-shuarcha, Yus iisam ni túramurijjaj “pénkeraitji” tu enentáimtumainiachunak, Yuska, Nii enentáimtusam, “pénkeraitrume” tímiayi. 31 Antsu Israer-shuarka péñker akupkamun umiktinian wakeruiniayatan tujintiainiakui nujaj péñker ajastinian tujinkiarimiayi. 32 ¿Urukamtai tujinkiarima? Yúsan enentáimtusuk aya ni péñker túramujaj péñker ajastinian enentáimtuiniak tujinkiarimiayi. Krístun enentáimtustinian nakitiainiak shuar kañkapan awañkemtuktinia núnisan iniararmal. 33 Tura kaya tukumkar iniarhamniakait. Nu asamtai Yus-Papinium Krístun pachis tímiayi: “Seun péprunam kayan ikiuajaj, tawai Yus. Nu kayanam Israer-shuar tukumkar iniarartatui. Antsu Nin shiir enentáimtuinia nú shuar natsaarchartatui” tawai.” Tu áarmaiti.

10

1 Yatsuru, Israer-shuar uwemprarat tusan ti wakerakun Yúsan áujtajaj. 2 Maa, uwempratniun nékachiatañ Yúsan shiir awajsatniun ti wakeruiniawai. 3 Túmaitiat shuáran Yus péñker awajsatniun nékachu ásar aya ni péñker túramujaj péñker ajastinian wakeruiniawai. Tuma ásar Yus péñker enentáimtamujaj péñker ajastinian jecharai. 4 Aya Krístu enentáimtamujaj péñker ajastin asamtai akupkamu umirkatniujaj péñker ajastin átraiti. 5 Akupkamujaj péñker ajastinian pachis Muisais tímiayi: “Nuna takamtsuk umirniuka nujaj péñker pujustatui.” Tu áarmaiti. 6 Antsu Krístun enentáimtus péñker pujustinian pachis shuar juna tíminiaiti: “Ti itiuurchata áinis “¿Yaki nayaimpiniam waka Krístun itiarat?” tiirap,” tawai. 7 Tura ¿Yaki jakamunam we Krístun iniantkit?” tiirap” tawai. 8 Tura junasha tawai: “Yus-Chicham yúpichuch umirkamniaiti. Aya enentáimjaj enentáimtakum wenumjaj uaktiniaitme.” Nu Chicham “Yus enentáimtustiniati” tawai. Nu Chicham tuke étsereaj núiti. 9 Yus Jesusan jakan iniantkimia nu enentáimtakum tura wenumjaj “Jesus winia Úuntruiti” takum uwemprattame. 10 Kame Krístu enentáimtakmin Yus “pénkeraitme” turamtatui nuyá wenumjaj “Jesukrístun enentáimtajaj” takum uwemprattame.

11 Ataksha Yus-Papinium tawai: “Nin shiir enentáimtuinia nú shuar natsaarchartatui.” 12 Tuma asamtai ashí shuar, Israertisha Israerchasha, mai metek Yúsan shiir enentáimtuinia nuna Yus ti aneak ashí péñkeran súawai. Tura ashí métek ni Úuntrinti. 13 Nu arantcha “Ashí shuar Uuntan áujea nu uwemprattawai” yáunchu Krístunun tu áatramuiti. 14 Tura Krístun enentáimtuiniachusha ¿itiurak Nin áujarat? Tura Krístun nékainiachusha ¿itiurak Nin enentáimtusarat? Tura Yus-Chicham ujaachmasha ¿itiurak nekaawarat? Shuar Yus-Chichaman uaktiniaiti. 15 Tura akupkachmasha ¿itiurak Yus-Chichaman ujarakat? Tura shuar Yus-Chichaman etserkataj tusa wéana nuna Yus-Papinium tawai:

“Shuar Yusa Shiir Chichamen etserki weana nu ti shírchakait.”

16 Tura ashí shuar uwempratín chichaman ántuiniayatan umirainiatsui. Isayassa yaunchu aak tímiayi:

“Uuntá, ¿yaki ii étserman antukaruit?”

17 Paantchakáit. Krístu túramu ujakam antuktiniaiti. Tura antukar Krístun shiir enentáimtustiniati.

18 Tura ¿Israer-shuar Yus-Chichaman antukcharu ásarán Yúsan enentáimtuscharma? Atsá. Warí, Yus-Papí tawai:

“Ashí nunkanam ni chichame antunkaiti.”

¹⁹ Tura “Israer-shuar nu chichaman antukariat ¿paant nekaawarmaashi?” inintrusminiati. Tura nekas nekaawarmai. Tuma asamtai Muisais tawai: “Israer-shuarchan nekachu ainiana nuna shiir awajeakun akajkattajrume.”

²⁰ Nuyá Isayas ashamtsuk áarmiayi:

“Eatkacharua nu waitkiarmiayi. Inintruiniatsain wantintiu kmiajai.”

²¹ Tura Israer-shuaran áujmatuk tímiayi:

“Tuke iniaitsuk Winin winiarti tusan nu shuaran untsúajai. Tura nakitrurar umirtuiniatsui.”

11

Chúkich Israer-shuarsha uwemprartatui

¹ Tura Israer-shuar Yúsan umiiniachkui ¿Yus nin iniaisaashit? Pénkea. Warí, wi Israer-shuarchakaitiaj. Wi Apraámsha tura Pinjamin weeá aki-iniachukaitiaj. ² Yámankamtaikniumiá Yus Israer-shuaran ni shuar arti tusa achikiu asa yamaikia iniaiasashtatui.

Ti yaunchu Yúsnan etserin Eriás Israer-shuaran pachis Yúsan áujtak tímiayi: ³ “Untrú, naman awasar Yus sútaincha mash saákiarai. Áminiu etserni-uncha mash máwarai. Tura wiki juakjai. Tura winiasha “mantuatai” turutainiawai.” Tu áujsamiai.

⁴ Tura Yus ayak tímiayi “Siati mir (7000) áishman kan Israer-shuarnumiá apujtumsaruitjai. Nu shuar ántar-yus Páaran tikishmatrachu ániawai” tímiayi Yus.

⁵ Núnisan yamaisha Yus ti waitnentainia asa ashí Israer-shuarnumiá ni shuarin achikiuiti. ⁶ Yus ni enentájjiajin waitnentak túraiti. Nú shuar péñker tura asamtai waitnentatsui. Yus aya péñkernak waitnentakka nuikia waitnenkratchainti.

⁷ Ayu. Nuikia ashí Israer-shuar péñkeran eakarú aijn aya Yus achikmia nú shuar wainkiarmiayi. Antsu ni achikchamuka nuna nan kaamas nekaach-min ajasar kusurua núnin awajnasarmiayi. ⁸ Yus-Chichamsha núnisan tawai: “Yus enentáimchatai enentáin súsararmiayi. Wáinmashtai jjincha tura ántushtai kuishniasha súsararmiayi. Yamaisha núniskete.” ⁹ Tawitcha yaunchu aak tímiayi: “Tuke tunáa túrin ásar namperan najanainiaksha achinkiar ti asutniáwarti.

¹⁰ Ni enentáin kusurarti tura wainmakcharti. Itiurchat ana nusha, káarak kijinia áintsan, tuke áentskatá.” Tu áarmiayi.

Israer-shuarsha uwempramin ániawai

¹¹ Watsek, Israer-shuar kayá tukumkar ¿tuke iniaaruk ánia? Atsá. Antsu Israer-shuar umirkachmajai Israer-shuarsha yamaikia uwempratin jeainiawai. Nujai Israer-shuarsha nujai métek uwempratniun enentáimsartatui. ¹² Israer-shuar umirkachmajai ashí shuar, Israercha ainia nusha, uwempramnia ajasarmiayi. Nuna nan kaamas Israer-shuar atak Yúsan enentáimtuiniak uwemprarmatai nujai ashí shuar ti péñker ajasartatui.

¹³ Israer-shuarchatirmea, atumin uwempratin chichaman etserkatniun Yus akupkamu asan nu takatan ti takaajai. ¹⁴ Nuna túrakun átum uwemprarmena núnisan niisha, wíshuar ainia nu, nuna ísar uwemprarat tusan wakerajai. ¹⁵ Kame Israer-shuaran iniaismujai ashí shuar Yusjai shiir nawamnaikiarmatainkia nuikia atak nin achikmajai jakamunmayá nantaktinia áintsan ti shiir átatui. ¹⁶ Emka apatuk ana nu Yus yúakur yuminsamuitkiunka nuikia ashí apatkunam Yus yuminsamuiti. Núnisan numí kan kapé péñkeraitkiunka numí takamtsuk péñkeraiti.

17 Yuska chíkich chíkich Israer-shuaran, numí kanawen tsupik ajap-niua áinis, iniaisamiayi. Tura nuyá atumin niisháa numinmaya árumnin nu numiniam anujtamkamarme. Nujai péñker numijjai tsanínkrum nu kakarmajai iwiaakrume. 18 Tura kanawen tsupikmajai nankaamantu enentáimtumasaip. Warí, ame kakarmarmijjai numi wajatsui antsu ni kakarmaríjjai iwiaakme.

19 “Túrasha wi anujnaktinian kanawen tsupikchamka” tíchainmeash. 20 Nekasaiti, túmaitiat niisha Yúsán enentáimtuiniachu ásar tsupinkiarimiayi. Atumsha aya Yus nekas enentáimta asam anujnakuitme. Tuma asamtai nankaamantu enentáimtumatsuk aya anearta. 21 Yus nekas kanawen péñkercha túrawarun tsupikkia páchitsuk amincha tsupirmakchamniakait. 22 Iista, Yus atumjai ti tsánkaiti tura Israer-shuar umichua nuna ti warí asutiaiti. Tura péñker wáinmamkata. Yus tuke nekas enentáimtachkurminkia atumniasha páchitsuk tsupirmaktatume. 23 Núnisan Israer-shuar ataksha Yúsán enentáimtuiniakui páchitsuk ataksha anujkachminkait. Nekas túrattawai. 24 Túram Israer-shuarcha asam niisháa numinmaya tsupikiar penké numiniam anujnakuitume. Nuna tura asa nekas ni kanawen tsupikia ajapamun páchitsuk atak anujkamniaiti.

Israer-shuarsha uwempratin áiniawai

25 Yatsurú, nankaamantu enentáimtumarájrum tusan yaunchu nekaachman ujaajrume. Júiti: Israer-shuarnumiánka chíkich chíkich Yúsán nekas enentáimtustinian nakitiainiawai. Tura aya Israer-shuarchasha Yus-shuar ajasarat tusa túrunamiayi. 26 Tura Israer-shuarchasha ti untsurí Yus-shuar ajasarmatai nuyá Israer-shuarsha ashí uwemprartatui. Tuma asamtai Yus-Papí tawai:

“Seúnnumiá Uwemtikiartin tátatui. Israernumiá tunaan asakátrattawai.

27 Jú Chichamnasha níjjai najanattajai: ni tunaarín asakturtatjai.”

28 Uwempratin chicham atumsha nekaatarum tusa Israer-shuaran Yus ni nemasrí awajsaruiti. Tura yaunchu ni weatrín achikiu asa nincha tuke anenawai. 29 Kame Yus amáa nuna ataksha ataatsui. Shuáran achiksha atak iniaiyatsui. 30 Átumka yaunchu Yus umirchayarme. Tura yamaikia Israer-shuar umirainiachkui Yus atumin waitnentramarme. 31 Núnisan ní yamaikia Yúsán umirainiatsui. Tura atumin waitnentrampramarum núnisan nincha waitnentrattawai. 32 Nujai ashí métek sumantikiak métek waitnentrar uwemtikrattawai.

33 Maa, Yus imiá shírchakait. Tí nekachukait. Ni túramu penké nekaachminiaitji.

34 “Uunt Yus enentáimmian zyaki neka? Tura zyá Nin unuiniaruit. 35 Yaki Nin péñkeran susa shiira nujai yapajniuit?” Tu áarmaiti.

36 Ashí najanamu ainia nu Yus najanamu áiniak Niiniu áiniawai. Tura Nin shiir awajsatniun najanawarma áiniawai. Yus tuke iniaitsuk shiir awájnásti. Núnisan atí.

12

Yusaj surumaktarum

1 Atumsha Yus-shuar árumna nu, atumek Yusaj surumaktarum. Yus ti anenma asakrumin nuna seajrume. Yaunchu Israer-shuar ni waakarín maa Yúsán suu árimiayi. Atumsha núnisrume iwiaaku árumna nuñ Nii túrutataj taku túrutati tusarum tuke enentájjai Yusaj tsánkamaktarum. Yusaj ísam

ti shiir atí tusarum túratarum. Nu túrakrumka pátatkechu antsu ti nekas enentáimjaj Yus shiir awajin átatrume.

² Chíkich shuar aya jú nunkanmayá ana nuna enentáimtusar wekainiawai. Tura átumka nu túrawairap. Antsu Yus winia enentáimmiarun yapajtiurat tusarum tsankatkatarum. Nu túrakrumka Yus wakera nu nekaattarme. Ni wakeramusha yajauchichuiti antsu imiá nekas péñkeraiti.

³ Yus winia waitnentrak akatar akuptuku asamtai júna tájarne. Atumek wíkitajtai tu enentáimtumatsuk jeamna nujaj métek enentáimtumasta. Yus enentáimta asakmin takastinian suramsana nujaj apatkam nekaamata.

⁴ Ii ayashj chikichkiítai ii muchitmarj untsurjinti. Tura métekrak muchitáiniatsui. ⁵ Núnisrik iisha, Yus-shuarti, ayashj muchitmarjya áintsarik untsurjitiatar chikichik ayashtinia áintsar takaaji. Nusha Krístujaj tsanin^hkiu asar áitkiamuitji. Túramu asar nuamtak atsumnaiyaji.

⁶ Ii túratniun Yus nusháa nusháa súramji Nii wakera nujaj métek. Wats, Yus ámin suramsamna nu túratniuitme. Yus ni chichamen etserkatniun suramsaitkiuin^hka Yus enentáimtakum unuimiarmam nujaj métek etserkata. ⁷ Chíkich shuar yáintinian Yus suramsaitkiuin^hka nekas enentáimjaj yáintá. Unuiniartiniaitkiúmka yawetsuk unuiniarta. ⁸ Chíkich shuar ikiakártiniaitkiúmka nekas péñker ikiakárta. Súsatniuitkiúmka shiir enentáijaj ementutsuk súsarta. Shuaran wáinin atí tusa Yus apujtamsaitkiuin^hka ti enentáimsam túratá. Tura shuar iturchat pujuinia nu yáintinian Yus suramsaitkiuin^hka shiir enentáimsam túratá.

Yus-shuar túratniau nu

⁹ Nekas enentáijaj mai anenai ajatarum. Yajauch nakitrarum péñkera nu túratarum. ¹⁰ Nuamtak yachi asarum núnisrum mai anenai ajatarum. Chíkich wijaj nañkaamas úntaiti tu enentáimtunaistarum.

¹¹ Nakittsuk kakaram ajasrum ashí enentáimjaj ii Uuntrj wakera nu túratarum.

¹² Ukunam Yus tsankatramkattajnia nu enentáimtusrum warastarum. Wáitiakrumsha katsuntratarum. Tuke iniaitsuk ashí túrunamujaj Yus áujstarum.

¹³ Yus-shuar atsumainia nujaj yáintarum. Írarsha péñker itiaatarum. ¹⁴ Yajauch awajtamainia nu shiir awajsatarum. Yus yajauch yumintsuk nu shuaran péñker túrawarat tusarum seattiarum.

¹⁵ Warainia nujaj warastarum. Kúntuts pujuinia nujajsha úttiarum.

¹⁶ Chikichik enentáijaj métekrak shiir enentáimtuaitiarum. Nañkaamantu enentáimtusairap. Antsu péjchach ajastarum. “Ti nekajai” tu enentáimtusairap.

¹⁷ Shuar ámin yajauch awajtamkuisha nincha yapajkiataj tu enentáimsáip. Aents íisam péñker áminia nu amesha tuke túratá. ¹⁸ Ame jeamna nujaj ashí shuarjaj nawamnaikiam wekasata. ¹⁹ Yuska ni Papirjin júna áamtikramiayi: “Wítjai tunaan asutiáiniun. Wisha yapajkiattajai” tawai Uunt Yus. Tuma asamtai yatsuru, kajertamkuisha atumsha yapajkiairap. Antsu yajauch awajtamkana nuna Yus ístí. Yus asutiáti. ²⁰ Tura nu arantcha tawai: “Ame nemasrum tsukamakuisha ayurata. Kitiamakkuisha umartin susata. Nu túrakum péñker ajachua nu iniatsaartatme.” ²¹ Yajauch nupettamkain. Antsu péñker túrakum yajauchia nu nupetkata.

13

¹ Akupniuka ashí shuar umirkatniuiti. Akupniuka Yus apujsamuiti. Yus apujdachma akupin atsawai. ² Tuma asamtai shuar akupniun umirtsuna nu, Yus apujsamun umireachu asa nekas asutniátniuiti. ³ Kame akupniuka péñker shuar sapijmiakarar tusar apujdachma ániawai. Antsu yajauch shuar ashamkarat tusar apujsamu ániawai. Nii ashamtsuk pujustin wakerakmeka péñker túratá. Túrakminkia akupin shiir enentáimturmartatui. ⁴ Yainmakat tusa Yus apujsamuiti. Antsu yajauch túrakmeka akupin nekas ashamkatniuitme. Warí, Yus ántar apujdachmaiti. Tunáa shuaran asutiátniun Yus apujsaiti. ⁵ Nu asamtai akupin tuke umirkatniuiti. Aya asutiúawajin tusar umirkashtiniaitji. Antsu shiir enentáijjai wekasatin umirkatniuiti. ⁶ Tuma asamtai núnisan akupniun kuit súsatniua nu páchitsuk susatarum. Nu takatan pujursarat tusa Yus apujrsaruiti.

⁷ Ashí túratniua nu túrararum. Akiktiniaitkiunka páchitsuk akikta. Akupniusha uuntcha ashí núnisan írunka nusha shiir enentáimtikratarum. ⁸ Kuitjai tumashrintin airap. Antsu mai anenai tuke ajatarum. Chíkich shuar aneakum nin péñker túrattame. Túram ashí akupkamu páchitsuk umirkattame. ⁹ Akupkamusha tawai: “Tsanirmawaip, mankartuawaip, kasamkaip, chíkich shuar tsanumpruraip, chikichna wakerutkaip” tawai. Tura nusha ashí chikichik chichamjain timiniaiti: “Ame ayashim aneam núnismek ashí shuar aneata.” ¹⁰ Shuar chíkich shuaran aneakka yajauch awajshatui. Tuma asa akupkamun ti shiir umirkattawai.

¹¹ Ii yámankamtaik Yus nekas enentáimtusmij nuj “Ii ti shiir ajasar tuke uwempratin ukunam átatui” tu enentáimprachmashijai. Antsu yamaikia nu tsawant yuntumsamta ashí túrajnia nujai shintiarar enentáimpratniuitji. ¹² Tuke káshiiat tsawaqtemprai. Ii Uuntrj Kristu jú tunáa nunkanam tátin ishichik ajasai. Tuma asamtai ii túrutairj kiritniua núnisan yajauch túrutai ana nuka túrutsuk tsáapninium péñker wekasatin kakaram ajastai. ¹³ Túratniua nujai métek wekasatai. Tsawai wekaakur kiritniunam uumkar tunáa túrutai túrashtai. Nampetsuk, yajauch warartsuk, tsanirmatsuk, jianaitsuk, tura kajernaitsuk aya péñker túratái. ¹⁴ Ii Uuntrj Jesukristu túramia núnisrik túratái. Tura ii ayashí wakeramu umikiat tusar tsanekatkashtiniaitji.

14

Ame yatsum kakantraip

¹ Shuar Yúsan ishichik enentáimtana nu itiaatarum tura kakantrairap. ² Iis, chíkichka ashí yuamniaiti tuiniawai. Tura chikichcha, Yúsnan awajirar, naman yúashtiniaiti tuiniawai. ³ Tura ashí yúa nuka namañken yúatsna nuna wishikrashtiniaiti. Núnisan ashí yucha nu ashí yuun kakantrashiniaiti. Warí, núnaka Yus ni shuarin awajshachukait. ⁴ ¿Ámeká timiataash péñkeraitiam chíkich shuar kakantinia? Antsu ni úntrin ni péñker túramuncha tura yajauch túramuncha íschatniukait. Enentáimpratá. Yus kakaram asa nin péñker awajsamniaiti.

⁵ Chikichcha enentáimpratái. Chíkich shuar tsawantan achikiar “Jú tsawantaj Yus nankaamas shiir awajsatniuiti” tuiniawai. Chikichcha ashí tsawantan métek enentáimtuiniawai. Ayu, tura ni enentáimtamun nekas paant nekaatniuiti. ⁶ Chikichik tsawantan enentáimtakka Yusan shiir awajsatniun túrawai. Tura ashí métekrak enentáimtakka Yúsan shiir awajsatat tusa túrawai.

Yurumkajajsha ashí yúana nu Yúsan yumínkias shiir awajsataj tusa túrawai. Núnisan ashí yúatsna nusha Yúsan yumínkias shiir awajsataj tusa túrawai.

7 Iikkia ii enentájjiajn iwiaaktsuji. Tura jáakrishá ii enentájjiajn jaatsji. 8 Kame iwiaaku pujakrishá ii Uuntrj Kristu shiir awajsataj tusa pujurji. Tura jáakrishá tuke Níiniuitji. Nu asamta iwiaaku pujakrishá tura jakarsha tuke Kristunuitji. 9 Kame jakancha iwiaakuncha ashí ni Uuntrj ajastaj tusa Kristu jaka nantakmiayi.

10 Tura çurukamtaí ame yatsum “yajauchiiti” tame. Urukamtaí nakitiam? Warí, ashí iikia ii túramu paant awajnasat tusa Kristui naka wajastatji. 11 Nu asamtaí Yus-Papiniun tawai:

“Wi nekas iwiaaku pujá asan ashí Winí tikishmatrurartatui. Tura ashí “Yus asa tuke péñker túriniaiti” túrutiartatui” tawai.” Tu áarmaiti.

12 Tuma asamtaí iisha chikichik chikichik ashí ii túramu Yus paant ujakar-tatji.

Ame yatsum tunaanum ajuraip

13 Nu asamtaí “yajauch túriniaiti” tu áujmatnaisashtiniaitji. Antsu ii yachj tunaanum ajurchatin ti enentáimturiniaitji. 14 Jesukristu jintintiamu asan juna nékajai: Yus najanamuka péñkerchaka atsawai. Ashí túramniaitjai. Túrasa shuar chichaak “Nu túrushtainti” táyat nuna túrakka níjjiaj tunaiti. 15 Tuma asamtaí shuar chichartamuk “Nu yúakminkia Yusjaj péñkerchaiti” taj, ame yúakminkia nu shuar itiurchat enentáimsashtatuak. Tura ní-isha tunaanum iniaar menkakamniaiti. Nu shuar aneakum túratsme. Enentáimpratá. Aya ame yuamna nujajn ame yatsum Kristu jarukmia nu emenkákaip. 16 Tura “yuamniaitjai” táyatam wi yúakui yajauch áujmatrusarajn tusam iniaisata. 17 Kame Yus umirkatin yurumátniujaisha umartinjaisha enentáimtuschatniuiti. Antsu Yusa Wakanjjiaj shiir wekasar Yusjaj tura shuarjaj nawamnaikiar ti péñker wekasatniuitji. 18 Ashí shuar Kristun núnis umireakui Yussha tura chíkich shuarsha péñker enentáimtuiniawai.

19 Nu asamtaí tuke shiir pujusminia nu túrakur Yusjaj kakaram ajastin yáiniaktai. 20 Yus iisam ashí yuamniaitji. Antsu ame yuamna nujaj chíkich shuar tunaanum ajurartin tunaiti. Tuma asamtaí ame yuam nujaj Yus nu shuara enentáin takarsamu emesraip. 21 Nu túrashtin nuikia namañ yúashtincha karia umarchatniusha péñkeraiti. Warí, túrushtaijjiaj ame yatsum itiurchat enentáimtikram tunaanum ajurchatapash. Tura nu shuar Yúsan nekas enentáimtuschanmia ajastatui. Nuka atsutí. 22 Ame Yus nekas enentáimtakum ashí túramniaitkiumka Yúsak wararsata. Shuar Yus íimmianum shiir enentájjiaj mash túramnia nu nekas shiiraiti. 23 Tura araantushim yua nuka Yúsan shiir enentáimtutsuk yua asa sumamattawai. Kame ashí Yus shiir enentáimtutsuk túramu tunaiti.

15

Chíkich shuar wakeramuk enentáimtustiniaiti

1 Yusjaj katsuaru ájnia nu iik enentáimtumatsuk kakarmachu ainia nu yáintiniaitji. 2 Chíkich shuar wakeramu enentáimtustiniaitji. Tura Yusjaj nu nankaamas shiir wekasatniun yáimniaitkiui túratniuitji. 3 Kristusha ni wakeramun túrachmiayi. Antsu Yus-Chicham tana núnisan chikichan enentáimtusmiayi. Nu asamtaí Yúsan umirin asa wáitak timia nu áarmaiti: “Ámin katsekramainiak Winiaja katsekrukarmiyai.” 4 Núnisan ashí yaunchu Yus-Papiniun aarma in jintintramatniun áararmiyai. Nujaj atsantamkurin

shiir wáin̄kiattajnia nuka katsuntrar nákastatji. ⁵ Yus atsantamar katsuntratniun jintin̄tramji. Tuma asa Jesukrístu túramia áintsan̄ atumniasha chikichik enentáij̄ij̄ai enentáimtunaisar pujustinian yáin̄makartí. ⁶ Nuj̄aj̄ ashí métekrak Yus shiir awajsattarme. Niisha ii Uuntr̄j̄ Jesukrístuncha Apar̄inti.

Israer-shuarchanmasha Uwempratin Chicham etserkamu

⁷ Tuma asantai chíkich shuarj̄aj̄isha shiir awaj̄naisatarum. Kristu núnisan Yúsan shiir awajsat tusa incha shiir awajtamsamiaji. ⁸ Juna tajai. Kristu Israer-shuaran yáin̄taj tusa támiayi. Tura Yus ti yaunchu nuna weatr̄in̄ “túrataj” timia nu uminkiat tusa támiayi. Nuj̄aj̄ Yus timia nuna umikmia nu nekaamn̄iaiti. ⁹ Tura nu arantcha Israer-shuarchasha Yus waitnentrartin áarmatai nin shiir awajsarat tusa támiayi. Tura Yus-Papisha tawai:

“Ámin kantamprakun ashí shuarnum shiir awajsattajme.”

¹⁰ Tura nu arantcha tawai: “Ashí nun̄kanmaȳa shuartiram ashí Israer-shuar Yúsna ainia nuj̄aj̄ warastarum.”

¹¹ Tura ataksha tawai: “Ashí aents ii Úuntr̄in̄ shiir awajsarti. Tura ashí shuarsha Nin “Ti úntaiti” tiarti” tawai.

¹² Isayassha áarmiayi: “Tawitia apar̄j̄ Isai weatr̄iya akupin akiinkiat-tawai. Niisha ashí nun̄kan akupeakui ashí shuar niiniak shiir enentáimtusartatui.” Tu áarmaiti.

¹³ Yus ashí shíiran suramsattakrin nu shiir nákaji. Tuma asantai Nii nekas enentáimtakrumin warasa shiir pujustinian yamá suramsati. Nuyá Yusa Wakan̄j̄ kakarmarij̄ij̄ai ti shiir enentáij̄ij̄ai katsuntrarum, nu nákastarum.

¹⁴ Yatsurú, atumsha anenainiaitrume. Tura ashí Yusna nekaarum nuamtak chicharnaikiatin nékarme. ¹⁵ Tuma aijn̄ kajinmatkij̄irum tusan ataksha ti paant áakun j̄ú enentáimtikeajrume. Yus winia waitnentrak ni Chichamen etserkat tusa akuptakui nuna áatjarme. ¹⁶ Kame Jesukrístu Israer-shuarchanum Yusa shiir chichamen etserkat tusa akuptukuiti. Nuna túrakun Israer-shuarchan Yusa Wakan̄j̄ij̄ai shiir awajsamu áarmatai Yusaj̄ juiniajai. Tura Yussha shiir enentáij̄ij̄ai itiainiawai.

¹⁷ Jesukrístu yaintiu asantai Yusna takarsamaj nuna wararsamniaitjai. ¹⁸ Tura chíkich shuarj̄aj̄ Kristu túramun pachischattajai. Aya wi chichasmaj̄aj̄isha tura wi túramuj̄aj̄isha Israer-shuarchan Kristu umimtikiamia nunak áujmatsattajai. ¹⁹ Yusa Shiir Wakan̄j̄ kakarmarij̄ij̄ai aents tujintiamun túran ashí shuaran Jerusaré̄n̄ péprunam nan̄kaman etserkin Iririkiu nun̄kanam ejekamjai. Kristu-chichaman ashí nu nun̄kanam etserkaitjai. ²⁰ Nuna túrakun chíkich shuar etserkachmanum Krístunun ántichu áiniamunam Uwempratin Chichaman etserkaitjai. Nuj̄aj̄ chíkich takasmanum takarsachuitjai. ²¹ Yus-Papisha núnisan̄ tawai:

“Chichaman pen̄ké antukcharuka nekaawartatui. Nin áujmatman anturkacharusha unuimiarartatui.”

Papru Rúmanam wétaj tawai

²² Nuna pujuru asan ítjarum táyatan íchmajrume. ²³ Tura yamaikia juyá takatrun umikian tura yáunchusha tuke ítjarum tiniu asan ²⁴ Ispania nukanam weáku ístatjarme. Tura atum̄in̄ shiir irasan Ispanianam wékuai atumsha yaiñtkiarum shiir akuptukchattarpash. ²⁵ Tura yamaikia kuitj̄aj̄ Jerusaré̄n̄numiá Yus-shuaran yáin̄taj tusan wéajai. ²⁶ Masetúnianmaȳa shuarsha tura Akayanmaȳa shuarsha kuítian irurar Jerusaré̄n̄numiá Yus-shuaran atsumainia nuna akuptuktai tuiniawai. ²⁷ Ti wakeruiniak túrawarmiyai.

Nu nekas túrashtinkiait. Israer-shuarnumia Yus-Chichaman antukaru ásar yamaikia ni kuítrijajai páchitsuk yáinchatniukait. ²⁸ Tuma asamtai jú kuitian súsaran umiran nuikia Ispanianam wéakun íktiatjarme. ²⁹ Tura nuj winiakun Kristu Shiir Chichamen nujaj shiir yáintajrum tusan ejetittiajrum.

³⁰ Yatsurú, ii Uuntrj Jesukristunu asarum tura ni Wakanj pujurtamkurmin anenia asarum Yus áujtursatarum. Núnisrum wijajai métek Yusna takastin yaintkiattarme. ³¹ Jutia nunkanmaya Israer-shuarnumia uwemtikrat tusarum Yus áujtursatarum. Tura jú kuitian júajna nunasha Jerusarénumia Yus-shuar shiir achikiarti tusarum Yus áujtursatarum. ³² Nujaj, Yus wakerakuinka, péñker wampú enentáimsan warasan íttiajrum. ³³ Yus ti shiir pujustinian súana nu atumjai tsanin pujurtamsati. Núnisan atí.

16

Amikmaamun akupramiania nu

¹ Ii umai Jépeka Senkrea péprunmaya Yus-shuaran yáiniaiti. Ti péñker Yus-shuaraiti. ² Kristu náarijn shiir wáinkiatarum. Nuamtak yachí wáinkiatniua núnisrum wáinkiatarum. Niisha chikichnasha tura winiasha ti péñker wáitin asamtai atumsha ni atsumamusha yainjarum.

³ Pirisirasha Akirasha wijajai métek Jesukristunun takasaru ásar amikmaatainiajai. ⁴ Niisha winia uwentikrurtai tusar jániñkiarmiayi. Tuma asamtai yuminkiniajai. Tura aya wíkichu antsu ashí Israer-shuarchanumia Yus-shuar áinia nusha yuminkiniawai. ⁵ Núnisan ashí Yus-shuar Pirisiran tura Akira jeen irunainia nusha amikmaatarum. Tura winia aneamu amikiur Epenetu amikmaatruatarum. Niisha Akaya nunkanam emka Kristun nekas enentáimtusmiayi. ⁶ Marisha, atumjai ti takasau nu amikmaatruatarum. ⁷ Tura wí shuarsha Antrunikiusha Júniassha amikmaatruatarum. Niisha wijajai sepunam pujusarmai. Wijajai emka Kristun shiir enentáimtusar chikich akatramujai nankaamas takasaru áiniawai.

⁸ Ámpriassha Kristunam winia aneamu amikiur asamtai amikmaatruatarum. ⁹ Urpanujajsha Jesukristu takatáj tsaninñiuiti. Niisha tura aneamu Estakishsha amikmaatruatarum. ¹⁰ Apirisssha amikmaatruatarum. Niisha Kristun ti shiir enentáimtamtu ti páantaiti. Núnisan Aristúpuru shuarsha amikmaatruatarum. ¹¹ Wiishuar Erutiúnsha tura Narsisu shuarsha Kristu shuarj ásarmatai amikmaatruawarta. ¹² Tripiniasha tura Tripiusasha Yúsnan takainia ásarmatai amikmaatruatarum. Núnisan ii umai Pírsitia Yúsnan ti takasu asamtai amikmaatruatarum. ¹³ Rúpusha, nusha ti péñker Yus-shuar, tura nukurísha amikmaatruatarum. Niisha wijajai nekas winia nukuru núnisaiti. ¹⁴ Asinkritiusha, Pirikiuntisha, Érmassha, Patrupassha, Érmessha, tura ashí niijajai Yús-shuar ainia nu amikmaatruatarum. ¹⁵ Núnisan Jirurukusha, Júriasha, Néreusha, ni umajjajajsha, Urimpiassha, tura ashí Yus-shuar niijajai pujuinia nu amikmaatruatarum.

¹⁶ Nuámtaksha shiir aujnaisatarum. Ashí juyá Kristu shuarj amikmaatmainiawai. ¹⁷ Yatsurú, shuar nusháa enentáimtuiniak Yus-shuaran akanainiak iturchat awajenawai. Nu shuar wáinkiarum kanaktiarum. Ni yajauch túramu átum péñker takastin unuimiarma núnischaiti. ¹⁸ Nu shuar ii Uuntrj Jesukristunun takainiatsui. Antsu ni wakeramun uminiawai. Tura ti shiir chichasar nékachun anankenawai. ¹⁹ Átum umirma ashí shuar nékainiakur ti waraaji. Yajauch túrutsuk aya péñker túratin enentáimsarum

pujustarum. ²⁰Yus tuke shiir pujustinian amawa nu ti wárik uunt iwianchin nupetturmaktatui. Tura ii Uuntri Jesukrístu shiir yainmakarti.

²¹Timiutéusha, wíjjaj takau, amikmaatmarme. Núnisan Rúsiusha, Jasunsha, Susipatresha, mash wíshuar ainia nu amikmaatmarme. ²²Wi, Tersiu asan, Papru chichamen jü papinium áateakun Kristu náarijn amikmaajrume.

²³Káyusha amikmaatmarme. Ni jeen pujaji tura juisha ashí Yus-shuar irunainiawai. Erastusha jü pepru kuítrjn wáinniuiti. Niisha ii yachj Kuártujaj amikmaatmarme.

²⁴Ii Uuntri Jesukrístu ti shiir yainmakarti. Núnisanj atí.

Yus shiir awajsatai

²⁵Watsek, Yus shiir awajsatai. Niñki nekas kakaram awajtamsamni-aiti. Wi Uwempratin Chichamnum Jesukristunun étsereaaj nujaj ikiantamprattawai. Nu chicham yámankamtaiknumia nekaachmanak Yus yamaikia paant awajsaiti. ²⁶Yaunchu Yúsnan etserin ni áarmanum nu chichaman etserkarmiayi. Tura yamaikia Yus wakerak ashí nunkanmayaj shuar Nii enentáimtusar umirkarat tusa nu Chichaman yamaikia paant awajsaiti. Yus amuutsuk tuke pujuwiti.

²⁷Yúsak Niñki ti neka asa tura Jesukrístu ti penker tura asamtai Niñki tuke shiir awájnásti. Nuke atí.

Papru KURINTIUNMAYA SHUARAN Emka papin aar akuptukma

Kurintiuṃmāyā Yus-shuaran Papru áatramiania nu

¹ Wi Pápruitjai, Jesukrístu akatramu. Yus nuna wakerak, ni akatramurj atí tusa anaitukmai. Wi, ii yachj Sústinisjaj, ju papí akupeaji. ² Ashí Yus-shuar Kurintiu péprunam iruntrumna nu ju papí akupeaji. Átumka Jesukrístujaj tsaniṅkiu asarum Yusna árumé. Átumsha tura ashí shuar Jesukrístun enentáimtuiniana nunasha Yus ti penker awajsatniun wakerawai. Nincha incha Jesukrístu mai metek Úuntriṅti. ³ Yus ii Aparj tura ii Úuntri Jesukrístusha waitnentrainia ásar yainmakarti imiatkinchanum tuke shiir pujustinian.

Ii Uuntri Jesukrístujaj tsaniṅkia pujustin

⁴ Yusan ájukun yuminsan atumin shiir enentáimtajrume. Jesukrístujaj tsaniṅkia pujakrumin Yus shiir enentáimturmawai. ⁵ Jesukrístujaj tsaniṅkia pujakrumin Yus atumin ti yáinmawai ashí péṅker ana nu enentáimtakrum tuke shiir chichastinian. ⁶ Kristu juna túramniai ti chámakaj. Ashí yamaikia uminkiyai. ⁷ Tuma asamtai ashí Yus súramna nu atsumatsrume. Nu túrakrum ii Uuntri Jesukrístu tatin tuke nákarne. ⁸ Tura iniaitsuk tuke emettamattawai ii Uuntri Jesukrístu támatai atumi tunaarj pachischatin. ⁹ Jesukrístu ii Uuntriṅti. Niijjaj tsaniṅkia pujusúk tusa Yus achirmakmarme. Tura Nii tana nuna tuke umiktatui.

Yus-shuar akantramu

¹⁰ Yatsuru, ii Uuntri Jesukrístu naari pachisan, seajrume métek enentáimpratarum tusan. Nísháa nísháa enentáimprairap antsu chikichik enentáijaj métek enentáimsa pujustarum. ¹¹ Átum yajauch chicharnaisarum pujarme. Krú shuarj tu ujatkmatai tájarne. ¹² Kame júnis awai: Chikich “Wi Páprunuitjai” tuiniawai. Chikich “Apurusnaitjai” tuiniawai. Chikichcha “Wi Pítrunuitjai” tuiniawai. Chikichcha “Wi Kristu-shuaraitjai” tuiniawai. ¹³ ¿Warí, nuṅkia, Kristu akantramukait. Páprusha krúsnum jarutrámakamaashi. Tura Papru naari pachisa imiaimiukaitrum? ¹⁴ Atumin untersuj imiaichu asan shiir enentáimjai. Aya Krispu Káyujaj jímiarchiniak imiaimjai. ¹⁵ Nújajṅkia shuar “Papru náarjṅ imiaimiuitjai” tíchamniai. ¹⁶ Maa, nekas, Estepanasa shuarṅincha imiaimjai tura chikich wi imiaimiun nékatsjai. ¹⁷ Kristu imiakrattia tusa akuptukchamai antsu uwempratin chichaman etserkat tusa akuptukmai. Tura ti neka chichainia núnisan chichaatsjai shuar wi shiir chichaamun enentáimpraraṅ tusan. Antsu yúpichuch chichaajai Kristu krúsnum jakamuk paant atí tusan.

Kristu Yusa kakarmarṅincha ni nekatairṅincha paant iniakmashiania nu

¹⁸ Kristu krúsnum jarutrámkamú étsereaji. Antsu Yus-shuarchaka menkaakatniunam wéana nu, “ántraiṅti nu chicham” tu enentáimainiawai. Antsu Yus-shuarti, uwempratiunam wéakur, “nu chichamjai Yusa kakarmari takusminiaiti” tu enentáimji. ¹⁹ Núnisan tawai Yus-Chicham yaunchu aarma: “Ju nunkanmayan ti neka áiniana nuna chichamen emesrattajai; ti unuimiararu áinianak ántar awajsatjai” tawai Yus ni

chichamen. ²⁰ Iis, ju nunkanam uwempratin chicham íruntsuk. Nu chichaman ashí mash Yus ántar awajsaiti. Ti neka áiniana nusha, jintinkiertin áiniana nusha, ashí ju nunkanmayan unuimiar ti chichastinian nékana nusha, nu shuar mash “wi tájana nujai péñker pujusam uwemprattame” tu enentáimiainiawai. Tura núnaka mash Yus penké ántar najanaiti. ²¹ Aya ni nékamujai aents Yúsan nekaacharmiayi. Núnisan atí tusa Yus túramiayi, timiá neka asa. Antsu ashí aentsun Yus ni chichamejai uwemtikratniun wakerimiayi. Chíkich “ántraiti” tuiniana nu chichamjaink’ Yus Nin enentáimtuinia núnaka uwemtikratniun wakerak túramiayi. ²² Israer-shuar “aentsi túrachminian iniakmasta, wi nekaataj” tuiniawai. Kriaku shuarsha “ti enentáimsam, mash péñker jiiikim turuttia wisha métek enentáimprataj” tuiniawai. ²³ Iikia antsu Kristu krúsnum jarutramkamuk étsereaji. Israer-shuarsha “ju chicham natsantaiti” tu enentáimiainiawai. Israer-shuarsha “ju chicham ántraiti” tu enentáimiainiawai. ²⁴ Tura Yus achikiarma, Niiniu ajasarat tusa, Israer-shuarsha Israer-shuarsha mai metek “Kristu krúsnum jarutramak Yusa kakarmaríncha ni nekatairíncha paant iniakmasmiayi” tu enentáimji. ²⁵ “Yusa nekatairí ántraiti” tuiniawai aents, túrasha imiá nekas péñkeraiti. “Yusa kakarmarísha jeatsui” tuiniawai aents, túrasha imiá nekas kakarmaiti. ²⁶ Enentáimtumastarum yatsuru. Yus achirmakmarme Niiniu ajastinian, tura ju nunkanam ti neka áinia núnisan atumín ti neka íruntsui. Ti akupniusha ti nankaamakusha atumín íruntsui. ²⁷ Antsu ju nunkanam nékachua núnis ana nuna Yus achikiuiti ti neka nuna iniatsáartinian. Tura ju nunkanam kakarmachua núnis ana nunasha Yus achikiuiti kakarma nuna iniatsáartinian. ²⁸ Péejchachincha, nakitsamuncha, ánrachincha, Yus achikiuiti ashí nankaamantu írurna nuna amuktinian. ²⁹ Nujainkia chikichkisha Yusjai waantu enentáimprachminiati. ³⁰ Tura Yus atumin Krístujai tsanin apujtamsaiti. Tura Kristu enentáimtusar Yus nekas nekatainkia nekaatajai. Kristu enentáimtakin Yus shiir enentáimturmajj, péñker awajtamji, tura uwemtikramji. ³¹ Yus-Papinium yaunchu aarma núniskete: “Shuar nankaamantu enentáimprataj tákuñka ii Uuntri Yus túramun wararsati.”

2

Kristu krúsnum jakamu etserkamu

¹ Wisha, yatsuru, atumín jeamaj nuí Yus-chichaman ti neka chichainia áintsan tura íwiasanak ujakchamajrume. ² Tura atumjai pujakun aya chikichkiniak nekaatniun enentáimpramjai. Júiti: Jesukrístu, tura Jesukrístu krúsnum jakamu. ³ Nékayatan kakarmachu sapíjmiashím jearmiajrume. ⁴ Yus-Chichaman ujaakun ti neka chichainia áintsan nupetkataj tu enentáimturchamajrume. Antsu Yusa kakarmaríncha tura ni Wakaníncha paant iniakmasan Yus-Chichaman ujakmajrume. ⁵ Aentsu nekatairíjjai Yus enentáimtuschatniuiti antsu Yusa kakarmari paant nekaarum Yus enentáimtustiniaitume. Nuní asamtai Yus-Chichaman tu ujakmajrume.

Aya Yusa Wakaníjjai Yúsnan nekaamniati

⁶ Túmaitiat Yusa nekatairí átsuk. Yúsnan unuimiararujai Yusa nekatairín áujmatji. Tura Yusa nekatairínkia aentsu nekatairí áintsachuiti. Ju nunkanam akupin ainia nuna nekatairínchuiti Yúsnaka. Ju nunkanam akupniuka ishichik pujus amuukachartatuak. ⁷ Yaunchu ju nunka atsain Yus in

uwemtikrampratniun enentáimpramiayi ti shiir pujusarmi tusa. Ju Yusa enentáimmiari yaunchu nekanachmiayi, tura yamaikia nu nekaar áujmatji. ⁸ Ju nunkanam akupniuka nuna penké nekaacharmiayi. Nékaini akka ii Uuntrj timiá shiira nuna, krúsnum máacharu aayi. ⁹ Yaunchu Yus-Papinium áarchamukait: “Shuar Yúsán aneana nuna Yus ti shíiran susattawai. Susatana nuka timiá péñker asantai shuar wáinkiachman, antukchamuncha, enentáimtachmancha Yus susattawai” tu áarmaiti. ¹⁰ Tura Yusa Wakanj ii enentáin pujurtamuk Yus suramsattajnia nuna yamá paant jintinramji. Nu Wakanha imia Yus enentáimiancha mash nékawai.

¹¹ Shuar enentáimna nuna chíkich shuar nekaamniakait. Antsu aya ní enentáijjai nékatsuk. Núnisan aya Yusa Wakanj Yúsán paant nékawai. ¹² Ju nunkanmayá aents enentáimiania nujaj Yusna nekaachminiaiti. Antsu Yusa Wakanj in súramaj nujaj Yus shiir tsankatramajnia nu nekaamniaitji. ¹³ Yusa Wakanj jintinramji Yúsán chichastinian Nii wakera áinsan. Ni chichamen súramji. Túramtai ii nékamujaj Yúsna étsertsuji. Tuma asantai imia Yusna nuka Yusjaj péñker wekainia nu jintajji.

¹⁴ Yus-shuarcha Yusa Wakanj in ántatsui ántrai tusa. Aya Yusa Wakanj jintintiamniaitkiui Yus-shuarcha nuna penké nekaachmin ániawai. ¹⁵ Antsu Yusa Wakanj takaku ashí mash iis, péñkera nuna nekaamniaiti. Nii túrana nunasha chíkich shuar súmamtekiachminiaiti. ¹⁶ Yus-Papinium yaunchu áarmaiti: “¿Yusa enentáimmiari ya neka. Tura Yúsán ya jintintiamniait?” tu áarmaiti. Tuma ajñ iikia Yus-shuar ájini nu, Kristu enentáimna núnisrik enentáimji.

3

Páprusha Apurussha Yusa takatrin mai tsaniñkiar takainiawai

¹ Tura wikia, yatsuru, nuik aj atumjaj pujakun Yusa Wakanj umirniun chichastinia áinsanak atumjaj chichastinian tujinkiamjai. Antsu ayash wakeramu umirin asakrumin Kústunam katsuarcharujaj chichastinia áinsanak atumjaj chichasmajai. ² Uchi kuírach namañ ayurachminiaiti antsu aya umuntsatniuiti. Núnisan aya yúpichuchin ujakmajrume, itiurchat ana nu tujintiakrumin. Tura yamaisha itiurchat ana nu tuke tujintiarme. ³ Tuke ayash wakeramu umirniuitrume. Yajach enentáimtunaiyakrum tura katsumnaiyakrum akantramuitrume. Nujaj páantaiti átum ayash wakeramu umirniuitrume. Yúsán enentáimticharujaj métek wekainiaitrume. ⁴ Atumjinkia shuar “wi Páprunuitjai” tuiniatsuk. Chikichcha “wi Apurusnaitjai” tuiniatsuk. Tu chichaakrum ayash wakeramu umirniuitrume. ⁵ Wátsek. Wi Papru ti péñkeraashitaj. Apurussha ti péñkeraashit. Antsu iisha aya Yusa takarniurjintji. Yus-Chicham étserkurin ii Uuntrj enentáimtuschkamkuram. Ii Uuntrj takatan chíkich chíkich suramsamajnia nuke takasmaji. ⁶ Wi Yus-Chichaman étserkun arakan araktinia áinis takasmaji. Apurussha entsan ukatramai. Tura Yus nu arakan tsakatmarmai. ⁷ Arakan araana nusha, entsan ukatna nusha ántrachukait. Antsu Yusak arakan tsakatmaru asa ashí túrachukait. ⁸ Arakan araana nusha, entsan ukatna nusha métek ániawai. Túmaitkiuisha takasmajaj métek Yus akiktatui. Péñker takasmatainkia péñker akiktatui. ⁹ Wisha Apurussha Yusa takatrin mai tsaniñkiar takaaji. Tura Yus atumj enentáin takaakui atumsha Yusa núnkeá áintsaitrume.

Jeasha enentáimpramniaiti. Yus atumjaj takaak jeá jeamtinia áinsan takaawai. ¹⁰⁻¹¹ Jeá jeamainiak, emka uunt kaya nunká inít ikiursar kaki

awajsatin áiniawai. Tura nuyanka nu kayanam ekeniar júkitniuiti jea wewe atí tusa. Wikia jeá jeammin ti unuiniamiarua áinsanak uunt kaya nunká emka ikiustinian nekaan, núnisnak Jesukristunun emka ujakmajrume. Tura Jesukristu uunt kaya kaki ikiusma áinis asa Nínkiti nuí jea ekenkatin. Iis, ashí enentáimtustinia nankaamas Jesukristu enentáimtustiniaiti. Nu asamtai Jesukristunun emka ujakmajrume. Yus nuna etserkatniun tsankatrakuiti. Wi emka, uunt kaya ikiursatniua áinsan, Jesukristunun ujakmajrume. Tura nuyanka chíkich shuar ekeniar jeammin áiniawai. Tura anearti péñker jeamtinian. ¹² Tura jea jeamainiak nii wakerak péñker ana nujai jeamminiaiti. Nii péñker jeamtinian wakerak kurijiaisha, kuitjaisha, shiirmach kayajiaisha jeamminiaiti. Chíkich jeamkuka numijiaisha, kenkujiaisha, nukajiaisha jeamminiaiti. Núnisañ shuar Yúsnañ takaak péñker takasminiaiti túrasha náñkamas takasminiaiti. ¹³ Tura amuukatin tsawant jeakui ashí ni takatři paant átatui. Nu tsawantajiaisha Yúsaiya ji átatui tura nu jisha ni takatři péñkera nunasha tura yajauchia nunasha nekapsattawai. ¹⁴ Tura shiir jeamuka tura nu jeasha esaachmatainikia shiir akinkiattawai. ¹⁵ Antsu náñkamas jeamuka imianiniki jiniumia uwemprattawai, tura ni jeamma esaa penké atsuttawai.

¹⁶ Enentáimpratarum. Yusa Wakaní atumjín pujá asamtai Yusa Jee ajasuram nu nékatsumek. ¹⁷ Shuar Yusa Jeeñ émesekuinkia Yus nu shuaran emesrattawai. Yusa Jeeñka timiá shiir asamtai túrattawai. Nu Jea atumketrume.

¹⁸ Ju nunkanmayan unuimiarua núnisrum “ti nekaitjai” tu enentáimtusarum ananmamawairap. Antsu ju nunkanmayan nékachu áinis ajas Yúsnañ ti shiir unuimiártiniaiti. ¹⁹ Ju nunkanmayá aents nékainia nuna Yus “ántrai” tawai. Yus-Papinium áarmaiti:

“Ju nunkanmayan unuimiarun ni enentáimmiajain Yus sumamtikiattawai.”

²⁰ Tura nu arantcha áarmaiti:

“Uunt Yuska “unuimiaru enentáimmiancha penké ántrai” tawai.”

²¹ Tuma asamtai “Páprunuitjai tárumna nusha, “Apurusnaitjai”, tura “Pítrunuitjai” tárumna nusha ántar enentáimprume, nii aya aents ásarmatai. Tu enentáimprarum warasairap. Antsu nekaatarum. Ashí írúnna nu atumin yainmaktiniaiti. ²² Páprusha, Apurussha, Pítrusha, ju nunkanmayasha, iwiaakmasha, jákatniusha, yamá írúnna nusha, ukunam átatna nusha, mash atumniaiti shiir yainmaktin. ²³ Atumsha Kíristunuitrume, tura Kíristusha Yúsnaiti.

4

Yus akatramu takatři

¹ Júnisañ ashí shuar enentáimturmastiniaitji. Iikia aya Kristu yáinríntji. Kristu akatramuríntji Yusna yaunchu nekaachma ana nu yamá etserkatin.

² Wátsek, akatramuka tána nujai métek umiktiniaiti. ³⁻⁴ Wi umikmancha umikchamuncha ii Uuntri Kristu nékawai. Átum enentáimturarmena nusha tura chíkich aents enentáimturainia nusha wíjjainkia ántrai. Imia wíkisha nekamatsjai. Kame winia tunaarun penké wáintsujai tura aya nujai “péñkeraitjai” tíchamniaitjai. Nínki Yus íiru. ⁵ Tsawant jeamtai ii Uuntri Kristu atak tátatui. Tura ashí yamá kiritniunam uúkma nuna tura shuar ashí enentáimprarma nunasha paant awajsettawai. Nu tsawant jeatsain shuar umikiuashit tusarum enentáimtusairap. Tura nu tsawantjai Yus ashí péñker

umikiarun shiir awajsattawai. Pénker umikiuncha ishichik umikiuncha takasmajai métek Yus shiir awajsattawai.

⁶ Átum “Ju shuar péñkeraiti tura chíchich péñkerchaiti” tu akannáirarum penké tichatniuitrume, yatsuru. Nuka paant atí tusan “Átum “Wi Páprunuitjai” tura “Wi Apurusnaitjai” tírap” tajai. Antsu aya Yus-Papinium áarmajai métek enentáimsatarum. ⁷ Ámeka chíchich shuarjai méteketme. Tura ashí takakmena nusha Yus amasmaiti. Tura Yus amasu asamtai çituirak áminiukea áintsam nujai nankaamantu ajai tu enentáimtumam?

⁸ ÇTi kuítrinnua áintsan tura ashí takakua áintsan enentáimtsurmek. In nankaakarum uunt kapitián ajasua áintsan enentáimtsurmek? Nekas uunt kapitián ajasrumka maak. Nuñkia iisha atumjai akupkaintji. ⁹ Chíchich shuar mash nankaamantu áinis áiniakuisha Yus in ni akatramurin ashí amúamunam apujtamsaitji. Tu enentáimprammiaiti. “Yajauch áiniawai, máatái” tu pujurtamji shuar. Tura Yusa suntarisha ashí juyá shuarsha in ístai tsar káutramkajtji. ¹⁰ Iikia atumjai jeatsji. Kristu shuarj asakrin nékachua áinis enentáimturmajai shuar. Átum antsu Krístunam tí nékachushitrum. Iikia kakarmachuitji. Átum timiá kakarmaitrume. Átumka ti penkeraitrume. Antsu iikia muíjtaintji. ¹¹ Tuke yamaisha tsukamaji, kitiamaji, entsartin atsumaji. Katsumpramji. Jeasha atsumaji. ¹² Íi ewejéjai takaakur ti pimpíajai. Shuar katsekramainiaji túrasha iikia shiir chichamjai aiyaji. Itiurchat awajtamainiakuisha katsunteaji. ¹³ Tsanumprutmakrincha tuke shiir chichaaji. Tsuata áintsarik tuke yamaisha ashí yajauchia núnisan ajapramatnium enentáimturmainiaji.

¹⁴ Atumin aya iniatsaartajtsan juní áattsujrume. Antsu winia aneamu uchirua áintsan jintintjarme. ¹⁵ Atumin Yus-Chichaman ujaakun Yus-shuar ajastinian unuiniamjarme. Nujai Jesukrístu enentáimtakrumin atumí aparjá áintsan ajasmajai. Chíchich shuar Krístunun jintintrámatin timiá untsurj ákuisha aya wiki atumí aparíntjai. ¹⁶ Tuma asamtai wi wekaajna áintsan wekasatarum atumsha.

¹⁷ Nu túratarum tusan winia aneamu uchirun Timiutéun akuptukmajrume. Niisha ii Uuntrj Krístun enentáimtamunam winia uchiruiti tura Krístun enentáimtak tuke shiir wekaawai. Túrasha wi Krístujai wekaamun ataksha enentáimtikramprattawai. Núiti ashí Yus-shuarnum wena jintíajna nuka. ¹⁸ Papru yamaikia irashtatui enentáimturainiak chíchich chíchich nankaamantuijai tu enentáimtumainiawai. ¹⁹ Antsu Yus wakerakuñkia wárik ítjam tusan wakerajai. Nuñkia nankaamantu chichameñ antukchattajai antsu wátskea, ni túramurjsha ístái. ²⁰ Yus akupeana nú shuar aya chíchainiatsui antsu Yusa kakarmarin iniaktuniawai. ²¹ Wátsek, çwarí enentáimprum? Átum tuke núnisan enentáimkiurminkia wi winin asutiátniuitjarme. Tura péñker enentáimkiurminkia, aneakun shiir chichasmini-aitjarme. ÇAtumsha túa wakerarum?

5

Tsanirmamu ti tunaiti

¹ Atumíin shuar ti tunáa tura awai. Ju yamá ashí nekanaiti. Nu shuar ni aparí nuwé achikiuiti. Timia tunaaka nu tsanirmamu Yus-shuarchanumsha atsawai. ² ÇNu tunaajaisha tuke nankaamantu enentáimprumek? Antsu úttiniaitrume. Nu shuar tunáa túraka atumíniñ akankatniuiti. ³ Ayashur

pujachkuisha wi nuĵi pujáa áintsan nuna tunaarĵin paant nekaamjai, tura asutiátniuiti tajai. ⁴ Tuma asamtai átum káunkakrumin ii Uuntri Jesukrístu kakarmarĵijai tura wi nuĵi pujáa áintsanak, ii Uuntri Jesukrístu kakarmarĵijai ⁵ nu shuar uunt iwianchnum surunkatniuiti ni ayashi wakeramurĵi amukati tusa. Nujai ni wakanĵi uwemprattawai ii Uuntri Jesukrístu támatai.

⁶ “Īikia péŋkeraitĵi” tárúmna nu ántrai, tunáa atumĵin tuke akui. Iis, “Karía ishichik yuminium enĵetam mash karimtiktsuk” tiniu áiniawai. Núnis átatui ju tunaajai. ⁷ Tuma asamtai nu karía ukartarum yajauch awajturmasajĵi tesarum. Núnisrum ju tunaanumiá kanakrum péŋker átatrume. Yaunchu enentái karía núnis amuukatniuiti. Ashí yamarmak yuminia áintsan aja-suitrume. Tanta wakapruachusha enentáimpratai. Israer-shuar paskua nampernum aya wakapruachu tantan yuu áiniawai. Atumĵi tunaarĵi atsakui atumsha nu námper-tantaa áintsar péŋker ajasuitrume. Paskua nampertincha Israer-shuar murikiun main áiniawai. Núnisanĵi Kristu jaka ii murikrĵa áinis ajasuiti. ⁸ Tuma asamtai iisha paskua námper nájanku pujakur tuke núnisanĵi shiir wekasatniuitĵi. Tuma asamtai ashí yajauch tunaasha írúnna nuka karía yaunchu nawamua áintsanĵete. Nuka atsutniuiti. Antsu nekas ana nuka shiir enentáimsar wekasatniuitĵi. Nuka yuminia áintsanĵete.

⁹ Nuik papin áatramajrumna nuĵi “Tsanirma shuarĵainĵkia íschatniuitrume” tímiajrum. ¹⁰ Ju nuŋkanam Yus-shuarchaka aya tsanirma, aya kuitniak ikiauwín, aya kasak, aya ántar-yusan tikishmatin áiniatsuk. Nú shuarĵainĵkia péŋké íschatniuitkiurmeka ju nuŋkanmayaĵi jĵinĵinrume. Núnaka tátsujai. ¹¹ Antsu wi tájana nu júiti, Shuar “Yus-shuaraitĵai” tákunĵa tura tunáa túriniaitkuinĵkia níjĵijai íschatniuitrume. Tsanirmasha, kuitian ikiauwíncha, ántar-yusan tikishmatniusha, tsanumniusha, nampencha, kasasha “Yus-shuaraitĵai” tákuinĵkia íschatniuitrume. Péŋké níjĵijai yurumáshtiniaitrume. ¹²⁻¹³ Yus-shuarcha tunaarĵi pachischatniuitĵai. Yus núnaka ístatui. Átumka antsu atumĵin Yus-shuar áinia nuna tunaarĵi ístiniaitrume. Tuma asamtai nu shuar tunaarintin atumĵiya akankatarum.

6

Yus-shuar nuámtak itiurchat awajnaisarka Yus-shuarchajai nuna iwiarashĵin áiniawai

¹ Yus-shuarka chĵikich Yus-shuarĵai itiurchat pujakka kapitánĵai chichas iwiarashĵiniaiti Yus-shuarcha asamtai. Antsu Yus-shuar írúnna nujai iwiarati. ² Enentáimpratarum. Amuukatĵin tsawantajĵi Yus-shuarka ashí ju nuŋkanmayaĵi shuara tunaarĵi mash nekaawartatui. Tura ashí tunáa nekaatniuitkiurmeka itiu yúpichuchia nu nekaashtatrum. ³ Nu arantcha Yusa santarĵi túramurĵisha nekaattajĵi péŋkerashit tusa. Nayaimpiniam túrawarma nekaatniuitkiurmeka itiuura ju nuŋkanmayaĵi nu tujinkiatĵai. ⁴ Pai, itiurchat ákuinĵkia Yus-shuar péŋké tujintiainiana nujai iwiaratarum antsu. ⁵ Natsaruk tusan nuna tájarme. Warĵi, ¿atumĵini chĵikichkisha atsawak ni yachĵi itiurchatĵi péŋker iwiamnia? ⁶ ¿Urukamtai Yus-shuar ni yachĵijai itiurchat pujakka Yus-shuarchanum wea iwiaratniun? ⁷ Atumĵi itiurchatĵi kapitannium jukirmeka nujainĵkia átum tujinkiam páantaiti. Natsantchakait. Itiurchat ana nusha ¿urukamtai antsu katsuntram asakáatsum? Kasamka-musha ¿urukamtai katsuntram asakáatsum? ⁸ Antsu átumka nuámtak yachĵijai itiurchat awajnáyarme tura kasárnáyarme.

⁹ Tunáa túrinkia Yus akupeamunam pachiinkiachmin ainia nu nékatsrumek. Anan̄nawairap. Ashí tsanirma nusha, ántar-yusan tikishmatniusha, nuamtak áishman̄jaj̄i tsanirmasha, ¹⁰ kasasha, ashí kuitian ikiauwincha, nampencha, tsanumniusha, yajauch chichainia nusha, chíkich shuaran anan̄kawar atantin ainia nusha Yus akupeamunma nuí pen̄ké wayashtin áiniawai. ¹¹ Atumíyasha chíkich chíkich nuna túrin armai. Tura yamaikia ii Uuntr̄i Jesusa kakarmarij̄jaj̄i tura ii Yusr̄i Wakan̄i kakarmarij̄jaj̄i atumi enent̄aj̄i shiir ajasuiti, atumsha Yusna ajasurme, tura tuke pen̄ker ajasurme.

Íi ayash̄i yajauch áchatniuiti

¹² “Ashí túramniait̄jaj̄i” tiniu áiniawai tura nekasaiti. Tuma aín̄ mash yáinkiashtatui pen̄ker wekasatniun. Nekas ashí túramniait̄jaj̄i tura nán̄kamas túratniuj̄aj̄i nupetnakchattaj̄aj̄i. ¹³ Junasha tiniu áiniawai: “Apatuk wakej̄aj̄in̄chu tura wake apatkuj̄aj̄in̄chu mai ántraiti.” Apatkuj̄aj̄i wakesha nekas mai metek enent̄aimpratin áiniawai tura Yus mai metek amuktatui. Núnisan̄ ii ayash̄i ii Uuntr̄i Kristunuiti tura Kristu ii ayash̄i nérenniuiti. Tuma asamtai ii ayash̄ij̄aj̄i tsanirmashtiniaiti. ¹⁴ Tura Yus ii Uuntr̄i Jesusan iniantkimia núnisan̄ ii ayash̄ín̄cha nu kakarmarij̄jaj̄i iniantkittiwai.

¹⁵ Ashí ii ayash̄īn̄ Kristu ayash̄ím̄kiaiiti. ¿Nu átumka nékatsrumek? Winia ayash̄rusha Kristu ayash̄īȳa asamtai ¿itiurak nuna tsanir̄i ayash̄ín̄ najanataj̄aj̄i? Pen̄ké túrachminiait̄jaj̄i. ¹⁶ Kame ¿jusha nékatsrumek? Áishman̄ tsanir̄ij̄aj̄i tsanin̄kiar chikichik ayashtinia áinis ajainiawai. Núnisan̄ Yus-Papinium áarmaiti: Mai chikichik ayashtinia áinis ajasartatui. ¹⁷ Tura shuar ii Uuntr̄i Kristuj̄aj̄i tsanin̄kia mai chikichik wakantin ajainiawai.

¹⁸ Tuma asamtai tsanir̄matniunm̄ȳa yaj̄aȳan̄ wainkiarum tséquentiarum. Chíkich tunáa írunga nu ii ayash̄ín̄kia ti yajauch awajeatsui. Túrusha shuar tsanirmakka ní ayash̄iniak yajauch awajeawai. ¹⁹ Yusa Wakan̄i ame enent̄aimin pujurtamu asamtai, ame ayash̄im ni jeente. Nu Wakan̄in̄kia Yus amasuiti. ¿Nuka nékatsrumek? Tuma asamtai ame ayash̄mi nérenchaitme. ²⁰ Kristu numpej̄aj̄i sumakma asamtai, ayash̄misha wakanmisha Yusna áiniawai. Yusna asamtai ayash̄mij̄aj̄i pen̄ker túratniuitme, Yus shiir awájnásti tusam.

7

Nuatkatniusha pen̄keraiti, nuatkashtincha pen̄keraiti

¹ Ayu. Átum áatrurarmena nuna yamaikia ujaktajrume. Shuar nu-atteachkusha pen̄keraiti. ² Tura ti tsanir̄matniun enent̄aimtunina ásar ashí áishman̄ ní nuwenak nuatkati tura ashí nuw̄a ní áishr̄in̄in̄ iniumkati. ³ Áishman̄sha ní áishr̄i asa nuwen túratniua nuna umiktiniaiti. Núnisan̄ nuw̄asha ní nuw̄e asa ní áishr̄in̄ túratniua nuna umiktiniaiti. ⁴ Núwaka nin̄ki ní ayash̄i nérenniuchuiti, antsu ní áishr̄in̄iuiti. Núnisan̄ áishman̄sha nin̄ki ní ayash̄i nérenniuchuiti, antsu ní nuw̄enuiti. ⁵ Ni ayash̄i suritnaiki-ashtin áiniawai. Tura mai itit awajnaitsuk Yus áuj̄satin wakeruiniak ishichik tsawant kanakmin áiniawai. Tura nuin̄kia atak tsanin̄ pujustin áiniawai. Túracharmatain̄kia uunt iwianch, Satanás, tunaanum iniantinian útsutkattawai katsuntratniun tujintiaku.

⁶ Ayu. Tura nuna áarayatan núj̄aj̄in̄kia “ashí shuar páchitsuk nuatkatniuiti” tátsuj̄aj̄i. Nuatkatniuitkiumka pen̄keraiti. ⁷ Túramtai “ashí wij̄aj̄i métek nuatkachuitkiuin̄kia maak ainti” taj̄aj̄i. Tura Yus ashí shuaran imiá métek

najanachuiti. Chikichan nuatkatniun súsaiti, tura chikichan yúpichuch kat-suntratniun súsaiti.

⁸ Natsancha wajencha juna tájai, “Wijjai métek nuattsuk pujusrumka péñkeraiti.” ⁹ Tura katsuntratniun tujinkiarka nuatkarti. Ti katsuntrachmin nekapeakum nuatkatniun péñkeraiti.

¹⁰ Nuatnaikiarun antsu tájai, “Nuwa nuatkamuka ni áishrin ikiukchat-niuti” tajai. Núnaka ii Uuntri Kristu akupkaiti aya winia chichampruchuiti. ¹¹ Túramtai ni áishrin ikiukkia niniki atak nuatnatsuk pujusti tura tsanin pujustinian wakerakka ataksha ni áishrin waketkiti. Núnisan áishmansha ni nuwen ajapashtiniati.

¹² Chikich shuaran juna tájai wikia, ii Uuntri Kristu juna akupkachuiti. Yus-shuara nuwenka Yus-shuarchaitkiunka tura ni áishrijjai pujustinian wakerakka péñkeraiti; ajapashtiniati, tájai. ¹³ Núnisan Yus-shuara aishri Yus-shuarchaitkiunka tura ni nuwejai pujustinian wakerakka péñkeraiti; ikiukchatniuiti. ¹⁴ Nu nuwaka “Yus-shuarchajai tsanin pujakun Yusjai yajauch ajastatjai” tu enentáimprashstiniati. Antsu nii Yus-shuar asamtai ni aishri nijjai pujá asa péñker ajasminiaiti Yusjai. Núnisan núwaka Yus-shuarchaitiat ni aishri Yus-shuaraitkiunkia nijjai tsanin pujá asa péñker ajasminiaiti Yusjai. Núnisan ni uchirisha péñker ajasmin áiniawai Yusjai. Núnischaitkiunkia ni uchiri Yus-shuarcha uchiria áintsar ainti. ¹⁵ Tura áishmansha nuwasha Yus-shuarcha ana nu kanaktinian wakerakka túrati. Yus-shuar nujai ankantaiti. Núnisan asati. Tuke máaniaktinian Yus nakitra-maji. ¹⁶ Nuwaka ni aishri Yus-shuar ajastatna nuna nekas nékawak. Tura áishmansha ni nuwe Yus-shuar ajastatna nuna nekas nékawak? Yus-shuarcha nuka wétinia wakerakka weti.

¹⁷ Wátsek. Shuarka Yus-shuar ajaska Yus nin najanama áintsan tuke átiniaiti. Pujumia áintsan pujusminiaiti. Núnaka ashí Yus-shuarum akupejai. ¹⁸ Iis, Yus-shuar ajasuka Israer-shuaraitkiunka tuke Israer-shuar atí. Tura Israer-shuarchaitkiunka Israer-shuar ajastin enentáimprashstiniati. ¹⁹ Israer-shuaraitkiunsha tura Israer-shuarchaitkiunsha nuka enentáimtuschatniuiti. Aya Yus tana nu umirkatin nekas enentáimtustiniati. ²⁰ Yus-shuar ajasuka nuik pujumia áintsan pujusminiaiti. ²¹ Chikich shuara takarniurj asam ti itirchat pujakmesha itirchat enentáimpráip. Tura ankant jínkimniaitkiunka jínkitiá. ²² Ankantchaitkiunka ankantaitkiunsha ju enentáimpratá. Takarniuka Yus-shuar ajas tuke chikich shuara takarniurjinkiusha shiir enentáimpratniuiti Kristu nin tunaanumiá ankant awajsamtai. Tura shuar takarniuchua nu, Yus-shuar ajas Kristu takarin ajasuiti. ²³ Ti wáitsamiayi Kristu in ankant awajtamsatnian. Ni numejai sumakma asarum shuar emetamu áirap. ²⁴ Tuma asamtai shuar Yus-shuar ajas nuik pujumia áintsan yamaisha pujusti tura Yusan enentáimtus wekasati.

²⁵ Nuwa natsa túratniua nuna yamaikia áujmatjai. Kristu juna akupkach-mai tura Kristu anenkratmarj ti nekapsa asamtai wi tájana nu antukmini-aiti. ²⁶ Tuma asamtai juna tájai. Ti iturchatnum pujá asakrin shuar aya júnisan nuattsuk pujustin péñkeraiti. ²⁷ Nuatkaitkiunka núwem ikiukip. Nátsaitkiunka nuwa ekaip. ²⁸ Tura nuatkunka tunáa túratsme. Nuwasha iniurtukka niisha tunáa túrachuiti. Túrasha nuatnaikiaru itirchatan ti wáinkiatatui ju nunkanam. Nú itirchatnumiá wi uwentikraintjai.

²⁹ Yatsuru, juna tájarme. Ishichik tsawant taasai. Juyanka nuatkaru ainia nuka aya ni nuarin enentáimprashstiniati antsu Yúsna enentáimtustiniati.

³⁰ Núnisan̄ tuke Yúsnan enentáimsar úutainia nusha uutcha áintsar pujustin áiniawai. Warainia nusha warascharua áintsar pujustin áiniawai. Súmainia nusha sumakcharua áintsar pujustin áiniawai. Jū nun̄kanmayajain̄kia itit awajmamsashtiniaitji. ³¹ Núnisan̄ aya jū nun̄kanam péñker pujustin ti takaschatniuiti. Ashí jū nun̄kanmayan̄ka amuukatniuiti.

³² Jū nun̄kanmayajain̄ itit ajaschak tusan wakerajrume. Nátsaka Yúsnan enentáimtawai ni wakera nuna umiktinian. ³³ Túrasha nuatkaka jū nun̄kanman̄ enentáimtawai ni nuar̄in shiir enentáimtiksatts. ³⁴ Núnisan̄ nuwā nátsasha nuatkamusha niisháa enentáimiainiawai. Nuwā natsa Yúsnan enentáimtawai ni ayash̄isha ni wakan̄isha tuke Yúsjai shiir atí tusa. Tura nuátkamuka jū nun̄kanmayan̄ enentáimtawai ni áishr̄in shiir enentáimtiksatts.

³⁵ Atumin yáintajtsan̄ juna tájarne. Itiurchat awajsattsan wakeratsjai antsu shiir wekaakrum itit awajtsuk Yus shiir enentáimtustarum tusan wakerajai.

³⁶ Tura shuar ni nawantr̄i natsan nuatnaikiati tákuñka péñkeraiti. Nawantr̄in natsa tuke apujsatniun nakitiakka surukminiaiiti. Nusha tunaachuiiti. ³⁷ Tura chíkichka tuke natsan apujsataj tákuñka nekas péñkeraiti. Apujsatin itiurchatchaitkiuñkia tura ni nawantr̄i nuatnakchatniuitkiuñkia apujsatniuiti. Apujsan̄ka nekas péñker túrait. ³⁸ Tuma asamtai nuatmamtikian̄ka péñker túrayi tura apujsan̄ka nu nan̄kaamas péñker túrayi.

³⁹ Nuwā aishr̄i iwiaaku pujakuñkia tuke niijjai tshan̄in pujustiniaiti. Tura ni aishr̄i jakamtai an̄kant ajas ni wakera nujai Yus-shuaran iis nuatnaiki-amniaiti, ⁴⁰ tura tuke nuatnatskesha nu nan̄kaamas nekas shiir pujustatu. Tú enentáimjai wikia tura Yusa Wakan̄isha métek tátsuash.

8

Yurumkasha naman̄sha ántar-yusnum susamu

¹ Ayu. Yamaikia yurumkasha naman̄sha ántar-yusnum susamun áujmatsattajai. Jujai túratniua nuka mash nékaji. Tura shuar “ti nékaitjai” enentáimkiuñka nujain̄kia “neka asan nan̄kaamantuitjai” tu enentáimui. Antsu shuar chíkich shuaran aneakka nin péñker atí tusa yayawai. ² Shuar “ti nékaitjai” tákuñka nekas nekaatniua núnaka unuimiarchaiti. ³ Tura Yúsán aneana núnaka Yus péñker nékawai.

⁴ Wátsek. Ántar-yus susamu yúatin junis enentáimpratniuiti. Yuska aya chíkichkiiti. Tura chíkich Yus atsakui, ⁵ aentsu yusr̄i nayaimpinmasha nun̄kasha írunna nuka pen̄ké ántar áiniawai. Kame aentsu yusr̄isha tura úntr̄isha ti írunui. ⁶ Tura iikia nékaji, aya chíkichik Yus awai, nusha ii Apar̄inti. Ashí írunna nuna najanaiti tura ni wakera nuna umikiat tusa najatmamji in. Ii Úuntr̄isha chíkichkiiti, Jesukristu. Niijjain̄kia ashí najanamui. Tura iisha ni kakarmarijiai iwiaaku pujaji.

⁷ Tuma asamtai ántar-yus susamu yuamniaiti tura Yus-shuar awai juna nékainiatsna nu. Nu shuar ántar-yusan yaunchu tikishmatraru ásar nú yusan susamun yuawarka itiurchat enentáimpr̄ar “enentáirui yajauch ajasjai” tiartatui. ⁸ Wátsek, yuamujai Yus in shiir enentáimtikrampratniun jeatsui. Yuarkia nujai péñker áhattaji tura yúachrikiya yajauch áhattaji. ⁹ An̄kantaitme yúatin wakerakme. Tura anearta. Ame yúakmin chíkich shuar itiurchat enentáimna nusha ámin wáitmak yúan̄ka ni enentáin̄ tunáa ajastatui.

¹⁰ Ístá. Ámeke neka asam ántar-yusa jēen wayam tura nūj yúakminkia ame

yatsum nuḵ wáitmákchanpiash. Tura niisha itiu^rchat enentáimiat ántar-yus susamun yúashtimpiash. ¹¹ Nújainkia ame nékamujai ame yatsum Kristu jaka uwemtikramia nu yajauch ajastatui. ¹² Túramtai ame yatsum itiu^rchat enentáimna nu yajauch awajeakum Krístunmasha tunáa túraitme. ¹³ Nu asantai winia yatsurun wi yúajna nujai yajauch awajeaknaka namañnaka penké yuashtatjai nii tunáa ajasain tusan.

9

Kristu akatramu túramnia nu

¹ Ashí Kristu akatramurḵ túratniau nuna wisha túramniaitjai ni akatramurḵ asan. Iis, wisha ii Uuntrḵ Jesusan wáinkiaitjai tura wisha Jesukrístu takatrḵn takaajai. Winia takatrujain átumka Yus-shuar ajasuitrume. ² Chíkich shuar “Kristu akatramurḵnchuiti” túrutainiakui^{sh}a átumka winia takatrujaj Yus-shuar ajasu asakrumḵn nujai wi nekas Kristu akatramurḵntiaj nu paant nekaamniaiti. Tura tu enentáimtursatniuitrume.

³ Ashí shuar “Kristu akatramurḵnchuiti” túrutainia nuna juna tájai. ⁴ Wisha Yus-Chichaman etserkataj tusan shuárnum irakun ashí ajamprunia nuna yuamniaitjai tura umarminiaitjai. ⁵ Tura Pitrusha, Jesusa yachḵsha, tura chíkich akatramusha irainiak ni nuwen Yus-shuar ainia nuna jukimnia ániawai. Wisha núnisnak túramniaitjai. ⁶ Chíkich akatramuka kuit susamujaj Yus-Chichaman etserainiawai. Wisha Pirnapísha núnisrik túramniaitji. Kame çaya íchikik takastiniaitjai? ⁷ Suntarka çní kuítrḵjijai^{sh}mpiash takaa? çTsan-impian aráa nu nuna neren yúatsuk. Wáakan wainia nusha muntsurḵn úmátsuk? Núnisan Yus-Chichaman étsera nusha nú takasmanu^{sh}ia yurumámniaiti. ⁸ Aya aents enentáimmian chichaatsjai. Muisais akupkamunmasha métek tawai. ⁹ Muisais akupkamunam áarmaiti:

“Turu takaak jinḵkiaia saepen pakartaj tusa nájakui ni nuḵ jinḵkiatáshtiniaiti.

Antsu ni wakerak yuati.” Tu áarmaiti.

Tura Yus aya túrunak enentáimprachmiayi jujaj. ¹⁰ Antsu in jujaj nekaawarat tusa túmiayi. Jinḵkiain araana nusha tura júukmatai saepen pakaana nusha nuna jinḵkiain mai yurumáin ániawai. Paant atí tusa Yus nuna áarmiyai. ¹¹ Tuma asantai Yus-Chicham atumḵin etserkkrin nuyá átum takakrumna nujaj in ajamsatniuitrume. çNusha itiu^rchatkai? ¹² Chíkich akatramu atumḵin irutainiak ajamsamun yuamniaitkuinḵkia iikia nekas túramniaitji ii etserkamujaj Yus-shuar ajasakrumin.

Tura wikia antsu túrachuitjai. Atsumaknasha ashí itiu^rchat ana nuna kat-suntramjai Kristu shiir chichamen étserkui shuar itiu^rchat enentáimturarain tusan. ¹³ Ashí shuar ni yúsrḵiniun tuke pujurin ainia nu, ni yusrḵ jeeⁿ írunga nuyān yurumáiniawai. Tura yus-sutai manāken maawar nuyá yurumáiniawai. ¹⁴ Núnisan Yus-Chichaman etserniau nuka Yúsnan takasu asantai penker ajamsatniuiti. Nuna Kristu akupkamiayi. ¹⁵ Tura wisha ajamsamun yuamniaitiatan tuke winia kuitrujaj yurumámjai. Tura yamaisha surúsúk tusan áattsujrume. Antsu nuna túrutsuk jakañka maak aintjai.

¹⁶ Uwempratin chichaman wi étserkun aya nújain “ti penkeraitjai” enentáimtumatsjai. Kame Yus nuna túratnium surusuncha itiu^rkatjak. Nuna túrachunka ti itiu^rchat pujusaintjai. ¹⁷ Wakerakun étserkunka, warasminiaitjai. Tura nakitiaknasha tuke Yus surusmanka umiktiniaitjai. ¹⁸ Tura jujaj antsu nekas warasminiaitjai: Wi túramnian iniaisan chikichnan

takatsuk aya winia kuítrujain uwempratin chichaman étserjai. Nujai waraakun akikma áintsan ketete.

¹⁹ Chíkich shuara takarniuchuitatan ashí shuara takarniurjya áintsan ketjai Kristu shuarj untsurj ajasarat tusan. ²⁰ Israer-shuarjai pujakan niisha Yus-shuar ajasarti tusan Israer-shuara áintsan ajai. Kame Muisaisa akupkamurj umirkatin áiniakui wisha aun umirkashtiniatiatnak umirniuitjai. ²¹ Tura Israer-shuarchasha Yus-shuar ajasarti tusan, nu shuar Muisaisa akupkamurj umirkashtin áiniakui, wisha nuna umirkashtinia áintsan ajai. Tura Kristu akupeana nuna umirkatin asan nekas Yus akupkamun umirniuitjai. ²² Yusjai katsuarchasha ti penker Yus-shuar ajasarti tusan wisha katsuarcha áintsan ajai. Chíkich chíkich shuarjai métek ajajai ishichkisha Yus-shuar ajasarti tusan. ²³ Ashí wi túraj núnaka uwempratin chicham tuke shiir atí tusan túrajai. Tura nu chichamjai wisha atsumtsuk shiir wekaajai.

²⁴ Shuar nekapnaisatniusha untsurj tsékeñtin átsuk tura aya chikichik awakmatsuk. Nínki, awakmakun súsatniua nú shiirmachin achiktatui. Núnisrum kakarum ajasrum awakmak shiirmachin achiktinia áintsarum Yusna takastarum. ²⁵ Shuar nakurak nekapnaisatin ainia nuka nupetmaktaj tákunka ashí itit awajea nuna ikiuniawai. Iisha núnisrik nu enentájjiai Yusna nu takastiniatiji. Nakuruinia nu shuar awakmakun tawasap súsatniua nuna achikiarsha nú tawaspan wárik kajinmatkimniaiti. Antsu Yus in amastatjina nú tawasap tuke amuukashtatui. ²⁶ Wikia aya nánkamsan tsékeatsjai. Nasejai maania áintsan máaniatsjai. ²⁷ Antsu winia ayashrun awatinia áitkiasnak umimtikiajai. Túrachkunka chikichan unuiniariatan winiasha awakmakun súsatniua nú shiirmachin Yus surustinian nakitrurainti.

10

Ántar-Yus tikishmatrashtiniaiti

¹ Enentáimpratarum, yatsuru. Yus yaunchu ii úuntrin ashí métek yáinmiayi. Nusháa yuranmijjai jintian nekapruamiayi. Tura ashí ii uuntrj nu yuranmin apapekar wearmiayi. Ashí núnisar Kapaaku Nayaantsan Yus akankamunam wekasar katitkiarmiayi. ² Tura Muisaisan umirkar yuranminiam tura nayaantsanam ashí imiaimiu áintsan ajasarmiayi. ³ Núnisan ashí mash Yusnumja yurumkan yuawarmiayi. ⁴ Entsanacha ashí mash Yus susamunak umararmiayi. Kame Yus kayanmaya entsan akupkamtai ashí umararmiayi. Kristusha, nú kaya áintsan, niijjai tuke weakui ni wakanj atsumamurj Kristunmayan takusarmiayi. ⁵ Tuma ajn Yus ti yáinmaitiat ni wakeramun umikcharmiayi. Tura ásar ni nunkeen jeatsuk atsamu nunkanam ti untsurj jákarmiayi.

⁶ Iisha nujai unuimiartiniatiji. Iikia ni wakeriarmia áintsarⁱ yajauchia nu wakerukchatniuitji. ⁷ Nu asantai ántar-yus ni túrawarmia áintsarum tikishmatrairap. Iis, jiru yusrj shiir awajenakuí Yus-Papinium áarmaiti, “Nu shuar yurumáwar nampekar námper ti najanawarmiayi.” Tu áarmaiti.

⁸ Nii túrawarmia núnisrik iikia tsanirmashtiniatiji. Nuna túrawar paintitres mir (23.000) chikichik tsawantaj jákarmiayi. ⁹ Iisha tunáa túrar “Yus asutiáshtatui” tu enentáimprashhtiniatiji. Niisha nuna túrawar napijjai esaim untsurj jákarmiayi. ¹⁰ Yussha yajauch áujmatsashtiniatiji. Nuna túrawarmatai Yus ni suntarin akupak untsurin maawarmiayi.

11 Yaunchu ii úuntrijjaj túrunamu in amúamu tsawantnum pujajnia nuna jintinramat tusa áarmaiti. 12 Tuma asamtai shuar “Tunaanum iniaarchat-tajai” tákunka anearti. Anearchamka iniaarminiaitme. 13 Tura ame itiuarchatrumka aya amek nekapeatsme. Chíkich shuarsha nu itiuarchatjaj métek nekapsatin áiniawai. Jusha ti enentáimpramniaiti. Ame katsuintratin tujintiamna nuna nankaamas itiuarchatan Yuska péñker asa tsankatramatsui. Antsu itiuarchat tarutrammatai, nu itiuarchatnum pujamin Yuska uwempratniun jintinramattawai. Nújainkia katsuntrattame.

14 Nu asamtai aneamu yatsuru penke ishichkisha ántar-yus enentaimtu-sairap. 15 Atumsha nékatsrumek. Wi tájana nu nekaschakait. 16 Kristu jakamu enentáimtustin námper najanar Yus áujeaji Kristu numpen nakumea nu shiir atí tuser. Tura métek umamar nujaj Kristu numpé métek enentáimtaji taji. Tura apatkusha púurarⁱ tura métek yuarⁱ nujaj Kristu ayashí in jarutramkamú métek enentáimtaji taji. 17 Apatkusha chíkichkiitiat púuram untsurí ajatsuk. Iisha núnisrik untsuríitiatar nu apatuk métek yuarⁱ métek enentáimprar chíkichik ayashtinia áintsar aji.

18 Israer-shuartisha enentáimpratai. Yus-sutai namañken yuinia nu, métek yuawar Yusan métek enentáimtuiniatsuk. 19-20 Núnisarⁿ Yus-shuarcha ántar-yus sutai namañken suiniak nekas-Yusan suiniatsui antsu yajauch wakanin suiniawai. Kame ántar-yus ániak penké ántar ániawai, iwiaakuchu ániawai. Nu namañsha sutai namañketiat péñker namañkete, yajauchichuiti. Aya junak tajai. Yus-shuarcha ántar-yus sutai namañken suiniakui amesha niijjaj métek yuanka yajauch wakanniasha niijjaj métek enentáimtaji tame. Nu antsu yajauchiiti. 21 Kristu numpen nakumea nu úmakrum íwianch susamua nuka umarchatniuitrume. Kristu ayashin nakumea nu yúakrumka íwianch susamua nuka yúashtiniaitrume. 22 ¿Warí, Yus akajkatin wakeramek. Iisha nin nupetkamniashitaj?

Aya aneakur takastiniaitji

23 “Ashí túramniaitjai” tiniu áiniawai. Ayu, tura mash yáintkiashtatui péñker wekasatniun. Nekas ashí túramniaitjai tura mash yáintkiashtatui wakaniur kakaram ajastin. 24 Nú arantcha chíkich yáintincha enentáimpratniuitji. Aya íiniuk pachischatniuitji.

25 Namañ súmakum inintrutsuk sumakta. Tura ántar-yusan susamusha yajauchichuashit enentáimtsuk páchitsuk yuata. 26 Ashí ju nunčkasha tura ashí irunna nusha Yúsnachuk ainia. Tuma asamtai péñker ániawai.

27 Yus-shuarchasha yurumkan ajampramkuisha ashí mash yajauchichuashit tu enentáimtsuk páchitsuk yuamniaitme. 28 Tura chíkich chichaak “Juka ántar-yus susamu namañkete” túramkuinkia nuikia yuawaip. Yúakminkia nu shuar itiuarchat enentáimprattawai. 29 Ame páchitsuk yuamniaitkiumnisha nii antsu yúachmin asa itiuarchat enentáimprattawai.

Tura amesha tíchatameash “¿Urukamtia nii tujintiakui wi yúachminiaitjai. 30 Wi Yúsan yumiñsan yúakuisha urukamtia itiuarchat enentáimturainia. Yus yumiñsachmakait?” tíchatameash. 31 Ayu, yúakmesha úmakmesha ashí túramna nusha ashí shuar Yúsan shiir enentáimtusarti tusam túratá. 32 Tuma asamtai ii túramujaj chíkich shuar tunaanum ajúashtiniaitji. Israer-shuarsha, Israer-shuarchasha, Yus-shuarsha ashí yáintiniaitji. 33 Wisha ashí shuaran yáintinian tuke enentáimjai. Ashí shuar uwemprarti tusan wi wakeraj nuna enentáimtsuk nin yáintinian tuke pujurjai.

11

1 Kristu turamia áintsan takaajai wisha. Atumsha núnisrum wi takaajna áintsarum takastarum.

Nuwa Yusa jeen túratin

2 Yatsuru, átum winia tuke enentáimturarum wi tímiajrumna nu umirniuitrume. Tuma asakrumin shiir enentáimtajrume. ³ Nu arantcha ujaajrume. Yus Apa Kristun akupea áintsan Kristu ashí áishmankan akupeawai. Núnisan áishmansha ni nuwen akupeawai. ⁴⁻⁵ Íjijainkia shuar Yus áujenak tura núnisan Yus-Chichaman étserrainiak áishman etsenkrukchatniuiti antsu nuwa múuknum nukumaktiniaiti. Tuma asamtai áishman nui etsenkkrakka natsantaiti. Tura nuwa múuknum nukumakchanka natsantaiti. Intiashin tsupimiarua áintsankete. ⁶ Nuwa múuknum nukumaktinian nakitiakka intiashin tsupírti nuikia. Watsek, nuwa ni intiashin tsupirtinian nakitiakka, tura awampratniun natsamakka múuknum nukumakti nuikia. ⁷ Áishmanka Yúsan nakumeawai. Yusna shiir ana nuna nakúmkáttsa Yus áishmankan najanamiayi. Tuma asamtai áishmanka etsenkrukchatniuiti. Antsu nuwanka áishmanna shiir ana nuna nakúmkáttsa Yus najanamiayi. ⁸ Iis, Yus áentsun najaneak nuwanmayan áishmankan najanachmiayi antsu áishmanka ukunchijjai nuwan najanamiayi. ⁹ Nuwan yáinkiát tusa áishmankan najanachmiayi antsu áishmankan yáinkiát tusa nuwan najanamiayi. ¹⁰ Tuma asamtai núwaka múuknum nukumaktiniaiti, nayaimpinmaya aencha ísarti tusa. ¹¹ Ayu, tura áishman nuwajainchu atsuinti tura nuwasha núnisan áishmanjainchu atsuinti. Yus ju nunkan núnisan atí tusa najanaiti. ¹² Iis, Yus nuwan áishmannumia najanamiayi tura áishmansha nuwanmaya akiiniaiti. Tura Yus mai najanaiti.

¹³ Enentáimpratarum atumsha. Nuwa múuknum nukumatsuk Yus áujsatin ¿pénkerkait? ¹⁴ Ii shuartinkia áishman intiash ajakin natsantchakait. ¹⁵ Antsu núwaka intiash ajakin pénkerchakait. Múuknum nukumaktinian susamuiti. ¹⁶ Watsek, shuar tuke umiktinian nakitiakka juna nekaati, iisha tura ashí Yus-shuartisha aya tu enentáimji.

Kristu jakamu enentáimtustin nampernum yajauch túramu

¹⁷ Yamái áarattajrumna nujain shiir enentáimtatsjarne. Atum irunkuram yáiniaiktiniatrume tuke pénker wekasatin. Átum antsu irunrarum yajauch awajnaiyarme. ¹⁸ Wats, Yusa Jeen irunkuram atumsháa enentáimprarum kanakurme. Kame tu ujatkarmai. Nekaschashit. ¹⁹ Tuke tupartatrumek Yúsnan ti nekana nu shuar paant nekanat tusarnea. Antsu kajernaikiar kanaktin pénkerchaiti. ²⁰ Kanakin asarum Kristu jakamu enentáimtustin nampernum atum irunrarum yúarmena nu nekas Yúsnachuiti. ²¹ Iis, ashí ní yurumken itiaawai ai yurumáttsa tura chikichan náksatsuk niá niá wari yuattsa wakerawai. Chikichkia ishichik itiaana nu tsukamawai tura chikichcha namekarai. ²² Yurumkan ishichik itiaana nu iniatsáarchamek. Atum áitkiarum núnisan Yusa jeen yurumashtiniaiti. Natsantaiti. Warí, chikich jea átsuk ai yurumátin. ¿Warimpait. Jujai shíirash áujsatjarum? Atsá. Jujai shiir áujschminiaitjarne.

Kristu jakamu enentáimtustin námper

²³ Ii Uuntri Kristu jintintruama núnaka ujakmajrume. Jútas tuke súratsain, nu kashi ii Uuntri Jesus apatkun júki ²⁴ Yusan yuminsamiayi. Nuyá puur

tímiayi “Yuatarum. Jusha winia ayashruti; atumin jarutramkatta núiti. Ju yúakrum Winia enentáimtursatarum” tímiayi. ²⁵ Núnisan yurumá umik piniñnasha achik tímiayi “Ju piniñ Yamaram Chichamaiti. Tura winia numpar puármatai Yamaram Chicham nekas uminkiatstawai tawai. Ju tuke úmakrum Winia enentáimtursatarum’ tímiayi. ²⁶ Tuma asamtai ju apatuk yúakrum tura piniñsha úmakrum ii Uuntrí Kristu jakamurí enentáimtarne. Kristu táatsain ju tuke túratniuitrume.

Shiir enentaijiaí Kristu jakamu enentaimtustin nampernum yuatniuiiti

²⁷ Tuma asamtai shuar Yusan enentáimtutsuk ju apatkun yuawar tura ju piniñnumiñcha umarar Kristu ayashincha ni numpencha yajauch enentáimta asa tunáa túraiti. ²⁸ Nu asamtai ashí shuar ju apatkun yútsuk tura ju piniñnumiñcha úmutsuk ni enentáin iwiaratniuiiti Yusjai. ²⁹ Kristu ayashí jakamu enentáimtutsuk yúakka tura úmakka nuna tura asa asutniáttawai. ³⁰ Atumsha tura asarum jaarme tura pimpiruitrume. Chikichcha jákaru ániawai. ³¹ Ímia-iik íimiakrinkia Yus in asutiámachaintji. ³² Tura ii enentáin Yus yajauchia nuna wániuk asutiámji. Túrachkunka ashí Yus-shuarchajai súmamtikramawaintji.

³³ Tuma asamtai, yatsuru, iruntrar yurumáttsa matsatkurmeke nákastarum métek yurumátin. ³⁴ Shuar tsukamakka ni jéeniñk' yurumáti. Nújainkia yajauchijjai irunchakrumin Yus asutiámashatrume. Ayu, chikich áatrururmena núnaka wi aj jean iwiarattajai.

12

Yusa Wakaní ni shuarin susamu

¹ Yusa Wakaní ashí ni shuarin súana nuna yamá ujaktatjarme. Nekaatarum, yatsuru. Yus-shuar shiir takasarti tusa Yusa Wakaní juna súsaiti.

² Yaunchu átum Yus-shuar tuke ajatsuk chikich shuarjai métek ántar-yus tikishmatramarme. Niisha ántar-yus ásar áujmatramsachmin ármiai. ³ Tura jújain shuar Yusa Wakaní kakarmarijjai chichaana nu nekaamniaiti. Yusa Wakaníjjaínkia shuar “Jesus yajauchiiti” tíchamniaiti. Núnisan aya Yusa Wakaníjjaín “Jesus winia Úuntur asa akuptuktiniaiti” tíminiaiti.

⁴⁻⁵ Yusa takatrí iruntsuk. Tura Yusa Wakaníñk' ashí nuna takastinian súsaiti. Tura shuar Yus-shuara Uuntrí chikichik ajn ashí Yusa takatrin métek takaatsui. Antsu chikichkin ashí nankaamas péñker takaawai. Yusa Wakanísha nuna shiir takasat tusa súawai. Tura Nii wakera nuna Niñki ni shuarin chikichik chikichik niisháa niisháa súawai. ⁶ Yúskete ashí ni shuarin niisháa takamtikeana nu. Niñki ashí ni shuarj enentáin takaak takatnasha shiir takamtikeawai. ⁷ Yusak túratin sám Yusa Wakaní kakarmari paant átatui nu takasmanum. Tura ashí shuar ní takatrijjai yáiniaiktin ániawai. ⁸ Júnaka Yus takamtikeawai. Nékana nu shuarnasha, unuimiarua nunasha Yúsnañ ujaktinian súawai. Tura mai shuaran Yusa Wakaní kakarmarijjai nuna túratniun súsaiti. ⁹ Chikichnasha Yúsnañ áujenak Yúsnañ ti enentáimtusar nekas itiurchat ana nuna iwiaratniun súawai. Nincha Yusa Wakaní kakarmarijjai nuna takastinian súsaiti. Chikichnasha jaan tsuártinian súawai. ¹⁰ Chikichnasha aents níki túrachminian túratniun súawai. Chikichnasha Yúsnañ etserkatniun súawai. Chikichnasha shuar warí yajauch wakannia péñker wakanniasha apatka nekaatniun súawai. Chikichnasha niisháa chichaman chichastinian súawai. Chikichnasha niisháa chichasman jintiatniun súawai. ¹¹ Tura ashí

shuara enentájn nu Wakanik takaawai. Tura Nii wakera nuna ankant ankant súawai takastinian.

Ashí Yus-shuar Kristu ayashía áintsan ajainiawai

¹² Iikia Kristu ayashía áintsar¹ ayashímkiatji. Kristu ayashí muchitmarjsha írunui. Niisha túmaitiat chikichik ayashtiniaiti. ¹³ Tura imianiakrin Yusa Wakaní chikichik awajtamsamji, Kristu ayashía áintsan. Israer-shuarsha, Israer-shuarchasha, ti itirchat takaana nusha, ankant ainia nusha, ashí yamá chikichik ajasuitji. Tura Yusa Wakaní pimiutkamuitji Niijjai tsaninkia pujakur.

¹⁴ Ayashi muchitmarí aya chikichichuít. ¹⁵ Tuma asamtai, winia nawer uwejruchuitiat tuke winia ayashrunuít. ¹⁶ Winia kuíshrusha jíruchuitiat tuke winia ayashrunuít. ¹⁷ Wátsek winia ayashur aya jíkikiuiníkiá ¿itiurak antukaintiaj? Winia ayashrusha aya kuíshkitkiuiníkiá ¿waríjiaín nekapsaintiaj? ¹⁸ Nu asamtai Yus winia ayashru muchitmarí ni wakeramunam ikiusuít. ¹⁹ Chikichik muchitmajáin ¿ayash áminkiait? ²⁰ Antsu untsurí muchitma akuisha chikichik ayashkiiti. Iisha núnisrik chíkich chíichá takayatrik métek takasar Yus wakeramu takamtsuk umíaji.

²¹ Winia jírú péñker aín winia uwejrúncha wakerishtatjak. Winia muukarsha péñker aín winia nawernasha wakerishtatjak. Núnisán Yus-shuar shiir enentáimtumak ni yachin “atsumatsjame” tíchamniaiti. ²² Antsu íi muchitmarí ishichik enentáimtajnia nu atsakuínkiá ti atsumawaintji. ²³⁻²⁴ Chíkich muchitmasha, ímiancha nu, shiir iwiarmamtaji. Tura nu muchitmaka shiir íisminia nujai nankaamas péñker wainji. Iis, shiircha nu antsu péñker wainji. Yus íi ayashín núnisán atí tusa najanamiaiyi. ²⁵ Nujáinkia ayashí muchitmarí máanaitasuk métek yáiniainiawai. ²⁶ Chikichik muchitmaram najaimiakum ashí ayashníum wáitiatsmek. Núnisán chikichik muchitmaram ayap ajakum ashí ayashníum shiir átsumek.

²⁷ Núnikete Kristu ayashíjjai ayashímkiatji nu. Tura chíkich chíkich ni muchitmarí aji. ²⁸ Ayashníum muchitma írunna áintsan Yus ni shuarín untsurí takatan súsaíti. Emka Yus akatramu, nuyá ni chichamen etserin, nuyá jintinkiatin, nuyá aents túrachminian túrin, nuyá tsuákratin, nuyá yáinkratin, nuyá akupin, nuyá niisháa chichamjai chicharin, mash írunui. ²⁹ ¿Ashí Yus akatramuk ainia. Ashí Yus-Chichaman etserniuk ainia. Ashí jintinkratniuk ainia. Aents túrachminian ashí túriniak ainia. ³⁰ Ashí tsuákratniuk ainia. Ashí niisháa chichamjai chichamtiniak ainia. Ashí niisháa chichamjai chichasman jintinkratniuk ainia? Atsá. Túmachuít. ³¹ Túmaitkuínkiá péñkera nu takastin wakeruktarum. Tura imiá péñkera nuna juí jintintiatjarne.

13

Aneatin

¹ Ju nunkanmaya aentsu chichamen untsurí chichayatnak tura nayaimpinmaya aentsu chichamencha chichayatnak anenkratchaknaka tampur meserua áintsanak aya ten-ten ajajai. Peñké ántranak chichajai. ² Yus-Chichamnasha ti shiir étseriatnak, túrasha ashí uukmancha tura ashí nekaamniancha nékayatnak, túrasha Yúsan ti enentáimtusán murá umuchiayatnak, anenkratchaknaka peñké ántraitjai. ³ Ashí wi takakjana nuna atsumainian súayatnak tura Yus shiir awajsattsan winia ayashrúncha áesawarti tusan suru-mayatnak tura anenkratchaknaka ántranak túraitjai.

⁴ Aneṅkartaka wari kajeatsui, tsáṅkaiti, chíkich shuaran shiir awajniuiti, péechach asa waantu enentáimtumatsui. ⁵ Aneṅkartaka natsanta nuna túrichuiti, níiniunak enentáimchaiti, kajechuiti, páchichuiti. ⁶ Chikicha tunaarjín wararchaiti antsu péṅker shuaran wararniuiti. ⁷ Aneṅkartaka aya kat-sunteawai. Tsanú chichamnasha nakitiawai antsu aya péṅker ana nuna nákwai. Tunáa shuar shiir ajastí tusa tuke nákwai.

⁸ Aneṅkrattainkia tuke amuukashiniaiti. Antsu ju nunka amuuk-mataisha Yus-Chícham etserkatin atsuttawai, tura niisháa chíchamjají unuimiatsuk chichastincha amuukattawai, tura ashí nekanamtai unuimiartincha atsuttawai. ⁹ Kame yamaikia aya ishichik nékaji. Yus-Chichamsha amut-suk étsereaji. ¹⁰ Túra ukunam mash nekanamtai yámankamtaik nekaamuka ántar átatui.

¹¹ Yaunchu wi uchich asan uchichia áintsan enentáimkiun chichasmajai. Antsu yamaikia uunt ajasan uchiniun iniaisaitjai. ¹² Núnisrik yamáí ju nunkanam Yus paant wáintsuji. Íspik kusurunam ímsatniua áintsanṅkete. Antsu ukunam mai métek paant wainniaikiattaji. Yamaikia aya ishichik nékaji. Nuḷ antsu Yus winia nékara áintsanak nekaattajai. ¹³ Watsek, menain-tiu amuukashtin áiniawai. Ju áiniawai: Yus shiir enentáimtustin, shiir ana nu nákastin, tura aneṅkrattai. Ju menaintiunmasha aneṅkrattainkia ashí nanṅkaamakuiiti.

14

Niisháa chicham unuimiatsuk chichastin

¹ Nu asamtai, aneṅkratin atarum. Tura núnisrumek Yúsnan péṅkera nu takastin wakeruktarum. Imiankaska Yus-Chícham etserkatin péṅkeraiti. ² Nújainkia niisháa chíchamjají unuimiatsuk chichastin péṅkerchaiti. Iis, nu shuar chíkich shuarjají chichatsuk aya Yusjají chichaawai. Ni chichame penṅé antukhamniaiti. Yusa Wakaní nin chichastinian súawai túrasha tana nu nekaachminiaiti. ³ Antsu Yus-Chichaman étserea nuka shuaran yayawai. Shuaran ikiatsuártasa, tura ikiakártasa, túrasha atsanṅkrattsa yayawai. ⁴ Niisháa chíchamjají unuimiatsuk chichaana nuka aya ninḷi kat-suártinian yáinmamui. Antsu Yus-Chichaman étserea nuka ashí Yus-shuaran ikiatsúáwai.

⁵ Atumsha ashí mash niisháa chíchamjají chichastinian wakerajrume. Túrasha nuna nanṅkaamas Yus-Chícham etserkatniun wakerajrume. Aya chichastinjainkia ju imiá péṅkerchakait. Kame chichasma jintiákmeka maak. Nujají Yus-shuar tsakarartatui. ⁶ Enentaimpratarum, yatsuru. Nuḷ irakun aya niisháa chíchamjají chichaaknaka žitiura yáintatjarum? Antsu Yus winia jintinrumuncha tura wi nékajna nunasha étserkunka yáintatjarme. Yus-Chichamnasha tura ashí Yúsnancha jintinkiuṅcha yáintatjarme.

⁷ Peemsha tura tumaṅsha wi tájana áintsan áiniawai. Péṅker tuntuíyamuka paant nekaamniaiti. Tura péṅker tuntuíyachuṅkia, nu tuntuíyamu nekaach-miniaiti. ⁸ Suntarsha mesetnum wéenakui ni kapitiántrí ni wakeramun ujaktinian kachun umpuawai. Paant umpuachuṅkia suntarsha ni wakeramun nekaawartatui. Tura paant umpuachuṅkia suntarsha žitiurak meset-num wétinian iwiarat? ⁹ Atumjajísha núniskete. Nekaachmin chíchamjají chichaakminka žtámena nuna itiu nekaawartata? Nase chichartsumeash. ¹⁰ Ju nunṅkanmayá chíchamka ti untsurí írunui. Nu chichaman nékakka ashí antukmin áiniawai. ¹¹ Tura chíkich shuara chichameṅ ántachkunka

nújjaińkia yajaya apachia áintsanak ajajai. Niisha wíjjaińkia yajaya apachia áintsanĸete. ¹² Tuma asamtai, Yusa takatri ti wakera asarum ashí Yus-shuaran iĸjarartatna nú takat nekas wakeruktarum.

¹³ Nu asamtai niisháa chichamjai chichaitĸiumka chichasumna nu jintiartin Yus seata. ¹⁴ Niisháa chichamjai Yusan áujeaknaka nekas winia wakantrujai áujeajai tura áujsajna nuna nékatsjai. ¹⁵ Antsu wikia júńisan enentáimjai. Yúsan áujeakun winia wakantrujai sha áujsattajai tura enentáimtsuk áujsashtatjai. Kantamkuncha kantamaj nuna enentáimĸiun winia wakantrujai sha kantamattajai. ¹⁶ Amesha shuar iruntramunam aya wakanmijai niisháa chichamjai Yus shiir yuminsakmincha nekaachmin asamtai nékachuka ámijai métek áujsatniun jeatsui. ¹⁷ Ti shiir Yus yuminsam áujeatsmeash tura chíkichka Yusjai ikiakáatsme. ¹⁸ Ashí átum nusháa chichamjai chicharmena nuna nańkaamas wikia chichaaĸai. Nuna Yusan yuminsajai. ¹⁹ Túmaitiatnak untsurí chichamjai chichasan ántumtĸiashtinjaińkia nańkaamas Yus-shuar iruntramunmańka aya seńku chichamchijaiń tuintjai, paant jintintiawartaj tusan.

²⁰ Yatsuru, uchía áintsarum enentáimprairap. Kuirchia áintsarum tunáa túrashtin enentáimpratarum tura chíkich írúnna nujai uunt enentáimpratniua áintsarum enentáimpratarum. ²¹ Yus-Papiniun áarmaiti:

““Yajaya shuaran akupkan niisháa chichamjai chichastatjai. Tura nújajsha anturtukchartatui” tawai Yus.” Tu áarmaiti.

²² Nújainĸia páantaiti, nusháa chichamjai chichastinkia Yus-shuarčan ashamtĸiár enentáimĸikratniun Yus súsaiti. Yus-shuaran tu enentáimĸikratniun súsachuiti. Antsu Yus-Chichaman etserĸatniunka Yus-shuarčan enentáimĸiksuk Yus-shuaran yáintinian súsaiti. ²³ Tuma aĸin, nékachusha tura Yus-shuarčasha Yus-shuar iruntramunam wayańka tura ashí niisháa chichamjai chichainianak wáinĸianĸa “mash waurka aĸasarai” enentáimturmarčartatuak. ²⁴ Tura Yus-Chicham étserĸurminkia nékachusha tura Yus-shuarčasha núj wayańka ashí tárúmna nujai ni tunaarĸin íimias enentáimturtatui. ²⁵ Nújainĸia ni enentáin úumak ana nuna paant wáiniak tikishmatar Yusan shiir awajsattawai. Tura “nekas Yus atumjai pujawai” títiatui.

Ashí tuke shiir takastarum

²⁶ Ayu, júńisaiti, yatsuru. Átum irunkurmin shuar takastinian Yus nin susamu túratí. Kantamátniuncha, jintintiatniuncha, Yus iwiainiakman ujaktinniasha, nusháa chichamjai chichastinniasha, nusháa chichasman jintiatniuncha, ashí Yus-shuar Yusjai tsakararti tusar júna mash takasarti.

²⁷ Nusháa chichamjai chichainiakka chikichik chikichik chichasarti. Tura jímíarchik menaintiuchiksha chichasarti. Tura ni timianka jintiartiniaiti.

²⁸ Jintiartin atsaĸuińkia nusháa chichamjai iruntramunam chichaschatniuiti. Antsu nińki Yusjai chichasti. ²⁹ Núńisan jímíarchiksha menaintiuchiksha Yus-Chichaman etserĸarti. Tura chíkich shuar núj iruntrar ni etserĸamun enentáimprarti péńĸerashit tusar. ³⁰ Tura chikichik chichaakui Yus chikichan núj pujana nuna yamaram chichaman súakuińkia emka chichaa nu iniáísatí.

³¹ Núńisrum Yus-Chicham etserĸatin wakerarmena nu chikichik chikichik chichasrum ashí jeattarme. Nújajsha Yus-shuar unuimíarar ĸakarartatui. ³² Yúsan étserainia nuka tuke enentáimpar chichastin áiniawai. Enentáimtsuk náńkamsan chichasmin áiniatsui. ³³ Yuska pachimtak chichaman nakitiak shiir chichasmanak wakerawai.

Chíkich nunkanmasha ashí Yus-shuar iruntramunam túrainia áintsarum túratniuitrume atumsha. ³⁴ Yus-shuar iruntramunam nuwá chichastin surimkiamuiti. Yus akupea núnisan núwaka chichatsuk umin átin ániawai. ³⁵ Inintrustinian wakerakka ni jeen waketkin ni aishrin nuji aniasti. Ashí iruntramunam nuwá chichastin natsantaiti.

³⁶ Jusha enentáimpratarum. Yus-Chicham atumjai nanakamnachmai. Núnisan aya atumjiniñ Yus-Chicham jeartamchaiti. Chíkich nunkanmasha Yus-shuarti túrutai enentáimpratniuitrume atumsha. ³⁷ Atumjin shuar “Yus-Chichaman tuke etserniuitjai” enentáimtumatsuash. Tura chíkich shuarsha “Yusa Wakaní tuke winia akuptaiti” enentáimtumatsuash. Nu shuarka wi áatjarmena nuna enentáimprar “nekas Yúsnan tíniuiti” tiartí. ³⁸ Tu táchakuinquia niisha ántrar ániawai.

³⁹ Nu asamtai, yatsuru, Yus-Chicham etserkatin wakeruktarum. Nusháa chichamjai unuimiatsuk chichastincha surimkiarap. ⁴⁰ Túmaitiat an-tukchamin awajtsuk ashí shiir túratarum.

15

Kristu nantakmia

¹ Ataksha, yatsuru, uwempratin chichaman wi etserkamaj nuna atumin enentáimtikratsan wakerajrume. Nu chichamsha atumsha enentáimturarum tariarurme. ² Nu chichamsha átum ántar enentáimtachkurmeka uwemprairume. Wi ujakmajrum nu tuke enentáimtaikiumeka nekas uwemprairume.

³ Winia ujakkamunak ujakmajrume. Nu chichamsha ashí nankaamas úntaiti. Júiti nu chicham: Ii tunaarjin asakártasa Kristu jarutramkamiaji, Yus-Papinium tana núnisan. ⁴ Tura jakamtai iwiarsarmiaji. Nuyá menaintiú tsawant sawarmanum Yus Nin iniantkimiayi, Yus-Papinium tana núnisan. ⁵ Nantakisha Pítrum wantintiukmiayi, nuyá ni akatramurjin wantintiukmiayi. ⁶ Nuyanka kiniantusa (500) nankaamas Yus-shuaran wantintiukmiayi. Nú shuarnumiasha ishichik jákaru ániawai tura untsurí tuke pujuiniawai. ⁷ Nuyasha Sántiakun tura nuyá ashí ni akatramurjin wantintiukmiayi.

⁸ Ashí amúamunmasha winiasha wantintiurkamiayi, wi yajauch wekaa ajñ. ⁹ Wisha Yus-shuaran ti yajauch awajsa asan chíkich Yus-akatramujai imianchaitjai. Nekas winia penkerujai ni akatramurjintjai tíchamniatjai. ¹⁰ Anatsu Yus ti shiir anentak winia enentáiruj pujurtus penker najataiti. Nu asamtai winia kakarmarjai takaschaitjai, antsu Yus, anenkartin asa, winia enentáiruj takaakui ashí ni akatramurjin nankaamas takasuitjai. ¹¹ Tura wi takaakuisha tura ni takainiakuisha mai penkerkete. Nu chichamka mash étsereaji tura nu chichamsha átum enentáimtusarme.

Jákaru nantakiartatui

¹² Iisha “Kristu jakamunmayá nantakniuiti” tu étsereaji. ¿Itiur nuikia shuar jakamunmayá nantakchatniuiti tuinia? ¹³ Jakamunmayá nantakchatniuitkiuinquia nuikia Krístusha nantakchaiti. ¹⁴ Tura Kristu nantakchaitkiuinquia ii uajnia nu penké ántraiti, atumsha Kristu enentáimtarmenta nusha ántraiti. ¹⁵ Núnisaitkiuinquia iisha “Yus Krístun iniantkimiayi” tákur waitruamji. Iis, nekas jakamunmayá nantakchamniatkiuinquia nuikia nekas Yus Krístun iniantkichiuiti. ¹⁶ Jaka nantakchatniuitkiuinquia imia Krístusha iniantkichi-maiti. ¹⁷ Tura Kristu iniantkichi-maitkiuinquia átum Kristu enentáimtamusha

penké ánrtrai. Tunaarmisha asakárchamu ániawai. ¹⁸ Núnisaitkiuñkia Yushuar jákaru ainia nu tuke menkaru ániawai. ¹⁹ Iikia Kristu enentámtusar tuke Niiñjái shiir pujustin nákJai. Tura aya jú nunkanam pujustiniaitkiurkia Kristu ántar enentámtakrin ashí nankaamas waitnentrampratniuitji.

²⁰ Antsu imiankas Kristu jakamunmayá nantakniuiti. Ashí ukunam jakamaya tuke jákashtinian nantakiartatna nuna Nii émtukuiti. ²¹⁻²² Yaunchu Atañ tunáa túramtai ashí shuar jákatin ániawai. Núnisan yamaikia Kristujain tuke atakka jákashtinian nantakiartiniaiti. Iis, chikichik áishmanjain jákatin nankamnamiayi. Nuka Atañkauyayi. Núnisan chikichik áishmanjai nantaktin nankamnamiayi. Nuka Kristuiti. ²³ Yus wakerana nuñ Yusna nu mash nantakiartatui: Kristu emka-juukma áintsan émtukim nantakniuiti tura atak jú nunkanam tara ashí ni shuarin júuktinia áintsan iniantkittiawai. ²⁴ Nuñkia mash amukattawai. Nuñ Kristu ashí kapitánniasha, ashí akupniuncha, ashí núnisan jú nunkanam írruna nunasha nupetak emesrattawai. Kristusha ashí mash ni Aparín susattawai. Tura Yus Apa ashí akupin átatui nuikia. ²⁵ Iis, júñisan átatui. Emka Yus Apa ashí ni nemasrin nupetak Krístun susattawai akupin atí tusa. ²⁶ Tura ni nemasrin nupetak ashí amúamunam jákatniuncha nupetkattawai. ²⁷ Yus Apa ashí Krístun súsaiti ashí akupin atí tusa. Yus-Papinium tu áarmaiti. Tura “ashí Krístun súsaiti” táyat Yus Apancha susamuiti tátsui. Antsu Yus Apa ashí Nin susa asa Niñki súsachmaiti. ²⁸ Tura Yus Apa ashí mash ni Uchirín Krístun nekas susamtai Kristu nuikia ashí akupin ajas atak ni Aparín mash awantuki núnisan surumaktatui. Nuñkia Yuska tuke ashí nankaamantu átatui.

²⁹ Ayu. Tura shuar jakan enentámtusar imiantinniasha ¿urukamtia nuna túruinia? Jákaru nantakchatniuncha ¿urukamtai imianainia?

³⁰ Iikia ¿urukamtai tuke jáññkiaruitiaji? Nantakchatniuitkiuñkia ánta wáitsaintji. ³¹ Atsá, penké áintsachuiti. Nu asamtai átum ii Uuntrj Jesukristu enentámtakrumin wi shiir enentámtajrume. Tura wisha tuke tsawantin ti iturchat pujakun jákatniua áintsan pujajai. ³² Jakamunmayá nantakchatniuitkiuñkia wi ántanak kajen shuarjai Ipsiunam máaniakuitjai. Maa, uunt yawáa áinis kajen ármai. Wats, núnisaitkiuñkia antsu “yurumar nampektai, kashin jákashtatik” titiai nuikia.

³³ Ananawairap. “Pénkeraitatam yajauch shuarjai tsaniñkia wekameka yajauch máatrattame” tiniu ániawai. ³⁴ Tunáa ikuakrum péñker wekasatin shiir enentámparaturum. Iis, shuar Yúsan nékainiachtu tuke awai. Atumin natsa¿ruk tusan tájarne.

Iniantkimiú ayash átatna nu

³⁵ Shuarsha inintruschaimpiash ¿jákarusha itiurak nantakiarat. Nantakiarsha warí ayashniak takusarat? ³⁶ Enentámtsuk inintrawai. Jínkiaí araamsha jaka áintsan amúatsuk. Túrayat tsapaatsuk. ³⁷ Tsapaitniurjsha araatsme antsu trikiu jínkiaichisha chíkich áraka jínkiaichirjsha araame. ³⁸ Nuyá tsapaakuisha Yus wakerana núnisan ní tsapaitniurjsha súawai. Tura ankant ankant tsapaitniurjñkia súsaiti. ³⁹ Núnisan ashí ayash métekcha ániawai. Áentsnaka niishaaiti. Kuntinniasha niishaaiti. Nanamtniasha namaknasha niisháa ániawai. ⁴⁰ Nayaimpiniam yaa írunei tura jú nunkanam írruna nuñ nusháa ímtin ániawai. Nayaimpinmayasha nuñkayasha shírmari nushaiti. ⁴¹ Etsá wincharisha nantunusha yáanusha mash nushaaiti. Nuamtak yaaksha chikicha wincharjñkia chikichnájainkia

nushaaiti. ⁴² Núniskete jaka nantaktincha. Káurtinnium iwiarsam jákashtinnium nantaawai. ⁴³ Antra nu iwiarnawai, shiira nu nantaawai. Kakarmachua nu iwiarnawai, kakarma nu nantaawai. ⁴⁴ Juyá ayash iwiarnawai, nayaimpinmaya ayash nantaawai. Juyá ayash átsuk. Núnisan nayaimpinmaya ayashsha awai.

⁴⁵ Yus-Papinium nuní áarmaiti:

“Emka áishman ni naari Atan, aents ajas iwiaaku ajasmiayi.” Tu áarmaiti. Ukunmanka, yamaram Atanka áintsan, Kristu, wakan asa, ashí áentsun nekas iwiaaku átinian susamniaiti. ⁴⁶ Nayaimpinmaya ayashkia émkachuiti antsu juyá ayash émkaiti tura nuyá nayaimpinmaya nu. ⁴⁷ Emka áishman nunkejai najanamu asa nunkejaiti. Ukunmaya áishmansha ii Uuntri Kristu asa nayaimpinmayaiti. ⁴⁸ Atanka áintsan ainia nusha juyá ayashtin áiniawai. Kristu áintsan ainia nusha nayaimpinmaya ayashtin áiniawai. ⁴⁹ Yamái juyá áiniakur ukunam nayaimpinmaya ayashtin ajastajii.

⁵⁰ Juna tájarme, yatsuru. Ayash númpentin asa nayaimpiniam, Yus akupeana nuí, wayachminiaiti. Iis, káutainkia káurchatniunam wayachminiaiti. ⁵¹ Yaunchu uukma nu yamá nekaatarum. Ashí jákashtatji, túmaitiatar ashí yapajniáttaji. ⁵² Tura pular¹ muítsarnin ti wárik yapajniáttaji. Tura ashí amuukai tusa umpuurtatui. Nú umpúamunmasha Yus-shuar jákaru ainia nu atak jákashtinian nantakiartatui. Iisha nuin yapajniáttaji. ⁵³⁻⁵⁴ Jú kautainkia yamá jákatniuitat káurchamnia ajastiniaiti. Túrasa jákachmin átatui. Nu túrunamtaisha Yus-Papinium aarma uminkiatawai:

“Jákatniun Yus nupetak amukuiti. ⁵⁵ ¿Itiur jákatjik yamaikia. Jákatniusha itiur nupettamkan mantamataj?” Tu áarmaiti.

⁵⁶ Yaunchu Yus akupkamu tiniu asamtai shuar tunáa tura jákatniuiti. ⁵⁷ Yamái antsu ii Uuntri Jesukristu túramujai jákatniunka Yus nupetkaiti. Tura incha nujai uwempratniun amaakui shiir yúminjiaji.

⁵⁸ Nu asamtai, aneamu yatsuru, kakaram ajasrum yawetsuk nankaamas Yusa takatji takastarum. Ii Uuntri Kristujai tsaninikia takaarum nuka penké ánrachuiti. Nu paant nékarme.

16

Yusa kuitri irurtin

¹ Yusa kuitri irurtinkia, Yus-shuaran Karasea nunkanam tímiaj núnisnak atumniasha tájarme. ² Ashí tumintin, Yus súrarna áintsam akankam ikiusta. Nújainkia wi jeattaj nuí yaunchu akankamu mash irurmin átatui. ³ Nuí jeanča átum anaiyarmena nu shuaran papijiai Jerusarénum akupkattajai. Tura atumí kúitrumin aisha ii yachin súsartatui. ⁴ Wisha wéminiaitkiuinikia wijjai wéartatui.

Papru irastatna nuí

⁵ Wi Masetúnia nunkanam wétiniaitjai tura nuyá Kurintiunam jeattajai. ⁶ Nuísha untsurí tsawant pujuschatjash. Ishichik nantusha wéchamnianum pujuschatjash. Tura wi atak wéakui atumsha yáintkiarum shiir akuptukchat-rash. ⁷ Aya wárik nankaamaktinian nakitiajai. Antsu Yus wakerakuinikia untsurí tsawant atumjai pujustaj tajai. ⁸ Tura juin Ipisiunam pintikustís nampernum pujustajjai. ⁹ Juinikia Yusa takatji tí shiir takastin awai. Tura untsurí shuar wi takaamun nakitiainiawai.

¹⁰ Timiutéu nuĵi jeamtajnkia, shiir awajsatarum; sapijmiakain. Niisha wijiĵi métek Yusa takatrĵn takaawiti. ¹¹ Nu asamtai nakitraitrap. Antsu yainkrum winí shiir akupkatarum. Chikich yachĵĵiĵi tatí tusan nákaĵai.

¹² Apurusnasha chikich yachĵĵiĵi winí írmasartí tusan ti seamĵai tura penkesha nakiarmai. Kame nii anĵkant aku nuĵi winishtimpiash.

Áujmamsamu

¹³ Aneara tariarum Yus nekas enentáimtustarum. Áishmañchakaitrum, kakaram ajastarum. ¹⁴ Anenĵkartamujĵi mash túratarum.

¹⁵ Ayu, yatsuru. Estepanasa shuarĵi ashí emka Akaya nunĵanam Yus-shuar ajasarmán nékarme. Niisha Yus-shuaran yáinĵajtsar tuke takainiawai.

¹⁶ Niisha tura ashí niĵĵiĵi métek yainĵiar takainia nú shuar seatmana nu tuke túratarum. ¹⁷ Estepanassha Jurtunátusha Akaikiusha atumĵĵya táarmatai shiir waraĵai. Átum yajá pujakrum tujintiarmena nuna túrawarmai. ¹⁸ Niisha winia shiir enentáimtikruraraí. Núnisañ shiir enentáimtikramprattarme. Nuní aents tuke shiir enentáimtustiniaiti.

¹⁹ Asia nunĵanmaya Yus-shuar amikmáatmainiawai. Akirasha ni nuwe Prisirajaisha ashí Yus-shuar ni jeen Yus-Chichaman irunturarusha Jesusa náariĵin amikmáatmainiawai. ²⁰ Ashí ii yachisha amikmáatmainiawai. Nuámtaksha shiir awajnaísrum amikmáaniatarum.

²¹ Wi Papru asan júchiniak winia uweĵruĵiĵi áaran amikmaajrume.

²² Ii Uuntriĵi Jesukrístun aneachuka yajauchiniam yuminĵkramu atí. “Ii Úuntriĵi, wari tatá.”

²³ Ii Uuntriĵi Jesukrístu yainmakarti. ²⁴ Jesukrístunu asakrumin atumin ashí ti aneajrume. Nu atí.

Papru KURINTIUNMAYA SHUARAN Ataksha papin aar akuptukma

Kurintiunmaya Yus-shuaran Papru áatramiania nu

¹ Wi Pápruitjai Jesukrístu akatramu. Yus nuna wakerakui ni akatramurj anaikiamuitjai. Ii yachj Timiutéujaj Yus-shuar Kurintiu péprunama íruntrumna nuna áatjarne. Kame ashí Akaya nunkanam Yusna ajasurmena nunasha áatjarne. ² Apa Yussha, ii Uuntrj Jesukristusha shiir enentáimturma ásar imiatkinchanum tuke shiir pujustinian yáinmakarat tusan wakerajrume.

Papru wáitsamurj

³ Ii Uuntrj Jesukrístu Aparj, ii Yusrj ana nuna naarj uunt awajsatai. Niisha ii Aparínti. In waitnentrámaji. Tura Niisha ii Yúsrínti. Tuma asa in tuke atsantamji. ⁴ Ii wáitajnia nuj Yuska in atsantamji. Tura in atsantamjinya nútiksarik iisha chikich shuar wáitainia nuna atsankrarat tusa túrutmaji. ⁵ Warj, Kristu wáitsamurj núkap pachiinkiaitjinya núnisrik ni atsankramurjñ núkap pachiinkiaitji. ⁶ Tuma asamtai, wáitajnia nu, Yusa uwentikrampratniurj tura ni atsankratniurj átumsha takustarum tusar wáitajji. Tura Yus in atsantampramjinya nu, Yusa uwentikrampratniurj tura ni atsankratniurj átum takustarum tusar atsankramuitji. Wats, átum uwentikramu tura atsankramu asarum, ii wáitsajnia nútiksarmek wáitaiyatrum shiir enentáimsarum katsuntramniaitrum. ⁷ Tura “túrattawai” tu enentáimtajrume. Warj, átum iijjai métek wáitsaitrum. Núnisaj iijjai métek Yus atsantamturmek.

⁸ Yatsurtiram, iikia Asia nunkanam ti itiurchat wáinkiamjinya nu nekaatarum tusar wakeraji. Imiá itiurchat wáinkiar iikia katsuntratin jeachmaji. ⁹ Nu itiurchatnumiá “iwiaku jíinkishtatji” tu enentáimsamji. Túrasha “iikia tujinchaitji” tu enentáimtumatsuk, antsu jakamunmayan iniannua nú Yusan enentáimtusarat tusa nu túrunamji. ¹⁰⁻¹¹ Jakamnia itiurchatnumiá Yuska uwentikrampramji. Tura yamaisha uwentikrampratajsa pujurtamji. Tura átumsha in Yus áujtakrumniñkia “Yuska tuke uwentikrampratjaji” taji. Tura untsurj shuar Yus aujsa asakrumin, ii uwempra asakrin untsurj shuar Yusan yuminsartatui.

Kurintiunam wau wéchatniun Papru ujakmiania nu

¹² Yatsurtiram, ju nekaatarum tusar wakeraji. Ju nunkanam pujusar tura nekaska atumjai pujusar anañtsuk tura Yus umirkar wekaimji. Aya ii nekairijjiañ wekaichamji. Antsu Yus in waitnentrama asa péñker wekasatniun yainmakmaji. Nu nekaar shiir enentáimji. ¹³ Áatjarmena nu páantaiti. Átum áusarum nekaatin jearmena nunak aarjai. Chikichan nekaachminian aatsjai. Péñker nekaatarum tusan wakerajrume. ¹⁴ Ishichik nékayatrumek nú núkap tuke nekaki wetarum tusan wakerajrume. Nuñkia Jesukrístu tátinia nú tsawantaj átum winia shiir enentáimtusattarme. Tura átum péñker wekasa asakrumin shiir enentáimtustatjarne. ¹⁵ Tura ii shiir enentáimtuniaj nuna nékakun ataksha Yusá waitnenkartutairj nekapsak tusan ataksha atumjñ irastinian wakerimjai. ¹⁶ Masetúnia nunkanmaani wéakun írkuta nanñkaikitjarum tusan enentáimmiajai. Tura wáketkuncha

ataksha ístajrum tusan wakerimjai. Túramtai wi Jutía nunċanam weakui átuċm yáintkiatarum tusan atumin ístinian wakerimjai. ¹⁷ Nuiċkia ċurukam-tai túrachmaj? ċPénker enentáimtsukek “wetajai” tímiaj? ċWi Ýus-shuarcha nunisaċ, ċjimiaraċ chichamtiniaiti, tú enentáimtsarumek? ¹⁸ Núchaiti. Yus tana nuna nímiatrusaċ umíana nútiksarik iikia ii chichame umiktai tusar wakeraji. Jú chichamaik, “Ee, atsa” tátsuji. ¹⁹ Wisha Serpanujai Tími-utéujai Yusa Úchiriċ Jesukristunun ujakmajrume. Niisha jú chichamaik, “Ee, atsa” tíchaiti. Antsu níi tana nuna tuke umíawai. ²⁰ Niiċjiaisha Yus tana nu nímiatrusaċ uminiui. Tuma asamtai Jesukrístu enentáimtakur “níi tana nuna nekas túrattawai” tu enentáimji. Tu enentáimsar Yusa naariċ shiir awajeaji. ²¹ Atumniasha incha ikiakátmajnia nu Yúsaiti. Krístunu ajasu asakrin túrutmajji. Tura anaítiamak Niiniu awajtamji. ²² Tura ukunam ii achiktatjinia nuna, nekas amastajai tusa Yus ni Wakanċin ii enentáin apujturmajji. Nujai Níniuitji tusar paant nékaji.

²³ Atumċin itiuřchatan wáinkiaċj tusan nakitiakun atumí péprurċin Kurintiunam jeachmajai. Wáitrukiċkia “Yus iirsati” tajai. ²⁴ “Aya wi tájana nútiksarmek Yus enentáimtusarum” waantu enentáimtusar nu titin nakiti-aji. Yus nekas enentáimtusamaċj kakaarme. Antsu nekas warastarum tusar wakeraji.

2

¹ Tuma asamtai, atak kúntuts awajsaċjrum tusan nakitiakun, “atumí tunaariċ íwiartsurminiċ jeashtatjai” tímiajai. ² Wi atumin kúntuts awajkuncha, ċyaki winia waramtikrusat? Aya atumek, wi nuik kúntuts awajsamjarmena nuke waramtikrusminiaitrum. ³ Wi jeakun atumí tunaariċ íwiartsurminiċ kúntuts enentáimsaċj tusan nakitiakun, nu papin áarmaj nútiksanaċ áarmajai. Warí, atumketrum winia waramtikrustin. ⁴ Nekaatarum. Nu papin áarmajai. Kúntuts awajsatjarum tusan áarchamjai; antsu ti aneajrumna nu nekaatarum tusan wakerakun áatramajrume.

Yajauċhin túrana nu tsanċuratin

⁵ Túřasha kúntuts awajtusmia nu, aya wíniak kúntuts awajtusċamai. Antsu atumniasha ishichik kúntuts awajtamsayi. Patasa chichasaċj tusan “ishichik” tajai. ⁶ Kame nu áishmaċkan iruntra chicharkarum wáitkiasmarum nuke máakete. ⁷ Antsu yamaikia tsanċuratniuitrum. Shiir enentáimtikratniuitrum. Niisha imiá kúntuts pujus nú arant ajasaċin tusarum túratniuitrum. ⁸ Túřakrum níi nekas anearmena nu paant iniaktustarum tusan seajrume. ⁹ Kame “aajna nuna umirtukartimpiash” tímiajai. Kame nuna nekaataj tusan wakerakun nu papin nuik áatramjarme. ¹⁰ Átuċm tsanċkurearmena nu shuaran wisha núnisnaċ tsanċkureajai. Tura tsanċuratin ákuċkia, wi tsanċurajna nu ashí atumnian enentáimtusanaċ, Krístu íimmianum túrajai. ¹¹ Kame uunt iwianċ Satanás in emestampratajsa wakerana nusha nékaji. Tuma asamtai, túrawaċin tusar tsanċuratniuitji.

Trúas péprunam Papru juákċhamiania nu

¹² Krístunu shiir chichaman Trúas péprunam etserkatajtsan jean, ti péċker takastinian wáinkiamjai. ¹³ Túřasha ii yachiċ Titiun wáinkiaċhu asan, shiir enentáimsatniun tujinkiamjai. Tura asamtai Trúasnumiá aentsun áujsan ikúkiaran Masetúnia nunċanam wémiajai.

Krístujai nupetkamniaitji

¹⁴ Kristu Jesusjaj Yuska incha nupetmamtikramak ewekatmasuitji. Tuma asamtai Nincha ti shiir yúminsa pujajai. Tura kukuji kunjúakui, ashí nékainia núnisan ii etserkamujaj Kristu shiir chichamen Yuska ashí aentsun nekamtikiainiawai. ¹⁵ Kristu in pujurtamu asamtai Yusjaj nekapsamka iikia kunjúaji. Ii kunjúajnia nuna uwentikramu ainia nusha tura uwentikrachma ainia nusha nekapramnia ainiawai. ¹⁶ Menkakatniunam weena nuka ii kunjúajnia nuna jakamnia mejea nekapramji. Tura iwiaaku átinnium weena nuka iwiaaku átin kunjúa nekapramji. Maa, nu túratniuncha ¿yaki jeá?

¹⁷ Kame untsurj aents kuítian achiktaj tusar Yusa chichamen yapajinia núniskechuitji. Antsu Krístunu ajasu asar, Yus akupkamu asar, Yus íimmianum anantsuk esetsar étseraeji.

3

Yamaram chícham najanamu

¹ ¿Nu tákurninkia, “ataksha niniki waantu enentáimtumainiawai,” tu enentáimsarmek? ¿Chíkich túruinia núnisrik, “Ju áishman nekas Yus-Chichaman etserin áiniawai” tusa papí aarma atumin iniaktustinkiaitaj? ¿Chíkich iniaktustin nú papí atumin seatniukaitaj? ² Atsá. Átumka ii papirja núniskechukaitrum. Ii enentáin nu papí áarmaiti. Tura nú papí áusatniua núnisan ashí aents atumi túramurj wáinkiar ii etserkamaj nu, Papru nekas Yusa takatrjn takaawai tusa nekaamnia áiniawai. ³ Iis, tátsujak. Papí aarma núnisketrume. Nu papí Kristu áarmaiti tura iisha nú papí atumin súaji. Tíntiajainchu antsu iwiaaku Yusa Wakanjijaj áarmaiti. Kayanmasha áarchamuiti; antsu shuara enentáin, auka, áarmaiti.

⁴ Kame Krístunu asar, Yus enentáimta asar, nusha túminiaitji, taji. ⁵ Ju nékaji; imia iik penké tujinkiaitji. Antsu ii túrajnia nu Yus ni kakarmarjn súramkurin túraji.

⁶ Yamaram chichaman Yus najanamia nuna, incha penker etserkatniun suramsaitji. Yaunchu aarma chichamnum, ashí takamtsuk umirkachrikiya tuke jakamniuyaji. Antsu yamaram chichamnum, Yuska ni Wakanjijaj yamaram wekasatniun súramji. Yusa kakarmarjijaj nu chicham étserji.

⁷ Yaunchu chichamnaka kayanam aar Yus Muisaisan susamiayi. Susamia nuj, Muisaisa yapi ti wincha ajasmiayi. Túrunamtaí Israer-shuar ni yapin íistinian tujinkiarimiayi. (Túrasha nu wincha mushatmaki wémiayi.) Túrasha nu chichaman shuar umirkatniun tujintiaku, nu chichamsha aya tuke jákatniunam shuáran ejemiayi. Túmayatan winchajaj susamuyayi. ⁸ Tura yamaram chichaman Yusa Wakanjijaj súramna nu, nujaj nankaamas shíiraiti.

⁹ Kame mesertinnium ejeana nú chicham winchajaj susamuyayi. Tura nujaj nankaamas Yúsnum ejeana nú chichamka Yus íimmianum penkeraiti.

¹⁰ Iista; yamaram ana nu imiá shiir asa, yaunchu wincha amia núnaka mushatmamtikui. ¹¹ Núkap arur pujuschamnia nu wincha áchamkia. Kame tuke átinia nuke nujaj nankaamas shíiraiti.

¹² Nu nékakur ti paant étserji. ¹³ Muisais túramia nútiksarik túratsji. Ii uuntrj Israer-shuar ni yapin wincha ajas menkaan wáinkiarain tusa tarachjaj ni yapin Muisaiska nukumakmiayi. ¹⁴ Tura nu arantcha Muisaisan anturkarmia nuna enentáisha nukukmauyayi. Nekaatniun tujinkiarimiayi. Tura yamaisha núnisan yaunchu aarma chichaman áusam antukar nekaatniun tujintiainiawai. Kristu enentáimtuschatin ni enentáin nukukma nu

yapajjáchmaiti. Aya Krístujaj nuka yapajjámniaiti. ¹⁵ Yamaisha Muisaisa áarmarín áujsar nékainiatsui, ni enentáimmiari nukurkamu asa. ¹⁶ Tura aencha ni enentáj yapajjá Uuntna ajasmataikia ni enentáimmiariya nukurkamu ana nu jusamuiti. ¹⁷ “Uunt” tájiniá nu, Yusa Wakaníiti. Uunt Yusa Wakaní pujana nuj ankant ajastiniaiti. ¹⁸ Nuke asamtai, iisha ii yapí tarachjaj nukukchamu asar íspikia núnisketji. Uunt Krístu péñkeri iniakmaji. Krístu péñkeri nú núkap takaki wéakur, Krístujaj métek ajastasa pujaji. Yusa Wakaníkia nuna túrawai.

4

¹ Yus in waitnentrama asa ni chichamen etserkatniun ataktamsaitji. Tuma asamtai yawetsuk takaaji. ² Uuka túratin ana nuyá tura natsanmaj ana nuyasha kanakmiaji. Anankatai tusar wekaatsuji. Tura Yus-Chichamjaj nakuratsji. Étserkur aya Yus-Chicham tana núchik étserji. Ashí aents nuna antukar, “nekas núiti Yus-Chicham” tiarat tusar túraji. Wi tájana nuna Yus nékawai. ³ Uwempratin Chicham ii étserjinia nu páantaiti. Áyatik menkakatniunam weena nu “páantchaiti” tuñiawai. ⁴ Uunt iwianch, ju nunká uuntrí ana nu, nu aentsu enentáin ukusturuiti. Uunt Krístunu shiir chichaman ii étsermajaj tsáapnin enentáimpraraín tusa ukustawai. Nu Krístu Yúsán ímiatrusan nakumui. ⁵ Iisha étserkur, Jesukrístu ii Úuntrínti tu étseraji. Iikia atumí únuntríntji tátsuji. Antsu, Jesus ii uuntrí asamtai, atumj yáinríntji, taji. ⁶ Yaunchu kiritin aan Yus tsáapin ati tusa tsáapnin awajsachmakia. Nú Yúsaiti ii enentáin tsaapnin awajtamsamia nu. Nu tsaapnijaj ni shiirmarín, Jesukrístu iniakmia nuna, ashí aents nekaawarat tusar Jesukristunun étseraji.

Yusak enentáimtusar wekasatin

⁷ Nu tsáapin imía péñker ana nuna ii ayashíin Yus ikiusuiti. Tura ii ayashí kakarmachu, nuwe najanamua áanin asamtai, warí, kakaram ájiniá nu Yúsnumiachukai. Ii aj nuna nekaawarat tusa Yuska ni tsáapnintrin ii ayashíin ikiusuiti. ⁸ Tuma asamtai ii itirchatrí árentmaku áriníñ tuke jiinkimniaitji. “Itiurkatjik” taji, túrasha Yus yáinmaji. ⁹ Aents pataaturmainiakrincha Yus ikiurmatsji. Emesrataj tukamá tujintiainiawai. ¹⁰ Kame Krístun máataj tusa tuke wakermia núnisan incha tuke mantamataj turamainiaji. Túrasha jákachu asar Krístu kakarmarí ii ayashíin iniakmaji. ¹¹ Iisha Jesusna ajasu asar wekaajnia nuj tuke tsawant tsúumainium jasattuk ajaji. Túrar ii ayashí jakamniaitiat nu ayashnium Jesusa iwiaakmarí paant iniakmaji. ¹² Iisha Yus-Chicham étserkur ii ayashíin jasattuk ajaji, tuma ajñ atumsha umikiu asarum nekas iwiaaku atin wáinkiarne.

¹³ Yus-Papinium yaunchu áarmanum: “Yúsán enentáimtusmajai, tuma asan etserkamjai” tátsuk. Iisha núnisrik Yus enentáimtusar wekaaji. Tuma asar étserji. ¹⁴ Yus kakarmaiti. Uunt Jesusan jakamunmayan iniantkimiayi. Incha núnisan Jesusaj iniantamkittiaji. Tura atumjaj métek ni pujamunam juramkittiaji. Nusha paant nékaji. ¹⁵ Atumsha untsurí aencha Yus-Chicham antukakrumin, Yus yáinmakurme. Tuma asamtai atumsha nútiksarmek Yus yuminsarum pujarme. Nujaj Yusa naarí uunt awajsamuiti. Nu nekaar wáitsatin ashamatsji. ¹⁶ Tura yaweatsji. Ii ayashí amuiki wéakuisha ii enentáinikia yamaram ajaki wéawai. ¹⁷ Warí, ukunam tuke shiir pujustajinia

nu enentáimtakrikia, ju nunċanam wáitajnia nu, ti itiurchataitai, aya yamaiya asa tiikia itiurchatchaiti, tura wárik nanċaamawai. Túrasha ii itiurchatrjijai Yuska ti shiir ana nuna amuukachmin ana nuna núkap suramsattaji. ¹⁸ Tuma asamtai wáinjinia nu ti enentáimtsaji. Antsu wáintsujnia nu nekas enentáimtaji. Wáinjinia nusha aya yamaiyaiti. Antsu wáintsujnia nuka tuke amuukachminiaiti.

5

¹ Wats ju nékaji. Nayaimpiniam ii shiir pujustinian amuukachmin ayashin Yus najanamun ikiurtamsaitji. Aents najanachmaiti nu. Tuma asamtai ii ayashí emesnakuisa warí itiurtamajia. Nuka aaka núnisañ amuukamniaiti. ² Ju ayashnium pujusar wáitajji, taji. Yamaram ayash nayaimpiniam pujana nu achiktai tusar wakeraji. ³ Ayashtichu ajasajj tusar, yamaram ayashtin ajastaisar wakeraji. Pushía núnik yamaram ayash in nukurmaktai tusar wakeraji. ⁴ Tura juí ayashjai pujusar wáitsar pujakur shiir enentáimtsuji. Arut pushí áiktinia núnisrik ju ayash ikiuktiaitsar tátsuji. Antsu yamaram pushí entsartinia núnisrik yamaram ayashnium tuke pujusmí tusar taji. Iista, ju ayash amuukachminkiait. Yamaram ayashnium pujusar tuke iwiaaku pujustaji. ⁵ Yamaram ayashintin ajastinian iwiarturmaruitjinia nu Yúsaiti. Tura nekas túrattajai tusa ni Wakanin suramsaitji.

⁶⁻⁷ Ju nékaji. Ju ayashnium pujajnia juñkia Uunt Jesusjai pujatsji. Tuma asamtai, wáinjinia nu ti enentáimtsuk Yus enentáimtsusar tuke shiir enentáimsar wekaajji. ⁸ Tura ju ayashniumia⁹ jñinkir Uunt Jesusjai tuke pujustaisar wakeraji. Tura túrattaji tu nékaji. ⁹ Tuma asamtai ju ayashnium pujakrishu tura ju ayash ikiukrishu Uunt Jesus tuke waramtiktsataj taji. ¹⁰ Warí, ju ayashjai ii túramajnia nu ujakam, “pénkeraiti”, “yajauchiiti” Kristu turutit tusar, ashí iisha Uunt Kristuj jeatnuiitji. Tura ii túramujai métek akirmaktaji.

Krístun waramtiksatatj taji

¹¹ Tuma asamtai ju nékaji: Uunt umirkashtin ti tsúumainti. Nu nekaar ashí shuar Yus-shuaran awajsatatj tusar ti takaajji. Tura incha Yus nékarmaji. Tura ii túramurj átumka atumí enentáin paant nékarme, tajai. ¹² Ataksha, “wi pénkeraitjai” tusar nu tátsuji. Antsu, ii túramu nekáa asakrumin enentáiniam ana nuna enentáimtsuk aya páatkeu nujaí warainia nú shuar tsanumprut-mainiakui yaintkiatarum tusar taji. ¹³ “Wáurkaiti” turamainiajash. Nusha warí, itiuurtamajia. Ashí túrajnia nu, Yus aneakur tura atumin yáintai tusar túrajji. ¹⁴ Kame ashí ii túrajnia nu Kristu anenkrattairjijai túrajji. Kame ju nékaji: Kristu ashí shuaran jaruku asamtai, Yus ímmianum ashí iisha jaka núnisaitji. ¹⁵ Kristu ashí shuaran jaruk nantarkimiayi. Tuma asamtai Krístunam iisha iwiaaku pujajnia juí, iik wararmamtsuk, Kristu umirkatnuiitji. ¹⁶ Tura yamaisha aya ni ayashí írsar, “nu shuar pénkeraiti” tura “nu shuar yajauchiiti,” titin tujintiaji. Kame yaunchu aya ni ayashí írsar “Kristu yajauchiiti” tu enentáimsamajji. Tura yamaikia yapajjár, esetsar enentáimkiur “Kristu Yusa Uchirinti” taji.

Krístujai yamarmaitji

¹⁷ Tuma asamtai, Krístunu ajasúka yamaram najanamuiti. Yaunchu enentáimtai^{ri} menċakayai. Antsu núnaka íkias ni enentáimtai^{ri} nekas yamarmaiti yamaikia. ¹⁸ Nunasha Yus túrait. In nawampramkattsa Krístun

akupturmakuitji. Tura nu etserkatniun incha ataktamsaitji. ¹⁹ Yuska in tunaarinniutin asutiámatniun nakitíak Krístujají nawampramkamiaji. Tura incha Yus-shuartin nu ujaktinían ataktamsaitji. ²⁰ Krístunu ataksamu asar, Yuska “winia Uchirjají nawamnaikiatarum” tusa ii wenejají atumin seatmarme. Tuma asakrin, Krístu náarijn “túratarum” tájarme. ²¹ Krístuka tunaan penké túrachmiaji. Túmanak ii tunaarijn Yus Krístun makuumiayi. Nuna tura Krístunam makuuchmin awajtamsamajji.

6

¹⁻² Ni Papirijn Yus yaunchu Isayasan juna tímiayi:

Tsawant jeamtai, ame seatmena nuna anturkamjame. Uwempratin tsawant jeamtaisha yainmajme.

Wats yamaikia Yus seatin jeayi. Yamái Yúsnum uwempratin jeayi. Tuma asamtai, iikia Yusa takatrín pachitkiajnía nu, Yusa anenkrattairí penker achiktarum tusar seajrume. ³ Tura “Papru etserkamurí ántrai” tíarajín tusar chíkich yajauch enentáimtiktsuk penker wekaaji. ⁴ Nekas Yusa takarniuríntji nuna paant nekaawarat tusar wáitíayatrik, atsumayatrik, itíurchatnum pujayatrik shiir katsunteaji. ⁵ Ju itíurchat wáinkiamji: katsumpramkarmaji; sepunam enketmáwarmiaji; charáa-charáa awajtamiarmiaji; takatcha ti itíurchat takasmiaji; kanutsuk pujumiaji; tura tsukasha ti tsukammiaji. ⁶ Tunáa nakitrar wekaaji; Yus-Chicham unuimiátraitji; shiir enentáijají katsuntrar wekaaji. Chíkich shuar penker awajeaji; Yusa Wakaní pujurtamkurin shuar nekas aneaji; ⁷ nekas chicham ana nu étsereaji; tura Yusa kakarmarísha nú paant iniakmaji. Tura ni nemasrín nupettukajín tusa suntar ni tantarín júana núnisrik iisha ii nemasrí íwianch nupettamkajj tusar ii Yusrj tuke umirkar wekaaji. ⁸ Shuar shiir enentáimturmainiakrincha, yajauch enentáimturmainiakrincha, penker chichartamainiakrincha, yajauch chichartamainiakrincha tuke Yusjají shiir wekaaji. “Wáitruiniawai” turamainiakrincha tuke nekas chichaaaji. ⁹ “Nu aents nékatsji” turamainiakrincha Yusnumka nékanji; jákatin tsúumainnium wekayatrik tuke iwiaaku pujaji; asutiámuítatrik mantamnatsji. Yusa takarniuríntiaj nu ashí nujají paant nekaamniaiti. ¹⁰ Kúntuts pujayatrik ii enentáinkia waraaji; kuítrinchaitatrik chíkich shuar kuítrintin awajeaji; penké takakchiatrík ashí wáinji.

¹¹ Yatsurtiram, Kurintiunam pujarmena nu, ashí paant ujakchamkajrum. Ti aneajrumna nu nékarme. ¹² Wikia atumin paant chichastajtsan wakerajrume; antsu átumka anenttsuk paant chichastin nakitrarme. ¹³ Winia uchirua núnisnak chichaajrume; wi tuke paant chichaarjarmena núnisrumek atumsha atumí enentáin ana nu, paant ujatkataram tusan seajrume.

Yusa jeentji

¹⁴ Yus-shuar Yus-shuarchajají tsaniñktinían enentáimsashtiniaiti. Warí, ¿Yusan umirna nú shuar, iwianchín umirna nú shuarjají métek enentáimiaiñiawak? ¿Tsáapnisha kiritjají máimtek áminkiait? ¹⁵ ¿Krístuka uunt iwianchjají nawamnaikiamniakait? ¿Yus-shuar Yus-shuarchajají tsaniñ shiir pujusminkiait? ¹⁶ ¿Iwiaaku Yusa jeencha ántar-yus pujustinkiait? Tura atumsha iwiaaku Yusa jeentrume. Yus Niñki ni Papirijn juna tíchamka: Niijají tsaniñkia pujusan, niijají wekasartatjai tura ni Yusrj átatjai; tura niisha Wíi aents ajasartatui.

¹⁷ Tuma asamtai junasha tímiayi:

Nii matsatania nuyá jíinkitiarum, tura niyya kanaktiarum, tawai Uunt Yus; tura yajauch ana nu antiñkiarap. Túrakrumninkia awayattajrume.

¹⁸ Tura atumí Aparí átatjai; átumka winia uchir átatrume. Nuna Wi imiá kakaram uunt Yus asan tajai. Tu áarmaiti.

7

¹ Tuma asamtai aneamur yatsurtiram, nusha, Yus tímia nu, in túramji. Nu tuma asamtai ii ayashí tura ii enentáisha yajauch ajasaín tusar, ashí tunáa ana nuyá kanaktiniaitji. Túrar “Yusak nekas ii úuntrínti” takur, ii ayashísha, ii enentáisha takamtsuk tuke tsawant Yus íktustiniaitji.

Kurintiumaya shuar enentáimprarmatai Papru warasmiai

² Ataksha nawamnaikiatai. Iikia shuar yajauch awajsachmaji; yajauch jintinrachmaji; anankachmaji. ³ Makuutai tusan nuna tátsujai. Antsu nuik tíchamkajrum, iwiaaku pujakrishá jakarsha átumka ii enentáin áchitkiarme.

⁴ Araantusuk áatjarne; shiir enentáimjai. Itiurchatnum pujayatnak, atumin enentáimtusan enentairuí kakaram enentáimsan waraajai.

⁵ Jui Masetúnianum penké ayamprachmaji. Antsu ti wáitsamji. Áentsnumia itiurchat wáinkiamji, tura ii enentáijiaínkia ashamkamji. ⁶ Tura kúntuts pujakrincha Yus ikiakátmartinian nékawai. Tuma asamtai Titiún akupturkamai. Nujai winia enentáirun ikiakármái. ⁷ Tura átum nii ikiakármarmuna nuna Titiu ujatkamai. Nuna antukan ti warasmajai. Títiuka átum írsatin wakerarmena nuna ujatkamai; túrunamia nuna kúntuts enentáimmiarumna nusha, tura winia anentu asarum enentáimturumna nuna ujatkamai. Nuna antukan nú nankaamas warasmajai.

⁸ Papi nuik akupkamaj nu áujsarum kúntuts enentáimprarme; núnaka nékajai. Túrasha ii akupmainchu túraitjai tátsujai. Eta, nuikkia tímiajai, túrasha yamaikia tátsujai. Papi áujsarum ishichik kúntuts enentáimprarmuna nuna nekaan waraajai. ⁹ Kame kúntuts enentáimprakrumin waraatsjai. Antsu atumí tunaarj nekaarum kúntuts enentáimprarm atumí enentá Yusjai yapajjá asakrumin nuna nekaan waraajai. Kame Yus wakerana nútiksarmek kúntutsrum katsuntearme; tuma asamtai iikia nu papijiai yajauch awajsachji. ¹⁰ Nekaatarum. Yus wakerana nútiksarj kúntuts katsunteakka ni enentá Yúsnum yapajjáwái. Nuñkia ni tunaarjya uwempraiti. Nuka “túrmainchu túraitjai” tíchamniaiti. Antsu Yusan enentáimtutsuk kúntuts pujakka ni enentá yapajjáshatui; yapajjtsuk ni tunaarjya uwemtsuk jakatawai. ¹¹ Tura iistarum; Yus wakerana nútiksarmek atumí kúntutsrj katsuntearme. Tuma asarum wi áatjarmena nu esettsarum enentáimtusurme. Atumí túramurj ujatkatajtsa wakerimiarme. Tura nu tunáa nakitramarme; tura ashamkamarme. Tura yajauchin túramia nu asutiámarme. Tura winia anentu asarum wi tímia tímiatrusrumek turatai tusarum ti wakerimiarme. Nu tura asakrumin penker túarmena nu, paant iniakmarne. ¹² Kame yajauchin túramia nuna ni tunaarjin iniaisat tusan wakerakun, tura wáitias pujumia nu atak shiir enentáimsati tusan wakerakun nu papin áatramjarme. Tura nú nankaamas átum Yúsnum in anearmena nu nekamaratum tusan áatramjarme. ¹³ Atum umikiu asarum waraakrumin iisha shiir enentáimji. Tura shiir itiaamarumna nuna Titiu waraak ujatkamtai nú nankaamas shiir waraaji. ¹⁴ Atumin shiir enentáimtajrumna nuna Titiun ujakmajai. Tura nuna nekas aan Titiu nekaamai. Tuma asamtai atumin natsantrachmajrume. Kame atumin tuke nekas ana nuna tímiajrume. Núnisan atumnian Titiun

tímiaj nusha nekasauyi. ¹⁵ Tura Títiuka atumin enentáimturmas ti waraawai. “Jiatmaktajtsa winiatsuash” tusarum ti ashamkachurmek. Túmayatrum, nii péñker tati tusarum pachischarme. Tura nii taa seatmarma nu umikiurme. Títiuka nuna enentáimias waraawai. ¹⁶ Tura wikia, átum péñker túramurmin nekaan tura péñker túrawartatui tu enentáimsan waraajai.

8

Yus-shuarti ii kuitri súsatin

¹ Yatsurtiram, Masetúnia núñkanmaya Yus-shuaran Yus waitnentainia nuna yamáí ujaktatjarne. ² Ti ititurchatnum nekapsamu ainiawai. Túmayatan warainiawai. Tura ti kuítrincha áiniayatan emeentutsuk kuítrinnia núnisan suiniawai. ³ Juna wi paant nekaan ujaajrume. Niisha wakeramujai súsatniun jeainia nuna súniawai; tura nú nañkaamassa súniawai. ⁴ Yus-shuaran kuítrinchan súsartaisa ti wakeruiniak, nu túratniun ti seatmarmaji. ⁵ Tura ii enentáimmiáj nú nañkaamas túrawarmiayi. Emka Yúsnum níñki sumamawarmiayi. Tura Yusa wakeramurj túrattaji tusar incha “yáíntajrume” turammiaji. ⁶ Tuma asamtai, “Masetúnia nuñkanam kuit júuktin nañkamamamna nu, Kurintiu peprunmasha amukta” tusar Titiu seamiaji. ⁷ Atumsha ashí péñker túratin ti nékarme. Yus enentáimtustincha, unuiniartincha, ju nuñkanmaya nekaatniusha, in aneatniusha nuka ashí nékarme. Wats, júsha túratarum. Yus-shuar kuítrincha ainia nu achikiarat tusarum Titiu támatai núkap susatarum.

⁸ Kame atumí úuntrja núnisnak akupeatsjarne, túratniuitrume tusan. Antsu chíkich shuar ni kuítrin susartasa ti wakeruiniá nuna atumin ujakan, atumí anenkraitairi nekasashi tusan nekapsatajtsa pujajai. ⁹ Ii uuntrj Jesukrístu waitnenkartutairi nékarme. Ashí takakuyayi, tura atumin anenma asa kuítrincha núnisan ajasmiaji. Ju nuñkanam kuítrincha núnis ajasmatai átum nayaimpiniam kuítriniak tusa túramiaji.

¹⁰ Juna enentáimjai. Nuik uwitin, “yáíntatji” tíchamkarum. Tura nu túratin ti wakerimiarme. ¹¹ Nañkamarmena nu yamaikia amuktarum. Nuik ti wakerimiarmena núnisrumek yamaisha súsatin jearmena nu susatarum. ¹² Iistarum. Ni kuítrin Yúsán nekas susatajtsa wakerakuñkia, nii jeana nuna susat tusa Yus wakerawai. “Jeana nú nañkaamas susati” tátsui Yus.

¹³ Chíkich ti núkap susarum atumnia táasat tusan tátsujai. ¹⁴ Antsu ashí métek takusarat tusan tajai. Iis atumsha yamaikia ti nukap takakrume; nujai atsuma nu súsatniuitrume. Ukunam chíkich tsawantaj átum atsumashtarmeash. Nuñkia niisha atumin suramsarti. Nu túratin ákuñkia ashí métek takustin átatui. ¹⁵ Yusa Papiirjin yaunchu áarman núnis tátsuk: Núkap takusmia nu ampirchamiayi; tura ishichik takusmia nu atsumachmiayi.

Titiu chíkich Yus-shuarjai Kurintiunam wetin ármiaji

¹⁶ Tura wi aneajrumna núnisan atumin aneatniun Yus Titiun susamiayi. Tuma asamtai Yúsán yumínisan pujajai. ¹⁷ Iis, wi takui wétinian wakerimiayi. Tura nú nañkaamas, atumin anenma asa, ni enentáijjain wéawai.

¹⁸ Tura chíkich Yus-shuar Titiujai akupkatajtsa pujajai. Nu shuar Yusa Chichamen ti penker etserainakuí, ashí Yus-shuar iruntramunam nin péñker áujmatainiawai. ¹⁹ Tura nú shuarnaka ii tsaniakmarj atí tusar ashí Yus-shuar iruntramunam nuna anaikiarmiayi. Iijjai kuítian jukiarti tusar

anaikiarmiayi. Iis Yusa náarín ashí aents uunt najanawarat tusar tura ashí shuar atumí tsan̄karín nekaawarat tusar nu takat túratsjik. ²⁰ Iis, jū kuit ii jukittiajnía nu, núkap asamtai, aents tsanumprutmawaraj̄j tusar, Titiujaj̄ tura jū shuarjaj̄sha wéjaji. ²¹ Yus ímmianumsha, aents ímmianumsha ii naka wekaajnía nuna nekaawarat tusar túrají.

²² Nu jimiará shuarjaj̄ chíkich Yus-shuar akupeaji. Yusa takatrín takastasa ti wakerana nu nekas nékaji. Tura átum yáintin ti wakerarmena nuna nekáa niisha atumiin jeataj tusa ti wakerawai. Nuna túmak Yusa takatrín takastinian wakerana nuna paant iniakmawai. ²³ Tura ajsha chíkich shuar Titiun nekaataitsar aninruiniakuisha, “Titiu Papru tsaniakmarinti. Incha yáinmaktajtsa Páprujaj̄ takaawai” titiarum. Chíkich Yus-shuaran nekaataitsar aninruiniakuisha, “Yus-shuar akupkamu áiniawai, tura Kristu náarín shiir awajin áiniawai” titiarum. ²⁴ Tura atumí anenkrattair̄j ashí Yus-shuar nekaawarat tusarum, nu shuar péñker itiaatarum. Nu túrakrum, atumnía ii shiir tímiaj nu nekasaiti tu iniaktustatrome.

9

Yus-shuaran kuítrinchán súsarmia nu

¹⁻² Kame átum Yus-shuar kuítrinchá súsatín wakerarme; nuna nékajai. Tuma asan núnaka áatrachminiaitjarme. Atumsha súsatín wakera asakru-min wi nunasha shiir enentáimsan, “Akaya nun̄kanmayá shuar nuik uwitínía wakerusmataj yáintínian wakeruiniawai” tusan Masetúnianmayá shuáran ujaajai. ³ Tura “kuítniasha súsatniun ti wakeruiniawai” tímiaj nuna, “wáitíaiti” tíaraj̄n tusan nakitiajai. Tuma asan, kuit susatajtsa wakerarum nu iwiaratarum tusan nu menaintiu Yus-shuaran nuna yáinmakarat tusan emka akupenajai. ⁴ Wi ukunam Masetúnianmayá shuarjaj̄ atumiin jean, kuit súsatín tímiarmena nuna iwiarachman wáinkian natsaraj̄j tusan, tura atumsha natsaraj̄rum tusan túrajai. Warí, “súsatniun ti wakeruiniawai” tuke tu wéatsjak. ⁵ Nu tuma asamtai, au takui súarme tu enentáimsaraj̄n tusan jū Yus-shuaran emka akupenajai. Niisha nu kuítian iwiaratniun yáinmakarti, tajai. Nuiñkia wisha Masetúnianmayá shuarjaj̄ ukunam jeawakrin, nu kuit atumsha nekas atumí enentáij̄jaj̄nk¹ súsatín wakerarmena nu nekaamnia átatui.

⁶ Tura junasha paant tájarme: ishichik araana nu ishichik júuktatui. Núkap araana nusha núkap júuktatui. Kuit súsatniusha núniskete. ⁷ Tura ashí shuar ni enentáin enentáimsana nunak susati. “Nakitiayatnak susatjai” tíchamniaiti. “Turutainiakui susatjai” tíchamniaiti. Shiir enentáimias súana nuna Yuska shiir enentáimtai. ⁸ Ashí péñker ana nuna suramsatniun Yus tujintiatsui. Nujaj̄ átum atumashtatrome. Tura chikichan yáintin núkap takustatrome.

⁹ Yus-Papiniun jū aarma awai:

Kuítrinchán núkap susayi;

nuna tura, tuke túratin átatui.

¹⁰ Arakmaun araakan súana nusha Yúsaiti. Tura yurumkan súana nusha Yúsaiti. Niisha átum péñker araatniun suramsattarme. Tura araarumna nujaj̄ péñker túratarum tusa araakru-min ipiampartatui. ¹¹ Tuma asamtai núkap juukma takaku asarum, núkap súsatín jeattarme. Nuiñkia súarmena nuna ii uwejeyan chíkich Yus-shuar achikiar Yúsan yumiñsartatui. ¹² Warí, jū kuit Yus-shuar kuítrinchá súakrin ni atsumamur̄ncha atsumachartatui. Tura nú nan̄kaamas Yúsán ti yumiñsartatui. ¹³ Nu shuar yáintai tusarum tura ashí

Yus-shuar yaintai tusarum súatsrumek. Nujaj̄i Kristu shiir chichamen umi-armena nuna nékainiawai. Tura kuítrum emeentutsuk sua asakrumin niisha Yusa náar̄in uunt awajsartatui. ¹⁴ Kame Yus atumin ti waitnentramainiakui kuítrum súatsrumek. Sua asakrumin nu shuar atumin ti anenmainiak Yúsán áujturmasartatui. ¹⁵ ¡Tura ashí iisha ii Yusr̄i ti yumiṅsatniuiti! ¿In súarmjinia nuna yaki jintíartinian jeá?

10

Papru nekas jintintiamniaiti

¹ Wats, “Papru iij̄aj̄i pujak péechach ajawai, tura yajá pujak kakaram chichaawai” chíkich shuar turutainiatsuk. Kame imia wiki Papru Kristu anenkartutairij̄ij̄aj̄i juna seatjarum tusan pujajai. ² Atumí weatkamuriȳa shuar chichainiak “Papru ni tsaniakmarij̄ij̄aj̄i ju nunkanam akupin ajas-tai tusar wakeruiniak jintintiainiawai” turutainia nuna kíishtumaktajtsan enentáimjai. Wisha atum̄in̄i jean kakaram chichaschataj tusan, nu antukairap tu seajrume. ³ Áentstanka nunkanmaya áentsuitji, túrasha jú áents maania aintsar máaniatsji. ⁴ Ju nunkanmaya nan̄kij̄ij̄aj̄i máaniatsji antsu ii nan̄kir̄i Yusa kakarmar̄inti. Nujaj̄i iwianchi kakarmar̄i núpeteaji. ⁵ Ju nunkanmaya aentsu jintíamuriṅkia tura waantu enentáimtumamuriṅkia, Yus nekaatniun itit awajea nuka, nu nan̄kij̄ij̄aj̄i núpeteaji. Tura ashí ju nunkanmaya enentáimsatin yapajniak, emetamu áintsan, Kristun umirkarat tusar nu nan̄kij̄ij̄aj̄i núpeteaji. ⁶ Nekas umirkatin átum jeawakrumniṅkia niun̄kia umirkatniun tuke nakitiainia nu, Yusa kakarmar̄ij̄ij̄aj̄i asutiáttaji, tajai.

⁷ Atumsha aya pátatek ana nu iiyarme. Wats, shuar nekas Kristunu ajas-man nekamaka, núnisan winiasha Kristunuiti tu enentáimtursatniuiti. ⁸ Yusa kakarmar̄ij̄ij̄aj̄i akupeaji tuke tákuncha natsaamatsjai. Nu kakarman atumin péṅker jintintiatarum tusa Kristu suramsaitji. Kame atumin emesratniun suramsachuitji. ⁹ “Ni áarmar̄ij̄ij̄aj̄i awaktamkatajtsa wakerutmaji” tátsurpash. Núchaiti. ¹⁰ “Papru áarmar̄i ti kakaram áiniawai, tura jūi pujak kakarmachuiti; tura etserkatniuncha nékatsui” turutainiawai. ¹¹ Wats, tuinia nuka junasha nekaawarti. Yajá pujakur kakaram áajinia núnisrik atumj̄aj̄i pujakrishakakaram túrattaji.

¹² “Wiki imiá péṅkeraitjai” tuinia nujaj̄i méteketji tátsuji. Ní shuaraitji tátsuji. Warí, niisha imia niṅki nekapmamainiawai. Tura ni āi íisar “nu nan̄kaamas péṅkeraitjai” tu wéenawai. Nuna túruiniak netse túruiniawai. ¹³ Antsu iikia, ii nekamatin jeajnia nú nan̄kaamas waantu ajaschattaji. Ii takastatjinia nūj Yus Niṅki jintintramji. Nu arant wéatsji. Kame atum̄in̄i takastinia Yus tsan̄katramkaitji. ¹⁴ Tuma asamtai, tájinia nu Yus tsan̄katramka nu inian̄kas túratsji. Warí, iisha emka Kristu chichamej̄aj̄i atum̄in̄i jeachmakaj̄i. “Emka jeamji” tájinia nu ántrar tátsuji. Kame Yus tsan̄katramakrin jeamji. ¹⁵ Chíkich takasmanum iikia waantu enentáimtumasar, “ii takatr̄inti” tátsuji. Antsu yamá enentáimtarmena nú nan̄kaamas Yus enentáimtustarum tusar wakeraji. Nu túrakrumniṅkia atum̄in̄i tuke takasminiaitji. ¹⁶ Nuyasha chíkich takaana nūj takatsuk átum pujarmena nú arant pujuinia nusha Yus-Chicham ujaktaj tusar wakeraji. Nu túrar chíkich shuar takasma “íiniuiti” tichattaji.

¹⁷ Tura péṅker enentáimtumastaj tusa wakerakka, Yúsnaítjai tusa péṅker enentáimtumasti. ¹⁸ Warí, niṅki “péṅkeraitjai” tumamna nuka anturkach-miniaiti. Antsu Uunt “péṅkeraiti” tana nú shuar nekas péṅkeraiti.

11

Ántar etserniun Papru áujmateawai

¹ Waurua núnisnak chichastatjana nu anturtukaintrumeash. Ee, anturtuktarum tusan seajrume. ² Atumniasha Krístunak anajmamtikrajrume. Tura nuwá chíkich áishmankan nékatsuk ni áishrijaink' nuatnaiya núnisrumek átum chikicha chichame umirtsuk aya ni chichamenk' umiakrumin Krístu ejetaj tusan wakerajrume. Nuna túrataj tusan atumin akasmatajrume. Nu akasmaktinian Yus surusuiti. ³ Túrasha íwianch ni nekatairijjai emka nuwá Epan anaŋkama nútiksáŋ atumniasha Yusa jintiyá awajimtikramar Krístu aneashtinian enentáimtikramprarmatai anaŋkamu ajrum tusan tsuutajrume. ⁴ Warí, chíkich shuar Jesusnan nusháa étserkamujai táiniakuisha péŋker ántarme. Tura nusháa wakan achikiam, nusháa chichamjai uwempramniaiti tu etserainiakuisha, nekasapitia tárume. ⁵ Kame “Yúsnumiá akatramu asar etserkatin imiá nékaitji” tuinia nujai naŋkaamas nékaitjai, tu enentáimjai. ⁶ Ti péŋker chichastinian nékachiatnak winia nekaatairsha taamtui. Núnaka ii túramurijjai tuke paant iniakmaji.

⁷ “Akirkata” tútsuk Yus-Chichaman atumin ujakmajrumna nuǐ ¿tunáa túrajak? Átum ankant ajastarum tusan wikia péejchach ajasu asan, “etserkamunam akirkata” tíchamjarme. ⁸ Antsu atumin yáintaj tusan pujakun chíkich Yus-shuarnumiá kuítian suruiniakuí achikmiajai. Nuna túran ni kuítrín emeentukmiajai. ⁹ Tura atumjai pujusan atsumaknasha atumnika seachjarme. Masetúnianmaya Yus-shuar taar, wi atsummiajna nuna surusarmiyai. Nu tuma asamtaí tájarme, seachjarme tura seastatjarme. ¹⁰ Ashí Akaya nuŋkanam nuna ujaktinian suritrukchartatui. Nuna tákun Krístu nekasrijjai tajai. ¹¹ ¿Urukamtaí nuna taja? ¿Atumin aneachu asanak taja? Atsá. Aneajrumna nuna Yus nékawai.

¹² Túrasha wi túrajna nuna tuke turu wétatjai. “Papru túrana núnisrik túrají” tuinia nuna tíarain tusan túratatai. ¹³ Warí, niisha Yúsnumiá akatrachma áiniawai. Anaŋkartin áiniawai. “Krístu akatramurintji” tumá átaj tusar wekainiawai. ¹⁴ Nusha urukaku túmait tíchammiaiti. Warí, imia Satanáskesha “nayaimpinmaya akatramuitjai” tumá átaj tusa wekaatsuk. ¹⁵ Nuŋkia imia ni suntarísha péŋkeran túrawai tumá atai tusar wekasachartinkiait; túrasha ni amuamurinkia tunáa túriarma nujai métek nekampá asutiátin átatui.

Papru wáitsamia nu

¹⁶ Ataksha tájarme “wáurkaiti” tu enentáimtursacharti. Kame “wáurkaiti” tu enentáimturiatrumek, chichastin tsankatruktarum. Ishichik waantu enentáimtumastaj tusan wakerajai. ¹⁷ Tura waantu enentáimtumastaj tájana nu, Uunta tsankatramurijjai tátsujai. Antsu waurka núnisnak chichaa-jai. ¹⁸ Untsurí ju nuŋkanam uunt ajasar ti waantu enentáimtumainiakui wisha ishichik waantu enentáimtumastatai. ¹⁹ Imiá nékayatrum waurka ainia nu shiir enentáimtusrum ánturearme. ²⁰ Niisha atumin takamtikramainiakuisha, kasartamainiakuisha, atumí nérenniurj ajainiakuisha, ya-jauch chichartamainiakuisha, yapimin awattamainiakuisha ashí nu kat-suntearme. ²¹ Natsamayatnak tájarme jikia nu túratin kakarmachuuji! Wats, niisha araanainiatsna nuna wisha araantatsjai. (Waurka núnisnak chichaa-jai.) ²² Niisha Ipríu-shuar áiniakuisha wisha núnisnak Ipríu-shuaraitjai. Israer-shuar áiniakuisha wisha núnisnak Israer-shuaraitjai. Apraáma weeatrj áiniakuisha pai, wisha núnisnak. ²³ Krístu takarniurintji, tuiniawai. Wikia

aujai nan̄kaamasaitjai. Kame nuna tákun waurka núnisnak chichaaajai. Kame niijjai nan̄kaamas takasuitjai; niijjai nan̄kaamas asutiámuitjai; niijjai nan̄kaamas sepunam en̄keamuitjai; ti núkap jániñkiamjai. ²⁴ Israer-shuar chikichkí achirkacharmai. Antsu tímiajni sen̄ku jea achirkarmai. Tura emka achirkarmia nūj awa-awatatkuwa trainta nuiwi ejeyarmiayi. Tura nu tímiajni sen̄ku jea achirkarmia nūsha nútiksaj̄ nujai métek awatturarmiayi. ²⁵ Numijjai menaintiú awatturarmai. Kayajaj̄isha mantuatai tusar chikichkí tukurarmai, kanusha menaintiú wayamai wi en̄kempran wekaimiaj̄ nūj. Tura nayaantsanam ajapén chikichik kashi nūj pujusan tsawarmajai tura nu tsawantcha tuke pujusmajai. ²⁶ Ti nukap wekasaitjai. Tura entsá wekasan tsúumainian wáinkiaitjai. Tura kasa shuarjaj̄isha, wí shuarjaj̄isha tura yajaj̄a shuarjaj̄isha tsúumainian wáinkiaitjai. Péprunmasha, kampuniunmasha, nayaantsanmasha tsúumainian wáinkiaitjai. Wait Yus-shuarsha yajaj̄a awajustaj̄ tusar wakeriarmai. ²⁷ Itiurchatnasha ti wáinkiaitjai; takatnasha ti takasuitjai. Ti untsurj̄ kánutsuk pujusuitjai. Tsukamaknasha, kitiamaknasha wáitsaitjai. Ti ijaiarmaitjai. Pushir táasmatai tsetsekruī wáitsaitjai.

²⁸ Tura nuna nan̄kaamas, kaarka kijin júkitniua núnisnak Yus-shuar péñker wekainiawash tusan ashí tsawant ti enentáimsan pujajai. ²⁹ Chikichik Yus-shuar kakarmachu pujaku wisha kakarmachu nekapeajai. Shuar chichan tunaanum ajawarmatainkia wisha natsamakun jakajan wáitajai. ³⁰ Maa, waantu chichastin ákuñkia, antsu winia kakarmachu awajtuinia nuna ujakan waantu ajasaintjai. ³¹ Yus, ii Uuntrj̄ Jesukristu Aparj̄ ana nu (ni naarj̄ tuke shiir awajsamu atí) wi wáitratsjana nuna nékawai. ³² Tamasku péprunam pujaj̄ nu nun̄kanmayá akupin winia jinkí juruktiaj̄ tusa wakerak pepru tanish téntakma wáitirj̄in suntaran apujamiayi. Aretas uunt kapitiañ pujaj̄ túramiayi. ³³ Túrasha uunt chankinnium en̄ketawar pepru aa tanishrj̄ áañkamunam j̄iki itiararmiayi. Tu uwempramajai.

12

Papru wáinkiamia nu

¹ Kame wiki shiir chicharmamsatniun nakitiajai. Túmayatnak íimiarjana nuna tura uunt Yus iniaktursamia nuna ujaktiniaitjarne. ² Kristun umirin ana nú áishmañkan nékajai. Nu áishmañ jimiarā nayaimpin nan̄kaikin menaintiú nayaimpiniam junakniuiti. Nusha katurse uwi nan̄kaamasuiti. Kame ayashtiuk wakaashit, tura ayashtichu wakaashit. Núnaka nékatsjai; aya Yúsak nékawai. ³ Tura nekas junakniua núnaka nékajai. Ayashtiuk wakaashit, ayashtichu wakaashit, núnaka aya Yúsak nékawai. ⁴ Yus-shuara wakaní shiir pujutainium junakmiayi. Nūsha paant awajsachmin ana nuna antukmiayi. Nii antukmia nú chicham paant awajsatniun suritkiamuiti. ⁵ Nu áishmañka túrunamurj̄ nan̄kaamakuiti tajai. Tura wikia nan̄kaamakuitjai túmamtsuk, kakarmachuitjiana nuna paant ujaajai. ⁶ Nan̄kaamakuitjai túmamtiaj̄ tusan wakeraknaka nekas tíminiaitjai, áñtran tíchaintjai. Túrasha túratsjai. Winia túramuruk wáinkiarum winia chichampruk antukrum, waritia enentáimsarum nujai métek enentáimtursatarum tusan wakerajai.

⁷ Wi nayaimpiniam wáinkiamajna nu timiá péñker asamtai ántar waantu enentáimtumaschatniun, jan̄ki mesertinia núnisan̄ winia ayashruj̄ najaimiatniun sunasmiajai. Nuka wi wáitsatin Satanásnumiá akupkamuiti. ⁸ Nuka

jurutkitia tusan Úuntan menaintiú seamjai. ⁹ Tuma ain Uunt winia turutmiayi “Atsá. Jaa pujayatmek winia waitnenkartutairjai shiir pujame. Shuar kakarmachun winia kakarmarun Wi suakuí ashí aents nu shuara ayashiin winia kakarmarun wáiniainiawai.” Tuma asamtai, Kristu kakarmari winia ayashruj paant ati tusan kakarmachuitatnak araantatsjai. ¹⁰ Tuma asamtai, wi Krístun aneakuí shuar katsekruiakuisha, kajertuiniakuisha, winia kuítrusha, kakarmarsha atsain waraajai. Kame ashí ititurchat ana nuí kakarmachuitatnak kakaram nekapeajai.

¹¹ Wi “pénkeraitjai” túmamkun waurua núnisnak chichaaajai. Tura atumsha winia péñker chichartusminiaiitrumek, túrachu asakrumin tu chichasjai. Warí, wi penké ántraitatnak, “ti péñker akatramuitji” tumamainia nú nunkaachichuitjai. ¹² Atumjai pujumiaj nuí, ititurchat ámanman katsuntran takasmiajai. Yuska ni kakarmarin iniakmastaj tusa ti uuntan aents tujintiamun túratniun surusmiayi. Nujai “Papru nekas winia akatramuruiti” tusa paant iniakmasmiayi. ¹³ Warí, chíkich Yus-shuaran yáingmiaj núnisnak atumniasha yáingmajrume. Áyatik atumin “kuit surusta” tíchamjarne. ¡Nu yajauchiitkiuinikia tsankurturatum!

Papru atak táinrin ujakmiania nu

¹⁴ Jújainkia menaintiú iwiarnarjai atumin íistaj tusan. Tura jeaknaka, “etserkamun akirkatarum” tíchattajrume. Atumí kuítrin wakeratsjai. Antsu atumin wakerajrume. Warí, winia uchirchakaitrum. Uchisha aparin kuítian ikiauntukchatniuiti. Antsu aparí ni uchirin kuítian ikiauntuktini-aiti. ¹⁵ Atumniasha yáingtaj tusan ashí takakjana júna ajapawaintjai, tura winia kakarmarnasha ashí emenkakaintjai. Wi ti wakeramaitiatrum átumka ishichik wakerutarminin túrawaintjai.

¹⁶ Túrasha chíkich shuar chichainiak “Nekasaiti; Papru niniki ii kuítrin jurutramkichmaji. Túrasha anañkartuatniun neka asa in anañkramachmiashia” turutainiatsuk. ¹⁷ ¿Nusha itiura? ¿Shuáran wi akupkamaj nujai kuítrumin achikjak? ¹⁸ Atumin íirmasat tusan Titiun “wetá” tímiajai. Tura nin atamprit tusan chíkich Yus-shuaran akupkamjai. ¿Titiusha kuítrumin jurutramkimkiamum? ¿Wisha niisha mai metek enentáimsar métek takaschamkaj?

¹⁹ ¿Warí enentáimsarum? ¿Átum péñker áiniawai turutik tusar nu tájik? Antsu, aneamu yatsurtiram, ii tájinia nu atumin Yúsnum ikiakártajrum tusar taji. ²⁰ Wi atumjin jeaknasha, wi wáitkiataj tusan wakeraj nuna wáinkiashtatjai, tu enentáimsan ititurchat enentáimjai. Tura atumsha wakerarmena núnisrumek wáinkiashtatrumek, tu enentáimjai. Yajauch chicharnaikiatniuncha, yajauch enentáimtunaistinniasha, kajernaikiatniuncha, niniki enentáimtumastinniasha, tsanumpratniuncha, mái-tunai ajatniuncha, waantu enentáimtumastinniasha, yajauch wekasatniuncha, ashí nuna wáinkiashtajash tusan ititurchat enentáimjai. ²¹ Tura wi jeaknasha, átum yajauch túratniunsha, tsanirmatniunsha tura yajauch ti wakerarmena nu, yaunchu túriniarmena nu, untsurí shuurtiram iniaisachurmena nuna nekashtajash. Tura enentáim yajajitsuk tuke tura asakrumin útchatjash taji. Kame wi átum umikchamun nekaamtai Yus winia iniatsátrattawai tusan tsúumajai.

13

¹ Jujai menaintiú íistajrum tusan winiajai. Ashí iwiaratin ana nu, jimiará tura menaintiú shuara chichamejai iwiarnartatui. ² Wi atumjai pujachiat-

nak, atumjaj pujáa núnisnak áatjarme. Yaunchu tunáa túrimiarmena nuna tura ashí shuártirmin wi nuik tímiajrumna nuna ataksha tájarme, wi atak tana tunaarum iwiareachkurminkia iniaiasashtatjarme. ³ Nuínkia wi Kristu kakarmarjjaj chichaaajna nu nekaattarme. Nu nekaataj tusarum wakeratsrumek. Tura Kristuka kakarmachuchuiti. Antsu atumí enentáin kakaram takaawai. ⁴ Kristu nekas kakarmachua nútiksaj krúsnum máamuítat, Yusa kakarmarjjaj iwiaakuiti. Ayashnium Kristu kakarmachu nekapmia núnisrik iikia kakarmachuitji. Túrasha Yusa kakarmarjjaj ni takatř takaaji. Nu atumin iniakmastatji.

⁵ “Nekas Yúsan umirniushitiaj” tusarum nekamatarum. Ímiastarum. Ántar Yus-shuarchaitkiurmeka Jesukřistu atumí enentáin pujurtama nu nekaattarme. ⁶ Tura iikia ántar Yus-shuarchaitji nu nekaatarum tusan wakerajai. ⁷ Tura átum tunáa túrawáirum tusar Yus seaji. Aents in péñker enentáimtikramprat tusar tátsuji. “Ántar ániawai” túrampriniñ, átum péñker wekasatarum tusar wakeraji. ⁸ Warí, Yusa nekas chichame emesratin tujintiaji. Antsu ii túrajnia nu Yusa nekas chichamejaj túraji. ⁹ Tuma asamtai, átum kakarmaitkiurminkia iikia kakarmachuitiatar shiir enentáimji. Atumsha nekas kakaram ajasúk tusar Yus tuke seaji. ¹⁰ Atumin emesratin Yuska winia akuptatsui. Antsu Yus akuptukuíti atumin ikiakártinian. Tuma asamtai, wi atumjín jeaknaka kakaram chicharkajjrum tusan winitsuk jü papin áatjarme.

Amikmaawai

¹¹ Ayu, yatsurtiram, shiir pujustarum. Krístunam tuke kakaram ajastarum. Yus shiir enentáimtikramprarti. Chikichík enentáik enentáimsatarum. Shiir awajnisarum pujustarum. Tura Yus anenmarmena nu, shiir enentáimtikramna nu atumjaj pujurtamsattarme. ¹² Yúsnum shiir enentáimtunaisrum amikmaanaisatarum. ¹³ Ashí Yus-shuar ainia nu amikmaatmarme. ¹⁴ Uunt Jesukřistu waitnenkartutairj, Yusa anenkrattairjsha atumjín pujurtamsati. Tura Yusa Wakanjsha tuke nemartamsarti. Nu atí.

Papru KARASEANMAYA SHUARAN Papí aar akuptukma

Karaseamaya Yus-shuaran Papru áatramiania nu

¹ Wi Pápruitjai, Yus akatramu. Yúsak winia akatturuiti. Shuarka akatturchamai. Yusscha chíkich shuáran akupturak akatturchamai, antsu Nunki, Yus Apa, Jesusan jakamunmaya iniantkimia nu, tura Jesussha winia akatturarmai Yusa shiir chichamen etserkatniun. ² Wisha, ashí Yus-shuar wijiái pujuinia nusha, ju papí akupeaji. Ashí Yus-shuar Karasea nunkanam pujarmena nu áusatarum tusan ju papin akuptajrume.

³ Yus Apa tura ii Uuntrí Jesukristusha waitnentramiania ásar yainmakarti imiatkinchanum tuke shiir pujustinian. ⁴ Yus ii Aparí nuna wakera asamtai, Jesus ni ayashín surumak wáitsamiayi ii tunaarí asakártinian. Nuna tura ashí tunáa ju nunkanam ana nuyá ankant awajtamsatai tusa in yáinmaji. ⁵ Tuma asamtai tuke Yus shiir atí. Ayu.

Chíkich uwempratin chichamka atsawai

⁶ Maa, nekasaash timiá wárik Yus ikiukmiarum. Kristu in ti anenma asamtai Yus ni shuarí ajastinian in anaitiamkamji. Urukamtaitsuk nuikia imiá wárik ni chichame inaisamarum nusháa chicham umikrum uwemprataj tusarum. ⁷ Wátsek, nekas chíkich chicham penké atsawai shuar umikiar uwempratin. Antsu yajaya shuar atumín taar péñkercha awajtamainiawai. Tura nusháa chichaman etserkar Yusa shiir chichamen yapajilatniun wakeruinaiwai. ⁸ Tuma asamtai Yus nin yajauchiniam yumínkrattawai. Wisha Yus-Chicham yapajámun etserkamtañkia Yus winia yumínkrattawai. Nayaimpinmaya suntarsha nusháa chichaman wi etserkachmaj nuna étserkuñkia nunsha yumínkrattawai. ⁹ Paant ujakjarme túmaitiatnak ataksha ujaajrume: Nánkamas shuar niisháa uwempratin chichaman, wi etserkachmaj nuna étserkuñkia Yus yumínkrattawai.

¹⁰ Ti kakaram chichaatsjak. Nuna chichaakun shuar shiir enentáimtursarti tusan chichaatsjai. Antsu Yus shiir enentáimtursati tusan nuna tajai. ¿Shuar wakeruinia nuna enentáimsan chichaajak? Nuna enentáimkiunka Kristu wakera nuna umirkachaintjai.

Papru júnis Yus akatramu ajasmiai

¹¹ Antsu nekaatarum, yatsuru. Uwempratin chichaman wi étserjana nuka áentsnumianchuiti. ¹² Aentska ujatkachmai. Unuitiutnasha unuitiurchamai. Antsu Jesukristuk winia paant jintintruamai.

¹³ Tura wi yáunchu ti yajauchin túramiaj nuka antukchakaitrum. Israer-shuar Yúsnan takainia nútiksanak wisha takasmajai. Tuma asan Yus-shuaran ti kajerkan tuke pataatukmajai amuktaj tusan. Nusha nékarme. ¹⁴ Tura kakaram ajasan, ii uuntrí yaunchu tiarmia nuna yawetsuk umiktinian ti enentáimpramjai. Tura untsurí shuaran wijiái métek uunt armia nuna nankaamas Yúsnan takasmajai. Túmaitiatan aya winia úuntrun chichamen ti umirniuyajai. ¹⁵ Túrasha wikia akiintsain Yus winia achirkamiayi, tura ti anenkratmarjijai winia anaitiukmiayi. ¹⁶ Nuikia shiir enentáimiuk ni Uchirín paant nekamtikruamai. Tura Israer-shuarchanum ni shiir

chichamen etserkat tusa akuptukmiayi. Tuma asamtai chikich shuaran aniaschamjai. ¹⁷ Uunt péprunmasha, Jerusarénumka, wéchamjai wini emkaru Yus akatramujai chichastinian. Antsu wárik Arapia nunkanam wémajai. Tura nuí Yúsan enentáimtasuan atak Tamasku péprunam waketkimjai. ¹⁸ Tura menaintiú uwí nankaasmatai, nuyá Pítrujai áujmattsataj tusan Jerusarénum jeamjai. Tura jimiará semanachik pujusmajai Pítrujai. ¹⁹ Tura Jakupuncha, ii Uuntrj Jesusa yachja nuna, wáinkiamjai. Nú arantka chikichnaka Yus akatramunka wáinkiachmajai. ²⁰ Yus iirui. Wi tájana nu nekasaiti, wáitchaiti.

²¹ Nú ukunmasha Siria nunkanmasha, Sirisia nunkanmasha wémajai. ²² Tuma asamtai ashí Yus-shuar Jutía nunkanam pujuarmia nu winia nekaracharmai. ²³ Aya antukarmai. “Yaunchu in ti áintrammiaj nu yamaikia Yus-Chichaman éteruk wekaawai. Yáunchuka in amutkaktinian wakerini-aitiat yamaikia iniaisaiti” tiarmai. ²⁴ Túrawar winia enentáimtursar Yúsan shiir yuminsarmai.

2

Chikich Yus akatramu Paprun shiir enentáimtuiniawai

¹ Tura katurse uwí nankaasmatai wisha Pírnapijiai Jerusarénum wémajai. Titiuncha jukimjai wijjai. ² Yus akupta asamtai Jerusarénum wémajai. Tura nuí jean aya Yus-shuara úntrijaiin áujmattsamjai. “Júnisnak ashí Israer-shuarchan Yus-Chichaman ujainiajai” tímiajai. Takasmajna nusha tura tuke takastin enentáimjiana nusha ántar ajn tusan tu áujmattsamjai. ³ Niisha Yus-shuara úntrintiat itiurchat enentáimpracharmai. Antsu chikich shuarka Titui Israer-shuarchaitiat wijjai pujakui niisha Israer-shuar ajastí tusa tsupimiamtikiatniun wakeriarmai. Túrasha tujinkiarmai. ⁴ Tura nu shuar ántar yachi ániak antuktai tusar wayawarmai. Tura ii chichamen antukar itiurchat awájtámsatai tusar wakeriarmai. Iis, Kristu Jesus in uwentikrampra asamtai ti shiir iisha Yus yúpichuch umíjai. Tura nuna nekaawar, atakka, aya yáunchu akupkamu itiurchat ana nujai uwentikrampratniun wakerutmakarmaji. ⁵ Túrasha penké ishichkisha umikchamjai. Antsu atumín Yus-Chicham yapajniátsuk métek jeartamat tusar ni chichame penké anturkachmaji. ⁶ Nu arantcha Yus akatramu uuntrínkia yamaran túratniunka suruscharmaj. Nincha ashí aents ti neka áiniawai tu enentáimtuiniawai. Kame nu shuar ti nékainiakuiisha ti enentáimtatsjai. Yus ashí shuaran mash métek iyatsuk. ⁷ Yus akatramu uuntrísha Yus winia Israer-shuarchan Yus-chicham ujaktinian akuptukma nuna nekarawarmaj. Tura Pítruncha akupkamaj Israer-shuaran Yus-Chicham ujaktinian. ⁸ Pítrun Israer-shuarnum akupkama nú Yusak winiasha akuptukmaj Israer-shuarchanum. ⁹ Tuma asamtai Jakupusha, Pítrusha, Juansha, Yus akatramu uuntrí ásar, Yus winia ti paant akuptan nekaawar, winiasha Pírnapiinsha, “Ayu, átum, Israer-shuarchanum Yus-Chicham etserkatarum, tiarmaj. Iisha Israer-shuarnum Yus-Chicham etserkattaji” tiarmaj. Túrawarmatai shiir áujnaisar ii uwejejai achirnaikiamjai métek enentáimji tusar. ¹⁰ Áyatik “Kuítrincha enentáimtusurum tuke yáintarum” tiarmaj. Wisha núnaka ti wak-erakun tuke túriniaitjai.

Papru Pítrun chicharkamai

¹¹ Tura nú ukunam wi Antiukía péprunam pujajñ Pítieur tamai. Tura nuñ yajauch túramtai, Yus-shuara úuntriniak chicharkamjai. ¹² Iis, Israer-shuar tuiniawai, “Israer-shuarcha Muisais timia núnisañ tsupirnakcha asamtai, nu shuarjai yurumáshtiniati” tuiniawai. Túmaitiat Pítieur yurumámnian nékaku, emka Sántiak shuar táatsañ Israer-shuarchajai yurumámai. Tura nuyá Sántiak shuar Jesarénumiá Antiukianam jeawarmatai Pítieur ashamak tsupirnakcha shuarnumiá kanakin yurumáchmai. “Tsupirnakhtiniatme” tiniu ainia nuna ashamak túramai.

¹³ Tuma asamtai chikich Yus-shuar, Israer-shuar armia nu, Píturujai métek emka yurumáwaru ániayat jimiará enentai takusar ukunam iniaisarmai. Pirnapísha neka áyat nútiksañ nupetnakmai. ¹⁴ Tura nuna íisan ashí íimiainiaini Píturun chicharkamjai. Yus Shiir Chicham tana nujai métek wekasachu ásarmatai tímiajai “Ame Israer-shuaraitiam Israer-shuarti ikiukim tsupirnakchajai yurumám Israer-shuarcha áintsamek túrame, tímiajai. Nuikia “Israer-shuarcha Israer-shuartijai métek wekasatin ániawai” tiip” tímiajai.

Israer-shuarsha Israer-shuarchasha mai métek Yúsán enentáimtusar uwemprartatu

¹⁵ Iikia nekas Israer-shuaraitji. Israer-shuarcha, tunáa ainia áaniuchuitji. ¹⁶ Túmaitiatar ju nékaji. Akupkamu umíamujai uwemprachminiaitji antsu Jesukristu nekas enentáimtakum uwemprattame. Nu nekaar iisha Jesukristu nekas enentáimtusmaji tunaajainchu atai tusar. Aya Kristu nekas enentáimtusar péñker átatji. Akupkamu takasar umirkarsha tuke nujai péñker ajaschattaji. Akupkamunka shuar umiktaj táyat, chikichki shuarkesha nujai péñker ajaschamniaiti. Nu nekaar antsu Jesukristu nekas enentáimtusmaji péñker ajastai tusar. ¹⁷ Tura Israer-shuar enentáimprashimpiash, “Wátsek, núnisaitkiuinikia wisha Kristun enentáimtustaj tákunka, emka tunáa shuaraitjai tu enentáimtumastiniaitjai” tíchanpiash. Nuka nekasaiti tura nuyá “Nu asamtai Kristu winia tunáa shuaran najataiti” penké tu enentáimprashiniati. ¹⁸ Antsu yaunchu, wi túrashtiniaitjai tímiaj nuna awainkin túratniuitjai tákunka nuikia nekas tunaitjai. ¹⁹ Iista, akupeamun umiktaj tukaman penké tujinkiamjai. Umiktinian tujinkian jaka áintsanak ajasmajai akupeamunam. Antsu Yúsajai iwiaaku pujajai ni wakera nuna umiktinian. ²⁰ Wisha Kristujai krúsnum jákaitjai. Tuma asamtai yamaikia wikia iwiaaksujai wi wakeraj nuna túratniun antsu Kristu wini iwiaaku ni wakera nuna túratniun. Tura ju ayashniun pujayatan aya Kristu enentáimtakun iwiaakjai. Kristusha Yusa Uchiríntiat winia ti anentuk jarutkamiayi. ²¹ Yus ti péñker asamtai ititurak “Kristu ántar jakamiayi” títiaj. Iis, aya akupkamun umirkan péñker ajasminiaitkiuinikia, nuikia Kristu ántar jákayai.

3

Yus akupkamu tura Yus enentáimtustin

¹ ¿Wariñ aa Karaseanmayatirmea. Waweamukaitrum netse enentáimprarun Yus tama umirkashtin. Kristu krúsnum máamun ti paant étserkun atumin iniaktuschamkajrum? ² Wátsek, aniatatjarme, enentáimpratarum. ¿Warijajain Yusa Wakaní atumí enentáin achikmarum. Akupkamu umirkarmek enentáimin achikmarum, antsu Yus enentáimtusrum ni Wakaní achikchamkum? ³ ¿Tuke nétsekaitrum. Yusa

Wakaní emka atumí enentáin wayá takasmatai atumek yamaikia nu takat aya ayashí kakarmarjijai umiktin enentáimprarmek. ⁴ Penké ánrarmek wáitsamarum tura antsu ishichkisha unuimiarchamkarum? ⁵ Naka enentáimpratarum. Yus ni Wakanín súramtsuk tura aents túrachminian atumín ti takaatsuk. Átum aya akupkamun umirkurmin Yus nuna túrachuiti. Antsu ni chichame antukrum Yus enentáimtakrumin Yus nuna túraití.

⁶ Yaunchu ii uuntri Apraám enentáimpratai. Yus-Chicham nin tawai:

“Apraám Yúsan enentáimtusmatai Yus “Ayu, péñkeraitme” tímiayi” tawai.

⁷ Iis, nujai páantchakait. Ashí shuar Yúsan enentáimtuinia nuka Apraámjai métek enentáimpraru ásar, ni uchiría áintsan ajasaru ániawai. ⁸ Yamái páantaiti. Yus ashí Israer-shuarchancha tawai “Aya winia enentáimtusarum péñker áatrume”. Israer-shuarchasha nujai péñker ajastinia nuna ti yaunchu neka asa, Apraáman ujakmiayi,

“Ámijjai ashí aents ti shiir ajasartatui.”

Tu ujakmiayi. ⁹ Tuma asamtai ashí shuar Yúsan enentáimtuinia nuke Apraámjai métek péñker ajasaru shiir warasartatui.

¹⁰ Antsu ashí shuar “akupkamun umirkan uwemprattajai” tuinia nuka yajauchiniam yuminíkramu ániawai. Yus-Papinium áarchamukait

“Ashí shuar Yus akupkamun ashí aarma nuna takamtsuk umirkachka ya-jauchiniam yuminíkramu ániawai.” Tu áarmaiti.

¹¹ Nújainkia páantaiti. Akupkamu umirkatnujai péñker ajaschamni-aiti Yusjai, antsu aya Yus enentáimtusam péñker ajasam uwemprattame.

¹² Shuar akupkamu umirkatniun enentáimna nuka aya nujai péñker ajastinian enentáimiui; Yúsan enentáimtak péñker ajastinian enentáimtsui.

¹³ Tura Kristu yamaikia uwemtikrampramji. Akupkamun umirkachu yuminíkramu tana nuka in túramtsuji. Antsu Kristu in yainmaktin krúsnum jaka yuminíkramu ajasmiayi. Kame áarmaiti:

Shuar jakati tusa numiniam nenasma yuminíkramu tui.

¹⁴ Tuma asamtai Jesukrístu jakamujai ashí Israer-shuarchasha Apraámjai métek péñker shiir warasartatui. Iisha núnisrik nu shuarjai Yusa Wakaní, Yus akupkataj timia nusha, achikataj Yus enentáimtusar.

Yus akupkamu tura Yus túrattana nu anajmarma

¹⁵⁻¹⁶ Iis, yatsuru, Yus Apraáman Chichaman najana anajmatuk,

“Ámijjai tura amée weeá akiinkiattana nujajisha ashí aents ti shiir ajasartatui” tímiayi.

Kame ‘amée weeá akiinkiartatna nujai’ tíchamiayi, antsu ‘akiintiatta nujai’ tímiayi. Nuna taku chikichik átinia nuna enentáimpramiayi. Nusha Krístuiti. Aentstisha enentáimpratai. Shuar chichaman najana tura papinium aar nuyá ni naarí apujas nuikia nekas yapajítsuk umiktiniaiti. Umítsuk ini-aisachminiaiti. Patattasha patattsachminiaiti. ¹⁷ Wátsek, Yus núnisan Chichaman Apraámjai najana, ukunam umítsuk ini-aisachminiaiti. Tura Chichaman najanamia nú ukunam, kuaru siañtu nuyá traínta (430) uwi nankaasmatai, Yus ni akupkamurín Muisaisan susamiayi. Túramaitiat nujai Yusa yaunchu Chichamen yapajíachmiayi ini-aisatniun. ¹⁸ Tuma asamtai Yus timia nuka tuke uminkiattawai, Yus yaunchu Apraámjai Chichaman najana asamtai. Nújainkia páantaiti, péñker ajastajtsar akupkamu umikrikia shiir pujuschartatj antsu Yus timia nujai iikia takatsuk shiir pujustatj. Nuna tsanekatkamiayi Yus Apraámjai Chichaman najaneak..

19 “¿Nuikia Yus urukamtai akupkamun susamia?” tíchaintmeash. Ayu, Apraám weean, Kristu táatsaj̄n Yus tímía nu uminkíachminiuyayi. Tuma asamtai nii táatsaj̄n ashí tunaan túrawarmia nu timiá yajauchiiti tusa Yus akupkamun susamiayi. Tura Yusa suntari j̄u akupkamun ashí iwiarar Muisaisan susar akatarmiaiyi Israer-shuaran susárti tusar. 20 Antsu chikichik shuar nínki takastinian enentáimkiunka chikichan atsumatsui. Tura Yus aya chikichkiiti. Nínki chikichan akattsuk ashí aentsun Apraámj̄aj̄ péñker awajsatniun Apraáma anajmatar níij̄aj̄ Chichaman najanamiayi.

Yus akupkamu itiuirkátin

21 “¿Tura Yus jimiará chichamj̄aj̄ chichaawak, tíchaintmeash. Emka Apraáman “Juj̄aj̄ uwemprattame” tíchamkia, nuyá Muisaisan ni akupkamur̄in súsachmakia?” tíchaintmeash. Tura áintsachuiti. Nekaata, akupkamu umirkatniuj̄aj̄ Yusj̄aj̄ tuke péñker pujusminiaitkiunka nuyá aya akupkamuj̄aj̄ uwempram tunaaj̄aj̄in chu ajasaintme. 22 Tura Yus-Chicham paant “Ashí tunáa áiniawai” tawai. Nu asamtai yamaikia ashí Jesukristu enentáimtuinia nú shuar, aya Yus timiá asamtai, uwemprattatui. 23 Tura Kristu táatsaj̄n Nin enentáimtushamniauyayi. Tuma asamtai Nii táatsaj̄n akupkamuka in emetama pujurtamji aya akupkamu tana nu umirkatín. Tura ukunam j̄u nekanayi: Kristu enentáimtusar uwempratniuitji. 24 Akupkamu, nuika, in waitmakmaji uchin kuírchin wainnia áintsan. Kristu tatí tusa waitmakmaji. Tura Kristu támatai ashí nekas Nin enentáimtuinia nuka Yúsj̄aj̄ péñker áiniawai. 25 Yamái Kristu nekas enentáimtustiniaiti tuma asamtai yamaikia akupkamu kuirchia áintsan wáitmatsji. 26 Antsu Jesukristu enentáimtusar, nuj̄aj̄ Yusa uchir̄i úuntmaru ajasuitji. 27 Ashí Kristu náarijn imiaimiutirmeka Kristu áintsan ajasuitrume. 28 Jesukristuj̄aj̄ tsanínkiu asarí imiá métek aji. Israer-shuar, Israer-shuarcha, ankant ainia nu, ankantcha ainia nu, áishman, nuwá, ashí mash Jesukristunuitkiunkia yamaikia “nishaaiti” tu enentáimprashtiniaiti. Ni shuarj̄ mash chikichik áiniaji. 29 Tura Kristunuitkiurmeka Apraám weea áintsan ajasurme atumsha. Tuma asarum, Yus Apraáman anajmatramia nu atumsha jurumkitniuitrume.

4

1 Kuítrinniu uchir̄i ashí ni apar̄i takakna nuna niiniu áchattawak ukunam. Tura uchichitkiunka ni apar̄i takarniur̄iya núkete. 2 Tuke uunt ajatsuk ni wáinnia nuna umirkatniuiti. Tura uunt ajasmatai tura ni apar̄i “Ayu” takui nuyá nii antsu ni apar̄in̄iu ashí wáinkiatniuiti. 3 Núnisrik iisha úchichik asarkia ashí aentsu akupkamur̄j̄ umirkatniuij̄. 4 Tura tsawant jeamtai, Yus ni Uchir̄in akupkamiayi j̄u nunkanam. Niisha Yúsaitiat nuwanam akiiniamiayi. Tura aents ajasmiayi. Tura aents ajas yaunchu akupkamuncha umirkatniuyayi. 5 Nuj̄aj̄ ashí aents akupkamun umirkatin armia nuna uwemtikrataj̄ tusa támiayi. Tura iisha yamaikia nuj̄aj̄ ni uchir̄i uunt ajasminiaitji. 6 Atumsha nekas ni uchir̄i ajasakrumin Yus ni Uchir̄i Wakan̄in atumí enentáin akupturmakuiti. Tura nu Wakan atumí enentáiȳa Yúsán “Aparú” tawai. 7 Tuma asamtai yamaikia aya takarniuchuitme antsu Yus ni uchir̄in najatmaiti ámin. Tura ni uchir̄i asakmin ashí Yus takakna nuna amastatui Kristuȳan.

Parpu nu Yus-shuaran yáintinian wakerawai

⁸ Yaunchu átum nekas Yus nékachkuram, ántar-yus írúnna nu umirkamarme nekascha yúsak. ⁹ Tura yamaikia nekas Yus nékarme, kame Yus atumin nekarmarme. Núnis asamtai itiuirsuk atak aentsu akupkamurj umirkatin enentáimprum. Nujaj kakaram ajaschamniaitme tura umikmesha yainmakchattawai uwempratin. ¹⁰ Átumka jísat ti najanearme. Yaunchu jisat najanatin amia nú tsawantcha, nantusha, uwisha, jísat tuke najanearme Yus shiir enentáimtursati tusarum. ¹¹ Ashamajai, atumjín ántrankeash takasmaj tusan. ¹² Yatsuru, wi atumea áintsanak ajaschamkaj; atumsha yamaikia wi wekaajna áintsarmek wekasatarum. Wi nuj pujakui ishichkisha ya-jauch awajtuschamarme. ¹³ Antsu nekarmarme ayashruj itiuirchat pujayatán Yusa shiir chichamen emka ujakmajrume. ¹⁴ Tura winia sunkur ti yajauch awajtajn atum winia nakitrurum mujrukchamarme, antsu Yusa suntaraj áintsarmek itiararmarme. Jesukrístu anturkatniua áintsarum antur-tukmarme. ¹⁵ Maa, wi nékajai, nuik atumi jimi ukuinkiarum surusaarme, túramniaitkiurmeka. Tura shiir enentáimprarmena nusha itiuirsukait yamaisha. ¹⁶ Yamaikia nekas chichaman étserkun áatumí nemasrj ajasjak? ¹⁷ Chíkich yajaya taaru ti shiir awajtamainiawai tura atumin yainmaktasa áitkiarmainiatsui. Aya winiyá akantamkitiai tusa wakerutmainiawai, winia antsu shiir enentáimtursat tusar. ¹⁸ Niisha nekas yainmaktinian wakerut-mainiakka atumin shiir awajtamsatin tuke péñker ainti, wi atumjai pujajnsa tura pujatsajnsa. ¹⁹ Uchirú, nuwá jurertaj tana núnisnak ataksha wáitijai Kristu atumjín paant atí tusan. ²⁰ Atumjai pujaknaka maak aintjai. Yamái pujaknaka nekas nusháa chichasaintjarme. Itiuirkatjarmetsuk nékatsjai.

Akarsha, Sarasha jimiara Chichaman nakumainiawai

²¹ Ayu, “akupkamu umirkatniuiti” támena nu nekaata; akupkamuka júnisaiti. ²²⁻²³ Aarma awai: Apraám jimiara uchirtiniuyayi. Emka ni takarniurj jurermiayi Ismaeran. Nuyá Apraáma nuwé jurermiayi Isakan. Ismaera nukurj Apraáma takarniurjyayi. Tura Apraám Yusan enentáimtutsuk niijjai kanarmatai, ni takarniurj jurermiayi. Tura antsu Isaka nukurjinka takarniurjinchuyayi, antsu nekas ni nuwé áuyayi. Niisha ti úntchiniak, Yus “jurertatme’ úmiayi. Tuma asamtai Yus timiajai Isakan jurermiayi. ²⁴ Ayu. Yamái tájana nuka Yusa Chichamen jimiaran nakumui. Ismaera nukurj Akar chikichik Chichaman nakumui. Yaunchu Senái muranam Yus ni akupkamurjín áarmiayi Israer-shuar, takarniua áintsan, umirkarti tusa. ²⁵ Senái murasha Akara nunke Arapianam wajaawai. Akarsha Senái muran nakumak, ashí Israer-shuaran “Akupkamujaj uwempramniaiti” tuinia nuna nakumui. Yamaisha Israer-shuara untrj Jerusarénnum pujuinia nuka tu chichainiawai. Tuma asamtai Akarsha, ashí nu shuarsha núnisar, akupkamu umirkatin ásar, ti takarniu áintsan wáitsar takainiawai. ²⁶ Antsu ashí Yus-shuarti uwempra asar imiankas ankant pujaji. Nayaimpinmaya Jerusarénnumiá áentsuitji. Nuyá áentsti tuke ankant pujuiniaji. Nuyá aents asakrin, nu yakiya Jerusarénka ii nukurjá áintsan enentáimpramniaiti. ²⁷ Júnis áarmaiti:

Warasta, misurma, uchi takakchiatmek;

Ti shiir warasta, uchi najawé nékachiatmek.

Nuwá ajapamu uchin jurertatui;

Nuwá áishrinnia núnaka nankaamas uchirtin átatui.

²⁸ Iisha, yatsuru, Isaka áintsarⁱ, Yus timiajajⁱ akiinaiitji. ²⁹ Yaunchu Ismaer Isakan kajerak itiurchat awajsamiayi. Núnisan^u yamaisha Ismaera áintsan^u aya ayashnumiá ainia nú aents Yusa Wakaníya akiinia nuna yajauch awajenawai. ³⁰ Tura Yus-Papinium áarmaiti:

“Takarniusha, ni uchirijjajⁱ, ajapam awemata. Nekas péñker nuwá uchirijjajⁱ tsaniñ pujuschamniaiti. Aparjⁱ kuítríncha achikchamniaiti,” tawai Yus-Papí.

³¹ Ayu, yatsuru, nekaatarum. Takarniu uchirínchuitji antsu ankant pujaji nekas péñker nuwá uchirí asarⁱ.

5

Yusjaj tuke ankant atarum

¹ Kristu uwemtikrampramijai tuke ankant átinian. Tuma asamtai kakaram ajasam tuke ankant pujustá. Ataksha nu itiurchatnum waketkip.

² Wi Papru asan ujaajrume. Átum Muisais timia núnisrumek tsupirnakrumniñkia ¿Kristu nuikia warí itiuertamkamniait? ³ Ataksha tájarne, ashí tsupirnakua nu shuar ashí Muisais timia nuna takamtsuk umírkatniuiti.

⁴ Átum “Akupkamu umiáakmin Yus shiir enentáimturmastatui” tárumna nu, nu shuartíram Kristuiya tupanniuítrume. Yusa anenkrattairiya kanakniurme. ⁵ Iikia, antsu, Yusa Wakaníjjajⁱ tura Yus enentáimtakrin Yus shiir enentáimturmastatji, tu enentáimji. ⁶ Nekas Kristunuitkiurkia tsupirnaktin atumatsji. Antsu aya Yus nekas enentáimtakur ashí anenaitniuitji.

⁷ Átumsha Kristujajⁱ péñker wekaimiarne. ¿Urukantai nekas Yus timia nu iniaisatin enentáimprum ataksha akupkamunam waketkitin? ⁸ Nú enentai Yúsaiyanchuiti. Niijjajⁱ wekasatniunka Yus achirmakuitrume. ⁹ Ju enentáimpratarum: Karía ishichik yuminnium enketam mashⁱ karimtiktsuk. Aneartarum átumsha. ¹⁰ Ayu, Yus yáinnakrumin wi tájana nu nusháa enentáimprashtratume, nékajai. Tura atumin yajauch áujmatramainia nuna Yus asutiáttawai páchitsuk.

¹¹ Wíka, yatsuru, yamaisha “tsupirnakiniaiti” tuke tákuinñkia Israer-shuar yajauch awajtuscharainti. Antsu Kristu jakamun étsereatnak “tsupirnakiniaiti” tákuinñkia kajertukcharainti. ¹² Átumin yajauch awajtamsatin wakeruiniiana nú shuar antsu niñki tsupimiakar yajauch awajmamsarti.

¹³ Átumniasha, yatsuru, Kristu tuke ankant awajtamsarme. Tura ankant ajasrum, “Aya wi wakerajna nuna túramniitjai” tu enentáimprairap. Antsu nuámtak aneniakrum péñker yáiniáiktarum. ¹⁴ Ju chichamjajⁱ ashí akupkamu mash uminkiatstawai: Ame ayashim aneamna áintsamek chíkich shuarsha aneata. ¹⁵ Tura aneartarum. Aneniachkurmeka, antsu esanairum mai yunai ajakrumka nuámtak amunaiktatrume.

Ayash wakeramu tura Yusa Wakaní wakeramu

¹⁶ Ju ná tájarne: Átumí ayashí wakerana nu umikíajjⁱ tusarum Yusa Wakaní kakarmaríjjajⁱ wekasatarum. ¹⁷ Yusa Wakaní wakera nuna ame ayashim nakitiawai. Tura ame ayashim wakerana núnaka Yusa Wakaní nakitiawai. Mai maanai ajainiawai. Túmaitkui péñker wekasataj tukamam tujintiame. Páantchakait. ¹⁸ Tura Yusa Wakaní jintinramkuinñkia, aentsu akupkamuríjjajⁱ itit áhattame.

¹⁹ Wats, ayash túramu ti paant áiniawai. Ju áiniawai: tsanirmatin, wapik túratin, yajauch túratin, ²⁰ ántar-yus ainia nu tikishmatratin, wawekratatin,

nemasnaikiatin, katsumnaikiatin, akasmaktin, wari kajektin, nan̄kaamantu enentáimtumastin, aya niisháa niisháa enentáimsartin, níniunak ístin, ²¹ yajauch enentáimtunaistin, maṅkartuatin, nampektin, nampernum aya ti yurumin, tura ti nampen átin. Chíkich nujai métek ániawai. Nuik ujakmajrumna núnisnak ataksha tájarne: Shuar nuna túrakka Yusaí pujustinian penké tujinkiattawai.

²² Ayu, yamaikia Yusa Wakaní kakarmarjijai túratin enentáimsatai. Yusa Wakaní ii enentáin pujak, péṅker túratniun nerektinia áintsan neremtikramji. Ju áiniawai: aneatin, shiir enentáimsatin, Yusjai tura shuarjai nawamnaikiar wekasatin, shiir enentáijjai katsuntratin, chíkich shuar shiir awajsatin, tsan̄ka átin, tana nuna tímiatrusan umiktin, ²³ péječhach ajastin, iik ímiasar tunáa túrashtin. ¿Ju túratniuncha yaki surimia? ²⁴ Shuar Jesukrístunu ainia nu, ni ayashí wakeramuríncha tura nunisan̄ ni túramuríncha surimiak wekaawai. Ni ayashí krúsnum maatniua áintsan túraiti.

²⁵ Yusa Wakaní kakarmarjijai Yus-shuar ajasu asar, núnisrik Yusa Wakaní kakarmarjijain̄ wekasatai. ²⁶ “Wats, nekapnaisatai. Wi imiá péṅkeraitjai” nuámtak túnaitsuk, yajauch enentáimtunáischatniuiiti.

6

Yáinniaiktarum

¹ Túrascha, yatsuru, Yus-shuar tunáa túrashtimpiash. Atumsha nekas Yusjai wekaarumna nu, nu wáinkiumeka, yátsum Yusjai iwíarat tusarum yáintárum. Tura nan̄kaamantu enentáimtumatsuk túratatum. Tura amesha nekamata. Tunaanum iniaraj̄i tusam anearam wekasata. ² Káarak kijin akui nuámtak yáiniaiktin átsuk. Núnisrumek atumsha, ititurchatr̄i akui nuámtak yáiniaiktarum. Túrakrumka Kristu akupeamur̄i umíarme.

³ Shuar tujintiayat “nan̄kaamantuitjai” tákun̄ka anan̄mamui. ⁴ Shuar ní túramur̄iniak enentáimtumastiniaiti. Níniunak enentáimtumakuin̄kia tura péṅkeraitkiuin̄kia chikicha túramur̄i iirtsuk, antsu nūiniun péṅker iis wararsattawai. ⁵ Iis, ashí ní káarkariniak júkishtinkiait.

⁶ Shuar Yus-Chichaman unuimiatna nu, nu shuar nin jintiana nuna ashí takakna nujai yáinti.

⁷ Anan̄mamawairap. Shuar Yúsan anan̄katniun tujintiawai. Ame araamna nuna neren̄ júuktatme. Chíkich nere áchattawai. Atumi enentáin̄cha núniskete. ⁸ Iista. Shuar ni ayashí wakeramunak tuke enentáimtakka, jatai nereá áintsan̄ araaiti. Nerekmatai jákatniun júuktatui. Tura Yusa Wakaní wakera nuna tuke enentáimtakka Yusjai tuke shiir pujustinian júuktatui. ⁹ Nu asantai péṅker túratin yawetkishtiniaiti. Tura pimpitsuk takasar júuktin tsawant jeamtai, páchitsuk júuktatji. ¹⁰ Tuma asantai yáin̄min ákuin̄kia ii jeajnia nu túratniuitji nekaska ii yachí yáin̄kiartin, Yus-shuar ainia nu. Tura ashí shuarsha yáintinaiti.

Jesukrístunu ajaras yamaram akiiniatin nekas péṅkeraiti

¹¹ Ímsakua, winia uwejrui urutá uuntna áatjarum. ¹² “Nekas tuke tsupirnaktiniaitme” tuinia nuka áyatik shuar shiir enentáimtursarti tusa tuiniawai. Kristu krúsnum jakamun étsereakuin̄kia ititurchat awajtusarain̄ tusar “tsupirnaktiniaitme” tuiniawai. Shuar “ashí akupkamun umiktajai” tusa, Muisais timia núnisan̄ tsupirnaktiniait. ¹³ Pai. Tura nú shuar tsupirnaktu

áiniayat ashí akupkamun umiiniatsui. Muisais timia nuna ajapén ikiuiniawai. Túmaitiat tsupirnakuk tusa wakerutmainiawai. Áyatik atumin “Pai, niisha tsupimiatkiakji” titiai tusar wakerutmainiawai. ¹⁴ Wikia, antsu, aya ii uuntri Jesukristu krúsnum jakamunak wararsatniun enentáimjai. Tu enentáimkiun Kristu krúsnum jakamia áintsanak ju nunkanmayá ana nuna jaka áintsan páchiatsjai; tunaanum winia útsutkatin atsawai. ¹⁵ Krístunu ajas-rikiá tsupirnaktincha tsupirnakchaitkiursha mai ántrai antsu yamaram akiiniatin nekas péñkeraiti. ¹⁶ Ashí nekas Yus-shuaran, wi tájana nujai métek wekainia nuna, Yus shiir enentáimias yáinti tuke shiir pujustinian.

¹⁷ Yamaikia itiurchat najatawarain. Jesusa takatri takaakui asutiawarma paant ayashruj chimikma irunui.

¹⁸ Yatsuru, ii uuntri Jesukristu atumin shiir yainmakarti. Nuke atí.

Papru IPISIUNMAYA SHUARAN papi akuptukma

Ipisiunmaya Yus-shuaran Papru áatramiania nu

¹ Yus nuna wakerakui Jesukrístu akatramuitjai. Jesukrístu nekas enentáimtusurum Yus-shuar ajasrum Ipisiunam pujarmena nuna ju papin áatjarne. ² Yus ii Aparísha tura ii Uuntri Jesukrístusha waitnentramainia ásar imiatkinchanum shiir pujustinian yainmakarti.

Krístujai tsanínkiu asakrin Yus ti shiira nuna tsankatramji

³ Ii Uuntri Jesukrístu Apari Yus nekas shiir awajustiniaiti. Iisha Krístujai tsanínkiu asar ii enentáin ashí nayaimpinmaya ana nujai warasminiaitji. Túmaitkiui Yus nu waratain ashí suramsaitji. ⁴ Krístujai uwemprar ti shiir tunaajainchu Nijjai pujusarat tusa Yus, ju nunka atsajsha, anaitiamkami-aji. ⁵ Yámankamtaiksha incha ti anenmak Jesukrístu túrunamujai ni uchiri ajasat tusa wakerutmakmiaji. ⁶ Ni aneamu Uchirijjai tsanínkiu asakrin nekas ti anenmaji. Nu enentáimsar ti shiir awajsatniuitji. ⁷ Yus ti anenmakrin ni aneamu Uchiri numpé puarmatai, nu jakamujai ii tunaarín akikmatramak uwentikrampraitji. ⁸ Tura ti anenmak ni enentáimtaijin tura nekatairíncha suramsamiaji. ⁹ Nujai shiir enentáimturmak in uwentikrampratniun wakerutmakmiaj nuna, yaunchu nekaachman, yamá paant awajturmajai. ¹⁰ Ashí jú nunkanam írúnna nunasha tura nayaimpiniam írúnna nunasha Kristu ashí akupin ati tusa Yus tsankatkattawai. Nunasha Yus yaunchu enentáimturú asamtai tsawant jeamtai ashí uminkíattawai.

¹¹ Iisha Krístujai tsanínkiu asakrin Yus yaunchu achirmakmiaji ashí Niiniu ana nuna tsankatramkatniun. Nunasha, ashí Nii túrana núnisan, aya Nii wakera asa túramiayi.

¹² Iikia Israer-shuar asar Kristu emka umirkakrin in imiá péñker túrutmamun nekaawar ashí shuar Yúsan ti shiir awajsamín ániawai. ¹³ Núnisan atumsha nekas uwempratín chicham antukrum Kristu nekas enentáimtusurme. Túrarum Kristu-shuar ajasakrumin Yus ni shiir Wakanín akuptuktaj timia nuna akupturmakmai. Nuna tura “nekas Wíi shuaraitrume” tawai. ¹⁴ Yamái Yusa Wakaní ii enentáin pujuruk tuke uwentikramji. Tura takas umik nu tsawantaj ashí tsankatramkattaji. Tura ii enentáin pujá asamtai Yus ukunam Nijjiaishá ashí tsankatramkattaj nu paant nékaji. Maa, Yus ti péñker asamtai Nin ashí ti shiir awajsarti.

Papru Yus-shuaran áujtusmiania nu

¹⁵ Átum ii Uuntri Jesukrístu nekas enentáimtamuncha tura ashí Yus-shuarjai shiir awajnaiyamuncha antukjai. ¹⁶ Túran shiir enentáimkiun Yúsan áujkun tuke yúmínkijajai. ¹⁷ Ii Uuntri Jesukrístu Apari Yus ti shiir asamtai Nin áujeakun ni Wakaní ni nekatairín suramas ashí jintinramawarti tusa seajai. Nujai nuna nankaamas Yus nekaattarme. ¹⁸ Tura enentáimtincha paant enentáimtikramprarti tusan seajai. Nujai shiir túrutmataj tusa achir-makuitrum nu nekaattarme. Nu arantcha imiá shíira nu, Yus ni shuarín ashí tsankatkattana nusha nekaattarme. ¹⁹ Nu arantcha Yus umirkurín

ti kakaram tujincha asa in yáinmaj nu nekaattarme. Tura nu kakaram ti kakaram asamtai ²⁰ nujají Krístun jakamunmaya iniantkimiyai. Tura nayaimpiniam jukí ni untsuuriní akupin pujutainium apujssamiyai. ²¹ Tura ashí jü nuñkanam akupin ainia nújajísha tura ukunam nuñka átatna nuí akupin áminia nújajísha tura ashí akupin ainia nújajísha tura ashí naari nékamu ainia nujajísha Yus Krístun ashí nankaamas akupin najanamiyai. ²² Tura ashí írúnna nu, Krístun umirkartin áiniawai. Tura Yuska Krístunak ashí Yus-shuara Akupniuri awajsamiyai. Túramtai Krístu ni shuari muuké áintsankete. ²³ Tura ashí nuñkanam Yus-shuar ainia nu Krístu ayashí najanainiawai. Tura Krístu ashí ni ayashin pimiutkaiti tura nu arantcha ashí írúnna nunasha pimiutkaiti.

2

Yus anenma asa uwentikramji

¹ Átum yajauch túrakrum tunaanum tuke wekaakrum Yúsnumia kanakin asarum jákauyarme. ² Nu tunaanum jü nuñkanam pujuinia nujají métek tuke wekainiuyarme. Túrarum uunt iwianchi wakeramurí umirniuyarme. Uunt iwianch ashí Yúsan umirainiatsna nuna akatenawai. ³ Ashí iisha núnisrik yaunchu nu shuarjají métek ii ayashí wakerakmu umirniuyaji. Tura í enentáj wakeramusha umirniuyaji. Tuma asar tura tunaajají akiinia asar chíkich shuarjají métek ti kajernakmijai. ⁴ Antsu Yus ti waitnenkartin asa in ti anenmiamijai. ⁵ Tuma asa ii tunaanum tuke jaka pujarní Krístujají métek iwiaaku awajtamsamijai. Aya ti anenkartin asa uwentikrampramijai. ⁶ Tura Krístujají métek iniantamkimijai. Nuyá Jesukrístujají métek, akupin pujutainium yamaisha apujtamas tuke nupetkatniun tsankatramkaitji. ⁷ Nujají ni ti anenkratmarincha tura Krístu túrunamujají waitnentrampramuncha tuke iniaktusmin átatui. ⁸ Jesukrístu nekas enentáimta asakrumin Yus waitnentram uwentikrampraiti. Juka átumkeka túrunachuitrume. Antsu Yuska Nínki kuítchajají suramsaitrume. ⁹ Shuar ni takatríjají uwempratniuitkiunka nankaamantu enentáimsainti winia kakarmarjají uwemprajai tusa. Nu enentáimsatniuka atsutí tusa Yuska átumka takaatsrumniñ uwempratniun suramsamiarme. ¹⁰ Yus najanamuitji. Kame Jesukrístujají tsaniákrin yamarum iwiaakman suramas tuke péñker túratniun najatmamji. Yáunchuk nuna enentáimturmasmijai.

Krístujají tsaniníkiu asar shiir nawamnaikiar pujaji

¹¹ Nuik ámarum nu enentáimpratarum. Ashí Israer-shuar ni ayashin tsupirnakú ásar ashí Israer-shuarchan, tsupirnakcha áiniakui, péñké Yúsnachua núnis enentáimtuiniawai. Tura atumsha Israer-shuarcha asakrumin "tsupirnakcha" turamniuyarme. ¹² Nuik Krísturtinchauyarme. Israer-shuarcha asarum ashí ni túrutairísha tura ashí Yus nin tsankatkarmasha nekaachuyarme. Tura jü nuñkanmaya asarum nekas Yusa nu enentáimtichuyarme tura shiir pujustin nánkamsarum enentáimpramarme. ¹³ Antsu yamaikia Krístujají tsaniníkiu asarum, yaunchu Yusaíya yajá pujuwitiatrum, yamaikia Krístu numpé puármatai ni jarutramkamujají tántaitrume. ¹⁴ Israer-shuarjají Israer-shuarchajají nemasmanaiikiar ajapén péñkramu ámijai. Tura Krístu nuna sáaki nawamnaimtikramkamijai. Tura chikichik shuar najatmamijai. ¹⁵ Nuik aya Israer-shuar Muisais akupkamu untsurí armia nuna umirkatin ániak nujají chíkich shuarjají nemasmanainiarmiayi. Tura Krístu jaka

nu akupkamun ántar awajas chikichik shuar yamaram awajtamsamiai. ¹⁶ Núnisan̄ ámiayi. Kristu krúsnum jaka nemasjaj̄ mai apattamak chikichik awajtamás Yusjaj̄sha nawamnaimtikramkamiai.

¹⁷ Kristu taa nawamnaikiatniun chichaman Israer-shuaran ujakmiayi. Tura nu chichamnak atumin Yus nékachuyarmena nunasha ujaktnian akupkamiayi. ¹⁸ Yamaikia Israer-shuartisha tura Israer-shuarchasha mai metek Kristu túrunamujaj̄ tura Yusa Wakanj̄ takaku asar Yusaj̄ jeatniuitji. ¹⁹ Tuma asamtai yamaikia chikich shuarchaitrume, antsu ashí Yus-shuarjaj̄ métek ajasuitrume. Nekas Yusa shuarj̄ntrume.

²⁰ Átum uunt jeā jeamma núnisaitrume. Uunt jeā jeamtin, emka kaya apujtuktiniaiti jeā ti wewe atí tusa. Núnisan̄ yaunchu Yúsnan etserniusha tura Kristu akatramurj̄sha Yus-Chichaman etserainiak imiá nekas enentáimtustinia nuna apujtukarmiayi. Tura ashí nujaj̄ nankaamas Jesukristu enentáimtustiniaiti. ²¹ Jeā apujtukmarj̄ Kristu asamtai Nj̄j̄ ti penker ekeniar jeā jeamnaki wéawai. Tura ii Uuntrj̄ Krístujaj̄ Yusa Jeē ti shiir átatu. ²² Núnisrumek atumsha Krístujaj̄ tsaninkiu asarum átum ashí Yus-shuarjaj̄ Yusa Jeēya ántsan̄ ajasuitrume. Tura Yusa Wakanj̄ ashí Yus-shuara enentáin pujú asamtai nekas Yusa Jeēnte.

3

Papru Israer-shuarchanum Yus-chichaman etserkatniuya nu

¹ Nu asamtai atumin Israer-shuarchatirmin yáintaj tusan Jesukristunu étserkun sepunam pujajai. ² Yus anentak Yus-Chichaman atumin etserkatniun akatar akuptukuiti. Nu nékatsrumek. ³ Yus nuna túrutak yaunchu nekaachmancha paant awajtursamiayi. Núnaka ishichik áatraitjarne. ⁴ Nu áusjarum Krístunu yaunchu nekaachman yamaikia paant nékajna nu nekaatarme. ⁵ Nú chichaman yáunchusha chikichinkesha ujankachmiayi. Túrasha yamaikia Yusa Wakanj̄ Kristu akatramurj̄ncha etserniurj̄ncha nu chichaman paant awajtusarai. ⁶ Nu chicham j̄uiti: Uwempratin chichaman umirkar Israer-shuarcha Israer-shuarjaj̄ métek Krístujaj̄ tsaninkiaru ásar chikichik shuar ajasartatui. Tura nu arantcha Yus ni shuarj̄n ashí shíran tsan̄katkatniun anajmatrama nuj̄ métek pachiinkiatatui. ⁷ Yus ni kakarmarj̄jaj̄ winia yáintiuk tura ti anentu asa nu uwempratin chichaman etserkat tusa akaturmiayi. ⁸ Ashí Yus-shuarjaj̄ nankaamas wi penkercha aj̄n Israer-shuarchanum shiir chichaman etserkat tusa Yus tsan̄katrukmiayi. Krístujaj̄n̄kia kuitjaj̄ nankaamas penker, enentáimtustin jeatsjinia nu, takakji. Nusha ti shiir chichamaiti. ⁹ Yuska, ashí najana nu, nu enentáimmian yáunchusha etsertsuk yamaikia ashí shuar nu chichaman nekaawarat tusa winia akaturmiayi. ¹⁰ Yamaikia ashí nayaimpiniam pujuinia nuka Yus ni shuarj̄n̄ túrunamun ísar Yuska imiá neka asa ashí enentáimniua nuna paant nékainiawai. ¹¹ Yus j̄únis túratniun yáunchuk enentáimpramiayi. Tura ii Uuntrj̄ Jesukrístujaj̄ mash uminkiamiayi. ¹² Tura Krístujaj̄ Yusaj̄ yúpichuch jeaji. Tura Nin nekas enentáimtusar sapijmiatsuk Nj̄jn̄ tantamniaitji. ¹³ Tuma asamtai tájarne, atumin yáintaj tusan sepunam pujakuí kúntuts enentáimprairap. Antsu nujaj̄ Yus atumin ti shiir awajtamkurmin átum warasuk tusan wak-erajrume.

Kristu ti anenkratniuiti

¹⁴ Nu asamtai ii Uuntrj Jesukristu Aparin tikishmatran áujtajrume. ¹⁵ Ashí nayaimpinmasha tura nun̄kasha Yus-shuar ájiniá nu nekas ni shuari áiniáji. ¹⁶ Yus ti kakaram asa ni Wakanjijai atumi enentáin pujureak ashí ni kakar-marjyan atumin suramsarat tusan áujtajrume. ¹⁷ Yus nekas enentáimtakrumin Kristu atumi enentáin pujusat tusan áujtajrume. Tuke yapajítsuk anenkratin átarum tusan áujtajrume. ¹⁸ Túrakrum ashí Yus-shuarjai Kristu anenkrattairj nekaattarme. Imiá uunt asa nan̄kantsuk tuke amuukachminiáiti. ¹⁹ Nu anenkrattai ashí takamtsuk nekaachmin ajn̄ nekaatarum tusan áujtajrume. Nujaj Yus takamtsuk pimiutramkattarme.

²⁰ Nekas Yus shiir awajnasti. Ni ti kakaram asa ii seajnia nuna nan̄kaamas tura enentáimprachminia nunasha nan̄kaamas iin̄ pujurtamuk ashí túramniáiti. ²¹ Ashí Yus-shuarjajisha tura Kástujajisha Yusa pen̄kerj tuke paant wantinin atí. Yus tuke iniaitsuk shiir awajnasti. Núnisan̄ atí.

4

Yusa Wakanjijai tsaninkiar pujakur túratin

¹ Atumsha ni shuari ajastin Yus achikma asarum pen̄ker wekasatarum tájarme. Ii Úuntriniun étserkun sepunam pujakun seajrume. ² Nekasmiancha ajasrum aneniakrum katsunnairatarum. ³ Yusa Wakanj chikichik shuar awajtamkurmin shiir awajnisarum pujustarum. ⁴ Yusa Wakanjinka chikichkiiti. Tura ashí métek Yus achikma asar métek Niijjai shiir pujustin enentáimji. Iisha Kristu ayashí ayashimkia asar chikichik ayashkiitji. ⁵ Ii Uuntrj chikichkiiti. Niñki nekas enentáimtusar métek imiantiniáitji. ⁶ Chikichkiiti Yus, ashí Yus-shuarti ii Aparinti. Ashí akuptamniuitji. Ashí ni shuariin̄ pujak ii enentáin̄ pujurtamji. Ti nekas ashí mash, Israer-shuartaisha Israer-shuarchasha, imiá chikichik ajasuitji.

⁷ Tura chikichik chikichik niisháa shiir takastinian suramsaitji. Tura Kristu wakerimia núnisan̄ suramsaji. ⁸ Nu asamtai Yus-Papiniumsha tawai: “Achikman jukí nayaimpiniam wakamiayi. Tura shuáran shíran susamiayi.” Tu áarmaiti.

⁹ Tura “wakamiayi” tana nu ¿warintuia? Kristu nayaimpiniam pujá asa yakí wakan̄ka emka tárashtinkiait. Nekas nun̄ká taramiayi. ¹⁰ Niñki ataksha nekas nayaimpiniam wakamiayi. Nuna tura asa ashí ni shuarin̄ pimiutkarmiayi. ¹¹ Tura nujaj chikichan akatramun awajsamiayi. Chikichnasha Yúsnan etserniun awajsamiayi. Chikichnasha uwempratin chichaman etserniun awajsamiayi. Chikichnasha Yus-shuara wáinnium awajsamiayi. Tura chikichnasha unuikiartinian awajsamiayi. ¹² Túramtai ashí Yus-shuar ni takatrijjai yáiniákiar ti pen̄ker shuar ajainiakui Kristu ayashj takamtsuk katsuarartatui. ¹³ Nujaj Yus nekas enentáimtamunam Yusa Uchirj ashí métekrak pen̄ker nekaattaji. Nu túrakur katsukir Kástujaj métek pen̄ker ajastatji. ¹⁴ Tura uchía áintsar áhattaji. Úchikia ashí yamaram chichaman antukar wari yapajjiniawai. Tura anan̄kartinia chichamen antukar waaku áiniawai. Kame nu anan̄kartin shuar ti paant chichayatán ni shiir chichamejai anan̄katniun pujurenawai. ¹⁵ Antsu nekas aneniakur nekas chicham ujanaiktiniáitji. Túrar Kástujaj tsaninkiar tuke tsakakir ashí pen̄ker túratniujaj Niijjai métek ajastatji. Kástuka ashí ni shuari muuké áintsan̄kete. ¹⁶ Tuma asa ni ayashin̄ wáinkui ashí nuna muchitmarj pen̄ker

yáiniaikiar ashí ni túratniurin shiir takasartatui. Nujaj nu ayashnium mu-chitmarj chikich chikich péñker takainiak métekrak shiir tsakartatui. Tura anenainiakui nu ayashsha péñker úuntmartatui.

Krístujaj tsanin̄kiu asar yamaram iwiaakmanum wekaaji

¹⁷ Ii Uuntrj Kristu íimmianum juna akatjarne: Chikich aents Yúsan nékachu ásar ántar ni enentáimmiajajin̄ wekainia núnisrum wekasairap. ¹⁸ Ni enentáin̄ kusuru ániak Yusna nuna nekaatniun wakeruiniatsui. Tuma ásar shiir wekasatniun, Yus amaana nuna, nékainiatsui. ¹⁹ Nu arantcha, ni túramurijaj natsamtichu ásar ti yajauchiniam surumakar ashí tunaan wararainiak túrin ániawai. ²⁰ Antsu átumka núnisrum enentáimtustin unuimiarchamarme. ²¹ Nekas Nii anturkaitkiurmeka tura Jesus nekas tama Kristu unuiniarmaitkiurmeka Nin shiir enentáimtustin unuimiarmarme. ²² Yaunchu enentáimtaimka ayash wakeramu anañkramin ainia nujaj pi-aku asa imiá yajauchiiti. Nu enentáimtaimesha yaunchu túrutaimesha ajapa iniaisatarum. ²³ Túrarum péñker enentáimsarum wakannium yapajjatarum. ²⁴ Tura yamaram enentáimtairam emetatarum. Nuka Yusjaj métek najanamu asa nekas péñker tura shiira nuna tuke túriniaiti.

²⁵ Nu asantai chikichik ayashi muchitmarj asarum wáitrutsuk nekas chicham chicharnaisatarum.

²⁶ Kajeakrum tunáa túrawairap. Tura nu kajekmasha tsawant takamtsuk áchatniuiti. ²⁷ Uunt iwianch yajauch awajtamsatin tsañkatkaip.

²⁸ Kasasha kasamtsuk kakaram takakmasti. Tura ni uwejéjaj péñker takaak atsumainia nú shuarnasha susati.

²⁹ Mujiama chicham chichasairap. Antsu chichastin akui péñker chicham, chikich shuar péñker awajsamnia nu chichastarum. Anturtuinia nuna yáintaj tusarum nu chicham ujaktarum. ³⁰ Yusa Shiir Wakanj kúntuts awajsairap. Warí, Yúsnaiti tusa pujurtamji. Tura pujurtamuk takamtsuk uwemtikramprattaji.

³¹ Ashí yajauch ana nuyá kanaktiarum. Nakitratniusha, kajernaiki-atniusha, tura kakantrar charáa charáa ajatniusha, katsekmaktincha, tsanumpratniusha mash atsuti. ³² Antsu shiir awajkartin ajasrum waitnen-nairarum, Kristu jakamujaj Yus atumí tunaarin tsañkurtampra nútiksarmek tsañkurnairatarum.

5

Yus-shuar túratin

¹ Nekas Yusa Uchirj aneamu asarum Nii tura núnis túratin wakeruktarum.

² Kristu in anenmaj núnisrum anenaitiarum. Kame ii tunaarin akikmaktaj tusa jákatniunam surumakmiayi. Túramtai Yus shiir enentáimtsumiayi.

³ Yusna asarum tsanirnatniusha yajauch túratniusha tura jú nun̄kanmayan̄ ikiaun̄katniusha ishichkisha enentáimtuschatniuitrume.

⁴ Natsanmaincha, ántar chichamsha yainmakchamnia asantai chichaschatniuitrume. Antsu Yus shiir yumiñsatniuiti. ⁵ Shuar chikich nuwajaj tsanirmakka tura ashí yajauchin wakerakka tura jú nun̄kanmayan̄ ikiaun̄katniun wakerakka Yusaj Kristu akupea nuj pen̄ké pachin̄kiachminiati.

Kame ju nun̄kanmayan̄ ikiaun̄katin ántar-yus tikishmatratniua nujaj méteketete. ⁶ Nu túramniaiti tusar ántar chichamjaj anañkramacharti. Warí, nuna túruiniakui Yúsan umirainiachun Yus ti asutiáwartatui. ⁷ Tuma asantai nu shuar pen̄ké pachischatniuitrume.

⁸ Yáunchuka atumsha kiritniunam wekainiuyarme. Tura yamaikia Krístujaj tsaninkiu asarum péñker tsáapninium wekaarme. Shuar tsáapninium wekainia nujaj métek wekasatarum. ⁹ Tsáapninium wekainiaka shiir awajkartincha tura nekas chichamtincha tura péñker túrin ániawai. ¹⁰ Ii Uuntrj Krístu wakeramu nekaatin wakeruktarum. ¹¹ Kiritniunam wekainia nu túramu pachisairap. Antsu nu shuar tsáapninium enkeatarum. ¹² Ni uuk túruinia nu áujmatsatin natsanmajniaiti. ¹³ Tura ashí tsáapninium itiamu ashí paant ajawai. Tsáapnikia ashí paant awajeatsuk. ¹⁴ Nu asamtai Yus-Papinium tawai:

“Kanáruitme nu shintiártá. Jakamunmaya nantáktiá. Tura Krístu tsáapin awajturmastatui.”

Tu áarmaiti.

¹⁵ Nu asamtai átum túramu íimiastarum. Nékachu áintsarum pujusairap. Antsu péñker enentáimprarum wekasatarum. ¹⁶ Péñker túratin tsawant wasirkáip. Tunáa ti pampaatsuk. ¹⁷ Enentáincha áirap. Ii Uuntrj Krístu warinia wakera nu enentáimtustarum. ¹⁸ Nampekairap. Nampeakmeka aya yajauch ajame. Antsu Yusa Wakanj winia enentáiruñ takamtsuk pujurtusti, tu enentáimsatarum. ¹⁹ Túrarum Yus shiir enentáimtakrum Yus-kanta kantamkirum shiir áujnaisatarum. ²⁰ Ii Uuntrj Jesukrístu náarijjaj ashí irunna nu Yus Apa tuke yumiñsatarum.

Yus-shuar túratin

²¹ Yus-shuar asarum nuámtak umirnaikiatarum. Túrakrum Krístu shiir awajsattarme.

²² Núwaka Krístun umirna núnisañ ni áishrincha umirkatniuiti. ²³ Krístu ni shuarjñ akupeana núnisañ áishmañsha ni nuweñ akupkatniuiti. Krístu ni shuarjñ ayashimiak ni muuké áintsankete. Tura nin uwemtikartiniaiti. ²⁴ Nu asamtai Yus-shuar Krístun umirin ániawai. Núnisañ ashí ana nujaj nuwá ni áishrin umirkatniuiti.

²⁵ Krístu ni shuarjñ ti aneak nin yáintaj tusa jákatniun surumakmiayi. Núnisrumek áishmañtirmesha atumi nuwé aneatniuitrume. ²⁶ Krístu ashí ni shuarjñ ni Chichamejaj tura entsajaj nijjar ní shuar péñker árat tusa jakamiayi. ²⁷ Nujaj ashí ni shuarjñ tunaarinniuchu tura yajauch máatrachu antsu ti penker shiir awajas Niini éjetaj tusa túramiayi. ²⁸ Núnisañ áishmañ ni ayashjñ anea núnisañ ni nuweñ aneatniuiti. Shuar ni nuweñ aneak nujaj ni ayashjñ aneawai. ²⁹ ¿Yaki ni ayashjñ nakitniuit? Antsu péñker wáiniuk áyureatsuk. Krístu núnisañ ni shuarjñ wainiui ³⁰ ni ayashjñ asamtai. Kame ni ayashjñ muchitmarintji. ³¹ “Tuma asamtai áishmañ ni aparjñcha nukurjñcha ikiukin ni nuwejaj tsaninkiar chikichik ayashtin ajainiawai.” Tu áarmaiti. ³² Nusha Krístu ni shuarjjaj tsaninmáan tawai. Nuka yaunchu nekaachma yamaikia nekanaiti, tura ti enentáimturtniaiti. ³³ Tura núnisañ ashí áishmañtiram atumi nuwé atumi ayashjña nútiksarmek aneatniuitrume. Nuwasha ni áishrin umirkatniuiti.

6

¹ Uchitirmesha, Yus-shuar asarum apasha nukusha umirkatarum. Nuka ti péñkeraiti. ² Emka akupkamu “umirkam nekas shiir átatme” tana nu júiti: “Aasha nukusha umirkata.

³ Túrakmeka shiir átatme tura jú nuñkanam untsurj tsawant pujustatme” tawai.

⁴ Atumsha, uchirtintirmesha, atumí uchirj ánrarum akajkairap. Antsu Yúsán shiir enentáimtusarat tusarum ti péñker jintinkirum tsakatmartarum.

⁵ Takakmautirmesha, atumí uuntrj jū nunkanam pujuinia nu ti péñker umirkatarum. Kristu umirkatniua áintsarum wishiktsuk ashamakrum tuke enentáijjaj takarsatarum. ⁶ Aya wáitmakui shiir enentáimtusarum péñker takarsairap. Antsu Kristu takarniurja núnisrum ashí ame enentáimjaj Yus wakera nu túratarum. ⁷ Aya shuárnak yayá nútiksarum takasairap. Antsu ii Uuntrj Kristu takarsatniua nútiksarmek ásump enentáijjaj takastarum. ⁸ Kame chíkich chíkich ni takasmajaj métek akinkiertatui. Ii Uuntrj Kristu nu shuar péñker túramujaj métek akiktatui.

⁹ Tura atumsha, iniamniutirmesha, atumí takartamu wakaní mántutsuk shiir enentáijjaj iniartarum. Nekas enentáimpratarum. Ii Uuntrj nayaimpiniam pujana nuna niisha atumjaj métek umirainiawai. Tura Yuska ashí shuaran akantsuk métek iyawai.

Yusa kakarmarijjaj íwianch taritratarum

¹⁰ Wátsek, yatsuru, ii Uuntrj Yusjaj tsaninǰiu asarum ni ti kakarmarijjaj íwianchjaj máanaiktin kakaram ajastarum. ¹¹ Apach máanainiak jiru entsarua núnisrum Yus susamujaj entsartarum. Nujaj íwianch nupettamkui tariartatme. ¹² Kame Yusna takáa asar péñké áentsjaj máaniatsji antsu yajauch wakan kakaram írúnna nujaj máaniaji. Niisha jū nunkanam, kiritniunma áintsan, tunaanum wekainia nuna akupin áiniawai. ¹³ Jiru entsartinia áintsarum Yus súragna nu entsartarum. Nu entsarmajaj itiurchat tsawant taritra nupetkarum tuke tariarum wajastatrum. ¹⁴ Wats, nekas tariartin nekas chicham emenmamatarum. Tura péñker túratniujaj jatairum ajaktarum. ¹⁵ Suntar iwiarnak sapatan aweá áintsarum Yusa shiir chichame etserkatin iwiarnatarum. ¹⁶ Nuyasha ashí nankaamas, tantar takustinia áintsan, Yus tuke nekas enentáimtustarum. Nujaj íwianch ekeétrámkamusha uwemturtatme. ¹⁷ Múukem ajaktincha Kristu uwentikrampramu múukmǰin etsenkrukturum. Tura Yus-Chicham puniáa áintsan achiktatum. Nuka nekas Yusa Wakaní puniarǰinti. ¹⁸ Yusa Wakanǰjaj Yus áujeakrum tuke seatniuitrum. Tura tuke aneara pujustarum wake mesetsuk, tura ashí Yushuar ainia nusha Yus áujtustarum. ¹⁹ Núnisan winiasha áujtursatarum. Wi sepunam pujayatan Yus winia chichastinian surusat tusarum seatritiarum. Tura wi chichaakun sapijmiatsuk Shiir-chichaman yaunchu nekaachma paant awajsat tusarum áujtursatarum. ²⁰ Yus nu chichaman etserkatniun akuptukuíti. Nuna túrakun sepunam pujajaj. Sapijmiatsuk etserkat tusarum Yus áujtursatarum.

Amikmaamu

²¹ Ii aneamu yachj, Tíkikiu, ashí wi túramun ujatmaktatui. Niisha Ii Uuntrj Kístunu etserkatniun ti péñker yánniuiti. ²² Tuma asamtai ii juj pujamun ujatmak ikiantampraratusan akuptajrume.

²³ Yus Apasha tura ii Uuntrj Jesukrístusha ashí Yus-shuartermin anenmak shiir imiatkinchanum pujustinian suramsarti. Tura Nin tuke nekas enentáimtustinian suramsarti. ²⁴ Ashí ii Uuntrj Jesukrístun tuke enentáijjaj aneana nuna Yus shiir yáǰinti.

Nuke atí.

Papru JIRIPIUSNUMIA SHUARAN papí akuptukma

Papru sepunam pujus Jiripiusnumia Yus-shuaran áatramiania nu

¹ Wi Papru Timiutéujai Jesuskristu takarın asar ashí Yus-shuar Jiripius péprunam pujarmena nu ju papí akuptaji. Yus-shuaran wainin árumna nusha tura Yus-shuaran yain árumna nusha ashí Yus-shuarsha nunisan Yusna asarum tura Jesukristujai tsaninkiu asakrumin ju papí áateajrume. ² Yus ii Aparışha Jesukristu ii Úuntrişha atumin waitnentrmainia ásar imiatkinchanum tuke shiir pujustinian yainmakarti.

Papru Yus-shuaran Yúsan áujtawai

³ Ashí tsawant atumin enentáimtakun Yúsan tuke shiir yúminıkiajai. ⁴ Yúsan áujeaknasha ti warasan seatjarne. ⁵ Kame iikia yámankamtaiknumia Yus-Chicham métek yáiniáikiar iniaitsuk takasuitji. ⁶ Yus atumün ti péñker awasatniun nanıkama asa núnisan Jesuskristu táatsain tuke shiir awájtámki nekas péñker najatmattarme. Nuka ti nekasaiti. ⁷ Atumin ashí ti aneajrume. Kame wi sepunam pujakun Yus-Chichaman akasmatkun tura Yus-shuar kakararti tusan takaakui átum yáintiarme. Yus ti anenkartin asa nu túratniun mai metek tsankatrámkaitji. Tuma asamtai atumin júnisan enentáimtustin ti penkeraiti. ⁸ Jesukristu anenkrattairijjai wi atumin aneamun Yussa paant nékarui. ⁹ Yúsan áujeakun anearmena nú nanıkamaas anek tusan seatjarne. Tura nújasha ti neka ajasrum ¹⁰ ashí péñkera nu achikiuk tusan Yúsan áujtajrume. Atumin nu túrunamtainkia yamaisha tunájainchu pujustatume tura Kristu támatai sumamashtatume. ¹¹ Núnisan Jesukristu kakarmarijjai ashí péñker túrin átatume. Tura nújai ashí shuar Yúsan ti shiir enentáimturartatui.

Wi ju nunkanam aya Krístunak enentáimtakun pujajai

¹² Winin túrunamu itiurchat aın nujai uwempratin chicham nekas pampaawai. Nu nekaatarum tusan wakerajrume, yatsuru. ¹³ Iis, uunt akupniun suntarışha tura ashí shuarsha wi Krístunun etseru asan sepunam pujamun paant nékainiawai. ¹⁴ Ti untsurı Yus-shuar wi sepunam enketman nekaawar ii Uuntrişhan nekas enentáimtusar sapijmiatsuk Yus-Chichaman etserainiawai.

¹⁵ Kame shuar awai winia kajertuiniak tura nanıkamantu enentáimtumainiak Krístun páchiniawai. Antsu chíkich shuarka nekas enentáijjai Krístun etserainiawai. ¹⁶ Yajauch shuarka Krístun shiir enentáimtutsuk antsu ashí shuar ní chichamenak anturkar wı shuar ajasarat tusar etserainiawai. Túruiniak wisha sepunam pujakui nu arant itit awajtustinian wakerutainiawai. ¹⁷ Antsu péñker shuar Krístun nekas aneek etserainiawai. Nu uwempratin chicham imiá penkeraiti wi titin asamtai winiasha anentainiak shiir etserainiawai. ¹⁸ Wats, mai metek chíkich yajauch enentáijjai tura chíkich shiir enentáijjai Krístun etserainiakui shiir enentáimjai.

Tura nuna nanıkamaas shiir enentáimprattajai. ¹⁹ Kame Yus áujtursa asakrumin tura Jesukristu Wakanışha yaintiu asamtai ti péñker uwempran jiinkit-tijai. ²⁰ Nekas juna wakerajai: Natsamtsuk uunt akupniun Jesukristun

paant ujakartinian wakerajai. Nujai winí Kristu kakarmari pujamu ti paant nekanattawai. Mántuiniakuisha tura mántuiniachkuisha ashamatsjai. Aya Kristu kakarmarin winí nankaamas nekaawarat tusan wakerajai. ²¹ Wíjiainkia ju nunkanam iwiaaku pujakun aya Krístunak enentáimtakun pujajai. Tura jákatniusha jui pujajnia nuna nankaamas péñkeraiti. ²² Ju nunkanam pujakun Uunt Jesusnan takasminiaitjai. Nu asamtai tunatsuk achiktaj nékatsjai. ²³ Wíjiainkia iturchataiti mai achiktin. Jákatniuncha wakerajai Krístujai tsaninkian pujustaj tusan. Wíjiainkia nu imiá péñkeraiti. ²⁴ Túrasha atumin yáintaj tusan tuke ju nunkanam iwiaaku pujusminiaitjai. ²⁵ Kame tuke pujustatjai nékajai. Núnisnak atumjai pujakun Yus nekas enentáimtakrum nankaamas waraakrum tuke katsuaruk tusan yáintatjarme. ²⁶ Nu asamtai wi atumjai pujakui Jesukrístu yumínsarum shiir warastarume.

²⁷ Kristu chichame ti penker asamtai atumsha aya péñkera nuke túratarum. Wi atumjai pujaknasha tura yajá pujaknasha átum ti shiir túrarmena nuna antuktinian wakerajai. Ashí shuar uwempratin chichaman nekaawar umirkarat tusarum chikichik enentáijjai kakaram ajastarum. ²⁸ Atumí nemarisha ishichiksha sapijmiamtikramkarain. Nu túrakrumin nu shuar emesratniunam weena nusha tura átum uwempratniusha paant nekanattawai. Núnisan atí tusa Yus túrait. ²⁹ Krístunu asarum Nii nekas enentáimtustinnisha tura Niiniu asarum wáitsatniusha Yus anenma asa tsankatramkaitrume. ³⁰ Yus-Chicham pamparat tusar mainetek ti takáa asar wáitijai. Wi nuik ti takasmaj nu nekamarme. Tura yamá tuke takaaj nusha ántarume.

2

Kristu péjchach ajasmatai Yus ti uunt awajsamiayi

¹ Kristu ikiantamkuisha, ni anenkrattairi atsantamkuisha, ni Wakaní atumjai pujakuisha, anenkratniuitkiurmesha, waitnenkratniuitkiurmesha ² waramtikrustarum. Métekrak takastarum. Mai metek anenaitiarum. Yusa Wakaní atumí enentáin pujá asamtai chikichik enentáik enentáimsatarum. ³ Átum wakeramuk túrawairap. Nankaamantu ajastaj tírap. Antsu péjchach ajasrum chikich shuar atumjai nankaamas péñker enentáimtusta. ⁴ Aya níniak péñker átatna nunak shuar túrashti. Antsu chikich shuar yáinminia nuna túrati.

⁵ Kristu Jesus enentáimpramia núnisrum enentáimpratarum. ⁶ Niisha Yúsaitiat ju nunkanam winiak tuke Yusjai métek átinian emettsuk ⁷⁻⁸ antsu nuna ikiuak aents ajas péjchach asa ashí aentsu takarin ajasmiayi. Tura aentsu ayashin ayashimiak tura Yúsán umireak jákatniuncha surimiakchamiayi. Maa, imiá tunaarinnia áintsan krúsnum natsanmainium jakamiayi. ⁹ Túramtai Yus nekas nankaamantu awajsamiayi. Ni náarincha ashí paant awajsamiayi. ¹⁰ Tuma asamtai ashí nayaimpiniam írúnna nusha, nunká írúnna nusha, tura iwiansamusha Jesusa náarin antukar tikishmatrartatui. ¹¹ Tura ashí shuar Jesukrístu ashí akupin ajasman paant nekaawartatui. Nújainkia Yus Apá kakarmarisha paant nekanattawai.

Yus-shuar kiritniunam keeák tsáapin awajeana áintsan ániawai

¹²⁻¹³ Nu asamtai, aneamu yatsuru, wi atumjai pujakui umirtukmarmena nuna nankaamas yamaikia arant pujakuisha umirtuktarum. Iis, Yus

atumí enentáin takaak ni shiir wakeramu wakeruktinniasha tura umiktinniasha pujurtamprome. Nu asamtai atumsha kakaram ajastarum Yus ti penker awajtamsatniun wakera nu túrunati tusarum. Tura péejchach enentáimprarum awajirminiaitjai tusarum aneara wekasatarum.

¹⁴ Ashí yajauch tunaitsuk tura jianaitsuk wekasatarum. ¹⁵ Túrakrum makuumatsuk tunaajainchu áatrume. Antsu Yusa uchirí áatrume. Ju nunkanmasha shuar imiá tunaan túrinjaisha máatrachu asarum kiritniunam ji keeá áintsanketrume ¹⁶ iwiaaku pujustin chicham paant awajeakrum. Nújai Kristu támatai atumín antran takascha asan ti shiir wararsattajrume. ¹⁷ Winia takatrujai Yus-shuar ajasakrumin wi jákatniuitkiuncha nújaisha warasaintjai. Atumsha wi waraajna juí núnisrumek warastarum tusan wakerajrume. ¹⁸ Atumsha waraakrumin métek wararnaisatai.

Timiutéuncha Epaprutíiuncha Papru ujatkamiania nu

¹⁹ Ii Uuntrí Jesus wakerakuinkia Timiutéun írmainiarat tusan ti warik akuptuktatjarne. Tura átum shiir pujamu ujateaku warastatjai. ²⁰ Kame Timiutéu wijjai métek enentáimna áinis chíkich shuar atsawai. Niisha átum shiir pujusuk tusa ti nekas enentáimturmarne. ²¹ Chíkichka Kristu wakeramun iniaisar ní wakeramunak páchiniawai. ²² Túrasha átumka Timiutéu tuke pénger túramu nékarme. Uchi ni aparjjiai takaana áinis Yusa shiir chichame etserkatniun yáintkiaiti. ²³ Winia itiurtukartiñ nuna nekaan Timiutéu írmainiarat tusan akuptuktatjarne. ²⁴ Kame Kristu yáintkiui wíkisha wárik ímniaitjarne.

²⁵ Wi atsumaj nuna írsati tusarum Epaprutíiu akupturkamarme. Wijjai métek tsanin takasuiti. Tura métek wáitsaitji. Áunkesha akupkamnia enentáimjai. ²⁶ Nii jaawai taman átum antukman nekáa, írmaitniun ti wakerutmarne. ²⁷ Maa, nekas ti janinkiamai. Túrasha Yus nin waitnentramai. Kame winiasa wi juí wáitiakun nii jakamtaí nu arant ti kuntuts pujuschatniun waitnentrurmai. ²⁸ Tuma asamtai akuptuktinian wakerajrume. Tura atumsha ataksha wáinkiarum waraakrumin wisha ti kuntuts enentáimchakun akuptuktatjarne. ²⁹ Kristu yumñsarum ti shiir warasrum wáinkiarum. Chíkich shuar niijjai métek pénger Yus-shuar ainia nusha shiir enentáimtustarum. ³⁰ Kristu takatrin takaak ti janinkiamai. Átum yáintkiachminia nuna winia yáintkiataj tusa pujus janinkiamai.

3

Kristu nekaatin ashí nankaamas péngeraiti

¹ Ayu. Warastarum, yatsurtiram, ii Uuntrí Kristu ti penker asamtai nuik áatramajrum nuna ataksha títiatjarne. Ataksha ujam yainmakminiaitkiuinikia wíjjainkia itiurchachaiti atak enentáimtikratin. ² Yajauch shuarjai aneartarum. Nu shuar Muisais timia núnis tuke yamaisha tsupirnaktinaitrume tuiniawai. ³ Antsu iikia ayash tsupirnakmajai pénger átiniaitji tu enentáimtatsji. Iikia antsu ii wakanjjiai Yus shiir awajeaji tura Jesukristunu asar Niniki shiir wararji. Nu túrakur Muisais timia nu umintikia iitji. ⁴ Ju nunkanam írunna nujai waantu enentáimpramniaitkiuinikia ashí shuarjai nankaamas wikia waantu enentáimturmarintjai. ⁵⁻⁶ Israer-shuar asan Muisais timia núnisan wi akiiniamtai uchu (8) tsawant nankaasmatai tsupirtukarmiayi. Israer-shuarum Pinjamín weeaitjai. Winia aparsha nukursha mai Israer-shuar ániakui wi imiá Israer-shuaraitjai. Wisha Pariséu tuinia

núnisan Muisais akupkamun ti umirin asamtai chíkichka winia sumamtiki-atniun tujintrin ármiai. Tura Pariséu asan Kristu-shuarin ti kajerkan áinramjai. ⁷ Ashí nujainkia waantu enentáimtumauyajai. Antsu yamaikia Kristujainkia penké ántar ániawai tajai. ⁸ Ashí enentáimpramnia ákuisha winia Úntur Jesukrístu shiir enentáimtustin nekas péñkeraiti. Nu asamtai Kristunu ajakun wi takusmaj nu muijmiai ajasmatai núnaka iniaisamjai. ⁹ Nuna túran Niiijai tsaniñkian pujajai. Tura akupkamun umirkatniujai péñker ajaschaitjai antsu Kristun enentáimtakui Yus “péñkeraitme” túrutui. ¹⁰ Tuma asamtai ashí nankaamas wakeraj nu júiti: Kristun péñker nekaan nekas enentáimtustinniasha tura ni iniantkimiu kakarman takustinniasha wakerajai. Tura Niiijai métek ajastinian wakerakun ni wáitkiamunam tsaniñtinniasha tura Nii jakamia núnisan jákatniuncha wakerajai. ¹¹ Túraknaka Kristujai métek jakamunmayá nantaktiaj tusan wakerajai.

Papru kakaram ajasmiayi Kristu wakeramun umiktinian

¹² Kame wakerukuitjia nuna mash umirkachuitjai. Kristujai métek nekas péñker shuar ajaschaitjai. Túrasha Kristu Jesus “nuí ejetajam” emka túrutkui, wisha nuí jeataj tusan kakaram ajasan pimpitsuk takaajai. ¹³ Yatsuru, wisha nuí jeajai tátsujai. Antsu yaunchu túrutain kajinmatkin kakaram ajasan Kristu wakeramunam jeatniun takaajai. ¹⁴ Tura nuna umikmatai nayaimpiniam Jesukristujai tsaniñkian shiir pujustinian Yus surustatui.

¹⁵ Ashí shuar Yusjai katsuaru ájinia nu wi tájana núnis “jeachuitjai” tu enentáimpratniuitji. Tura “jeaitjai” enentáimkiurminkia Yus nunasha atak enentáimtikramprattarme. ¹⁶ Tura aneartarum. Naki pujutsuk jeajnia nujai métek umirkatin pimpitsuk takastiniaitji. ¹⁷ Yatsuru, wisha tura chikichcha wijií métek péñker túrajnia nu wáinkiuaram atumsha núnisrumek túratarum. ¹⁸ Tura yajauch shuarsha írunui. Wi nuiksha ti ujakmajrume tura ataksha útkun ujaajrume, nu shuar Kristu krúsnum jakamun muíjiainiawai. ¹⁹ Tuma ásar emesratniunam akupnakartatui. Ni ayashí wakeramun, ni yusrja áintsan, tuke umirainiawai. Natsanmainian túruiniayat wararainiawai. Tura ju nunkanmayanak enentáimtuiniawai. ²⁰ Antsu ilkia nayaimpinmayá shuar asar ii Uuntri Jesukrístu in uwemtikrampra asamtai nayaimpinmayá tatí tusar nákaji. ²¹ Nii taa, ii yajauch ayashin yapajjá ni ayashíjjai métek ti shiir awajsattawai. Ashí uunt akupin ajas nu kakarmajai túrutmattaji.

4

Kristujai tsaniñkia wekáa asarum warastarum

¹ Nu asamtai, aneamu yatsuru, ii Uuntri Kristujai tsaniñkiu asarum kakaram ajastarum. Maa, ti aneakun atumin enentáimtakun ti waraajai tura ístajrum tusan wakerajrume. Tawasap achikiar shiir enentáimsatniua núnisnak shiir enentáimtajrume.

² Ewautiancha tura Séntikincha, ii Uuntri Kristu shuarj ásar, mai metek enentáimsarat tusan seajai. ³ Amincha, winia airú, nu nuwá yáinkta tusan seajme. Niisha wi iwiaaku chichaman étsereakui wijií métek takasarmai. Tura Krimintisha tura chikichcha wijií métek takasarmai. Nuna náarin iwaaku átinnium Yus átraiti.

⁴ Nu asamtai Uunt Jesusjai tsaniñkia pujá asarum warastarum. Ataksha “warastarum” tájarne. ⁵ Uunt Jesus tátin ishichik ajasai. Tuma asamtai tsanika enentái takakrum nu paant nekanati.

⁶ Itiurchat enentáimsatin atumjaj penké atsutí. Antsu tuke Yus áujukum ashí itiurchatrum ujakta. Atsumamuram Yus seata. Túram Yus yumiņsata. ⁷ Nuiņkia atumí enentáj anĳant átinian, áentstikia penké nekaachminia nuna, Yus amastatui. Yus atumin anĳant awajtamsa asa atumí enentáin tura atumí enentáimsamurincha yajauch wayawain tusa shiir waitmaktatrome Jesukristujaj tsaniņkiu asakrumin.

Ashí péņker ana nu enentáimsatarum

⁸ Yamaisha yatsuru, júchiniak títiatjai. Yus-shuarti enentáimsatniun chichastatjai yamaikia. Ashí nekas ana nu enentáimsatarum. Tura ashí anturkamnia ana nusha, naka chicham ana nusha enentáimsatarum. Tura yajauch chichamsha enentáimsairap. Tura antsu ashí shiir ana nusha, chíkich shuarnasha péņker enentáimtusminia nusha, kame ashí péņker ana nu enentáimsatarum. Nuyásha chíkich shiir anturkamnia ana nusha enentáimsatarum.

⁹ Wi unuinarmajrumna nu umiktarum. Tura wi túramur íisurmena nu tura antukurmena nusha umiktarum. Túrakrumniņkia Yuska anĳant átinian amastaj tusa pujurtamsattarme.

Jiripiusnumiā Yus-shuar Páprun kuítian akuptukarmiania nu

¹⁰ Ii Uuntrĳ Kristu anea asarum winiasha ataksha enentáimturu asakrumin ti warajaj. Kame kajinmatrukmiarme tátsujaj antsu kuítium atsakui yáintkiatin tujinkiamarme. ¹¹ Tura kuítian atsumakun tátsujaj. Antsu wi takakjana nujain warastinian unuimiáruiťjai. ¹² Kuítinchati pujustinia nuna nékajaj tura ti nukap takustinia nunasha nékajaj. Tsukamaknasha jéemarnasha, itiarar takustinniasha tura penké takutsuk pujustinniasha unuimiáruiťjai. ¹³ Kristu ni kakarmarĳn surakuí ashí túramniaitjai. ¹⁴ Tuma aĳn atumsha wi atsumamu akupturkarum ti péņker túramarme.

¹⁵ Jiripiusnumiā shuartiram, ju ti péņker nékarme. Masetunia nuņkanam Yus-Chíchaman etserumtai aya atumek kuit akupturkamiarme. Wi etserkamujaj atumí wakanĳn yáinma asamtai yumiņsarum akupturkamiarme. ¹⁶ Atumek wi Tisarúnikia nuņkanam atsumakun pujajsha kuit akupturkamiarme. ¹⁷ Aya kuit akupturkakrumin tu enentáimsujaj. Antsu nu kuit Yusaj kawentramkaku tusan wakerajrume. ¹⁸ Epaprutíťuiťaj akupturkamarum nujajsha atsumamaj nuna nanĳkaamas tiaruncha wáinkiaťjai. Akupturkamarum nusha ti kuņkuin Yus susamua áinis ti shiir auyi. ¹⁹ Winia Yúsrusha ti péņkeran núkap takakuí. Atumsha Jesukristunu ajasu asarum Yus seamniaitrome. Tura Yuska ti takakna nujaj ashí atsumarmena nuna suramsattarme. ²⁰ Ii Aparĳ Yus tuke shiir atí. Nuke atí.

Amikmaamu

²¹ Winia náaruĳsha tura Jesukristu náarĳncha ashí Yus-shuar ainia nu chícham uťatructarum. Niisha shiir pujusarti. Wi írutramusha núnisaĳn shiir pujusarti tusa akupturmainiawai. ²² Tura ashí akupin Sésaraj pujuinia nuyá Yusna ajasaruka tura chíkich Yus-shuarsha shiir pujusarti tusa chichaman akupturmainiawai.

²³ Ii Uuntrĳ Jesukristu atumniasha ti shiir yainmakarti. Nuke atí.

írunna nunasha akupniuiti. ¹⁹ Yus ashí takamtsuk Kristují shiir pujumi-ayi. ²⁰ Núnisan Yus Kristu krúsnum jakamujají ashí nayaimpinmasha tura jú nunkanmasha írunna nuna Niijjají nawamnaikiar shiir pujusarat tusa wakerukmiayi.

²¹⁻²² Atumsha nuik tunáa túrin asarum atumí enentáin Yusa nemasri ámarme. Tuma asarum yajá wekaimiarme. Antsu Kristu, aentsu ayashín ayashimiak, krúsnum wáitias jakamujají ii tunaari asakármatai yamaikia Yusjají nawamnaikiar shiir pujaji. Nujají Kristu in péñker ajasuncha tunaan máatrachmancha tura sumamachuncha Yúsají ejetamtatji. ²³ Tuma asamtai Jesukristu shiir enentáimtusrum kakaram ajasrum katsuartiniatrum. Tura uwempratin chicham antukuitrum nuyá kanakchatniuitrum. Jú uwempratin chichaman ashí nunkanam etsernakuiti. Wisha, Papru asan, etserkatniun yaimjai.

Papru ashí Yus-shuaran yáinkratniuiti

²⁴ Atumin wáitiaknasha ti shiir waraajai. Kristu ni shuarin nekas péñker awajsat tusa wáitiana nuí pachiinkia asan waraajai. Ashí Yus-shuar Kristu ayashí áintsan áiniakui Yus-shuaran yáintajtsan ayashrujají wáitiakun shiir enentáimjai. ²⁵ Atumin yáinkiai tusa Yus akattur Yus-Chichaman takamt-suk ujakai tusa akuptukmai. Nuna takaakun ashí Yus-shuara yáintringjai. ²⁶ Yámankamtaiknumiá nekaachman Yus yamaikia ni shuarin paant awajsaiti. Nu chichamnasha ujakarai tusa winia akatar akuptukuiti. ²⁷ Nu chichamsha júiti: Kristu atumí enentáin pujak Niijjají métek tí shíiram awajtamsattawai. Nu imiá shiir chichamnum Israer-shuarchasha pachiiniainian Yus ashí ni shuarj nekawaarat tusa wakerimiayi.

²⁸ Iisha Kristu étseaeji. Túrar ashí enentáimtikrar péñker nekaawarat tusar jintintainiaji. Nujají Kristujají tsaniñkiar ashí péñker tsakarartatui. ²⁹ Tuma asamtai Kristu ni kakarmarin tí surakui nekas kakaram takaajai.

2

¹ Nekaatarum, yatsuru. Yus-shuaran yáintaj tusan ti takaajai. Tura atumincha, Rautiséanmayá shuarnasha, tura ashí winia waitcha ainia nunasha yáintaj tusan ti takaitjai. ² Ashí shiir enentáimtikratniun ti takaa-jai. Núnisan aneniarum chikichik enentáijjají métekrak wekasatarum tu-san wakerajrume. Nu arantcha, ashí Yusna ti péñker nekaarum tuke katsuaruk tusan takaajai. Nujají Kristu ti péñker nekaattarme. Tura yaunchu nekaachman Yus yamá paant awajsaiti. Nuka Kristuiti. Tura Nii nekaatin nekas shíiraiti. ³ Tura kakaram ajasam Kristu péñker nekaam ashí shiir enentáimprannia nusha tura ashí Yusna nekaannia nusha nekaat-tarme. ⁴ Atumin chíkich shuar niisháa chichamjají shiir chichartamas anankramawarajin tusan nuna tájarne. ⁵ Wi nuí atumjají pujachkuncha nuí pujajna áintsanak enentáimtajrume. Tuma asan átum métek enentáimprurum tura kakaram ajasrum Kristu nekas enentáimtururmena nuna ísnaka shiir enentáimjai. ⁶⁻⁷ Nu asamtai átum ii Uuntrj Jesukristu nekas enentáimtusrum Yus-shuar ajasmarmena núnisrum yamaisha Nii nekas enentáimtusrum Ni-ijjají tsaniñkrum ashí túratarum. Nu túrakrum Nii enentáimtakrum tuke tsakaki wétatrum. Tura te tariara wajasrum Yusjají kanakchattarme. Yus-Chicham núnisan etsernakmatai nekamarne. Tuma asarum Yus tuke yuminsarum, núnisan péñker wekasatarum.

Kristujají yamaram iwiaakma takakji

⁸ Aneartarum atumsha. Shuar aentsti enentáimmiajain ashí ju nunkanmayan enentáimprar tura Kristun enentáimtutsuk niisháa chichaman áujtamainiak nekaschajaj anankramataj tusa wakerutmainiawai.

⁹ Kristunam Yus ashí takamtsuk pujuwiti. ¹⁰ Túmakui atumsha Kristujaj tsaninkiu asarum ni iwiaakmarj takamtsuk takakuitrume. Kristusha ashí akupniun akupniuiti. Áentsnumsha iwianchniumsha tura nayaimpinmasha ashí akupin írunna nuna akupniuiti. ¹¹ Nu arant átum ayashnium tsupirnatskesha Kristu shuarj ajasakrumin ashí ayash wakeramun, tsupirkatniua áintsan, Kristu ajapamiyai. ¹² Tura atumsha Yus ni kakarmarijjaj Kristu jakan iniantkimia nu enentáimtusum imianmiarme. Túrarum Kristujaj métek iwiarnasmarme. Tura núnisrumek Kristujaj métek nantakmiarme. ¹³ Nuikkia átumsha tsupirnatsuk atumí tunaarj tuke akui atumí wakanjin jákauyarme. Tura yamaikia Jesukristujaj tsaninkiu asakrumin Yuska atumí tunaarj tsankur yamarum iwiaakman suramsaitrume. ¹⁴ Tura ashí ii tumashrin sumamtikramatin amia nuna japiruiti. Kristu krúsnum jakamtai ashí akupkamujaj sumamtikramamun tsankurtampramijai. ¹⁵ Núnisanj Kristu krúsnum jaka, iwianchnium ashí akupin ainia nuna nupetak ashí ímiainainj iniatsararmiayi.

Nayaimpiniam írunna nu enentáimtustarum

¹⁶ Akupkamunmayá Yus ankant awajtamsamtai chikich shuar ame túramujaj yajauch enentáimturmarain. Yúamna nujaj, úmamna nujaj, uwitinha, nantutinha, tura tsawantinha nampermam nujaj chikich shuar yajauch áujmatramkuisha ¿warí urukatin? ¹⁷ Nu nampernum Israer-shuar Kristu túrattana nuna nakumainiak túrin ármiai. Tura Kristu taa ímia Ninjki pujá asamtai nakumkamuka ántrai. ¹⁸ Tura shuar “Péejchach ajasam Yus áujtsuk aya Yusa suntarj shiir awajsatniuiti” túramkuinkia anturkairap. Nu shuar mesekranam wáinkiamun áujmatenak ántar nankaamantu enentáimtumainiawai. Aya aentsti enentáimian chichainiawai. ¹⁹ Tuma ásar Kristujaj tsaninkiar wekainiatsui. Kristu ashí akupin asa ni shuarin Yúsnan jintintia shiir tsakarar tusa péjker wáiniui. Nu arantcha ashí ápateak Yus wakerana áintsan chikichik awajeawai.

²⁰ Atumsha Kristujaj jaka asarum aya aentsti enentáimtai ikiukniuitrume. Nuikia ¿urukamtai ju nunkanmayá ana nu tuke páchiarum? Nii tuinia nu umirkashtiniaiti. ²¹ “Ju antinchatniuiti, tuiniawai. Ju yúashtiniaiti. Tura ju achikchatniuiti” tuiniawai. ²² Nusha ¿warí, takasam amuukashtatuak? Kame áyatik aents akupkamu áiniawai. ²³ Shuar nu akupkamu umiiniak Yúsnan ti nékaitjai tura Yus shiir enentáimturui tu enentáimtumainiawai. Nu arantcha péejchach ajasan winia ayashrun ti asutiájai tu enentáimtumainiawai. Túrasha ayash wakeramunka nupeteatsui.

3

¹ Nuikia Kristujaj nantakin asarum nayaimpinmayá írunna nu wakeruktarum. Nuj Kristu pujawai Yusa untsuurinj. ² Ju nunkanam ana nu enentáimtsuk aya nayaimpinmayá ana nu enentáimtustarum. ³ Atumsha Kristujaj tsaninkrum jakarmarme. Tuma asarum Kristujaj tsaninkrum Yusjaj iwiaaku pujarme. ⁴ Kristukete ii iwiaakmarj. Nii nayaimpinmayá wantinkiuisha atumsha Nijjaj métek wantinkiattarme. Tura Nijjaj métek ti penker átrume.

Yaunchu iwiaakmasha tura yamaram iwiaakmasha

⁵ Tuma asamtai ju nunkanmaya ana nu ajakratniua áintsarum iniaisatarum. Tsanirmatniusha, tunáa wakeruktincha, tura takakna nujaj nankaamas wakeruktincha ántar-yus tikishmatratniua áintsan asamtai iniaisatarum. ⁶ Shuar Yúsan umirtsuk aya nuna túrin ásarmatai Yus nin kajerak ti asutiáttawai. ⁷ Atumsha núnisrumek túriniuyarme. ⁸ Tura yamaikia jusha iniaisatarum: kajektincha, yajauch wakeruktincha, yajauch túratniusha, katsekmaktincha, yajauch chicham chichastincha, mash iniaisatarum. ⁹ Yushuar ajasrum yaunchu enentáimtairam iniaisarmarme. Tura yaunchu túrutairmesha iniaisaitrume. Tuma asarum nuamtak tsanumprunairairap tura wáitruawairap. ¹⁰ Yaunchu enentái, pushí mamuru áiktinia áintsarum, iniaisaitrume. Núnisrum yamaram enentái, shiir pushí entsartinia áintsarmek, wekasaitrume. Tura Yus nu yamaram enentáin najana asa ashí tsawant pujurtawai nuna nankaamas Nijjaj métek shiir atí tusa. Túramtai Yus ti penker nekaki wéjaji. ¹¹ Krístuka ashí írúnna nujaj nankaamas ashiyaiti. Niiniun pujurui. Tuma asamtai ashí ni shuari enentáin pujá asamtai nusháa enentáimtunairchatin áiniawai. Kriaku-shuarsha tura Israer-shuarsha, tsupirnakusha tura tsupirnakchasha, apachcha tura yajaya shuarsha, takarín ainia nusha tura ankan ainia nusha, Kristu ashí ni enentáin pujakui nusháa enentáimtunairchatniuiti.

¹² Yus atumin anenmak Niiniu arti tusa achirmakmarme. Túrutma asamtai jujaj shiir iwiamampratniua áintsarum tuke túrin atarum: waitnenkartin, shiir awajkartin, péechach átin, émtin áchatin, tura katsuntin átin. ¹³ Kristu atumí tunaarín tsankuramiam núnisrumek nuamtak tsankúrnáiratarum. Chíkich yajauch awajtamkuisha shiir katsuntram yapajniaitsuk tsankúrnáiratarum. ¹⁴ Tura ashí nankaamas anenaitiarum. Túrakrumka chikichik ajasrum mash pénger túrattarme. ¹⁵ Kame chikichik ayashtinia áintsarum ajastarum tusa Yus ni shuari ajasat tusa achirmakmarme. Tuma asamtai Yusa shiir atumí enentáin pujurtamsati. Nujaj Yus yuminsatarum.

¹⁶ Kristu shiir chichame atumí enentáin piakti. Nekas naka enentáimprarum jintinniaiyarum mai ikiakánai ajatarum. Yus kanta kantamárum tuke enentáijijaj Yus yuminsarum shiir awajsatarum. ¹⁷ Tura takaakmesha, chichaakmesha, kame ashí túramna nuka Jesukrístu shiir awajsataj tusam ni kakarmarjijajin túrata. Túrakum Krístujaj Yus Apa yuminsata.

Yus-shuar túratniua nu

¹⁸ Nuwátiram, atumí aishri umirkatarum Uunt Yus nuna wakerakui. ¹⁹ Áishmantiram, atumí nuwé aneatarum. Atumí nuwejaj kajernaikiairap. ²⁰ Uchitiram, ame apa nukusha tuke umirkatarum. Nu túrakrum Yus shiir enentáimtiksatarme. ²¹ Uchirtintiram, atumí uchiri ti kakantrairap. Ti kakanteamka uchisha ti kuntuts pujus pénger wekasatniun nakitchanpiash. Nu túrunawain untrarum ántarum atumí uchiri kakantrairap. ²² Takarniutiram, atumí untri shiir umirkatarum. Ju nunkanmaya uuntri ajin aya nii iimkiui shiir enentáimturati tusarum takaschatniuitrume. Antsu Yus enentáimtakrum tuke pénger takastiniaitrume. ²³ Ashí túramna nu asump enentáijijaj takakmasta. Aya aentsuk yáintinia áintsachu antsu nayaimpinmaya Úntrum yaya áitkiasrum takastarum. ²⁴ Ame Úntrum Kristu asa

nayaimpiniam ashí shiir takustinian tsan̄katramkattawai. ²⁵ Antsu tunáa túrin ni yajauch túramujai métek akinkiáttawai. Yus ashí áentsun métek iyawai.

4

¹ Únttirmesha, atumí Uuntri atumin wáiniuk nayaimpiniam pujatsuk. Tuma asamtai atumí yáinma jiatsuk péñker iniaitniaitrumé.

² Yus áujkuram Nii yumĩsarum asummiarum iniaitsuk áuj̄satarum. ³ Incha Yus áuj̄tustarum. Kristu-chicham yaunchu nekaachman yamáí étserkun sepunam pujajai. Tuma asamtai nuna shiir an̄kant etserkat tusarum áuj̄tursatarum. ⁴ Tura wi paant etserkatniuitiaj núnisan etserkat tusarum áuj̄tursatarum.

⁵ Yus-shuarchajai shiir túratarum Yus-Chichaman yajauch enentáimturain̄. Kakaram ajasrum tsawant ánrarum iniañkasairap. ⁶ Ti shiir chichamtin átiniaitrumé tura anturújamin átiniaitrumé. Núnisrum chíkich chíkich Yus-chicham paant ujaktin nekaattarme.

Amikmaamu

⁷ Ii aneamu yachi Tíkikiu ashí wínian ujatmaktatrumé. Niisha wijījai métek Yúsnan pimpitsuk ti pen̄ker takasuiti. ⁸ Nu asamtai ii jūj̄ pujajnia nuna ujatmak ikiantamprarat tusan akuptajrume. ⁹ Núnisan̄ ii aneamu yachi Unisemu niij̄jai winiawai. Niisha atum weéaiti, tura Yusj̄ai shiir wekaawai. Nu shuar ashí jūj̄ túrunamun ujatmaktatrumé.

¹⁰ Aristarku wi sepunam tsaniñkia pujamur amikmaatmarme. Núnisan̄ Markus, Pirnapi kaná yach̄ia nu, amikmaatmawai. Niisha nūj̄ jeamtai antukmarum núnisrum péñker wáinkiatarum. ¹¹ Justu Jesus náartin amikmaatmarme. Júchik áiniawai Rúmanmaya Israer-shuar winia Yúsnan etserkatin atutkaru ainia nu. Túmainiak ti shiir ayamtikruiniawai. ¹² Épaprassa, atum weeá, Krístunun etserin asa atumin amikmaatmarme. Niisha ashí tsawant Yúsán áujeak Yusj̄ai kakaarum tuke shiir Yus wakera nu túrak tusa seatramprume. ¹³ Wisha Épapas atumin ti enentáimturman nékajai. Núnisan̄ Rautiséanmaya shuarnasha tura Iarapurisnumiá shuarnasha ti páchiniawai. ¹⁴ Rukas, aneamu tsuákratin, núnisan̄ Témassha amikmaatmarme.

¹⁵ Tura Rautiséanam pujuinia nú Yus-shuarsha amikmaatruatarum. Núnisan̄ Nímpiassa tura ni jēen irunainia nú Yus-shuarsha amikmaatruatarum. ¹⁶ Átum jū papí áuj̄sarum umikrum Rautiséanmasha nuyá Yus-shuar áuj̄sarti tusarum akupkatarum. Tura atumsha núnisan̄ Rautiséanmaya papí támatái atumsha áuj̄satarum. ¹⁷ Tura jū Arkípiu titiarum: “Ii Uuntri Jesus ni takatrin̄ suramsa nu péñker umikta” tawai, titiarum.

¹⁸ Wi, Papru, winia uwejruījai júchiniak áatkun amikmaajrume. Sepunam pujajna jū enentáimturatarum. Yus shiir yainmakarti.

Nuke atí.

Papru

TISARÚNIKIANMAYA SHUARAN

Emka papín aar akuptukma

Papru ni tsaniakmarijjai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai Tisarúnikianmaya Yus-shuar ajasuitrumna nuna áatjarne. Atumsha Yus-shuar asarum Apa Yúsnaitrume, tura Uunt Jesukristunuitrume. Ii Apari Yus, tura ii Uuntri Jesukristu waitnentrana ásarmatai, ti shiir imiatkinchanum pujustarum, tu wakerajrume.

Tisarúnikianmaya shuar Yus nekas enentáimtusar umirkatniun jintintiarmania nu

² Iisha Yus áujkurkia atumniasha tuke enentáimtusar Yus shiir yuminsaji. ³ Atumsha Yus nekas enentáimtakrum umirkarumna nu nékaji. Núnisrumek, Yus aneakrum takaarme. Tura Jesukristu tatí tusarum tuke tsawant nákarne. Nu neka asar, ii Apari Yus áujkur, nusha ashí enentáimsar áujtajrume. ⁴ Yatsurú, Yus anenmarne. Anenma asa Winia arti tusa achirmakurmena nusha nékaji. ⁵ Enentáimpratarum. Iisha Yúsaj Uwempratin Chicham atumin ujakmajnia nusha aya chíchamjain tíchamji. Antsu nú arant, nu chicham nekasaiti tusar Yusa Wakanj kakarmarjijjai timiaji. Tura átum péñker matsamsarat tusar atumjai pujusar shiir iruntrar wekasarmiaji. Nusha paant nékarne.

⁶ Atumsha yamaikia íksarmek ii túramiaj nu, tura ii Uuntri Jesukristu túramia nu túrarme. Itiurchat ajñ Yus-Chicham umikiurme. Tura wáitiatrumek Yusa Wakanj shiir enentáimtikramkui warasrum pujarme. ⁷ Nu túrakrum ashí Masetúnia tura Akaya nunñanmaya Yus-shuarsha shiir wekasatin jintintiarne. ⁸ Tuma asarum Uunt Yusa chichame ti ipiamparurme. Tuma asamtai Masetúnia tura Akaya nunñanmaya shuar nuna nékainiawai. Tura nú nankaamas Yus nekas umirkarmena nuna ashí aents nékainiawai. Nuna nékainia ásar ii étserman atsumainiatsui. ⁹ Antsu átum in péñker itiaamun nii íksañ ujatmainiaji. Tura nuyasha ántar-yus enentáimtustin iniaisarum nekas iwiaaku Yus nekas enentáimtusurum umirkarumna nunasha ujatmainiaji. ¹⁰ Tura nuyasha Yusa Uchiri Jesus jakamunmayan Yus iniantkimia nu, nayaimpinimaya tatí tusarum átum nákamuncha ujatmainiaji. Iis, Jesus Niñkiti Yusa kajetáiri tsawantri jeattana nuyá uwentikrampratin.

2

Yus-chichaman paant ujakarmiania nu

¹ Atumsha nékarne, yatsurú, iisha ántar atumjñ jeachmaji. ² Antsu itiurchat wáinkiaitiatar arantutsuk shiir Uwempratin Chichaman ujakmajrume. Iis, nuik Jiripius péprunam incha katsekramkarmiaji. Tura nú arant, ti itiurchat wáinkiamiajai. Túmaitian Yus yáintkiui Yusa chichamen ujakmajrume. Nuka atumsha ti penker nékarne. ³ Warí, iisha Yus-Chicham atumin ujakmiaj nu nekasauyi. Tura yajauch enentáimsan, anañkatjarum tusan tíchamjarne. ⁴ Antsu Yus in péñker enentaimturmas Uwempratin Chicham etserkatarum tusa akatrampramiaji. Tuma asamtai núnisrik

étsereaji. Túrasha aya aents waramtiksatatai tusar étsertsuji. Antsu Niñki Yúsak ii enentáin nekartamin asamtai, shiir enentáimtiksatataisrar túraji. ⁵ Átumka nékarme, penkeshá shíirmach chichasan anan̄kachjarme. Nuyasha, kuit achiktai tusar ántarar chichaschamji. Núnaka Yus nékawai. ⁶ Iisha Kristu akatramurjntji. Tuma asar ni kakarmarjijai akupkatin takakuji. Páchitsuk túramniauji. Túrasha waantu ajastaj tíchamji. Nuyá atumsha tura chikichcha in waantu awajtamsataj tákuisha iikia nakitmiaji. ⁷ Antsu uchi kuírchin ni nukurj péñker iis tsakatmana áintsarik iikia atumniaka shiir ísmajrume. ⁸ Iisha ti shiir aneajrume. Tuma asar Yus-Chicham ujaktai tusar ti wakerukmaji. Tura aya ujakar iniaisatin wakerukchamji. Antsu ii jákatniuitkiursha iniaisachajai, atumín ti anea asar'. ⁹ Yatsurú, ii atumaj nu sumarmaktai tusar kakaram takakmasmaj nu ¿kajinmatkintrumek? Atsá. Nékarme. Iis, Yus-Chicham étsersuk, tsawajsha káshisha takasmiaji. Nusha, akirkata, tijj tusar takakmasmiaji.

¹⁰ Yatsurú, atumjai pujumiaj nu*j* iisha Yus wakerana nu túrimiaji, tura ya-jauch túrutsuk shiir wekasamiaji. Nujai incha chikichkisha yajauch chichartamkatniusha atumiayi. Nuka atumsha nékarme tura nú arant Yus nékawai. ¹¹ Tura atumniasha an̄kant an̄kant Yúsnum ikiakármajrumna nu nékarme. Tura uchin ni aparj átsan̄keana nútiksarik shiir enentáimtikramajrumna nusha nékarme. ¹² Tura Yúsjai shiir wekasatarum tímiajrume. Yus nan̄kaamas uunt asa ashí akupeawai. Tura Yus-shuaraitrumna nuna, Winin pachiinkiarat tusa, Yus untsurmarme. Yus untsurma asamtai Níiniuitrume. Niiniu asarum Yusa uchirja núnisrumek wekasatniuitrume.

¹³ Yus-Chicham ii étserma antukrum, aya áentsnumian̄chaiti tímiarme. Yúsnumiaiti tímiarme. Nu tiniu asarum umirkamarme. Kame nekas tárume. Ii étsersinia nu nekas Yusa chichamente. Átum nu chicham umirka asakrumin, atumí enentáin kakaram ajastinian amaawai, Yus-Chicham asa. Átum Yus-Chicham umirkaru asakrumin iisha tuke tsawant Yus yúmñikiaji. ¹⁴ Yatsurú, ju nekaatarum. Aya atumek wáitiatsrume. Ashí Jutía nun̄kanam Israershuar, ni shuarin̄ketiat, Yus-shuaran wáitkiascharmakia. Iis, Yus-shuaran Kristu Jesusan umirkaru ásarmatai wáitkiasarmiayi. Yamaikia atumniasha atumí shuarin̄ wáitkiarmainiawai. Nujai Jutía nun̄kanmaya Yus-shuarjai métekrak ajasurme. ¹⁵ Niisha Israershuaraitiatan̄ Yus-Chichaman etserin armia nuna nuamtaketiát máawarmiayi. Tura nú weeák Uunt Jesunasha máawarmiayi. Tura incha aa jiiki akuptamkarmiaji. Maaj, niisha Yúsán shiir enentáimtikiainiatsui. Tura núnisan̄ ashí áentsun kajerainiawai. ¹⁶ Warí, Israershuarcha Uwempratín Chicham ujaktaj tákurnisha niisha suritramainiaji. Nuna túruiniak yaunchu tunaan túriarmia nújain̄kia nan̄kaamas yamaikia túrawarai. Pai, túrasha yamaikia Yusa kajetairijí imiá tsumaj ana nu*j* pusarai.

Papru ataksha Tisarūnikianam irautajtsa wakerimiania nu

¹⁷ Iisha, yatsuru, ishichik tsawant atumjija kanakir jeachat pujayatrik, atumjajsha wáinniaiyachiatrik tuke ii enentáin̄kia enentáimtimjjarne. Tuma asar ataksha atumin iistai tusar ti wakerimji. ¹⁸ Nekas winitiaitsar wakerimji. Imia wikisha winitniun ti nukap enentáimsamjai. Tura iwianchi uuntri Satanás tuke nuna suritramniaji. ¹⁹⁻²⁰ Atumsha shiir wekasa asakrumin iisha ti shiir enentáimsar waraaji. Nu tuma asar Uunt Jesukristu tátintri shiir enentáimsar náka*j*i. Nii támatai imiá warastatji. Atumin Yus-shuar awajsa

asar, Nii támatai atumsha iijjaj Jesus shiir inkiuntatji. Tuma asamtai nu enentáimsar tawasap achiktinia áintsar waraaji.

3

¹⁻² Iisha ataksha atumin ístaitсар ti wakerimji. Tura tujintiakur iikia Atenas péprunam juákur ii yachi Timiutéu atumin írmainiarat tusar akupkatai, timiaji. Iisha Kristuj Uwempratin Chicham etsermiaj nuj, Timiutéuka iijjaj métek takasuiti. Tuma asa niisha Yusa takatrin takáa asa atumniasha Yusaj kakartarum turamarti tusar akupkamji. ³ Tura nú arant, itiur- chatan wáiniuk iniaisarajin tusa ikiakátmararti tusar Timiutéu akupkamji. Yatsuru, átumka nékarme, ashí Yus-shuaraitjinia nuka páchitsuk wáitsatniuitji. Iis, tuma asamtai atumsha ti nekas itiurchatnum pujarme, Yus-Chicham umirka asarum. ⁴ Iimiatarum, atumjaj nuik tuke pujumjinia nuj “iisha wáitsartatji” tíchamkajrum. Iis, túrunachaik. Nuka nékarme. ⁵ Tura atumin íwianch tunaanum ajunmarchariash tusan, wisha kúntuts enentáimsamijaj. Tura ánrar takaschajish tu enentáimsamijaj. Tuma asamtai nekaataj tusan ti wakerakun, wisha ti nukap tsawant nákaschamijaj. Antsu wárik Timiutéun akupkamijaj. Yúsajjaj péñkerash wekainia tusan, “nu inintrusam ikiuuta” timijaj.

⁶ Tura yamaikia Timiutéu Tisarúnikianmayá waketki tayi. Niisha taa, átum Yus aneakrum shiir enentáimtamuncha ujatmaj. Tura átum in anenma asarum tuke enentáimsar pujamuncha tura ii atumin ístaitсар wakerajnia núnisrumek atumsha incha írmaitiai tusarum wakeramuncha Timiutéu ujatmaj. ⁷ Tuma asamtai, yatsuru, ashí itiurchat tura wáitsatin wáiniatrik átum Yus shiir enentáimta asakrumin iisha shiir enentáimji. ⁸ Atumsha Yúsajjaj tariara weká asakrumin, shuar jaa péñker ajas enentáj chinkiana áintsarik enentáimji. ⁹ Yus péñker umirka asakrumin, iisha shiir waraaji. Warasu asar ii Yusri ti yúminjiaji. ¹⁰ Incha Yus akuptamkurninjia atumjijn timijajajk jeartiai tusar wakeraji. Túrar Yusna nekaatin mash nékatsrum nu jintintiatati tusa tuke ti seaji.

¹¹ Atumjijn weri ístinian ii Aparj Yussha tura ii Uuntrj Jesukrístusha in yáinmaktai tusar wakeraji. ¹² Atumin ii aneajnia núnisanj Yus atumniasha mai anenai ajatniun tura chikichcha aneastinian enentáimtikramprartí. Tura nú nukap anenkrattain Yus amasartí tusar wakeraji. ¹³ Yus ikiakátmakui átum tunáa túrutsuk Yus umirkarum wekasatarum tusar ii Aparj Yus seaji. Ii Uuntrj Jesus Níiniurijjaj winiak péñker wekaarmin tati tusar taji.

4

Péñker túratniun Yus wakerana nu

¹ Iikia Uunt Jesus akupkamuitji. Tuma asar nu kakarmajaj atumni-asha ju túratarum tusan akupeajrume. Atumsha iwiaaku pujarmena nuj Yus shiir waramtiksataram tura tuke péñker túrukum wetarum tusar seajrume. Iisha nuik atumin unuiniarmajrumna nútiksarmek túratarum. ² Uunt Jesusa akupeamurijjaj tura nu kakarmajaj atumniasha nuik unuiniarmajrumna nu átumka nékarme. ³ Atumin Yus wakeruntmarmena nu júiiti: “Shuar aya Winjin sumama pujusat tusan chikichkinesha shuar tsanirmaashti”. ⁴⁻⁵ Yus-shuarcha ainia nu, Yúsán nékainiachu ásar, aya ninjki enentáimtumasar aya ni ayashj wakeramunak umiktinian wakeru- iniak nuwan enentáimtuiniawai. Atumsha núnisrumek túrawairap. Antsu

atumsha atumí nuarí péñker enentáimtusrum shiir aneasrum ayastarum. ⁶Nú arant, amesha ame yatsum anankam ni nuarí yajauch awajtusaip. Nu túrakrumniñkia ii tímiajrumna nútiksañ Uunt Yus ti kakaram asutiámawartatui. ⁷Warí, Yus incha péñkercha yajauch túratarum turamchaitji. Antsu aya péñkerak túratarum turamji. ⁸Tuma asamtai shuar ju chichaman nakitiakka áentsun nakitiatsui, antsu Yúsán nakitraiti. Tura nu Yussha ni Wakanjñ amaawiti tunaan túrashiniana.

⁹Tura yamaikia nuamtak Yus-shuar aneniastin ana nuna ti neka asakrumin áatrashtatjarne. Warí, imia Niñki Yus atumin mai anenai ajatniun jintinramawarmatai nékarme. ¹⁰Iis nútiksarmek aneniatsrumek ashí Masetúnianam matsatainia nujai. Túrasha, yatsuru, atumí anenkrattairj nú nukap ajasti tusan, seajrume. ¹¹Yamaikia tímiaj nútiksarmek, yayauchin túruinia núj wekatsuk, chíkich shuarna pachittsuk, atumí takatrijñ shiir ankant pujusrum atumí uwejejain takakmá pujutarum. ¹²Átum táasaírurum tusan tájarne. Túrakrumniñkia atumniasha chíkich shuar péñker enentáimturmasartatui.

Kristu tátintri

¹³Yatsuru, Yus-shuarcha ni shuarj jakamtai “atakka wáinkiashtatjai” tusa ti kuntuts enentáimainiawai. Tuma asamtai atumsha nútiksarmek kúntuts enentáimsaírurum tusan júna tájarne. Jákaru ainia nu urukawartinkit paant nekaatarum. ¹⁴Jesus jákayat nantakchamkia. Núnisañ Yus Jesusan iniantkin Nin umirkar jákaru áiniana nunasha iniantkittiawai. Paant nékaji nusha. ¹⁵Tuma asamtai Yus-Chicham nekaprutamnia nuna atumniasha jintintiajrumne. Iisha tuke iwiaaku pujarin Kristu táakuisha jákaru ainia nuka ikiuakur émkishtatji. ¹⁶Antsu Yus akupeakui, Yusa suntarj uuntrj untsumkui tura Yusa kachurjñ umpuarmatai Uunt Jesukristu untsumuk Yus pujamunmayá tarattawai. Nuñkia Kristunu ajarar jákaru áiniana nu iwiaarsumunmayá nantakiartatui emka. ¹⁷Tura nuyá iisha Yus-shuar tuke iwiaaku pujajnia nu Kristujai yuranminiam ajapén inkiunaikiartatji. Nuní ashí nayaimpiniam ii Uuntrj Jesukristujai tuke iwiaaku pujusartatji. ¹⁸Tuma asamtai ju shiir chicham atumin ujakjana jujai mai ikiakánai ajatarum.

5

¹Túrasha, yatsuru, ni tátintri waritjñ tura warí tsawantai, nuka áatratin atsumatsrume. ²Ni tátintri júnis átin nékarme. Kiritniunam kasá shuar kasamkataj tusa tátatna nu nekaachminiaiti. Núnisañ náakatsuk pujuiniaj Uunt Kristu tsawantri jeattawai. ³Ashí shuar “Pai, yamaikia ti nekas shiir péñker pujuiniaji” tu matsatainiaj, aya aneachma nunka mesertin tsawant jeattawai. Nuwá ajamtin aya aneachma jatema áintsañ, nékachmanum átatui. Túmakui pisartin penké atsuttawai. ⁴Túrasha, yatsuru, átumka ujakmaitrume. Nu tsawant atumsha aneara pujarmin jeattawai. Atumsha aneara pujá asakrumin kasá áintsañ tarutrámashatui. ⁵Enta, átumka tsáapniniun wekáa asarum Yus-shuairmeka nékairume. Iikia kiritniumianchuitji. ⁶Nu tuma asar, chíkich uruka núnisrik, ii enentáin kanartinia núnisrik “Warí, winia itiurtawa” tíchami. Antsu naka enentáimsar anearmi. ⁷Iis, kashi kanarchatniukait. Tura nampeena nu kashi nampeenawai. ⁸Túrasha iikia shiir tsáapniniun wekainiaj nuka naka enentáimprar tuke nampetsuk pujustini-aitji. Suntar ni nemasri anankruawain tusa anear wekasatniuiti. Tura iisha núnisrik iwianch yajauch awajtamsajj tusar anearmi. Yus enentáimtusar

aneetniuitji. Tura núnisrik iisha, ju nunkanmayá uwemprar Yúsai tuke pujustatji, tu enentáimprar wetái. ⁹Páantchakait. “Jinium wéchatniuitrume” Yus incha túramji. Antsu ii Uuntrj Jesukrístujai uwempratniun tsan̄katramkaitji. ¹⁰Niijjai métekrak iwiaaku ami tusa Jesukrístu in jarutramkamiaji. Nu tuma asamtai iisha ii ayashijjai iwiaaku pujakrisha Niijjai iwiaakji, tura ii ayashijjai jáakrisha Niijjai tuke iwiaakji. ¹¹Tuma asamtai tuke túrarmena núnisrumek, shiir enentáimtiknaisarum mai ikiakánai ajatarum.

Papru Yus-shuaran jintintiamiania nu

¹²Yatsurú, juna seajrume. Atumjai pujuinia nú shuar Yúsna takamainiakui shiir enentáimtustarum. Jintinramuk chichartamainiakui umirkatarum. ¹³Yúsna takainia ásarmatai ti péñker enentáimtusurum aneestarum. Tura yajauch awajnaitsuk ti shiir nawamnaikiarum matsamsatarum. ¹⁴Tura junasha seajrume, yatsuru. Takastinian nakitiana nusha chicharkatarum. Tura yaweena nusha ataksha enentáimtikrarum ikiakárarum. Kakarmachu ana nusha yáintarum. Tura ashí shuarjai kajetsuk katsuntrarum wekasatarum.

¹⁵Aneartarum, yatsuru. Chikich yajauch túrutmantai amesha nútiksamek yapajkiaip. Antsu nuka túrutsuk átumka mai péñker awajnai ajatarum. Tura nú arant, ashí nunkanmasha ashí shuarsha nútiksarmek túrarum. ¹⁶Tuke shiir warasrum pujatarum. ¹⁷Tuke tsawant iniaitsuk Yus áusatarum. ¹⁸Péñker pujakmesha, itiurchat pujakmesha ashí warí wáiniam nujsa Yus shiir yumnsatarum. Kristu Jesusai Yus-shuar ajasutiram nu túratniun Yus wakerawai.

¹⁹Ji ikiajniaktinia núnisañ Yusa Wakaní enentáimin keana nuka tunaajai téenmantikiarum ikiajniakairap.

²⁰Yus jintinrar akupkamu asa péñker chichaman etserainia nu naki-trairap.

²¹Ashí etserkamu ana nu nekasashit tusarum nekaatarum. Túrarum aya péñker ana nuke achiktarum. ²²Ashí yajauch ana nuyanka kanaktiarum.

²³Yuska, imiatkinchanum wekasatin amaana nu, atumin takamtsuk shiir awajtamsarti. Tura ii Uuntrj Jesukrístu táatsain, atumi wakaní atumi enentai tura atumi ayashisha mash métek tunaajainchu awajtamsati. ²⁴Yus atumin untsurmakmarumna nu tímianak uminiaiti. Nii tana nuna yawetsuk túrattawai.

Amuamunam amikmaatin

²⁵Ashí yatsurtiram winiasha Yus áujtursatarum. ²⁶Ashí Yus-shuar árum nu, amikmaaniatarum. ²⁷Winia Uuntru Jesukrístu chichamejai juna tájarne. Ju papí ashí Yus-shuar antukarti tusarum ashí iruntramunam áusatarum. ²⁸Ii Uuntrj Jesukrístu atumin yáimákartí. Nu atí.

Papru

TISARÚNIKIANMAYA SHUARAN

Ataksha papin aar akuptukma

Papru ni tsaniakmarijjai Yus-shuaran áatramiania nu

¹ Wikia Pápruitjai. Wisha Serpanujai tura Timiutéujai iruntran atumin Tisarúnikianmaya Yus-shuar árumna nuna ju papin áatjarme. Atumsha ii Aparj Yusna tura Uunt Jesukristunu ajasuitrume. ² Tuma asakrumin ii Aparj Yus tura ii Uuntri Jesukristusha waitnentrama áarmatai yáinmakar péñker awajtamsarat tusan wakerajrume.

Kristu támatai tunáa shuáran Yus asutiátawai

³ Yatsuru, átum péñker matsatu asakrumin iisha Yus tuke yúmiñkijai. Átumka Yus nekas enentáimtustin nú núkap nekaakrum wéarme. Tura nuamtak aneniastincha nú núkap nékarme. Nu tuma asamtai Yus yumínsatniuitji. ⁴ Átum Yus-shuar asakrumin chíkich shuar atumin yajauch awajtamaini-awai. Tura itiurchat wainiu asarum ti wáitiarme. Nu tuma aijn átumka katsuntearme, tuke Yus enentáimta asarum. Nu tuma asakrumin, iisha Yus-shuar matsatainia nuka warasar ujainiaji. ⁵ “Yusa akupeamurjn pachiinkiamniaitrume” Yus túramprume. Nuñ pachiinkiatat tau asarum ju nuñkanam wáitiarme. Tura wáitiakrumsha nuna nankaamas iwiarnaruitrume nuñ pachiinkiatin. Kame nújainkia Yus atumin achirmak péñker túrait, nuka páantaiti. ⁶ Núnisañ atumin wáitkiarmainia nunasha Yus tímiatrusañ wáitkiasartincha nekas péñkeraiti. ⁷ Tura wáitiarmena nusha Yus íijjaisha ayantikramprartin péñkeraiti. Ii Uuntri Jesukristu ji keana ímianisañ kakaram suntarjijjai nayaimpinmaya tara wantinkiamtai, nu tsawantaj Yus ayampratniun suramsartatji. ⁸ Tura nú tsawantajsha Yúsan nékainiatsna núnaka ii Uuntri Jesukristu ti asutiátajtsa tátatui. ⁹ Taa, nincha menkkakatniunam akupkaratui. Chichaak “Wi pujajna juyá akupeajrume” titiatui. Tura winia ti kakarmar atsana nuñ akupeajrume, átum winia umirtukcha asakrumin” nin tiartatui. ¹⁰ Kame Uunt Jesukristu tátin tsawantri jeamtaí, ni shuarj, ni enentájpéñker awajrsaru áinia nu, ni náarjn shiir pachisartatui. Tura Yúsan umikiaru ásar, ti shiir enentáimsar Jesukristun ísartatui. Ii ujakmajrumna nu antukrum umirka asarum atumsha nuñ pachiinkiatarme. ¹¹ Nu tuma asamtai ii Yusrjn atumin tuke áujtajrume. Yus atumin achirmakuitrume. Nuñkia Yuska atumí enentájn takas Nii wakera nujaj métek awajtamsati, taji. Yus umirka asarum péñker wekasataj tusarum wakerarme. Túrarum Yus enentáimtusum péñker túratin wakerarme. Tura wakerarmena nu umiktin Yuska ni kakarmarjijjai yáintí, tu áujtaji. ¹² Átum péñker wekasa asakrumin chíkich shuarsha ii Uuntri Jesukristu náarjn nankaamantu enentáimtusartatui. Nusha auka ii Yusrj tura ii Uuntri Jesukristu waitnentáimturmasar péñker wekasatniun yáinmakui túarme. Túramtai chíkich shuar shiir enentáimturmasartatui.

2

Tuke Tunaarintin wantinkiattana nu

¹ Tura, yatsuru, ii Uuntri Jesukristu tátatna nuna tura Nijijjai inkiunaiktatjania nunasha ujaktinian wakerajrume. ² Chíkich shuar

anaṅkramawar “Uunt Jesukristu tsawantr̄i jeayi” tu ujatmaktaj tusar wakeruiniawai. “Iimiarmaj nujaj̄i nékajai” turamainiakuiṣha, “chícham étserman antukmaj nujaj̄i nékajai” turamainiakuiṣha, tura “Papru papí áarmar̄i nuna takui nékajai” turamainiakuiṣha, páchim enentáimprairap. Tura sapijmiakairap tusan seajume. ³ Penké anaṅnawairap. Nekaatarum. Nu tsawan jeatsaj̄n Yúsnumiā kanaktin átatui. Tura nú arant, Tuke Tunaarintin, emesnartatna nu wantinkiattawai. ⁴ Niisha aya wíniak enentáimtursarat tusa wakerak, ántar-yusnasha tura nekas Yúsasha shuar tikishmatraraj̄n tusa ti nakitrattawai. Niṅki ti naṅkaamantu enentáimtumas, Yusa nuke ajas, Uunt Yusa J̄een wayáa pujustatui. “J̄úiti Yus” shuar turutiarat tusa mash túrittawai. ⁵ Yatsurtiram, wi atumjaj̄i pujakun nuna ashí ujakmajrume. ¿Nuka kajinmakniurmek? ⁶ Yámaikikia, ni tsawantr̄i jeatsaj̄n, Tuke Tunaarintin wantinkiaj̄n tusa surimia nu nékarme. ⁷ Tunaasha yamaisha awai, tura paantcha. Túrasa tunaan surimia nu juramkitniuk taasai nu tunaaka paant átin. ⁸ Nuṅkia nu Tuke Tunaarintin wantinkiattawai. Tura Uunt Jesus ni wenejaj̄i umpuí aun máattawai. Tara ni wincharij̄jaj̄i nuna amuktatui. ⁹ Nu Tuke Tunaarintin, iwianchi uuntr̄i Satanás akupkam tátatui. Ni kakarmar̄i iniakmastaj tusa, aentsti túrachminian túrak anaṅkawartatui. ¹⁰ J̄inium wémin ainia nú shuaran ashí tunáa ana nujaj̄i anaṅkawartatui. Nu shuar Yus-Chichaman nekas ana núnaka nakitraru ásar uwemprachmin ániawai. ¹¹ Iis, nekas ana nuna nakitia ásarmatai, ti anaṅmamawar wait-chichaman umirkarat tusa Yuska tsan̄katkattawai. ¹² Warí, niisha ni tunaar̄in wararainiak, nekas ana nuna nakitraru ásarmatai, Yuska “j̄inium wétatrume” tiartatui nuna.

Uwempramin ainia nu

¹³ Tura, yatsuru, Uunt Jesus aneamu árumna nu, iisha atumin enentáimtusar ii Yusr̄i yuminsaji. Átum nekas ana nuka umikiurme. Tuma asakrumin Yusa Wakan̄i atumí enentáin pen̄ker awajtamsaitrume. Nu tuma asamtai yámankamtaikniumiā Yuska “átum uwempranniaitrume” túramprume. ¹⁴ Nu túrunat tusa Yus wakerutmarme. Krístujaj̄i Uwempratin Chicham ii ujakj̄inia nujaj̄i Yus untsurmakmarme. II Uuntr̄i Jesukristu ti pen̄ker pujana nuj̄i pachiinkiamniuram tusan ujakmajrume, nú chichaman.

¹⁵ Wátsek, yatsuru, Yusjaj̄i katsuq̄tarum. Yus-Chicham etserkamu antukurmena nu, tura wisha áaran akuptukjarmena nusha kajinmatkiirap. ¹⁶ Ii Uuntr̄i Jesukristusha tura ii Apar̄i Yussha ti pen̄ker ásar incha anenmatsjik. Tura waitnentrama ásar incha shiir enentáimtikramji. Tura nú naṅkaamas ii tuke pen̄ker pujustinian ikiurtamsaitji. ¹⁷ Nu tuma asamtai, pen̄ker chichastarum tusa, tura pen̄ker takastarum tusa Jesukristuka shiir enentáimtikramar ikiakátmarartí.

3

Papru “áujtursatarum” tímiania nu

¹ Nuyá, yatsurú, Yusa chichame shiir pampartí tusarum Yus áujtursatarum. Átum Yus-Chicham wakerukmarmena áintsan̄ ashí nuṅkanam wakerukartí tusarum Yus seatarum. ² Tura yajauch shuar, pen̄ker ana nuna ti nakitiainia nu, incha yajauch awajtamsachartí tusarum Yus áujkartustarum. Kame chíkich aents Yúsan umirkacharu ániawai. ³ Túrasa Uunt Jesusak atumin iniaitsuk wáitmaktatrume. Tura atumin ikiakátmartatrume. Tura iwianch

anaṅkramataj takui kíishturmaktatrume. ⁴ Kame Yus atumin yainmakta-trume, taji. Ii tájinja nu yamáí umíarme. Tura tuke umirkattarme. Nusha nekaar shiir enentáimji. ⁵ Uunt Yus yainmakartí ni anenkrattairin nekaat-niun. Kristu itiurchatan katsuntramia núnisaṅ atumniasha katsuntratniun Yus yainmaktí.

Takastiniaitji

⁶ Yatsurtiram, antuktarum. Ii Uuntri Jesukristu chichamejai ju taji: “Nuyá Yus-shuar wi jintinramun nakitiak aya wékana nu ikiuktiarum.” ⁷⁻⁸ Ii túrajnia núnisrumek túratin nékarme. Júiti: atumjai pujumaj nuí tuke takakmasmiaji. Atumí yurumkarí iisha akikmakar yurummiaji. Atumjai itiurchat áchatí tusar tsawajsha káshisha tuke takakmasmiaji. ⁹ Kame iisha, Kristu akatramu asar “yáintkiatarum” tíminiuji; túrasha nu tútsuk, ii túrajnia núnisrumek túratin nekaatarum tusar, iisha tuke tsawant takaamiaji. ¹⁰ Warí, atumjai pujumiaj nuí “Takastinian nakitiana nuka yurumáshti” tíchamkaji. ¹¹ Iis, atumjinja weeá, nánkamas enentáimiainiak tura nánkamas túruiniak penké takatsuk pujuiniawai, túramainiaji. ¹² Nú shuáran ii Uuntri Jesukristu chichamejai “Tákamtak shiir takakmasartí” tajai.

¹³ Yatsurtiram, yawetsuk shiir túratarum. ¹⁴ Ju papinium ii tájinja nuna, shuar umiktinian nakitiakuinikia “umichuiti” tákuram, ni natsarat tusarum ikiuktiarum. ¹⁵ Túrasha “Yus-shuara nemasrinti” tiip. Áyatik jintintrata, tura Yúsaj enentáimtikrata, ame nekas yatsumeá áitkiasmek.

Papru aujsua ikiuamu

¹⁶ Uunt Yuska, imiatkichu enentái susamniaiti. Jú Yus, itiurchatnum pujarminiṅ atumin tuke imiatkichu enentáimtikramsartí. Uunt Yuska atumin pujurtamsartí, tajai.

¹⁷ Juí wi Papru juna aajai. Wi papin akupeaj nuí júnisnak winia náarun áaran apujeajai, wíniaiti tusan. ¹⁸ Ii Uuntri Jesukristu atumin ashí yainmakarat tusan wakerajrume. Nu atí.

Papru TIMIUTÉUN Emka papin aar akuptukma

¹ Wi Papru Jesukristu akatramurintjai. In uwemtikkiartin Yussha tura ii Uuntri Jesukristusha winia akuptuku ániawai. Jesukristujai métek ti shiir ajastai tusar nákJai. ² Timiutéu, ju papin áateajme. Wi ujakam Yus-shuar ajasu asam nekas winia uchirua áinkiaitme. Tuma asakmin Yus Apasha tura ii Uuntri Jesukristusha ti anenma ásar waitnentramainiak imiatkinchanum ti shiir pujustinian yainmakarti.

Wait chichamjai anearta

³ Masetúnia nunċanam wéakun “Ipisiu péprunam pujuuta” timiaj núnisnak tájame. Shuar nuċ wait-chichaman jintin ainia nu suritkiarta. ⁴ Niisha Israer-shuara weatrin áujmatsamunak tura ni weatři naari ti untsurċ irurtinniak Yus-Chichamjai nanċaamas enentáimtuiniawai. Nunak áujmatsar tuke ántar tuiniawai. Nu túramuka Yus enentáimtusar Nin shiir umirkatniun yáinmatsji. Tuma asamtai nusha surítkiatá.

⁵ Yus-shuar tuke enentáijċai Yúsan shiir enentáimtusar tura tunáa túrtsuk aya péŋkera nuna wakerukar anenċartin ajastin ániawai. Núnisan péŋker ajasat tusar Yus-Chicham étsereaji. ⁶ Chíkich shuar juċa iniaisar ántar chichaman áujmatainiawai. ⁷ Yúsnan nékachiát “jintinniuċtai” tuiniawai. Tura unuiniainia nuna nékainiatsui.

⁸ Yus wakeramun nekaatin tura tunaan suritkiatin akupkamuka nekas péŋkeraiti. Nu paant nékJai. ⁹ Kame akupniuka péŋker shuaran itit awajsatniun akupenatsui. Antsu yajauch shuar juċa túrin ainia nuna itit awajsatniun akupenawai: Tunáa shuarnasha, umichuncha, Yúsnasha tura ashí Yúsnancha nakitiainia nunasha, aparin máinniasha, nukurin máinniasha, kame manċartinniasha, ¹⁰ nuwanċa tura áishmanċasha tsanirma áinia nunasha, shuaran kasamak juu ainia nunasha, wáitrinniasha, tsanumniuncha, ashí nuna itit awajsatniun akupenawai. Kame ashí péŋkercha nuna iwiaratniun akupenawai. ¹¹ Núnisan tawai ti shiir uwempratin chicham Yus suramsamajnia nu. Nu chichamnaka etserkatniun Yus péŋker asa tsanċatrukuiti.

Yus waitnenċartin asamtai Papru yuminsamiayi

¹² Ii Uuntri Jesukristu shiir enentáimturu asa Niiniun etserturkat tusa kakarman surusuiti. Túruta asamtai yúmiŋċiajai. ¹³ Wi Yúsan imiá yajauch chicharniuċajai. Yus-shuarnasha áintrarmiajai. Yusnasha katsekniuyajai. Túrin aċu Yus winia waitnentrumiayi. Kame Jesuska Yus Anaikiamun nékachu asan wi túramu yajauchiiti tu enentáimċauyajai. ¹⁴ Tura ii Uuntri Jesukristu ti nekas waitnentrumiayi. Tura Jesukristujai tsaninċia pujakui Yus nekas enentáimtustinniasha tura anenċartin ajastinniasha surusuiti.

¹⁵ Juċ chicham ti nekasaiti. Tunáa shuáran uwemtikrataj tusa Jesukristu ju nunċanam taramiayi. Nunasha ashí shuar nekaatin ániawai. Tura wikia ashí shuarċai nanċaamas tunáan túriniaċitjai. ¹⁶ Ti tunáa aċu Jesukristu ti anenċartin ana nu paant nekanati tusa Yus winia waitnentrumiayi Tuma asamtai chíkich shuar, wijiċai métek, Yúsan nekas enentáimtusar Niijċai tuke

iwiiaaku pujusartatui. ¹⁷ Yus tuke jacha asa tuke iniaitsuk akupniuiti. Wáinchataitiat imiá nan̄kaamas nékaiiti. imia Niñki Yúsaiti. Tuma asamtai imia Niñki tuke iniaitsuk ti shiir awajsatniuiti. Núnisañ tuke ati.

¹⁸ Uchiru, Timiutéu, yáunchuya Yus-shuar ámin “Jü shuar péñkeran túrattawai” túrarmia nútksam yamaikia kakaram ajástá. Nii timia enentáimsam suntara áintsam Yúsna kakaram takastin asumprurta. Nuna tájame. Tura Yus tuke nekas enentáimtusam tura tunaan túrawajj tusam anearam túrata. ¹⁹ Chíkich shuar tunaajaj anearcharu ásar Yúsan ikiukiarmái. ²⁰ Iminíusha tura Arejántrusha núnisañ Yúsan ikiukiarmatai uunt iwianchnium surukarmajai. Nujaj Yúsan ti yajauch chicharsacharat tusan túraitjai.

2

Yus áujساتin

¹ Wátsek, emka seajrume Yus áujeakum Yus yumĩnsam ashí shuar yaiñkiat tusam áujtusarta. ² Imiatkinchanum pujusar Yusjajisha tura áentsjajisha shiir túratai tusar tura ashí akupin ainia nusha péñker akupkarat tusar Yus áujtustiniatiji. ³ Áitkiasar seatin péñker asamtai, uwemtikramajnia nú Yus wakerawai. ⁴ Ashí shuar nekas chichaman nekaawar uwemprarat tusar wakerawai Yus. ⁵ Aya chíkichik Yus awai. Tura Jesukrístu aents ajas Yusjaj áentsun nawamnaimtikartiniaiti. ⁶ Ashí shuara tunaarjĩn akikmatkataj tusa jákatniunam Jesukrístu surumakmiayi. Tura tsawant jeamtai nu chicham ashí shuarnum etsernaktiniuyi. ⁷ Nuna túratniun Yus wĩnia akatar akup-tukuíti. Israer-shuarcha nekas chichaman enentáimtusarti tusa Yus akuptuk-miayi. Krístunu asan wáitrusuk nekas tajai.

⁸ Nu asamtai áishman̄kka kajetsuk yajauch tunaitsuk antsu péñker enentáijjaj uweje takuiniar Yúsan áujsarti. ⁹⁻¹⁰ Núnisañ núwaka iwiarmamuk nekasmiancha péñker enentáijjaj entsararti. Chíkich shuar nu nuwãĩn iis temashmarmarĩncha, sháukrĩncha, kurimkiamuncha, iwiarmampramurĩncha núnaka enentáimtusuk antsu ni péñker túrunamun enentáimtusarti. Núnisañ áchatniukait nuwã Yús-shuar ainia nujaj. Ni péñker túramujaj nekas shiir awajmamsashtinkiait. ¹¹ Núwaka takamtak pujusar umiiniak unuimi-ararti. ¹² Nuwãnka ashí iruntramunam unuiniartinniasha tura ni áishrĩn akupkatniuncha suritijajai. Antsu takamtak pujustiniaiti. ¹³ Yus emka áishman̄kan Atan̄kan najanamiayi. Nuyá nuwãĩn Épan najanamiayi. ¹⁴ Tura Yus timian umirkach Atan̄ka anan̄nachmiayi. Antsu Épa anan̄na asa tunaan túramiayi. ¹⁵ Túmaitiat jurertin asa, emesnartinniumiã uwempraiti. Tura Yúsan nekas enentáimtak anen̄kartiniaitiuk tura esetar enentáimuk péñker wekasatniuiti.

3

Yus-shuaran wáinin

¹ Shuar Yus-shuaran wáinkiatniun wakerakka péñker takatan achikiuiti. Nuka nekasaiti. ² Tura Yus-shuaran wáinin ajastinian wakerakka chíkich shuar nin yajauch áujmattsachmin átiniaiti. Nuwá apatka áchatniuiti. Ni-isha péñker esetar enentáimin naka wekasatniuiti. Íraran ni jeen ti shiir itiaatniuiti. Péñker jintinkratin átiniaiti. ³ Nampechusha tura suiir enentáimtichusha átiniaiti. Aya kuítian ikiaun̄katniun enentáimtuschatniuiti.

Antsu tsan̄ka átini*ai*ti. Kajechusha átini*ai*ti. Chikichnancha wakerutkash-tini*ai*ti. ⁴ Ni shuar̄in shiir akupeaku*i* ni uchir̄isha umin tura shiir awa-jkartin ártini*ai*ti. ⁵ Kame ni shuar̄in akupkachmini*ai*ti kiun̄ka çitiurak Yus-shuaran wáinkiat? ⁶ Yus-shuaran wáinniuka yama Yus-shuar ajasu áchatni*ui*ti. Túmaitkiun̄ka ti nan̄kaamantu enentáimtumak iwianchjaj̄i métek tunaan túrak sumamattawai. ⁷ Yus-shuarchasha nin shiir enentáimtustin áni*ai*wai. Núnischaitkiuin̄kia nin yajauch chicharainiakui íwianch wárik tunaanum ajuartatui.

Yus-shuaran yain

⁸ Núnisan̄ Yus-shuaran yaincha péñker asamtai ashí shuar nin shiir enentáimtustin áni*ai*wai. Nii tana nuna tímatusan̄ umin átini*ai*ti. Nampechu átini*ai*ti. Aya kuítian ikiaun̄katniun enentáimtuschatni*ui*ti. ⁹ Yúsnan ti péñker nekaatni*ui*ti. Tura esetar enentáimsatni*ui*ti. ¹⁰ Emka péñker ístini*ai*ti nuyá péñker wekaakka Yus-shuaran yain átini*ai*ti. ¹¹ Nuwasha péñker asam-tai ashí shuarsha nin shiir enentáimtustin áni*ai*wai. Tsanumniuchu antsu esetar enentáimiar nii chichaa ímiatrusan̄ umin átini*ai*ti. ¹² Yus-shuaran yainkia nuwan̄ apatkachu átini*ai*ti. Tura ni uchir̄incha ni shuar̄incha ashí shiir akupin átini*ai*ti. ¹³ Yus-shuaran yayak nekas péñker takaakka shiir enentáimtusmin asa páchitsuk Kristu Jesus enentáimtamun arantsuk etserkam-i*ai*ti.

Yusna ana nu imiá nan̄kaamas péñkeraiti

¹⁴⁻¹⁵ Wárik ítniun wakerajme. Túmaitiatnak sétaknasha Yus-shuarjaj̄i takastin nekaak tusan̄ juna áatjame. Ashí Yus-shuar, iwiaaku Yusna ainia nu, nekas chichaman tuke emetawar akasmataini*ai*wai. ¹⁶ Maa, imiá nekasaiti, Yus iwiainturmakma ashí nan̄kaamas ti péñkeraiti. Tura júi*ti*:

Yuska aents ajas jú nun̄kanam paant wantinkiami*yi*.

Yus Wakancha “ti shiiraiti” Nin tími*yi*.

Yusa suntar̄isha Nin wáinkiar*mi*yi.

Ashí nun̄kanam nu etsernak*mi*yi.

Túramtai ashí nun̄kanmaya shuar umirkar*mi*yi.

Tura nayaimpiniam waketkimi*yi*.

4

Amuukatin tsawantin

¹ Yusa Wakan̄i ti paant tawai, amuukatin tsawant jeaku*i* untsurí aents Yus enentáimtustinian iniaisar antsu yajauch wakanin nemarsar íwianch jintíamun anturkartatui. ² Yajauch shuaran anturkartatui. Nu shuar ni enentá*i* narúa ánin ásar ni tunáa túramun penk*e* enentáimtichu áni*ai*wai. Tuma asa shiir chichainiayat̄an wáitrin áni*ai*wai. ³ Nu shuar nuatnaikiatniun suriti-aini*ai*wai. Núnisan̄ chíkich chíkich yurumak yúatniuncha suritiaini*ai*wai. Warí, Yus ashí yurumkan najana asamtai Yus-shuar nekas chichaman nékainia ásar Yúsan yumĩnsar páchitsuk yuámin áni*ai*wai. ⁴ Ashí Yus najanamu péñker asamtai nakittsuk antsu Yusan yumĩnsar yúatni*ui*ti. ⁵ Yus-Chicham tana nújaj̄isha tura yuiniak Yúsan yumĩnkias áuj̄samuj̄aj̄i ashí péñker ajasu*iti*.

Jesukristu péñker takar̄in

⁶ Wi tájamna nu chíkich Yus-shuar jintintiakmeka Jesukristu péñker takar̄in átatme. Tura ashí Yus-Chicham péñker jintíamu unuimiaru asam nuj̄aj̄i kakaram ajastatme. ⁷ Antar chichamsha tura netse chichamsha

enentáimtutsuk nekas Yusna ana nu túratin kakaram ajasta. ⁸ Kame ayash kakaram awajsatniusha ishichik péñkeraiti. Antsu Yusna nu túratin kakaram ajastinkia imiá péñkeraiti. Yamái ju nunñanmasha yáinmaji tura ukunmasha Yusjaj pujustin asakrin nanñkaamas péñkeraiti. ⁹ Nu imiá nekas asantai ashí shuar nuna enentáimtustiniaiti. ¹⁰ Nekas iwiaaku Yus ashí shuaran uwemtikramniaiti, tura ashí Nin enentáimtuinia nú shuaran nekas uwemtikratniuiti. Nu chicham imiá nekasaiti tu enentáimtakur katsekramainiakrincha kakaram takaaji.

¹¹ Nuka ashí ame jintiakum akupkatniuitme. ¹² Ti úntchaitkiumnisha nakitramprarajñ. Antsu péñker túrakum Yus-shuar unuiniarta. Chichammijjajsha, túramurmijjajsha, enekratmarmijjajsha, nekas Yus enentáimtamujajsha, tura esetra enentáimsam Yusna péñker túramujajsha niisha túrawarat tusam iniaktusarta. ¹³ Wi jeatsajñ Yus-Chicham áujeakum shuar jintintiata. Túram Yus-shuar ikiakárarta. ¹⁴ Yus-shuara uuntri Yúsnan takastin anaitiamak uwején awantramsarmái. Nuna túramainiak “Ju shuar kakarman Yúsnumiñ takustatui” túramarmia nu, kakaram ajasam tímatrusam túratá.

¹⁵ Tuke enentáimjaj wi tájamna nu enentáimtakmin ame péñker túruki wéamun nekaawartatui. ¹⁶ Túramna nusha tura unuiniamna nusha péñker wáinmankata. Nu túratin pimpikiip. Nu túrakmeka uwemprattame amesha tura ujainiam nusha uwemtikrattame.

5

Yus-shuarjaj itiur túratniuit

¹ Uunta nu kakantraip. Antsu nekas ame apa nútiksamek chicharkata. Nátsasha nekas ame yátsumea nútiksamek shiir awajserta. ² Nuwá úntchisha nekas ame núka nútiksamek shiir awajserta. Nuwá nátsasha nekas ame uamainia nútiksam shiir enentáimjaj péñker awajserta.

³ Wajé nekas atsumin ainia nusha yáinñkiarta. ⁴ Tura wajé uchirtini-aitkiuñkia tura tiranñrinniuitkiuñkia, nu shuar wajén wáinkarti. Emka ni shuarjñ péñker wáinkiatniun unuimiararti. Ni aparj anemia núnis awañtuiniak shiir wáinkarti. Núnaka Yus ti shiir enentáimtawai. ⁵ Nekas wajé niñki pujana nu Yúsán enentáimtak tsawajsha káshisha iniaitsuk Yúsán áujeawai. ⁶ Antsu aya wárastiniak wakera nuka iwiaakiat jaka áintsañkete. ⁷ Tura wajénka ni shuarj wáinkarti. Yus-shuaran yajauch chicharnaktin atsutí tusam wi tájamna nu ashí Yus-shuar ujakarta. ⁸ Shuar ni jeén puñnia nuna nekaska wáinkiatniuiti. Tura nuyá chikich shuárnasha yáinñiniaiti. Túrachkuñka Yus tana nuna umiátsui, tura Yus-shuarcha nujaj nanñkaamas yajauchiiti.

⁹ Yusa kuñtrijjaj yáinniaiktiniaitkiuñka wajé sesenta (60) uwí nanñkaamas takustiniaiti. Tura chikichik aishriniak takusu átiniaiti. ¹⁰ Ti paant péñker túrin átiniaiti. Ni uchirjñ péñker tsakatmaashit, írran péñker táata tíniuashit, nekasmiancha enentáimtumar Yus-shuaran yáiniaashit, wáitiainia nuna wait-nenniuashit, tura chikichnasha péñker túriniaitkiuñka maak.

¹¹ Tura sesenta (60) uwí takakchaka chikich wajejaj iruraip. Ni ayashj wakeramurj Kristujaj kanamtikiainiawai tura ataksha nuatnaikiatniun wakeruñiawai. ¹² Tura emka enentáimtiarmia nuna iniaisar sumamaini-awai. ¹³ Nu arantcha nakimiainiak ántar irauwear chikicha iturchatrjñ áujmatsachminia nunasha áujmatin áiniawai. ¹⁴ Nu asantai wajé úchipiak

ainia nuka uyurtukar uchin takusarti. Tura nuwə nuatkamu takastinia nuna túrawarti. Tura ni túrunamurijjaj in kajertamainiaj nú shuar yajauch enentáimturmarsharti. ¹⁵ Kame nuik chíkich chíkich waje Krístuiyā kanakiar iwianchin nemarsaru ásar matai nuna tájai.

¹⁶ Áishmansha nuwasha Yus-shuar ainia nu ni shuarjin waje ákuinkia Yusa kuítrín seatsuk nii yaintí. Nujaj chíkich wajén nekas atsumainia nuna Yusa kuítrj yáintatui.

¹⁷ Yus-shuara uuntrj Yus-shuara pēnker wáinkiarua nu, nekas shiir enentáimtustin ániawai. Tura akinkiamniasha ániawai. Nekaska Yus-Chichaman etserkatniuncha tura ununiartinniasha tuke takaaka imiá shiir enentáimtustinaiti. ¹⁸ Yus-Papiniumsha núnisan áarmaiti:

Jínkiaia saepen pakartaj tusa turu takaak nájakui ni nují jínkiatáshtinaiti. Antsu ni wakerak yuati. Tu áarmaiti.

Tura nu arantcha áarmaiti:

Takakmasua nu nekas akinkiatniuiti. Tu áarmaiti.

¹⁹ Chikichik shuarak Yus-shuara uuntrj tunaarjñ etsertukmatainkia anturkaip. Antsu jimiarsha menaintiusha tsanumtsuk métek tuiniakui anturkata. ²⁰ Chíkich shuarsha ni tunaarjñ ikiuktinian nakitiainia nu, ashí iruntramunam chicharkarta. Chikichcha, nuna ísar, ashamkarti. ²¹ Yussa ii Uuntrj Jesukristusha tura nayaimpinmaya suntarsha ímiainiamunam “túrata” tájame. Ashí shuarjaj niisháa enentáimtutsuk métekrak túrata. ²² Yus-shuara uuntrj atí tusam wárik anaikiaip. Wárik túramka chíkicha tunaarjñ sumamattame. Ashí tunaanum pēnké pachiinkiaip.

²³ Wakemjaj jau asam aya éntsak úmutsuk karía ishichik pachimpram umarta.

²⁴ Chíkich shuara tunaarj wáitsatin imiá paant ániawai wáitsatin tsawant jeatsajñ. Tura chíkich shuara tunaarjñkia paantcha ániawai antsu ukunam paant nekanawatatui. ²⁵ Núnisan pēnker túramusha ti paant ániawai. Tura yamá páantchaitat tuke paantcha áchamniaiti. Páchitsuk nekanattawai.

6

¹ Takarniutirmesha, atumí uuntrj ti shiir umirkatarum. Túrachkumnjñkia chíkich shuar Yusnasha ii ununiamuncha yajauch áujmattsartatui. ² Atumí uuntrj Yus-shuar ániakka aya Yusjaj yatsum asamtai nakiarchatniuitrume. Antsu nuna nankaamas pēnker takarsatniuitrume. Warí, ame yayamna nu Yus-shuarchak ainia, tura ame aneamu yatsumchak ainia. Ame, Timiutéu, tu jintintiata.

Yusna wakeruktincha tura kuít wakeruktincha

³ Shuar ti shiir naka chichaman ii Uuntrj Jesukristunu ana nuna nakitiak antsu niisháa chichaman étserkunka ⁴ nu shuar nankaamantu enentáimtumayat ántraiti. Ni enentáimmianak chichaak aya ántar chichaman antumtiknaikiatniun chichaawai. Tura nu chichamjaj nupetmaktaj tusar nankaamas áujmatainiak kajernaikiar tura katseknaikiar pēnker enentáimtunaisuk ⁵ tuke kakannaniawai. Tura tu aujmatnaisatniun wakeruiniana nú shuar nekas-chichaman nékachu ásar aya tunaan enentáimtin ániawai. “Yusna ana nujaj kuítrintin ajasminiaiti” tuiniawai. Nu shuar pachisaip. ⁶ Shuar takakna nujajñ waraakka Yusna ana nujaisha waraak jū nuñkanmasha tura nayaimpinmasha nekas kuítriniuiti. ⁷ Iis, jū nuñkanam misuk támaji; núnisar misuk jiinkittiaji. ⁸ Tuma asamtai yurumkasha tura entsataisha takakkurkia nujajñ warasa

pujustiniaitji. ⁹ Antsu kuítrintin ajastaj tuinia nu, tunaanum awaṅkemkar iniainiawai. Tura antra nuna wakerukar itieurchatan wáiniainiawai. Nujaj emesratniunmasha jeainiawai. ¹⁰ Kame kuit aneatniuka ashí tunáanum útsutmakminiaitji. Chíkich shuar nuna wakerukar Yus enentáimtustinian iniaisar ti itieurchatjaj yajauch awajmamsarai.

Yusna nu túrunat tusam kakaram ajástá

¹¹ Antsu ame Yus-shuar asam nuyá pisarta. Yus nekas enentáimtakum péñker túrata. Waantu enentáimtsuk Yus péñker umirkata. Aneakum katsuntrata. ¹² Yusna nu túrunat tusam kakaram ajástá. Tuke amuicha iwiaakma emetata. Nu túratniun Yus anaitiamkaiti, tura ame Yus nekas enentáimtamun unturí shuar iruntramunam etserkaitme. ¹³ Yuska ashí iwiaaku átinian súwiti. Jesukrístusha Punsu Piratují nekasa nuna ti paant ujakmiayi. Tuma asamtai Yussha Jesukrístusha írainiamunam nuna tájame. ¹⁴ Ii Uuntrí Jesukrístu táatsajñ wi tájamna nu yapajítsuk tura yajauch chicharnakchamnia péñker umiktá, tájame. ¹⁵ Tsawant jeamtai Jesukrístu tatí tusa Uunt Yus, imiá péñker asa, akupkattawai. Nínkiti Yus. Akupniuncha Akupniuiti. Uuntjaj naṅkaamas Úuntaiti. ¹⁶ Iwiaaku átinia nérenniurí Nínkiti. Ti tsáapninnium pujakuí nuntumtuachminiaiti. Wáinchatai asamtai shuar péñké wáinkiacharu áiniawai. Nínki ashí shiir awajsatniuiti tura Nínki tuke ashí akupin atí. Núnisañ atí.

¹⁷ Jú nunkanam kuítrintin ainia nusha naṅkaamantu enentáimtumasharti. Kuitcha yúpichuch menkakamnia asamtai kuítniak enentáimtusar pujuscharti. Antsu iwiaaku Yus ashí in ti péñkeran núkap súramaj nuna nekas enentáimtusarti. ¹⁸ “Péñker túratarum” tiarta. Tákumin niisha shiir enentáijjaj ni takakman ajamsarti. Nuyá nú péñker túramujaj Yusaj ikiáunkartí. ¹⁹ Nuna túruiniak kuítriniawartatui. Núnisañ tuke iwiaaku átinian wáinkiaartatui.

Amuak Timiutéun akatramu

²⁰ Timiutéu, ashí ame túratniua nu tuke enentáimturta. Jú nunkanmaya ántar chichainia nu anturkaip. Tura wáitruiniak “wi imiá nékajai” tuinia nusha anturkaip. ²¹ Chíkich shuar nuna umirkar Yusajiyá kanakiarai.

Wátsek, Timiutéu, Yus shiir yainmakti.

Nuke atí.

Papru TIMIUTÉUN Ataksha papin aar akuptukma

Papru Timiutéun áatramiania nu

¹ Wi Pápruitjai. Yus wakerakui Jesukrístu akatramurí ajasuitjai. Ashí Jesukrístujai tsaniñkiarun “Nekas iwiaaku átinian susattajai” tíniuiti Yus. Tuma asa nuna etserkat tusa akuptukuiti. ² Aneamu uchiru, Timiutéu, jü papín áateajme. Yus Apasha tura ii Uuntrí Jesukrístusha ti anenma ásar waitnentramainiak imiatkinchanum shiir pujustinian yainmakarti.

Krístunu takastiniaitjinia nu

³ Tsawajsha káshisha Yúsan áujeakun ámin tuke enentáimtusan ti shiir Yúsan yúminñkijai. Winia weatur túrawarmia nútiksanak Yúsan enentáimtakun ti shiir awajeajai. ⁴ Kanakmiaj nuí eantramiam nuna tuke enentáimtajme. Ataksha wararnaisatai tusan íitniun wakerajme. ⁵ Yus nekas shiir enentáimtiniaitmena nuna nékajai. Nukuchrum Ruñtiasha tura ame nuku Eunisiasha emka Yúsan nekas enentáimtin ármiai. Amesha núnisketme.

⁶ Tuma asakmin tájame: Yusna takasái tusan winia uwejrun ámin awanteakui Yus kakarman suramsamia nujaj atak kakaram takasta. ⁷ Yus sápij enentáin suramsachuitji. Antsu kakaram ajastinniasha anenaitniuncha péñker wekasatniuncha suramsaitji. ⁸ Ii Uuntrí Jesukrístunu etserkatin natsantraip. Níiniun étserkun sepunam pujamusha étserkun natsantraip. Antsu Yus kakaram awajtamkui ame étseram nujaj shuar yajauch túramainiakui surimiamtsuk wáitsatin enentáimtumarta. ⁹ Ii péñker túrichu árinñ Yus in anenma asa uwemtikramar péñker túratniunam apujtamsaitji. Iisha Jesukrístujai tsaniñkiaru asakrin tura Yus nuna túratniun wakerak túramiai. Yaunchu jü nunka atsajsha in tuke waitnentrampramiai. ¹⁰ Tura yamá in Uwemtikkiartin Jesukrístu támatai nu anenmamumu paant ajasuiti. Niisha jákatniun nupetak emesramiai. Tura uwempratín chichamjai jáchatai iwiaakman paant awajturmajai.

¹¹ Nuna etserkat tusa Yus anaitiukmiayi. Tura akattur Israer-shuarchanum akuptukmiayi. ¹² Túruta asamtai ti wáitijai. Túrusha Yúsan nekas enentáimta asan natsamatsjai. Imiá kakaram asa amuukatin tsawant jeatsain ashí wíñian susamaj nuna ti penker waitruktatui.

¹³ Shiir chichaman jintintiamajmena nuke emetata. Jesukrístujai tsaniñkiu asar Yus nekas enentáimtaji tura nujaj anenkratniuitji. Tuke núnismek túrata. ¹⁴ Yus ámin takasat tusa suramsamu shiir takasta. Tura Yusa Wakaní in pujurtamaj nuna kakarmaríjjai túrata.

¹⁵ Asia nunñkanmayá shuar mash iniaitiusarmai. Nu nekaachmaashum. Nu shuarnumiá Pijirusha Ermujenessha armai. ¹⁶ Antsu Unisépuru niisháa shuar amai. Ti nukap shiir enentáimtikurmai. Tura wi sepunam pujamuncha natsantruchamai. Ii Uuntrí Kristu ni shuaríncha waitnentrarti. ¹⁷ Rúmanam taasha natsantrutsuk eñatak wáitsuk iniaitiuschamiai. ¹⁸ Ipiisu péprunam pujarin ti yainmakmiaj nu paant nékame. Tuma asamtai amuukatín tsawant jeamtai nincha Uunt Yus waitnentrati.

2

Kakaram ajasta

¹ Amesha, uchirú, Jesukristujai tsanin^ñkiu asam nu kakarmajaj kakaram ajasta. ² Untsurí ántuiniamunam wi etserkamaj nu, shuar umikmin ainia nu jintintiwaram chikichnasha jintintiwarat tusam akupkarta.

³ Ame ti penker Jesukristu suntarí asam wáitsatin katsuntrata. ⁴ Suntarka ni uuntri tana nunak umiktin asa chíkich takatan pachintiukchatniuiti.

⁵ Núnisan^ñ nakurincha nakurustinia nujaj métek nakurachkunka nekas péñkeran awakmakun súsatniua nuna achikchamniaiti. ⁶ Ataksha núnisan^ñ shuar ajan takaana nu, ashí shuara nan^ñkaamas nuyan yúashtinkiaiti. ⁷ Wats, ju maintiu métek-taku chicham áiniawai. Péñker enentáimtakmin ii Uuntri Kristu paant awajturmastatui.

⁸ Jesukristu jaka nantakmia nu enentáimprata. Tura Uunt akupin Tawit ni weat^{ri} asantai Jesussha uunt akupin áiniiaiti. Núiti wi uwempratin chichaman étsereaj nu. ⁹ Nuna étsereakun sepunam jirujaj jin^ñkiamu pujakun wáitijaj. Túrasha Yus-Chicham jin^ñkiachminiaiti. ¹⁰ Ashí shuar ni shuar^{ri} arti tusa Yus achikiarua nuna yáin^ñtajtsan ashí itirchatan katsunteajaj. Nujaj Jesukristujaj tsanin^ñkiaru ásar uwemprar tuke shiir pujusartatui Yusjaj.

¹¹ Ju imiá nekasaiti:

Jesukristujaj jákaitkiurkia Níjjajsha tuke iwiaaku pujustatji.

¹² Wáitiakrisha Níjjaj akupkattaji.

Natsantakrinkia Níisha natsantramprattaji.

¹³ Umichuitkiurniisha Niñkia tuke uminiaiti. Warí, Yuska ni enentáim^ñajain^ñ yapajniásuk tuke umiktiniaiti.

Yusaj natsaqaraj tusam ashi túrata

¹⁴ Shuar jintintiakum ju enentáimtikrata. Ii Uuntri Yus íimmianum chichamjaj yajauch tunaiyarain^ñ tusam chicharkarta. Nu tunaitin penké ántraiti antsu ántuiniana nuna yajauch awajenawai. ¹⁵ Yus-Chicham tuke enentáim^ñaj péñker unuimiátram shiir jintintiwarta. Túrakum Yus péñker írsat tusam péñker takarin atá. Túramka Yusaj natsa^ñarchattame.

¹⁶ Jú nun^ñkanmayan^ñak ántar áujmatin ainia nujaj kanaktia. Shuar nuna áujmatainiak tunaanum nuna nan^ñkaamas wáiniawai. ¹⁷ Ni jintiniamusha sun^ñkurjaj métek pampaawai. Iminiúsha tura Piritiusha nu shuar áiniawai.

¹⁸ Nísha nekas chichaman iniaisar tura ashí Yus-shuar nantaktincha nan^ñkaamasai tuíniakui chíkich shuar Yúsan naka enentáimtuiniatsui yamaikia. ¹⁹ Túrasha Yus ashí nan^ñkaamas enentáim^ñtustinia nuna paant awajsaiti. Júnisaiti: “Uunt Yus ni shuar^{ri}n nékainiawai,” tura nuyá “Ashí Kristu shuar^{ri} ainia nu tunaanumia^ñ kanakiarti.”

²⁰ Ku^ñtrinniu jeen kurijaj najanamusha kuitjaj najanamusha írunui. Nújain^ñkia ti shiira nu takastin áiniawai. Tura numijaj najanamusha nuwejaj najanamusha írunui. Antsu nújain^ñkia nekasmiancha ainia nu takastin áiniawai. ²¹ Núniskete Yusa takat^{ri}jjaj. Ashí tunaanumia^ñ kanakir péñker wekasar shiira nu takasmin átatji. Kame ashí péñkera nu takasmin asakrin ii Uuntri Jesukristu wakerak péñker takata nu^ñ apujtamsamniaitji.

²² Natsá wakerutai iniaism esetram péñker wekasata. Amesha ashí shuar shiir enentáim^ñaj Yúsan áujena nujaj Yus nekas enentáimtakum aneniakum ti shiir pujustá. ²³ Enentáim^ñsuk chichainiak aya ántar tunaitinian chichainia nu pachisáirap. Nusha aya némasmanainiawai. ²⁴ Ii uuntri Jesukristu takarniuka chíkich shuarjaj nemasmanaikiashtiniaiti, antsu ashí shuarjaj

pénker nawamnaikiatniuiti. Tura waitnentáimturar péñker jintintiatniuiti. ²⁵ Tura umircha shuarnasha Yus ni enentáin yapajtiakui nekas chichaman shiir enentáimturarat tusa péñker enentáijjaj jintintiatniuiti. ²⁶ Nujaj iwianch ni wakeramu túrawarat tusa achikmaitiatan uwemprartatui.

3

Amuukatin tsawant jeatemamtai aents ti tunaan túrawartatui

¹ Amuukatin tsawant jeakui ti iturchat átatui. ² Shuar aya nínki enentáimtumasaratui. Kuítian ti wakeriartatui. Nankaamantu enentáimtumasaratui. Yúsnasha yajauch chicharsartatui. Aparíncha umirkachartatui. Yumínsatniuncha nékachu ártatui. Ashí Yúsnancha enentáimtuschartatui. ³ Aneetsuk waitnenkartichu ártatui. Tsanumin ártatui. Ni ayashí wakeramun katsuncha ártatui. Aya kajen ártatui. Ashí péñker túrinia nuna nemasrj ártatui. ⁴ Amikríncha surukartatui. Arantsuk tunaan túrawartatui. Waantu enentáimin ártatui. Yúsan nakitrar aya ni wakeramunak enentáimtusartatui. ⁵ Yusa kakarmarj “ántraiti” tuíniak péñker umirkachartatui. Túrasha Yúsan umirua núnisar túrawartatui.

Nu shuar penké pachisáip. ⁶ Nu shuarsha shiir chichayatan anañkawar jeá wáiniawai. Tura nuwá esetar enentáimchan nekas tunaarinnun anañkainiawai. Nu nuwá ashí yajauch wakeramujaj anañnainiawai. ⁷ Tuma ásar ashí shuara chichamen tuke ántuiniayatan nekas-chichaman nekaatniun tujintiainiawai. ⁸ Yaunchu Ejiptu nunkanam Muisaisan uunt akupniujaj chichaakui jimiará iwishin, Jánissha Jámpriissha, Muisaisan kajerainiak “ántar tawai” tiarmiayi. Núnisan ju shuar nekas-chichaman nakitiainiawai. Naka enentáimiaiiniachu ásar Yúsnan naka jintiatniun penké tujintiainiawai. ⁹ Túrasha nuna nankaamas kuakchartatui. Shuar ti paant ni netse túruiniamurin nekarawartatui. Núnisan nu jimiará iwishniujaj túrunamiayi.

Amúak Papru Timiutéun akatramiania nu

¹⁰⁻¹¹ Tura ámeke wi tímiaj nu umireame. Wi Yusjaj shiir wekaamusha métek túriniaitme. Wi enentáimmiasha nékaitme. Ántruiniakui wáitsamaj nu nékame. Tura Yúsan enentáimtakun tura anenkratkun shiir enentáijjaj kat-suntramjai. Antiukía péprunmasha, Ikiuniu péprunmasha, Ristra péprunmasha ashí yajauch túrutawarmatai wáitsamaj nu paant nékame. Túrasha ii Uuntrj uwemtikrurmiayi. ¹² Nekasaiti, shuar Jesukrístujaj shiir túrataj tákunka ni nemasrj ántiam ti wáitsatniuiti. ¹³ Tura ashí anañkartin ainia nusha kame ashí yajauch shuarsha nú yajauch túrukiar wétatui. Iwianchjaj anañkamu ásar chikichnasha anañkarj weartatui.

¹⁴ Antsu ámeke anuimiam nu imiá nekasaiti tu enentáimtakun tuke emetata. Jintinramawarmia nú shuarsha wáitrichua nu nékame. ¹⁵ Úchichinmayan Yus-Chicham nékame. Yus-Chichamka uwempratniun jintinramamniaiti. Nusha “Jesukrístu nekas enentáimtakun uwemprattame” tawai. ¹⁶⁻¹⁷ Ni Papiirj áarat tusa Yus ni shuarj áamtikramiayi. Ashí shuar ni Chichamen nekaawar péñker túrawarat tusa túramiayi. Tuma asamtai Yus-Papí shuartin unuiniakartin asa imiá penkeraiti. Tunáa túrajnia nu Yus-Papijjaj nekamatniuiti. Tura awajiakrincha Yus-Papí núnaka paant jintinramji. Nuyá naka wekasatniun jintinramji.

4

¹ Ii Uuntrj Jesukristu amuukatin tsawantaj Uunt Akupin ajas iwiaakuncha tura jákaruncha ashí péñker túramuncha tura yajauch túramuncha nekaat-tawai. Tuma asamtai Niisha tura Yus Apasha íimiainiamunam juna akateajme. ² Uwempratin chicham etserkata. Yúpichuchia nujsa tura itiurchata nujsa tuke etserkata. Yus-Chicham nekas enentáimtikrarta. Tura shiir enentáimtusam chicharkam yáintaj tusam unuiniararta. ³ Ukunmanka péñker chichaman nakitrar ii wakeraj núchik nekaatai tusar, shuar teremak péñker pujuschamnia nekapea áintsan, nankaamas unuimiaru atai tusar, nánkamas unuikiartinian ti untsurj eakartatui. ⁴ Nekas shiir chichaman iniaisar ikiuiniak ántar áujmatsamun enentáimtusartatui. ⁵ Antsu ámeka tuke péñker túratin wakerakum ashí itiurchat katsuntrata. Uwempratin chicham étserkum takatrum péñker umikta.

⁶ Ishichik ajasai winia iwiaakmar Yusaj surumaktin. Mantamnan nayimpiniam wétin jeatimiai. ⁷ Shuar kakaram maanainia núnisnak tuke kakaram takasmajai. Tséken péñker tsekea áintsanak yawetsuk takasmajai. Tura Yus-Chichaman nekas akasmatkun péñker wáinkiaitjai. ⁸ Tuma asamtai tawasap nukajaj najanamu tsékena susamua áintsan wisha péñker túramunam akinkiattajai. Tura aya wíniak akirkashtatui. Antsu ashí ni tátinian shiir enentáijjai nákainia nunasha nekas péñkera nuna akikiartatui.

Timiutéu túratin akatmamturma

⁹ Wárik iiraitin enentáimturata. ¹⁰ Témas aya jú nunkanmayanak wak-erak ajapa ikiuruk Tisarúnikia péprunam weyi. Tura Kresentisha Karasea nunkanam weyi. Núnisan Títiusha Tarmasia nunkanam weyi. ¹¹ Túrawarmatai aya Rúkas wijjai pujawai. Márkus eaka wáinkiam ame itiaritia. Jui ti penker yainkiamniaiti. ¹² Tura Tikikiunka Ipiisu péprunam akupkamjai. ¹³ Tura winiakum nuparam pushí Trúas péprunam Karpu jeen ikiukmiaj nu takurtuktia. Núnisan nuparam papisha tura nekaska penké papí takurtuktia.

¹⁴ Arejántruka jirujaj takawa nu ti yajauch awajtusuiti. Túrutaitkiuisha ni túramujaj métek Yus akiktí. ¹⁵ Nu amesha péñker wáinkiatá. Ii étsereamun penké nakitiawai.

¹⁶ Emka akupniunam ayamprumaktaj tusan chichaakui chikichkisha yáintkiacharmiayi. Antsu sapijmiainiak ikiurkiarmiayi. Yus nu shuaran yajauch enentáimturcharka maak. ¹⁷ Tura ii Uuntrj Jesukristu ni kakarmarjñ surus yaintkiamiai. Nujaj uwempratin chichaman ashí nunkanam Israershuarcha antukarti tusan etserkamjai. Tura núnisan akupniunmayasha ii Uuntrj uwemtikrurmiayi. ¹⁸ Tura núnisan ashí yajauchia nuyá uwemtikrurmatai Nii akupeana nuñ nayaimpiniam jeattajai. Niñki tuke shiir awajnasti. Núnisan atí.

Amikmaamiania nu

¹⁹ Piriskancha ni áishri Akirancha amikmainiajai. Núnisnak Unisépuru shuarincha amikmainiajai. ²⁰ Erastu Kurintiu péprunam juakmai. Tura Trúpimiunka Miritiu péprunam jaan ikiukmiajai. ²¹ Michá nantu jeatsañ iiraitin enentáimturata. Tura Eupurusha Putentesha Ríniusha Kráutiasha tura ashí Yus-shuarsha amikmaatmainiawai.

²² Ii Uuntrj Jesukristu ámijjai tsañiñ pujustí. Tura Yus ashí péñker waitmakarti.

Nuke atí.

Papru TITIUN papí áatramu

Papru Titium áatramania nu

¹ Wikia Pápruitjai Yusa takarniuri. Tura Jesukristu akatramuríntjai. Yus achikma ainia nú shuar niisha antukar Yúsán umirkarat tusan akatramuitjai. Shuar nuna nekaawar pénger wekasartatui. ² Tura nú arant, nú shuarsha tuke iwiaaku pujusarat tusan étsereajai. Nú shuarnasha, nunkan najantsuk, “uwentikrattajai” Yus tímiayi. Tura Niisha wáitruatniun tujintiawai. ³ Tura yamaikia, tsawant jeamtai, nuna nekaawarat tusa ii Yusri uwentikiartinia nu, winia chichamur ujakarta tusa, winia áakaturmiayi.

⁴ Titiu, wi Yusna étserma umikiu asakmin winia uchirua áitkiasnak papin áateajme. Iis, iijjai métek Yus nekas enentáimtatsjik. Yus waitnentrama asa shiir awajtamsati tusan wakerajme. Tura ii Apari Yussha, ii Uuntri Jesukristusha, Uwentikiartin ana nu, enentáimin imiatkincha awajtamsati, tajai.

⁵ Wats, wi iwiarachmajna nu ame iwiarata tusan Kreta nunkanam ikukchamkajam. Tura “ashí péprunam Yus-shuar írunmanum, Yus-shuaran wáinkiarat tusam shuar anaikiarta” tíchamkajam.

Yus-shuaran wáinin

⁶ Yus-shuaran wáinin júnis atí. Niisha makuuchmin ti pénger wekasati. Tura chikichik nuwentin átiniaiti. Tura ni uchirísha Yusna ártiniaiti. Tura shuar yajauch chicharsachmin niisha tutupnísan wekain ártiniaiti. ⁷ Enentáimprata. Yus-shuaran wáinin Yusna ana nuna wáinkiat tusa anaikiamuiti. Tuma asamtai nekas makuuchmin wekasatniuiti. Waantu enentáimtumatsuk, kajetsuk, tura nampechu átiniaiti. Chikichan waitkiaú áchatniuiti. Tura ananma kuítrintin ajastaj tusa wakerukchatniuiti. ⁸ Antsu shuar ni jeen írar winiana nuna itiaatniuiti. Tura ashí pénger ana nuna wakerin, esetas enentáimin átiniaiti. Tura ju nunkanmaya akupeamuncha, núnisan Yús akupeamuncha umirkatniuiti. Tura níngi ímiastiniaiti. ⁹ Tura nú arantcha, chikich shuáran pénger jintintrataj tusa tura Yus-Chichaman nakitin áinia nuna nupetkataj tusa, Yúsnumiá nekas chichaman, ní unuimiátramania nuyá kanakchatniuiti. ¹⁰ Nekaata. Umichu ti irunui. Niisha ántar chichau ásar ananmau ániawai. Israer-shuar weenam ti irunui nú shuar. ¹¹ Niisha kuítian achiktaj tusar wakeruiniak, yajauch unuiniarchatniua nuna unuiniainiawai. Nuna túruiniak untsurí shuáran, ni írutkamuríjjai yajauch enentáimtikiainiawai. Tuma asamtai auka, ni wene epetkatniuiti, ántar chichainiakui. ¹² Warí, imia Krétanmaya chichaman eterin juna tíchamka: “Krétanmaya aentska tuke wáitrin ániawai. Tura nákitiat ti yurumin ániawai. Yajasma núnisan ániawai.” Nuna tíchamka. ¹³⁻¹⁴ Maa, niisha nékasn tímiayi. Nu tuma asamtai, Titiu, Israer-shuar ántar tuinia nuna, Yus-shuar anturkachartí tusam, tura nekas chichaman nakitiana nuna akupeamurín umirkachartí tusam, antsu Yúsán nekas umirkarat tusam, umichu shuar kakaram chicharkarta.

¹⁵ Enentáimprata. Yus-shuarka, ni enentái chamir ajasu ana nuka, ashí ní wainnia nuna péngernak enentáimtai. Tura chikich shuar, Yúsán

umirkachu asa, ni enentáí wapik asa, péñker ana nuna enentáimtustinian tujintiawai. Achapai enentáimiuk, péñkercha ana nuna “péñkeraiti” tawai. ¹⁶ Tura niisha “Yus-shuaraitjai” tuíniayatan, Yúsan umirtsuk niisháa túruiniawai. Tuma ásar mujmiaí ániawai niisha. Umichu ásar péñkeran túratniun penké tujintiainiawai.

2

Péñker jintintiatin

¹ Tura amesha, Titiu, péñker chicham etserkata. Yus-Chicham tátsuna nu etserkaip. ² Antsu áishmañ katsunt Yusna ainia nu, ju jintintrata. Nampechu, náñkamas enentáimcha, esetas enentáimin arti. Yus tana nuna umirin tura anenain arti. Ni itiuurchatríin Yúsan enentáimtusar katsuntin arti. ³ Tura núnímek nuwá katsunt Yusna ainia nusha ju jintintrata. Niisha núnisarañ Yus-shuarti túramnia nuna péñker túrawartí. Tsanumin tura nampen áchartí. Antsu péñker wekasatniun unuinin arti. ⁴ Niisha yama nuatnakua nuna ni áishrín ni uchiríncha nekas aneetniun unuininarartí. ⁵ Júnasha jintintrartí. Esetas enentáimin, péñker wekain ártiniaiti. Ni takatrín péñker takastin ániawai. Ni áishrín umirin ártiniaiti. Tura waitnentin ártiniaiti. Yus-shuarcha Yus-Chichaman yajauch chicharkarañ tusar túrawartiniaiti. “Tu jintintrarta” titiá.

⁶ Nuyá, Titiu, natsa áinia nu “náñkamsar enentáimsarum wekasairap” titiá. ⁷⁻⁸ Tura amesha, Titiu, ashí tsawant péñker wekasatá. Nu natsa wí túramun júkiar nunak túrawarmi tusam, nu túrata. Tura anturtamna nu “nekaschapitia” tíin tusam, esetsam enentáimsam, Yus-Chicham tana nu ímiatrusmek jintintiata. Nú túrakmiñkia, Yus-Chichaman nakitiana nu shuar “Titiu náñkamas chichaawai” titiaj tukamá, natsaamamak tujintramkattawai.

⁹ Takarin ainia nu, ni takartairín umirkarat tusam jintintrarta. “Shiir enentáimsarum, yajauch áimtsuk shiir umirkatarum” titiá. ¹⁰ “Kasamkairap, tura anañkawairap. Iis, péñker túrakrumka, takarniuitiatrum, shiir tura asarum ii Uwentikramin Yusrj chichamen shúiraiti, tu enentáimtikrattarme” titiá.

¹¹ Yus in waitnentrana asa ashí áentstin uwentikramprataj tusa wakerutmaji. ¹² Kame Yus waitnentrana asamtai, tunáa ana nu iniaisatniuitji, nu nékaji. Tura ju nuñkanmayá yajauch ana nu wakerukchatniuitji. Tura antsu ju nuñkanam pujayatrik esetsar enentáimsar anañma wekatsuk tuke tsawant Yus anear wekasatniuitji. ¹³ Túrar ii Yusrj Jesukristu, uwentikramajnia nu, imiá shiir iwiarnar tatí tusar nákastiniaitji. ¹⁴ Jesukristuka in jarutramkamiaji, ii tunaarínia uwentikrampratajsa. Tura, Winia ajasar tuke enentáijiaí péñker túrawarat tusa, ii tunaarín japirtampramiaji.

¹⁵ Titiu, anaikiamu asam arantutsuk nu jintintrata. Yajauch ana nuna túrawarañ tusam chicharkarta. Péñkeran túruinia nu ikiakárta. Tura yajauch chichartukarañ tusam tuke péñker wekasata.

3

Yus-shuarti túratin

¹ Titiu, shuar enentáimtikrarta. “Ashí akupin ainia nusha tura chikich uunt akupena nusha antukrum umirkatarum” titiá. “Péñkeran túratin ana nuna páchitsuk túrattajai” titiniaitruma” titiá. ² “Tsanumpirap, kajernaikairap, antsu shiir enentáimtunaistarum” titiá. Nañkaamantu enentáimtumatsuk ashí

shuar péñker awajsatarum tusam tu jintintrarta. ³ Warí, iisha núnisrik Yus-shuar ajatsuk náñkamsar wekaimji, Yuska umirtsuk. Tura íwianch emetamu pempée wekaimji. Tura ii ayashí wakeramu tuke túriniuyaji. Tunaasha túriniuyaji. Chíkich atankittsar wakeriniuyaji. Chíkich shuar kajerkar tura nuamtaksha kajernainiuyaji. ⁴ Túrasha Yus in uwentikkiartin ana nu, anenkratin asa, ni anenkrattairin ashí áentsun iniaktus in uwentikrampramiai. ⁵ Yus in waitnentrama asa, iikia júkesha péñker túrachma aín uwentikrampramiai. ¿Itiurak uwentikrampramiai? Ii tunaarín asakátrampramiai, niijaktinia áintsan. Tura Yusa Wakaní pujurtamkurin, ii iwiaakmarin yamaran amasmaji. ⁶ Jesukristu jakamujai Yus in emeenturmatsuk ni Wakanin suramsamiai. ⁷ In anenma asa nuna túramiayi. Nujínkia iisha yamaram awajsamu asar tuke iwiaaku átin, ti wakerimij nu íniuiiti. ⁸ Nuka ti nekasaiti. Tuma asamtai Yúsán umirkarmia nu, péñker túratniun tuke wakerukarat tusam tuke jintinki wetá. Wi tímiajna nu, péñker asamtai, ashí aents nuna nekaatniun atsumainiawai. ⁹ Shuar netse áujmatainiakui ameja pachisaip. Tura “aya winia úntruk péñker áiniawai” tu chichasaip. Tura Israer-shuara akupkamurí itiurkit tusa shuar ti áujmatainiakui nusha pachisaip. Ántraiti nuka. Péñker wekasatniun yayatsui.

¹⁰ Shuar tsanumprur yajauch enentáimtunaimtikiana nu chicharkata. Ántachkuínkia ataksha chicharkata. Tura penké tujinkiamka jiiiki akupkata. ¹¹ Nujai juna nekaamniaitme: nuna tura asa awajiruiti. Tura ni tunaarínin jakattui.

Papru wakerana nu

¹² Wisha Artemasan akatran akuptukchatjameash. Nin akupeachkunka Tikikiun akuptuktatjame. Nii jeamtai amesha wari winitritia Nekapuris pérunam. Jui Nekapurisnum yumí nantu asamtai seturan pujuttajai. ¹³ Senas, chichaman ti unuimiaru pujana nu, amikiur Apurusjai jeamtai, nii atsumtsuk shiir weartí tusam, ame túratin jeamna nu yainá. ¹⁴ Iní Yus-shuar ainia nusha péñker túratniun tura atsumainia nunasha yáinínian nekaawartí. Ántar pujusarain tusan nuna tajai.

¹⁵ Ashí wijjai pujuinia nu amikmaatmainiawai. Tura ii amikri Yus-shuar ainia nu amikmaatruata. Atumniasha Yus shiir yainmakat tusan wakerajrume. Nuke atí.

Papru JIRIMIÚÑKAN papí áatramu

Papru Jirimiúñkan papin áatramiania nu

¹ Wi Papru ju papin áaran akuptajme ámin, Jirimiúñká. Ii yachi Timiutéusha juna akupturmawai. Wi Jesukrístu takaru asan sepunam pujajai. Ame iijjaj tsanin̄kia takáa asakmin ju papin akuptajme. ² Núnisan̄ ame jeemiin Yushuar irunainia nunasha tura ii umaĵ Apiancha tura Arkípiuncha iijjaj ti kakaram takasu asamtai ju papin akuptajrume. ³ Yus ii Aparĵ tura ii Uuntrĵ Jesukrístu shiir enentáimturma ásar yainmakarti imiatkinchanum tuke shiir pujustinian.

Jirimiúñ pēnker Yus-shuar ámiayi

⁴⁻⁵ Ame Uunt Jesus shiir enentáimtakum ashí Yus-shuar ainia nusha aneamun antukjai. Nuna antukan ámin ti shiir enentáimtakun Yúsan áujeakun yúmin̄kijaj. ⁶ Áujeakun chíkich shuarsha ámijjaj métek Yúsan nekas enentáimtuiniak ashí pēnker ana nuna ti paant nekaawarat tusan seajai. Ashí pēnker ana nuka Jesukrístu shiir awajsamujaj takakji. ⁷ Wisha ame anenkratmajaj ti shiir enentáimtakun waraajai. Yatsurú, ámijjaj ashí Yus-shuarsha shiir enentáimiainiawai.

Papru Unisemun waitnentratniun Jirimiúñkan seamiani nu

⁸ Nu asamtai kakaram tátsujme. Kame wakeraknaka Kristu akatramu asan “Ju túrata” túminiaitjijame. ⁹ Antsu aneakun aya júnisan tájame. Wi Papru úuntach asan tura Krístun takarkun sepunam pujakun ¹⁰ Unisemu waitnentrat tusan seajme. Niisha wi ujakmajaj Yus-shuar ajasu asa winia uchirua áintsan̄kete. Sepunam pujayatan ni aparĵya áintsanak ajasjai.

¹¹ Nuikia Unisemu ántrauyi antsu yamaikia aminiisha winiisha yáimniuiti. ¹² Ataksha awantajme. Wi ti pēnker aneamu asamtai pēnker itiaata. ¹³ Wi Yus-Chichaman étserkun sepunam pujajai. Túmakun ame yajá pujakun yáintkiatin tujintiakmin nii antsu wĵjaj pujus yáintkiat tusan wakerimjai. ¹⁴ Túrasha ámin ujatsuk túrachmin enentáimpramjai. Kame ame wakerakum útsukchamujaj “pujustí” tákum̄n̄kia maak. ¹⁵ Júnissha enentáimpramniaiti. Unisem ishichik tsawant men̄kakamai tura yamaikia waketki ámijjaj tuke pujustatui. ¹⁶ Kame yamaikia emetachma antsu ame aneamu yátsume áinis átatui. Nuka ti pēnkerchakait. Wisha nin ti anejai. Tura yainmakmin asamtai tura Krístunam ame yatsum ajasu asamtai winia iniankattsam aneashtapash.

¹⁷ Wisha ti pēnker amikrumchakaitaj. Tuma asam winia itiaarua nútiksam shiir awayáta. ¹⁸ Yajauch awajtamkaitkiuin̄kia tura ámijjaj tumashitkiuisha wi akiktatjai. ¹⁹ Wi Papru nekas winia uwejruij juna áaran ti nekas akiktatjame tájame. Túrasha winia tumashitmena nuna páchittsujme. Kame wi ujakam Yus-shuar ajaschamkum. ²⁰ Wátsek, yatsurú, amesha Yus-shuar asam wi seajme ju túrutata. Kristu enentáimtakum shiir enentáimtikurta.

²¹ Ti penker uminiaitme nuna nékakun júnisan áatjame. Tura wi seajmena nuna nankaamas túrattamna nuna nékajai. ²² Ayu. Átum Yus áujturkurmin Yus winia tsan̄katruktatui atumj̄in iiraitniun. Tuma asamtai wi nūj jean pujustin iwiarturata.

Amikmaamiania nu

²³ Épaprassha niisha Jesukristunu étseruk sepunam wijīaj pujus amikmaatmarme. ²⁴ Núnisan̄ Márkussha Aristárkusha Témassha tura Rúkassha Yus-Chichaman etserkatniun yáintiainia nusha amikmaatmainiawai.

²⁵ Ii Uuntrī Jesukristu atumniasha ti shiir yainmakarti.
Nuke atí.

ISRAER-SHUARAN papi akuptukma

Yus ni Uchirijjai ni chichamen ujatmakji

¹ Yáunchuka Yúsnan etserniujai chichas Yus ni enentáimmian ii úuntrin ujakmiayi. Tura untsurí nunkanmasha tura untsurí uwitincha niisháa niisháa chichas ujakmiayi. ² Antsu ju amúamu tsawantaikia ni Uchirí Jesukristujain ashí Niiniu ana nuna ujatmakji. Yus Niijjai ashí írussa nuna najana asa mash Nin súsaiti. ³ Níyaiti Yúsan imiá métek nakumeana nu. Tura Níyaiti Yus nankaamas shiira nuna paant awajeana nu. Niisha aya ni chichamejai kakarma nujai ashí írussa nuna wáiniuk emeta pujurui. Tura ii tunaarin nijiatramak akupin pujutainium, Yusa untsuuriní, pujusmiayi.

Nayaimpinmaya suntarjai Kristu nankaamantuiti

⁴ Yusa Uchirí nayaimpinmaya suntarjai imiá nankaamantu awajnasuiti. Tura ti nankaamantu asamtai Yus nayaimpinmaya suntar nankaamas Nin ti shiir awajtai. ⁵ Wátsek, nayaimpinmaya suntaran chikichinkesha juna tútsuk Kírstun tímiayi:

“Ame winia Uchiruitme. Túmaitkiui yamáikia winia kakarmarun átakeajme.”
Tura núnisan tímiayi:

“Wi ni aparí átatjai, tura Nii winia uchir átatui.”

⁶ Tura ju nunkanam ni Iwiairin akupeak tímiayi:

“Ashí Yusa suntarj tikishmatrarti.”

⁷ Nayaimpinmaya suntarnan júnis chicharui:

“Nayaimpinmaya suntarin takartursarat tusa nasea áintsan awajsaiti. Ni suntarin chárpia áinis akupeawai.”

⁸ Antsu ni Uchiriniun tímiayi:

“Ame, Yusá, tuke akupniuitme. Ame akuptairmesha aya péñkeraiti.

⁹ Péñkera nu anenaitme, tura yajauchia nu muñjniuitme. Tuma asamtai ashí shuar shiir warartamu asamtai Yus, ame Yúsrum, ashí akupniujai nankaamas uunt awajtamsaiti.”

¹⁰ Nu arantcha tawai:

“Uuntá, yámankamtaik Ame ju nunka najanamiamé. Túram ame uwejmijjai nayaimpisha najanaitme. ¹¹ Nusha mai amuukarmataisha Ame tuke pujuttame. Tarachjai métek mamurartatui. ¹² Tura ipijram ikius-tatme. Pushiya áintsam yapajiáttame. Túrasha Ámeka núnismek átatme. Játsuk tuke pujuttame.”

¹³ Ataksha tímiayi:

“Akupin pujutainium, winia untsuuruiní, pujusam nácarsatá. Ame nemas-rumin nupetkan Ámin umirtamkarti tusan amastatjai.”

Núnisan nayaimpinmaya suntaran peñké tichamiayi. ¹⁴ Antsu Yusa suntarí wakan áiniak ashí shuar uwemprartatna nuna yáinkiarat tusar Yus akup-kamu ániawai.

2

Anearta. Uwempratin Chicham nakitrashtiniaiti.

¹ Nuikia Kristu ti uunt asamtai ashí Niiniu antukajnia nujaj kanakchatin ti enentáimtustiniaitji. ² Yaunchu nayaimpinmaya suntar Muisaisan súsarmia nú akupkamu nekas uminkiatniuyayi. Shuar umitsuk tunaan túramtai ti kakaram asutniáwarmiayi. ³ Antsu ii Uuntrj Krístuka Uwempratin Chichaman emka itiamiyi. Tura imiá nekas tuíniak Nin anturkaru in ujatmakar-maji. Tuma asamtai Uwempratin Chicham nakitiakrika nuna nankaamas uwemtsuk asutniáttaji. ⁴ Kame nu arantcha, Uwempratin Chicham ujat-mainiakrin imiá nekas tuíniawai tusa aents túrachminian kakarman Yus iniakmasmiayi. Núnisan ni Shiir Wakanj ni wakerana núnisan niisháa niisháa kakermajaj takamtikeawai. Nujaj Yus-Chichama nu paant nekanamniaiti.

Jesukrístu aents ajasmiania nu

⁵ Ayu. Nuik áujmatkur “jú nunka amuukattawai” taji. Tura yamaram nunkanam nayaimpinmaya suntar akupkachartatui. ⁶ Antsu ii akupkattania nu, Yus-Papinium áarmaiti:

“¿Shuarti warimpiaitijame imiá enentáimtitniusha? Kame, ¿shuar warí asam-tai pujursataj tamea? ⁷ Ishichik tsawant nayaimpinmaya suntarjaj péejchach awajsamiame. Túram ti shiir nankaamas uunt awajsattame. Ame najanamun ashí akupkati tusam tsanatkattame. ⁸ Ashí nin umirkarti tusam susattame.” Tu áarmaiti.

Yus “ashí nin umirkarti” takui nin umirkashtinkia atsawai. Túrasha yamaikia ashí umirainiaka wáintsuji. ⁹ Tura wáinjinia nu Krístuuti. Niisha aents ajas ishichik tsawant nayaimpinmaya suntarjaj péejchach ajasmiayi. Yus ni shuarin ti aneak jarukarti tusa wakerimiayi. Tura ni wáitias jakamujaj yamaikia ti shiir nankaamas Uunt awajsamuiti.

¹⁰ Ashí írúnna nu Yus najanamun ásar ni wakeramun umiktin ainiawai. Tura ashí ni uchirjsha ni shíirmarj pachiinkiarat tusa wakerawai. Tuma asa Yuska Jesukristun, nu shuaran Uwentiknia nuna, ni waitsmujaj nekas Uwentikmartin awajsamiayi. ¹¹ Yusna atí tusa shiir awajsamuncha tura Kristu nin shiir awajea nunasha Yuska mai metek ni Aparinti. Nu asamtai Yusa Uchirj nu shuaran “yatsur” títinian natsantatsui. ¹² Yus-Papinium núnisan tawai:

“Ame náarmrin winia yatsurun ujakartatjai. Ashí iruntramunam kantampru-attajme.”

¹³ Ataksha ni shuarijjaj métek enentáimtamun tawai:

“Yúsán ti shiir enentáimtustatjai.”

Tura ataksha:

“Yus surusmia nú uchirjaj Yúsán umirkun pujajaj” tawai.

¹⁴ Tura nu uchi aents ásarmatai núnisan Jesussha aents ajasmiayi. Tura aents ajas jaka, iwianchin, jatai nérenniurj, ashí emesarmiai. ¹⁵ Tura ti untsurj shuaran uwemtikrarmiayi. Nu shuar yaunchu jákatniun ashamainiak tuke wáitin ármiai. Antsu ni jakamujaj yamá ankant áiniawai. ¹⁶ Maa, imiá nekasaiti, nayaimpinmaya suntaran yáintaj tusa táchamiayi. Antsu ashí Apraám weean, ashí Yus-shuar ainia nuna yáintajtsa támiayi. ¹⁷ Túratin asa penké métek ni yachja áinis ajasmiayi. Nujaj in tuke waitnentrampromniatji. Tuma asa Yúsán pujurniu uuntrj ajas Yúsán tuke penker chichartamsanniatji. Núnisan murikiun maa Yus súsatniua áintsán ni jakamujaj ashí shuara tunaarj tsankurniuiti. ¹⁸ Tura imia ninj waitsa asa tura íwianch nekapsamu asa yamaikia iisha wáitiakrincha tura íwianch nekaprakurnisha yainmakminiatji.

3

Jesus Muisaisjaisha nan̄kaamantuiti

¹ Tuma asamtai, pēnker yatsuru, atumniasha Niiniu atí tusa Yus achir-makuitrume. Tuma asarum Kristu Jesus pēnker enentáimtusarum. Niisha Yus nekas Akatramuyayi. Tura ashí Yus-shuar ajasarua nujai Yúsna pu-jurniu uuntriá núnisaiti. ² Nu atí tusa Yus anaikiamiayi. Túramtai Kristu nuna ti pēnker takasuít. Núnisañ Muisais ashí Yusa aentsrīn, Israer-shuar armia nuna ti shiir wainkiamiayi. ³ Túrasha Muisaisjai nan̄kaamas Kristu ti shiir awajnasuít. Jeajai nan̄kaamas jea jeamniuka nekas pēnkerchakait. Núnisañ Kristu Muisaisjai nan̄kaamas pēnkeraiti. ⁴ Kame ashí jeañ shuar jeamtsuk. Tura Yus ashí írúnna nuna najanaiti. ⁵ Wats. Muisais Israer-shuaran wáiniuk Yusa Jeen takastinia áintsan pēnker takarniuyayi. Tura ni takaak ukunam Yus titiatna nuna etserkatniuyayi. ⁶ Túrasha Kristu Yusa Jeen takarniuchu asa antsu Yusa Uchirj asa nuj ashí akupeawai. Nu jeasha iitji. Tura tuke iniaitsuk kakaram ajasar Yus suramsattaj nu wararsar nákastiniatji.

Yusa shuari shiir pujustin

⁷ Nu asamtai, Yusa Shiir Wakanj Yus-Papinium tawai:

“Yamaikia, Yus tana nu ántakrumka ⁸ nakittsuk shiir anturkatarum. Israer-shuar yaunchu aents atsamunam wekainiak Yus taman nakitrar Yúsna nekapsar akajkarmiayi. ⁹ Túramtai Yus tímiayi “Nuj atumí uuntri nekaprusr akajtukarmiayi. Kuarenta (40) uwitin wi kakaram túramun ísarsha nakitrurarmiayi. ¹⁰ Tuma áarmatai nu shuaran kajerkan tiarmajai “Nu shuar ni enentáin tuke awajiniawai. Tura Wi taman umirkatniun nakitiainiawai” tímiajai. ¹¹ Tura kajerkan nekas tákun “Wijjai shiir pujustinian penké tsan̄katkachartatjai” tímiajai”

Tu áarmaiti.

¹² Anearta, yatsuru. Yajauch enentáimsarum tuke iwiaaku Yus enentáimtusuk kanakiirap. ¹³ Kame kashinkia tunaajai anañnam enentáimin Yúsna nakitrashapash. Tuma asamtai yamaik tura ashí tsawant ikiakánairatarum. ¹⁴ Yámankamtaik Kristu shiir enentáimtusmaj núnisrik tuke iniaitsuk émeteakrikiá Krístujai shiir tsaniñkiar pujustatji. ¹⁵ Nu asamtai Yus-Papí tawai:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap.”

¹⁶ Muisais Ejiptu nun̄kanmaya jikmia ní shuar Yusa chichamen anturkariat nakitrarmiayi. ¹⁷ Tura umiiniachkuí kuarenta uwi kajerkarmiayi. Tunaan túrawaru ásar untsurj shuar aents atsamunam kajñkarmiayi. ¹⁸ Kame umirkacharunka Yus “Wijjai shiir pujustinian penké tsan̄katkachartatjai” tímiayi. ¹⁹ Iis, Yúsna enentáimtachu ásar Niijjai shiir pujustinnium wayatniun tujinkarmiayi.

4

¹ Nu asamtai, ii wayatin tsan̄katkamu áyatar Yusjai shiir pujustinnium páchitkiachu aij tusar aneartiniatji. ² Yaunchu nu shuaran ujakarmia núnisañ incha Uwempratin Chichaman ujatmakuitji. Nu shuar Yúsna enentáimtusuk antukaru áarmatai nu chicham yáincharmiayi. ³ Antsu iikia ni chichame

enentáimta asar Yusjaj shiir pujustinnium nekas wayaji. Tura chikichan Yus tímiayi:

“Nu asamtai kajerkan nekas takun “Wijjaj shiir pujustinian penké tsan̄katchartatjai” tímiajai” tímiayi. Kame Yus jú nuñkan najana umik nuyá shiir pujus ayampramiayi. ⁴ Yus-Chichamnum ayampramun júnis tawai.

“Yus sais tsawant takakmas nuyá tsawantaj ayampramiayi.”

⁵ Tura ataksha tawai:

“Wijjaj shiir pujustinnium wayá ayamprashtatui.”

⁶ Shuar nuj wayawar ayampratin tuke awai. Tura emka Uwempratin Chichaman antukarmia nuka umichu ásar wayacharmiayi. ⁷ Nu asamtai ataksha Yus wayatin tsawantan áanturmaitji. Nusha yamá tsawantaiti. Wats, Israer-shuar ni nuñké Yus susamunam wayáwarmiayi. Tura nuna ukunam Uunt Tawit timiajai Yus ni chichamen ujatmaji:

“Yamaikia, Yus tana nu ántakrumka nakittsuk shiir anturkatarum. Israer-shuar yaunchu Yus taman nakitrarua núnisrum ajasairap” tímiayi.

⁸ Kame ni kapitiantri Jusué Israer-shuaran ni nuñkeen awayá ayantikraitki-iuin̄kia Yus ukunam ataksha tsawantan áanturmachajji. ⁹ Nujaj páantaiti, ashí Yus-shuar Yusjaj shiir pujus ayampratin tuke awai. ¹⁰ Yusjaj ayamprania nuñkan, ni kakarmarjijaj takastinian ayampraiti Yus ni takatrijijaj ayamprania núnisan̄. ¹¹ Nu asamtai iisha Yusjaj shiir pujustinnium pachiiinkiachajj tusar Yus shiir enentáimtusar kakaram ajastiniaitji. Israer-shuar yaunchu Yus taman nakitrarua núnis ajaschatniuitji.

¹² Yusa chichame iwiaaku chichamaiti, imiá kakarmaiti. Puniá mai érea núniniaiti. Tuma asa shuara enentáin init wayá ashí ni enentáimmian tura wakeramurj̄n ti paant awajitawai. ¹³ Yus najanamuka penké Nin umprukchamniaiti. Ashí írunna nu Yus íimmianum misúa áintsan̄ paant ániawai. Tura ii túramu ashí paant ujakartatji.

Jesus nekas Yúsnan pujurniu úuntriinti

¹⁴ Jesus Yusa Uchirj̄ nekas Yúsnan pujurniu uuntri ajas Yusaj wayá iiniun chichartamji. Nu asamtai iniaitsuk tuke nekas enentáimtustiniaitji. ¹⁵ Niisha iijjaj métek ashí tunaanum nekapsamuiti. Túrasha tunaan túrachmiayi. Tuma asa ii tujintiaj nuna paant nékak ii itiurchatrin waitnentramniuitji. Tura Yúsnan pujurniu uuntri asamtai ¹⁶ Yús-akuptainium shiir enentáijijaj sapijmi-atsuk jeamniaitji. Tura Yus in anenma asa waitnentramak itiurchat pujajnia nuj yainmaktatji.

5

¹ Tura Yúsnan pujurniu úuntriikia shuar anaikiamuiti tura ni takatrij̄ jímiairaiti. Yusaj shuárnan chicharsatniuiti. Nuyasha Yus suñiamun súsatniuiti tura núnisan̄ naman̄ken maa Yúsan súsatniuiti shuara tunaarj̄n asakátratniun. ² Tura Yúsnan pujurniu uuntri niisha shuar asa ni tujintiamun nékak shuar nékachuncha tura waak yujainia nunasha waitnentramniaiti. ³ Tura niisha tujintia asa ni tunaarj̄ncha chikichnajakj̄ métek tsan̄kurnarat naman̄ken maa Yúsan súsatniuiti.

⁴ Shuar ni enentáijijain̄kia Yúsnan pujurniu uuntri ajaschamniaiti. Antsu Yus nu shuaran anaikiatniuiti. Núnisan̄ Aruñkan anaikiamiayi. ⁵ Núniskete Krístujaj. Niisha ni enentáijijaj Yúsnan pujurniu uuntri ajaschamiayi. Antsu Yus Nin anak nujaj shiir awajsamiayi. Tura tímiayi:

“Ame winia Uchiruitme. Túmaitkui yamaikia winia kakarmarun átakeajme.”

⁶ Tura ataksha Yus-Papinium júnis tawai:

“Mirkisetékká Yúsnan pujurin amia núnismek Amesha tuke Yúsnan pujurin átatme.”

⁷ Kristu jú nunkanam pujak kakantar útuk Yúsán ti seamiyai. Nin jákatniunmayá uwemtikramnia asamtai seamiyai. Tura Yusa wakeramurin tuke enentáijjaj enentáimtakui Yus anturak ti yáinmiyai. ⁸ Nujaj Kristu Yusa Uchiríntiat ní wáitsatniujaj umirkatniun unuimiarmiiai. ⁹ Nujaj ti nekas Uwemtikin ajasmiai. Tura shuar umirainia nuna tuke uwem ataksha Yus-Papinium júnis tawai:

“Mirkisetékká Yúsantikrarminiaiti. ¹⁰ Túramtai Yus Nin Yúsnan pujurniu uun-trj Mirkisetékkaj métek awajsamiyai.

Anearta. Yusjaj kanakchatniuiti.

¹¹ Ju ti nukap áujmatsatin awai. Túrasha ántichu asakrumin mashi ujakchamniaitjarme. ¹² Átumka yaunchu mash nekaamaintrume. Túmaitiatrun ataksha yaitiás Yúsnan jintinruat tusarum atsumarme. Warí, kuirchia núniniaitrume. Kátsuram yútsuk muntsu muntsúatniuitrume. ¹³ Kuírchikia Uwempratin Chichaman áujenak péñker unuimiainiatsui. Tiniamnumiá ásar tujintiainiawai. ¹⁴ Apatuk kátsurman aya uunt yuámniaiti. Uunt ainia nuka péñkernasha tura yajauchincha apatkar paant nékainiawai.

6

¹ Uunt ajastai. Krístunu ana nuyá aya yúpichuchia nuke enentáimtusuk nu arantcha unuimiarai. Kame emka unuimiarinia nu ju ániawai: shuar ní tunaarjín jákatniunam júana nuna kúntuts enentáimtur Yúsán shiir enentáimtustincha, ² imiantinnium nekaatniuswai:

“Mirkisetékká Yúsnanha, Yus-shuar yáinmanum uweje awantsatniusha, jakamunmayá nantaktincha, tura sumantikiatin tsawanta nu nekaatniusha. ³ Tura Yus yáinmakrin nuna nankaamas nekaattaji.

⁴ Shuar Yusna nuna nekaanka tura Yus susamun takakkunka tura Yusa Shiir Wakanj kakarmarjín nekapsaitkiunka ⁵ tura Yusa chichamencha péñkeraiti nekaanka tura Yusa kakarmari ukunam nunka yamarmanum takastatna nuna yamá nekapeakka, ⁶ nu shuar nuna nakitiak kanakniaka atak ní tunaarjín enentáimtak ikiuktinian wakerachuk tujinkiattawai. Warí, ní enentáijjaj Yusa Uchirín krúsnum máiniaiti túrak ashí íimiainiaí natsanmain awajawai. ⁷ Nu shuar yajauch nunka áintsan ániawai. Yumi yútakui péñker nunka arakan péñker tsapatmakka arakmaun yayawai. Túramtai Yus shiir enentáimiui. ⁸ Antsu janjí nupan tsapatmakka nu nunka yajauchiiti. Yus áeseak emesrattawai.

Yus tsankatramkattajnia nu enentáimtakur kakaram ajaji

⁹ Aneamu yatsurú, tu chicharkursha, nú shuarchaitrum nu nékaji. Antsu uwempra asarum nú péñker túrattarme. ¹⁰ Yus ti péñker asa átum takasmancha tura ní aneakrum Yus-shuar yáinmancha kajinmatkishtatui. Tura yamaisha tuke túrarme. ¹¹ Tura nuik túrarmena núnisrumek tuke iniaitsuk kakaram takasrum ashí Yus tsankatramkatta nu wáinkiatarme. Núnisan atí tusar wakeraji. ¹² Nakimtsuk kakaram ajastarum. Niiniaua nuna Yus ní shuarjín susattawai. Tura shuar Yúsán enentáimtak shiir enentáijjaj nákkaka nuna wainkiattawai. Tu takastarum tusar wakeraji.

13-14 Yus yaunchu Apraámjaj chichaak “Ti nekas shiir awajsattajme tura ti nukap pampamtikrattajme” tímiayi. Nuna taku imiá nekas tajai tusa tura chíkich Nijjaj nankaamas uunt atsakui imia Niñki pachimias tumammiayi. 15 Tutai Apraám yáitmataik nákas Yus timia nuna wáinkiamiayi. 16 Shuar “nekas tajai Yus íirui” tákuŋka chíkich nijjaj nankaamas úuntan páchiawai. Tura tu chichasmataiŋkia nuyáŋka imiá nekas tana nu nekaamniati. 17 Tuma asamtai Yuska “ti nekasan yapáŋtsuk túrattajai” tusa imia Niñki pachimias tumammiayi. Nujaj ni tsan̄katkamun júkiartatna nu shuar Yus ti nekas umikatatna nuna nékainiawai. 18 Yus penké wáitruachmin asa áyatik ni tamajaj nekasaiti. Nuna arant nuikia imia Niñki pachimias ti ikiakátmajai in. Nujaj iisha uwempratai tusar Niini weamkatikia tsan̄katramkattajnia nu ti shiir enentáimsar wáinkiatin nákaji. 19 Nu enentáimsar kakaram ajaji. Yusaiya in umuchtiamkamnia penké atsawai. Yusaj áchitkia asakrin ti kakaram emet-tamji. 20 Jesussha emka Yusaj wayá mash iwiarturmaji. Tura Mirkiseték amia núnisan Niisha yamá tuke amuukashtinian Yúsnan pujurniu uuntri ajasuiti.

7

Mirkiseték amia núnisan Jesussha Yúsnan pujurniu uuntri ajasuiti

1 Nu Mirkisetéksha Sarem nunkanam akupniuyayi. Tura ashí nan̄kamas kakaram Yúsnan pujurniuyayi. Apraám chikich akupniun mesetjaj awakak támatai Mirkiseték j̄intiuki in̄kiun ti shiir awájsámiayi. 2 Túramtai Apraám nupetmakar kuit jukimiun tias (10) akantuk susamiayi. Mirkisetéka naari tana júka “ti penker uunt akupin” tawai. Tura Saremka “ti shiir imiatkincha” tawai. Tura Mirkiseték Sarema akupniurj asa “ti shiir imiatkinchanum akupin” tawai. 3 Nukurjsha aparjsha Yus-Chichamnum atsawai. Núnisan ni uuntrjsha atsawai. Ni akiiniamurjcha ni jakamurjcha ujaatsui. Tuma asamtai Yusa Uchirjía áintsan̄ tuke iniannakchatniun Yúsnan pujurniu uuntri ajasuiti.

4 Mirkiseték timiá uuntauya nu enentáimprata. Ii uuntri Apraámsha nupetmakar kuit jukimiun tias akantuk susamiayi. 5 Tuma asamtai Apraám nan̄kaamas úuntaiti. Muisais akupkamujaj Riwí weeáka Yúsnan pujurni ániawai. Niisha ashí Israer-shuarjaj métek Apraám weeá ániawai. Túmaitiat penké Israer-shuar ni warirj in tias akantuk Riwí shuaran suu ármiayi. Muisais tu akupkamiayi. 6 Túrasha Mirkiseték Riwí weeachunak Apraám tiásan akantuk nin susamiayi. Apraám Yus shiira nuna tsan̄katkamuitiat Mirkisetékan nijjaj uunt asamtai susamiayi. Túram Mirkiseték Apraáman shiir awajsamiayi. 7 Imiá nekas Mirkiseték Apraáma nan̄kaamas páantin asa Apraáman shiir awajsamiayi. 8 Israer-shuarti tias akankamun súajnia nú shuar aya aents ásar tuke pujuschamin ániawai. Antsu Mirkiseték jakamun Yus-Chicham penké ujaatsui. 9 Yamá Riwí weeá shuar kuit akankamun achiktin ániawai. Túrasha Apraám Mirkisetékan súakui Riwí weeá nujaj susa ániawai. 10 Apraám weeá ániak ni ayashjía áinis enentáimtusmin ániawai.

11 Muisais akupkamunam Riwí-shuarnumiá aya Arun̄ weeá shuar Yúsnan pujurni ármiayi. Niisha Muisais akupkamu timia nujaj métek penké shuarjaj takasarmiayi. Tura Riwí-shuarnumiá Yúsnan pujurniu takatrijjaj tunáa nekas asakárminiatkiuŋkia Yúsnan pujurni yamarmak, Arun̄ weeachu, anaiki-ashtin ainti. Túrasha Yus Jesusan, Mirkiseték amia áinis, Yúsnan pujurniun anaikiati. Nusha Arun̄ weeachuiti. 12 Tura Yúsnan pujurni yapajniámtai

Muisais akupkamusha yapajniátniuiti. ¹³⁻¹⁴ Nu arantcha, ii Uuntri Jesukristu Riwi-shuarcha antsu Jutá-shuarauyayi. Tura Muisais akupkamujai Jutá-shuarnumiá Yúsnan pujurin atsutniuiti. Antsu nuna takatrin penké túrashtiniuyi. Tuma asamtai nújajisha Muisais akupkamu yapajniátniuiti.

¹⁵ Nú páantcha awajsamniaiti. Wats, Yúsnan pujurin yamarma nuka Mirkisetékjai méteketete. ¹⁶ Niñkia Riwi shuar asa Yúsnan pujurin ajaschamiayi, antsu jákashtin asa nu kakarmajai Yúsnan pujurin ajasmiayi. ¹⁷ Tuma asamtai juna Yus Jesusan áujmatui:

“Mirkisetékka Yúsnan pujurin amia núnismek Amesha iniannatsuk Yúsnan tuke pujurin átatme.”

¹⁸ Nujai yaunchu akupkamu péñkercha ajasmatai japirmaiti. ¹⁹ Muisais akupkamuka shuáran péñker awajsachminiuyayi. Antsu Yus in ti shiir awajtamattajnia nu nákaji. Nujai Yusai ti shiir jeéáitji.

²⁰ Nunasha Yus “nekas tajai” tusa Niñki pachiimias tumammiai. ²¹ Riwi-shuarnumiá Yúsnan pujurin Yusa naarj pachitsuk anaikiamu ármiai. Antsu jú Yúsnan pujurniunka Yus imia Niñki pachiimias anaikiamiayi. Tura Nin júnis tímiayi:

“Uuntka imia Niñki pachiimias tiniu asa penké yapajjáshtatui. Niisha “Mirkisetékka Yúsnan pujurin amia núnismek Amesha tuke Yúsnan pujurin átatme.”

²² Tuma asamtai Jesuska nekas uwemtikrattajai tusa yaunchu amia nujai nankaamas péñker Chichaman iwiarturuiti. ²³ Yaunchu Yúsnan pujurin untsurí ármiai. Chíkich jakamtai chíkich tuke takaarmiai. ²⁴ Antsu Jesus tuke jákashtin asa chikichan ikiurkishtatui. ²⁵ Tuma asa tuke iwiaaku pujak ni shuarin tuke Yúsan áujtusminiaiti. Tuma asa shuar Nin enentáimtusar Yusaj weankarun tuke uwemtikramniaiti.

²⁶ Tuma asa Jesus Yúsnan péñker pujurin asa ii atsumajnia núkete niisha. Niisha ti shiir asa penké tunaarinchaiti. Ashí tunaariniunmayá kanakniuiti. Tura Yusajai métek Uunt ajasuiti. ²⁷ Niisha yaunchu Yúsnan pujurniu uuntri armia núnichaiti. Yaunchua nuka murikiun máawar ashí tsawant Yúsan suu ármiai. Nujai emka ni tunaarín nuyá ashí shuara tunaarín asakátin ármiai. Tura Jesuska jákatniunan chikichki surumak ashí shuara tunaarín asakátramiayi. ²⁸ Muisais akupkamuka penké shuarnak tuke péñkercha ajin Yúsnan pujurniu úuntrin anaikiaiti. Tura nu ukunmanka Yus, nekas niñki pachiimias, ni Uchirín, tuke péñkera nuna, Yúsnan pujurniu úuntrin anaikiaiti.

8

Nankaamas péñker Chichaman Jesus takartamji

¹ Nekas juna tájame: Yúsnan pujurniu uuntri Jesus in ti shiir yainma asa akupin pujutainium Yusa untsuurin nayaimpiniam pujusuiti. ² Nekas Yusa Jeé nayaimpinma nu aents najanachma antsu Yus najanamuiti. Nu Jesus Yúsnan pujurui. ³ Ashí Yúsnan pujurniu uuntri ainia nu, shuar Yúsnan susamuncha tura naman maar Yus sútaincha Yúsan ashí súsatin ániawai. Núnisan Jesukristusha Yúsan súsatniuiti. ⁴ Juyá Yúsnan pujurin Muisais tímia nuna Yúsan yamaisha susamin akui Jesus ju nunkanam pujakka Yúsnan pujurin áchainti. Antsu nayaimpiniam takaawai. ⁵ Yus yaunchu Muisaisan nayaimpiniam írunna nuna iniaktus tímiayi “Ame wáinkiamna nujai métek ashí najanata.” Túramu asamtai ashí yaunchu Yúsnan pujurin Muisais

najanamujaj takainia nu aya nayaimpiniam ana nuna nakumkamujajin takainiawai. ⁶ Antsu Jesus ti nekasa nujaj nayaimpiniam takaawai. Muisais akupkamuka shuáran péñker awajsachminiaiti. Antsu Yus in ti penker awajtamsattaji. Kame Yamaram Chichamnum Yus ashí túrutmattajnia nu Muisais akupkamunam ana nuna nankaamas ti penker áiniawai. Tuma asamtai nankaamas péñker Chichaman Jesus takartamji.

⁷ Kame Emka Chicham, Yus Muisaisjaj yaunchu najanamia nu, nekas péñkeraitkiuinikia Yamaram Chichaman najanachaayi. ⁸ Antsu péñkercha áiniakui Israer-shuaran tímiayi:

“Uunt Yus tawai: “Tsawant jeamtai ashí Israer-shuarjaj Yamaram Chichaman najanattajaj. ⁹ Yaunchu ju shuara uuntrin Ejiptunmaya yaruakmiaj nuí Emka Chichaman najanamjai. Tura Yamaram Chichaman najanattaj nu núnisha átatui. Emka nuna uminiachkui ajapan iniaisarmajai.” Núnis tawai Uunt Yus. ¹⁰ Tura nu arantcha tawai: “Tsawant jeamtai Israer-shuarjaj Yamaram Chichaman najanattaj nuka júnis átatui. Wi akupeajna nuna enentáin paant enentáimtikrartatjai. Nuyá ni Yusri ártatjai tura niisha Wíi shuar ártatui. ¹¹ Nuísha Yúsán nekaat tusa jintinnaiyachartatui. Kame ni ajsa ni yachjsa kame ashí shuar, uchisha uuntcha, ashí nekarawartatui. ¹² Tura ashí ni tunaaríncha tsanukuraran ni yajauchirin atak penké enentáimtuschartatjai” tímiayi.” Tu áarmaiti.

¹³ Wats, Emka Chicham yajauch ajakui Yus Yamaram Chichaman nájanek pujurui. Tura yajauch ajasua nuka wárik ajapnattawai.

9

Yusa Jee nayaimpinmasha tura ju nunkanmasha

¹ Ayu. Yus shiir awajsatniuka Emka Chicham timia nujaj métek túratniuyayi. Tura ju nunkanmaya Yusa Jeeñ weriar Yús shiir awajsatniuyayi. ² Nu Jeeasha júnis tesakmauyayi. Nékatka Shiir Tesaamu tutainti. Nuí asuitin ekeemakar tsápin awajtaisha tura misasha Yus iniaktusma tantajaj pujuyayi. ³ Nuyá-tesaamuka Imiá Shiir Tesaamu tutainti. ⁴ Nuí kunkuin ekeemataisha kurijijaj kuerma tura Chícham Aarma Chumpitiaisha pujuyayi. Nusha ashí kurijijaj kuérmauyayi. Tura inít kurijijaj najanamu ichínkian maná yurumak enkemniuyayi. Nuyá Yúsñan pujurniu uuntri Arunka ushukrutairi yaunchu tsapaak janukukmia nusha enkemniuyayi. Nuyá Yus najanamu Chícham Muisais kayanam aarmasha enkemniuyayi. ⁵ Nuna úkurin Kirupín, nayaimpinmaya suntara nu, kurijijaj nakumkamu wajarmiyai. Nusha Yusa shírmariñ nakumkarmiyai. Tura ni nanapéjaj shuara tunaarín ayamprutain nukúakuyayi. Nuna arantka yamá etserkatin atsumatsji.

⁶ Núnis aa asamtai Shiir Tesaamunam ashí Yúsñan pujurin tuke wániak Yúsñan takasarmiyai. ⁷ Tura Imiá Shiir Tesaamunmanka aya ni uuntrin wáiniauyayi. Tura niisha ashí uwitin aya chikichik tsawant wayamiayi. Wayak ni tunaarjsa tura ashí shuara tunaarj tsanukurnarat tusa Yus súsatniu namanké numpen juu ámiayi. ⁸ Yusa Wakanj núnis atí tusa nuna mash iwiaramiayi. Tura asa juna paant awajturmajai. Jú nunkanmaya Yusa Jee pujakui tura aya nuñ Yus shiir awajsamniaitkiuinikia nekas Imiá Shiira nuí Yus pujamunam wayatín tuke itiuurchat ainti. ⁹ Nusha yamá pujuiniaj nuna enentáimtikrampratniuitji. Shuar Yus shiir enentáimtikratniun namanken maa suíniaksha nu shuar ni tunaarjijaj tuke itit enentáimtumainiawai. ¹⁰ Warí,

aya yurumátniusha umartincha nijjartintcha tura ashí núnisan túratniujai aya pátatek asamtai enentáiniam ana nuna iwiarachmin áiniawai. Antsu Yus nú túratniunka yapajjái niuyayi. Tuma asamtai yapajniátsaiñ túratin áiniawai.

¹¹ Tura yamaikia Kristu táwiti tura Yúsnan pujurniu uuntri ajas Yamaram Chichamnum Yus ti penkeran túrutmatniua nuna pujurturmaji. Niisha ti shiir Yus Jeá aents najanachmanum takaawai. Nu Jeá ju nunkanmayanchuuti. ¹² Tura Kristu Imiá Shiir Tesaamunam namañke numpéjai wayachuuti antsu ni numpejaink' wayaiti. Tura aya chikichkí wayá ii tunaarin asakturmar tuke uwemtikrampramiayi. ¹³ Nekas namañké numpesha tura áisamu yun'kunmirisha tunáa shuarnum pátatek ukatkamu aya pátatek shiir awajsamniuyi. ¹⁴ Túrasha Kristu numpé ii tunaarin penké asakáruiti. Túramtai yamaikia tunáa jákatniunam júana nujai itit enentáimtumatsuk nekas iwaaku Yus shiir umirkanniaitji. Kristu penké tunaarincha asa tuke jákashtin Wakaní kakarmarjijai jákatniunam Yusaj surumakmiayi.

¹⁵ Nu asamtai Jesukristu Yamaram Chichaman shiir takarniuiti. Yaunchu Chichamjai tunáa nekas tsankurachma asamtai Kristu jaka nu tunaancha tsankurarmiayi. Nujai ashí Yus-shuarti Yus achikma asar Yus tsankatramajnia nu wáinkiar tuke wararsattaji. ¹⁶⁻¹⁷ Shuar ni kuítrin akantratak chichaman najanatuuiti. Tura jáatsaiñ nu kuit akantrashtini-aiti. Aya nii jakamtai nu chicham najanamu uminkiatniuiti. ¹⁸ Nu asamtai Emka Chicham Muisaisjai najanamusha maamu numpé ukatramujai akupkamuyayi. Nujajisha namañ máatniuyayi. ¹⁹ Muisais nu akupkamun ashí shuáran ujakarmiayi. Nuyá ure kapaakujai tura nupajajsha namañké numpé entsajai pachimpramujai ayak akupkamu papincha ashí shuar-nasha ukatkarmiayi. ²⁰ Tura tiarmiayi "Ju numpajai "Chícham Yus akupturmarena nu nekas umiktiniaiti" tawai." ²¹ Nuyá nu numpajai Yusa Jeencha ashí nuj takastin irunmia nunasha ukatkarmiayi. ²² Nu akupkamujai penké ishichik numpajainchu shiir awajsamniaiti. Túrasha numpajainchu tunáa penké asakárchamniaiti.

Kristu jakamujai tunáa asakármniaiti

²³ Tuma asamtai Muisais najanamu nayaimpiniam ana nuna aya nakumkamu ásar namañké numpejai shiir awajsamu ármiai. Antsu nayaimpiniam nekas írúnna nu, nañkaamas kakaram numpajai shiir awajsatin áiniawai. ²⁴ Kóstuka yaunchu Yusa Jeen aents najanamunam takastaj tusa wayachmiayi. Nuka nayaimpinmayan aya nakumkamuiti. Antsu nekas nayaimpiniam Yus pujamunam wayá asa in áujturmaji. ²⁵ Yaunchu Yúsnan pujurniu uuntri ni numpejainchu ashí uwitin Imiá Shiir Tesaamunam wain ármiai. Tura Kóstuka untsurj wayachuuti. ²⁶ Kame untsurj wayatniuitkiuñkia ni numpejaink' wayá asa yamañkamtaiknumia untsurj jákaayi. Antsu yamaikia ju nunka amúamunam Kristu chikichkí jákatniunam surumak tunaan ashí asakáruiti. ²⁷ Ashí shuar chikichkí jakar nuyá ni túramun Yusaj nekatniun nantaktin áiniawai. ²⁸ Núnisan Kristu chikichkí jákatniunam surumak shuara tunaarin asakáruiti. Tura atakka tunaan asakártinian wantinkiashtatui. Antsu ni tátintriñ nákania nuna uwemtikkraatsa wantinkiatatawai.

10

¹ Muisais akupkamuka ukunam ti penker átatna núchaiti. Antsu nuna aya nakumeawai. Tuma asa ashí uwitin namañ maar Yus sútaijjajsha

shuara tunaarj̄n asakátrachminiati. ² Kame asakátraka shuar nekas shiir awa-
jsamniaitkiuñkia Yus namañ maar súsatniun atsumachuk iniaisaraꞗyi. Iis,
mash tsankuramuitkiuñka ni tunaarj̄j̄ai itit enentáimtumashcharainti. Túrawar
namañ maar Yus súsatniun iniaisarañti. ³ Antsu namañken maar ashí uwitin
tuke súniak nuj̄ai ni tunaarj̄n tuke enentáimtuiniawai. ⁴ Warí, namañké
numpej̄ai ii tunaarj̄ penké asakárchamniati.

⁵ Nu asamtai Kristu jú nunkanam taa Yúsan chicharuk tímiayi:

“Namañ maar sutaisha penké nakitráme. Antsu ayash iwíaram surusuitme.

⁶ Namañ áesamusha tura tunaan asakártin namañ susamusha waker-
atsme. ⁷ Tuma asamtai “Yusrú, tímiyajai. Winia áatruma núnisnak ame
wakeramurmin umiktajtsan táwitjai” tímiyajai” tímiayi.

⁸ Emka, Muisais akupkamu aijn, namañ susamuncha, tunaan asakárat tusa
namañ maar susamuncha, namañ áesamuncha Yus ashí nakitraitit tawai
Kristu. ⁹ Nuyá “Yusrú, ame wakeramurm̄n umiktajtsan táwitjai” tawai.
Nuna taku namañ maar sútain “Asakáiniati” tawai. Tura chikichan ikuuawai.
¹⁰ Jesukristu Yúsan umiruk jákatniun chikichkí surumakmatai Yus in tunaar-
incha shiir awajtamsaitji.

¹¹ Tura Israer-shuarnumiá Yúsnan pujurin ashí tsawantaj nú namañnak
máawar tunaan asakáchunak Yúsan ti suu áiniawai. ¹² Antsu Jesukristuka
jákatniunam chikichkí surumak ashí shuara tunaarj̄n asakár atakka penké
jákashtiniati. Nuna tura Yusa untsuurin̄i nekas akupin pujutainium pu-
jusuiti. ¹³ Tura Yus ni nemasr̄j̄n nupetak nin umirkarti tusa sústartatna nuna
nákawai. ¹⁴ Chikichkí jakamuj̄ai ni shuarj̄n tuke tunaarincha awajsaruiti.

¹⁵ Yusa Wakanj̄sha núnisan̄ tawai. Emka tímiayi:

¹⁶ “Yamaram Chichaman najanattaj nuka júnisan̄ átatui: Wi akupeaj nuna
ni enentáin paant enentáimtikrartajai.” ¹⁷ Nuyásha tawai: “Ni yajauch
tunáa túramurin̄ penké enentáimtuschattajai.”

¹⁸ Tuma asamtai, ii tunaarj̄ tsankuramu asamtai atak in jarutramkatin
atsumatsji.

Yus tuke shiir enentáimtusar Yusaj jeartai

¹⁹ Tuma asamtai, yatsurú, Jesukristu numpej̄ai péñker awajsamu asar
sapijmiatsuk shiir enentáij̄j̄ai Imiá Shiira nuñ, nekas Yus pujamunam
wayamniatiji. ²⁰ Nuñ wayatniuka Kristu jaka Yusa J̄eñ tesaamun júsatniua
áintsan ánturmamiayi. Yamaisha tura tuke wayamnia átatui. ²¹ Jesus Yúsnan
pujurniu uuntri asa ashí Yus-shuartin wáitmak pujurtamji. ²² Tuma asamtai,
tuke enentáij̄j̄ai Yus imiá nekas enentáimtusar Yusaj jeartai. Ii enentá
Kristu numpej̄ai nijarma asamtai nekas enentáimtakur ii tunaarj̄j̄ai itit
enentáimtumashchatniuitji. Tura ii ayashisha péñker entsajai imianniuitji.
²³ Yus tsankatramkattajnia nu shiir enentáimtamun iniaitsuk kakaram ajarar
tuke emetatniuitji. Yus tsankatramkaitji nuna umiktatui. ²⁴ Péñker anenain
tura péñker túrin ajasartai tusañ mai yainiaikiartiniatiji. ²⁵ Yusa J̄eñ Yus-
shuarj̄j̄ai tuke iruntrat̄in iniaisashiniatiji. Chikich iniainiakuisha iikia tuke
iruntrat̄niuitji. Nuñ irunkurkia ikiakánairtiniatiji. Tura Kristu tátin tsawantri
ishichik ajasu asamtai nú nukap túratniuitji.

Anearta. Ti tsúumainti iwiaaku Yusa kakarmarj̄j̄ai asutiniátin.

²⁶ Túrasha shuar nekas chichaman nékayat wakeramurj̄j̄ain̄ tunaanum
wekaakka Kristu jakamun nakítia asamtai chikich atsawai ni tunaarj̄n
asakátratniun. ²⁷ Áyatik ashamak ti tsuumai sumamat̄in tsawantan

nákasminiaiti. Nu tsawantaj Yus ni nemasrin ti kakerak asutiak mash emesrattawai. ²⁸ Shuar Muisais akupkamun umikchamtai tura jimi ar shuar menaintiusha etserkarmatai waitnentsuk máatniuyayi. ²⁹ Núnisaitkiunkia shuar Yusa Uchirin wishikiainiakka ni numpencha nakitiainiakka tura Yus nin anea nuna Wakanincha katsekainiakka nuna nankaamas asutniachartatuak. Warí, nii nakitiana nu numpajaj Yamaram Chicham nekas umirkatin awajsamuyayi. Tura nújajisha nii ti péñker awajnasiniuyayi. ³⁰ Ii Uuntri Yus júnis tímiayi “Wi asutiátniuitjai. Wi yapajkiattajai.” Nuyásha tímiayi “Wíi shuara tunaarjin ti paant nekarattajai.” ³¹ Ti tsúmanti iwiaaku Yusa kakarmarjijaj asutniátin.

³² Tura atumsha yámankamtaik Yusna nekaarum Yus-shuar ajasmarum nu enentáimsatarum. Kakaram ajasrum ashí itiurchat katsuntramarme. ³³ Chikichtirmeka katseknakmarme tura ashí ímiainiamunam yajauch awajnasmarme. Chikichcha nu shuarum pachitkia asarum itit awajnasmarme. ³⁴ Atumsha sepunam pujuinia nusha waitnentrarmarme. Tura shiir warasrum kuítrumin atantramainiakui sha katsuntramarme. Nayaimpiniam tuke amuukashitin kuit pachiktin asarum túramarme. ³⁵ Tuma asarum yawetsuk Yus tuke enentáimtusrum kakaram ajastarum. Túrakrum nankaamas akinkiatarme. ³⁶ Atumsha esetra enentáimsarum Yus wakera nu túrakrum Yus atumin amastinia nu wainkiattarme. ³⁷ Kame Yus-Chichamnum áarmaiti: “Tátinia nu ishichik ajasai. Wárik tátatui. ³⁸ Shuar Yúsan nekas enentáimtak péñker wekaak uwemprattawai. Tura iniyaiyakuinikia nin wararsashattajai.”

³⁹ Tura iikia iniaisar mesena nú shuarchaitji. Antsu Yus shiir enentáimtusar uwempraitji.

11

Yus nekas enentáimtustin

¹ Yus nekas enentáimtakur “nákajnia nuna, Yus nekas suramsattajai” taji. Tura wáinchaitiatar “nekas wainkiattajai” taji. ² Yaunchu ii uuntri Yúsan nekas enentáimtuiniakui Yus “péñkeraitme” tiarmiayi.

³ Aya Yus enentáimtakur ju nékaji: Yus aya ni chichamejain ashí nunkan najanamiayi. Túramtai ashí wáiniainiaj nu wáinchataijjaj najanamu áiniawai.

⁴ Apir Yúsan nekas enentáimtak Kaínjaj nankaamas péñkera nuna Yúsan susamiayi. Túramtai Yus “péñkeraitme” taku shiir yuminsamiayi. Tuma asamtai Apir jákaitiat tuke enentáimtikramji.

⁵ Eruksha Yúsan nekas enentáimtak iwiaakuk nayaimpiniam junakmiayi. Yus júkimiú asamtai wáinkicharmiayi. Tura Yus-Chichamnum aarma “Eruk júnatsuk Yúsan ti shiir enentáimtikniuyayi” tawai. ⁶ Tura Yus nekas enentáimtachumka çitiurak Nii shiir enentáimtiksatam? Nekas enentáimjaj Yúsan weantuktaj tusam wakerakmeka, emka, Yus iwiaaku pujawai, tu enentáimpratniuitme. Nuyásha, Wi Yúsan eakuinikia Yuska winia yáintkiattawai, tu enentáimsatniuitme.

⁷ Yus, ‘amaarkatniun akupkattajai’ tiniu asamtai, Nuaisha Yúsan nekas enentáimtak, amaarun wáinchaitiat, “túrunattawai” tímiayi. Túrak Yus timiajaj métek uunt kanun najana ni shuarincha uwemtikramiayi. Tura Yúsan nekas enentáimta asamtai Yus “péñkeraitme” tímiayi. Tura ni umirkamujaj chikich shuar Yúsan enentáimtachun súmamtikiawarmiayi.

⁸ Tura Apraámsha Yúsan nekas enentáimtak Yus “núńkem ikiukim wetá” tutai shiir umikmiayi. Yus tuke nin súsatniua nú nuńkanam wémiayi. Turasha ni nuńken ikiuak ni jeatniun nékatsuk jiinkimiayi. ⁹ Yúsan shiir enentáimtak nú nuńkanam Yus nin tsanġatkamuitiat írara áinis pujusmiayi. Nuap jeanam pujuyayi. Núnisanġ ni uchirġ Isaksha tura ni tiranġġ Jakupsha nuġnġ tsanġatkamuitiatan írara núnisar pujuarmiayi. ¹⁰ Kame Apraámka nayaimpinmaya ashirchamin péprunam pujustinian nákasmiayi. Yus nu pepru péńker iwiar jeamka asamtai umuchkiachminiaiti.

¹¹ Apraáma nuwé Sarasha Yúsan shiir enentáimta asa úuntach áyat ajaprukmiayi. Yus timia nuna umiktatui tau asa uchin takusmiayi. ¹² Tura nuġai Apraám ti úuntchitiat ti pampanmiayi. Nii chikichkitiat ni pampanmarġ ti untsurġ ajasar yaajai métek tura náikmijiai métek nekapmarchamnia ajasarmiayi.

¹³ Ashí nu shuar Yus tsanġatkamun wáintsuk jákarmiayi. Túrasha Yúsan nekas enentáimtuiniak arantiġ wáinkiar warasar shiir enentáimtiarmiayi. Túrawar “ju nuńkanam nekas aya íraraġti” tiarmiayi. ¹⁴ ‘Íraraġti’ tu chichainiak chíkich nuńka eamun páant awajainiawai. ¹⁵ Niisha matsatu winíarmia nuġ atak waketkitniun wakeruiniakka páchitsuk waketkíaraġyi. ¹⁶ Tura antsu niisha nuna nanġkaamas péńker nuńkan nayaimpinmaya nuna enentáimtiarmiayi. Túmainiakui Yuska péprun iwiartur susa asa “wi ni Yusrġntjai” títinian natsantatsui.

¹⁷ Ataksha Apraám Yúsan nekas enentáimtak “chikichik uchi amasmaj nu, namánkea áitkiasmek maam surusta” takui Apraám Isakan ni uchirġn Yus susatniun penġé suritkiachmiayi. ¹⁸ Kame Yus “Isakġai ti pampanġatme” tau asamtai ¹⁹ Apraám “máamtaisha Yus iniantkittiaawai” tu enentáimpramiayi. Tura Yus ukunam máatiun suritkiamtai Isakan máachiat nekas jákatniunmaya uwempran nantakniua áintsanġ wáinkiamiayi.

²⁰ Isaksha Yúsan nekas enentáimtak ni uchirġn Jakupnasha Esauncha ukunam ni túrunattana nuna uġakarmiayi. ²¹ Núnisanġ Jakup Yúsan nekas enentáimtak jatsuk ni tiranġġn, Jusé uchirġn, shiir túrunattana nuna uġakarmiayi. Tura ti uuntach asa máshuġnġn ushukruma Yúsan shiir awajsamiayi. ²² Tura Jusesha jákatniurġ ishichik ajatesmatai Yúsan nekas enentáimtak Yus ukunam Israer-shuaran Eġiptu nuńkanmaya júkiartatna nuna uġakarmiayi. Tura jiiniainiak ni ukunchġn júkiar Yus tsanġatkaamu nuńkanam iwiarsarat tusa akupkamiayi.

²³ Muisaisa aparġsha nukurġsha Yúsan nekas enentáimtuiniak Muisais ti shírmach asamtai suntar máawaraġn tusa akiiniamunmaya menaintiu nantu úġakarmiayi. Tura uunt akupin akupkamun ashamkacharmiayi. ²⁴ Muisaissha Yúsan shiir enentáimtak uunt ajas Eġiptunmaya uunt akupni nawanrġ uchirġ ajastinian nakitramiayi. ²⁵ Antsu Eġiptu nuńkanam ishichkisha tunaan warartsuk Yusa shuarġġai métek wáitsatniun nanġkaamas wakerukmiayi. ²⁶ Nuġai Krístun yajauch awajsarmia núnisanġ niisha wáitsatniuyui. Túrasha ashí Eġiptu nuńkanam péńker ironmia nuna nanġkaamas Yus nin ukunam tsanġatkatta nuna shiir enentáimtusmiayi. ²⁷ Niisha Yúsan shiir enentáimtak uunt akupin kajeramu aġn ashamsuk Eġiptu nuńkanmaya jiinki wémiayi. Yúsan wáinchiat shiir enentáimtamujai wainiua áinis kakaram ajas ashí katsuntramiayi.

²⁸ Muisais Yúsan shiir enentáimtak yámankamtaik paskua namperan najaneak ashí Israer-shuaran numpajai ni wáitirġn kuérat tusa akupkarmiayi.

Nujaj Yus timia núnisan nayaimpinmaya suntar nuna iis nu jeanam iwiajrin máatsuk nankaikit tusa tímiayi.

²⁹ Israer-shuarsha Yúsan shiir enentáimtuinia ásar Kapaantin Entsa nakaakamtai ajapén ti penker kukarnum katinkiarimiayi. Ejiptunmaya suntarsha núnisan katintai tukamá jakerarmiayi.

³⁰ Israer-shuarsha Yúsan shiir enentáimtuinia ásar Yus timian umirkar siati tsawant Jerikiú péprun téntakarmatai aa tanish sánákmiayi. Nujaj ti yúpichuch nupetkarmiayi. ³¹ Raapsha nu péprunam pujaku Yúsan nekas enentáimtak tsanirmataj áyat Israera suntarjin mamikmak wekaan ti penker itiaa asa chíkich shuar Jerikiúnam matsatua nujaj jákachmiayi.

³² Nu arantcha Yúsan shiir enentáimtin ti írunui. Jeteúnsha, Paraksha, Sañsunsha, Jiptísha, Tawitcha, Samuershá, Yúsnan etserniusha nu shuar ármiai. Mash ujaktinian jeatsjai. ³³ Niisha ashí Yúsan nekas enentáimtuinia ásar Yusa kakarmarin niisháa niisháa iniaktusarmiayi. Nuna túruiniak chíkich chíkich nunkanmaya aentsun nupetkarmiayi, nuisha pénger akupkarmiayi, tura Yussha ni timia núnisan yañkiarimiayi. Uunt yawancha kajeche awajarsarmiayi, ³⁴ uunt jiniasha ikiajniakarmiayi, puniajaj mantamnatniuncha uwemprarmiayi. Kakarmachusha kakaram ajar mesetnumsha ni nemasrincha nupetkarmiayi. ³⁵ Nuwasha ni uchirj jakan iniantkimiun wáinkiarimiayi.

Chikichcha wáitias mantamnowarmiayi. Ti shiir pujustinnium nantaktiai tusar nú tsawantaj uwempratniun nakitrarmiayi.

³⁶ Chikichcha katseknakarmiayi, asutniáwarmiayi, jirujaj jinkiarwar sepunam enkenawarmiayi. ³⁷ Kayajaj tukú mantamnowarmiayi, jiniapetek tsupinkiarimiayi, Yúsan iniaisarat tusa nekapnasarmiayi, puniajaj mantamnowarmiayi.

Aya wékainiarmiayi, kuítrincha ásar nuapen entsararmiayi, shuar nincha áintrar wáitnenmai awajiarimiayi.

³⁸ Atsamunmasha, naincha, waanmasha, ashí nunkanam wekain ármiai. Nu shuarjainkia ju nunkanmaya shuar imiá yajauch ásar niijjaj pujumainchu ániawai. ³⁹ Nu shuar Yúsan shiir enentáimtuiniakui Yus "péngeraitrume" tiarmiayi. Túmaitiat ni tsañkatkamun wáinkiacharmiayi.

⁴⁰ Yuska nuna nankaamas péngeran iwiarturaru asa tura in yamá pujajnia juna enentáimturma asa niisha iisha mai metek tsaninkiar ti penker ajasarti tu enentáimsamiayi.

12

Jesus tuke enentáimtusar tsékentiai

¹ Ashí ju nunkanam túrajnia nuka shuar nakuruiniak tsékena nujaj nakumkamniati. Ashí shuar yaunchu Yúsan shiir enentáimtusaruka téntakar írmainiaji. Tuma asantai ashí kijin ana nusha tura ashí tunaaka itit awajtamaj nusha ajapa iniaisar tura katsuntrar tsékenkir jeatai. ² Túmakur Jesus tuke enentáimtusar tsékentiai. Ashí shuarjaj nankaamas Jesus Yúsan ti nekas enentáimtak aya péngernak túramiayi. Tuke nekas awakmakmiayi.

Imiá tunáa shuáran krusnum máatin ajin núnisan natsanmainium jákatniun surimiakchamiayi. Antsu ukunam ti shiir warastin átatna nuna enentáimtak nuna ashí katsuntramiayi tura nuyá Yusa untsuurinj akupin pujutainium pujusuti.

³ Tunáa shuar Jesusan wáitkiasarmia nu enentáimpratarum. Túrarum pimpit-suk katsuntratarum. ⁴ Átum tunaajaj máaniakrum Jesus túramia áintsarum

numpemsha puárchaitrume tura jákachuitrume. Nuísha katsuntrarum jeat-niuitrume. ⁵⁻⁶ Yus nekas ni uchirín chicharkatniua áinis túramprum nu kajinmatkichmashuram. Júnis tawai:

“Uchirú, wi jintintramajmena nu kajinmatkip. Asutiámkuisha kúntuts puju-saip. Kame Uuntka Nii aneana nuna jintintiawai. Tura ni uchirí ajasat tusa achiana nuna asutiawai.”

⁷ Tuma asamtai Yus ni uchiría áinis asutiámkuisha katsuntrarum. Warí, ashí apa ni uchirín chicharkashtatuak. ⁸ Tura ashí uchin chicharkatniua núnis Yus atumin chichartamchakrumniñkia nekas ni uchirínchuitrume. Antsu chikichnaitrume. ⁹ Nu arantcha ii aparí uchich árinñ chichartamkurin umirniuyaji. Nu arant nuikia nekas ii Aparí nayaimpiniam pujana nu shiir umirkar tuke shiir pujustin wakerishtatjik. ¹⁰ Ii aparí ishichik ni enentájjijai wakeramu chichartamniuyaji. Antsu Yuska ti penker awajtam-sataj tusa nekas atsumajnia nujai métek chichartamji. ¹¹ Kame nekasaiti, ashí asutiámu yamaikikia waraschamniaiti, antsu kúntuts enentáimtikramji. Túrasha ukunam nu asutiámujai unuimij nuka péñker túratniun tura shiir pujustinian yáinmaji.

Anearta. Yus tana nu nekas antuktiniaiti.

¹² Nujai pimpirarusha tura kakarmachu ainia nusha ikiakárarum. ¹³ Túrarum péñker esettsa enentáimsarum wekasatarum. Túrarum tujintiainia nusha shiir wekasatin yaiñtarum.

¹⁴ Ashí péñker túrakrum ashí shuarjai nawamnaikiarum péñker wekasatarum. Tunaan túrunkia Yusaj penké jeashtatui. ¹⁵ Aneartarum. Shuar nakitiakuñkia Yus nu shuáran shiir yáinñinian tujinkiattawai. Nu shuar yajach enentáimiuk chikich shuárnasha itit awajas tunaanum útsukartatui.

Yau6 Tsanirmawairap.

Yusna nusha nakitirairap. Isaka uchirí Esau péñkera nuna nakitramiayi. Yus “iwiajrín núkap súsatniuiti” timia nuna enentáimtuschamiayi. Tura asa aya ishichik yurumkajai yapajíamiayi. ¹⁷ Tura nuyá ni aparí ukunam túrunattana nuna takui Esau ti penkeran wakerimiayi. Tura ti útkuisha ni aparí nin nakitramiayi tura ni chichasman yapajíatniun tujinkiamiayi.

¹⁸ Atumjainkia Yusna enentáimtusminia nuka yaunchu Israer-shuarjai ashammaín amia núnischaiti. Yáunchuka Yus ni akupkamurín Israer-shuaran súakui Senai muranam jeeármiai. Muranam uunt jisha kiritniusha teesha nasesha ajamiayi. ¹⁹ Tura kachu kakaram umpúamusha ámiayi. Tura Yus kakaram nin chichaream antukar ashamkar atakka chichaschati tu searmiyai. ²⁰ Kame Yus chichaak “Shuarsha tan̄kusha ishichkisha nú muranam najarmatai nuka kayajai tukurar tura nan̄kijjaisha máatniuiti” tímiayi. Nu akupkamai ti ashammai asamtai “chichaschati” tiarmiayi. ²¹ Wáinkiarminia nu ti tsuumai asamtai imia Muisaissha “Ashamakun kuraajai” tímiayi.

²² Antsu atumjainkia Yusna enentáimtustin nujai nan̄kaamas péñkeraiti. Átumka nayaimpinmaya Seun náinnium, Jerusaréñ iwiaaku Yus pujutai péprun nakumeana nu jeeáitrume. Nuísha ti untsurí nayaimpinmaya sun-tarsha ²³ ashí Yus-shuarsha shiir iruntrarú ániawai. Yus-shuaraka ashí nayaimpiniam ni naarj anujtukma ásar ni uchirí ániawai. Nuísha Yus, ashí shuaran ti nékana nu, pujawai. Niísha shuáran ti penker awajsamtai nu shuar jákar ni wakaní nu j shiir pujuiniawai. ²⁴ Nuísha Yamaram Chichaman in takartamajnia nu, Jesus, pujawai. Nuna numpé ukatramujai ashí shiir awajsaiti. Nu numpasha Apira numpejai nan̄kaamas péñkeraiti. Kame Apir

ántar máamu asamtai yapajmiatrukta titinia áintsan enentáimtaji. Antsu Jesus tunáa shuáran péñker awajsartaj tusa jakamiayi.

²⁵ Nuka ti penker asamtai Yus chichartamprumna nu nekas anturkatniuitrume. Yaunchu Yus jú nuñkanam murá chichaamun anturkachar asutniátniunam uwempracharmiayi. Nujkia Yus nayaimpinmaya chichartamkurin ántachkurkia ishichkisha uwemprashtatji. ²⁶ Yaunchu Yus chichamejai nuñkan úrmamtekiarmiayi. Tura yamaisha tawai “Ataksha aya núñkankechu antsu nayaimpinmasha úrmamtekiattajai.” ²⁷ “Ataksha” tana nujai “ashí muchitrámnia nu amuukartatui” tawai. Tura muchitrachminia nu juakartatui. ²⁸ Yus in akupkatniun tsankatramaj nuka umuchnakchattawai. Tuma asamtai Yus yuminsatniuitji. Yus wakerana núnisrik wishiktsuk shiir enentáimtusar Yus shiir awajsatniuitji. ²⁹ Maa, ii Yúsriñkia kajerkañka uunt jáa nuke áesaa mash emesramniaiti.

13

Yus shiir enentáimtiksatin

¹ Nuamtak yachja núnisrum tuke mai anenai ajatarum. ² Tuke írar shiir itiaatarum. Nuna túruiniak shuar nékachminiak nayaimpinmaya suntaran itiaawaruíti.

³ Sepunam pujuinia nusha atumsha niijjai pujáa núnisrumek waitnen-trarta. Wáitkiasarma nusha wisha núnisnak wáitsamniapitjia tusarum waitnen-tratarum.

⁴ Nuatnaikiatin péñkeraiti. Shuar ni nuwejai tsanin pujustin péñkeraiti. Tura nuatkamu áinia nusha chikichan eakchatniuiti. Tsanirmana núnaka Yus asutiáttawai.

⁵ Aya kuítiak enentáimtusam pujusaip. Yuska “Kanakchattajai tura penké ikiukchattajme” túramui. Tuma asamtai ame takakmena nujai shiir enentáimsam “maakete” titiá. ⁶ Tiniu asamtai arantutsuk ju tíminiatji: “Winia yainnia nuka Uunt Yúsaiti. Nu asamtai shuar túrutamnia nuna ashamkashtat-jai.”

⁷ Atumin Yus-Chichaman jintintramawarmia nu enentáimtustarum. Yúsán shiir enentáimtuiniak péñker wekasarmia núnisrumek atumsha túratarum.

⁸ Jesukrístuka tuke yapajítsuk nuikiya núnisan yamaisha tura ukunmasha tuke núnisan átatui. ⁹ Chíkich chicham niisháa írunna nu anturkairap. Yus in anenma asakrin kakaram ajasartai. Shuar niisháa yurumkajai enentáiruj kakaram ajastaj táyat penké yáinçhaiti. Yurumeaj nújainchu antsu Yusa aneñkrattairjjiai ii enentáin kakaram ajasminiaitji.

¹⁰ Yáunchu Yúsnan pujurin namañ maar Yus susamunmayan yuu áirmiayi. Tura iikia Yus-sutaj nusháa ana nu súaji. Nusha Kristu jakamu asamtai yaunchua nu Yúsnan pujurin nuj pachiinkiachmin áiniawai. ¹¹ Israer-shuarnumiá Yúsnan pujurniu uuntri tunaan asakártaj tusa namañké numpen júkiar Imiá Shiir Tesaamunam wain áirmiayi. Tura nu namañ arant áesatniuyayi. ¹² Núnisan Jesussha péprunam arant wáitkianas mantamnamiai. Nujai ashí shuara tunaarin ni numpejai nijiatkaiti. ¹³ Núnisrik iisha péprunmaya arant wétinia núnisrik Jesusaj weri Niijjai métek wishikmain katsuntutai. ¹⁴ Kame ju nuñkanam amuukachmin pepru atsawai. Antsu ukunam ti shiir pepru átatna nu nákaji. ¹⁵ Tuma asar namañ maar Yus sútsuk antsu shiir chicham súakur tuke Yus shiir yúmiñkiaji. Tuke núnisar túratai.

¹⁶ Pénker túrakrum takakrum nu ajamnaisatin kajinmatnaikiirap. Nusha ti shiir Yus sútainti.

¹⁷ Yus-shuaran akupin ainia nu umirkarum shiir enentáimtikratarum. Ni takatrin Yúsan ujaktin ásar atumí wakanin shiir wainiainiawai. Niisha itirchatcha antsu wakerumainian túrawarat tusarum shiir yáintarum. Nu túrachkumka çitiurak yainmakarat?

¹⁸ Incha Yus áujstarum. Iisha ashí péñker túratin wakeraji. Túraji enentáimji. ¹⁹ Tura Yus áujkuram Yus ataksha atumjai wainniaikiatniun wari tsan̄katrukāt tusarum seatritiarum.

Amúak shiir chichaawai

²⁰⁻²¹ Imiatkinchanum apujkartinia nú Yus, Jesukristun jakamunmaya iniantkimia nuka, ni numpé kakarmarijjai ashí péñker ana nuna suramsarti. Nujai ni wakeramu túrattarme. Tura Jesukristu kakarmarijjai ashí ni wakeramun in pujurtamas takasti. Ii Uuntri Jesukristu ashí Yus-shuaran ti penker Wáinniuiti. Tura ni numpejai Yamaram Chichaman kakaram awajsamiayi. Nu Chichamsha tuke men̄kakashtatui. Aya Kristu tuke shiir awajnosti. Núnisan atí.

²² Yatsurú, kakaram chicharkajrumna ju shiir enentáimjai anturkatarum. Kame ti wárik áatrajume. ²³ Yamaikia ii yachi Timiutéu sepunmaya jinki an̄kant ajasai. Nuna ujaajrume. Wárik támataingia atumin íitij tusan winiakun niijjai winittijai.

²⁴ Atumí uuntri sha tura ashí Yus-shuarsha amikmaatarum. Itiaria nun̄kanmaya shuarsha amikmatmainiawai.

²⁵ Ashí Yus ti shiir yainmakarti. Nuke atí.

SÁNTIAK pápin áarar akuptukma

Sántiak aarmiania nu

¹ Wi Sántiak Uunt Yúsan tura núnisan ii Uuntrj Jesukrístun umirin asan ju pápin aajai. Ashí Yus-shuartirmin ashí nunñkanam tsakinñmakarum mat-safrumna nuna amikmaajrume.

Nekataĩkia Yúsnumigiti

² Yatsuru, ashí itiurchat wáinkiuřmesha tuke warastarum. ³ Iis, itiurchat-num pujakrum nekas Yus enentáimtaikiurmeke katsuntratĩn unuimiarturume. ⁴ Tura tuke páchiachkuram, tuke katsunteakrum, nuikia Yúsjaĩ ti penker katsuartatrum. Penké atumashtatrum.

⁵ Átum nánkamsarmek nekaatin tujintiakrumka Yusa nekataĩrj seata. Shuar seakuĩ Yuska kajetsuk tura ementutsuk antsu patatas súawai. Tuma asamtai seakminkia suramsattawai. ⁶ Túrasha Yus nekas enentáimtusam, “túratpiash” tútsuk seata. “Cha, nékatsjai surustimpiash” tu seakmeke áńtram seame. Nayaantsa tsukaturj junĩ taa, atúu wakетки ajatsuk. Amesha áintsamek túmame. ⁷ Enentáimjĩn núnisketkuĩñkia, seamna nuna Yus penké suramsashtatui. ⁸ Shuar jimiará enentáimna nuka shiir wekasatniun tujintiawai.

⁹ Yus-shuar, ju nunñkanam kuĩtrĩncha ainia nu, Yus shiir awajsamu nujaj warasti. ¹⁰⁻¹¹ Tura Yus-shuar kuĩtrĩnniuitkuisha péejchach enentáimtikramsha warasti. Iis, nupa kuáñkam tura nantu ti sukuam kaar miniatsuk. Kuĩtrĩnniuka áńtska áńtram seame. Nayaantsa tsukaturj junĩ taa, atúu wakетки ajatsuk. Amesha áintsamek tánkete. Tuke súrutnak pujurkusha itiurchat wáiniuk wárik amuukattawai.

Ii itiurchatrj ana nu

¹² Shíiraiti shuar ni itiurchatrjĩn nekas katsunteana nuka. Nekapsam jíinkiuřka akinkiatniun wáinkiatawai. Iwiaaku átinian, tawasap achiktĩnia núnisan, wáinkiatawai Yus ni aneam tsanñkatka nuna. ¹³ Shuar tunáa túramnia nekapeakka “Yus nuna útsutrutui” tu enentáimprashĩniaiti. Yuska yajuch túramnia enentáimsui túrasha Niisha penké chikichkinkesha tunaanum útsuchuiti. ¹⁴ Antsu ni wakeramurjĩjĩn aents tunaan niñki ikiatmamkaiti yajauch túratniun. Nújajĩñkia tunaanum útsukmaiti. ¹⁵ Nu yajauch wakera-munmayá tunáa akiĩniui. Tura nu tunáa mash amuukamtai jákatin akiĩniui.

¹⁶ Yatsuru, aneakun tájarme, ananñmamawairap. ¹⁷ Ashí penker ana nu, ashí shiir ana nusha nayaimpinmayá Yusak amasuiti. Yus ashí tsáapnia nuna najanaiti. Tura Niin kiritin atsaiñ yapajĩtsuk tuke tsáapniiti. ¹⁸ Ni wakra asa ni nekas chichamea nujaj ni uchirj najatmamjĩ. Tura ashí ukunam átatna nujaj ii émkaitjĩ.

Yus nekas shiir awajsatin

¹⁹ Tuma asamtai aneamu yatsuru, wárik chichastĩn enentáimprairap antsu antuktĩn emka enentáimprata. Núnisan wárik kajekaip. ²⁰ Kajena nuka Yus penker wakeramun túratsui. ²¹ Nu asamtai, ashí penkercha nu tura ashí yajauch írũna nusha iniaisata. Tura tuke enentáijĩjĩn Yus-Chicham ame

enentáimin araamu anturkata. Tura nu Chicham kakarmaiti uwentikram-pratniun.

²² Yus-Chicham umikta. Aya ántukaip. Aya ántakmeka amek ananmamattame. ²³⁻²⁴ Shuar íspikia ímiak ni yapin wapikian wáiniak tura nuyá jáupmitsuk we, ni urukuit nuna wárik kajinmatkishtimpiash. Shuar Yus-Chicham umitsuk aya ántana nuka nujai méteketete. ²⁵ Yus tana nujai ankant ajasminiaiti. Shuar íspikia íimia áintsan nekas Yus péñker táman tuke iniaitsuk enentáimtus, nu shuar kajinmattsuk aya antukchattawai antsu tuke umiktatui. Tura ti shiir waras pujustatui.

²⁶ “Nekas Yúsán shiir umirjai” tana nu tura eseer chichaachkuñka imia niniki ananmamui tura “Yúsán shiir umirjai” tana nuna ántar tawai. ²⁷ Nekas Yus Apa awajitsuk shiir umirkatin júiti: mitiaikiasha wajésha iturchat-num pujuiniakuisha yáintiniaiti tura ju nunkanam ashí tunáa ana nújajsha máatrashtiniaiti.

2

Shuar antra akantrashtin

¹ Yatsuru, ii Uuntrj Jesukristu ti shiir nankaamantua nu enentaimtatirmeka shuar akantratin enentáimsairap. Shuara enentái enentáimtsuk antsu aya pátatke wáinmena nujai aents akantram niisháa enentáimturairap. ² Iis, iruntrumna nuj shuar kuítrintin kurí aniyu aweera tura péñker iwiarmampra wayashtimpiash. Tura núnisan chíkich kuítrincha aruta entsaru wayashtimpiash. ³ Tura kuítrinnia nu “Péñkera juj pujusta” tichatameash. Tura kuítrincha “Atu wajauta, túrachkumsha juj nunkansha pujusta” tichatameash. ⁴ Nu tákumka yajauch enentáimpram jimiará enentáijjai aents enentáimtame.

⁵ Aneamu yatsuru, antuktarum. Ju nunkanam kuítrincha ainia nuna Yus achikiuiti Ní shuar ajar Nin nekas enentaimtin ajasartinian. Tura ashí nayaimpiniam írunna nunasha Yus nin tsanatkattawai. Ashí shuar Yúsán aneena nuna anajmatra asa nin tsanatkattawai. ⁶ Átum antsu kuítrincha natsant awajearme. Iista, kuítrinnia nuka timiá iturchat awajtamainiat-suk. ¿Nuikia níchuk ainia achirmak kapitánnium japiki júramprumna nu? ⁷ ¿Nínkichuk ainia Kristu naarj shiira nuna ántar pachikiar penké yajauch áujmatainia nu? Tura átumka nuna naarj tuke shiir awajkurmin, ashí shuar “Kristu shuarij” túramainiawai.

⁸ Yus-Chichamnum ju akupeamu nekas péñkeraiti:

“Ame ayashim aneamna núnismek ame írutramuram aneeta.”

Nu nekas umirniuitkiurmeka maak. ⁹ Nú enentáijjai kuítrinniuaj chichasminiaiti. Tura nuyá kuítrinchaaj shiir chichaachkumka, niisháa enentáimta asam, nu akupkamu umirkachuitme. Tunáa túrame. Núnismek Yusa akupeamurijjai amek sumamame. ¹⁰ Chíkich akupkamu írunna nu ashí umikiam tura aya chikichik akupkamu umikchamka nuikia ashí akupkamu umircha ajasume. ¹¹ Iis, Nínki Yúsak chichaak tichamka “tsanirmawaip.” Tura chikichnasha “mankartuawaip” tímiayi. Nu asamtai, shuar tsanirmatsuk túrasha mankartakka ni wakeramun umirtsui. ¹² Kristu ankant awajtam-santai ii yamá ni akupeamurj yúpichuch umirkanniaitji. Nu asamtai nu akupkamujai métek wekakurnínkia Yus “péñker túraitme” turamtatji. Tura umikchakrínkia “péñker umikchaitme” turamtatji. Tura nu enentáimsar péñker chichasar takasar wekasatniuitji. ¹³ Chikichan waitnentachkuñka

waitnennatsuk asutniáttawai. Tura waitnenkratniuitkiurniñkia tsawant jeamtai Yus in waitnentramprattaji.

Yus enentáimtustin tura umirkatniusha

¹⁴ Yatsuru, shuar “Yusan shiir enentáimtajai” táyat tura péñker túrachkuñkia péñkerashit. Nujají uwemprattawak. ¹⁵ Wátskea, Yus-shuar, áishmansha nuwasha, entsátáirin tura yurumken atsumashtimpiash. ¹⁶ Tura ame nékayatmek ayashí atsumana nu sútsuk tíchatapash “Péñker wetá, entsatai entsaram túram péñker yurumáta.” ¿Nu sútsuk tákum péñkerkait? ¹⁷ Núnisan takatsuk Yus enentáimtustin ántraithi.

¹⁸ Tura shuar tíchanpiash, “Chíkich takaawai tura chikichcha Yúsán shiir enentáimtawai. Mai péñkerchakait” tichanpiash. Wats, ame Yus enentáimtamun takatsuk paant inaktusminiashitiam. Tura wi antsu péñker takatrujají Yus enentáimtamun paant inaktustatjají. ¹⁹ Nekas Yus chikichki-iti tu enentáimtame. Nuka péñker túrame. Túrasa iwianchcha nunasha nékainiawai. Tura umircha ásar ashainiawai. ²⁰ Netse enentáimpraip. Ashí Yus wakera nu takaachkuma, Yus enentáimtustin ántraithi. ¿Nu nekaatin wakeramek? Iista. ²¹ Apraáman Yus chicharuk “Winia ti shiir awajtusat tusam ame uchiram Isak maam surusta” tutai suritkiachmiayi. Máachiat suritkiachmiayi. Tura suritkiacham Yus “Péñkeraitme” tímiayi Apraáman. ²² Páantchakait. Apraám Yusa shiir enentáimtak umirkamiayi. Umirtsuk Yúsán enentáimtakka núikia ántar enentáimtiayí. Tura umirak Yus enentáimtamun umikmiayi. ²³ Nujají Yus-Chicham aarma nu uminkiamiayi. Juiti:

Apraám Yúsán shiir enentáimtusmiayi tura Yus chicharuk tímiayi “Máakete. Nújajíñkia tuke péñker túraitme Wijají” tímiayi. Apraámsha nekas “Yusa Amikrj” tu náamkamiayi.

²⁴ Páantchakait. Shuar aya Yúsán shiir enentáimtamujajinchuk tura péñker takasmajajisha Yus nin shiir enentáimtawai. ²⁵ Núnisan Raap tsanirmatajijayi. Túmaitiat Israeran suntarin mamikmauta tusar akupkamun ni jeen itiaawar tura úkar chikich jintianam akupak uwemtikrarmiayi. Nuna túramtai Yus “péñkeraitme” tímiayi nincha. ²⁶ Ayash wakantichuka jákachukait. Núnisan Yus enentáimtustin tura ni wakeramu takaachkurkia, jaka áintsan ántraitjají.

3

Ii iniaí

¹ Atum untsurj jintiñkiartin ajastin wakerukairap. Yus in, jintiñkiartin ájinia núnaka, nankaamas neka asar, awajiakrin nankaamas Yus asutiámattajají. ² Iis, ashí mash ti awajatsjik. Tura shuar chichaak, aya péñkernak chichaakka, nu shuar tuke eseer enentáimniuiti. Tura ayashúsha tuke péñker ana nuna túriniaiti. ³ Kawaisha enentáimpratai. Jiru wenuchiniam ikiursam ni ayashí ashí ayantaatsuk. ⁴ Kanusha ti úuntaitiat tura kakaram wéayat ishitiapach wiantajijají shuar wakera nují ayantarminiaiti. ⁵ Núniskete ii iniaí. Tímiá ishitiapchitiat awakmaktinia tímianu chichaatsuk. Ji ishichik kapaajají ashí numi tsaruaku ekeemakchamniakait. ⁶ Ii iniaísha jijají méteketete. Ashí tunáa piákuiti. Tura ii ayashíin tunáa túratniun úsutmají. Túñkuranmayá jijají ikiapármaiti tura ashí ii wekajnia nují émesewai. ⁷ Shuar ashí yajsamán nawamkamin áiniawai. Ashí kajen írussa nunasha, nanamtincha, napincha, tura entsayanacha ashí nawamkaruiti. ⁸ Tura iniaikia penké nawamkachminiaiti. Tí yajauch asa penké nupetkachminiaiti. Iniaikia ti

taráa tseasaiti. ⁹ Nu iniaijjaj Yus Apa shiir awajeaji tura nu iniaijjajin aentsti yajauch chichárnaiyaji. Áentsun Yus Nijjijaj métek-taku najanamaitiatar yajauch chicharnaiyaji. ¹⁰ Nu iniaijjajin péñkersha tura yajauchisha chichaaji. Yatsuru, nuka penké atsutniuiti. ¹¹ ¿Púkununmaya entsa sáawijjaj kusuku jíinkimniakait? ¹² Yatsuru, ¿Kushinjiap shuinian nereawak. Munchisha kushinjiapen nerektatuak? Núnisan púkununmaya entsa sáawijjaj kusuku jíinkhminiaiti. Ii iniaijjaj núnisan aya péñkera nu chichastiniaitji.

Yusa nekatairi

¹³ Shuar ti neka enentái takakna nu, péñker túrattawai. Nekas nékaitkiunka pééjchachia núnis tuke péñker ana nuna túrattawai. ¹⁴ Antsu atumí enentáijjaj penké yajauch enentáimtumairum tura atumek péñker pujustin enentáimtumarum, nékaitiatam péñker túrachiatam “péñkeraitjai” tiip. Nuka wáitrame. Nekaska núchaiti. ¹⁵ Nú enentaikia Yúsaiyanchuiti. Antsu ju nunkanmayaiti, shuara enentáiyaiti, núnisan iwianchnumiaiti nú enentaikia. ¹⁶ Shuarsha yajauch enentáimtumairar tura níñki enentáimtumainiakui, nujaj ashí meseawai tura ashí yajauch ti awai. ¹⁷ Antsu Yúsaiy enentái takakua nu júnisaiti: ashí nankaamas emka eseeratin, nuyá nawamkartin, shiir ajá, péñker anturnain, waitenkratin, ashí péñker takáa tura anañtsuk naka chichamtin. ¹⁸ Eseera enentáimtsatniusha shiir takawai ashí shuar péñker ana nuna túrawarti tusa.

4

Ju nunkanam íranna nu aneashtin

¹ ¿Urukamtaitsuk tuke kajernaikiarum ti máanaishrum pujarum. Mesetnumsha urukamtaí wéarum? Júnisaiti: Atumin yajauch enentái katsuntrachmin útsutmakrumin tuke máaniarme. ² Wakerarmena nu takustin wakerarme tura nu wakeramu takustin jeachkuram nérentin maarme juruktiaj tusam. Chíkich takakna nujaj itit enentáimtuniarme tura atáitin tujinkiam máanaitrume. Wakerarmena nusha Yus seachu asarum wáintsurme. ³ Tura seakrumsha yajauch searme. Atumí péñkerijjaj warastin enentáimui asarum searmena nusha wáintsurme. ⁴ Jú nunkanmayá wakerakum Yusa nemasrijjaj tsanirma áintsanketrum. Nékatsumek atumsha. Ju nunkanmayan wakerakrikia Yusa nemasrintji. Shuar ju nunkanmayan wakerakka Yusa nemasrj ajawai. ⁵ Yus-Chicham juna tawai: Yus ni Wakanj ii enentáin apujturmasuitji. Nu Wakan in anenma asa ti akasmatramaji, táwai.

Tura nuna ¿ántrankeash ta? ⁶ Tura anenma asa ti yáinmaji. Tuma asamtai Yus-Chicham tawai:

Kajemtinian Yus íistatui tura pééjchachin Yus nin aneak ti shiir yáintatui, tawai.

⁷ Yusaj ikiumastarum, tura íwianch taritratatum. Túrakrumin íwianch ikiurmaktiatui. ⁸ Yúsajin weamkata tura Nii atumin wearmaktatrum. Tunáa shuartiram Kristu numpejaj nijiamartatum. Tura átum, Yussha tura ju nunkanmayasha mai métek wakerarmena nu, atumí enentái naka eseeratarum. ⁹ Atumí tunaarj enentáimsarum kúntuts enentáimpratarum. Nu kúntutsaj ti úttiarum. Nuik shiir enentáimprarum wishikmiarumna nuka iniaisarum kúntuts enentáimprarum úttiarum. ¹⁰ Yusajj pééjchach ajasta, túrakmin shiir awajtamsattawai.

“Yajauchiitme” tunaichatin

¹¹ Yatsuru, yajauch áujmatnaisairap. Yus-shuar ni yachin yajauch áujmatas tura yachí tunaari tuke áujmatuk Yus “aneniatarum” tana nuna umichuiti. Antsu umichu asa “nu akupkamu ánráiti, umirkashtiniáiti” tawai nu shuar. Nujai nu shuar umirtsuk Yus akupkamu nankaamas enentáimtumawai. ¹² Yus Niñki akupkamu najana asa Niñki nu akupkamu umirkamun nekas nekaamniáiti tunaashit tusa. Niñkiti uwemtikratniun tura emesratniunam akupkatin jea nu. Amesha yáitiam chikicha tunaari ístincha.

Kashin átatna nuna Yusak nékawai

¹³ Watsek, átum áujmateakrum “Arumsha kashincha nu péprunam weri nu j chikichik uwí takasar kuit achiktatji” tíchattarpash. ¹⁴ Ishichkisha penké nékatsrume kashin átatna nu. Ju nunkanam ii iwiaakmarí wárik amúatsuk. Yuran kim utsanar tura nantu sukuam mash wárik menkaatsuk. Núnisketji. ¹⁵ Antsu júnis tímíniaitrum: “Yus wakerakuñkia iwiaaku pujakrikia nusha túrattaji” titiarum. ¹⁶ Túrachkurmeka átumka Yusjái nankaamantu enentáimprume. Tura ashí nu enentáikia yajauchiiti. ¹⁷ Shuar péñker túratniun nékayat, túrachkuñkia, nuka tunaiti.

5

Kuítrintin enentáimpratniua nu

¹ Kuítrinniutiram ju antuktaram. Ti úttiarum. Ti wáitsatin asarum ti kakantra úttiarum. ² Kuítrum mash mamukarai tura iwíarmampramurmesha mash tinkishap yúkayi. ³ Kurirmesha tura kuítrumsha ashí ijiakmamkarai. Ijiakmampramurísha ame péñkercha túram nuna paant iniakmawai. Tura jinium áesamua áintsan ame kuítrum yajauch awajtamsattawai ayashmjín. Amuukatin tsawant jeamunam anearchamame antsu ame kuítrum ikiaunkamame. ⁴ Ame takat iniararam ementushim akirarmamna nu “akirkati” turamainiawai. Anearta. Yakiyá Yus, nayaimpinmaya suntara uuntri, nu takartamniu chichamen antukai. ⁵ Ashí ju nunkanam írunna nu wararsauritrum. Tuma asarum kapunka nuke machararme tura yamaikia máatin tsawant jeayi. ⁶ “Nu shuar tunaiti” tírum tunaachu sunumprurum máamarme, tura niñkia surimiakcharmai.

Yawetsuk takastin tura Yus áujsatín

⁷ Nu asamtai, yatsuru, nu páchitsuk ii Uuntri Kristu tatin nákastarum. Arakmausha ni arakri péñker tsapaiti tusa yumi yutuktinian shiir enentaijái nákatsuk. Yútasua umirmatai esatrurmatai júuktatjai tusa nákatsuk. Tura júurmaksha ti waraatsuk. ⁸ Núnisan atumsha katsuntsatarum tura yawekiirap. Kristu tatin yuntumtemayi. ⁹ Yatsuru, nuámtak “ju yajauch túrutui” tunainirap. Tákurminkia Yus írmastatrum. Niñkichukait nuna ístin tura anearta nu Yúsak tíjuch wajatramui. ¹⁰ Yatsuru, yaunchu Yúsna etserin enentáimpratarum. Tuke ii Uuntri Yus timia nuna shiir etserkarmiyai. Túmaitiat wáitsarmiyai túrasha pachischarmiyai. Núnisrume enentáimsatarum. ¹¹ Itiurchatan katsuntainia nuka nekas shíráiti, tu enentáimji. Shuar itiurchatan ti katsuntin ámiyai, ni naarj Jup. Tura ni itiurchatri nankaamasmatai Yus ti núkap kuítrin susamiyai. Nu nékatsrume. Ii Uuntri Yus ti waitnenkratchakait.

¹² Ju ashí nankaamas enentáimtustiniáiti, yatsuru. Ame “ee” tákumka nekas titiá. Tura “atsá” tákumka nusha nekas titiá. Nekas chicham

chichaachkumniñkia Yus írmastatui. Nu asamtai nayaimsha nuñkasha ashí írunna nusha páchitsuk, aya támena nu tuke nekas atí.

¹³ Wáitakmeká Yus áújsata. Waraakmeká, warasam kantamám Yus shiir awajsata. ¹⁴ Yus-shuartíram, shuar jáakka, Yus-shuara úuntriñ untsukti. Tura niisha taarti. Tura Jesusa naari pachikiar asuitijai jaa shuaran ishichik kuerarti. Túrawar Yúsan áújtusarti nu shuaran. ¹⁵ Tura “Yus nuna nekas anturtamkattaji” tu enentáimsar áújsarti. Túrawarmatai jaa shuar péñker ajastatui. Yus nin tsuártatui. Tura tunaan tura asa jáakuñkia Yus nu tunaan tsankurattawai. ¹⁶ Nu asamtai, atumí tunaari paant etsertunaiktarum. Túrarum Yus áújtunaistarum atumí tunaari tsankurnarat tusarum. Péñker shuar Yúsan tuke enentáijiai áujeamuriñkia ti kakarmaiti. ¹⁷ Yaunchu Yus-Chichaman etserin ámiayi, ni naari Eriás. Niisha iijiai méteketiat yumi yutukai tusa Yusa áújsamtai menaintiu uwi nuyá nankaamas yutukchamiayi. ¹⁸ Ataksha yutukti tu áújsamtai ataksha yutukmiayi tura araksha ataksha tsapainiarmiayi.

¹⁹ Yatsuru, shuar eseera wekatainmaya kanaakuñkia chíkich nin waketk-itniun yaini. ²⁰ Shuar tunáa shuaran yajauch wekaan awakeakka jákatniunmaya uwemtikrattawai tura ti untsuri tunaari tsankurnartatui.

PÍTIUR Emka papin aar akupkamu

Pítur Yus-shuaran áatramiania nu

¹ Wisha ju papin aajna nu Pítruitjai. Wisha Jesukrístu akatramurintjai. Israer-shuar Yus-shuar árum nuna atumin ankant ankant tsakinmakarum chíkich chíkich nunkanam matsatrumna nuna áatjarne. Puntu nunkanmasha, Karasea nunkanmasha, Kapatúsea nunkanmasha, Asia nunkanmasha, Pitinia nunkanmasha pujarmena nuna áatjarne. ² Yaunchu Apa Yus, “uwentikrataj” tímia núnisañ achikmaitrume. Tura, Winia ajasat tusa ni Wakanijjai akantamkamiarme. Umirtukat tusa nuna túramiayi. Tura Jesukrístu numpejajsha atumí enentáin atsajkir chamir awajturmasmiarme. Wats, Yus tuke waitnentramar ti shiir awajtamsarat tusan wakerajrume.

Shiir enentáimsar pujustin

³ Wats, Yus, ii Uuntri Jesukrístu Apari ana nuna naari shiir awajsatai. Yussha ti waitnentrama asa, atak akiiniatniun suramsaitji. Jesukrístu jakamunmayá nantakin asamtai, iikia atak akiiniar tuke iwiaaku pujustiniaitajnia nu arutramji. ⁴ Tura nayaimpiniam ikiurtamsamu ana nuna achikmintrum tusa Yus wakerawai. Nu ikiurtamsamu meserchamnia amuukachminiaiiti. Tura nusha yajauchichuiti. ⁵ Yus nekas enentáimta asakrumin ni kakarmarjijai wearmarme. Tura tuke uwentikrampratniun, nuka amuuamunam paant iniakmastatna ni achikmintrum tusa tuke tsawant ni kakarmarjijai wáitmarne.

⁶ Nu enentáimsarum wararme. Kame ju nunkanam pujakrum itiurchat wáinkiashtarmeash. Tura ju nunkanam pujustin ishichkichukait. Ukunam péñker pujustaj tu enentáimsarum wararme. ⁷ Enentáimsatarum. Shuar kurin wakerana núnisañ atumniasha umirtukat tusa Yus wakerutmarne. Aents kurin jinium áesainiawai, aya kurik juakat tusar. Kurin ti wakeruinia ásar, amuukamnia añ túruiniawai. Atumsha, itiurchat wáinkiarmana nujai, Yus-san nekas enentáimtusartimpiash tusa nekapsamuitrume. Nu enentáimtamú kurijjai nankaamas péñkeraiti. Ukunam, Jesukrístu támatai, Yuska atumin “péñker túraitrume” turamtajtsa wakerittiawai. Tura “Ashí shuar nuna nekaawar winia naarun uunt awajsarat” tusa túrutmattarme. Nu tuma asamtai ju nunkanam nekapsamuitrume, itiurchat wáintrumna nujai.

⁸ Jesukrístu wáinchaiatrum anearme. Tura yamá wáinchiatrumek nekas enentáimtarne. Tuma asarum ti wararme. Nu warastin nayaimpiniam warastajinia núniskete; nuka paant titin jeatsji. ⁹ Imiatarum. Uwentikrurat tusarum Yus umirkachurmek. Nu uwempratín wainiu asarum waraarme.

Krístujai ii uwempratniun yaunchu etserkarmiayi

¹⁰⁻¹¹ Yus áentsun waitnenta asa, uwentikrataj tusa tuke wakerimiayi. Núnaka Yúsnan etserin etseriarmiayi. Kristu Wakanj ni enentáin pujuriarmia nu, túruntsañ Kristu wáitsatniurin jintiarmiayi. Tura ukunam ni ti shiir pujustintrincha etseriarmiayi. Túrasha “tuu áishmankait Kristu tutai, tura urutiák túrunat” tusar nu etserin émamkesar anintrusarmiayi. ¹² Tura nii pujuiniainkia túrunashtinian, antsu ti ukunam, ii pujajnia juí túrunatniun Yus nekaamtikiarmiayi. Núnaka Yusa shiir chichamen ujatmakarmia nú

shuar nekaprutmarme. Nú shuar Yusa Wakanj, nayaimpinmaya akupkamu ana nuna nekatairijjaj ujatmakurme. Maa, nu uwempratniun tájana nuna, nayaimpinmaya suntar nekaatai tusar wakeruiniawai, túrasha tujintiaini-awai.

Pénker wekasatin

¹³ Tuma asantai, péñker enentáimsarum tura péñker ímiasrum wekasatarum. Tura Jesukrístu ukunam wantiniak waitnentramprattana nu yawetsuk nákastarum. ¹⁴ Umin uchi áintsarmek yaunchu nékachu asarum wakerimiarmena nu iniaisarum Yus umirin atarum. ¹⁵ Ashí túramurmijjaj timiá penker wekasatarum. Yus, untsurmakuana nu, péñker asantai, átumka ni shuarj asarum péñker wekasatarum. ¹⁶ “Wi péñker asantai atumsha péñker wekasatarum” Yus tana nu ni Papiriin áarchamukait.

¹⁷ “Yus winia Aparuítí” tárugna nu aneartarum. Ashí aentsu túrutairin métek Yus nekaatawai. Nu neka asarum, ju nunkanam pujarmena ju Yus ashamkatarum. ¹⁸ Warí, ánta wekasatniun atumí uuntri jintintra-arena nuyá Yus uwentikramprarme. Túrasha kurisha kuitcha amuukamnia ainia nujaj uwentikrachmaitrume. ¹⁹ Antsu Kristu numpe ti shiira nujaj uwentikramuitrume. Nu nékarme. Yaunchu, shuar tunáa túrakui, Yus tímiayi, “murik yajauchichu tunamarcha maarum, Yus sútainiam ikiustarum. Nuna numpen wáinkian, atumí tunaarín tsan̄kurattajai” tíniuyayi. Núnisan̄ Kristu in jarutramka asa ii tunaaríniá uwentikrampraitji. ²⁰ Nunkan nájantsuk áentsun jaruktinian Kristun anaikiamiayi Yus. Tura wárik akupkachmiayi. Antsu yamá tsawantin, átum pujarmin, péñker pujusúk tusa wakerak, atumin jarutramkat tusa Krístun akupkamiayi. ²¹ Níijaj átumka Yus umiirume. Yuska Krístun jakamunmayan iniantki nan̄kaamantu awajsamiayi. Yus nekas enentáimtakrum, aya péñkernak túrawai titiarum tusa túraiti. ²² Yus nekas tana nuna, Yusa Wakanj yainmakui, umirka asarum atumí wakanjin péñker ajasuitrume. Yus-shuarjaj yajauch enentáimtunaisuk mai anenai ajatai tusarum tura asarum, nekas shiir enentáimtunaisrum mai anenai ajatarum. ²³ Nekaatarum. Yusa chichame umirka asarum atak akiini-aitrum nuka ju nunkanmayanchuiti. Antsu Yusa chichame iwiaaku tuke amuukachmin ana nú chichamjaj tuke iwiaaku átiniaitrume.

²⁴ Ju ayash tuke pujuschamniaiti. Yusa Papiriin junis áarmaiti:

Ashí aentsti nupáa áaniuitji. Ii péñkerjsha kukujja áaniuiti. Nupa wárik kaawai. Kukujsha núnisan̄ wárik iniaawai. ²⁵ Tura Yusa chichamesha tuke amuukachminiaiti.

Nu Chichamjaj uwempramnia asantai atumin etsernakuiti.

2

¹ Tuma asantai, ashí yajauch ana nu iniaisarum. Anan̄katin, ántar-chichamtin átin, chikichna wakeruktin, ashí tsanumpratniusha iniaisarum. ²⁻³ Antsu, Uunt Jesukrístu waitnenkartutairi nekapsa asarum, uchi yama akiinia muntsun ti wakeruinia áintsarmek, Yusa chichame aya penkerkea nu ti wakeruktarum. Yusa chichamejaj tuke tsawant tsakakrum tuke uwemprami tusarum túratarum.

Iwiaaku kaya

⁴ Ii Uuntri̯ Kristu kayáa áantsaṅkete. Tura shuar kayan yajauchin nakitiainia núnisan̄ Jesukristun nakitrarmiayi. Tura kayan ti peṅkeran wakeruinia núnisan, Yuska, “winia Uchir ti peṅkeraiti” tusa Jesukristun achikmiayi. Atumsha Jesukristu weantuktarum. Nii iwiaaku kayaiti. ⁵ Atumsha iwiaaku kaya áantsaṅketrume. Tuma asarum Yus wiji̯ai ni jeṅ jeamti tusarum tsaṅkamaktarum. Tura nútiksarmek Jesukristuj̯i atumí iwiaakmar̯i tsaṅkamaktarum, Yus wakera nuna túrutati tusarum. Jesukristuj̯ai tura asarum Yus shiir enentáimtikrume. ⁶ Jesukristunun Yusa Papiri̯in̄ júnis áarmaiti:

“Iistarum. Kayan ti peṅkeran achikjai” Yus tímiayi. Jeṅ emka apujtuamur̯i atí tusan Seun̄num apujeajai.

Nin enentáimtana nu ántar enentáimtsui. Aarma ana nu peṅké kayan chichaatsui. Antsu Jesukristun tawai. ⁷ Yus umirkaitrumna nu, “kaya ti peṅkeraiti” tarume. Tura Yúsan umirainiatsna nuka Yusa Papiri̯in̄ tana nuj̯ai métek áiniawai. Ju áarmaiti:

Jeṅ jeamin nakitrarmia nú kaya jeṅ emka apujtuamur̯i atí tusa apujamuiti.

⁸ Tura jusha aarma awai:

Tukumak iniaartin kayaiti.

Kame shuar Jesukristunun etserkamun nakitiakka, ¿enentáinium itiur péṅker wekasat?

Wats, nú shuar, Kristun umirainiachú ásar, tuke túrunatin asamtai tukumainiawai.

Yusna ajasaru ainia nu

⁹ Tura átumka Yus achikmaitrume. Tura, wínian pujurtursarat tusa yajauchinmayá Uunt Yus akantamkaitrume. Yusna asarum péṅker enentáimin ajasurme. Tura Yus sumakmaitrume. Niisha winia péṅkerun etserturkarat tusa túrait̯i. Kame kiritniunmayá j̯iinkirun ni tsáapnitr̯in̄ wekasatniun achirmakurme. ¹⁰ Yaunchu nusháa shuar áuyarme. Tura antsu yamaikia Yusshuar ajasrum, Niiniu ajasurme. Yusshuar ajatsrumni̯n̄, ¿ya waitnentrampria? Antsu yamaikia Yus waitnentramuitrume.

“Yúsnaitjai” tu enentáimsatin

¹¹ Yatsurtirmin tájarme, Yusna ajasrum, ju nunkanam írar matsatu asarum, atumí ayash̄i wakerana nu tsaṅkatkairap. Ayashim wakerana nu túrakmiṅkia ame enentáim̄ nuj̯ai yajauch ajastatui. ¹² Yusshuarchanum péṅker wekasatarum. Túrakrumniṅkia niisha yamá “Yusshuar yajauch túruiniawai” ántar tuiniayat̯an, ukunmaṅka, Yusj̯ai̯ in̄kiunaiktin tsawant jeamtai, péṅker wekarmena nuna enentáimturmasar, nú shuarsha Yúsan shiir awajartatui.

¹³ Kristu atumí Uuntri̯ asamtai, ju nunkanam akupin áiniana nusha umirkatniuitrume. Uunt akupin ash̄i akupin asamtai umirkatarum.

¹⁴ Tura ni akupeamur̯i ainia nusha tunaan túruinia núnaka asutiáti tura peṅkeran túruinia núnaka shiir awajsat̯i tusa uunt akupin akupkamu ásarमत̯ai umirkatarum. ¹⁵ Nekas peṅker wekaamurm̄ij̯ai̯ enentáimcha ainia nu netse chichaamur̯i̯ itiatmam̄t̄ikiatarum tusa Yus wakerawai.

¹⁶ Tunaanumia̯ aṅkant̄ ajasu asarum péṅker wekasatarum. Túrusha wi aṅkant̄ ajaschajak tusarum nánkamsarum yajauch túrawairap. Antsu Yusna asarum, ni wakera nuna umirkatjai tusarum anearum wekasatarum.

¹⁷ Chíkichcha shiir enentáimtustarum. Yus-shuar ainia nusha aneetarum. Yus péñker asamtai ashankatarum. Uunt akupin shiir awajsatarum.

Yus-shuarti katsuntratin

¹⁸ Takarniutirmesha ame úntrum péñker shiir enentáimturmakui sha tura yajauchiitkuisha umirkatarum. ¹⁹ Nekaatarum. Ántar wáitkiarmainia nui, “Yus iirui” tu enentáimsa katsunteakrumka, ti péñkeraiti. ²⁰ Yajauch túrawakmin asutiámamtai katsunteakmeká nuísha warin ati. Antsu péñker túrawakmin asutiámamtai katsunteakmeká júka ti péñker túrame Yusaj. ²¹ Núnisan túrunatin achikmaitrume. Kristu waitrutmasmiarme nui, Wi túraj núnisan túrawarmi tusar wáitsamiayi. ²² Kristuka tunaan péñké túrachmiayi. Tura chikichkinkesha péñké anañkachmiayi. ²³ Kátsekeamsha Niñkia katsekachmiayi. Wáitkiamsha “yapajmiaktaj” tíchamiayi. Antsu “winia Apar Yus iisti’ tímiayi, Yus péñker túrin asamtai. ²⁴ Kristu Niñki ni ayashjin ii tunaarjin entsaki krúsnum jarutramkamiaji. Tunáa enentáimtusairum tusa, antsu Yusaj péñker wekasamniuram tusa jarutramkamiaji. Atumí enentáin tsuártaj tusa Kristu asutniámiayi. ²⁵ Murik ni pujutairjin wakektiniun nékatsna ántsarmek atumsha menkaka wekaimiarne. Tura yamaikia atumí wáitmaurjin wakektintrume. Atumí wáitmau Krístuiti, atumí enentáin wáinnia nu.

3

Nuatnaikiaru itiur túratniuit

¹⁻² Tuma asamtai, nuwatiram atumí áishri umirkatarum. Amesha péñker, Yus umirka weká asakmin, áishrum Yus-Chichaman umirchaitiat, ame túramurmin nekáa, ámeká chichaatsminiñ, niisha Yus-shuar ajastinian wakerittiawai. ³ Nu asamtai aya pátatek iwiarmampratniusha ti enentáimtusairap. Intiash ti péñker iwiaratniusha, kurijjai iwiarmampratniusha, pushí ti kuitjai entsartíncha ti enentáimtusairap. ⁴ Antsu, “nekas shírmach ajastaj” tákumka, enentáimin “shiir kajecheu átajai” tu enentáimsatarum. Nuka sakarchattawai. Tura nuka Yúsnumka ti péñkeraiti. ⁵ Yaunchu núnisarañ nuwá Yúsán enentáimtusarmia nu, tura Yúsán shiir enentáimtikratniun wakeriarmia nu, ni áishrin umirkar nujai ni enentáin shírmach ajasar pujuarmiayi. ⁶ Atumí weatři Sara ni áishrin Apráman umirmiayi. Umirin asa, “winia uuntru” tñiuyayi nin. Atumsha péñker túrakrumka tura sapijmiatsuk wekaakrumka, Sarajaj métek átatrume.

⁷ Tura áishmanfirmesha Yus wakerana nu nekaarum atumí nuwe shiir enentáimtusurum tsanintarum. Nuwemsha, nuwá asa, áishmanjai métek kat-suntrachminiaiti. Tura niisha, ámijjai métek Yusa waitnenkartutairjjjai tuke iwiaaku átinian takusminiaiti. Tu enentáimta asam ame núwem shiir enentáimtustá. Yus áujukuram iturchat atsuti tusarum túratarum.

Yúsnum péñker wekasatin

⁸ Nuyasha ashí Yús-shuartistirmin tájarme, aya chikichík enentaik atí. Waitnennairatarum. Nekas yatsum aneam núnisrumek anenaitiarum. Aya áminiuk enentáimtutsuk chikichan yáintaj tu enentáimsatarum. ⁹ Yajauch turamainiakui sha “yapajkiataj” tiirap. Katsekramainiakui sha “iikkiataj” tiirap. Antsu “Yus winia shiir awajtusuiti” tu enentáimsarum, yajauch turamainiana nu péñker awajsatarum. ¹⁰⁻¹² Yus-Chichamnum júnis aarma asamtai nu túratarum:

Uunt Yus péñker wekaana nuna wainiui, tura ni áujmancha ántawai. Tura yajauchin túrana nuna nakitrawai. Tuma asamtai, shiir pujustaj tákuñka tura tuke tsawant warastinian wakerana nu, péñker ímiastí, yajauch chichakajj tusa tura wáitruawajj tusa. Tunaanumiã kanaki péñkeran túratí. Tuke enentáijjajj shiir átinian eakti.

Tu áarmaiti.

Itiurchat aij péñker túratin

¹³ ¿Yaki yajauch túrutmat péñker turamnisha? ¹⁴ Túrasha péñker túrayatmek wáitiakminkia Yus shiir enentáimtikramprattarme. Tuma asamtai ashamkartusuk, sapijmiatsuk wekasatniutrume. ¹⁵ Tura “Kristu winia Úntruuti” tu enentáimtustarum. Tura “¿urukamtia Yus-shuar ajasuitiam?” turamainiakuisha, péñker áimkiamnium iwiarnarum pujustarum. Waantu enentáimtumatsuk, nin péñker enentáimtikrataj tusam túrata. ¹⁶ “Yúsajj péñker wekasataj” tu enentáimsarum wekasatarum. Yus-shuar asakrumin chíkich shuar ántar áujmatramainia nu ni ántar áujmatramsamun nekaawar natsáararat tusarum Yúsajj péñker wekasatarum. ¹⁷ Yajauch túrakur wáitsatniujajjñkia nankaamas, Yus wakerakuñkia péñker túrakur wáitsatniuka ti penkeraiti.

¹⁸ Kristu ii tunaarjñ asakártaj tusa jarutramkamiaji. Ashí asakárma asamtai atak tunaan jarukchatniuiti. Niisha tunaan penké túrichuitiat, ii tunáa asakrin wáitrutmasmijai, Yúsnum ejetamtai tusa. Ayashjñkia jakayat ni wakanjijjajj ni ayashj ataksha iwiaaku ajasmiaji. ¹⁹ Ni wakanjijjajj jakáa wakanjñ emetamu armia nuna etserkataj tusa wémiyai. ²⁰ Nusha yaunchu Nuai uunt kanun nájanuk siañtu painti (120) uwi pujurmia nuj Yuska umirtukarat tusa ti nákamaitiat Nuai étserman umikcharmiyai. Nú kanunmasha ishichik, uchu, aents kanunam pujuinian yumijjajj uwemtikrarmiaji. ²¹ Nu yumi Yus-shuarti imiantinian nakumui. Íi ayashj chamir awajsatai tusar imiantsuji. Antsu ii enentáijj péñker atí tusar Yus sear imianji. Nujajj iisha uwemji. Jesukrístu nantakin asamtai, nuajj uwempraitji. ²² Tura Nisha nayaimpiniam we akupin pujutajñinm Yusa untsuurjñni apujsamuiti. Túramtai nayaimpinmayã suntarsha, tura ashí kakaram akupin áiniana nusha Jesukrístun umirainiawai.

4

Ju nunkanam wáitsatin

¹ Kristu ni ayashjñ wáitsa asamtai atumsha núnisrumek wáitsatin ákuisha, katsuntratjai titiarum. Ni ayashjñ wáitiana nú shuar yajauchin páchiatsui. ² Antsu “iwiaakjana nuñkia Yusa wakeramurjñ tuke umjkatjai” tu enentáimui. Ni ayashj wakerana nuna yamaikia páchiatsui. ³ Warí, Yúsán nékainiatsna nú shuar túruiniana nu atumsha núkap túrichmakuram. Yus-shuar ajatsuk tsanirmatin wakerimiarme. Yajauch túratniusha, nampernum nampekrum ti yurumárum, enentáincha ajasrum charaatum ajatniusha, ántar-yusa namperjñ yajauch ana nu najanatniusha nusha ashí wakerimiarme. ⁴ Tura surimiatsuk yajauch túrimiamena nu iniaisa asakrumin, yaunchu atumjajj nuna túrin armia nu, “urukamtai iniaisara?” tusar yajauch áujmatramprume. ⁵ Túrasha ukunam nu aents ni túramurjñ etserkartatui. Iwiaaku ainia nunasha tura jákaru ainia nunasha Neka awai. Nii nu aentsun sumamtikiawartatui. ⁶ Túrasha jaka armia nu

Yusa shiir chichame ujankarmiayi. Ni ayashiin ashí shuarjají métek jakamniaitiatan Yus iwiaaku pujana núnisan ni wakanjii iwiaaku pujusarat tusa ujankarmiayi.

Shuar yáintiniatji

7 Ashí amuukatin jeatemayi. Tuma asamtai péñker enentáimsatarum; túrarum anearum Yus auju pujutarum. 8 Aneniamujají untsurí tunaasha tsan̄kuratin awai. Tuma asamtai ashí nankaamas nuamtak anenaistarum. 9 Kajé-kajejainchu atumí jeen itiaaniátarum. 10 In an̄kant an̄kant shiir awajtamsatniun Yus ti núkap takakui. Tura in shiir awajtamsamujají chíkich shuarsha shiir awajsatarum tusa chíkich chíkich túratniun suramsaitji. Tuma asamtai péñker takaawa áintsarmek Yus amasmania nujají ame írutramuram yaiñtá. 11 Etserkatniun Yus amasuitkiuin̄kia ame tamena nu, Yus tana nujají métek atí. Chíkich shuar yáintiniaitkiunka Yus amaana nú kakarmajají túrata. Ashí túramna nu Yusa naarj shiir atí tusam Jesukristu náarjijají túrata. Jesukristun ashí aents shiir enentáimtusartí. Tura ashí áentsnum ni kakarmarij tuke atí. Nuna tajai.

Yus-shuarti wáitsatin

12 Aneamu yatsurtiram, ti waitsatin nekapramsartin jeartampramna nu nusháa enentáimprairap. Wáitsatin támatá, “¿urukamtai waitsa pujaj?” tu enentáimsairap. Kame túrunamniaiti. 13 Tuma ajñ shiir enentáimsatarum. “Kristu wáitsamurin̄ métek-taku wáitiakun péñkeraití” tu enentáimsatarum. Ukunam Kristu wincharj wáinkiarum timiá warasmi tusarum túrarum. 14 Kristunu asakrumin̄ katsekkramkachartimpiash. Túmaitkiuisha Yusa Wakanj shiir ana nu atumijn̄ pujurtamkui shiir awajsamuitrume. Katsekkramainia nú shuar imia Yusa Wakanj̄n yajauch áujmatainiawai. Tura átumka Yusa Wakanj shiir awajearme. 15 Túra atumsha yajauch túrawajirum aneararum. Mankartana nu, kasamkana nu, tunáa túrana nu, tura chíkichna páchiana nusha ni wáitsatniurijn̄kete. Atumjain̄kia nu wáitsatniuka atsutí. 16 Tura antsu Kristunuiti tusar wishikramuk wáitkiarmainiakui natsāarairap. Kristunu asam wáitiayatmek, natsam̄tsuk Kristu naarj shiir awajsata.

17 Yuska ni shuarin̄ nekapsatajtsa nan̄kamatniuiti. Tura nu tsawantcha jeayi. Yus imia in nekapramkuisha Yus-Chichaman umirainiatsna nú shuarsha urukawartin̄. Ti asutniáwartatui. 18 Imia Yus umirjinia nu uwempratniurj̄ itiruchataitkiuisha tunaan túruiniana nusha urukawartin̄. 19 Tuma asamtai Yus wakeramujají wáitainia nu, niisha Yus najanamu asa Yus iirsatí tusa tuke péñker túratí. Warí, Yuska tuke péñker túrichukait.

5

Yus-shuara uuntri túratin

1 Yamaikia Yus-shuara uuntrītiram, jintintjarme. Wisha núnisnak Yus-shuara uuntrīntjai. Kristu wáitsamurin̄ wáinkiaitjai wisha. Tura ukunam ti shiir átatna nuj̄ chíkich Yus-shuara uuntrīa núnisnak wisha pachiinkiat-tajai. 2 Yus-shuar ame ístiniaitmena nu, péñker iistá, murikiu wáinin ni murikrj̄n wainnia áintsamek. Nakittsuk, shiir enentáimsam túrata, Yus wak-erana nuke. “Chíkich akupta asamtai túrattajai” tútsuk tura nujají kufrintin̄ ajastin enentáimtsuk nekas wakeritia, Yusa takatrij̄ asamtai. 3 Turasha, “Yús-shuara uuntrī ajasan, Yus-shuaran akuptiaj” tu enentáimsaip. Antsu shiir túramurmijají Yusa murikrj̄ jintintiata. 4 Nuin̄kia murikiu wainniu Uuntrī

taa wantiniak iwiarmantai tawasap ti shíirmachia núninian suramsattawai. Aents súana nú shíirmach wari mamurtiniaiti. Tura Úntrum ámin suramsatana nuka penké mamurchattawai.

Yus-shuarti umirnaikiatin

⁵ Tura natsatírmesha atumí uuntri umirkatarum. Kame yaunchu Yús-Papiniun aarma asamtai ashí Yus-shuartiram nankaamantu enentáimtumatsuk umirnaikiatarum.

Waantu enentáimtuma núnaka Yus nakittiawai. Antsu nankaamantuchu enentáimtuma nuna Yus waitnentak yayawai. Tu aarmaiti.

⁶ Wats, Yus timiá kakaram asamtai, amek nekamam, péejchach enentáijiai enentáimtumasta. Nuñkia tsawant jeamtai ni wakerak Yus ámin penkeri awajtamsattawai. ⁷ Yus ámin ti enentáimturmakui ame itiurchatrum ainia nu Yus ashí iiktusta.

⁸ Aneartarum tura ímiastarum. Íwianch atumí nemasri ana nu, uunt yawáa nuke, yanak emesraintiaj tusa eaqak tentaa wekaawai. ⁹ Tura tuke Yus nekas enentáimtusrum surimiaktarum. Ashí nuñkanam Yusnum atumí yachi ainia nu átum wáitiarmena núnisarañ wáitiainiawai. Nusha kajinmakchatniutrume. ¹⁰ Wats, ishichik tsawant wáitsarmena nu nankaamasmatai Yus ataksha péñker awajtamsattarme. Tura numi wewe wajana núnisarañ ikiakátmartatrume. Tura Yus ikiakárma asarum ni jintiñ tuke péñker wekasattarme. Ju Yus tuke in waitnentramtsujik. Tura iisha Jesukristunu asakrin Niijai métek Yus ni shiir pujutainium tuke shiir pujusmintrum tusa achirmakuitji. ¹¹ Nú Yúsnasha ashí aents shiir enentáimtusartí. Tura ashí áentsnum ni kakarmarij tuke atí. Nuke atí.

Amiak áujmamsamu

¹² Serpanujai ju papin ishichik áarmaj nuna akupeajai. Serpanu Yusjai péñker wekaak Yusnum winia yatsur ajasuiti; núnaka nékajai. Yus waitnentraza asa ti yainmakmania nuna enentáimtikeajrume ju papijiai. Tura tuke ni waitnenkartutairiñ wekasatarum tájarme.

¹³ Papirúnianmaya atumjai métek Yus achikma áinia nu amikmaatmarme. Winia uchir Markus núnisarañ amikmaatmawai.

¹⁴ Yusaj yachi ajasu asarum anenaisrum shiir awajnisatarum. Jesukristunu ajasuitrumna nuna Yus imiatkinchanum pujustinian suramsarat tusan wakerajai.

Nu atí.

PÍTIUR Ataksha papin áarar akupkamu

Pitiur Yus-shuaran áatramiania nu

¹ Wikia ju papin aajna ju Semun Pítruitjai. Jesukrístu akatramu asan ni takarniurintjai. Ii Yusri tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijjai métek Niiniu ajasurme. Nuka ti penkeraiti. ²Yus, tura ii Uuntri Jesssha nékarmena nú núkap nekaki wéakrumin, Yuska atumin ti nukap yáinmaktatrome tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

Yusai páchitkia atin

³Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashí yajauch wakerana nuyá uwemprarum, Yusai páchitkia átinian suramsaitrome. ⁵Yus umirkarme. Yamaikia juna túrataj tusarum kakartiniaitrome. Ti penker wekasatniuitrome. Nuyá Yusna nekaatniuitrome. ⁶Nuyá yayauch túrashtin íimiastiniaitrome. Nuyá katsuntratniuitrome. Nuyá Yus shiir enentáimtusrum wekasatniuitrome. ⁷Tura nuyá ashí shuar shiir enentáimtustiniaitrome. Tura nu nankaamas ashí shuar aneatniuitrome.

⁸Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrome. Tura ii Uuntri Jesukrístu nekas nekaattarme. ⁹Tura nuna túruiniatsna nuka, kusurua áanin áiniawai. Jesukrístu wakeramurjin enentáimtuiniatsui. Ni tunaariya uwemprarmia nuna kajinmatainiawai. ¹⁰Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. ¹¹Tura ii Uuntri Jesukrístu uwemtikramprajnia nu, Nii tuke akupeana nu, nakitsuk shiir awaintiamattarme.

¹²Tuma asamtai nékarminin tura Yusna nekas ana nuyá kanaatsrumnin tuke enentáimtikratjarme. ¹³⁻¹⁴Nekaatarum. Winia jákatniurun jeatema nuna ii Uuntri Jesukrístu ujatkayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai. ¹⁵Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

Kristu waantu ajasun wáinkiamia nu

¹⁶Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchayui. Antsu imia ii jijijai Uunt Jesukrístu waantu ajasu wáinkia asar ujakmajrume. ¹⁷Tura Apa Yus Jesukrístun shiir waantu awajsamia nu, ni imia shiir pujutairiya chichaak tímiayi, “Juka winia ti aneamur Uchiruiti. Nin ti wararjai.” ¹⁸Iisha naint “Yusna” tájinia nu, Nijijai pujá asar nu nayaimpinmaya chichaamu paant antukmaji.

19 Tura nuna nan̄kaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain̄ kiritniunam ji keak tsáapin awajeana áintsan̄ asantai, péñker enentáimta asarum péñker túrarme. Tura Kristu taa, yánkuam etsantea núnisan̄ atumí enentáin ashí paant awajsattawai. Tura nu tsawant jeatsain̄ nu étserma tuke péñker enentáimtustarum. 20 Tura ju emka nekaatarum. Shuar aya ni enentáimmiarijjain̄, Yusa Wakan̄jjain̄chu, Yus-Chicham urukantai tu chicháa nuna nekaatniun jeatsui. 21 Warí, Yúsnan etserin yaunchu etserkarmia nu, aya ni wakeramurijjain̄ tícharmiayi. Nu áishman̄kan enentáin Yus pujursarmiayi. Tuma asa ni tiarmia nuna Yusa Wakan̄j jintintiam tiarmiayi.

2

Wait chichaman unuiniania nu (Jútas 4-13)

1 Tura Israer-shuarnum wait chichaman etserniusha páchitkiarmiayi. Atumijn̄cha wait chichaman unuiniau páchitkia ártatui. Niisha awajintikrampratniun wakeruiniak wáitian ti yajauchin uúkar unuiníartatui. Tura “Uunt Jesu uwentikrurmia nusha ántrai” tiartatui. Nuna takui ni amuukatniurjsha wárik jeartiatui. 2 Tura untsurí shuar ni yajauch túruiniamurj̄n írsar métek túrawartatui. Iis, “Yus-Chichaman unuiníaitjai” tuñiyatan̄ imiá yajauch túruiniakui untsurí aents “Yus-Chicham ántrai” tiartatui. 3 Kuítian ti wakeruinia ásar, wait chichaman unuitiamprar akiam kuítriniawartatui. Tura nú shuar yaunchu Yus jákatniunam sumamtiki-awarma ásar, ni amuukatin tsawantr̄j jeatemayi. 4 ¿Warí? Yuska ni suntar̄j nayaimpiniam pujuarmia nunasha penké tsan̄kurachmiayi. Antsu nayaimpinmaya jinium akupkarmiayi. Tura nekapsatin tsawant jeatsain̄ kiritniunam jinkiamu emetamu pujuiniawai. 5 Yáunchuya shuarnasha Yus tsan̄kurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusaj̄i wekasatniun etserin asantai ni shuar̄j siati armia nujāi uwentikramiayi. 6 Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiayi. Ukunam nu túrunamun nekaawar, shuar tunáa túratin tsúmainian nekaawarat tusa túramiayi. 7 Tura Yus Ráutan uwentikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi. 8 Péñker áishman̄ asa, nuyá shuara yajachir̄in wáitiainiak, ni enentáin péñker asantai tuke tsawant kúntuts enentáimiuk wáitmiayi. 9 Tura incha tunaan iniakturmakin, nu tunaanum nupetnakchati tusa Uunt Yus uwentikrampramniat̄ji, ni umirka asakrin. Túrasha yajauch shuárnaka nekapsatin tsawant jeakuí ti asutniáwarat tusa Yus yámaikikia apujeawai.

10 Tura Yus akupeana nuna umirkatniun nakitrar ni yajauch wakeramur̄in túruinia nunasha Yuska nekas asutiáttawai. Enentáimcha áiniawai. Tura ni wakeramur̄iniak wakeruiniawai. Niijjaj̄i nan̄kaamas akupin ainia nuna yajauch áujmatainiawai. 11 Warí, imia Yusa suntar̄j Yusaj̄i matsainia nu, nuna túratniun tsúmainiawai. Nan̄kaamas kakaram tura nan̄kaamas uunt áiniayat nu akupniun katsekainiatsui.

¹² Nu áishmaṅsha enentáincha yajasma núnin áiniawai. Achikiar man-tamnatniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisaṅ jákartatui. ¹³ Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayataṅ atumin ananḱramawar warainiawai. Nuka natsántaiti.

¹⁴ Nuwaṅ wakerutskeka íniatsui. Tunaan yawétainiatsui. Yúpichuch ainia nú shuaran netse túratniun wakerumtikiainiawai. Kuítian wakeruk-tinniasha ti nékainiawai. Jákatniunam sumamawaru áiniawai. ¹⁵ Yúsnumaani naka wétsuk awajirarai. Peura uchiri Paraam Yúsnan etserniuitat yaunchu awajimia núnisaraṅ awajiniawai ju shuar. Paraamka tunaan tura, kuítian achiktiniian ti wakerukmiayi. ¹⁶ Tura niisha tunáa túratajtsa weaj Yuska umpuurun chichachun aents chichaana nujai métek chichamtikiamiayi. Nuñkia umpuuru timia nujai Yúsnan etserin ni netse túratniurin enentáimiar iniaisamiayi.

¹⁷ Nu áishmaṅsha yumirmat kuyua núnis áiniawai. Tura núnisaṅ yuraṅmisha kíariat nase umpuim menkaana nu, yumi ajuarcha ásar, penké ántar áiniawai. Warí, Yus-Chichamjai áentsun yainiainiatsui. Niisha imiá kirit ámanum tuke pujustin áiniawai. ¹⁸ Niisha ti chichainiayat ántar chichainiawai. Yajauch túratniujai tura ayash wakera nujajisha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. ¹⁹ “Iiya núnis túrakrumka anḱant átatrume” tu wénawai. Túrasha imia ninḱi ni tunaariin emetamu áiniawai. Páantchakait. Shuar warí tunaajaim nupetnaka, nuna emetamurinti. ²⁰ Kame shuar, uunt Jesukrístu uwentikiartin ana nuna chichamen nékainiak ju nunḱanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nujainkia nanḱaamas yamá imiá yajauch pujuiniawai. ²¹ Yusa akupkamurin imiá péñkera nuna Yus nú shuarnasha súarmiayi. Túrasha nékainiayat tunaanum wakеткиaru ásar ti asutniáwartatui. Tuma asamtai, nekas jintia nekaachuitḱunḱa maak árainti. ²² Tíchamukait, “yawá iyak ataksha yúawai,” tura, “kuchisha imiaimiuitiat ataksha tsakusum maajkimiui.” Nu áishmaṅsha núnisaṅ yajauchiniam ataksha wáketainiawai.

3

Uunta táintrj

¹ Aneamu yatsurtiram ju papin jimiará áatjarme. Mai papinium winia jintintiamurjai atumí chamir enentáin enentáimtikratjarum tusan wakerajrume. ² Yúsnan etserin, péñker wekain armia nuna etserkamurj enentáimturarum. Tura ii Uuntrj akupkamurin ni akatramurjjjai ujatmakarmia nusha enentáimpratarum. Jesukrístu uwentikrampramaj nuna chichamen tajai.

³ Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurin túrusar wekasartatui. ⁴ Tura juṅa tiartatui. “¿Krístuka “wi atak tátatjai” timia nusha urukuit? Warí, ii uuntrj yaunchu kajinḱiarmia nuyá yapajjáchmaiti. Yus yaunchu ju nunḱan najanania nuyá yamaisha tuke núniskete” tiartatui. ⁵ Túrasha nunḱancha nayaimpincha Yusa yaunchu najanania nuna nekaatniun nakitiainiawai. Yusa chichamejai nunḱa entsaya jinkimiayi tura nunḱasha entsá nanatrawai, Yus timia nujai métek. ⁶ Tura ukunam

nu nun̄kan amaarkamujai Yus emesramiayi. Ashí nuna nekaatniun nakitiainiawai. ⁷ Tura Yus tiniu asamtai nayaimpisha nun̄kasha yamáiya nuka jijjaj emesnarat tusa ikiusma áiniawai. Yus áentsun nekapsattana nu tsawantaj yajauch aents emesnartatui; tura jisha nu tsawantaj nun̄kancha nayaimpincha áesattawai.

⁸ Tura jusha, aneamu yatsurtiram, enentáimsatarum. Uunt Krístujainkia chikichík tsawant mir uwiya núniskete; mir uwisha chikichík tsawanta núniskete. ⁹ Uunt Kristu, “atak tátatjai” tana nuna umitsuk men̄kakashatui. Áyatik áentsti “wau taatsui” taji. ¿Urukamtai wau taatsua? In áentstin nákarmaji. Shuar chikichíkisha men̄kakajin̄ tusa nakitiawai. Antsu ashí shuar enentáin yapajjáwarat tusa wakerawai. ¹⁰ Túrasha Uunta tsawantrij aya aneachma jeattawai. Kasa aya aneachma kiritniunam taana núnisan̄ tátatui. Nu tsawantin nayaimpisha ipiamta núnis charáa timiatai men̄kakattawai. Tura nuj ashí írúnna núurtiuk esaawartatui. Tura nun̄kasha tura ashí írúnna nusha esaawartatui.

¹¹ Ashí nu emesnartin neka asarum atumsha imiá nekas Yus tuke enentáimtusum, takamtsuk umirkarum wekasatniuitrume. ¹² Yusa tsawantrij wárik tati tusar, jintiá ímprusar nákastiniaitji. Nu tsawantaj nayaimpisha esáa emesnartatui, tura ashí írúnna núurtiuk ti tsuer ajas entsamnattawai. ¹³ Tura iikia yamaram nayaimpisha, yamaram nun̄kasha ati tusar nákaji. Nu átatui, tímiayi Yus. Tura nujsha aya péñkerak átatui.

¹⁴ Nu tuma asamtai, aneamu yatsurtiram, ju túrunati tusarum nákarmena nuj, imiatkinchanum wekasam chamir enentáimjai makuuchmin Yus wáitkiati tusarum wekasatarum. ¹⁵ Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisan̄ Yus ni nekatairjin̄ susamia tímiatrusan̄ áatramprarmeme. ¹⁶ Ashí papí aarmia nuj Pápruka wi tajaana nuna chichaaawai. Kame ni áarmarj chíkichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajjáwar nusháa jintintiniawai. Tura chíkich chichamsha Yus-Chichamnumiá ana nuna núnisan̄ túruiniawai. Túmainiakka nin̄ki emesmamainiawai.

¹⁷ Wátsek, aneamu yatsurtiram, túruntsain̄ ujakjarmena nu neka asarum, yajauch shuar anañkramattsa wakerutmainiak awajimtikrurain̄ tusarum, tura Yusaj tariarumena nuyá iniaraj̄ tusarum anearum wekasatarum. ¹⁸ Tura ii Uuntrij Jesukristu in Uwentikkiartin ana nu, yamáí nékarmena nú nan̄kaamas nekaatarum. Tura enentáimin̄ nú nan̄kaamas tariarum wetarum. Yamaisha tura tuke, ii Uuntrij Jesukristu náarin̄ uunt awájsarti. Nu atí.

JUAN

Emka papin áarar akupkamu

Tuke iwaaku átinia nérentin Chicham ana nu

¹ Ashí nan̄kamamia nú yaunchu Yusa Uchir̄i tuke pujuuyayi. Nusha iisha anturkait̄ji. Nekas ii jiij̄i wáinkiat̄ji. Wáinkiarsha ii uwejejaisha antin̄kiuit̄ji. Niisha Yúsan ti paant awajeak̄, Chícham tíminiaiti. Tura tuke iwiaaku átinia nérennuiti. Nuna áateajrume. ² Iwiaaku átinia nérenniusha paant nekanamiayi, nusha Jesukrist̄uiti. Iisha Nii wáinkia asar nu étsereaji. Tura tuke iwiaaku átinia nérenniur̄i asa tuke Yus Apajāi pujuuyayi. Tura yamaikia iji paant ajatramsakrin atumniasha ujaajrume. ³ Ii Yus Apajāisha ni Uchir̄i Jesukrist̄uj̄aisha tsan̄inkiar nekas chikich̄ik ajaji. Tura atumsha núnisrumek iji chikich̄ik ajasuk tusar wáinkiamajnia nuna anturkamajnia nunasha ujaajrume. ⁴ Ti shiir warastarum tusan juna áatjarne.

Yus tsáapniniaiti

⁵ Yus imiá tsáapnin asamtai kiritin N̄iinkia pen̄ké atsawai. Nu chichaman Jesukrist̄u in unuitiamprakrin nuna atumniasha ujaajrume. ⁶ “N̄iij̄i tsan̄inkia pujaji” táyatar kiritniunam pujustinia áintsar tunaanum pujakrikia wáit̄raji tura nekas pen̄ker ana nu túrats̄ji. ⁷ Yuska tuke tsáapninium pujuwiti. Iisha núnisrik tuke tsáapninium pujakrikia nuám̄tak nawamnaik̄iar pujuiniaji. Túrakrin Yus ni Uchir̄i Jesukrist̄u numpéjāi ashí ii tunaar̄i japirtam̄ji.

⁸ “Wi tunaan túrichuit̄jai” tákurkia ímia iik anan̄mamaji. Nekas ana nu nékats̄ji. ⁹ Antsu ii tunáar̄i Yus paant ujakrinkia Yuska tsan̄kurtamprattaji. Tura ii tunaar̄in asakátramprattaji. Yuska ti pen̄ker asa Nii tana nuna tímiatrusan̄ umikmin asa túrattawai. ¹⁰ Kame “Tunaan túrichuit̄jai” tákurkia nuj̄āi “Yus wáit̄riniaiti” taji. Ni chichamesha ii enentáin pujurtam̄tsuji.

2

Jesukrist̄u in Yúsan áujturmaid̄ji

¹ Yus-shuartiram, tunaanum iniaar̄irum tusan ju papí áateajrume. Túrasha Yus-shuar tunáa túram̄tānkia Apa Yusan ii áujturmau awai. Nuka Jesukrist̄uiti. Niisha ti pen̄keraiti. Niisha Yúsan áujturmakui Yusjāi ataksha iwiaarar pujustat̄ji. ² Jesukrist̄u ii tunaar̄in asakártaj tusa jarutramkamiaji. Túrasha aya íiniunkechu antsu ashí shuara tunaar̄in asakártaj tusa jarukmiayi.

³ Yus tana nu umirkurkia nuikia Yus nekas nékait̄ji. ⁴ Tura shuar “Yúsan nékait̄jai” tayat Yus tana nuna umirchakka wáit̄rawai. Nekasa nuka ni enentáin atsawai. ⁵ Antsu shuar Yus tana nuna umireakka Yúsan ti shiir aneawai. Túrakur N̄iij̄i tsan̄inkiar pujamu nékaji. ⁶ “Yusjāi tsan̄inkia wekaajai” tana nú shuar Jesukrist̄u wekasamia núnisan̄ wekasatniuiti.

Yamaram akupkamu

⁷ Yatsuru, yamaram akupkamun áattsujrume. Áyatik yámankam̄taiknumiá antukmiarum nunak tájarne. Ashí atumin jintintiamu yaunchu akupkamuiti. ⁸ Túmaitiat nekas yamarma áitkiasnak áateajrume. Nu akupkamun Kristusha nekas iniakmasmai. Atum̄ijn̄cha nu akupkamu nekas paant

awajsamuiti. Nujaj kiritin menkaatemka asamtai tura nekas tsaapninkia paant tsaapnirtasa pujakui nu akupkamun atakshaa aateajrume.

⁹ Shuar “tsáapninium pujajai” táyat chíkich Yus-shuaran nakitiakka tuke kiritniunam wekaawai. ¹⁰ Yus-shuaran aneana nu nekas tsáapninium pujawai. Niisha iniaatsuk chikichnasha tunaanum ajuarhamniaiti. ¹¹ Tura shuar chíkich Yus-shuaran nakitiakka kiritniunam tuke wekaawai. Tura kiritniunam iimiu asa ituraani wea nuna nékatsui.

¹² Uchitirmincha, Jesukristu jakamujaj atumí tunaari tsan̄kurnaru asakrumin juna áateajrume. ¹³ Úuntirmincha yámankamtaiknumiá tuke pujuuya nu nekáa asakrumin juna áateajrume. Úunmarutirmincha uunt iwianch nupetka asakrumin juna áateajrume.

Uchitirmincha, Yus Apa nekáa asakrumin áateajrume. ¹⁴ Úuntirmincha yámankamtaiknumiá tuke pujuuya nu nekáa asakrumin juna áatjarme. Úunmarutirmincha atumí enentáijijaj Yus-Chicham umirkarum kakaram asarum iwianch nupetka asakrumin juna áatjarme.

¹⁵⁻¹⁷ Aya áentsnumiá ana nu yakiyanchuiti. Apa Yus súsachuiti. ¿Warimpiait nu? Júiti: ame ayashim wakerana nusha, ame ísam takustaj támena nusha, tura nan̄kaamantu ajastin. Nuka ju nun̄kanmayá áiniawai. Shuar aya nunak wakerak Yúsna aneatsui. Kame ju nun̄kasha amuukattawai. Ashí nu wakeruktincha ti nekas amuukattawai. Túrasha shuar Yusa wakera-mur̄in umiana nu tuke iwiaaku pujustatu Yusjaj. Nu asamtai atumsha ju nun̄kanam ana nu pachikiairap. Tura aya juyá ana nu aya tákustin enentáimsáip.

Nekas chicham tura wait chicham

¹⁸ Uchirú, amuukatin tsawant jeatemayi. Atumsha Kristu nemasri tátin antukuitrume. Yamaikia untsurí Kristu nemasri wantinkiamtai amuukatin tsawant jeatemayi. ¹⁹ Nusha ii weak ármayi. Túmaitiat nekas Yus-shuar ácharmayi. Nekas Yus-shuar ániakka tuke iijaj irunar pujuaraayi. Tura jíinkiamtai nekas Yus-shuarcha ainia nu paant nekanamniaiti.

²⁰ Antsu atumniaka Yusa Shiir Wakan̄in Kristu suramsamtai ashí paant nékarme. ²¹ Nékachuitrume tu enentáimkiun áattsujrume. Antsu nekas chicham ana nu neka asakrumin paant áatjarme. Wáit-chichamsha nekas-chichamsha pen̄ké nushaachuk ainia.

²² Wáitrin júiti: Jesusan “Yus anaikiamuka Krístuchuiti” tana núiti. Núiti nekas Kristu nemasri. Yus Apancha ni Uchir̄incha nakitia asa Kristu nemasrinti. ²³ Yusa Uchir̄in nakitiainia nu Yus Apajaisha tsan̄in pujatsui. Tura Yusa Uchir̄in shiir awajea nu, Yus Apajaisha tsan̄in pujawai.

²⁴ Yámankamtaiknumiá antukmiarum nu atumí enentáin pujurtamsati. Nu túrakrum atumsha Yusa Uchir̄ijajisha Yus Apajaisha tuke tsan̄inkrum pujustatume. ²⁵ Jesukristusha Nijijaj tuke iwiaaku pujustinian tsan̄katramkaitji.

²⁶ Anan̄kartin írunkui juna áatjarme. ²⁷ Atumniasha Jesukristu Yusa Shiir Wakan̄in suramsakrumin, nu Wakan̄ tuke pujurtamkurmin shuar jintin-tramat̄in atsumatsrume. Antsu Yusa Wakan̄ ashí jintin-tramprume. Ni jintin-trammasha imiá nekas asa wáitchaiti. Tuma asamtai Nii jintin-tramna áintsarum Kristujaj tuke tsan̄inkrum pujustarum.

²⁸ Yamaikia, uchiru, Kristujaj tuke tsan̄inkrum wekasatarum. Nu túrakrikia Nii támatai natsamtsuk ti shiir in̄kiunaiktatji. ²⁹ Atumsha Jesukristu ti pen̄kera nu nékarme. Núnisan̄ ashí shuar pé̄nkeran túruinia nuka Yusa uchir̄i áiniawai. Nusha nekaatarum.

3

Yusa uchirí áiniana nu

¹ Maa, shiir enentáimpratarum. Yus Apa ti anenma asa “winia uchir” tu anaitiamkaitji. Kame nekas ni uchiríntji. Tuma asakrin jú nunñanmaya Yús-shuarcha nekarmainiatsji. Kame Yusnasha nékainiatsui. ² Aneamu yatsurtirmea, júna tájarne: nekas Yusa uchirí ajasuitji. Kame ukunam urukuk átají nusha nékatsji. Túrasha jú paant nékaji: Jesukrístu támatai imia Nii paant wáinkiar Niijjai métek ajastatji. ³ Tura shuar shiir enentáijjai nuna nákkaka imia niñki shiir awajmamui Jesukrístujai métek shiir atajai tusa.

⁴ Shuar tunáa túrakka Yus akupkamu umirkachuiti. Kame núiti tunaaka Yus akupkamu umirkashtin. ⁵ Jesukrístu ii tunaari asakártaj tusa jú nunñanam támia nu nékarme. Tura Niñkia tunaan túrichuyayi. ⁶ Tuma asamtai shuar Niijjai tsaniñ wekáa nuka tunaanum wekaatsui. Antsu shuar tunaanum wekaakka nu shuar Kristun wáinchaiti, núnisan nékachuiti. ⁷ Uchiru, shuar anañkramawairap. Péñker túrinkia Kristu ti péñker asamtai niisha péñkeraiti. ⁸ Antsu shuar tunaanum wekaana nu iwianchnaiti íwianch tuke tunaan túrin asamtai. Yusa Uchirí jú nunñanam táwiti ashí íwianch túramun emesrataj tusa.

⁹ Shuar nekas Yusjai akiinia nu tunaanum wekaatsui. Yusa uchirí asa Yusa iwiaakmarijjai wekaawai. Tuma asa tunaanum tuke wekaatsui. ¹⁰ Shuar péñker túratsna nuka tura Yus-shuaran kajera nuka Yus-shuarchaiti. Nujai Yusa uchirí ainia nusha tura iwianchi uchirí ainia nusha paant nekaamni-aiti.

Mai anenai ajatin

¹¹ Atumsha yámankamtaikniumia chicham antukmiarum nu júiti: mai anenai ajartin. ¹² Iisha Kañkia áanin áchatniuitji. Íwianch-shuar asa ni yachin máamiayi. Tura çurukamtai maamia? Enentáimprata. Nii yajauch asa tura ni yachi péñker asamtai máamiayi.

¹³ Yatsurtiram, jú nunñanmaya shuar nakitramainiakui ti enentáimsairap. ¹⁴ Iikia jákatniunmaya uwempra asarí nekas iwiaaku pujaji. Túmakur Yus-shuar ainia nu aneaji. Nujai yamaram iwiaakma takakjinia nu imiá páantaiti. Shuar Yus-shuaran aneachkunka tuke jákatniunam wekaawai. ¹⁵ Shuar Yus-shuaran nakitiakka mañkartinia núnisaiti. Tura mañkartinkia tuke amuicha iwiaakmanum pujuiniatsui. Nuka nékaji. ¹⁶ Jesukrístu in jarutramka asakrin nujai nekas in anenmaj nu nékaji. Iisha núnisrik Yus-shuar ainia nu ti aneakar ni yaintai tusar jarukmin átiniaitji. ¹⁷ Túrasha shuar chíkich Yus-shuar atsumana nuna takakiat waitnentachkunka nekas ni enentáijjai Yúsán aneawash. ¹⁸ Uchiru, aya chíchamjain anenain áchatniuitji antsu nekas aneniakur péñker túrar yáiniaiktiniaitji.

Yusaj natsqmtsuk jeamniaitji

¹⁹ Jujai ii Yúsai sapijmiatsuk jeatniusha tura nekas Yus-shuaraitji nu nekaatniusha nekapmampramniaitji. ²⁰ Ii enentái yajauch túramun enentáimtikramkurnisha Yus iijjai nankaamas ashí mash nékatsuk. ²¹ Tura, aneamu yatsurtiram, ii enentái yajauch túramun enentáimtikramchakrinkia Yúsai sapijmiatsuk jeamniaitji. ²² Tura ni wakeramu túrakrikia tura ni chichamesha umiru asakrin ashí ii seaj nuna suramsattaji. ²³ Júiti Yus akupkamu: ni Uchirí Jesukrístu nekas enentáimtustin tura Kristu timia áintsarik shuartisha mai anenai ajartin. ²⁴ Shuar ni chichamen umía nuka

Yusjaj tsanin wekaawai tura Yus niijjaj tsanin wekaawai. Mai chikichik ajasu ániawai. Tura Yusa Wakanj ii enentáin pujá asamtai nujaj Yus iijjaj tsanin wekaana nu nékaji.

4

Yusa Wakanjsha tura Kristu nemasri wakancha

¹ Aneamu yatsuru, untsurí shuar wáitruiniak “wi Yúsnan etserniuitjai” tuiniawai. Tuma asamtai ashí shuar “wi Yusa Wakanin takakkun chichaa-jai” tuinia nu penker nekapsuk enentáimtusairap. Antsu ísrum nekas Yusa Wakanimpiashit tura chikich wakaniashit nu nekaatarum. ² Jujaj nekasarum ya nekas Yusa Wakanin takaka nu nekaattarme: Shuar “Jesus Yusa Uchirj Krístuítai nekas aents ajas ayashimkiamiayi” tana nu Yusa Wakanin nekas takakui. ³ Tura Jesusan tu enentáimtsatna nuka Yusa Wakanin takaktsui antsu Kristu nemasri wakanin takakui. Kame Kristu nemasri wakan tatin tama ántichukaitrum. Nu wakan yamaikja ju nunkanam táwiti.

⁴ Uchiru, átumka Yusna asarum Yus atumí enentáin pujawai. Tura ju nunkanmaya shuara enentáin íwianch pujawai. Atumijn pujana nuka niijjaj nankaamas kakaram asamtai wáitrin ainia nu nupetkaitrume. ⁵ Niisha ju nunkanmaya ásar aya ju nunkanmayan áujmatainiawai. Túmainiakui ju nunkanmaya shuar ti penker anturainiawai. ⁶ Antsu iikja Yúsnaitji. Tuma asakrin Yúsan nékainia nu anturtamainiaji. Tura Yúsnachu ainia nu anturtamainiatsji. Nujaj nekas Wakanin takakusha tura wáitrin wakanin takakusha nekaamniaiti.

Yus tuke anenkratniuiti

⁷ Aneamu yatsuru, anenaitin Yúsnumia asamtai mai anenai ajartai. Shuar anenkratniua nuka Yusa uchirj asa Yúsnancha nékawai. ⁸ Shuar anenkratcha nuka Yúsnanka nékatsui. Kame Yuska tuke anenkratniuiti. ⁹ Tuma asa ni Uchirj chikichkiniak ju nunkanam akupturmakmijaji. Iisha ni túrunamujaj nekas iwiaaku pujaji. Nujaj Yus in yáinmak ni anenkrattain paant inakturmasmijaji. ¹⁰ Jujaj nekas anenkrattainkia paant nekanamniaiti: ii Yus aneaj núchaiti. Antsu ii ti tunáa árinin Nii aneachmaitiatan Yuska ti anenma asa ni Uchirj ii tunaarin asakarat tusa akupturmakmijaj nujaj nekas nekanamniaiti.

¹¹ Aneamu yatsuru, Yus núnis anenma asakrin iisha núnisrik mai anenai ajartai. ¹² Chikichkisha Yúsan wáinkiachuiti. Túmaitiat mai anenai ajakrikia Yus ii enentáin pujurtamkui Niijjaj métek anenkratin ajaji. ¹³ Yus ni Wakanin suramsa asakrin Yus iijjaj tsanin wekaana nusha tura ii Niijjaj tsaninkia wekaajnia nusha, nujaj nékaji. ¹⁴ Yus Apa ni Uchirj ashí shuaran uwemtikrarat tusa ju nunkanam akupkama nu wáinkia asarí étsereaji. ¹⁵ “Jesus Yusa Uchirinti” tana nu shuarjaj Yus tsanin wekaawai tura niisha Yusjaj tsanin wekaawai. Mai chikichik ajasu ániawai.

¹⁶ Yus in anenmajnia nu ti nekas nékaji. Yus tuke anenkratniuiti. Tuma asamtai shuar anenkartakka Yusjaj tsanin wekaawai tura Yussha niijjaj tsanin wekaawai. Mai chikichik ajasu ániawai. ¹⁷ Núnisar ti penker anenkartin ajaji. Túrarí súmamtikiatin tsawantaj natsamtsuk wajastatji. Kame ju nunkanam pujayatrik Jesukristujaj méketetji. ¹⁸ Nekas anenaiyanunam sápij atsawai. Antsu nekas anenaiyanunam sápij menkaawai. Aya asutiátin akui sapijmiaktinaiti. Tuma asamtai ántar sapijmiana nu nekas anenkratchaiti.

¹⁹ Yus emka in anenma asakrin iisha Nii aneaji. ²⁰ Tura shuar “wi Yúsan aneajai” táyat chíkich Yus-shuaran nakitiakka nuka wáitriniaiti. Kame Yus-shuaran tuke wainnia nuna aneachkunka çitiurak Yusan wáinchasha aneat? ²¹ Yus incha júna turammiaji: Yúsan anea nu shuar chíkich Yus-shuarnasha aneatniuiti.

5

Ju nunkanmaya írúnna nu núpeteaji

¹ Ashí “Jesus Yusa Uchirí Krístuiti” tu enentáimtana nú shuar Yusa uchirínti. Tura aparí aneakrikia ní uchirísha aneattaji. ² Yus Apa aneakur tura Nii wakera nu umirkur Yusa uchirísha ashí aneattaji. ³⁻⁴ Yus aneakur Nii tana nu umikattaji. Ashí Yusa uchiríya nu Yúsan nekas enentáimta asa, ashí ju nunkanmaya írúnna nuna núpeteawai. Nu asamtai Yus tana nu umirkatin itiruchatchaiti. ⁵ Aya “Jesus Yusa Uchirínti” tu enentáimtana nú shuar ju nunkanmaya ana nuna awakkamniaiti.

Jesukrístu “Yusa Uchirínti” tu etserainia nu

⁶ Jesukrístu jú nunkanam taa entsajai imiankui Yus nayaimpinmaya chichaak “Juka winia aneamu Uchiruiti” tímiayi. Tura nuyá Jesus jakamtai ni numpé puarmiayi. Entsajai imianin ni takatrín nankamamiayi túrasha in jarutramak ni takatrín amukmiayi ju nunkanam. Chíkichinkia túrutsuk mai metek túra asamtai Yusa Uchiríya nu paant nekanamniaiti. Yusa Wakanísha tuke nekas tiniua nu métek tawai. ⁷⁻⁸ Nu asamtai menaint “Yusa Uchirínti” Jesusan tuiniawai: Nayaimpiniam Yus Apa tura Jesukrístu, Chícham aa nu, tura Yus Wakanísha; nunkanmasha Yus Wakanísha, entsasha tura numpasha. Mash métekrak tuiniawai. ⁹ Aents étserainiakui ántureaji. Nuna nankaamas Yus ní Uchirín tana nu nekas anturkatniuitji. ¹⁰ Yusa Uchirín enentáimtana nú shuar ní enentáincha nékawai. Antsu Yus ní Uchirín timian enentáimatsna nú shuar Yúsan enentáimtachu asa Yúsan “wáitriniaiti” tawai. ¹¹ Yus ní Uchirín timia júiti: Tuke iwiaaku pujutai nérenniuiti tura nu iwiaakmancha in suramsaitji. ¹² Yusa Uchiríjajai tsanín wekaana nú shuar, nu iwiaakmajai iwiaaku pujuiniawai. Tura Yusa Uchiríjajai tsanín wekaatsna nú shuar, nu iwiaaku átinnium pujatsui.

Amuak Yus nekas enentáimustinian áarmiania nu

¹³ Yusa Uchirí nekas enentáimtakrum tuke amuicha iwiaakmajai iwiaaku pujarme. Nu nekaatarum tusan júna áatjarme.

¹⁴⁻¹⁵ Yus wakeramujai métek seakrinkia anturtamji. Tura anturtamkurin ii seamaj nu nekas takusua nu enentáimpramniaitji. Nu neka asar Yus ti shiir enentáimtajai.

¹⁶ Tunáa awai jákatniunam júana nu. Shuar nu tunaan túramtainkia Yus áujtustin ántrait. Tura shuar chíkich tunaan túrakuinkia nuka nekas Yus áujtustiniaiti. Nekas jákatniunam júatsna nú tunaan túraitkiuinkia iwiaaku átinian Yus susattawai. ¹⁷ Ashí yajauch¹ ana nuka tunaiti. Tura jákatniunam júatsna nú tunaasha awai.

¹⁸ Nekas Yusjají akiinia nú shuar tunaanum tuke wekaatsui. Antsu Yusa Uchirí nin ti penker wainkiui íwianch antínkiachminiaiti.

¹⁹ Tikia nekas Yúsnaitji tura ashí ju nunkanmaya shuar iwianchnia áiniawai. ²⁰ Yusa Uchirí ju nunkanam taa nekas-Yus aa nuna paant jintinramji. Yusa Uchirí Jesukrístujají tsanínkia wekaakur nekas-Yusa nujajísha tsanínkiar

wekaaji. Nekas-Yus asa tuke iwiaaku átinia nuna nérenniuiti. ²¹Uchirú, ántar-yus írunna nuí pachiinkiairap. Antsu nujají aneartarum.
Nuke atí.

JUAN

Ataksha papin aar akupkamun

Nekasa nunasha tura anenaitniuncha ujaawai

¹ Wi Juan Yus-shuara uuntri asan ii umai Yus achikma nuna tura ni uchirincha ju papin áateajai. Wisha nekas anamin aneajrume. Tura aya wikichu antsu ashí Yus-shuar ainia nusha nekas chichaman nekaawaru ásar atumin anenmarme. ² Nekas-chicham tuke amuutsuk ii enentáin pujá asamtai aneajrume. ³ Yus ii Aparjsha tura ii Uuntri Jesukristusha, Yus Apa Uchiri asa, atumin anenmak imiatkinchanum shiir pujustinian waitnentramak yainmakarti. Nujai nekas-chicham nekaarum anenaitiarme.

⁴ Ame uchiram Yus Apa akupkamujai métek umiiniakui nuna nekaan ti shiir enentáimprajai. Nekas-chichaman umin ániawai. ⁵ Yamaikia, umaru, tájame: mai anenai ajartai. Yamaram akupkamun áattsujme antsu yamañkamtaik antukmiaj nunak tájame. ⁶ Nekas aneñkartinia nú shuar Yus akupkamun uminiaiti. Tura Yus akupkamuka “aneñkartin tuke atarum” tawai. Nusha yamañkamtaiknumia antukuitrume.

Anañkartincha írunui

⁷ Ju nunkanam anañkartincha ti írunui. Jesukristu nekas aents ajas aki-iniamia nuna enentáimtuiniatsui. Nu shuar anañkartin ásar Kristu nemasri ániawai. ⁸ Nu shuarjai aneartarum. Yajauch shuar ántar yayakrumin Yus átum takasman métek akirmakchamniaiti. Antsu aneara takasakrumin Yus métek akirmakarmi.

⁹ Ashí shuar Kristu jintíamun iniais “nañkaamas nékajai” tana nu, Yúsnachuiti. Antsu Kristu jintíamun umíana nu shuar Yus Apajaisha tura ni Uchirijiaisha mai tsaniñ pujawai. ¹⁰ Shuar Kristu chichamen jintíachu atumí jeen írmástaj tusa jeakuí awayáwairap tura “shiir taume” tiirap. ¹¹ Kame nu shuar “shiir taume” takumka nu shuar yajauch jintíamu jímiareame.

Umíamu chicham

¹² Ti nukap atumjai áujmatsatniun wakerajai. Túrasha ju papinium mashi áatrashtatjarme. Antsu imia wiki atumin iyakun jeátjái. Nuyá naka chichasar ti shiir warastatji.

¹³ Ame kaim Yus achikma nuna uchiri amikmaatmainiawai. Nuke atí.

JUAN

Nuyá Ukunam papin aar akupkamu

Kayu ti penker shuaraiti

¹ Wi Juan Yus-shuara uuntri asan winia amikrun Kayun ju papin áateajai. Wisá ti nekas aneajme. ² Aneamu yatsurú, Yusjai péñker wekaakum ame wakanim péñker pujana núnisan ame ayashmisha péñker atí tusan Yúsan áujtajme. ³ Ame nekas chicham umirman shuar juj taar ujatkarmayi. Tura nuna antukan ti warasmajai. ⁴ Yus-shuar nekas chichaman umiiniakui imiá shiir enentáimtuiniajai.

⁵ Aneamu yatsurú, chíkich Yus-shuar ti penker yayame. Kame yajaya yujainia nusha nekas yayame. Nu péñkeraiti. ⁶ Nu shuar ame nekas anenamun juj taar Yus-shuar iruntramunam etserkarai. Ataksha irauwenakui atsumainiana nu súsam shiir akupkarta. Péñker wáinkiumka Yus shiir enentáimtikrattame. ⁷ Nu shuar Jesukristun takarsatai tusar wekainiawai. Túrawar Yus-shuaracha ainia nuna kuítrijjai yurumátniun nakitrarmatai ⁸ ii Yus-shuartikia nii atsumainia nu ajamsatniuitji. Nekas chichaman etserainia nu, yainkiartai tusar túratniuitji.

Tiútrepes yajauch túriniati

⁹ Ashí Yus-shuar árumna nuna papin akuptukmajrume. Kame nékajai, Tiútrepes nankaamantu enentáimtumak ii tájinia nuna umiktinian nakitiawai. ¹⁰ Nu asamtai nuj jean ni yajauch túramun etsertuktatjai. Nii ántar ti áujmatuk tsanumprutmaji. Tura nu arantcha Yúsnan takainia nu irainiakui awayáiniatsui. Tura chíkich awayátaj tákuisha suritiawai. Tura nuyá Yus-shuarjai iruntratniun surimiawai.

¹¹ Aneamu yatsurú, nu yajauch túramu jumamkiirap antsu péñker túratarum. Péñker túrinia nuka Yúsnaiti. Antsu tunáa túrinia nuka Yúsan nékachuiti.

Timitriu péñker túriniati

¹² Imiá nekas péñker shuar asamtai ashí shuar Timitriun péñker áujmatainiawai. Iisha núnisrik péñker shuaraiti tákurin nekas tájinia nusha nékarme.

Umíamu chicham

¹³ Wi ti nukap títinian wakerajme. Túrasha ju papinium mashi áatrashtatjame ¹⁴ wárik íitin asan. Nuj jean chichasmi.

¹⁵ Shiir pujustá. Juyá amikrum amikmaatmainiawai. Ii amikrisha chikichik chikichik amikmaatruata.

JÚTAS papin árar akuptukma

Jútas Yus-shuaran papin áateawai

¹ Wi Jútas Jakupu yachintjai. Jesukrístu takarin asan ashí Yus Apa ni shuarí átinian achikma ainia nuna ju papin áateajai. Jesukrístujai tsanin̄kiaru áсарmatai Yus nin wainiainiawai niijjai kanakchatniun. ² Yus ti waitnentramak imiatkinchanum tuke shiir pujustinian yainmakarti. Ti anenma asa túrati.

Ti tunáa shuar írunui (2 Pítuur 2.1-17)

³⁻⁴ Aneamu yatsurú, iikia mai metek Yus-shuar asar ju uwempratin chichaman átratniun wakerukjarme. Túrasha ti yajauch shuar anan̄kramawar atum̄in pachiinkiarmai. Niisha “Yus ti anen̄kartin asamtai páchitsuk tunáa túramniaitji” tuiniawai. Nu arantcha Yus in Akuptamniuncha tura ii Uuntri Jesukrístuncha nakitin áiniawai. Nu asamtai nu shuaran “yaunchu sumamawaruiti” túmiayi Yus. Tuma asamtai tájarme “Tuke Yus-Chicham yapajáshtinian ashí Yus-shuar akasmatkarat tusar susamuiti. Wátsek, kakaram ajastarum” tájarme.

⁵ Yaunchu Uunt Yus Israer-shuaran túramia nu nékarme. Nuna atak enentáimtkratjarme. Eijptu nun̄kanmaya júkiar Nin umirkacharua nuna méawarmiayi. ⁶ Nayaimpinmaya suntarsha ni pujutairin ajapa ikiukiari Yus susamun umitsuk iniaisarmiayi. Túrawarmatai Yus kiritniunam jirujai tuke jin̄kiá sepunam apujas pujurainiawai. Tura Uunt Tsawant jeamtai súmamtikiawartatui. ⁷ Núnisan̄ Sutuma péprusha Kumura péprusha tura tijiuch péprusha áishmajajisha nuwajajisha ti yajauch nuamtak tsanirmanainiakui ti tunaan pen̄ké túrachmin ana nunasha túrin árimiayi. Túmainiakui ashí shuar ashamkarat tusa Yus amuicha jinium asutiáwarmiayi.

⁸ Ayu. Atum̄in yajauch shuar ainia nu, yaunchu túrunamun enentáimtsuk tuke yajauch enentáimiainiak ni ayashin yajauch awajmamainiawai, Yusnasha nakitiainiawai, tura ashí akupin ainia nunasha yajauch áujmatainiawai. ⁹ Antsu Mikiar, nayaimpinmaya sutara kapitian̄trintiat, iwianchjai máaniak Muisaisa ayashin akasmatak “áaniumsha” tu chicharkachmiayi. Antsu áyatik “Yus írmastí” túmiayi. ¹⁰ Túrasha ju shuarka nékainiatsna nuna nánkamsar yajauch chicharainiawai. Tura nékainiana nuka yawá áinis enentáimtsuk áyatik nékainiawai. Tura nújajisha imia nin̄ki yajauch emesmamainiawai.

¹¹ Maa, anearartí. Kaín̄ yajauchin túramia núnis tura ásar jákartatui. Tura Parama ánis kuítian ti wakeruiniak imia nin̄ki tunaanum tsan̄kamakaru áiniawai. Tura Kurea ánis ashí akupniun nakitin ániak kajin̄kiartatui. ¹² Átum nuamtak anenaitiai-jisat nájankurmin nu shuar chikichan enentáimtsuk Yusnasha ashamtsuk imia nin̄ki enentáimtumainiawai. Pen̄ké ántar ániak yumi kíar tee ajasua núnin áiniawai. Tura nase umpuin yútusuk nan̄kamainiawai. Árak nerektin nantutin nerechua áanin áiniawai. Tuma ásar uwemu pen̄ké jaka áanin áiniawai. ¹³ Entsa nujan̄krak saurin ajekeawai. Nu

shuarsha núnisar ni natsantr̄jn natsamtsuk ajekenawai. Tura yaa waakua áanin áiniawai. Tuma ásar nekas kiritniunam tuke menkakatin áiniawai.

¹⁴ Ataŋka tiran̄kiyayi Eruk. Ti penker Yúsnaŋ etserin asa juŋa tímiayi “Uunt Yus ti untsur̄j ni shuarjij̄aj winittiwai. ¹⁵ Nuyá ashí shuar túrawarman nekaattawai. Tura ashí yajauch shuarnasha ti tunáa túrawarua nuj̄aj tura Yúsnaŋ yajauch áujmatsarua núj̄aj̄isha súmamtikiawartatui” tímiayi Eruk. ¹⁶ Nu shuarka pen̄kera nuj̄aj waratsuk “yajauchiiti” tuiniawai. Aya ni ayash̄j wakeramunak wakeruiniawai. Nan̄kaamantu enentáimtumainiak chichainiawai. Tura chikich shuaran shiir chicharainiaksha aya nii wakera nuna túrutati tusa pen̄ker chichainiawai.

Yus-shuar enentáimtikratin

¹⁷ Tura atumsha, aneamu yatsurú, ii Uuntr̄j Jesukristu akatramur̄j yáunchu “aneartarum” tiarmiania nusha enentáimtustarum. ¹⁸ “Amúamu tsawant ishichik ajatesmatai shuar Yúsnaŋ wishikrar nakitrartatui. Tura ni yajauch wakeramur̄jiniak umí pujuartatui” tiarmiayi. ¹⁹ Nu yajauch shuar atumín akantamenawai. Ju nun̄kanmayan̄ak páchiniak Yusa Wakan̄jn takakainiat-sui.

²⁰ Tura átumka, aneamu yatsurú, tuke Yus nekas enentáimtusum kakaram ajastarum. Yusa Wakan̄j kakarmar̄ij̄aj ashí Yus seatarum. ²¹ Yus ti anenmakui nii wakera nu wakeruktarum atumsha. Túrarum ni anenmamu shiir nekaattarme. Tsawant winiawai, ii Uuntr̄j Jesukristu in waitnentr̄ama asa tuke shiir Nij̄j̄aj pujustinian amatat̄j. Nu tsawant naká pujutarum.

²² Mai yapaj̄j ajá ainia nu naka enentáimtikratarum. ²³ Chikich shuarsha jiniumiá júsatniua áitkiasrum uwentikratarum. Tura chikichcha ti yajauch ásar matai anearum waitnentratarum. Tura ni pushir̄isha ni tunaar̄ij̄aj maatra asamtai mūjkiatniuiti.

Yúsnaŋ shiir awajeawai

²⁴⁻²⁵ Yus chikichkiiti. Ti nekaiti. In uwentikkiartin asa ni kakarmar̄ij̄aj yainmakminiaiti tunaanum iniarchatniun. Tuma asa tunaaj̄aj máatrachu awajtamas ni ti shíirmar̄jn ejetamtatrume. Túrutma ti waramtikramsattarme. Ii Uuntr̄j Jesukristu túrunamuj̄aj Yuska Niŋki shiir awajsatniuiti tura nan̄kaamantu enentáimtustiniaiti. Yáunchusha, yamaisha, tura tuke ashí akupin atí.

Núkete.

APUKARÍPSIS

Jesukrístu Juánkan paant iniaktusma

Jesukristu paant awajsamu

¹ Jú áarman Jesukrístun Yus ujakmiayi. Wárik túrunatta nuna ni shuarin ujakarat tusa ujakmiayi. Tuma asamtai Jesukrístu ni suntarin akupak ashí winia paant awajtursamai. Wisha Juánkaitjai. ² Yus timia nunasha tura Jesukrístu ujatkamia nunasha tura wi íismaj nunasha ti paant aya nekasa nuna tájai. Penké wáitratsjai.

³ Jú papin áujea nu shuarsha tura núnisan juna ántana nusha nekas enentáimtuiniakka shiir ártatui. Ukunam átatna nuna ujaawai tura jeatemayi.

Juan siati péprunam Yus-shuar írunun juna áteawai

⁴ Wi, Juan, Asia nunkanam siati (7) péprunam Yus-shuar írunun ju papin áateajai. Yus anenma asa imiatkinchanum shiir pujustinian yainmakarti. Nu Yus tuke yaunchu pujuyayi. Núnisan yamaisha pujawai. Tura nuke winittiwai. Akupin pujutainium Yusa Wakanj siati naka pujurainia nusha shiir yainmakarti. ⁵ Núnisan Jesukrístu shiir yainmakarti. Nii tana nu imiá nekasaiti. Niisha emka jakamunmaya yamaram iwiakmajai nantakniuiti. Tura ju nunkanmaya akupniu Uuntrinti. In anenma asa ni numpejai ii tunaarin nijiatramkaitji. ⁶ Túrutma akupin awajtamsaitji. Tura ni Aparj Yúsnan pujursarat tusa anaitiamkaitji. Nii ti kakaram asa tuke shiir awaj-nasti. Núnisan atí.

⁷ Wats, Krístuka yuranmijiai winittiwai. Tura íjuarmia nusha tura ashí shuarsha nuna wáinkíartatui. Túrawar ashí sapijmíainiak útiartatui. Maa, nekas nunis átatui.

⁸ Krístuka “yámankamtaiknumia amúamunmasha ashí nérenniuitjai, tawai. Wisha A rétranmaya Y rétranam ashí retra áintsaitjai” tawai ti kakaram Uunt Kristu. Tuke yaunchu pujuyayi. Núnisan yamaisha pujawai. Tura nuke ataksha winittiwai.

Kristu ti shiir wincha ajasun Juan wainkiamiania nu

⁹ Wi Juan atumjai métek waitia asan atumí yachintjai. Núnisan nayaimpiniam, Yus akupeana nuj, métek jeattaji. Tura katsuntrar nákastinian Jesukrístu mái métek súrampi. Yus-Chichamnasha tura Jesukrístu timiancha étsereakun nayaantsa ajapén atentramunam Pátmus nunkanam sepunan apujusamua núnisan pujumjai. ¹⁰ Tumai tumin tsawantaj Yusa Wakanj pujurtaku winia úkuruinj kakantar untsumman antukmajai. Kachu umpúamua núnis ti kakarmauyayi.

¹¹ Tura turutmiai “Wiitjai. Yámankamtaiknumia amúamunam ashí nérenniuitjai. Wisha A rétranmaya Y rétranam ashí retra áintsaitjai, tímiai. Tuma asamtai wáinmena ju, papinium áaram Asia nunkanam siati péprunam Yus-shuar írunna nuj akuptukarta. Ju peprunam akupkarta: Ipisiusha, Ismirnasha, Pírkamusha, Tiatirasha, Sártissha, Piratírpiasha, tura Rautiséasha.” Tu turutmiai.

¹² Túrutkui yaki túruta tusan apajasán íikman siati shirikip ikiutain kurijiai najanamun wainkiamjai. ¹³ Tura nuj ajapén Aents Ajasua núninan wajan

wáinkiamjai. Tura pushirísha nawęa timiai nuntuaru entsaruyi. Emenmamkешa kúriniak netsepnum emenmamaui. ¹⁴ Tura ni muuke intiashísha murikiu uré nijiamua núnisan tura micha núnisan ti puju chjārauyi. Tura ni jīsha jiya núniskeyi. ¹⁵ Ni nawęsha ti wincha asa jiru yaŋkutaku jiamua áinis néwar ajarmiayi. Ni chichameша ti kakaram asa uunt entsa téter ajá áintsauyi. ¹⁶ Ni untsuurinī siati yaan takakuyi. Tura ni weneniasha puniá áinis tsakatskat mai ere awajsamu jīnmiiai. Ni yapīsha etsa ti etsantuk išchamnia núnisauyi.

¹⁷ Nuna wáinkian jaka áintsanak nawęen iniaarmajai. Túrasha ni untsuurī uwejen awaantrus turutmiayi, “Ashamkaip. Wiitjai. Yámankamtaiknumiá amúamunmasha tuke pujuwitjai, timiai. ¹⁸ Wikia tuke iwiaakuitjai. Jakami-ajai tura nantakin jákashtinian tuke iwiaaku pujajai. Jákatniuncha tura jaka pujuunia nuna yawirin takakkun nérenniuitjai, timiai. ¹⁹ Tuma asamtai wáinkiamna jusha, yamá wáinmena nusha, tura ukunam átatna nusha aartá, timiai. ²⁰ Wáinmena nu júnisaiti. Siati shirikip-ikiutai kúrik wainkiam nu, siati péprunam Yus-shuar Írunun nakumeawai. Tura winia untsuurinī siati yaa wainkiam nu, siati péprunmayá Yus-shuaran wáinniun nakumenawai, turutmiiai.

2

Ipisiunam chícham áatramu

¹ Nuyá turutmiiai ‘Ipisiunmayá Yus-shuaran wáinin ju áatratá: Siati yaan untsuurnum takakna nu tura núnisan siati shirikip-ikiutai kúrinman ajapén atenta wekáa nu, tawai: ² “Ashí ame túram nuna nékajai. Ti kakaram takaakum katsunteamuncha nékajai. Yajauch shuar nawamtsuk awemaitrume. Shuar “Yus akatramuitjai” ántar tuinia nu nekaamarme. Wáitrinia nusha nékaitme. ³ Ti wáitiatmek katsuntram yawętsuk Winia ti takartusuitme. ⁴ Túrin áminiñ juna títiatjame. Yus aneakum yámankamtaik ti penker wekainiuyam núnisam túratsme. ⁵ Tuma asam ikiuknum nu enentáimpram yaanchu túriniuyam núnismek ataksha túrata. Túrachakminkia ame shiripkirmin wari jurustatjame. ⁶ Tura ju penker túriniaitme. Nikiurás shuar nakitniuitrume. Nu shuar “ayash wakeramu páchitsuk túramniaiti” tuiniakui Wisha núnisnak nakitijai. ⁷ Kuishtinia nu shuar Yusa Wakanj ashí Yus-shuaran timian antukti: Nupetmakunka tuke iwiaaku pujutai numi neren yúatniun tsanċatkattajai. Nu numi Yus pujana nuj wajaawai.” Tu áartá turutmiiai.

Ismirnanam chícham áatramu

⁸ Nuyá turutmiiai ‘Ismirnanmayá Yus-shuaran wáinin ju áatratá: Yámankamtaiknumiá amúamunam tuke pujuwa nu tura núnisan jaka nantakmia nu, tawai: ⁹ “Ashí ame túram nuna nékajai. Ti wáitiam nunasha tura kuítrinchaitmena nunasha nékajai. Antsu Yusainkia ti kuítrinniuitme. Tura shuar uunt iwianch Satanása shuarj áiniyat “Israer-shuaraitjai” tuiniak yajauch áujmatramena nuna nékajai. ¹⁰ Ti wáitsattamna nu ashamkaip. Íwianch ashí nekapramsataj tusa atumiñiñ sepunam enkeattawai. Nuċ tias tsawant wáitsattarme. Jáakmesha tuke Yus shiir enentáimtusakminkia tawaspan nakurin susatniua nútiksanak nekas iwiaakman tuke shiir

pujustinian amastatjai. ¹¹ Kuíshtinia nu shuar Yusa Wakanj ashí Yus-shuaran timian antukti: Nupetmakuka jimiará jákatniuka waitsashtatui.” Tu aartá’ turutmiai.

Pírkamunam chícham áatramu

¹² Nuyá turutmiai ‘Pírkamunmayá Yus-shuaran wáinin ju áatratá: Puniá áinis tsakatskat mai ere awajsamun takakna nu, tawai: ¹³ “Ashí ame túram nuna nékajai. Uunt iwianch Satanás akupea nuj pujayatmek tuke shiir enentáimturmena nuna nékajai. Winia shiir umirtínian Ántipasan máawmataisha Winia enentáimturatin ishichkisha iniaituschamame. Nusha íwianch pujutainium pujakrumin túrunamai. ¹⁴ Túrin áminin juna títiatjame. Atumjiniá shuar yaunchu Yúsnan etserin Param yajauch jintíamun tuke emetainiawai. Niisha Israer-shuaran tunáa awajsat tusa kapitían Parakan unuiniarmiayi. Nuyá Parak Yus-sutai namañken maar yúatniun Israer-shuaran jintintiamiayi. Núnisan ti tsanirmatniun jintintiamiayi. ¹⁵ Atumjiniá shuarsha Nikiurás jintíamuncha, Wi nakitij nuna, iniaisatniun nakitiainiawai. ¹⁶ Wats, enentáimpram iniaisata. Túrachakminkia Wi wari winin winia wenurujya puniá jiniá nujai máaniaktajai. ¹⁷ Kuíshtinia nu shuar Yusa Wakanj ashí Yus-shuaran timian antukti: Nupetmakunka maná yurumkan uukma nuna ayurattajai. Nuyá kaya pújun susattajai. Nu kayanam yamaram naarj aarma átatui. Nunasha chíkich shuarka penké nékatsajin aya achia nuke nekaattawai.” Tu aartá’ turutmiai.

Tiatiranam chícham áatramu

¹⁸ Nuyá turutmiai ‘Tiatiranmayá Yus-shuaran wáinin ju áatratá: Yusa Uchirj jii jijjai métek keena nu tura núnisan nawe jiru yanikutaku jiamua núnis newar ajawa nu, tawai: ¹⁹ “Ashí ame túram nuna nékajai. Yus shiir enentáimtakum aneam nuna nékajai. Tura katsuntram penker takaamna nuna nékajai. Yáunchujai nankaamas penker túrame yamaikia. ²⁰ Túrin áminin juna títiatjame. Nu nuwá Jesapír awematsme. “Yúsnan unuiniájai” tinia Wíi shuaran ti anañkenawai. Tura ti tsanirmatniuncha tura ántar-yus-sutai namañken maar yúatniun jintintiaiawai. ²¹ Niisha ni tunaarjin enentáimiar iniaisat tusan nákasuitjai. Tura nakitiawai. ²² Wátsek, sunkurmatkiakan peaknum áepsattajai. Tura chíkichcha niijjai tsanirma ainia nunasha niijjai métek ti wáitkiastatjai. Ni tunaarjin enentáimiar iniaisacharmatainikia túratattajai. ²³ Ni uchirjíncha mantúattajai. Nujai ashí Yus-shuar Wi nekas shuara enentáin nékaitjia nuna nekaawartatui. Atumniasha chikichik chikichik takasmajai métek akiktatjarme. ²⁴ Tura chíkich shuar Tiatiranmayatiram, nú chicham enentáimtuscharmema nu, “nekas iwianchnia uukma” tútajya nu nékachu asakrumin atakka túratniun patatkashtatjarme. ²⁵ Tura Wi jeatsajin takakrum nu emetatarum. ²⁶ Nupetmakunka Wi wakeraj nunak tuke initsuk túrana nuna untsurj nunkanam akupkatniun tsanekatattajai. ²⁷ Winia Apar tsanekatrukmiá núnisnak akupkatniun tsanekatattajai. Tura nuwe najanamu jirujai awati ijiakratniua áinis ti kakarmajai akupkattawai. ²⁸ Yánkuam káshik jiniá nuna susattajai. ²⁹ Kuíshtinia nu shuar Yusa Wakanj ashí Yus-shuaran timian antukti.” Tu aartá’ turutmiai.

¹ Nuyá turutmiai ‘Sártisnumiá Yus-shuaran wáinin ju áatratá: Siati Yusa Wakanin takakna nu tura núnisan siati yaan takakna nu, tawai: “Ashí ame túram nuna nékajai. Iwiaakua áintsan wekayatmek Wijiainkia jákaitme. ² Shintiarta. Kajinia nu umpuim ekeemakta. Kame Yusjai ísam pénger túrichuitme. ³ Yus-Chicham ti shiir enentáijiai emka antukmam nu ataksha enentáimpram emetata. Tura tunaarumsha enentáimpram iniaisata. Tura iniaiyachkumninkia kasa núnisnak nékatsmin jeartiatjame. ⁴ Tura Sártisnum shuar ishichik pushiri wapik máacharu pujuiniawai. Nusha ti pénger áiniak pushi pújun entsarar Wijiái wekasartatui. ⁵ Nupetmakuka pushi pújun entsartatui. Tura iwiaaku átinia nu papiniumiá ni naari áarman japirash-tatjai. Antsu winia Apar tura ashí nayaimpinmaya suntar íimmianum shiir áujmattsattajai. ⁶ Kuíshtinia nu shuar Yusa Wakaní ashí Yus-shuaran timian antukti.” Tu aartá,” turutmiai.

Piratírpianam chícham áatramu

⁷ Nuyá turutmiai ‘Piratírpianamaya Yus-shuaran wáinin ju áatratá: Ti shiir túrin tuke nekasana tana nu, uunt akupin Tawitia yawiri takaku asa uraimtai chíkich penké epenchamniaiti. Tura epenmiatai chíkich penké uraichmini-aiti. Juna tawai: ⁸ “Ashí ame túram nuna nékajai. Kakarmachuitiatmek winia chichamur shiir enentáimtakum Winia initiushaitme. Tuma asakmin wáitin uratjame. Nuna chíkich penké epenchamniaiti. ⁹ Wátsek. Shuar wáitruiniak “Israer-shuaraitjai” tuíniayat uunt iwianch Satanás-shuar áiniawai. Nu shuáran, nekas ámin aneajna nuna nekaawarat tusan amjini tikish-matkiarartatjai. ¹⁰ Katsuntrata tímiaj nu, shiir umirka asakmin Wisha ti wáitsatin ashí nunkanam áatana nuyá uwentikrattajme. Nu wáitsatniujai ashí nunkanmaya shuar nekapnasartatui. ¹¹ Wárik winittiajai. Takakmena nu emetata. Akinkiatniuitmena nuna chíkich shuar atantramkiarajin. ¹² Nupetmakunka winia Yusru jee tankirin awajsattajai. Tura nuyá penké jinkichartatui. Tura nin winia Yusru náarin áatrattajai. Tura winia Yusru pépruri náarincha áatrattajai. Nu pépruka nayaimpinmaya yamar-Jeruserenka Yúsnumiá tára núiti. Núnisan winia yamaram náarun nin áatrattajai. ¹³ Kuíshtinia nu shuar Yusa Wakaní ashí Yus-shuaran timian antukti.” Tu aartá,” turutmiai.

Rautiséanam chícham áatramu

¹⁴ Nuyá turutmiai ‘Rautiséanamaya Yus-shuaran wáinin ju áatratá: Wáitruitsuk nekasa nunak tiniua nu tura núnisan ashí Yus najanamun Úuntriya nu, tawai: ¹⁵ “Ashí ame túram nuna nékajai. Tura michaash míchachuitme. Núnisan tsuersha tsuérchaitme. Míchaitkiumsha tura tsuéraitkiumsha maak. ¹⁶ Kame míchachu tsuércha antsu aya tsuésuetak asakmin imiutkattajme. ¹⁷ Iis, “Kuítrinniuitjai, ti irumpraitjai, warinkisha atsumatsjai” tame. Túrasha ashí yajauch, wáitnenmai, kuítrinha, kusuru, tura misú iyajme. ¹⁸ Tuma asam Winí ti shiir kuri sumakam nekas kuítrintin ajasta. Turam puju pushi Winí sumakam misú ajasma shiir entsarta. Pénger ímprataj tusan jinium enketai enkeeta. ¹⁹ Aneajna nuna chichareajai. Nu asamtai kakaram ajasam tunaarum enentáimpram iniaisata. ²⁰ Enentáimprata. Shuar wáitiniam wajas untsamna áintsanak Wi ámin untsúajme. Winia anturtukam ame enentáimin awaintiakminkia Wi wáintiuattajme. Tura wayan ámijiai yurumáttajai. Tura amesha Wijiái yurumáttame. ²¹ Nupetmakuka akupin pujutainium Wijiái

pujustatui. Wisha núnisnak nupetmaku asan winia Aparjaj̄i akupin pujutainium pujusuitjaj̄i. ²² Kušhtinia nu shuar Yusa Wakanj̄i ashí Yus-shuaran timian antukti.” Tu áartá,” turutmiai.

4

Nayaimpiniam Yúsán shiir awajenawai

¹ Nu nan̄kaasmatai nayaimpiniam waiti uranniun wainkiamjaj̄i. Tura nuyá kakaram untsumman antukmajaj̄i. Nuik kachujaj̄i métek kakaram chichartukma nu turutmiai “Juí yakí wakatá. Ukunam áatna nuna iniaktustajame” turutmiai.

² Nu chichamaik Yusa Wakanj̄i akantukmiai. Túrutamtai nayaimpiniam akupin pujutainium pujan wainkiamjaj̄i. ³ Niisha jasp̄i kayasha tura kurnarinia kayasha nujaj̄i métek ti winchaui. Akupin pujutain tuntiak téntakuyi. Nusha ismirarta kayajaj̄i métekeyi. ⁴ Chíkich paintikuatru (24) akupin pujutain nu pujutain téntakarun wainkiamjaj̄i. Tura paintikuatru uunt púju entsarainian tura kurin etsenkrakainian, nuj pujuinian wainkiamjaj̄i. ⁵ Akuptainiumiá peemsha ipiamtasha untsummasha jíiniarmai. Tura nu pujutainium naka siati shirikip kearmai. Nusha siati Yusa Wakanj̄inti. ⁶ Núnisañ nu pujutainium naka nayaantsa áanin ti saar amai.

Nu pujutainium wakenmaan̄isha niisháa tan̄ku kuaru téntakar áarmiayi. Ukurin̄isha tura eemsha jíi irunmiai. ⁷ Emka tan̄ku úunt yawáa áanniuyi. Chíkichka turu uchichia áanniuyi. Tura chíkichcha shuara yapia áanniuyi. Tura chíkichka churuwia nanamua áanniuyi. ⁸ Nusha sais nanamtin áрмаi. Tura jíiisha ti irunainiak ashí wainmarmai. Káshisha tsawaisha tuke iniaitsuk juna t̄iniu armai:

“Ti nekas péñkeraiti Uunt Yus. Ashí nan̄kaamas kakarmaiti. Tuke yaunchu pujuyayi. Núnisañ yamaisha pujawai. Tura ataksha juke winittiwai” t̄iniu armai.

⁹ Tura uunt pujutainium pujana nu tuke iwiaaku pujú asamtai nu tanku ti shiir awajsar yúmin̄kiak pujuriarmai. ¹⁰ Túruiniakui paintikuatru uunt tuke iwiaaku pujun tikishmatainiak ni etsenkrutairin naka áepruiniak tuiniawai:

¹¹ “Úuntá, ii Yús̄rinme. Tuke shiir awajmainme. Ashí nankaamas kakarmaitme. Amek ashí irunna nu najanaitme. Tura aya wakerakum najanamame. Ame wakerakmin irunainiwai” tuiniawai.

5

Murikkia papin urakminiaiti

¹ Nuyá akupin pujutainium pujuya nuna untsuurin̄ papí penuarma áanniun wainkiamjaj̄i. Nu papisha initiaañsha tura pátatkesha áarmauyi. Tura urakchamnia atí tusa siati anujtukmajaj̄i kaki peekmauyi. ² Tura nayaimpinmayá suntar ti kakarma nu, ti kakantar inintran wainkiamjaj̄i. Niisha tím̄iai “¿Ya akupniuk ju papin kaki anujkamun jaak urakminiait?” ³ Tura nayaimpinmayásha nun̄kanmayásha tura jakamunmayásha chíkichkisha nu papin urakmin atsumiayi. Áujtsuk ístinniasha tujinkiarmai. Tímanu akupin atsumai. ⁴ Nu papin uraktincha tura áujsatniusha, kame ístincha atsakui ti úutmiajaj̄i. ⁵ Nuyá chíkichik uunt turutmiai “Tí úútíp. Israer-shuarnumiá Úunt-yawá, Jutá weeá awai. Niisha uunt akupin Tawit weeaiti. Nupetmaku asa nu papí siati anujtukman jaak urakminiaiti.”

6 Nuyá uunt pujutaiya nuĭ tura kuaru taŋkunam ajapén tura úuntnum ajapén Murik wajan wainkiamjai. Maamua áintsanġetiat iwiaakuyi. Kachurġsha siátiyi. Ni ġiisha siátiyi. Nusha Yusa Wakanġ siati ashí nuŋkanam akupramua nuuyi. 7 Nu Murik we nekas uunt Akupniun untsuurġnian nu papin achikmiayi. 8 Tura papin achikmatai kuaru taŋkusha tura paintikuaru uunt arma nusha Murikiun tikishmatrarmiayi. Ashí uunt arpa tuntuítian takaku armai. Tura ashí kuŋkuin enġetaiŋ kuri najanamun takaku armai. Nu kuŋkuin Yus-shuar áujsamuiti. 9 Ju yamaram kantancha kantampriarmai: “Amek imiá naŋkaamas akupniuitme. Amek papí achikiam anujtukmarġ jáakminiaitme. Yus-sutai namanġea áinis mantamna asam túramniaitme. Ashí nuŋkanmaya shuarnumiasha Yusna árat tusam ame numpemġai in sumakmiame.

10 Turam akupin awajkartusuitme tura núnisanġ ii Yúsrġniun pujurin awajkartusuitme. Tuma asakmin akupin ajasár ju nuŋkanam akupkattaji.” Tu kantamainiawai.

11 Tura untsurġ nayaimpinmaya suntar uunt pujutaincha taŋkuncha tura úuntnasha enġekawarun wainkiamjai. Nusha nekapmarchamnia ti untsurġ armai nu 12 kakantar tiarmai: “Murik mantamnania nu akupin ajas ashí kakarmancha, kuítniasha, nekaatniuncha Niŋki achikminiaiti. Tura nupetmaku asamtai yumiŋsar Nin ti shiir awajsatin áiniawai.” Tu tiarmai.

13 Núnisanġ ashí Yus najanamu, nayaimpiniam írunna nusha, nuŋkanam írunna nusha, nuŋká inġt írunna nusha, nayaantsanam írunna nusha, tuġnian antukmajai:

“Muriksha tura akuptainium pujana nusha ti shiir tura ti kakaram ásar tuke iniaitsuk shiir awajnasarti.” Tu tuiniawai.

14 Tura kuaru taŋkusha “Tuke núnisanġ atí” tiarmai. Tura paintikuaru uuntka nekas tuke iwiaaku pujá nuna tikishmatar shiir awajsarmai.

6

Murikkia siati anujtukman jaakmai

1 Wi iyakui Murikkia chikichík anujtukman jaakmai. Túramtai chikichík taŋku ípíamtajai métek kakantar untsurun antukmajai. “Winim iitiá” turutmiai. 2 Túrutkui kaway pújun wainkiamjai. Nuġ ekeemia nu tíshimkiun takakuyi. Akuptai tawaspasha susamuyi. Tura tuke nupetmaktinian ġiinkimiai.

3 Nuyá Murik anujtukma ġimiaran jáakmatai taŋku ġimiaru nu “Winim iitiá” turutmiai. 4 Túrutkui chikich kawai kapaakun wainkiamjai. Nuġ ekeemia nuna puniá úuntnuŋ samuyi. Nusha shiir pujuscharat tusa ashí ġú nuŋkanmaya shuaran máanaimtikiatniun akupkamuyi.

5 Nuyá Murik anujtukma menaintiun jáakmatai taŋku menaintiua nu “Winim iitiá” turutmiai. Túrutkui kaway mukusan wainkiamjai. Nuġ ekeemia nusha ġijin nekapmatain takakuyi. 6 Tura kuaru taŋku ajapénġ chichaamun antukmajai. “Tsawant takamtsuk takaakmesha apatkuka penġe ishichik sumakmin átatme. Tura núnisanġ machasha nijiamchisha amuukacharat tusam penġer wáinkiaata.” Tu timiai.

7 Nuyá Murik anujtukma kuátrun jáakmatai taŋku kuarua nu “Winim iitiá” turutmiai. 8 Túrutkui kaway yaŋkun wainkiamjai. Nuġ ekeemia nusha ġákatin náartiniuyi. Tura nuna úkurġn ġatai nemark winimiai. Nusha ashí

nunġanmaya shuar kuaru akankamunmaya chikichkin máatniun akup-karmauyi. Nusha mesetjaisha tsukajajsha sunġurjajsha tura yajasmajai máawarmai.

⁹ Nuyá Murik anujtukma sénkun jáakmatai Yus-sutai kunġuin ekem-tai wakenmaanġ ísmajai. Túran Yus-Chichaman etserainiakui máawarma wakanġin wainkiamjai.

¹⁰ Nusha kakantar untsumainiak tiarmai “Uuntá, ti penġer asam támena nu umiátsmek. ¿Urutiak nunġá pujuinia nú shuar ii mantamnamunam yapajmjátruktam?” tiarmai.

¹¹ Tuńiakui pushí pújun susar tiarmai “Chikichcha Krístunun etserainiakui mantamnatin ániawai. Nu náakrum ishichik ayampratarum” tiarmai.

¹² Nuyásha Murik anujtukma saisan jáakmatai ti úurun wainkiamjai. Tsawai-nantusha itiurchat ajasua áintsanġ mukusa ajasmai. Kashí-nantusha numpá áintsanġ ajasmai. ¹³ Tura yaasha wampú nere nase umpuim ti majuwa áintsanġ kákekarmai. ¹⁴ Nayaimpisha papí penuara júamua áintsanġ menġkakamai. Tura naintcha yajá apujnasarmai. Tura nunġasha nayaantsanam ajapén atentrainia nusha yajá apujnasarmai. ¹⁵ Tura jú nunġanam akupin ainia nusha náinnium wear kayá wáanam uumkarmai. Nijjajajsha ashí shuar, uuntcha, kuńtriniusha, suntara kapitińtrisha, ashí kakaram ainia nusha, tura takarniusha anġkant ainia nujajġ náinnium wear-mai. ¹⁶⁻¹⁷ Túrawar náinniasha kayancha tiarmai “Asutníátin tsawant jeayi. ¿Yaki aun katsuntrat? Nu asamtai saanakim in yutukratata. Túrarum Murik ti asutiámataj nuyásha tura akupin pujana nuyásha uukratkatá” tiarmai.

7

Israer-shuarnumiá anujturma armia nu

¹ Nu nanġkaasmatai kuaru nayaimpinmaya suntar, nunkaa kuaru yantamén wajan wainkiamjai. Nusha kuaru nase kukarsha, nayaantsanmasha tura kampunniunmasha nasenkacharat tusar wajatiarmai. ² Kame kukarsha tura nayaantsanmasha yajauch awajsatniun akupkamu armai. Tura chikich suntarnasha nantu tátainmaania winian wainkiamjai. Tuke iwiaaku Yusa anujtutairin takakaui. Nusha kuaru suntaran kakantar untsuak tímiai, ³ “Íi Yusrġ takarġin ainia nu nijjainium árar anujtatsrinġ kukarsha, nayaantsasha, tura kampunniusha nasejajġ yajauch awajssairap” tímiai.

⁴ Tura tímiajni untsurġ aara anujtukman antukmajai. Ashí Israer-shuar tuse (12) shuar weeá ainia nuyá chikichik siańtu kuarenta kuaru mir (144.000) armai. ⁵ Jutá weeanmaya tuse mir (12.000) anujtukma armai. Rupġin weeanmayasha tuse mir anujtukma armai. Kat weeanmayasha tuse mir anujtukma armai. ⁶ Aser weeanmayasha tuse mir anujtukma armai. Niptarġ weeanmayasha tuse mir anujtukma armai. Manasés weeanmayasha tuse mir anujtukma armai. ⁷ Semeunġ weeanmayasha tuse mir anujtukma armai. Riwi weeanmayasha tuse mir anujtukma armai. Ísakar weeanmayasha tuse mir anujtukma armai. ⁸ Sapurúnġ weeanmayasha tuse mir anujtukma armai. Jusé weeanmayasha tuse mir anujtukma armai. Pinjamġin weeanmayasha tuse mir anujtukma armai.

Ti untsurġ shuar pújun entsararu

⁹ Nuyá ti untsurġ shuaran wainkiamjai. Ashí nunġanmaya nusháa shuaraim iruntrarú ásar nekapmarchamnia armai. Tura nusha uunt

akupin pujutainium tura Muriknium naka wajaarmai. Tintiuki nukea áaniun takaku armai. Tura ashí pújun entsaru armai. ¹⁰ Ashí kakantar untsumainiak tiarmai:

“Ii Yusri uunt akupin pujutainium eketna au tura Muriksha imia Niñki Uwemtikin áiniawai” tiarmai.

¹¹ Tura nayaimpinmaya suntarsha uunt akupin pujutaincha, kuaru tanjuncha, tura úntnasha téntatkar armia nu piniakum nunká tepersar Yúsan shiir awajsar ¹² tiarmai

“Nekasaiti. Tuke iniaitsuk ii Yusri ti shiir awajsatniuiti. Niñki ti neka, ti kakaram, ti akupin, tura ti penker asamtaí tuke yumĩnsatniuiti. Núnisan atí.”

¹³ Nuyá chikichik uunt inintsamai “Pújun entsaru ainia jusha *çya* ainia tura tuyá ainia?”

¹⁴ Túrutkui “Uuntá, amek nékame” tímiajai.

Tutai nii túrutmiai “Ju shuar ti waitsaru áiniawai. Túrawar Murikiu numpéjai ni pushiri nijiamawar puju awajsaru áiniawai. ¹⁵ Nuna túrawaru ásar yamaikia Yusaj naka pujusar tsawajsha káshisha Yúsan ni jeen takainiawai. Tura akupin pujutainium eketna au tuke wainkiartatui. ¹⁶ Yamaikia tsukajajsha kitiakajajsha wáitsachartatui. Tura etsasha sukuiniak yajauch awajsachartatui. ¹⁷ Murik, akupin pujutainium naka wajana au, ni murikrin wáiniuk áyureak ti penker púkuni entsa waana nu apujusartatui. Tura Yus ni neajkincha ukútiurartatui.” Tu túrutmiai.

8

Anujtukma siatia nu jaakma tura kunkuin ekeemataijai túrunamu

¹ Nuyá Murik anujtukma siatin jaakmatai nayaimpiniam chikichik ura jeastatuk ajapén mitia ajasmai. ² Nuyá siati suntar Yusaj naka wajainia nuna wainkiamjai. Nusha siati kachun susamu armai. ³ Nuyá chikichik suntar kunkuin enketain kurijjai najanamun itiamai. Tura Yus-sútainium ayamas wajasmatai núkap kunkuin sunasmai. Nu kunkuin ashí Yus-shuar áujsumujai métek kunkuin ekeematainimum ekeemaktiniuyi. Nu ekeematai kurijjai najanamuyi tura uunt akupin pujutainium naka pujumai. ⁴ Tura suntar ekeemakmatai kunkuinia mukuintiuri Yus-shuar áujsumujai métek Yúsan amainkiamai. ⁵ Nuyá nu kunkuin enketain suntar achik ekeematainimaya ji kapaan káirin áimiak ju nunkanam ukaamai. Túramtai ipiamtasha untsummasha, peemsha, tura uusha armai.

Kachu umpuarma

⁶ Nuyá siati suntar kachun takakainia nu umpuartaí tusar iwiarnararmai.

⁷ Emka suntar kachun umpuarmatai micha kákekamai. Nunasha ji numpajai pachimpramuncha nunkanam ajapawarmai. Túmakui menaintiu nakakma jeeán numincha tura ashí írussa nu ekeemakmai. Tura ashí nunkanam chírichrin takamtsuk ekeemakmai.

⁸ Nuyá suntar jimiara nu kachun umpuarmatai uunt naintia áanin kean nayaantsanam ajunmai. Túramtai menaintiu nakakma jeeá nayaants numpa ajasmai. ⁹ Núnisan menaint jeeá nayaantsanam matsatainía jákarmai. Tura menaint jeeá uunt kanua nu emesnararmai.

¹⁰ Nuyá suntar menaintiua nu kachun umpuarmatai ti uunt yaa nayaimpinimaya kapaá kákekamai. Tura entsasha tura púkunimasha menaint nakakam jeeánum kákekamai. ¹¹ Nu yaasha Yapá-numi náartiniuyi. Tura

menaintiu nakakam jeeá entsa yapá ajasarmai. Túrunamtai ti untsurj shuar nu entsa yapá ajasmájaj jakarmai.

¹² Nuyá suntar kuarua nu kachun umpuarmatai menaintiu nakakam jeeá tsawai-nantusha kashí-nantusha tura yaasha emesnarar ajapén tee ajasarmai. Túrunawar tsawajsha káshisha menaintiu nakakam jeeánun tsáapnircharmai.

¹³ Nuyá chíkich suntar nayaimpiniam nanamun wainkiamjai. Nusha kakantar untsunuk timiai “Maa, chíkich menaintiu suntar umpuiniakui nunkanam pujuinia nu ti wáitsartatui.” Tu timiai.

9

¹ Nuyá suntar senkua nu, kachun umpuarmatai yaan nayaimpinmaya nunká kákeran wainkiamjai. Tura nu yaan tunáa shuar jákaru matsamtai yawirín susamuyi. ² Tura uraimtai nu nánkatkachu wáanmaya ti mukuint jijnmiais uunt jinumia áintsan. Tura etsancha tee awajsamai, yuranmincha tee awajsamai. ³ Nuyá nu mukuintiumaya manchi jíintrar nunká ti yujaarmai. Tura ju nunkanmaya titinkia áinis najamin ajastinian susamu armai. ⁴ Chíríchrincha ashí arakmancha ashí numincha yajauch awajsatin suritki-amuyi. Antsu áyatik shuar nijaijium Yusa naarj áarar anujtukchamunak yajauch awajsatin armai. ⁵ Túrasha ajaktsuk senku (5) nántutin wáitkiastin susamu armai. Kame titin, shuaran ijiú, najaweá núnis najaweátin susamu armai. ⁶ Nuj shuar wari jakataj tuñiyatan jakachartatui. Ti wakeruiniyatan jakatniun tujinkiartatui.

⁷ Manchisha íisam mesetnum weena nu kawaiya áinis armai. Kurí tawaspa áinis etsenkraku armai. Yajpisha shuarna áinis armai. ⁸ Intiashisha nuwanua núnis armai. Najsha úunt yawá najya núnis armai. ⁹ Netsepén namaka saepea áinis jiru péeramui armai. Tura nanamenaksha kaway karu japiiniak mesetnum tsékeena núnisan téter ajarmai. ¹⁰ Ujukésha titinki ujukea áinis asa janke ajakin armai. Nujai tuke senku nantu yujarsar shuaran íjuar wáitkiastin armai. ¹¹ Ni uuntrisha nánkatkachu wáa uraimia nuyaiti. Nusha Israer-chichamjai Apatún tutainti. Tura Kriaku-chichamjainkia Apuriún tutainti. Nuka Yajauch Awajkartin tawai.

¹² Jujai emka wáitsatin nankaamasai. Túrasha tuke jímiar taasai.

¹³ Nuyá suntar saisa nu kachun umpuarmatai chichaman antukmajai. Yusaj naka kunkuin ekeemaka Yus-sutai kurimpramu amai. Tura ni kuaru yantame kachu jijnmiais. Tura nuyá chichaak ¹⁴ suntar kachu takakun saisa nuna timiai “Kuaru suntar Eupratis kanusá pujuinia nu atiram akupkarta.”

¹⁵ Túramtai nu kuaru suntar wear menaintiu nakakam untsurj shuaran maatai tusar weriarmiayi. Kame nuna túrawarat tusar ikiusma armai. Tura nu uwitin, nu nantutin, nu tsawantin, tura nu úratin atiatin ikiusma armai. ¹⁶ Tura suntarnasha kawainium eketainian wainkiamjai. Tura timiá untsurj nekapmarchamnia asamtai aya númerurín antukmajai. Nusha jimiará sianu miyun (200.000.000) armai.

¹⁷ Tura íimiamunam suntarnasha kawaincha júnisan wainkiamjai: Eketainiaka netsepnum jirun entsaru armai. Nusha kapaaku winkia tura yanke armai. Tura kawaisa úunt yawáa muuke áinin armai. Tura ni wenyasha jisha, mukuintiusa, asuprisha ti tsuer keá nu jíiniarmai. ¹⁸ Nu menaintiu ti yajauch wáitsamujai menaintiu nakakam shuar untsurj jakarmai. Jijiaisha, mukuintiujaisha, asuprijaisha jakarmai. ¹⁹ Nujai nu kaway ni wenejai

shuáran wáitkiasarmai. Tura ni ujuké napí múukeya áinin áрмаi. Nújajsha shuáran wáitkiasarmai.

²⁰ Tura nujajsha jákacharmia nú shuar tuke tunáa túratniun iniaisacharmai. Tura yajauch wakanniasha tura ántar-yusnasha tikishmatratniun iniaisacharmai. Nu ántar-yus kurijajsha, kuítjajsha, jiru yanikutakujajsha, kayajajsha, numijajsha najanamú ásar wainmaktinniasha, antuktinniasha, tura wekasatniuncha tujintiainiawai. ²¹ Núnisan mankartuatniuncha, wawekratatniuncha, tsanirmatniuncha, tura kasamkatniuncha iniaisacharmai.

10

Papichin suntar takusmia nu

¹ Nuyá chíkich kakaram suntar nayaimpinmayá táarun wainkiamjai. Nusha yuranjim amúámu tura múuknum tuntiák téntakmauyi. Yapisha etsajai métek wínchauyi. Tura kujapéssha ji keá áintsankeyi. ² Nusha papin urak takakauyi. Tura imiá uunt asamtai ni nawé untsuurnumanj nayaantsanam tura menarinj kukar tarimias wajasmai. ³ Tura úunt yawá kakar shiniak chicháa áinis ti kakaram untsumkamai. Nujaj siati (7) ipiamtasha chichasarmai. ⁴ Nii chichasarmatai ni chichamen áartiniujai tura nayaimpinmayá chichartak “Áaráip, túrutmiai. Juka nekanashti” túrutmiai.

⁵ Tura nuyá, suntar nayaantsanmasha tura kukarsha tarimias wajama nu ni uweje untsuurin nayaimpinmaanji takuimiai. ⁶⁻⁷ Tura timiai “Penké ishichik ajasai. Suntar siatia nu umpúakuinkia Yus ashí yaunchu enentáimpramia nu uminkiattawai. Emka ujatsuk ukunam ni shuarin Yúsnan etserniua nuna ujakmiayi.” Tu timiai. Nuyá chichaak:

“Yus tuke iwiaaku pujawai. Tura imiá kakaram asa nayaimpincha, nunkancha, nayaantsancha, tura ashí nuj írunna nunasha najanaiti” timiai.

⁸ Nayaimpinmayá “áaráip” túrutmia nu ataksha chichartak turutmiai “Suntar nayaantsanam tura kukar tarimias wajana nu weritiá. Turam ni untsuurinj papin urak takakna nu achiktá” turutmiai. ⁹ Nuyá túrutkui werin papichin seamjai.

Tura surak turutmiai “Papái. Yuátá. Tura yúamka ti yumin átatui. Tura antsu wakeminka yapamprattame” túrutmiai. ¹⁰ Nuyá papichin suntar-nuniá jukin yuamjai. Tura nii turutmia núnisan wenuruinkia ti yumin nekapramjai. Tura antsu yuan wakeruinkia yapampramjai.

¹¹ Tura nuyá turutiarmai “Waketkim ataksha ashí nunkanmayá shuáran tura ni kapitánrincha Yus tana nu ujakartiniaitme.” Tu túrutmiai.

11

Jimiará shuar Yusaia akupkamu

¹ Nuyá karisun nekapmatia áaniun surus turutiarmai “Weme Yusa Uunt Jee nekapmartá. Túram naman-maa-Yus-sutaisha nekapmartá. Tura nuj Yúsan shiir awajeena nusha nekapmartá. ² Antsu jee áarinkia yajaya shuar susamu asamtai nekapmatsuk ikiuktiá. Nu shuar ti shiir péprun Jerusarénkan kuarentitús (42) nantu nuj akupeenak mash yajauch awajsartatui. ³ Túruiniakui Wikia Wii-shuáran jimiaran akatran akupkattajai. Nusha chikichik mir jimiará siantu sesenta (1.260) tsawant pujusar Winian

etserkartatui. Nuka menaintiu uwí nan̄kaamasaiti. Útkur-entsatai pushin entsaru ártatui.” Tu turutiarmai.

⁴Nu jímiar shuarsha nayaimpiniam nakumkamu áiniawai. Uriwiu numisha jímiar tura shirikip ekeemataisha jímiar nayaimpiniam awai. Nusha ju nun̄ká Uuntr̄i Yusaj̄ wajainiak, jímiar akatramua nú shuaran nakumainiawai. ⁵Shuar nin yajauch awajsataj tutai ni weneñia jinia j̄iki nemasr̄i ashí áesatniuiti. Núnisan̄ nin yajauch awajsatniun wakera nuka jákartatui. ⁶Nu aentska Yúsnan̄ áujmatainiak yumi yutukaip̄ títinian kakarman takakainiawai. Núnisan̄ entsancha numpa awajsatniun kakarman takakainiawai. Tura ashí yajauchia nujaj̄ aentsun wáitkiastinian takakainiawai. Nuna ashí ni wakeruinia nuj̄ páchitsuk túramin áiniawai. ⁷Tura ni takatr̄in umikiarmatai Ti Kajen Yajasma nánkatkachu wáñmaya j̄inina nu mesetan najata nupetak máawartatui. ⁸Tura iwiarnatsuk ni ayash̄j̄ uunt pepru jint̄in̄ ajapén tepeartatui. Nu péprunmasha ii Uuntr̄i Jesukr̄istuncha máawarmiayi. Nu péprunmaya shuar tuke tunaan túrin ásarmatai Ejiptu tuñiak tura núnisan̄ Sutuma tuñiak nu péprun páchiiniawai. ⁹Tura menaintiu tsawant nuyá nan̄kaamas ashí nun̄kanmaya shuar jaka tepan̄ ísar iwiarnascharti tiártatui. ¹⁰Nu jákarmatai ashí nun̄kanam pujuinia nú shuar ni jakamun ti wararainiak mai sunai ajartatui. Kame nu jímiará aents Yúsnan̄ áujmatenek ashí shuaran wáitkiasaru ásarmatai ti warasarmai. ¹¹Nuyá menaintiu tsawant nuyá nan̄kaamas jaka tepesarmatai Yus ataksha iwiaaku awajсарmai. Tura nantakiarmatai nuyá shuar nin wainkiar ti ashamkarmai.

¹²Nuyá nu nantakiaru nayaimpinmaya kakaram untsunnan antukarmai: “Jui yakí wakatarum.” Tu untsunmiai. Tutai ashí ni nemasr̄i íimiainiañ yurañkim amuam̄ nayaimpiniam wákarmai. ¹³Túmainiaj̄ ti úurkamtai tias nakakam jeeá pepru saanakmiai. Tura siati mir (7.000) shuar jákarmai nu uujaj̄. Chíkichkia sapijmiainiak Yus nayaimpiniam pujana nuna shiir awajсарmai.

¹⁴Jímiar wáitsatin nan̄kaamasai. Chikichik ajasua nu túrunatin ishichik ajasai.

Suntar siatia nu kachun umpuarmai

¹⁵Nuyá suntar siatia nu, kachun umpuarmatai chícham kakaram chichainian nayaimpinmayan̄ antunkamai. Juna tímiayi:

“Yamaikia ii Uuntr̄i Yus tura ni Anaikiamu Kristu ashí shuaran akupin ajasarai. Niisha tuke amutsuk akupkartatui.”

¹⁶Nuyá paintikuatru uuntka akupin pujutainium Yusaj̄ naka pujuarmia nu piniakum tepersar Yúsan shiir awajenek tiarmai:

¹⁷“Uunt Yusá, ti kakaram asam Ámij̄iaj̄ tujinkiatin atsawai. Yáunchusha, yamaisha, tura tuke amuutsuk iwiaaku pujuwitme. Ame ti kakarmarmij̄iaj̄ nekas akupkatin juarme yamaikia. Tuma asakmin yu-minsajme, tiarmai. ¹⁸Ashí shuar kajertamkaru añ̄ yamaikia amesha kajerkatin tsawant jeayi. Jákarusha iniantkim ni túramur̄i ísartatme. Turam amée shuarka shiir etserturmakua nusha, tura Aminiak enentáimturmasarua nusha, tura Ámin shiir awajtamsarua nusha ashí mash ti shiira nuna súakum akiktatme. Antsu ju nun̄kan emesniuka ashí emesratniuna akupkattame.” Tu tiarmai.

¹⁹Tuñiakui Yusa Uunt Jee nayaimpiniam ana nu uranmiatai wakenmaan̄i Chícham Aarma Chumpit̄iai paant amai. Túrunamtai peemsha, ipiamtasha, cháarpisha, uusha amai tura michasha ti kakekamai.

12

Nuwasha tura Ti Kajen Yajasmasha

¹ Nuyá nakumkamu ti enentáimprannia nayaimpiniam wantinkiamai. Nuwá etsajaj penuarma wantinkiamai. Nawesha nantunam ekeemai. Tura múuknum tuse yaan etsenkrakuyi. ² Nu nuwá ajamtin asa jurertaj tusa wátiak ti kakantar uutmiai.

³ Tumaj ataksha ti enentáimprannia nayaimpiniam wantinkiamai. Ti Kajen Yajasma kapaaku wantinkiamai. Muukeshsa siati asa siati akuptai tawaspan etsenkraku áрмаi. Tura kachurjsha tiásauyi. ⁴ Menaintiu nakakam jeeán yaan ni ujukéjaj japiki akakermai. Tura nunká utsamai. Nu Ti Kajen Yajasma nu nuwá jatema nuj wajasmai. Júermataik yuruataj tusa wajattsamai. ⁵ Tura nuwasha áishmankan jurermai. Nu uchi uunt ajas ashí nunkanam ti kakaram akupkatin asa, nu uchi akupin pujutainium Yus pujana nuj junakmiai. ⁶ Tura núwaka atsamunam pisarmai. Nu jujustinian Yus iwiarturmai. Tura chikichik mir jimiara siantu sesenta (1.260) tsawant ayurnat tusa akupkamai. Nuka menaintiu uwi nankaamasaiti.

⁷ Nuyá nayaimpiniam meset amai. Nayaimpinmaya suntara kapitántri Mikiar ni suntarijjaj Ti Kajen Yajasmajaj máanaikiarmai. Ti Kajen Yajasmasha ni suntarijjaj ti máanaikiarsha ⁸ nupetmakcharmai. Túramtai nayaimpinmaya jjiiki akupkamuyi. ⁹ Núnisan Ti Kajen Yajasma ashí ni suntarijjaj nunká akupnakmai. Nu Yajasmasha iwianchi kapitántri Satanás tutainti. Yáunchuyá-napiiti niisha. Ashí nunkanmaya shuáran ananniuiti.

¹⁰ Nuyá nayaimpinmaya kakaram unsumman antukmajai. Tura timiai: “Uunt iwianch ii yachin yajauch áujmatin jjiiki akupkamu asamtai yamaikia ii Yusrj uwentikratniusha tura ni kakarmarin iniakmastingha tura akupkatniusha jeayi. Anaikiamu Kristusha ashí akupin ajastincha jeayi. Tura uunt iwianch ii yachin tsawajisha káshisha iniaitsuk Yusaj yajauch áujmatniua nuna ¹¹ íksan ii yachj nupetmakarai. Yususamu murikiu numpea áinis Jesukristu numpejaj nupetmakarai. Niisha jákatniuitkiusha surimiatsuk nekas-chichaman páchitsuk etserkarmai. Nujajisha uunt iwianchin nupetkarmai. ¹² Tuma asamtai nayaimpiniam pujarmena nusha warastarum. Antsu nunká tura entsá pujarmena nusha uunt iwianch atumin tarutmarmatai, maa, waitnentajrume. Ni tsawantri ishichik ajatesman nekáa ti kajekuiti.” Tu timiai.

¹³ Nuyá Ti Kajen Yajasma nunká ajapna nuwá áishmankan jurerma nuna áinramai. ¹⁴ Turakui nuwan uunt nanapen churuwia nanapea áinis sunasmai. Nujaj nanamuk yáunchuyá-napiya pisar atsamunam wemai. Tura ni ayuratniunam menaintiu uwi nuyá sais nantu pujusmai. ¹⁵ Nuyá nu napi ni weneyá entsá jjiiki nujankrumamai nuwan ajekrataj tusa. ¹⁶ Túrasha nunka nuwan yajak nakaak nu entsan mash ukuyámai. ¹⁷⁻¹⁸ Túramtai nuwan ti kajerak ni weea chikich irunna nujaj máaniaktaj tusa wemai. Nu shuarsha Yus akupkamun umirainiak Jesusan ti shiir áujmaténakui, niijaj máaniaktaj tawai.

13

Nuyá Yajasma jimiara nu

¹ Nuyá nayaantsa káanmatkarjin wajasan nayaantsanmaya Yajasma jiniun wainkiamjai. Muukeshsa siátitiat kachurj tias tura akuptai tawaspasha tias armai. Ashí muuken Yúsan yajauch chicharin tu áarmauyi. ² Nu j

wáinkiamaj nu Yajasma nekas uunt yawáa áinniuitiat nawenka chaj nawea áinniuyi. Wenēsha nekas kajen yawáa áinniuyi. Tura Ti Kajen Yajasma Entsaya Yajasma ni kakarmaríncha tura ni akupkatniuríncha susamai nujaj ti kakaram akupkati tusa. ³ Entsaya Yajasma muuké chikichkin jakamnia awatmian wainkiamjai. Túrasha péñker awajnasmai. Túramtai ashí nunñanmayá shuar nuna ísar ti enentáimturar nemarsarmai. ⁴ Túrawar nin tikishmatrar shiir awajsar “¿Yaki jujaisha jeá. Imiá kakaram asamtai yaki niijijai máanaikminiait?” tiarmai. Tura Ti Kajen Yajasma ni kakarmarín Entsaya Yajasma susa asamtai ashí shuar nincha tikishmatrarmai.

⁵ Núnisan nu Entsaya Yajasma waantu enentáimtumak Yúsan yajauch chicharkatniusha tsanñkatnakmai. Tura kuarentitús (42) nantutin kakaram akupkatniun sunasmai. ⁶ Núnisan túrak Yúsan yajauch áujmatuk ni náarincha ni Jēencha tura ashí ni shuarj nayaimpiniam pujuinia nusha katsekkarmai. ⁷ Tura Yusna ainia nujaj mesetan najana nupetkatniun tsanñkatnakmai. Tura ashí nunñanmayá shuaran akupkatniun tsanñkatnakmai. ⁸ Túramtai ashí shuar tuke iwiaaku átinia nu papinium ni naarj yámankamtaiknumiá anujkamú atsúarma nuka nu Yajasma tikishmatrarmai. Nu papincha Murik jaka nantakmia nu takakui.

⁹ Shuar juna ántakka enentáimprati:

¹⁰ “Shuaran emetá juinia nusha emetnattawai.

Núnisan shuaran nanñkijajai mainia nusha nanñkijajai mantamnattawai.”

Tuma asamtai Yajasma mesetan najanamtai Yus-shuar Yus iisti tusar tuke enentáimtusar katsuntsar pujustin áiniawai.

¹¹ Nuyá chikich Yajasma kukariá wáakun wainkiamjai. Nusha murikiu ánin jimiará kachurtiniuyi. Tura Ti Kajen Yajasma áinis kakaram chichaakuyi. ¹² Niisha Entsaya Yajasma kakarmarín súam akupniuyi. Tura ashí nunñanmayá shuaran “Entsaya Yajasma peñké jaa tsuarma nu, shiir awajnasti” tímiai. ¹³ Núnisan shuarti túrachminian ti turin asa ashí shuar ímiainajin nayaimpinmayá jinia nuñká ajuarmai. ¹⁴ Tura Entsaya Yajasma súam aents túrachminian ti turak ashí nunñanmayá shuaran ananñkawarmai. Túrak Entsaya Yajasma nakumkamurín najanawarat tusa akupkamai. Túramtai puniajajai peñké jakamnia awatmia péñker ajasma nuna nakumkamurín najanawarmai. ¹⁵ Kukariá Yajasma kakaram sunasmai. Nujaj Entsaya Yajasma najanamun iwiaaku awajsatniua áintsan ichachkiamai. Túram ashí níniak shiir awajeacham máatniun susamai. ¹⁶ Nu arantcha ashí shuar anujmamprarat tusa akupkamai. Uuntcha uchisha kuítrinniusa kuítrinchasha anñkantcha anñkantchasha ashí ni niijiaíncha tura wakerakka untsuuríncha anujtuktiniuyi. ¹⁷ Entsaya Yajasma náarin tura wakerakka ni náarij númerurj anujtuktiniuyi. Túrachuka sumatnasha sumakchamniuyi, surutnasha surukchamniuyi. ¹⁸ Wats, wi tájana ju nekaatniuka ti nekas enentáimtustiniaiti: Entsaya Yajasma númerurj áishmanka númerurj asa sais siantú seséntisáisaiti (666). Ashí ti neka ainia nú shuar Entsaya Yajasma númerurj in nekapmar nin nekaati.

14

144.000 shuar Yúsan kantampruawarma

¹ Nuyá Murikiun Seun náinnium wajan wainkiamjai. Níijiaisha siantú kuaréntikuátru mir (144.000) shuar wajaarmai. Nusha niijaij Murikiu náarincha tura ni Aparj náarincha anujtukma aarmai. ² Ti untsurj árgan

nayaimpiniam túntuiniak teer awajenak kanusa uuntri nujanrak téter ajá núnisan antukmajai. Ti kakaram ipiamta núnis amai. ³ Nu tuntuiyamujai siañtu kuaréntikuátru mir shuar akupin pujutainium naka wajasar yamar kántan kantamáwarmai. Niisha kuartru tanñkunmasha tura paintikuatru uuntnumsha naka wajasar kantamáwarmai. Nu kántanka chíkichka nekaachmin armái. Aya nu siañtu kuaréntikuátru mir shuarka jú nunñkanmaya shuarnumiá uwempraru ásar nu kántan kantamiarmái. ⁴ Nu shuarsha nuwajai yajauch ajascharu ásar ti shiir áiniawai. Túrawar Murik weana nu nemarainiawai. Ju nunñkanmaya shuarnumiá uwempraru ásarmatai Yussha tura Muriksha ti shiir enentáimtiarmái. Niisha emka juukma ti shiira núnisan armái. ⁵ Nu shuar penké wáitruachu ásar Yúsajsha ti shiir tunáa máatrachu armái.

Menaintiu suntar chichaman etserainiawai

⁶ Nuyá nayaimpiniam suntar nanamun wainkiamjai. Nusha uwempratin chicham tuke amuukashtinia nuna ashí nunñkanam pujuinia nú shuaran ujakartiniuyi. ⁷ Nusha ti kakantar untsukum timiai: “Yus ashamkatarum. Niñki shiir awajsatarum. Yamaikia ashí shuaran súmamtikiawartin tsawant jeayi. Nayaimpincha nunñkancha nayaantsancha ashí entsancha najana asantai shiir awajsatarum.”

⁸ Nuyá chíkich suntar, jímiara nu, taa timiai: “Pai, Uunt Papirúnia pépruka penké meserai. Niisha tuke tsanirmaua núnisan ashí shuaran anampratniua núnisan utsuurmai. Tuma asa niisha nú shuarjai nupetnak tuke emesnarai.”

⁹ Nuyá chíkich suntar, menaintiua nu, taa timiai: “Shuar Entsayá Yajasmancha tura ni nakumkamuríncha shiir awajeakuñkia tura nijiañniunmsha uwejnumsha ni naari anujtukmaitkuñkia ¹⁰ Yus nin kajerak ti asutiáttawai. Yapá pachimprachman áartinia áintsan ti kajerakattawai. Túramtai asupri ti tsúer keá nujai jinium wáitsartatui. Yusa suntari tura Murik íimmianum apenáwar jinium wáitsartatui. ¹¹ Ni wáitsatniuri jí esaak kajintsuk tuke mukuintia nuniskete. Entsayá yajasman tura ni nakumkamurin shiir awajeenak ni naari anujmamainia nuka tsawajsha káshisha ayamtsuk wáitsartatui. ¹² Nu asantai ni chichamen umirainiak Yusna ainia nuka Krístun ti shiir nemarainia ásar nu tsawantai itiurchatnum pujuiniak katsuntratin áiniawai.”

¹³ Nuyá nayaimpinmaya chichaman antukmajai. Nusha turutmiai “Ju áatratá: “Uunt Jesusan umirainia nu yamái jakarusha tura ukunam jakarusha ti shiir pujusartatui.” Tu aartá” timiai.

“Núnisan Yusa Wakaní tawai. “Eta, ti takasaru ásar jakar yawerman ayamprartatui. Tura ti penker túrawar akinkiaratui” tawai” turutmiai.

Jú nunñkanam arakma juukma

¹⁴ Nuyá yurañkim pújun wainkiamjai. Tura yurañminiam Aents Ajasua nuna eketun wainkiamjai. Akuptai tawaspan kurijjai najanamu etsenkrakuyi. Tura machitian éren takakuyi.

¹⁵ Tura chíkich suntar Yusa Uunt Jeeniá jiinki yurañminiam eketun kakanar chicharuk timiai “Árak júuktin tsawant jeayi. Machitrumjai tsupiram juuktá.” ¹⁶ Tutai yurañminiam eketu ni machitrijjai nunká arakman tsupir juukmai.

¹⁷ Nuyá chíkich suntar Yusa Uunt Jee nayaimpiniam ana nuyá jíinkimiai. Niisha ni machitri éren takakuyi. ¹⁸ Tura chíkich suntar namañ maar Yusútainmaya jíinkimiai. Niisha jinia wáinniuyi. Tura máchit ti éren takakun

kakantar chicharuk timiai “Machitrum ti érea nujai uwa nunká arakma nu tsupiram juuktá. Mash tsamakarai.” ¹⁹ Tutai suntar ni machitrijjai ashí nunkanmaya uwa neren tsupir juukmai. Tura neketainiam chumpiamai. Nu neketai Yus ti kajerak shuáran ti asutiátta nuna nakumeawai. ²⁰ Tura uunt péprunmaya arantach ijiurarmai. Tura neketainmaya numpa jíinkimiai. Nu numpa tres siañtu (300) kirumitrua nuñ pajamar kawayu nuñijjai métek ajasmai.

15

Nayaimpinmaya suntar amúamunam wáitkiasinia nuna pininnumiñ ukaini-awai

¹ Nuyá ashammain ti enentáimpramnian nayaimpiniam wainkiamjai. Siati suntar amúamunam wáitkiasinia nuna takusarmai. Nujai juñ nunkanam yajauch shuáran ti wáitkiasar Yus kajeamun umirtatui.

² Nuyá antumianka áiv 20 Tura uunt péprunmaya aranntsñ ti saar jijjai pachimpramun wainkiamjai. Ni káanmatkarincha Entsayá Yajasman tura ni nakumkamurincha nupetkarma nu nuñ wajaarmai. Tura nin arpa tun-tuitiain Yus súsarmai. ³ Túramtai kantamáwarmai. Yusa yaintri Muisaisa kantarincha tura Murikiu kantarincha kantamainiak tiarmai:

“Uuntá, ashí tujinchaitme. Ti penker tura ti enentáimturmin ashí najanaitme.

Ashí Uunt Akupin asam ashí nekasa nu túrasha péñkera nu túriniaitme.

⁴ Uuntá, ¿yaki ashampromkachat? Tura yaki ti shiir awajtamsachat? Aya Amek ti shiir tunaarinchaitme. Ashí nunkanmaya shuar ame ti shiir túramun wáinkiár Aminiak jeartamar ti shiir awajtamsartatui.”

Tu kantamáwarmai.

⁵ Nuyá atak Yusa Uunt Jeeñ íisan, Ti Shiir Tesaamun uranniun wainkiamjai. ⁶ Tura Ti Shiir Tesaamunmaya siati suntar siati wáitkiasinjai jíinkiamjai. Niisha ti shiir pújun entsaru armái. Netsepnumsha kurin emenmama armái.

⁷ Nuyá kuaru tanñkunmaya chikichik kurí pininñian súsarmai. Nu pininñ tuke iwiaaku Yusa kajetairijjai piaku armái. ⁸ Tura Yusa kakarmari ti ashammajai Ti Shiir Tesaamunam mukuintiua núnis piakmai. Túramtai nu siati suntar wáitkiasinian ukarar amuiniatsañ Yusa Jeeñ wayachminiuyi.

16

Wáitkiasin pinin ukararma

¹ Nuyá Imiá Shiir Tesaamunmaya ti kakaram chichaamun antukmajai. Nusha siati suntaran tiarmai “Nunká werum Yusa kajetairi siati pininnum ana nu ashí ukartarum.”

² Tutai emka suntar we, pininnumiñ kukar ukarmai. Túramtai ashí shuar Entsayá Yajasma náarín anujmamprar ni nakumkamurin shiir awajiarma nuna ti najamin kuchap jíintiurarmai.

³ Nuyá chikich suntar jíimara nu, we Yusa kajetairin nayaantsanam ukarmai. Túramtai nayaants jakáa numpéa áinis ajasmai. Tura ashí nuñ pujuinia nu kajinñkiarmai.

⁴ Nuyá suntar menaintiua nu, entsanam tura púkuninmasha ukarmai. Túramtai ashí numpa ajasarmai. ⁵ Nuyá suntar entsá wáinnua nuna chichamen antukmajai. “Uuntá, amek ti penker Yus asam jútikiame. Yáunchusha tuke pujú asam ti shíiraitme. ⁶ Iis, nu shuar amée shuárumincha

tura ame chichammin etserniuncha máawar ni numpen ukatraru áсарmatai Amesha núnismek numpa áarume. Maa, páchitsuk áitkianatin ániawai.”

⁷ Tutaí namañ-maa-Yus-sútainmaya chichaman antukmajai. “Eta, Uuntá. Nekas kakaram asam ashí ti tujinchaitme, Nekas túratniua nu ti penker túrin asam nu shuar túramujai métek akiruitme, timiai.”

⁸ Nuyá suntar kuatrua nu, tsawai nantunam ukarmai. Túramtai jijjai shuáran esaamujai wáitkistin kakaram sunasmai. ⁹ Tura shuar ti sukuám wáitarmia nu, nu wáitkistinian nérenniun Yusan yajauch chicharkarmai. Tura ni tunaarín enentáimsuk Nin shiir awajsatniuncha penké nakitrarmai.

¹⁰ Nuyá suntar senkua nu, Entsaya Yajasma akupin pujutairín ukarmai. Túramtai ni nunkeen ashí kashi ajasmai. Tura shuar ti najaimiainiak iniaíncha esamiarmai. ¹¹ Tura nújajisha yajauch túratniuncha iniaisacharmai. Antsu kuchapríjjajisha tura ti najaimiainiak wáitaiainiak nayaimpinmaya Yúsan ti yajauch chicharkarmai.

¹² Nuyá suntar saisa nu, Eupratis entsanam ukarmai. Túramtai kuyuíamai. Nujai nantu tátainmaania akupin taarti tusa jintiamnamai.

¹³ Tura nuyá júna wainkiamjai. Ti Kajen Yajasma weneyasha, Entsaya Yajasma weneyasha tura núnisañ penké Kukaria Yajasma ántar yúsnan etserniua nuna weneyasha puachia núnin yajauch wakan menaint jíniarmai.

¹⁴ Íwianch ániak aents tujintiamun túruiniak ashí nunkanmaya akupniun irurarmai. Ti Tujincha-Yusaí ni uunt tsawantrí jeamtai mesetan najanatai túsar weriarmai. ¹⁵ (Yamáí Kristu “Aneara pujustarum, tawai. Nékachmanum kasa núnisañ jeattajai. Kánutsuk tuke iwiarnar pujak ni entsatairín penker wáinia nú shuar ti shiir átatui. Misuchu asa natsaarchattawai.” Tu tawai.)

¹⁶ Tura yajauch wakan uunt akupin ánian Armajetúñ nunkanam irurarmai. Israer-chichamnum nu nunka tu anaikiamuiti.

¹⁷ Nuyá suntar siatia nu, nasenam ukarmai. Túramtai nayaimpinmaya Yusa Uunt Jeeñia ti kakaram chicham Yus akupin pujutainmaya chichaak “Mash uminkiai” timiai.

¹⁸ Tura nuyánka peemsha, chárpisha, ipiamtasha ajamai. Tura nunkasha ti kakaram úrkamai. Maa, aents jú nunkanam yámankamtaik pujuarmia nuyá júnis úurkamuka atsuwiti. ¹⁹ Ti Uunt Péprusha menaint nakantramai. Ashí nunkanmaya péprusha saanakiarmai. Nujsha Yus ti kajerak Papirúnia pépruncha kajinmattsuk ni kajetairín yapá umutaia ántsañ aarmai. ²⁰ Entsa ajapén atentrasha tura murasha menkaramai. ²¹ Núnisañ nayaimpinmaya uunt kaya núnisañ micha kákeramai. Ti uunt ániak kintiarjai métek kijin armai. Shuarsha nujai ti wáitaiainiyatan áyatik Yúsan yajauch chicharkarmai.

17

Tsanirmatai nuwá asutiámu

¹ Nuyá siati suntarnumiá chikichik taruti turutmiai “Winitia. Tsanirmatai nuwá ti asutiátniun iniaktustatjame. Nu nuwá nayaantsanam uku eketui. ² Ashí jú nunkanmaya akupin níjjai tsanirmawaru ániawai. Núnisañ ashí jú nunkanmaya shuar, nu nuwá tsanirmatniun tsankateam, níjiamanch umartinia ántsar níjjai ti yajauch túrawar nampekarmai.” Nuna taku Yusnumiá kanaktinian nakumkamai. ³ Nuyá mesekranam kam-puntin atsamanam jurukmiai. Tura nuí Yajasma kapaakunam nuwá eketun wainkiamjai. Nu Yajasma masha ashí Yúsan yajauch chichareamu áatramuyi. Muuke siátitiat kachuri tiásauyi. ⁴ Nu nuwasha tarachin

yamakai kapaakujajsha ti shiir iwiarmamar entsaruyi. Kurijjajsha, shírmach kayajajsha, ti shiir sháukjajsha iwiarmamprauyi. Kurí piniñkian mujjmiainniasha tura ashí ni tsanirmatairj imiá yajauch armia nunasha piakun ajaamak takakauyi. ⁵ Nijjainiumsha ni naarja áintsan yúpichuch nekaachminia nu júnis áarmauyi: UUNT PAPIRÚNIA, Ashí Tsanirmauncha tura Ashí Ju Nunkanam Mujjmiainian Túrinia Nunasha Nukurinti. ⁶ Nu nuwasha Yus-shuar Kristunun etserkar máawarma ainia nuna numpen nampekuyi.

Nuna wáinkian ti enentáimturmajai. ⁷ Túrunamtai nayaimpinmaya suntar túrutmiai “¿Urukamtai imiá enentáimtam? Wats, ashí nuwanun paant ujaktatjame. Núnisan yajasma ekenak júana nunasha paant ujaktatjame. Muukeshá siátichukait tura kachurjsha tiáschak áinia. ⁸ Nu yajasma wáinkiam nuka yaunchu pujuwiti tura yamaikia juj pujachiat amúamunam tuke játsuk náñkatkachu wáanmaya jíinkítiaiwai. Shuar nuna wáinkiar ni naarj tuke iwiaaku pujutai papiniun yámankamtaiknumiá anujtukchamua nuka nu yajasma ashamkartatui. Nu yajasma yaunchu pujú yamaikia atsayat atak wantinkiattawai’ turutmiai.

⁹ ‘Nekas neka ainia nu júna enentáimturarti: Siati muukenka siati náintian nakumui. Nu nuwá nuj eketui. ¹⁰ Núnisan ni siati muuke siati akupniun nakumui. Kame señku akupniuka nankaamasaru ainiawai. Chikichik tuke akupniuiti tura chikichka tuke taatsui. Nii taasha núkap tsawant akupkashtatui. ¹¹ Nuyá ashí ukunmanka yaunchu amia nú yajasma wantiniak nujaj uchu akupin ajastatui. Túmaitiat chikich siati akupniujaj iruram métek enentáimpramniati. Tura nu yajasma yamaikia atsayat wantiniak akupak umik tuke emesnartinnium wétatui’ turutmiai.

¹² ‘Tias kachurj wáinkiam nuka tias akupin tuke akupeenatsna núiti. Niisha nu yajasmajaj métek penké ishichik tsawant akupin ajasartatui. ¹³ Ju tias akupniusha métekrak enentáimiaiainiak ni kakarmarjñ yajasma súsartatui nujajsha akupkat tusa. ¹⁴ Murikjajsha mesetan najanawartatui. Túrasha Murik nupetkartatui. Niisha uuntjaj nankaamas Uunt asa tura núnisan akupniujaj nankaamas Akupin asa nupetmaktatui. Tura Nijjaj irutraa nu, Yus Winia atí tusa achikma ásar tura Nin tuke umirin ásar Nijjaj nupetmakartatui.’

¹⁵ Suntar tuke chichartak turutmiai ‘Tsanirmatai nuwá nayaantsanam uku eketu wáinkiachumek. Nu nayaantsaka ashí nunkanmaya shuáran nakumeawai. ¹⁶ Tura tias káchuka yajasmaunum wáinkiam nu, tsanirmatai nuwan nakitrar ajapawar misú ikiukiartatui. Ni ayashíncha yuawartatui tura áesawartatui. ¹⁷ Nu akupniun enentáin Yuska ni wakeramurjñ apujsaiti. Nii timia nu umintsajñ akupniusha métekrak enentáimprar ni kakarmarjñ takamtsuk yajasma súsatniun enentáimtikramai. ¹⁸ Nuwá wáinkiam nuka ashí nunkanmaya akupniun akupeana nu pépruiti.”

18

Papirúnia emesramuiti

¹ Nuyá nayaimpinmaya suntar táarun wainkiamjai. Ti kakaram akupin asa nunkancha tsáapin awajsamái. ² Tura ti kakantar chichaak timiai “Pai, Uunt Papirúnia penké meserai. Tura yamaikia íwianch matsamtaisha ashí yajauch wakanj pujutairjsha ajasai. Mujjmiainian nanamtincha tura ashí yajauch nanamtin ainia nusha nuj pasunmainiawai. ³ Nu péprunmaya shuar

tuke tsanirmaua núnisañ ashí nunkanmaya shuaran anampratniua núnisañ ni ti yajauch turamujai utsuurmai. Núnisañ ashí jú nunkanmaya akupin Yúsan iniaisar níjjajai tsanirmawarua áinis áiniawai. Tura shuarsha ni yajauch wararmajai ti kuítrintin ajasaruiti.” Tu timiai.

⁴ Nuyá nayaimpinmaya ti kakantar chichaman antukmajai. “Wíi shuaraitrumna nuka nú peprunmaya jíinkitarum. Túrachkurmeka ni tunaarj jumankirum ni wáitsatniuríncha pachiinkiatarme. ⁵ Ni tunaarjsha ti piak nayaimpiniam jeostatuk ajasai. Tuma asamtai Yus ni tunaarín kajinmatkichuiti. ⁶ Ni tunáa túramujai métek akikiam ataksha nuna nankaamas métek patattsata. Ni yajauch túramu nijiamchín ashí áararma núnisañ nuna nankaamas ti wáitsatin nijiamanch pachimpruram susata. ⁷ Waantu enentáimtumak yajauchin wararsama nujai métek ti wáitkiastá yamaikia. Tunáan ti túriniaitiat ni enentáinkia enentáimias “Uunt Akupniuitjaj. Wajechu asan penké wáitsashintiaitjai” tu enentáimtumawai. ⁸ Tuma asamtai ti wárik chikichik tsawantaj ni wáitsatniurí tarittiawai. Jákatniusha ti wáitsatniusha tura tsukasha tarí ashí jíjjajai ekeemankattawai. Uunt Yus ashí Tujincha nu kajer kamu asa nujai asutniáttawai.” Tu timiai.

⁹ Ashí nunkanmaya akupin níjjajai tsanirmawaru ainia nu ashí yajauchin níjjajai wararsaru ásar nu pepru esaak múkuint ajakui eáararmai. ¹⁰ Ti esaak wáitkiakui nuí pachiinkiar wáitsatniun ashamainiak arant wajasar tiartatui “Maa, Papirúnia ti uunt pépruítat nekas wáitnenmai ajawai. Imiá wárik ni wáitsatniurí tarini.”

¹¹ Núnisañ ashí nunkanam súrin ainia nusha nu péprun ti kuntuts enentáimturar eáartatui. Ni surutain itiamun ¿yaki sumarkat? ¹² Kame júna itiaru áiniawai: kurincha, kuítiniasha, kaya shíirmachincha, ti shiir sháuknasha, ti péñker tarachniasha, akupin entsatai shiirmachin yamakaincha kapañaniuncha, sétancha, itiaru áiniawai. Núnisañ ashí kunkuin numincha, ti shiir awara najanamuncha, ti shíiram numincha, yanjú jiruncha, penké jiruncha, mármur kayancha itiaru áiniawai. ¹³ Núnisañ ishpiñnasha, nusháa kunkuinniasha, mira kunkuinniasha, umutaincha, asuitincha, trikiu nerencha, tura trikiu ti péñker nekenmancha itiaru áiniawai. Núnisañ áintstai tan kuncha, murikniasha, kawaincha ni káruuríjjajai, tura nú arantka shuárnasha suruktinian itiaru áiniawai.

¹⁴ Tura nu péprun tiarmai “Numí neren ti wakeruk súmauya nu yamaikia nuí atsawai. Ashí ni kuítrísha tura ashí ni péñkerísha tuke penké amuukayi.” Tu tiarmai.

¹⁵ Ashí nuna súrin armia nu, nuna surukar kuítrintin ajasaru ásar, ti wáitsamun ashamkar arant wajasar eáartatui. ¹⁶ Túrawar tiartatui “Maa, uunt pépruítat ti wáitnenmai ajakai. Nuwa ti péñker iwiarmampra áinis nuyá shuar akuptai tarachin yamakaijjajai kapaaku entsarmi. Kuríjjajisha kaya ti shíirmachíjjajisha tura ti péñker sháukjajisha ti shiir iwiarmampraruyi. ¹⁷ Ti wárik ashí jú kuit amukaiti.” Tu tiarmai.

Ashí uunt kanú kapitíántrísha, ashí nayaantsanam katiinia nusha, ashí kanú wiánniusha, tura ashí kanú nérennurísha árantak wajasarmai. ¹⁸ Tura pepru esaak múkuint ajan wáinkiar ti kakantar úutainiak tiarmai “Timiá shiir pepru atsuwiti.” ¹⁹ Tiar ti kuntuts pujuiniak awatmamar kakantar úutainiak tiarmai “Maa, ti uunt pépruítat ti wáitnenmai ajakai. Ashí uunt kanu nérentin nayaantsanam níjjajai takasar kuítrintin ajasarmai. Tura ti wárik mash emesnarai.” Tu tiarmai.

²⁰ Antsu nayaimpiniam pujarumna nu, ashí Yus akatramutirmesha, ashí Yusna etserniutirmesha, tura ashí Yus-shuar árumna nu ni wáitsamujai warastarum. Nu wáitsamujai atumin yajauch awajtamsamarmena nuna yapajtiurmakurme.

²¹ Nuyá ti kakaram nayaimpinmaya suntar ti uunt neketai kayan juki nayaantsanam ajuñ timiai “Júnisan uunt pepru Papirúnia emesnar atakka wainniakchatin tuke meñkakattawai. ²² Tura atakka jantsemma piñkiuisha tampursha shakapsha antunkashtatui. Nu arantcha nuñkia shuar penké takakmaschartatui. Túramtai nekeamusha antunkashtatui. Ashí mitia átatui. ²³ Shiripkincha ekeemakchartatui. Nuatma nampersha antunkashtatui. Nuikkia ni shuari súrín arma nu ashí nunkanam nankaamantu armai. Tura ashí nunkanaya shuaran waweatniua áintsan níiya núnis ajasarat tusa anañkawarmai. Túrashá núnisan ti kakarmaitiat ju маш túrunayi.” Tu timiai.

²⁴ Kame ni akupkamujai péñker shuar ti mantamnewaru asamtai nu péprunam ashí yaunchu Yusna etserniu numpesha, ashí Yus-shuara numpesha tura péñker shuar ashí nunkanam maamu ainia nuna numpesha nu paant wáinkiamniaiti.

19

¹ Nuyá nayaimpinmaya ti untsurí aents kakantar untsumainian antukmajai.

“Ju ti shiir enentáimtumainti. Yuska uwempratniuncha, nekas shiir átinniasha, nankaamaku átinniasha, tura ashí kakarmancha nekas nérenniuiti. ² Niisha aya nekas péñker túratniua nuna túrin asa ti nukap tsanirmaun ashí shuaran tsanirijjai utsuun ti asutiáyi. Nin ti wáitkias ashí ni shuari máawarman yapájmiátkaiti” tiarmai.

³ Ataksha kakantar untsumainiak tiarmai:

“Ti shiiraiti. Nii wáitsatin ji esaak tuke kajintsuk múkuint ajawai.” Tu tiarmai.

⁴ Tuíniakui paintikuatru uunta nu tura kuaru tanqusha nunká piniakumawar akupin pujutainium Yus pujana nuna shiir awajsarmai. Túrawar “Imiá nekasaiti. Ti shiir túriniaitme” tiarmai. ⁵ Akupin pujutainmaya chícham jíinkimiai.

“Yusna takarniutirmesha tura ni umirniutirmesha, úuntaitkiurmesha úchitkiurmesha kapitiánitkiurmesha péejchachitkiurmesha, ii Yusri tuke shiir awajsatarum.” Tu timiai.

Murik nuatnaikiatin namperi

⁶ Nuyá ti untsurí aents chichainiak kanusa uuntri nujanrak téter ajá núnisan antukmajai. Ti kakaram ipiamta núnis amai.

“Tí shiiraiti, tiarmai. Ii Uuntri Yus ashí tujincha asa ashí akupkatniun nankaamayi. ⁷ Tuma asamtai shiir enentáimsartai. Murikiu anajmarmari shiir iwiarnarmatai ni nuatnaikiatin tsawantri jeayi. Tuma asamtai ti shiir warasar nincha shiir awajsatai. ⁸ Murikiu anajmarmarinkia iwiarnarti tusa ti shiir pushi sunasmai. Nusha yamaram máatrachu asa ti pújuiti.” Tu tiarmai.

Nu pushi Yus-shuar péñker túramun nakumeawai.

⁹ Nuyá nayaimpinmaya suntar turutmiai “Ju áatrarta: “Murik nuatma námpernam ipiaamu ainia nuka ti shiir warasarti.” Tu aartá, turutmiai. Juka Yus timia asa imiá nekasaiti.”

¹⁰ Takui nu suntaran shiir awajsataj tusan tikishmatramjai. Túramtai turutmiai “Penke áinkiaip. Wisha Yusa yáinrintjai ámijjai métek tura yatsumjai métek Kristu nekas chichamen tuke umirin ainia nu. Yúsak shiir awajsatniuiti.” Tu turutmiai.

Kame Kristu imiá nekas timia nuna ashí Yúsnan etserainia nú shuar paant awajkartin áiniawai.

Kaway pújunam eketna nu

¹¹ Nuyá nayaimp uranniun wainkiamjai. Nuĵ kaway puju wantinkiamai. Nu kawaynum ekeama nuna naarĵ Ti Penker Umin tutajyi. Núnisanĵ Ti Nekas Turin tutajyi. Ti penker Akupin asa aya nekas penker túrak mesetan najanaiti. ¹²⁻¹³ Ni ĵiisha ĵijjai métek keeáarmai. Múuknumsha akuptai tawaspan untsurĵ etsenkrakuyi. Nuĵ ni naarĵ Yus Chicham áarmauyi. Túrasha tana nuna Niŋki takamtsuk nekaamai. Numpajai enĵerman entsaruyi. ¹⁴ Ti untsurĵ nayaimpinmayaĵ suntar mesetnum weena áintsar kawainium ekemkar ti shiir pújun entsaru Nin nemariarmai. ¹⁵ Nu suntara Uuntrĵ weneĵya, ashí nunĵanmayaĵ yajauch shuaran máatin, puniá mai ere tsakatskatin ĵiinmiai. Tura ĵirujai asutiátniua áintsanĵ ti kakaram akupkattawai. Túrak Ashí Tujincha Yusa kajetairĵ ti kakarma nuĵai shuáran asutiáttawai. Uwa nekenkar ĵiĵuratniua áitkiasanĵ wáitkiasartatui. ¹⁶ Ni pushirĵincha makuĵincha ni naarĵ áarmauyi: Ashí Akupniun Akupin tura Ashí Uunta Uuntrĵ.

¹⁷ Nuyá tsawái-nantunam suntaran eketun wainkiamjai. Nusha nayaimpiniam nanamtin nanamainian kakantar untsuak timiai “Yusa uunt namperĵin yurumáitiarum. ¹⁸ Akupniun namaŋkésĵha yuítiarum. Suntara kapitántri namaŋkésĵha, kakaram suntara namaŋkésĵha, kaway namaŋkésĵha tura eketainia nuna namaŋkésĵha, kame ashí shuara namaŋkésĵha nanĵkaamantu ainia núnasha tura penké shuar ainia núnasha yuítiarum.” Tu untsukmai.

¹⁹ Tura nuyá Entsayaĵ Yajasmancha tura ĵú nunĵanam akupin ainia nunasha ashí ni suntarĵijjai wainkiamjai. Niisha kawainium eketka nuĵai tura nuna suntarĵijjai mesetan najanatai tusar iruntrarmai. ²⁰ Tura nu mesetnum Yajasmasha tura Kukariĵ Yajasmasha, penké ántar yúsnan etserniua nu, mai achinkiarmai. Nuikkia Entsayaĵ Yajasma ni kakarmarĵin súam nu Kukariĵ Yajasmaka aents tujintiamun ti turak shuáran anaŋkawarmai. Túramtai nu shuar Entsayaĵ Yajasma náarin apujmamsar ni nakumkamurĵin shiir awajсарmai. Tuma asamtai Entsayaĵ Yajasmancha tura Kukariĵ Yajasmancha íwiakuk asuprijjai ti kea nu ĵi-antumiannum apeáwarmai. ²¹ Chíkichka kawainium eketkanumiĵ puniá tsakatskatin weneĵya ĵiinmia nuĵai mantamnawarmai. Túramtai nanamtin ni ayashĵin yuawar eĵemakarmai.

20

Kristu mir uwiĵú nunĵanam akupkattawai

¹ Nuyá nayaimpinmayaĵ suntar táarun wainkiamjai. Nusha náŋkatkachu waa yawirĵin tura ĵinĵiatai ĵirun kampurman takakuyi. ² Nu suntarsha Ti Kajeŋ Yajasma ĵiru kampurmajai ĵinĵiamai. Nu Yajasma iwianchi kapitántriĵ Satanás tutainti. Yáunchuyaĵ-napiti niisha. Tura nu iwianchin ĵinĵiá mir uwiĵú pujusat tusa ³ náŋkatkachu waaŋnam epenĵmiai. Tura waiti uraichminian anujtukmai. Mir uwiĵú nanĵkaamatsaiŋ ashí nunĵanmayaĵ

shuaran anaṅkawaraṅ tusa túramai. Antsu mir uwí naṅkaamasmatai ishichik tsawant aṅkant akupnaktiniaiti.

⁴⁻⁵ Nuyá akupin pujutainium pujuinian wainkiamjai. Tura shuara túramurṅ ṅsarat tusa kakaram sunasarmai. Tura núnisanṅ muuke tsupirka maamu wakanṅcha wainkiamjai. Nusha Yusa chichamen etserainiak tura Kristu chichamencha etserin ásar maamu armai. Niisha Entsayaṅ Yajasmaṅcha ni nakumkamurṅcha tikishmatracharu armai. Núnisanṅ náarṅcha nijiaṅniumsha tura uweṅnumsha anujmampracharu armai. Nu shuar ataksha nantakiar emka nantaktin tsawantnum pachiinkiarmai. Túmainiak Krístujai métek mir uwí akupeamun wainkiamjai. Antsu chíkich jákaruka mir uwí naṅkaamatsaṅ nantakcharmái. ⁶ Antsu emka nantaktin tsawantnum pachiinkiarua nú shuar, ti penker áimák, ti shiir warasmin áiniawai. Nu shuarka jimiará jákatniunam pachiintsuk Yusna tuke takarin tura núnisanṅ Krístunu tuke takarin ártatui. Tura Krístujai métek mir uwí akupkartatui.

⁷ Tura mir uwí naṅkaamasmatai uunt iwianch urani akupnaktatui. ⁸ Túram ashí nuṅkanmayaṅ shuáran anaṅkawartaj tusa jíinkittiwai. Kuk nuṅkanmasha tura Makuk nuṅkanmasha ashí pujuinia nuna anaṅkawartatui. Tura mesetan najanataj tusa ni suntarṅ nekapmarchamnia ti untsurṅ irurtatui. ⁹ Tura ashí nuṅkan enetak Yushuar matsamtaincha tura Yus ti aneamu pépruncha mash éṅkekarmai. Túramtai Yus nayaimpinmayaṅ jinia akuptuk mash áesawarmai. ¹⁰ Tura iwianchi kapitiántri, nin anaṅkawarmia nu, asupriṅjai keá ji-antumiannum apenámai. Nu yaunchusha Entsayaṅ Yajasmasha tura Kukariá Yajasmasha, penké ántar yusnar etserniua nu, nuṅ apenáwarmai. Nuṅsha tsawaiṅsha káshisha iniaṅnatsuk ti wáitsartatui.

Ashí amúamunam súmamtikiatin tsawant

¹¹ Nuyá akupin pujutain úuntan tura ti pújun wainkiamjai. Tura nuṅ pujancha wainkiamjai. Niisha ti kakaram asamtai nuṅkasha nayaimpisha aya menkarar tuke atsúarmai. ¹²⁻¹³ Tura túrunatsaṅ nayaantsanam jákarua nusha jíinkiarmai. Núnisanṅ iwiarsamunam jaka pujuinia nusha jíinkiarmai. Tura jákaruncha, naṅkaamantu arma nunasha tura penké shuar arma nunasha, ashí wainkiamjai. Tura Yusaṅ naka wajaarmai. Nuyá ashí shuar túramu aakma papí urantrarmai. Tura nu papinium aarma nujai métek ashí ni turamurṅ paant nékaneakui súmamtiknawarmai. Tura chíkich papisha tuke iwiaaku pujustin papí urankamai. ¹⁴ Nuyá jákatin amuukati tusa ji-antumiannum apenámai. Nu ji-antumiannum wétin jimiará jákatin tútainti. ¹⁵ Tura ashí shuar ni naariṅ tuke iwiaaku pujustin papinium atsúarma nusha nuṅ apenáwarmai.

21

Nayaim yamaran tura yamá nuṅka

¹ Nuyá nayaimpisha tura nuṅkasha menkaramtai nayaim yamaran tura yamá nuṅkancha wainkiamjai. Tura nayaantsasha atsumai. ² Wi, Juan, ti shiir péprun, Yusunmiaṅ yamaran Jerusarénkan nayaimpinmayaṅ táarun, wainkiamjai. Anajmaria ni áishriṅ inṅiuntaj tusa ti shiir iwiarmampra áintsṅ ti penker iwiaramuyi. ³ Nayaimpinmayaṅ ti kakantar chichaamun antukmajai. “Íisiá, Yus yamaikia aentsjaiṅ pujawai. Tuke niijjaiṅ pujakuí ashí ni shuariṅ ártatui. Tura niijjaiṅ tuke pujak nekas tuke ni Yusriṅ ártatui. ⁴ Yus ni

neajkin ujujturartatui. Tura nuik amia nuka ashí amuukarmatai jákatniusha, úuttincha, wáitsatniusha, tura najaimiatniusha atsuttawai.”

⁵ Tura akupin pujutainium ekema nu “Iistá, Wi ashí penké yamarman nájanjai” timiai. Nuyá nu arantcha turutmiai “Juka imiá nekas asantai aartá. Nekas enentáimtustiniaiti.” ⁶ Ataksha turutmiai “Yamaikia mash uminkiyai. Wiitjai. Yámankraitaiknumiá amúanmasha tuke pujuwitjai. Wisha A rétranmayá Y rétranam ashí retra áintsaitjai. Ashí kitiama núnaka tuke iwiaaku pujutai entsan penké kuitchajai áartatjai. ⁷ Nupetmakunka ashí yamarma juna mash susattajai. Wisha ni Yusrj átatjai. Núnisan niisha winia uchir átatui. ⁸ Antsu sápijkia, Yúsan enentáimtichusha, yajauchin máatrasha, maṅkartincha, tsanirmatan pujurniusha, wawekratniusha, ántar-yusan tikishmatniusha, tura ashí wáitrincha asuprijjai keá ji-antumiannum apenáwartatui. Nuka jimiará jákatin tútainti.”

Yamaram Jerusarén

⁹ Nuyá siati suntar pinij amúamunam wáitkiastinjai piakun takakua nuyá chikichik taruti túrutmiai “Winitia. Murikiu anajmarmarín iniaktustatjame.” ¹⁰ Taku mesekranam naint yakí juruki Yusanumia ti shiir Jerusarén pepru nayaimpinmaya táarun iniaktursamai. ¹¹ Nu péprusha Yusa wincharijjai tsáapniniuyi. Nu tsáapnincha kaya ti shíirmachia núnis jaspi kaya nuni saar asa ti tsáapniniuyi. ¹² Pepru yantamesha ti yakí péṅkramuyi tura wáitirij tuse amai. Tura nu wáitinium suntar wajatiarmai. Nu wáitinmasha Israer-shuara uuntri tuse armia nuna naari áarmauyi. ¹³ Nantu tátainmaani menaintiu waiti amai. Nantu akatainmaanisha menaintiu waiti amai. Nunkaanisha menaintiu waiti amai. Arakaanisha menaintiu waiti amai. ¹⁴ Ti uunt kaya tuse apujsamu armai. Tura nuj ekenir péṅkramuyi. Nu tuse kayanam Murikiu akatramurij tuse armia nuna naari áarmauyi.

¹⁵ Suntar wijjai chichaua nu, nekapmatain kurin takakuyi. Nujai pépruncha, wáitirincha, tura péṅkramurincha nekapmartiniuyi. ¹⁶ Pepru esantisha waṅkantisha yakirisha mash métékak armai. Suntarsha péprun nekapmataijjai nekapmaram esantisha waṅkantisha tura núnisan jeamkamu yakirisha jimiará mir jimiará siantu (2.200) kirúmitru amai. ¹⁷ Nuyá péṅkrincha nekapmarmai. Suntar aents nekapmataijjai nekapmaram sesentikuatru (64) mitru amai. ¹⁸ Nu péṅkramusha jaspi kayajai najanamuyi. Péprusha aya kúrikiiyi. Nu kuri ti penker sáaraui. ¹⁹ Pen apujtukma kayasha ti shiir kaya ainia nujai najanamu asa ti shiir iwiaramuyi. Emka nu jaspi káyauyi. Jímiara nusha sapiru káyauyi. Menaintiu nusha ákata káyauyi. Kuatrua nusha ismirártaui. ²⁰ Senkua nusha únise káyauyi. Saisa nusha kurnarinia káyauyi. Siatia nusha krisuritiu káyauyi. Uchua nusha periru káyauyi. Nuiwia nusha tupasiu káyauyi. Tiasa nusha krisuprasa káyauyi. Áuntsea nusha jasentu káyauyi. Tusea nusha amatista káyauyi. Ti kayaim apujsamu asantai ti shíirmachiiyi. ²¹ Pepru wáitirij tuse ainia nu, ti shiir nayaantsanmaya shaukjai chikichik najanamu armai. Pepru jintisha aya kúrikiiyi. Nu kuri ti penker sáaraui.

²² Yusa Uunt Jeencha wainkiachmajai. Antsu nu peprunam Uunt Yus ashí tujincha nu tura núnisan Muriksha nu péprun pímiutkui takamtsuk Níiniuyi. ²³ Nu péprunmasha tsawai-nantusha kashí-nantusha atsumchamai. Antsu Yusa wincharij tsáapin awajmiai. Núnisan Muriksha tsáapin awajmiai. ²⁴ Nu tsáapnijjaisha ashí nunkanmayá shuar wekasartatui. Tura

ashí nunġkanam akupin ainia nusha nuġ yujainiak ni pēnkerġġġai nuna shiir awajtuiniawai. ²⁵ Tura kashi atsá asamtai tuke tsawaiti. Tuma asamtai wáitiri tuke epenchamu ártatui. ²⁶ Tura ashí nunġkanam pēnker ana nuna nuġ itiaartatui. ²⁷ Tura yajauchikia pēnké wayaġhatatui. Muġġmiainian túrincha tura ananġkartincha pēnké wayaġchartatui. Antsu áyatik shuar tuke iwiaaku pujutai papinium naarġ aarma ainia nuke wayaġwartatui. Nu papincha Murik takakui.

22

¹ Nuyá suntar tuke iwiaaku pujutai entsan ti sáaran iniaktursamai. Nusha uunt akupin pujutainmaya ti saawi ġinmiái. Nu pujutaisha Yusna tura Muriknauyi. ² Pepru ġintincha tura entsá mai paen tuke iwiaaku pujutai numi wajamai. Nusha ashí tuse nantutin neremai. Ni nukēsha ashí nunġkanmaya shuar tsuámatainti. ³⁻⁴ Ashí yajauchia nuka atsuttawai. Uunt akupin pujutai, Yúsnasha Murikniasha, nuġ aa asamtai ni shuarġ ti paant wainiainiak tikishmatrartatui. Tura niġġaincha ni naarġ anujmamkartatui. ⁵ Tura káshisha atsuttawai. Nuġ puġuinia nuka shiripkincha etsancha atsumchartatui. Uunt Yúsak tuke tsáapin awajtiatui. Tura ni shuarġ tuke inianġnatsuk akupkartatui.

Jesukrístu tátintri pēnké nuntumsai

⁶ Nuyá suntar turutmiai “Ĵu chicham ti nekas asa nekas enentáimtusminiati. Uunt Yus yaunchu níniun etserniun ni chichamen enentáimtikramia núnisan yamaikia ni suntarġn akuptuk wárik túrunatta nuna ashí ni shuarġn ujakuiti.”

⁷ “Ti wárik winittiaġai” tawai Murikkia.

Shuar ġu papinium Yusa Chichame áarman umirna nuka shiir warasmini-aiti.

⁸ Wi, Juan, ġuna mash ísan mash antukmajai. Tura mash ísan antukan nayaimpinmaya suntar iniaktursama nuna shiir awajsataġ tusan tikishmatramġai. ⁹ Túram turutmiai “Pēnke áinkiaip. Wisha Yusa yáintriġntġai ámiġġġai métek tura yatsumġġġai métek. Yúsnan etserin ásar tura ġu papinium áarma nuna umirainiak Yusa yáintri áiniawai níisha. Yúsak shiir awajsatniuiti.”

¹⁰ Nuyá ataksha turutmiai “Ĵu papinium aarma Yusna asamtai úġkam ikiusaip. Ashí túrunatin tsawant ishichik ajatesai. ¹¹ Nu jeatsainġkia ya-jauch shuarka tuke yajauch túruki wetí. Núnisan muġġmiainian túraka tuke túruki wetí. Antsu pēnkeran túraka pēnkeran túruki wetí. Núnisan esetar enentáimniusha tuke esetar Yusġġai wekasati.”

¹² Muriksha tawai “Eta, ti wárik winittiaġai. Túran ti shírmachin ashí pēnker túramuġġai métek súsatniua nuna takukin winittiaġai. ¹³ Wiitġai. Yámankamtaiknumiġ amúanmasha tuke puġuwitġai. Wisha A rétranmaya Y rétranam ashí retra áintsaitġai.” Tu tawai.

¹⁴ Ni pushiri pēnker niġiamatniua núnisan pēnker túrinia nú shuar shiir warasminiati. Nu shuar nu pepru wáitirincha wayamniati. Túrar tuke iwiaaku pujutai numinmaya yuamniati. ¹⁵ Tura antsu Yúsan enentáimtachuka, wawekratniuka, tsanirmatan pujurainia nuka, manġkartinkia, ántar-yus tikishmatniuka, tura ashí shuar wáitian wararainiak tuke túrin ainia nuka aġ matsatainiak pēnké wayaġchmin áiniawai.

¹⁶ “Wi, Jesus, ashí Yus-shuaran ujakarát tusan winia suntarun akupkajai. Wikia Tawit Weeitjai. Túrasha Tawitia Úuntrintjai. Wikia ti tsáapin yaa, yáñkuamia áintsanketjai.” Tu tawai.

¹⁷ Yusa Shiir Wakanjsha tura Murik anajmarmasha “Winitiarum” tuini-awai.

Tura juna ántana nusha “Winitiarum” tití. Tura ashí kitiama nuka winití. Wakerakka tuke iwiaaku pujutai entsan penké kuitchajai umartí.

¹⁸ Ashí shuar ju papinium Yus-Chicham aarma nuna antukarun juna ujaajai: Shuar ju áarman chikichan pataakka Yus nin ti wáitsatin ju aarma nuna patattsattawai. ¹⁹ Núnisañ shuar ju aarman emeneakuñkia Yus ni naarin iwiaaku pujutai papiniumiá japirattawai. Tura ti shiir péprunam wayatniun suritkiattawai. Nu péprusha tura nu papisha ju paant ujakma áiniawai.

²⁰ Jú papí áantratniun ujakua nu tawai “Eta, ti wari winittiajai.” Pai, núnisañ atí. Wari winitia, Uunt Jesúsá.

²¹ Ii Uuntrj Jesukrístu atumniasha shiir yainmakarti. Nuke atí.